


भड्लार्ड बाइबलि



The Holy Bible in the Bhadrawahi Language (bhd) of India

भइलाई बाइबिल

The Holy Bible in the Bhadrawahi Language (bhd) of India

Copyright © 2020 The Love Fellowship

Language: भदरवाही (Bhadrawahi)

Contributor: The Love Fellowship

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word.

See Revelation 22:18-19.

2023-04-06

PDF generated using Haiola and XeLaTeX on 15 Sep 2023 from source files dated 7 Apr 2023

7f6d55d1-b322-5b69-99bd-e0641d0d9871

Contents

मत्ती	1
मरकुस	41
लूका	72
यूहन्ना	114
प्रेरितां	143
रोमियो	181
1 कुरिन्थियो	198
2 कुरिन्थियो	215
गलातियो	226
इफिसियो	232
फिलिप्पियो	238
कुलुस्सियो	242
1 थिस्सलुनीकियो	246
2 थिस्सलुनीकियो	250
1 तीमुथियुस	253
2 तीमुथियुस	258
तीतुस	262
फिलेमोन	265
इब्रानियो	267
याकूब	280
1 पतरस	284
2 पतरस	290
1 यूहन्ना	294
2 यूहन्ना	298
3 यूहन्ना	299
यहूदा	300
प्रकाशित	302

मत्ती

११११ १११११११ ११११११११
(११११ ३:२३-३८)

१ अब्राहमेरी औलादी मरां दाऊद राजो थियो, दाऊद राजेरे औलादी मरां यीशु मसीह थियो। यीशु मसीहेरे दादे-पडदादां केरां नंवां इना आन। २ अब्राहमेरू मट्टू इसहाक थियूं, इसहाकेरू याकूब, याकूबेरां मट्टां यहूदा ते तैसेरे ढला थिये। ३ यहूदा ते तामारेरां मट्टां पेरेस ते जेरह थियां, पेरेसेरू मट्टू हेसरोन, हेसरोनेरू एराम, ४ ते एरामेरू अम्मीनादाब, अम्मीनादाबेरू नहशोन, नहशोनेरू सलमोन, ५ ते सलमोन ते तैसेरी कुआन्श राहाबेरू मट्टू बोआज थियूं, ते बोआज ते तैसेरी कुआन्श रूतरू ओबेद, ओबेदेरू यिशै, ६ ते यिशैरू मट्टू दाऊद राजो थियो, दाऊद राजेरू मट्टू सुलैमान तैस कुआन्शी सेइं पैदा भोव, जै पेइली ऊरिय्याहरी कुआन्श थी। ७ सुलैमानेरू रहबाम, रहबामेरू अबिय्याह, अबिय्याहेरू आसा, ८ ते आसारू यहोशाफात, यहोशाफातेरू योराम, ते योरामेरे खानदानेरे मरां उज्जियाह पैदा भोव। ९ उज्जियाहरू योताम, योतामेरू आहाज, आहाजेरू हिजकिय्याह, १० ते हिजकिय्याहेरू मनश्शे, मनश्शेरू आमोन, आमोनेरू मट्टू योशिय्याह थियूं ११ ते योशिय्याहेरां पोद्लडां यकुन्याह ते तैसेरे ढला थिये, जैना गिरफ्तार भोइतां बाबेलेरी गुलैमी मां गानेरे वक्ते मां जर्मोरां थियां।

१२ गिरफ्तार भोइतां बाबेलेरी गुलैमी मां गानेरे पत्ती यकुन्याहेरू शालतियेल ते शालतियेलेरू जरुब्बाबेल, १३ ते जरुब्बाबेलेरू अबीहूद, अबीहूदेरू एलयाकीम, एलयाकीमेरू अजोर, १४ ते अजोरेरू सादोक, सादोकेरू अखीम, अखीमेरू एलीहूद १५ ते एलीहूदेरू एलीआजर, एलीआजारेरू मत्तान, मत्तानेरू याकूब, १६ ते याकूबेरू यूसुफ, ते यूसुफ मरियमरो मुन्श थियो, ते मरियमरू मट्टू यीशु आए, जैस जो मसीह ज़ोतन।

१७ एन्चरे अब्राहमे करां दाऊद राजे तगर च़ेवधे पीड़ी भोइ, ते दाऊद राजे करां यहूदी केरे गिरफ्तार भोइतां बाबेलेरी गुलैमी मां गाने तगर च़ेवधे पीड़ी भोइ, ते गिरफ्तार भोइतां बाबेले मां गाने करां देइतां यीशु मसीह तगर च़ेवधे पीड़ी भोइ।

१११११११ ११११११
(११११ १:२६-३८; २:१-७)

१८ यीशु मसीहेरू ज़र्म एन्चरे सेइं भोवं, कि ज़ैखन तैसेरी अम्मा मरियमरी कुडमाइ यूसुफ नंवे एक्की मैन्हु सेइं भोरी थी, त तैन केरे इला भोने करां पेइले मरियम पवित्तर आत्मारें शेक्ति सेइं दोज्जींती भोइ। १९ तैसारो मुन्श यूसुफ ज़ै धर्मी मैन्हु थियो, तै तैस बदनाम केरनि न थियो चातो। तैनी चुपच़ारे इन सोचू, कि मीं एस सेइं इला नई बनानो। २० हेजू तै एन सोचने लोरो थियो, त प्रभुएरे एक्की स्वर्गदूते तैस सेइं सुपने मां एइतां ज़ोवं, “हे यूसुफ! तू ज़ै दाऊदेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारे पेटे मां आए तैन पवित्तर आत्मारें तरफां आए। २१ तैस मट्टू भोनूए, ते तू तैसेरू नवं ‘यीशु’ रेखां, किजोकि तैए अपने लोकन तैन केरे पापन करां मुक्ति देलो।”

२२ एन सब किछ एल्हेरेलेइ भोवं, कि ज़ैना वचन प्रभुए यशायाह नेबेरे ज़िरिये ज़ोरे थिये पूरे भोए कि, २३ “हेरा, अक अइलाई कुई पेटे भारी भोली, ते तैस अक मट्टू भोलू, ते लोक तैस जो इम्मानुएल ज़ोले” ज़ेसेरो मतलब ई आए, परमेशर असन सेइं साथी आए। २४ तैखन यूसुफ निडलारां बींझो त तैनी परमेशेरे स्वर्गदूतेरू ज़ोनू मन्नु, ते मरियमी सेइं इला बनाव ते अपने घरे आनी। २५ पन ज़ांतगर तैस मट्टू न भोवं तांतगर तै तैस सेइं साथी न झुल्लो ते ज़ैखन तैस मट्टू भोवं त यूसुफे तैस मट्टेरू नवं यीशु रख्वू।

२

१११११११ १११११११ ११११११११११ ११११११ ११११११ ११११ ११११११ १११११११

१ हेरोदेस राजेरे ज़माने मां ज़ेइस यहूदिया इलाकेरे बैतलहम नगरे मां यीशु पैदा भोव, त पूर्बेरां किछ जोष्टी लोक यरूशलम नगरे मां आए। २ ते तैना लोकन पुच्छने लगगे, “यहूदी लोकां केरो राजो ज़ै ज़र्मोरोए तै कोडि आए? किजोकि असेईं पूरबे मां तैसेरो तारो लोरोए, ते आस तैस कां मथ्यो टेकने ओरेम।”

3 जैखन हेरोदेस राजे ए गल शुनी, त हेरोदेस राजो ते कने यरूशलेम नगरेरे सारे लोक घबराए। 4 ते हेरोदेस, यहूदी लोकां केरे प्रधान याजक ते शास्त्री लोक अकोट्टे केरतां तैन पुच्छने लगो, “मसीह कोडि पैदा भोरो लोडे?” 5 तैनेई तैस सेइ ज़ोवं, “यहूदिया इलाकेरे बैतलहम नगरे मां,” किजोकि (बड़े पेइले) मीका नेबे एन्चरे लिखोरूए, कि परमेशरे ज़ोवं,

6 “हे बैतलहम नगर, तू जैन यहूदिया इलाके मां आस, यहूदियारे इलाकन मां तू बडू खास नगर आस, किजोकि तीं मरां अक एरो हाकिम निसेलो जै मेरे लोक इस्राएलेरी रखवाली केरेलो” 7 जैखन हेरोदेस राजे एन शुनू, त तैनी जोष्टी चुपचारे कुजेइतां तैन करां तारो निसनेरे ठीक वक्तेरे बारे मां पतो कियो। 8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चेरे बारे मां रोडेचारे पतो केरा ते जैखन तुसन पतो लगगे, त (वापस एइतां) मीं भी पतो देइयथ ताके अवं भी तैस कां गेइतां मथ्यो टेकी।”

9 तैना जोष्टी (हेरोदेस) राजेरी गल शुन्तां (यरूशलेम नगरेरां) चले जे। ते अकदम तै तारो, जै तैनेई पूरबे मां लोरो थियो, तैन अग्री-अग्री चलो ते तैस घरेरे बा रूको जैडी तैन मट्टू थियू। 10 जैखन तैनेई तै तारो लव, त तैना बड़े खुश भोए। 11 तैखन तैना घरे अन्तर जे ते तैन मट्टू तैसेरी अम्मा मरियमी कां लाव ते तैस मट्टे कां मथ्यो टेकी। तैखन तैनेई अपने-अपने खजानेरे झोले खोलतां सोन्नु, लोबान ते मुर तैस कां च़ादू।

12 जोष्टी केरे तैट्टां निसनेरां पत्ती, तैन सुपने मां ए बिस्तार मैल्लो कि वापस हेरोदेसे कां न गेइयथ। एल्हेरेलेइ तैना वापस कोन्वी होरि बत्तां अपने मुलखे जो चले जे।

१२२२२२ २ २२२२२२ २२२२२ २२२२२२२ २२२२२ २२२२ २२२२२२ २२२२२ २२२२२ २२ २२२२२

13 जोष्टी केरे गानेरां पत्ती, अचानक प्रभुएरो अक स्वर्गदूत यूसुफे सुपने मां मैल्लो ते ज़ोने लगो, “उठ, बच्चो ते तैसेरी अम्मा नेइतां मिस्र मुलखे जो नशश। ते मेरे ज़ोने तगर तैडी रेइयां, किजोकि हेरोदेस राजो बच्चे तोप्तां मारने चाते।” 14 यूसुफ निडलारां उठो ते मट्टू ते तैसेरी अम्मा साथी नेइतां रातो-रात मिस्र मुलखे जो चलो जेव। 15 हेरोदेसेरे मरने तगर यूसुफ तैडी राव, ताके प्रभुएरू तैन वचन पूरू भोए, जैन होशे नेबे लिखोरू थियू, “मीं मिस्र मुलखे मरां अपनू मट्टू कुजाव।”

१२२२२२२२ २२२२ २२२२२२२२ २२२२२ २२२२२२

16 जैखन हेरोदेसे जोष्टी केरे धोखे बैजरो पतो लगो, त तैस बड़ी सरक आई। तैनी अपने मैन्हु भेजतां, जैन गल्लां केरो पतो तैस जोष्टन करां मैल्लोरो थियो, तैनी बैतलहम नगरे ते तैसेरे आसेपासेरे इलाकन मां सिपाही भेजतां सारां मट्टां, जैना दूई सालां केरां या दूई सालन करां निकड़ां थियां मारां। 17 जैखन एन भोव, त तैखन तैन वचन पूरू भोवं, जैन यिर्मयाह नेबे ज़ोरू थियू। तैनी ज़ोवं,

18 “रामाह नगर मां बेडि लेरां ते मातमेरि आवाज शुनोई, राहेल अपने बच्चां केरे लेइ लेरां देने लोरी, तैसारो दिल ठंडो न भोए, किजोकि तैसेरे बच्चे मेरि जोरन।”

१२२२२२ २ २२२२२२२ २२२२२ २२२२२२ २२२२२ २२२२ २२२२ २२२२ २२२२२

19 हेरोदेसेरी मौतारां पत्ती, जैखन यूसुफ मिस्र मुलखे मां थियो, त अचानक प्रभुएरो स्वर्गदूत तैस सुपने मां लेइहोव ते तैस सेइ ज़ोने लगो, 20 “उठ, बच्चो ते कने तैसेरी अम्मा साथी नेइतां इस्राएल मुलखे जो वापस चलो गा, किजोकि जैना लोक बच्चे मारने चाते थिये, तैना मेरि जोरेन।” 21 फिरी यूसुफ निडलारां बींझो, ते बच्चो ते तैसेरी अम्मा साथी एन्तां इस्राएल मुलखे जो वापस अव। 22 पन जैखन यूसुफ एन शुनू कि अरखिलाउस अपने बाजी हेरोदेसेरी ठैरी यहूदिया इलाके पुड़ राज करने लगगोरो, त तै तैडी गाने करां डरो। एल्हेरेलेइ जैखन यूसुफे सुपने मां परमेशरेरो बिस्तार मैल्लो, त तै गलील इलाके जो चलो जेव। 23 ते तैडी पुजतां तै नासरत नंब्वेरे नगर मां राने लगो, ताके तैन वचन पूरू भोए, जैन परमेशरे अपने नेबी केरे ज़िरिये ज़ोरो थियू। तैनेई ज़ोवं, “तैस जो नासरी ज़ोले।”

3

१२२२२२२२ २२२२२२२२२ २२२२२२२२२ २२२२२२२२ २२२ २२२२ २२२२२२ २२२२२२२
(२२२२२२ 1:1-8; २२२२२ 3:1-18; २२२२२२२२ 1:6-8,15-34)

1 तैन दिहाइन मां यूहन्ना नंवेरो मैन्हु, जै बपतिस्मो देनेबालो थियो, यहूदिया इलाकेरे सुनसान ठैरी मां अव । तै लोकन जैना तैस कां एइते थिये, तैन ई प्रचार केरतो थियो, 2 “अपने पापन करां मनफिराथ, किजोकि स्वर्गेरू राज नेडे ओरूए!” 3 ई तैए जेसरे बारे मां यशायाह नेबे एन ज़ोरू थियूं, “कोई सुनसान ठैरी मां लोकन, जैना तैस कां गातन, तैन उच्ची आवाजी सेइं ज़ोलो कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने तैसेरेलेइ सडकां सिद्धी केरा ।’ (यानी, प्रभुएरे लेइ तुस अपने दिल साफ केरा)”

4 यूहन्ना आम लिगड़ां लातो थियो जैना लिगड़ां ऊंटेरे बालन सेइं बनोरां थियां । तै अपनि कमरी पुड़ चमड़ेरू मज़ बंधतो थियो । ते तै टिट्टां त कने जंगलेरू माछी खातो थियो । 5 तैखन यरूशलेम नगरेरे बडे लोक ते यहूदिया इलाकेरे बडे लोक ते यरदन दरियारे आसे-पासेरे इलाकन मरां लोक यूहन्नारी गल्लां शुन्नेरे लेइ तैस कां एइते थिये । 6 ते तैनेई अपने पाप मेन्तां यूहन्ना करां यरदन दरियाए मां बपतिस्मो नीयो ।

7 पन जैखन तैनी हेरू कि बडे फरीसी ते सदूकी लोक बपतिस्मो नेनेरे लेइ तैस कां एजने लोरेन, त तैनी तैन सेइं ज़ोवं, “तुस जेहरीले सप्पेरे जेरे बुरे आथ! तुसन केनि ज़ोवं कि, एजनेबाले परमेशेरे कोपे करां नशशा? 8 सज़ाई करां बच्चनेरे लेइ तैना कम्मां केरा, जैन सेइं पतो लगगे तुसेईं सच्चे पापन करां मन फिरावरोए । 9 ते अपने-अपने दिले मां एन न सोचा कि ‘अब्राहम इशो बाजी आए’ (परमेशर तुशे पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ), किजोकि अवं तुसन सेइं ज़ोताई कि परमेशर इन घोड़न मरां भी अब्राहमेरे लेइ औलाद पैदा केरि सकते! 10 ते हुन्ना त बुट्टां केरे जीलन पुड़ परमेशेरो मैक्कु रख्वोरोए, एल्हेरेलेइ जै कोई तैस बुट्टेरो जेरो भोते, जै रोड़ो फल न दे, तै कटनोए ते अग्गी मां छडनोए । 11 अवं त तुसन पैनी सेइं बपतिस्मो देताई किजोकि तुसेईं मनफिरोरोए, पन मसीह जै मेरे बाद एजनेबालोए, तै मीं केरां भी महान आए । अवं त तैसेरो गुलाम भोनेरे काबल भी नई कि तैसेरे बूट छुई । तै तुसन पवित्र आत्माई सेइं ते अग्गी सेइं बपतिस्मो देलो (जैना मन फिरान, तैनन) । 12 तैसेरू छज्ज तैसेरे हथ्ये मां आए ते तै खलाइ रोड़ेचारे साफ केरेलो*, तै गेहुं अपने कोठारे मां रखेलो, पन झाझी तैस अग्गी मां फुकेलो जै कधे न हिशशे । (एल्हेरेलेइ पापन करां मनफिराथ नई त परमेशर तुसन सज़ा देलो)”

ⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂ ⓂⓂ, ⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂⓂⓂ
(ⓂⓂⓂⓂⓂⓂ 1:9-11; ⓂⓂⓂⓂⓂ 3:21-22; ⓂⓂⓂⓂⓂⓂⓂⓂ 1:31-34)

13 तैस मौके यीशु गलील इलाके मरां यरदन दरियारे बन्ने पुड़ यूहन्ना कां अव, ताके तैस करां बपतिस्मो ने । 14 पन यूहन्ना, यीशु जो इन ज़ोइतां रोकने लगो, “मीं तीं करां बपतिस्मो नीयोरो लोड़ते, फिरी किजो तू मीं करां बपतिस्मो नेने ओरोस?” 15 पन यीशुए तैस ई जुवाब दित्तो, “हुनी तू एन्चरे भोने दे, किजोकि †एन्चरे केरतां अस तैन केरतम जैन परमेशर चाते ।” तैखन यूहन्ना तैसेरी गल मन्नी । 16 ते यीशु जैखन बपतिस्मो नेइतां पैनी मरां बेइर अव, त तैस मौके हेरा अम्बर खुल्ली ज़ोवं । ते तैनी पवित्र आत्मा कबूतरेरी शकली मां एप्पू पुड़ एइती लाई । 17 ते तैखन हेरा अम्बरे मरां ए आवाज़ आई (त यीशुएरे बारे मां ज़ोवं), “एन मेरू ट्लारू मट्टू, अवं एस पुड़ बड़ो खुश आई ।”

4

ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ
(ⓂⓂⓂⓂⓂⓂ 1:12-13; ⓂⓂⓂⓂⓂ 4:1-13)

1 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी अज़मैइश केरे । 2 40 दिहाडे ते 40 रातन किछ न खानेरां पत्ती तैस दलुख लगगी । 3 त तैखन शैताने जैस जो अज़माने बालो भी ज़ोतन, तैस कां एइतां ज़ोवं, “अगर तू परमेशेरू मट्टू आस, त इन घोड़न जो हुक्म देइतां साबत केर, कि एना रोट्टी बनन् ताके तू खेइ सकस ।” 4 यीशुए तैस जुवाब दित्तो, “अवं न केरेलो किजोकि परमेशेरी किताबी मां लिखोरूए, भैन्हु सिर्फ रोट्टेइं सेइं ज़ीतो न राए,

* 3:12 3:12 मतलब, कि परमेशर सारे लोकन इन्साफ केरनेरे लेइ त कने जेन्चरे अक किसान गेहुं करां झाझ अलग केरते, तेन्चरे बुरे लोकन करां धर्मी लोकन अलग केरनेरे लेइ तियार आए । † 3:15 3:15 मूल भाषाई मां: ज़रूरी आए कि अस सारी धार्मिकता एन्चरे सेइं पूरी केरम

बल्के तै हर गल मन्ने सेइं ज़ींतो राते, ज़ै परमेशर ज़ोते।”

5 फिरी शैताने तै पवित्तर नगर यरूशलेमे मां नीयो ते मन्दरेरी उच्ची छम्पी पुड़ नेइतां खड़ो कियो। 6 तैखन तैनी यीशु सेइं ज़ोवं, “अगर तू हकीकत मां परमेशेरू मट्ठू आस त इट्ठां बिछड़तां साबत केर, किजोकि पवित्तरशास्त्रे मां लिखोरूए, तै तेरे लेइ अपने स्वर्गदूतन हुक्म देलो, ते तैना तीं अपने हथ्थन मां ट्ठाले, ताके तेरे पावन केन्ची घोड़न सेइं ठोकर न लगगे।” 7 यीशुए तैस सेइं ज़ोवं, “(नई, अवं छाल न मारेलो, किजोकि) परमेशेररी किताबी मां एन भी लिखोरूए, तू प्रभु अपने परमेशेर अज़मेइतां इन साबत केरनेरी कोशिश न केर कि तै अपने वादे पूरे करते या नई।”

8 तैखन शैताने, यीशु एक्की बड़े उच्चे पहाड़े पुड़ नीयो, ते तैड़ी दुनियारां सारां राज्जां ते तैन केरि धन दौलत तैस हिराई। 9 तैखन तैनी यीशु सेइं ज़ोवं, “अगर तू मीं कां मथ्यो टेकस ते मेरी आराधना केरस, त अवं इन सब किछ् तीं देलो।” 10 यीशुए तैस जो ज़ोवं, “हे शैतान! दूर भो, किजोकि परमेशेररी किताबी मां लिखोरूए, तू सिर्फ प्रभु अपने परमेशेर कां मथ्यो टेक ते तैसेरी आराधना केर!” 11 तैखन शैतान तैस करां चलो जेव, ते अकदम किछ् स्वर्गदूत यीशु कां एइतां तैसेरी सेवा केरने लगगे।

[\(मत्ती 1:14-15; मत्ती 4:14-15,31\)](#)

12 एक्सां केन्चे यीशु जो ज़ोवं, कि यूहन्ना ज़ै बपतिस्मो देनेबालो थियो, कैद कियोरूए त यीशु यहूदिया इलाकेरां, गलील इलाके मां वापस अव। 13 ते नासरत नगर शैरतां कफरनहूम नगरे मां राने लगगे, जैन समुन्दरेरे बन्ने पुड़ आए, ज़ैड़ी जबूलून ते कने नप्ताली गोदलेरे लोक राते थिये। 14 ताके तैन वचन जैन यशायाह नेबे ज़ोरू थियू पूरू भोए, तैनी ज़ोवं,

15 “ज़ैना लोक जबूलून ते नप्ताली गोत्रां केरे इलाके मां आन,

ज़ैना गलील समुन्दरेरे नेडे यरदन दरियारे उस पार, गलील इलाके मां आन, ज़ैड़ी गैर यहूदी लोक भी रातन,

16 (तैना लोक) ज़ैना पापेरे आंधरे मां बिश्शोरें, तैनेई बड्डी लौ लई। तै लौ तैन पुड़ चमकी ज़ैना हमेशारे मौतारे आंधरेरे मुलखे मां बिश्शोरें।”

17 तेइसेरू देंतू यीशुए परमेशेररी खबर लोकन शुनानेरी सेवा शुरू की। तैनी लोकन ज़ोवं, “अपने पापन करां मनफिराथ, किजोकि स्वर्गेरू राज़ नेडे ओरूए।”

[\(मत्ती 1:16-20; मत्ती 5:1-11; मत्ती 1:35-42\)](#)

18 एक्सां ज़ैखन यीशु गलील समुन्दरेरे बन्ने चलोरो थियो, त तैनी दूई मैन्हु लाए ज़ैना मेछली ट्लानेबाले थिये। तैना मेछली ट्लानेरे लेइ समुन्दरे मां ज़ाल छेड़डी राओरे थिये। तैन मरां एक्केरू नवं शमौन, ज़ैस जो पतरस भी ज़ोतन, ते तैसेरो ढला ज़ेसेरू नवं अन्दरयास थियूं। 19 यीशुए तैन सेइं ज़ोवं, “एज्जा मेरे चले बना। अवं तुसन शिखालेलो कि केन्चरां होरे मैन्हु मेरे चले बनानेन।” 20 तैना अकदम अपना ज़ालां छेड़तां यीशु पत्ती चले जे।

21 ते तैना तैट्ठां थोड़े ज़ेरे अगगर जे, त यीशुए होरे दूई ढला, यानी याकूब त कने तैसेरो ढला यूहन्ना अपने बाजी जब्दी सेइं साथी किशती मां लाए। तैना किशती मां ज़ालां ठीक केरने लगगोरे थिये। यीशुए तैना भी कुजाए (कि तैना तैसेरे चले बनन)। 22 ते तैना भी तैखने किशती ते अपने बाजी तैड़ी ज़ेरे छेड़तां यीशु सेइं साथी चले जे।

[\(मत्ती 6:17-19\)](#)

23 तैल्ला पत्ती, यीशु सारे गलील इलाके मां हंठतो फिरतो राव। तै तैन केरे प्रार्थना घरन मां लोकन शिक्षा देतो राव ते परमेशेररे राज्जेरी खुशखबरी शुनातो राव। ते तै लोकां केरि हर किसमेरी बिमैरी ते कमज़ोरी दूर केरतो राव। 24 यीशुएरे बारे मां ई खबर सारे सीरिया इलाके मां मुशूर भोइ जेई। एसेरे वजाई सेइं, ज़ैड़ी कोन्ची तै जेव, तैड़ी लोक सेब्भी बिमारन ज़ैना हर किसमेरी बिमैरी ते तकलीफन मां फसोरे थिये, ते ज़ैन लोकन पुड़ भूतां केरो सायो थियो, ते ज़ैना मिरगरे रोगी थिये, ते ज़ैना अधरंगेरे रोगी थिये, तैना यीशु कां आने ते यीशुए तैना सारे

बज्झाए। ²⁵ एसेरे वजाई सेइं मैन्हु केरि बड़ी भीड़ यीशु पत्ती चली। तैना लोक गलील, दिकापुलिस* इलाकां केरे, यरूशलेम नगरेरे, यहूदिया इलाकेरे, ते यरदन दरियारे पैरीं पारेरे इलाकां केरां ओरे थिये।

5

११११ ११११११ ११११ ११११ १११११ ११११

१ यीशु तैना हछे लोक लेइतां एक्की पहैड़ी पुड़ चलो जेव, ते जैखन तै शिखालनेरे लेइ बिशशो त तैसेरे चले तैस कां आए। ² तैखन यीशु तैन लोकन शिक्षा देने लगो,

११११११ १११ ११११ ११११ १११११
(११११ 6:20-23)

३ “परमेशर तैन लोकन बरकत देते, जैना ज्ञानतन कि तैन परमेशेरी जरूरते, किजोकि तै तैन पुड़ राज़ केरेलो।

४ परमेशर तैन लोकन बरकत देते, जैना दुखी आन, किजोकि परमेशर तैन तस्सली देलो।

५ परमेशर तैन लोकन बरकत देते जैना नम्र आन, किजोकि परमेशर तैन, तैना सैरी बरकतां देलो जैन केरो तैनी वादो कियोरोए।

६ परमेशर तैन लोकन बरकत देते, जैना परमेशेरी नज़री मां रोड़ी गल्लां केरनेरी बड़ी इच्छा रखतन, (जेन्चरे कोई ढलुखोरो खाने पीनेरी इच्छा रखते)

तैन परमेशर अपनि मेर्जी पुड़ चलनेरे लेइ शक्ति देते।

७ परमेशर तैन लोकन बरकत देते, जैना दया केरतन, किजोकि परमेशर भी तैन पुड़ दया केरेलो।

८ परमेशर तैन लोकन बरकत देते, जैन केरे मन साफ आन, किजोकि तैन परमेशर दर्शन देलो।

९ परमेशर तैन लोकन बरकत देते, जैना शैनतरां कम्मां केरतन, किजोकि तैन जो परमेशेरे बच्चे ज़ोले।

१० परमेशर तैन लोकन बरकत देते, जैना परमेशेरी नज़री मां रोड़ि गल्लां केरनेरे वजाई सेइं सताए गातन, किजोकि परमेशर तैन पुड़ राज़ केरते।”

११ “परमेशर तुसन बरकत देलो, जैखन लोक तुसन मेरे चेलो भोनेरे वाजाई सेइं तुशशी तुहीन केरन ते स्तान ते झूठ ज़ोइतां हर किसमेरी बुरी गल्लां तुशशे बारे मां ज़ोन। ^{१२} तैखन तुस खुशी रेइयथ ते मघन भोइयथ, किजोकि परमेशेरे जैन इनाम स्वर्गे मां तुशशे लेइ रखेरूए तैन बडू बडूए, किजोकि लोकेई बडे पेइले तैना नबी भी एन्चरे सतारे थिये।”

१११११११ ११११ ११ ११ ११११११ १११११ १११
(१११११ 9:50; ११११ 9:34-35)

१३ “तुस इस दुनियारे लोकां केरे लेइ लूनेरे ज़ेरे आथ, पन अगर लूनेरो स्वाद चेलि गाए, त फिरी दुबारां केन्चरे तैसेरो स्वाद वापस आनेले? फिरी तैन कोन्ची कम्मेरू न राए, सुवाए बेइरोवं शारनेरां ते लोकां केरे पांवेइं सेइं ढलेन्चोनेरां।”

१४ “तुस इस दुनियारे लोकां केरे लेइ लोअरे ज़ेरे आथ। जैन नगर पहाड़े पुड़ बसते तैन कधे भी छेप्पी न सके।

१५ लोक बलतो दीयो हेटी मां न रखन, पन तैस उच्चि ठैरी रखतन ताके घरेरे सैरी मैनन् लौ पुज्जे। ^{१६} ते एन्चरे तुशशी लौ मैन्हु केरे सामने एरी चमके, ताके तैना तुशशां रोड़ां कम्मां हेरतां तुशशे स्वर्गेरे बाजेरी तारीफ़ केरन।”

११११ ११११११ ११११११११ ११११११ ११११ १११११११ १११ १११

१७ “एन न बुझथ कि अवं मूसेरो कानून या नेबी केरे किताबन मां लिखोरी गल्लां रद केरने ओरोई। अवं तैन रद केरने नई बल्के पूरी केरने ओरोई। ^{१८} किजोकि अवं तुसन सेइं सत्र ज़ोताई, कि ज़ां तगर धरती त अम्बर खतम न भोए, तांतगर परमेशेरे कानूने मरां अक मात्रा या बिंदी भी न टलेली, ज़ां तगर सब किछ लिखेरू पूरू न भोए। ^{१९} एल्हेरेलेइ ज़ै कोई इन निकड़े करां निकड़े हुकमन मरां केन्ची एक्की ज़ेरे टलोइते ते होरन भी एन्ने केरन्

* 4:25 4:25 दिकापुलिस: इड़ी दिकापुलिसेरो मतलब दश नगर।

शिखालते, तै स्वर्गेरे राज्जे मां सेब्बन करां निकडो भोलो, पन जै तैन हुक्मन पुड अमल केरते ते होरन भी एन हुक्मन पुड चलनेरे बारे मां शिखालते त तै स्वर्गेरे राज्जे मां बडो भोलो। ²⁰ किजोकि अवं तुसन सेइं ज़ोताई कि ज़ां तगर तुस शास्त्री ते फरीसी लोकन करां रोडे चारे कानूने न मन्नेले, तांतगर तुस स्वर्गेरे राज्जे मां दाखल न भोइ सकतथ।”

॥२२२२ २२२२२२ २२ २२२२ २२२२२२२२ २२२२२ २२२२ २२२२२२२२ २२२२२॥

²¹ “तुसेईं शुनेरू थियूं कि परमेशरे इश्शे दादे-पडदादन सेइं ज़ोरू थियूं, ‘खून नईं केरनो, ते ज़ै खून केरेलो त तैस आदालत सज़ा देली।’ ²² पन मेरू ज़ोनू एने कि ज़ै कोई अपने ढलाए पुड क्रोध केरते, परमेशर तैसेरो इन्साफ केरेलो, ते ज़ै कोई अपने ढलाए जो निकम्मो ज़ोते त तैस भी महासभा मां जुवाब देनो पेनोए, ते ज़ै कोई अपने ढलाए जो ‘बेवकूफ’ ज़ोलो त परमेशर तैस नरकेरे अगारी सज़ा देलो। ²³ एल्हेरेलेइ अगर तू अपनि चढतल मन्दरे मां आनस, ते तैड़ी तीं याद एज्जे कि मीं अपने ढलाए सेइं किछ गिलोए। ²⁴ त तू अपनि चढतल बलिदान चाढनेरि ठैरी पुड छेडतां पेइले अपने ढलाए सेइं मेल-मलाप केरां, फिरी अपनि चढतल चैदां। ²⁵ अगर कोई मैन्हु तीं पुड दाओ केरतां तीं आदालती मां नेनो चाते, त तू बत्तां तैस सेइं मेल-मिलाप केरां न त तैनी तू हाकिमे कां खडो केरनोस, ते तैनी तू सिपैहीएरे हवाले केरनोस ते सिपैहिए तू कैद केरतां छडनोस। ²⁶ अवं तुसन सेइं सज़ ज़ोताई कि ज़ां तगर तू पाई-पाई न देलो त तांतगर तैट्टां छुट्टी न सकेलो।”

॥२२२२ २२२२२२२२२ २२२२२ २२२२ २२२२२२२२ २२२२२॥

²⁷ “तुसेईं शुनेरू थियूं, कि ई हुक्म दित्तोरो थियो, ‘बदमाशी नईं केरनि।’ ²⁸ पन अवं तुसन इन भी ज़ोताई कि ज़ै कोई केन्ची कुआन्शी पुड गेन्दी नज़रां सेइं तकते, तैनी अपने दिले मां पेइली तैस सेइं बदमाशी केरि छडडी। ²⁹ अगर तेरी देइनी अछ तीं पाप केरनेरे लेइ ठोकर खुवाए, त तैस केढतां शार, किजोकि तेरी पूरी जान नरके मां छडडे गाने करां तेरे लेइ एन्ने रोडूए कि तेरी जानी मरां अक अंग नाश भोए ³⁰ अगर तेरो देइनो हथ तीं पाप केरनेरे लेइ ठोकर खुवाए त तैस केढतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोडूए कि तेरी जानी मरां अक अंग नाश भोए।”

॥२२२२ २२२२२२२२२२२ २२२२२ २२२२ २२२२२२२२ २२२२२॥
(२२२२२२ 19:9; २२२२२२ 10:11-12; २२२२२ 16:18)

³¹ “एन भी ज़ोरू थियूं, ‘ज़ै कोई अपनि कुआन्श शारे त एन ज़रूरीए कि फारख्ती लिखतां हावाले केरे।’ ³² पन अवं तुसन सेइं ज़ोताई, कि ज़ै कोई अपने कुआन्शी बदमैशरे अलावा होरि केन्ची गल्ली पुड फारख्ती दे, त तै तैस केरां बदमैशी केरवाते। ते ज़ै कोई तैस शैरोरी कुआन्शी सेइं इला बनाते, त तै भी तैस सेइं बदमाशी केरते।”

॥२२२२ २२२२ २२२२२२२२२२ २२२२२ २२२२ २२२२२२२२ २२२२२॥

³³ “तुसेईं शुनोरू, कि ई हुक्म दित्तोरो थियो, ‘झूठी कसम नईं केरनि, पन कसम प्रभुएरे लेइ पूरी केरथ।’ ³⁴ पन अवं तुसन सेइं ज़ोताई कि कधे कसम न केरथ, न स्वर्गेरी, किजोकि तै परमेशरेरो तखत आए। ³⁵ न ज़मीनारी किजोकि परमेशर तैड़ी पाव रखते, ते न यरूशलेम नगरेरी किजोकि तैन महा राजां केरू नगर आए। ³⁶ ते न अपने दोग्गेरी कसम केरथ, किजोकि तुस अपनो अक बाल भी छित्तो या कालो न केरि सकतथ। ³⁷ पन हांएरी ठैरी हाँ ते नाएरी ठैरी न ज़ोथ, किजोकि ज़ैन किछ एस करां जादे तैन बुरैई यानी शैतानेरे पासेरां आए।”

॥२२२२ २२२२२२२२ २२२२२ २२२२ २२२२२ २२२२२२२२ २२२२२॥
(२२२२२ 6:29-30)

³⁸ “तुसेईं शुनोरूए, कि मूसेरे कानूने मां लिखोरूए, कि अछछरे बदले अछ ते दंतरे बदले दंत। ³⁹ पन अवं तुसन सेइं ज़ोताई कि, बुरे मैन्हु करां बदलो न नेइयथ। अगर कोई तेरे देइनी खैखोड़ी पुड थप्पड बालो त तू बाएं पासो भी तैसेरे पासे रेख्खां। ⁴⁰ ते अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां। ⁴¹ ते अगर कोई सिपाई तीं भारो छूने अक मील नेने चाए त तू दूई मील गेइयां। ⁴² ज़ै कोई तीं करां किछ मग्गे, तैस दे। ते ज़ै कोई तीं करां ओधार मग्गे त तुत्तर न फिरेइयां।”

॥२२२२२२२२२ २२२२२ २२२२२२ २२२२२२२२२ २२२२२ २२२२ २२२२२२२२॥
(२२२२२ 6:27-28,32-36)

43 “तुसेईं शुनोरुए, कि मूसरे कानूने मां लिखोरुए, कि ‘अपने पड़ोसी सेइं अपनो जेरो प्यार केरथ ते दुश्मने सेइं बैर रेखथ ।’ 44 पन अवं तुसन सेइं ज़ोताईं, कि अपने दुश्मन सेइं प्यार केरा, ते ज़ैना तुसन सतातन तैन केरे लेइ प्रार्थना केरा । 45 ज़ैस सेइं तुस अपने स्वर्गेर बाजी केरे बच्चे बेनि सकतथ, ज़ै अपनो दिहाडो अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़ झड़ी देते ते बुरे लोकन पुड़ भी । 46 किजोकि अगर तुस तैन्ने लोकन सेइं प्यार केरथ ज़ैना तुसन सेइं प्यार केरतन त तुसन कुन इनाम मैलेलू? कुन चुंगी धिन्ने बाले भी एन्ने न केरन?” 47 “ते अगर तुस सिर्फ अपने दूलान जो नमस्कार ज़ोथ, त तुस होरन करां जादे कुन केरतथ? कुन गैर कौमां केरे लोक ज़ैना परमेशेरे कानूने न मनन् तैना भी एरू न केरन? 48 तुसन तैन लोकन सेइं प्यार केरनेरी जरूरत आए, ज़ैना तुसन सेइं प्यार न केरन, एन्चरां तुस सिद्ध भोले जेन्चरे स्वर्गे मां रानेबालो तुश्शो बाजी सिद्ध आए ।”

6

1 “खबरदार, तुस अपने रोड़ां कम्मां सिर्फ लोकन हिरानेरे लेइ न केरा, नई त तुश्शो स्वर्गेरो बाजी तुसन कोई इनाम न देलो । 2 एल्हेरेलेइ ज़ैखन तू गरीब मैन्हु दान देस, त तू दुंदूरो न बजेइयां, जेन्चरे पाखंडी लोक प्रार्थना

घरन मां ते गेल्लन मां केरतन, ताके लोक तैन केरि तारीफ़ केरन । अवं तुसन सेइं सच्च ज़ोताईं कि ज़ैन इनाम तैन मैलनू थियूं, तैन सिर्फ इन्ने, कि लोकेईं तैन केरि तारीफ़ की (परमेशेरे करां तैनन् कोई इनाम न मैलेलो) । 3 पन ज़ैखन तू गरीब मैन्हु दान देस, त केन्ची पतो न लोड़े लगगोरो कि तीं कुन दित्तू । 4 ताके तेरू दान छप्पोरू भोए, तैखन तेरो बाजी ज़ै छेपतां तकते, तीं इनाम देलो ।”

(2:1-4)

5 “ज़ैखन तू प्रार्थना केरस त पाखंडी लोकां केरो जेरो न बेना, ज़ैना प्रार्थना घरन मां ते सड़कां केरे मोड़न पुड़ खेड़ोइतां प्रार्थना केरनि सुखातन, ताके लोक तैन तक्कन ते तैन केरि तारीफ़ केरन । अवं तुसन सेइं ज़ोताईं कि ज़ैन इनाम तैनन् मैल्लोरू लोड़तू थियूं, तैन सिर्फ इन्ने, कि लोकेईं तैन केरि तारीफ़ की (परमेशेरे करां तैनन् कोई इनाम न मैलेलू) । 6 पन ज़ैखन तू प्रार्थना केरस त अकैल्लो अपने कमरेरो अन्तर गा, ते दार बंद केरतां अपने परमेशेरे कां ज़ै लेइहोए न तैस कां प्रार्थना केरा । तैखन तुश्शो बाजी परमेशर ज़ै लेइहोए न, ज़ै हर वक्त तीं तकतो राते तै तीं इनाम देलो । 7 प्रार्थना केरते बार, गैर कौमां केरू ज़ेरू बकबक न केरां, किजोकि तैना समझतन कि तैन केरे बकबक केरने सेइं तैन केरि प्रार्थना शुनी गाली । 8 तैन केरे ज़ेरे न बना, किजोकि तुश्शो बाजी तुश्शे मगने करां पेइले तुश्शी जरूरतां जानते ।”

9 “एल्हेरेलेइ तुस एन्चरे प्रार्थना केरा, हे इश्शे बाजी, तू ज़ै स्वर्गे मां आस, लोक तेरी आदर केरन किजोकि तू पवित्तर परमेशर आस ।

10 तू सेब्भी लोकन पुड़ ते चीज़न पुड़ राज़ केरस । तेरी मर्जी जेन्चरे स्वर्गे मां पूरी भोचे, इस धेरती पुड़ भी भोए ।

11 इश्शी रोज़ेरी रोटी अज़ असन दे ।

12 ते जेन्चरे अस ज़ैना इश्शे खलाफ बुराई केरतन, तैन माफ़ केरतम, तेन्चरे तू भी इश्शी बुरैई माफ़ केर ।

13 अज़मैइशरे ज़िरिये असन पाप केरने न दे, पन बुरैई यानी शैताने करां बच्चेइयां, (किजोकि राज़, शक्ति ते महिमा हमेशा तेरी भोती राए । आमीन ।)”

14 “एल्हेरेलेइ अगर तुस लोकां केरे पाप माफ़ केरेले, त तुश्शो स्वर्गेरो बाजी भी तुश्शे पाप माफ़ केरेलो । 15 ते अगर तुस लोकां केरे पाप माफ़ न केरेले, त तुश्शो स्वर्गेरो बाजी भी तुश्शे पाप माफ़ न केरेलो ।”

16 “ज़ैखन तुस बरत रखत, त पाखंडी लोकां केरू ज़ेरू अपनू तुत्तर न बगैइथ । तैना अपनू तुत्तर बिगाड़तन, ताके लोकन पतो लगगे कि एनेईं अज़ बरत रखोरुए ते तैन केरि तारीफ़ केरन । अवं तुसन सेइं सच्च ज़ोताईं कि ज़ैन इनाम तैन मैलनू थियूं तैन मैल्ली जेव । 17 बल्के ज़ैखन तू बरत रखस त अपनू तुत्तर धोइयां ते दोगगे तेल मेल्लां । 18 ताके लोक नई, पन तेरो स्वर्गेरो बाजी, ज़ै लेइहोतोए न तै लाए कि तीं बरत रखोरुए तै तीं इनाम देलो ।”

१२:३३-३४)
(१२:३३-३४)

19 “एप्पू जेई धरती पुड दौलत अकोट्टी न केरा, ज़ैडी कीडे खातन ते मौरचो लेगतां नाश केरते, ते चोर तुशशू घर ट्लोडतां चोरी केरतन। 20 बल्के रोडू केरतां अपने लेइ स्वर्गे मां दौलत अकोट्टी केरा ज़ैडी न कीडो लगगे, ते न मोरचो लगगे ते न चोर चोरी केरेले। 21 किजोकि ज़ैडी तेरी दौलत भोली, तैडी तेरो दिल भी लगगेलो।”

११:३४-३६)
(११:३४-३६)

22 “अछ्छ जानेरे लेइ दीयेरी ज़ेरि आए, एल्हेरेलेइ अगर तेरी अछ्छ रोडी साफ आए, त तेरी सारी जान लौ भोली। 23 अगर तेरी अछ्छ खराब आए, त सारी जानी मां आंधरू भोलू। बस अगर ज़ै लौ तीं मां आए तै आंधरू बेनि गाए, त तैन केतरू आंधरू भोलू!”

१६:१३; १२:२२-३१)
(१६:१३; १२:२२-३१)

24 “कोई मैन्हू दई मालिकां केरि सेवा एक्की वक्ते मां न केरि सके। न त एक्की सेइं दुश्मनी केरेलो ते होरि सेइं प्यार केरेलो, या एक्केरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथ। 25 एल्हेरेलेइ अवं तुसन सेइं ज़ोताई, कि तुस अपने ज़िन्दगरी ज़रूरतां केरे लेइ फिक्र न केरा, कि तुस कुन खाले या कुन पीले, ते न अपने जानारी कि कुन लामेले। कुन प्राण रोट्टी करां ते जान लिगडे करां बेधतां नई!”

26 “अम्बेरेरे चुडोल्लन हेरा! तैना न किछ्छ बेन, ते न किछ्छ कट्टन, ते न अकोट्टे केरतां रखन, फिरी भी तुशशो स्वर्गेरो बाजी तैन खाने जो देते ते तैन केरि हेरगेश केरते। कुन तुशशी कदर तैन करां जादे नई? 27 तुसन मां एरो कौन आए, ज़ै फिक्र केरतां अपनि उमर अक घड़ी भी बधैई सकते?”

28 “ते लिगडेरे लेइ किजो फिक्र केरतथ? जंगले मां सोसनेरां फूडू हेरा कि तैना केन्चरे बेडोतन, न तैना मेहनत केरन, ते न तैना लिगडां बनान। 29 फिर भी अवं तुसन सेइं ज़ोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगडां न लां। 30 एल्हेरेलेइ ज़ैखन परमेशर मैइदानेरो घास, ज़ै अज़ आए ते कालां लौवने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड न देलो? 31 एल्हेरेलेइ तुस फिक्र केरतां एन न ज़ोइयथ, कि ‘कुन खामेले, या कुन पीमेले, या कुन लामेले?’ 32 किजोकि गैर कौमां एन गल्लां केरि फिक्री मां रेडचन। ते तुशशो स्वर्गेरो बाजी ज़ानते, कि तुसन कोनां-कोनां चीज़ां केरि ज़रूरत आए। एल्हेरेलेइ तुस कोन्ची चीज़री फिक्र न केरा। 33 पन पेइले तुस अपने आपे परमेशेरे राज़ेरे लेइ अर्पण केरा, ते तैन कम केरा ज़ैन परमेशेरी नज़री मां रोडू भोते, त इना सैरी चीज़ां भी तुसन मैल्ली गैली। 34 एल्हेरेलेइ कालेरे बारे मां फिक्र न केरथ, किजोकि कालेरी दिहाड़ी अपने लेइ एप्पू फिक्र आनेली। अज़ेरे लेइ अज़ेरो दुख सुद्धोए।”

7

६:३७-३८,४१-४२)
(६:३७-३८,४१-४२)

1 “केन्ची पुड दोष न लेइयथ, तुसन भी दोष न लगगेलो। 2 किजोकि ज़ेन्चरे तुस होरि पुड दोष लाएले, तेन्चरे परमेशर भी तुशशो इन्साफ केरेलो। ज़ेन्चरे तुस होरि लोकन सेइं बर्ताव केरतथ, तेन्चरे परमेशर तुसन सेइं बर्ताव केरेलो।”

3 “तू अपने द्लाएरी एछ्छी मां कूडो किजो तकतां, पन तेरी एछ्छी मां त नग आए, ते तैसेरो तू खियाल भी न केरस? 4 ज़द तेरी एछ्छी मां नग आए, त तू कौस ऐशी सेइं अपने द्लाए जो ज़ोई सकतां कि, ‘एई, अवं तेरी एछ्छी मरां कूडो केडडी!’ 5 हे पाखंडी! पेइले अपने एछ्छी मरां नग कढ, ते फिरी अपने द्लाएरी एछ्छी मरां रोडे च़ारे तेकतां कूडो केडडी सकतस।”

6 “ज़ैना लोक परमेशेरू वचन शन्नू न चान, तैन न शुनाथ। अगर तुस एन्चरे केरेले, त पवित्तर चीज़ कुतरन कां छडनेरे बराबर ते कने मोती सूरन कां छडनेरे बराबर भोले, कि तैना तैन पव्वन हैठ इलन्चन ते बेदलोइतां तुसन पुड हमलो केरेले।”

११:१३

7 “परमेशे करां मग्गा, त तुसन दिचू गालू । ते तोप्पा, त तुसन मैल्ली गालू । ते दार गुडकाथ, त तुशे लेइ खोल्लू गालू । 8 किजोकि जै कोई मगते तै हासिल केरते, ते जै कोई तोपते तैस मैल्ली गाते, ते जै कोई दार गुडकाते त तैसेरेलेइ खोल्लू गालू । 9 तुसन मां एरो कौन आए, कि अगर तैसेरू मट्टू रोट्टी मग्गे, त तै तैस घोड़ दे? 10 या अगर मछली मग्गे, त तैस सप दे? 11 ते तुस बुरे भोनेरे बावजूद भी अपने मट्टन रोड़ी चीजां देनी ज्ञानतथ, त तुशे स्वर्गेरो बाजी तुसन रोड़ी चीजां कि न देलो, जैना तैस करां मगतन? 12 जेरू तुस चातथ कि लोक तुसन सेइ केरन, तुस भी तैन सेइ तेरहु केरा, किजोकि मूसेरे कानूनेरी त कने नेबी केरि लिखोरी शिक्षा ईए आए ।”

१३:२४

13 “तुस परमेशेरे राज्जे मां सिर्फ सुन्कडे दारेरां बत्तां गेइ सकतथ । किजोकि तैन दार चौडू, ते तै बत बड़ी खुल्ली आए जै नाशेरे पासे गाचे, ते तैस बत्तां गानेबाले बड़े आन । 14 किजोकि तैन दार सोंकडू आए, ते तै बत असुखती आए, जै हमेशेरे जिन्दगरे पासे गाचे, ते तेरहां गानेबाले थोड़े आन ।”

६:४३-४४, ४६; १३:२५-२७

15 “झूठे नेबन करां खबरदार रेइयथ, जैना तुसन कां भैडडां केरे रूपे मां एइतन पन असली मां तैना मारने बालां गिदां भोतन । 16 तुस तैन केरे कम्मन सेइ तैन पिशानेले, कुन लोक झल्लन सैहीयेरां दाछ कढतन ते करेरी सैहीयेरां फेगू टलोइतन? 17 एल्हेरेलेइ हर एक्की रोडे बुट्टे रोडो फल लगते, ते हर एक्की बुरे बुट्टे बुरो फल लगते । 18 रोडे बुट्टे बुरो फल न लगगे, ते न बुरे बुट्टे रोडो फल लगगे । 19 ते जैस बुट्टे रोडो फल न लगगे तै केटतां अग्गी मां फुकतां छडतन, तेन्चरे झूठे नेबन भी सजा मैलेली । 20 बस्सा, तुस तैन केरे कम्मन सेइ तैन पिशानेले ।”

21 “मींजो, हे प्रभु, हे प्रभु, जौनेबाले सारे मैन्हु स्वर्गेरे राज्जे मां दाखल न भोले, पन जै, मेरे स्वर्गेरे बाजी केरे मेर्जी पुड़ चलने बालोए तै जरूर दाखल भोले । 22 इन्साफेरे दिहाड़ी बड़े लोक मीं सेइ जौले कि, ‘हे प्रभु, हे प्रभु,’ कुन असेई तेरे नंवे सेइ भविष्यवाणी नई कियोरी? ते तेरे नंवे सेइ भूतां नई कढोरां ते तेरे नंवे सेइ बड़े चमत्कार नई हेरेवरे? 23 तैखन अवं तैन जो साफ जौलो, ‘अवं तुसन कधे न जैनी, ओ बुरां कम्मां केरने बालाव, मेरे तुत्तर अगरां दूर भोथ ।’”

६:४७-४९

24 “एल्हेरेलेइ जै मेरी गल्लां शुनते ते तैन पुड़ अमल केरते त तै तैस अक्लमन्द मैनेरो जेरो भोलो, जैनी अपनू घर शफड़ी पुड़ बनेवरुए । 25 झड़ी लगगी ते हड़ाई आई ते अंधगुबारी भोइ ते तैस घरे पुड़ पुजी, पन तैन घर न डुल्लू, किजोकि तैसेरी मुनीयाद पेक्की शफड़ी पुड़ कढोरी थी । 26 पन जै मेरी गल्लां शुनते ते तैन पुड़ अमल न केरे, त तै तैस बेवकूफ मैनेरो जेरोए भोलो, जैनी अपनू घर रेती पुड़ बनेवरु थियू । 27 झड़ी लगगी ते हड़ाई आई अंधगुबारी भोइ ते तैस घरे कां पुजी ते तैन घर डुल्ली जौवं ते बरबाद भोवं ।”

28 जैखन यीशुए एना सैरी गल्लां शुनेइतां झैडी, त सारे लोक तैसेरी शिक्षा शुन्तां हैरान भोए । 29 किजोकि यीशु तैन शास्त्री लोकां केरि जेरि नई, बल्के अधिकारे सेइ शिक्षा देतो थियो ।

8

१:४०-४५; ५:१२-१६

1 जैखन तै पहैड़ी पुड़ां उन्ढो अव, त बड़े लोक तैस पत्पती चले । 2 तैखन एक्की कोढे यीशु कां जैन्धु केरे भारे बिशतां तैस कां मिन्नत केरतां जौवं, “हे प्रभु अगर तू चास त मेरू कोढ बज्जेई सकतस ।” 3 यीशुए तैस पुड़ हथ रेखतां जौवं, “अवं चाताई, तू बज्जोस ।” ते तै कोढी तैखने साफ भोइ जेव । 4 यीशुए तैस सेइ जौवं, “हेर, एस गल्लरे बारे मां केन्ची सेइ किछ न जौइयां । बल्के अपनो आप याजक हिरा । तैल्ला पत्ती, तू अपने बेज्जोनेरे वजाई सेइ चढतल चाढ, जेसेरे बारे मां मूसा नेबे कानूने मां हुकम दित्तोरोए, ताके लोकन पतो चले कि तू बेज्जोरोस ।”

७७७७ ७७७७७७७७७ ७७७७ ७७७ ७७७७७७७७
(७७७७ 7:1-10)

5 जैखन यीशु कफरनहूम नगर मां अव त अक रोमी सूबेदार जै 100 सिपेहिन केरो अफसर थियो, तैनी यीशु कां एइतां बिनती की। 6 “हे प्रभु, मेरो नौकर अधरंगेरो मरीज घर बिमार भोरोए, तै चलनेरे काबल नई, ते तै बेड़ि तकलीफी मां आए।” 7 तैनी तैस सेइं ज़ोवं, “अवं एज्जेलो ते तैस बज्जेइलो।” 8 सूबेदार* ज़ोने लगो, हे प्रभु अवं एस काबल नई कि तू मेरे घरे मां एज्जी सकस; पन तू अगर सिर्फ ज़बाना सेइं ज़ोस त मेरो नौकर बेज्जोलो। 9 किजोकि अवं भी केन्चेरे अधिकारे मां कम केरताई, ते सिपाही मेरे अधीन आन, ते जैखन एक्की जो ज़ोताई कि गा, त तै गाते ते होरि जो ज़ोतां एई, त तै एइते, ते अपने सेवके जो ज़ोताई इन कम केर त तै केरते।

10 यीशु एन शुन्तां हैरान रेइ जेव, ते एप्पू पत्ती चलने बाले मैनु सेइं ज़ोने लगो, “अवं तुसन सेइं सन्न ज़ोताई, कि मीं इस्राएल मुलखे मां इस गैर यहूदी मैनेरो ज़ेरो मैन्हु नई लोवरो जै मीं पुड़ एत्रो विश्वास केरे।” 11 अवं तुसन सेइं ज़ोताई कि बड़े गैर कौमां केरे लोक पूर्बेरां ते पछमेरां एइतां अब्राहमे, इसहाक ते याकूबे सेइं साथी परमेशेरे राज्जेरी धामी मां शामिल भोले। 12 पन इस्राएली लोक बेइर आंधरे मां छड़डे गाले ज़ैडी तैना लेरां देते ते दंत ज़ापते राले। 13 ते यीशुए तैस सूबेदारे सेइं ज़ोवं, “घरे जो गा, ज़ेरो तेरो विश्वासे तेरे लेइ तेरहु भोलू,” ते तैखने तैसेरो नौकर बेज्जोइ जेव।

७७७७ ७७७ ७७७७ ७७७७७७७७
(७७७७७ 1:29-34; ७७७७ 4:38-41)

14 जैखन यीशु पतरसेरे घरे जेव, त तैनी हेरू, कि पतरसेरी शिखी बड़ो भुखारे, ते तै लेटोरी थी। 15 तैनी तैसारो हथ टलातो ते अकदम तैसारो भुखार उतरी जेव, ते तै खड़ी उट्टतां तैसेरी सेवा केरने लगगी। 16 जैखन इलोइ भोइ त लोकेई बड़े बिमार, जैन पुड़ भूतां केरो सायो थियो तैस कां आने, ते तैनी तैना भूतां अपने वचने सेइं कढां, ते सारे बिमार बज्जाए। 17 ताके यशायाह नेबेरी ज़ोरी तै गल पूरी भोए कि, “तैनी एप्पू इशशी कमज़ोरी हटेइ ते इशशी बिमैरी भी मुकेइ।”

७७७७७७७७ ७७७७७ ७७७७७७७७ ७७७७७७७७
(७७७७७ 9:57-62)

18 यीशुए अपने च़ेवरे पासन मैन्हु केरि भीड़ लेइतां अपने चलन, गलील समुन्दरे पार गानेरो हुक्म दित्तो। 19 जैखन तैना पार गानेरी तियारी केरने लगगे, त तैखन अक शास्त्री मैन्हु तैस कां एइतां ज़ोने लगो, “गुरू, तू ज़ेरहां भी गालो त अवं तीं पत्ती चल्लेलो।” 20 यीशुए तैस जो ज़ोवं, “लौई केरि कूढां, ते अम्बेरेरे चुड़ोल्लू केरे आले भोतन, पन मैनेरे मट्टे यानी मीं कां कोई ठार नई ज़ैडी अवं झुल्ली सेक्खी।” 21 चलन मरां एक्के होरे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजेरे मरनेरां बाद अवं तैस देबतां एज्जेलो ते फिरी तीं पत्ती चल्लेलो।” 22 यीशुए तैस जो ज़ोवं, “तू मेरो चेलो बन ते मीं पत्ती चल, ते ज़ैना लोक आत्मिक तरीके सेइं मरेंन तैन अपने मैन्हु मरने बलगने दे।”

७७७७ ७७७७७७ ७७७७७७७७
(७७७७७ 4:35-41; ७७७७७ 8:22-25)

23 जैखन यीशु किशती मां च़ढो त तैसेरे च़ेले भी तैस सेइं साथी च़ले। 24 ते अचानक समुन्दरे मां अक बड़ो तूफान अव ते किशती छ़लहेई सेइं छ़पने लगगी ते यीशु तैस मां झुल्लोरो थियो। 25 तैखन च़ेलेई तै बींझेइतां तैस सेइं ज़ोवं, “हे प्रभु, असन बच्चा! अस त ड़बने लोरेम!” 26 तैनी तैन सेइं ज़ोवं, “हे घट विश्वासे बालाव, तुस किजो ड़रतथ?” तैखन तैनी खड़े उट्टतां तूफान त समुन्दर डांटो, तैखने तूफान रुकी जेव त समुन्दर बड़े शांत भोव। 27 लोक हैरान भोइतां ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

७७७ ७७७७७७७ ७७७ ७७७७७७७ ७७७७ ७७७७ ७७७७७७७ ७७ ७७७७७७७ ७७७७७७७७
(७७७७७ 5:1-20; ७७७७७ 8:26-39)

28 जैखन तै गलील समुन्दरेरे पार, गिरासेनी इलाके मां पुज़ो, त दूई मैन्हु ज़ैन पुड़ भूतां केरो सैयो थियो कब्रन मांमेइ यीशु कां मिलने आए। तैना एत्रे निग्गर थिये, कि कोई भी तैस बत्तां निस्सी न थियो बटतो। 29 तैना ज़ोरे-ज़ोरे चिन्डां मारने लगगे ते ज़ोने लगगे, हे परमेशेरेरा मट्टां, तीं असन सेइं कुन कम्मे? कुन तू वक्ते करां पेइले

* 8:8 8:8 सूबेदार: ए यहूदी नई थियो एल्हेरेलेइ तै ज़ोने लगगोरो थियो अवं इस काबल नई।

असन नरके मां छडने ओरोस? 30 तैन केरां दूर सूरं केरो अक बड़ो घान चरने लोरो थियो। 31 भूतेई यीशु कां मिनत केरतां ज़ोवं, “अगर तू असन कढने चातस त उन सूरं केरे घाने मांजो भेज्ज।” 32 तैखन यीशुए ज़ोवं, “गाथ,” तैना भूतां तैट्ठां निस्तां तैन सूरं केरे घाने मां जेआं, ते सूरं केरो सारो घान उछड़तो-उछड़तो डैल्ले मां गेइतां सारे सूर मेरि जे। 33 तैखन सूरं केरे चारनेबालेई एन हेरू, त तैना डेरि जे, ते तैनेई नगरेरे लोकन सेइं सारो बिस्तार दित्तो, ते ज़ैन पुड़ भूतां केरो सैयो थियो तैन केरो हाल भी शुनाव। 34 तैस नगरेरे सारे लोक यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लगगे, इश्शे इलाके मरां चलो गा।

9

[\[2:1-12\]](#); [\[5:17-26\]](#)

1 फिरी यीशु किशती मां च़ेढ़तां दरियाए पार जो जेव, ते अपने नगर मां अव। 2 ते हेरा, किछ मैनेई अक अधरंगी मैन्हु खट्टी पुड़ छुइतां तैस कां आनो, ज़ैखन यीशुए तैन केरो विश्वास हेरो, त तैस अधरंगी मैन्हु जो ज़ोवं, “मट्ठा, गा हिम्मत रख, तेरे पाप माफ़ भोए।” 3 एस गल्ली पुड़ किछ शास्त्री एप्पू मामेइं ज़ोने लगगे, “ए त परमेशेरी तुहीन केरते!” 4 यीशुए तैन केरि मनेरी गल्लां बुझतां तैन जो ज़ोवं, “तुस अपने-अपने मने मां एन्चरां किजो सोचने लगगोरेथ? 5 एन ज़ोनू कुन सुखतुए कि गा तेरे पाप माफ़ भोए; या एन ज़ोनू कि उठ, ते चल फिर?” 6 पन अवं किछ केरनेबालोई, ज़ैस सेइं तुसेईं बुझनूए कि मैनेरे मट्ठे (यानी मीं) धेरती पुड़ लोकां केरे पाप माफ़ केरनेरो अधिकार आए।” तैखन तैनी तैस अधरंगी मैन्हु जो ज़ोवं, “अपनि खट छुइतां अपने घरजो चलो गा।” 7 तै अधरंगी मैन्हु तैखने अपनि खट छुइतां घरजो चलो जेव। 8 लोक एन हेरतां डेरि जे ते परमेशेरी बड़याई केरने लगगे, कि ज़ैनी मैन्हु एत्रो अधिकार दित्तोरोए।

[\[2:13-17\]](#); [\[5:27-32\]](#)

9 ज़ैखन यीशु तैट्ठां अग्रोवं चलो त तैनी अक मत्ती नंवेरो मैन्हु, चुंगी नेनेबालो दफ़तरे मां बिश्शोरो लाव, ते यीशुए तैस जो ज़ोवं, “तू मीं पत्ती चल।” तै तैखने यीशु पत्ती चलो। 10 ते ज़ैखन यीशु अपने चेलेरे घरे गेइतां रोट्टी खाने बिश्शो ज़ेसेरू नवं मत्ती थियूं, त बड़े चुंगी नेनेबाले ते पापी मैन्हु* भी आए ते यीशु त तैसेरे चलन सेइं साथी रोट्टी खाने बिश्शे। 11 ज़ैखन फरीसी लोकेई एन हेरू, त तैनेई तैसेरे चलन पुच्छू, “तुश्शो गुरू चुंगी घिन्ने बाले ते पैपी लोकन सेइं साथी रोट्टी किजो खाते?” 12 एन शुन्तां यीशुए तैन मिसाल देइतां ज़ोवं, “सझर लोकन डाक्टरेरी ज़रूरत न भोए, पन बिमारन भोचे।” 13 फिर भी तुस गेइतां एस गल्लरो मतलब कढा, “अवं बलिदान नई बल्के दया पसंद केरताई, किजोकि अवं धर्मी लोकन नई बल्के पापी लोकन कुजाने ओरोई।”

[\[2:18-22\]](#); [\[5:33-39\]](#)

14 तैखन यूहन्नारे चले यीशु कां एइतां ज़ोने लगगे कि कुन वजा आए, कि अस ते फरीसी लोक त बरत रखतम, पन तेरे चले किजो बरत न रखन? 15 यीशुए तैनन् जुवाब दित्तो, “इलाएरे दिहाड़े, ज़ैखन लाड़ो ज़ैनी सेइं साथी राते, कुन जन शौग बनेइं सकतन? पन तैना दिहाड़े एज्जले, ज़ेइस लाड़ो तैन केरां अलग कियो गालो (यानी मारो गालो), तैखन तैना (अपने दुखेरे वजाई सेइं) बरत रखेले। 16 अवं तुसन अक होरि मिसाल देताई, नंवे लिगड़ेरी टलोई पुराने लिगड़े कोई न लाए। किजोकि नंवे लिगड़ेरी टलोई पुराने लिगड़े अपने पासे खिचची छुड़डेली। ते तैन पेइले केरां भी जादे छिन्दोलू। 17 ते नंवो दाछारो रस पुरैनी मसकन मां न भरन, किजोकि मसकां फैट्टी गाचिन ते दाछारो रस ज़ैया भोइ गाते ते मसकां भी कोन्ची कम्मेरी न रान। एल्हेरेलेइ नंवो दाछारो रस नेव्वीं मसकी मां छुडतन ताके दुइये बरबाद न भोन।”

[\[5:21-43\]](#); [\[8:40-56\]](#)

18 यीशु एन गल्लां हेजू मसां ज़ोने लोरो थियो, त प्रार्थना घरेरो अक प्रधान अव ते यीशु कां मथ्यो टेकतां ज़ोने लगगे, मेरी कुई मेरि जोरीए, “पन तू अगर एइतां तैस पुड़ हथ रखवस त तै हुन्ना जींती भोइ गानीए।” 19 यीशु

* 9:10 9:10 पापी मैन्हु: लोक तैन केरे बारे मां सोचते थी कि एना पापिन।

तैस सेइं साथी चलो जेव, ते चले भी तैस सेइं साथी जे । 20 ते एरू भोव कि अक कुआन्श भी थी, जैस 12 सालां केरि खून चलनेरी बिमारी थी । तैसां यीशु पत्पती एइतां तैसेरे चोगे सेइं हथ लाव । 21 किजोकि तै अपने दिले मां एन ज़ोती थी, कि अगर अवं यीशुएरे चोगे सेइं हथ लाएली त अवं बेज्झोइ गानीं । 22 यीशुए बेदलोइतां तैस कुआन्शरे पासे तक्कू ते ज़ोवं, “हे कुईए, विश्वास रख, तेरे विश्वासे सेइं तू बेज्झोरस” ते तै तैखने बेज्झोइ जेई । 23 ज़ैखन यीशु तैस प्रधानेरे घरे पुज़ो, त लोक नगारो बजाते ते लेरां देंते लाए । 24 तैखन यीशुए तैन लोकन सेइं ज़ोवं, “दूर भोथ, किजोकि कुई मरीं नई, बल्के झुल्लोरीए ।” एन शुन्तां तैना लोक हसने लगगे । 25 पन ज़ैखन लोक तैटठां दूर कढे, त यीशुए अन्तर गेइतां कुइयरो हथ ट्लाव, त तै जीती भोइ । 26 ते एस गल्लरी खबर सारे इलाके मां फैली जेई ।

२२२२ २२२ २२२२ २२२२२ २२२२२२२२

27 ज़ैखन यीशु तैटठां अग्रोवं चलो, त दूई काने तैस पत्ती चिन्डां मारते ज़ोने लगगे, “हे दाऊदेरा मटठां असन पुड़ दया केर!” 28 ज़ैखन तै घरे अन्तर जेव, त तैना काने तैस कां आए, ते यीशुए तैन सेइं ज़ोवं, “कुन तुसन विश्वासे, कि अवं तुसन बज्झेई सकताई?” तैनेई जुवाब दित्तो “हाँ प्रभु, अस विश्वास केरतम, तू असन बज्झेईं सकतस ।” 29 तैखन तैनी तैन केरि एछ्छन सेइं हथ लाव ते ज़ोवं, “तुस विश्वास केरतथ कि अवं बज्झेई सकताई, अवं तुसन बज्झेइलो ।” 30 ते तैना लहने लाए, ते यीशुए तैन रोडेचारे समझेइतां ज़ोवं, “खबरदार ज़ैन मीं तुशशे लेइ कियूं तैसेरे बारे मां कोन्ची सेइं न ज़ोइयथ!” 31 पन तैनेई बेइर गेइतां सारे मुलखे मां एस चमत्कारेरे बारे मां ज़ोवं ।

२२२२ २२ २२२२२२ २२२२२२

32 ज़ैखन तैना बेइर चलोरोरे थिये, त लोकेई अक मैन्हु ज़ै गल्लां न थियो केरि बटतो, किजोकि तैस पुड़ भूतेरो सैयो थियो, तै तैनेई यीशु कां आनो । 33 ते ज़ैखन भूतेरो सैयो तैस मेरां कढो, त लट्टो गल्लां केरने लगगे, लोक बड़े हैरान भोइजेइ ते ज़ोने लगगे, असेई एरो ज़ेरो माजरो इस्राएले मां पेइले कधे नई लाहोरो । 34 पन फरीसी लोक ज़ोने लगगे, “ए त भूतां केरे गुरेरी मद्दी सेइं भूतां कढते ।”

२२ २२२२२२२२२२ २२२२ २२

35 यीशु त कने तैसेरे चले गलील इलाकेरे इलोव्वन ते नगरन मां ते प्रार्थना घरन मां जे । ते तै शिक्षा देतो राव, ते परमेशेरे राज्जेरी खुशखबरी शुनातो राव, ते लोकां केरि हर किसमेरी बिमारी ते कमज़ोरी दूर केरतो राव । 36 ज़ैखन तैनी बड़े लोक लाए त तैस तैन लोकन पुड़ बड़ो तरस अव, किजोकि तैना तैन भैड्डां केरे ज़ेरे थिये ज़ैन केरो कोई पुहाल न भोए, तैन केरो बड़ो बुरो हाल थियो ते तैना टेपलोरे थिये । 37 तैखन यीशुए अपने चलन सेइं ज़ोवं, “पकोरी फसलरे ज़ेरे बड़े लोक तियार आन ज़ैना परमेशेरे वचने पुड़ विश्वास केरनू चातन, पन कम केरनेबाले थोड़े आन ज़ैना तैन परमेशेरे राज्जेरे बारे मां ज़ोन । 38 एल्हेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशेरे राज्जेरे बारे मां ज़ोन ।”

10

२२२२२२२ 12 २२२२

(२२२२२ 3:13-19; २२२२ 6:12-16)

1 फिरी यीशुए अपने 12 चले एप्पू कां कुजाए, ते तैन भूतां केरो सैयो कढनेरो ते हर बिमारी ते तकलीफ दूर केरनेरो अधिकार दित्तो ।

2 12 परेरितां केरां नव्वां इना आन, शमौन ज़ैस जो पतरस ज़ोतन ते तैसेरो दला अन्दरयास, जब्देरू मट्टू याकूब ते कने तैसेरो दला यूहन्ना, 3 फिलिप्पुस, बरतुल्मै, थोमा, ते मत्ती चुंगी घिन्ने बालो, हलफईरू मट्टू याकूब, ते तदै । 4 शमौन कनानी, ते यहूदा इस्करियोती ज़ैनी तै ट्लुवेवरो भी थियो ।

12 २२२२२ २२२२ २२२२२२२ २२

(२२२२२ 6:7-13; २२२२ 9:1-6; 10:4-12)

5 एन 12 यीशुए एन ज़ोइतां भेजे, “गैर कौमां केरे पासे न गेइयथ, ते कने सामरी लोकां केरे केन्ची नगर मां न गेइयथ । 6 बल्के इस्राएलेरे घरानेरी हेरोरि भैड्डन कां गेइयथ । 7 ते चलते-चलते, एन ज़ोते गेइयथ कि स्वर्गेरू राज नेड़े ओरूए । 8 बिमारन बज्झेइयथ, मुड़दन जीते केरथ, कोढ़ी केरू कोढ़ साफ केरथ, ते भूतां केरो सैयो केदथ,

तुसन एन सब किछ मुफ्त मैलोरूए ते मुफ्त देइयथ । 9 ते साथी सोन्नु, चाँदी ते पेंडसे न रेखथ । 10 ते न बत्तारे लेइ झोलो नेइयथ ते न दूई-दूई लिगडां, ते न बूट ते न सोटी, किजोकि मज्जदूर अपनि मज्जदूरारो हकदार भोते ।”

11 “जैखन तुस केन्ची नगर या इलोव्वे मां गाथ त तुस एरे मैनेरो पतो केरथ, कि कौन अतबारेरे काबल? तैट्ठां जां तगर गानेरो वक्त न एज्जे त तांतगर तैडी तैस्से कां रेइयथ । 12 ते घरे मां अन्तर गांते बार तैन जो शान्ति देइयथ ।” 13 “अगर तैन घर तुश्शे काबल भोलू त शान्ति पुज्जेली, ते अगर तैन घर तुश्शे काबल न भोलू त तुश्शी शान्ति तुसन पुड़ वापस एज्जेली । 14 जै तुसन कबूल न केरे ते तुश्शी गल न मन्ने त तैस घरे या नगर मरां बेइरोवं गांते बार अपने पावां केरि धूड़ तैडी झैइथ ।” 15 “अवं तुसन सेइं सच्च ज़ोताईं कि इन्साफेरे दिहाड़े तैस नगरेरो हाल सदोम ते अमोरा नगरां केरे हाले करां भी जादे बुरो भोलो ।”

[\[?\]\[?\]\[?\]\[?\]\[?\] \[?\]\[?\]\[?\]\[?\]\[?\]](#)
([\[?\]\[?\]\[?\]\[?\] 13:9-13; \[?\]\[?\]\[?\] 21:12-17](#))

16 “हेरा, अवं तुसन भैड्डां केरे गिदन मां भेज्जने लोरोईं, एल्हेरेलेइ तुस सप्पां केरे ज़ेरे हुशार ते कबूतरां केरे ज़ेरे सादे बेनथ । 17 मैनन् करां हुशार रेइयथ तैना तुसन ट्लेइतां सभान मां पैश केरेले ते प्रार्थना घरन मां तुसन कोडां केरि मार दुवाले । 18 ते तुसन मेरी वजाईं सेइं गवर्नरन ते कने राजन कां हाज़र केरेले, ताके तुस तैन मां ते गैर कौमन मां मेरे गवाह बन्थ । 19 पन जैखन तैना ट्लुवेइतां हावाले केरेले, त तुस फिकर न केरथ, कि अस कुन जोमेले ते केन्चरे जोमेले, किजोकि जैन किछ ज़ोनू भोलू तैखने अवं तुसन ज़ोइलो । 20 किजोकि ज़ोने बाले तुस नईं, बल्के पवित्र आत्मा भोलो जै तुश्शे स्वर्गेरे बाजी परमेशेरे तरफां आए ।”

21 “दूला, दूलाए ते बाजी मट्ठे मारनेरे लेइ सॉफेले, ते मट्ठां अपने अम्मा बाजी केरे खलाफ भोइतां तैन माराले । 22 मेरे नंवेरो वजाईं सेइं सब लोक तुसन सेइं बैर केरेले, पन जै आखरी तगर बरदाशत केरेलो तैस्से मुक्ति मैलेली । 23 जैखन लोक तुसन एक्की नगर मां सताले, त होरि नगर मांजो नेश्शी गेइयथ, अवं तुसन सेइं सच्च ज़ोताईं कि एस करां पेइले तुस इस्राएलेरे सैरी नगरन मां तुश्शू सफर पूरू न भोलू, त अवं मैनेरू मट्ठू एज्जी गालू ।”

24 “चेलो अपने गुरू करां बड्डो न भोए, ते न नौकर अपने मालिके करां । 25 चेलेरे लेइ त एन्ने बड्डुए कि तै अपने गुरेरो ज़ेरो भोए, ते नौकरेरे लेइ एन्ने बड्डुए कि तै अपने मालिके बराबर भोए, अगर तैनेईं मालिके जो शैतान ज़ोवं, त तैसेरे घरेबालन जो केतरू ज़ोनूए!”

[\[?\]\[?\] \[?\]\[?\]\[?\] \[?\]\[?\]\[?\]\[?\] \[?\]\[?\]\[?\]\[?\]](#)
([\[?\]\[?\]\[?\] 12:2-7](#))

26 “तुस तैन करां न डेरथ, किजोकि कोई चीज़ छप्पोरी नईं, जै खोल्ली न गाली, ते कोई भेद छप्पोरो न रालो, बल्के सारो भेद बांदो भोलो । 27 जैन किछ अवं तुसन सेइं आंधरे मां ज़ोताईं, तुस तैन दीसां ज़ोइयथ, ते जैन किछ तुश्शे कन्ने पत्र बल्हे सेइं शुनावं गाते, तुस लाए पुड़ गेइतां तैसेरो प्रचार केरथ । 28 तुस तैन करां न डेरथ जैना जानी त मारतन, पन आत्मा न मैरी बटन, परमेशेरे करां डरा, जै आत्माईं ते जानी दुइने नरके मां नाश केरि बटते । 29 कुन एक्की सिकेरी दूई च़डोली न बिकन? फिरी भी तुश्शो बाजेरे मेरज़ेरे बगैर तैन मरां अक भी धेरती पुड़ न झेड़ी बटन । 30 परमेशर तुश्शे हर गल्लरी फिकर केरते इडी तगर तुश्शे दोग्गेरे बाल भी गन्नोरेन । 31 एल्हेरेलेइ डरा न, तुश्शी कदर बेडि च़डोलन करां भी बडी जादे ।”

[\[?\]\[?\]\[?\] \[?\]\[?\]\[?\] \[?\]\[?\]\[?\]\[?\] \[?\] \[?\] \[?\]\[?\]\[?\] \[?\]\[?\]\[?\]\[?\]](#)
([\[?\]\[?\]\[?\] 12:8-9](#))

32 “जैना लोक, मैन्हु केरे सामने मेरो इकरार केरतन कि तैना मेरे चलेन, त अवं भी अपने स्वर्गेरो बाजी केरे सामने तैन केरो इकरार केरेलो, कि तैना मेरे चलेन । 33 पन जैना लोक, मैन्हु केरे सामने इन ज़ोने करां डरेले, कि तैना मेरे चलेन, त अवं भी तैन केरो अपने स्वर्गेरो बाजेरे सामने इन्कार केरेलो, कि एना मेरे चले नईं ।”

[\[?\]\[?\]\[?\] \[?\]\[?\]\[?\] \[?\]\[?\]\[?\]\[?\] \[?\]\[?\]\[?\]\[?\]](#)
([\[?\]\[?\]\[?\] 12:51-53; 14:26-27](#))

34 “इन न सैमझथ कि अवं धेरती पुड़ एल्हेरेलेइ ओरोईं लोक मेल मिलापे सेइं रान, पन मेरू एज्जून लोकन एप्पू मांमेइं लइनेरी वजा भोइ, मेल मलाप नईं । 35 अवं एल्हेरेलेइ ओरोईं कि मट्ठे बाजी करां ते कुइये अम्मा करां ते नुशी शिखी करां अलग केरि । 36 मैनेरे दुश्मन त तैसेरे अपने घरेरे लोक भोनेन ।”

37 जै कोई अम्मा या बाजी मीं करां जादे ट्लारे समझते, तै मेरो चेलो बन्नेरे काबल नई ते जै कोई मट्ठे या कुइये मीं करां जादे समझते, तै भी मेरो चेलो बन्नेरे काबल नई। 38 जै कोई मेरो चेलो भोनेरी वजाई सेइ दुःख झैल्लनेरे लेइ त कने मरनेरे लेइ तियार नई, त तै भी मेरो चेलो बन्नेरे काबल नई। 39 जै कोई मरने करां बचनेरे लेइ मेरो इन्कार केरेलो, त तैन हमेशारी जिन्दगी न मैलेली। पन जै मीं पुड़ विश्वास केरनेरे वजाई सेइ अपने जान देनेरे लेइ भी तियार भोलो, त तैस हमेशारी जिन्दगी मैलेली।

(9:41)

40 “जैना तुसन कबूल केरतन, तैना मीं कबूल केरतन, जैना मीं कबूल केरतन, तैना सिर्फ मीं नई, पन तैना परमेशरे भी कबूल केरतन, जैनी अवं इड़ी भेजोरोई।” 41 “जै नेबन, नबी समझतां कबूल केरेलो, परमेशर तैस नेबी केरे बराबर इनाम देलो, ते जै धेर्मी मैन्हु धर्मी समझतां कबूल केरते, परमेशर तैस धेर्मी बराबर इनाम देलो। 42 जै कोई इन निकडन मरां एक्की मेरो चेलो बुझतां सिर्फ अक कटोरो ठंडू पानी पियालो, अवं तुसन सेइ सत्र ज़ोताई तैस पक्कू इनाम मैलनू आए।”

11

(7:18-35)

1 जैखन यीशुए अपने 12 चेलन हुक्म दित्तो, त तै तैट्ठां चलो जेव, ताके चेलां केरे नगरन मां गेइतां शिक्षा दे ते प्रचार केरे।

2 यूहन्ना नेबे कैदखाने मां मसीहेरे कम्मां केरे बारे मां शुन्तां तैस कां अपने चले इन पुच्छने भेजे। 3 “तैनी तैन सेइ ज़ोवं, एजनेबालो मसीह तू आस, जेसेरे बारे मां परमेशरे वादो कियोरोए, या आस केन्वी होरि बलगम?”

4 यीशुए तैन जुवाब दित्तो, “जैन किछ तुस शुन्तन ते लातथ तैन गेइतां यूहन्ना सेइ ज़ोथ। 5 कि काने लातन, ते टोन्टे चलतन, ते कोढी केरू कोढ शुद्ध भोते, ते टोऊने शुन्तन, ते मुइदे जीते भोतन, ते गरीबन खुशखबरी शुनाई गातीए 6 परमेशर तैस बरकत देते, जै मीं पुड़ शक न केरे।”

7 जैखन यूहन्नारे चले तैट्ठां चले जे, त यीशु लोकन सेइ यूहन्नारे बारे मां ज़ोने लगो, “तुस सुनसान टैरी कुन हेरने जोरे थिये? कुन हवाई सेइ हिलते निरैठरे डाले? 8 त फिरी होरू कुन हेरने जोरे थिये? माघां लिगडां लेइतां कोई? हेरा जैन माघां लिगडां लेइतां भोतन तैना महलन मां रातन। 9 फिरी तुस कुन हेरने जोरे थिये? कुन कोई नेबी? हाँ पन अवं तुसन सेइ ज़ोताई कि नेबी करां भी बड्डे हेरने जोरे थिये। 10 ई तैए यूहन्ना आए जेसेरे बारे मां परमेशर पवित्रशास्तरे मां ज़ोते,

कि हेरा, ‘अवं अपने बिस्तार देनेबालो तीं अग्री भेजताई,
जै तेरे लेइ बत तियार केरेलो।’”

11 अवं तुसन सेइ सत्र ज़ोताई, कि जै कुआन्शन करां ज़रमोरोए तैन मां यूहन्ना बपतिस्मो देनेबाले करां कोई बड्डो नई भोरो, पन जै स्वगेरे राज़े मां निकडे करां निकडोए तै तैस करां भी बड्डोए। 12 यूहन्ना बपतिस्मो देनेबालेरे दिहाइन करां अज़ तगर प्रचार भोइ रावरोए, ते स्वगेरू राज़ जल्दी बधने लोरूए, पन बडे निग्गर लोक तैस पुड़ हमलो केरतन। 13 सारे नेबी केरे लेख, ते मूसेरो कानून यूहन्ना तगर भविष्यवाणी केरते राए। 14 अगर तुस चाथ ते मन्नथ, एलिय्याह जेसेरे बारे मां नेबेई ज़ोरू थियू, कि तै एजनेबालो थियो तै ईए। 15 जै कोई समझनू चाते, तै ध्याने सेइ शुने ते समझे। 16 “अवं इस ज़मानेरे लोकां केरि मिसाल केस सेइ देई, इना तैन मट्ठां केरे ज़ेरेन जैना बज़ारन मां बिश्तां अपने दोसन सेइ शिकैयत केरतन, 17 कि असेई तुशे लेइ बाज़ो बज़ाव, ते तुस न नच्चे, ते असेई शौग कियो ते तुसेई छाती न पिट्टी। 18 किजोकि यूहन्ना बपतिस्मो देनेबालो* जादे तर बरत रखतो थियो, ते शराब न थियो पीतो, ते तैना तैस जो ज़ोतन कि एस पुड़ भूतेरो सैयो आए। 19 ते मैनेरू मट्ठू यानी अवं खातो पीतो अव, हेरा, ते तैना ज़ोतन पेटू ते शराबी मैन्हु ते चुंगी नेनेबाले ते पापी लोकां केरो दोस्त, पन अक्लमन्द कौने तैसेरे कम्मेई सेइ पतो चलते।”

(10:13-15)

* 11:18 11:18 यूहन्ना: हन्ना टिटां ते जंगली माछी खातो थियो।

20 तैखन यीशु फिरी तैन नगरन मां गोइतां तैट्टेरे लोकन झिडकतां ज़ोने लगो, ज़ैन मां तैनी चमत्कार कियोरे थी, पन तैनेई अपने पापन करां मन न फिराव। 21 “हे खुराजीन नगरेरे लोकव! तुसन पुड़ अफ़सोस, हे बैतसैदा नगरेरे लोकव तुसन पुड़ अफ़सोस, कि ज़ैना चमत्कार तुसन मां किये, अगर एना चमत्कार सूर ते सैदा नगरन मां कियोरे भोथे, त तैन लोकेई केइसेरे देंतेरी टाट पलेटतां ते मांजनी मां बिश्तां† अपने पापन करां मनफिरावरो भोथो। 22 पन अवं तुसन सेइं ज़ोताई, कि इन्साफेरे दिहाड़े परमेशर, ज़ै सज़ा सूर ते सैदा नगरां केरे लोकन देलो, तुशशी सज़ा तैस करां भी जादे भोली। 23 ते हे कफरनहूम नगरेरे लोकव, कुन तुस सोचतथ कि स्वर्गे मां तुशशी आदर भोनीए! नई तुस त नरके गाले ज़ैडी पापी लोकन सज़ा मैलेली! किजोकि ज़ैना चमत्कार तुसन मां किये, अगर मीं एना सदोम नगरे मां कियोरे भोथे त सदोम नगर अज़ तगर भी भोनू थियूं। 24 पन अवं तुसन ज़ोतां कि इन्साफेरे दिहाड़े परमेशर ज़ै सज़ा सदोम नगरेरे लोकन देलो, तुशशी सज़ा तैस करां भी जादे भोली।”

ⓂⓂⓂⓂ ⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂ
(ⓂⓂⓂⓂ 10:21-22)

25 तैखन यीशुए ज़ोवं, “हे बाजी, स्वर्ग ते धेरतरे प्रभु, अवं तेरू शुक्र केरतां कि तीं एना गल्लां अक्लमन्द ते समझदार लोकन करां छपेइतां रेख्खी ते तैन लोकन पुड़ बैदी की, ज़ैना निक्के बच्चां केरे ज़ेरे आन। 26 हाँ, हे बाजी तीं एन्ने रोड़ लग्गू।

27 “मेरे बाजेई सब किछ् मेरे सुपुर्द कियोरूए; कोई होरो मट्टे‡ न ज़ाने, सिर्फ बाजी ज़ानते; कोई बाजी§ न ज़ाने सिर्फ मट्टू ज़ानते, या तै मैन्हु बाजी ज़ानते ज़ैस पुड़ मट्टू बांदो केरने चाए।

28 “हे मेहनत केरनेबाले* लोकव, ते भारे सेइं थकोरे लोकव मीं कां एज्जा; अवं तुसन आराम देइलो। 29 मेरे अधीन एन्चरे भोथ ज़ेन्चरे दांत जूँए हैठ भोते, ते ज़ैन किछ् अवं तुसन शिखालताई तैस शिख्वा, किजोकि अवं शरीफ आई ते दिलेरो नम्र आई ते तुशशी जानी आराम मैलेलो। 30 ज़ै भार अवं तुसन देइलो तै पोल्लोए, तुस तैस आरामे सेइं छुई सकतथ।”

12

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ ⓂⓂ
(ⓂⓂⓂⓂⓂ 2:23-28; ⓂⓂⓂⓂ 6:1-5)

1 यीशु आरामेरे दिहाड़े ऊडारन मांमेइं एक्की बत्तां च़लोरे थियो, ते तैसेरे चेलन ढ़लुख लग्गी, ते तैना शिल्लां टलोइतां खाने लग्गे। 2 फरीसी लोकेई एन लेइतां यीशु सेइं ज़ोवं, “तक! तेरे चले तैन कम केरने लोरेन ज़ैन आरामेरे दिहाड़े केरनू जेइज नई।” 3 यीशुए तैन जुवाब दित्तो, “कुन तुसेई पवित्रशास्त्रे मां कधे नई पढेरू कि जेइस इशशे पूर्वज दाऊद राज़ो त तैसेरे साथी ढ़लुखोरे थिये त तैनेई कुन कियेरू थियूं? 4 तै केन्चरे परमेशरेरे घरे मां जेव, ते ज़ैना च़ैदोरी रोट्टी थी तैट्टां एन्तां एप्पू भी खेइ, ते अपने सैथन भी दित्ती, ते तैनेई भी खेइ हालांकी तैना रोट्टी खैनी तैन केरे लेइ ज़ेइज थी, तैना सिर्फ याजक खेइ सकते थिये। 5 या तुसेई मूसरो कानूने मां एन भी नई पढेरू, कि याजक मन्दरे मां आरामेरे दिहाड़ेरी विधि न मन्ने पुड़ भी बेकसूर भोतन। 6 पन अवं तुसन सेइं ज़ोताई कि इडी तैए, ज़ै मन्दरे करां भी बड्डोए। 7 अगर तुस एल्हेरो मतलब ज़ानेथे कि, अवं बलिदान नई बल्के दया पसंद केरताई, त तुस बेकसूर कुसुरवार न बनाथे। 8 किजोकि मैनेरू मट्टू यानी अवं आरामेरे दिहाड़ेरो भी प्रभु आई।”

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ
(ⓂⓂⓂⓂⓂ 3:1-6; ⓂⓂⓂⓂ 6:6-11)

9 यीशु तैट्टां निस्तां तैन केरे प्रार्थना घरे मां जेव। 10 तैडी अक मैन्हु थियो, ज़ेसेरो हथ शुक्कोरो थियो, तैनेई यीशु दोष लानेरे बहाने सेइं तैस पुच्छ्, “कुन आरामेरे दिहाड़े कोई बझानो जेइज्जे?” 11 तैनी तैन जो ज़ोवं, “तुसन मरां कौने, ज़ेसेरी अक्के भैड भोए, ते तै आरामेरे दिहाड़े गत्ते मांजो बिछ्छे, त तुस कुन तैस तैट्टां बेइर न कढेले? 12 मैनेरी कीमत त भैडी करां केत्ती जादे! एल्हेरेलेइ आरामेरे दिहाड़े रोड़ कम केरनू जेइज्जे।” 13 तैखन यीशुए तैस

† 11:21 11:21 टाट पलेटतां ते मांजनी मां बिश्तां: बडे पेइले लोक टाट पलेटतां ते मांजनी मां बिश्तां अपने पापन करां मन फिराते थी। ‡ 11:27 11:27 मट्टे: मट्टे यानी यीशुए § 11:27 11:27 बाजी: बाजी मतलब परमेशर। * 11:28 11:28 मेहनत केरनेबाले

मैन्हु जो ज़ोवं, “अपनो हथ अग्रोवं केर ।” तैनी मैने अपनो हथ अग्रोवं कियो, ते अकदम तैसेरो हथ बेज्झोव ।
14 तैखन फरीसी लोक बेइर गोइतां तैसेरी खलाफ साज्जिण केरने लग्गे, कि एस केन्चरे मारम?

ⓄⓄⓄⓄⓄⓄⓄⓄ ⓄⓄⓄⓄⓄⓄⓄⓄ ⓄⓄⓄⓄ

15 इन बुझतां यीशु तैट्टां चलो जेव । ते बड़े लोक तैस पत्ती चले, ते तैनी तैना सब बज्झाए । 16 ते तैनी तैना खबरदार किये, कि मेरे बारे मां केन्ची सेइं न ज़ोइयथ । 17 ताके यशायाह नेबेरी ज़ोरी तै गल पूरी भोए:

18 “हेरा ई मेरो सेवके ज़ै मीं चुनोरोए, ई मेरो ट्लारोए ज़ैस पुड़ मेरो दिल खुशे, अवं अपनि आत्मा तैस पुड़ छुडेले, ते तै गैर कौमन मां गोइतां इन्साफेरी खबर शुनालो । 19 तै न लड़ाई केरेलो, ते न शौर,

ते बज़ारन मां कोई तैसेरी आवाज़ न शुनेलो ।

20 ते ए द्दलेन्चोरे निरैठरे डाले न टलोडेलो,

ते न बलतो दीयो हिशाहो जां तगर इन्साफ भारी न भोए ।

21 ते तैसेरे नंवे पुड़ गैर कौमां उमीद रेखेली ।”

ⓄⓄⓄⓄ ⓄⓄ ⓄⓄⓄⓄⓄⓄ

(ⓄⓄⓄⓄⓄ 3:20-30; ⓄⓄⓄⓄⓄ 11:14-23)

22 तैखन लोकेई अक मैन्हु यीशु कां आनो ज़ै कानो ते लट्टो थियो ते तैस पुड़ भूतेरो सैयो थियो, तै तैनेई तैस कां आनो, तैनी तै ठीक कियो, ते तै लहने लगो ते गल्लां भी केरने लगो । 23 एन हेरतां लोक हैरान भोइतां ज़ोने लग्गे, “कुन एन दाऊदेरू मट्टूए?” 24 पन फरीसी लोकेई एन शुन्तां ज़ोवं, “ए त भूतां केरे प्रधान शैतानेरी मदती सेइं भूतां केरो सैयो कढते ।” 25 यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस राज्जे मां फूट पेचे, तैन राज्ज बनोरू न रेइ सके, ते केन्ची नगर या खानदाने मां फूट पेचे, तैन भी बनोरू न राए । 26 अगर शैतान एप्पू अपने भूतां कढे, त तै अपनो मुखालफ एप्पू भुओ, त फिरी तैसेरू राज्ज केन्चरे बनोरू रेइ सकते? 27 अगर अवं शैतानेरी मदती सेइं भूतां केरो सैयो कढताई त तुश्शे अपने मैन्हु केसेरी मदती सेइं कढतन? तैन्ना तुश्शो हाकिम भोले । 28 पन अगर अवं परमेशेरी आत्मारें मदती सेइं भूतां केरो सैयो कढताई त परमेशेरू राज्ज तुश्शे नेडे पुज़ोरूए । 29 या कोई मैन्हु केन्ची ज़ोरेबाले मैनेरे घरेरे मां गोइतां तैसेरो माल तांतगर लुट्टी न सके, जांतगर कि तै पेइले तैस ज़ोरेबाले मैन्हु बंधी न छुडडे । तैखन तै तैस ज़ोरेबाले मैनेरो माल लुट्टी सकते । 30 ज़ै मीं सेइं साथी नई तै मेरे खलाफे, ते ज़ै मीं सेइं साथी नई तै अकोट्टू न केरे तै इरां उरां बिट्लते । 31 एल्हेरेलेइ अवं तुसन सेइं ज़ोताई कि, मैन्हु केरे सारे पाप ते तुहीन माफ़ भोली, पन पवित्तर आत्मारी तुहीन माफ़ न भोली । 32 ज़ै कोई मैनेरे मट्टेरे खलाफ किछ् ज़ोलो, त तैसेरो ए पाप माफ़ कियो गालो, पन ज़ै पवित्तर आत्मारी तुहीन केरे, त तैस मैन्हु न इस दुनियाई मां माफ़ भोलू ते न एजने बैली दुनियाई मां माफ़ भोलू ।”

ⓄⓄⓄ ⓄⓄ ⓄⓄⓄⓄⓄⓄ ⓄⓄ

(ⓄⓄⓄⓄⓄ 6:43-45)

33 “अगर बुट रोडे, त तैसेरे फल भी रोड़ो भोलो, अगर बुट बुरोए त तैसेरे फल भी बुरो भोलो, किजोकि बुट अपने फले सेइं पिशैनोते । 34 तुस ज़हरीले सपेरे बच्चां केरे बुरे भोइतां रोड़ी गल केन्चरे ज़ोई सकतथ? किजोकि ज़ैन दिले मां भोते तैन्ने ज़बानी पुड़ एइते । 35 रोड़ो मैन्हु दिलेरे रोडे खजाने मरां रोड़ी गल्लां कढते, ते बुरो मैन्हु बुरे दिलेरे बुरे खजाने मरां बुरी गल्लां कढते (दिल खजानेरो ज़ेरोए) । 36 अवं तुसन सेइं ज़ोतां, कि ज़ैना-ज़ैना निक्केमी गल्लां मैन्हु ज़ोले, इन्साफेरे दिहाडे लोकन अपनि हर एक्की तैस गल्लरो हिसाब देनो भोलो । 37 किजोकि तू अपने गल्लेई सेइं धर्मी ते अपने गल्लेई सेइं दोषी भोलो ।”

ⓄⓄⓄⓄⓄⓄ ⓄⓄⓄⓄⓄⓄⓄⓄⓄ ⓄⓄⓄⓄ

(ⓄⓄⓄⓄⓄ 8:11-12; ⓄⓄⓄⓄⓄ 11:29-32)

38 इस पुड़ किछ् शास्तरी ते फरीसी लोकेई तैस सेइं ज़ोवं, “हे गुरु अस तीं करां कोई निशान हेरनो चातम ।”

39 तैनी तैन जुवाब दित्तो, “इस ज़मानेरे बुरे ते बदमाश लोक निशान हेरनो चातन, पन तैन योना नेबेरे निशानेरे अलावा होरो कोई निशान न दित्तो गालो । 40 ज़ेन्चरे योना नबी ट्लाई दिहाडे ते ट्लाई रातन मेच्छलेरे पेटे मां राव, तेन्चरे मैनेरू मट्टू यानी अवं भी ट्लाई दिहाडे ते ट्लाई रातन ज़मीनी मां रालो । 41 नीनवेरे लोक इन्साफेरे दिहाडे इस ज़मानेरे लोकन सेइं साथी खड़े भोइतां एन दोषी बनाले, एल्हेरेलेइ कि तैनेई योनारो प्रचार शुन्तां पापन करां मन फिराव, ते हेरा इडी तैए, ज़ै योना करां भी बड्डोए, पन तुसेईं पापन करां मन फिरानो न चाव । 42 दक्षिणेरी

रानी इन्साफेरे दिहाडे इस ज़मानेरे लोकन सेइं साथी खड़ी भोइतां दोषी बनाली, किजोकि तै बड़े दूरेरां सुलैमान राजेरू ज्ञान शुन्नेरे लेइ ओरी थी, पन हेरा इड़ी तैए, जै सुलैमाने करां भी बड्डोए।”

॥॥॥॥॥ ॥॥॥॥॥॥ ॥॥॥॥ ॥॥॥॥
(॥॥॥॥ 11:24-26)

43 “जैखन केन्ची मैन्हु मरां भूतां केरो सैयो निसते, त तै अपने आरामेरे लेइ बेरान ठारां हंठते, पन जैखन तैस ठार न मैल्ले। 44 तैखन ज़ोते, कि अवं वापस अपने तैस्से घरे मां गाताईं जैस मरां निसोरो आई, ते जैखन तै वापस एइते, त तैस तैन घरे खाली, धोवेरु ते साफ सुथरु सज्जो-सज्जेवरु मैलते। 45 तैखन तैन गाते ते सत बुरां भूतां एप्पू सेइं साथी आनते, ते तैन सब तैस मां रहतन, ते तैस मैनेरो हाल पेडले हाले करां भी जादे बुरो केरतन, तेन्चरे इस ज़मानेरे बुरे लोकां केरो हाल भी एरो भोनोए।”

॥॥॥॥॥॥॥ ॥॥॥॥॥॥ ॥॥ ॥॥॥॥॥
(॥॥॥॥॥ 3:31-35; ॥॥॥॥॥ 8:19-21)

46 जैखन तै मैनन् सेइं गल्लां केरने लोरो थियो, त तैसेरी अम्मा ते कने तैसेरे ढला खड़े थी, तैना तैस सेइं गल्लां केरनि चाते थिये। 47 केन्चे गेइतां तैस सेइं ज़ोवं, “बेइर तेरी अम्मा ते ढला खड़े आन, तैना तीं सेइं गल केरनि चातन।” 48 एन शुन्तां तैनी पतो देनेबाले जो ज़ोवं, “कौने मेरी अम्मा, ते कौन मेरे ढला?” 49 ते अपने चेलां केरे पासे हथ अग्रोवं केरतां ज़ोवं, “हेरा मेरी अम्मा, ते मेरे ढला इना आन। 50 किजोकि जै कोई मेरे स्वर्गेरे बाजेरी मेर्जी पुड़ च़लते तैए मेरो ढला ते मेरी बेइन्न, ते मेरी अम्मा आए।”

13

॥॥॥ ॥॥॥॥॥॥॥॥॥॥॥ ॥॥॥॥॥॥॥
(॥॥॥॥॥ 4:1-9; ॥॥॥॥॥ 8:4-8)

1 तैस दिहाडे यीशु घेरां निस्सो, ते गलील समुन्दरेरे बन्ने पुड़ गेइतां बिश्शो। 2 तैसेरे च़ेवरे पासन लोकां केरि एतरी भीड़ अकोट्टी भोइ, ते तै एक्की किशती मां च़ढो ते बिश्शी जेव, ताके तै सेब्भी लोकन परमेशेरेरी गल्लां केरि शिक्षा देइ सके, ते सारे लोक बन्ने पुड़ खड़े राए। 3 तैखन तैनी तैन सेइं कहैनी केरे तरीके सेइं बेइडि गल्लां ज़ोई, “एक्सां अक बीज बेनेबालो बीज बेने जो जेव। 4 बीज बेते बार किछ् बीज बत्तेरे इलेखी बिछ् डू त चुडोल्लेई एइतां तैन बीज चुनू। 5 किछ् बीज घोडनबाली ज़मीनी पुड़ बिछ् डू, ज़ेड़ी तैस डुग्धी मित्ती न मेलनेरे वजाई सेइं तैन लूशी उग्गू ते बूटो लगो। 6 पन जैखन दिहाडो निस्सो, त तै निकडो बूटो फुक्कोई जेव। जील न छ् ड्डनेरे वजाई सेइं शुक्की जेव। 7 ते किछ् बीज कंटां केरे झैल्लन मां बिछ् डू। जैखन तैड़ी बूटो लगो, त कंटां केरे झैल्लेई भी बेडोइतां तै बूटो दबेइ छ् ड्डो। 8 पन ज़ैन रोड़ी ज़मीनी मां बिछ् डू, त तैस फल भी लगो केन्ची शौव गुणा केन्ची शठ गुणा, ते केन्ची ट्ली गुणा। 9 जै कोई समझनू चाते, तै ध्याने सेइं शुने ते समझे।”

॥॥॥॥॥॥॥ ॥॥॥॥॥॥॥ ॥॥॥॥ ॥॥॥॥॥
(॥॥॥॥॥ 4:10-12; ॥॥॥॥॥ 8:9-10)

10 च़ेलेई यीशु कां एइतां पुच़्छू, “तू लोकन सेइं कहैनी केरे तरीके सेइं गल्लां किजो केरतां?” 11 तैने जुवाब दित्तो, “तुसन त स्वर्गेरे राज़ेरे भेदां केरि समझ दित्तोरीए” पन होरि लोकन नई। 12 किजोकि जैस कां परमेशेरेरी मर्जी समझनेरी इच्छा आए, तैस परमेशर जादे समझ देलो। पन जैस कां परमेशेरेरी मर्जी समझनेरी इच्छा नई, तैस केरां, थोड़ी ज़ेरि समझ, जै तैस कां आए, तै भी नी गाली। 13 अवं तैन सेइं एल्हेरेलेइ कहैन्न मां गल्लां केरतां, कि तैन, तैना बार-बार शुनेले, पन मेरी गल न समझेले। 14 तैन केरे बारे मां यशायाह नेबेरी भविष्यवाणी पूरी भोतीए,

“तुस कन्नेई सेइं त शुनेले पन समझेले न, तुस एछ्छन सेइं त लाएले पन पिशैनी न सकेले।”

15 “किजोकि एना लोकां केरे दिलन पुड़ चरभी भेरोरीए,
ते एना कन्न सेइं उकडु शुन्तन, ते एनेई अपनि एछ्छी तुमोरिन,
एरू न भोए कि तैना एछ्छेई सेइं लहन,
ते कन्नेई सेइं शुन्न ते दिले सेइं समझन,
ते मेरे पासे फिरन ते अवं तैन बज्जेइं।”

16 “पन तुशशी एच्छी धन आन, कि तुस लातथ ते तुशशे कन्न धन आन किजोकि तुस शुन्तन। 17 अवं तुसन सेइं सज्ज जोताई, कि बडे नेवी ते धेरमी लोकेईं चाव कि जैन गल्लां तुस हेरतथ तैना हेरन, पन न हेरी बेटि, ते जैना गल्लां तुस शुन्तन शुन्न, पन न शुनी बेटि।”

[\[१३:१६-२०\]](#) [\[१३:२१-२३\]](#) [\[१३:२४-२८\]](#)
([\[१३:१६-२०\]](#) 4:13-20; [\[१३:२१-२३\]](#) 8:11-15)

18 “हुनी तुस बीज बेनेबालेरी कहैनरो मतलब शुना। 19 बीज बेनेबालो तै आए, जै परमेशेरी गल्लां लोकन शुनाते। जैना मैन्हु परमेशेरी गल्लां शुन्तन, तैन मरां किछ लोक तैस बत्तेरे जेरे आन, जेडी बीज बिछडते। तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केडडी छडते। 20 ते जैन घोड़नबाली जमीनी मां बेवं, एना तैना आन, जैना खुशी सेइं वचन शुन्तन कबूल केरतन। 21 पन एप्पू मां जील न रखनेरे वजाई सेइं तैन थोडे दिहाडी केरूए, ते जैखन वचनेरे वजाई सेइं तैन पुड़ मुसीबत या जुलम भोते त तैखने ठोकर खातन। 22 होरे किछ लोक जैना परमेशेरी गल्लां शुन्तन, तैना तैस कटां केरे झैल्लां केरे जमीनेरे जेरे आन। पन दुनियारो फिकर ते दौलतरे वजाई सेइं धोखो खातन, ते तैना बेफल रेइ गाते। 23 जैन रोडि जमीनी मां बेवं, एन तैना लोकन जैना वचन शुन्तन ते समझतन, ते तैस फल भी लगते कोन्ची शौव गुणा कोन्ची शठ गुणा, ते केन्ची टलही गुणा।”

[\[१३:२४-२८\]](#) [\[१३:२९-३१\]](#) [\[१३:३२-३४\]](#)

24 यीशुए तैन अक होरि मिसाल देइतां ज़ोवं, “स्वर्गेरू राज तैस मैनेरू जेरूए जैनी अपने ऊडारे मां रोडू बीज बेवं। 25 पन जैखन लोक झुलोरो थिये, त तैसेरे दुश्मने एइतां तैसेरे ऊडारे मां गेहुं केरे बीजे मांमेइं जंगली बीज बेवं। 26 जैखन पट्लां ते शिल्लां लगां लगने त तै जंगली डाल भी साथी लगगो। 27 मालिकेरे नौकरेईं एइतां तैस सेइं ज़ोवं, हे मालिक, कुन तीं अपने ऊडारे मां रोडू बीज न थियूं बेवरू, फिरी जंगली तैस मां कोट्टां अव?” 28 तैनी तैन सेइं ज़ोवं, एन केन्ची दुश्मनेरू कम्मे, नौकरेईं पुच्छू कुन तू चातस, कि अस गेइतां तैन पुट्टी छडम? 29 पन तैनी ज़ोवं नन्ना, एरू न भोए कि तैस सेइं साथी तुस गेहुं भी पुटथ। 30 फसल लुन्ने तगर दुइये साथी बेडोने देथ, ते लुनते बार अवं एप्पू लुन्ने बालन सेइं ज़ोइलो, कि पेइले जंगली बीज लुन्तां अगगी मां फुकनेरे लेइ अकोट्टू केरा, ते फिरी तुस गेहुं मेरे कोठारे मां जम्हां केरतां रख्वा।”

[\[१३:३५-३९\]](#) [\[१३:४०-४४\]](#) [\[१३:४५-४९\]](#)
([\[१३:३५-३९\]](#) 4:30-32; [\[१३:४०-४४\]](#) 13:18-19)

31 तैनी तैन अक होरि मिसाल देइतां ज़ोवं, “स्वर्गेरू राज शेरीएरे बीजेरू जेरू आए, जैन एक्के मैने आनू ते अपने ऊडारे मां बेवं। 32 एन बीज सेब्भी बीजन करां निक्कु भोते, पन जैखन तैन बीज बेव गाते, त तैन उगतां सारे निक्के-निक्के बुट्टन केरां बड्ड भोते। ते एरो बुट बनते इडी तगर कि अम्बरेरां चुडोल्लू भी तैस पुड़ विशतन।”

[\[१३:४५-४९\]](#) [\[१३:५०-५४\]](#)
([\[१३:४५-४९\]](#) 13:20-21)

33 तैनी तैन अक होरि मिसाल देइतां ज़ोवं, “स्वर्गेरू राज अम्लटेरू जेरूए, जैन केन्ची कुआन्शां आनू, ते हछे अट्टे मां मलाव ते सारू अट्टू खमीर बेनि ज़ोवं।”

[\[१३:५५-५९\]](#) [\[१३:६०-६४\]](#) [\[१३:६५-६९\]](#)
([\[१३:५५-५९\]](#) 4:33-34)

34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगैर तै तैन किछ न थियो शुनातो। 35 ताके तैन वचन जैन नेबे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेलो, ते तैना गल्लां ज़ोइलो जैना दुनिया बन्ने करां पेइली छेप्पोरी थी।”

[\[१३:६५-६९\]](#) [\[१३:७०-७४\]](#) [\[१३:७५-७९\]](#)

36 तैखन यीशु लोकन करां अलग भोइतां घरजो अव, ते तैसेरे चलेईं तैस कां एइतां ज़ोवं, “तू असन ऊडारेरे जंगली बीजेरी कहैनरो मतलब समझा।” 37 तैनी तैन जुवाब दित्तो, “रोडू बीज बेनेबालो मैनेरू मट्टूए। 38 ऊडार ई दुनियाए, ते रोडू बीज राज हासिल केरनेबाले लोक, ते जंगली बीज शैतानेरे लोक आन। 39 ते तै दुश्मन जैनी

तैन बेवरू थियूं तै शैताने, लुन्नेरो मतलब इस दुनियारो अन्त भोनोए, ते लुन्ने बाले स्वर्गदूतन। 40 जेन्चरे जंगली बीजेरे ग्लेव अकोट्टे केरतां अग्गी मां फुकतन, तेन्चरे इस दुनियारो अन्त भोनोए। 41 मैनेरू मट्टू अपने स्वर्गदूतन भेजेलू, ते तैन केरे राज्जे मां ठोकरारी वजा ते बुरां कम्मां केरनेबालन अकोट्टे केरेले। 42 ते तैन अग्गारे कुण्डे मां छडेले, जैडी तैना लोक लेरां देते ते दंत चापते राले। 43 तेइस धर्मी लोक अपने बाजी केरे राज्जे मां दिहाड़े जेरे चमकेले। जै कोई समझनू चाते, तै ध्याने सेइं शुने ते समझे।”

११११११ ११११११११ १११११

44 “स्वर्गेरू राज तैस दौलतरू जेरू ए, जै एक्की ऊडारे मां दबोरी थी, जै एक्की मैने तोप्पी, ते तैस मैल्ली भी, ते फिरी तैने छपेइतां छडी ते खुशी सेइं अपनू सब किछ बेचतां तैन ऊडार धिनु।

११११११ १११११

45 “स्वर्गेरू राज तैस बुपैरेरू जेरू ए, जै कीमती मोती तोपतो थियो। 46 जैखन तैस अक कीमती मोती मैल्लो, त तैनी अपनू सब किछ बेचतां तै मोती धिनो।

१११११११ १११११

47 “स्वर्गेरू राज तैस मेछली जालेरू जेरू ए, जैन समुन्द्रे मां छडू ते तैस मां हर किसमेरी मेछली लेग्गी। 48 ते जैखन जाल भेरोई ज़ोवं त झिरेइं जाल खिचतां कनारे पुड़ आनू, ते बिशतां रोडी-रोडी मेछली टोकरन मां रेख्वी ते बुरी-बुरी मेछली शैरी छैडी। 49 दुनियारे अन्ते मां भी एरू भोनूए, स्वर्गदूतेई एइतां दुष्ट लोक, धर्मी लोकन करां अलग केरनेन। 50 ते तैना अगारी भेठी मां छडनेन तैडी लेरां ते दंत चापने भोले।

१११११११ ११ ११११११११ ११११११११

51 “कुन तुसेईं एन सेरी गल्लां सेमझी?” तैनेई ज़ोवं, “हाँ” असेईं सेमझी। 52 फिरी यीशुए तैन सेइं ज़ोवं, “हर अक शास्त्री जै स्वर्गेरे राज्जेरो चेलो बनोरोए एक्की एरे मुकान मालिकेरो ज़ेरोहे, जै अपने खजाने मरां नव्वीं ते पुरैनी चीजां कढते।”

१११११११ ११११११ ११११ १११११११११ १११११११११
(१११११११ 6:1-6; ११११११ 4:16-30)

53 जैखन यीशुए एना सब कहैनी शुनेई त ते तैट्ठां अग्रोवं चलो जेव। 54 ते अपने नगर मां एइतां तैट्ठेरे प्रार्थना घरे मां गेइतां शिक्षा देने लगो, ते लोक तैसेरी शिक्षा शुन्तां हैरान भोए ते ज़ोने लगो: “ए अक्ल बुधी ते एना चमत्कार एस कोट्ठां हासिल भोए। 55 एन त तैस टलखानेरू मट्टू आए ते एसेरे अम्मारू नवं मरियम ते एसेरे ढलां केरू नवं याकूब, यूसुफ, शमौन ते कने यहूदा आन, 56 ते एसेरी सब बेइनां इश्शे इडी रेइचन, फिरी एसमां ई काबलीत कोट्ठां आई?”

57 एन्चरे तैन लोकेई इन्कार कियो। पन यीशुए तैन सेइं ज़ोवं, “नबी अपने नगर मां ते अपने घेरे अलावा होरि कोन्ची ठारी बेइजत न भोए।” 58 ते तैने तैडी तैन केरे विश्वास न केरनेरे वजाई सेइं जादे चमत्कार न हिराए।

14

१११११११११ १११११११११११ १११११११११११११ १११११११११११११
(१११११११ 6:14-29; ११११११ 9:7-9)

1 जेइस हेरोदेस जै मुलखेरे च़ेवरोवं हिस्से पुड़ हकोमत केरतो थियो, तैनी यीशुएरे बारे मां शुनू। 2 तैनी अपने नौकरन सेइं ज़ोवं, “ए यूहन्ना आए जै बपतिस्मो देनेबालोए, ए मुडदन मरां जीतो भोरोए, एल्हेरेलेइ तै चमत्कार हिराते।”

3 किजोकि हेरोदेसे अपने ढलाए फिलिप्पुसेरी कुआन्श हेरोदियासेरी वजाई सेइं यूहन्ना टलेइतां बन्धोवरो ते कैदखाने मां छडोरो थियो। 4 किजोकि यूहन्ना हेरोदेस सेइं ज़ोरू थियूं, कि ए रखनी तेरे लेइ जेइज नई। 5 ते हेरोदेस तैस कत्ल केरनो चातो थियो, पन लोकन करां डरतो थियो, किजोकि लोक तैस नबी मन्ते थिये।

6 पन जैखन हेरोदेसेरी जर्म दिहैडी आई, त हेरोदियासेरे कुइयां मेहमाना केरे सामने नेचतां हेरोदेस खुश कियोरो थियो। 7 एल्हेरेलेइ तैनी वादो कियोरो थियो, “कि जैन किछ तू मग्गेली, अवं तीं तैन्ने देलो।” 8 तैसां अपने अम्मारे शिखालने पुड़ ज़ोवं, “मीजेई यूहन्ना बपतिस्मो देनेबालेरी क़ोडी थाले मां मग।” 9 राजे बडो अफ़सोस भोव, पन अपने मेहमाना केरे सामने ते कसम खानेरी वजाई सेइं हुकम दित्तो कि देथ। 10 ते तैनी कैदखाने मां लोक भेजतां

यूहन्नारी करोड़ी कटाई। 11 ते तैसेरी करोड़ी थाले मां रेखतां कुडये कां दिती, ते तै अपनि अम्मा कां घिन्तां जेई। 12 तैखन तैसेरे चले आए, ते तैनेई तैसेरी लाश नेइतां देबतां छडी ते गेइतां यीशुए पतो दित्तो।

[\[22222 500 22222 222222 222222\]](#)
([\[22222 6:30-44; 22222 9:10-17; 22222222 6:1-14\]](#))

13 जैखन यीशुए एन शुनू, त तै किशतरे जिरिये अकेन्ती ठारी जो चलो जेव, ते लोक एन शुन्तां नगर नगरेरे पैदल तैस पत्ती चले जे। 14 जैखन यीशु किशती मरां ओस्सो त तैनी बडे लोक पतोरं एइते लाए, ते तैस तैन पुड बडो तरस अव, ते तैनी तैन केरे बिमार लोक बज्झाए।

15 जैखन इलोझ भोइ, त यीशुएरे चलेई तैस कां एइतां ज़ोवं, “ई सुनसान ठार आए, त चिर भी बडू भोरू आए। ते एन लोकन भेज्जी छड ते कोस्कोई इलॉव्वन मां गेइतां किछ खाने जो घिन्न।” 16 यीशुए तैन सेइं ज़ोवं, “एना भेज्जने जरूरी नई! तुस्से एन किछ खाने जो देथ।” 17 चलेई तैस सेइं ज़ोवं, “इडी असन कां पंच रोट्टी ते दूई मेछली केरे अलावा होरू किछ नई।” 18 तैनी ज़ोवं, “तैन इरां मीं कां आनां।” 19 तैखन यीशुए लोकन घासे पुड उन्डे बिशनेरे लेइ ज़ोवं, ते पंच रोट्टी ते दूई मेछली हथ्ये मां रेख्खी, ते अम्बरेरे पासे तेकतां शुकर कियूं, ते रोट्टी टलोडी-टलोडी अपने चलन कां दिती, ते चलेई तैन लोकन दिती। 20 ते सारे मैन्हु खेइतां रेज्जी जे। तैल्ला पत्ती, यीशुएरे चलेई बचोरे टुकडन सेइं 12 टोकरी भेरि। 21 रोट्टी खानेबाले लोकां केरि तैधात कुआन्शां ते बच्चां केरे अलावा कोई 5000 मडद थिये।

[\[22222222 22222 22222 222222\]](#)
([\[2222222 6:45-52; 22222222 6:15-21\]](#))

22 तैल्ला पत्ती, यीशुए अपने चलन हुक्म दित्तो कि, तुस किशती मां चेइतां मीं केरां पेइले समुन्दरेरे उस पार जो गाथ ते अवं एन लोकन वापस भेज्जतां एइताई। 23 लोकन भेज्जनेरे पत्ती, यीशु तैट्ठां निस्तां नेडे एककी पहैडी पुड प्रार्थना केरनेरे लेइ जेव। ते इलोझी तै अकैल्लो थियो। 24 तैखन किशती बन्ने करां दूर पुजोरी थी, किजोकि एगरोवरां बडी तेज हवा चलोरी थी। 25 ते लगभग झेज्जरेरे चेवरे बजेई जैखन हेजू आंधरू थियूं, यीशु समुन्दरेरे पैनी पुड चलेतां अपने चलन कां अव। 26 जैखन चलेई यीशु समुन्दरे पुड चलतो लाव त तैना डेरि जे, तैनेई बुझ्, “ए भूत ओरोए,” ते डेरतां चिन्डां लगगे मारने। 27 यीशुए तैखने तैन सेइं रोडेचारे गल्लां की ते ज़ोवं, “हिम्मत रख्खा डरा नन्ना, अवं आई।” 28 पतरसे तैस जुवाब दित्तो, “हे प्रभु अगर तू आस, त मीं भी हुक्म दे ते अवं भी पैनी पुड चलतो तीं कां एज्जी।” 29 तैनी ज़ोवं, “एई!” तैखन पतरस किशती मरां ओस्तां यीशु कां गानेरे लेइ पैनी पुड मेइं चलने लगगे। 30 पन तेज हावी सेइं छेल्ली चलने लेग्गी ते तै डेरि जेव, ते डुबने लगगे तैखन तैनी चिन्डां मेरतां ज़ोवं, “हे प्रभु मीं बच्चा।” 31 यीशुए लूशी अपने हथ्ये सेइं झफ देइतां पतरस टलातो, ते तैस सेइं ज़ोवं, “हे घट भरोसे बाला तीं किजो शक की?” 32 जैखन तैना किशती मां बिशो ते हवां रुकी जेई। 33 तैखन जैना किशती मां बिशोरे थिये, त तैनेई तैस कां मथ्यो टेको ते ज़ोने लगगे, “तू सच्चे परमेशेरू मट्टूस।”

[\[2222 222222222 222222 2222 222222 222222222\]](#)
([\[222222 6:53-56\]](#))

34 जैखन तैना गलील समुन्दर पार केरतां गन्नेसरत नव्वेरे जगाई पुड पुज्जे। 35 त तैट्टेरे लोकेई यीशु पिशानो ते आसेपासेरे इलाके मां खबर दिती, ते सारे बिमार तैस कां आने। 36 ते तैनेई यीशु सेइं मिन्त केरते थिये कि, तैन तैसेरे लिगडन सेइं हरने दे। ते जेत्रेइं तैसेरे लिगडन सेइं हथ लाव तैना सब बेज्झोए।

15

[\[2222 2222222 22222222 22222 2222 2222\]](#)
([\[222222 7:1-13\]](#))

1 तैखन किछ फरीसी ते किछ शास्त्री लोक यरूशलेम नगरे मरां यीशु कां आए ते ज़ोने लगगे। 2 “तेरे चले बुज्जुर्गां केरि रसमरे खलाफ किजो चलतन, तैना रोट्टी खाने करां पेइले हथ न धोन?” 3 तैनी तैन जुवाब दित्तो, “तुस किजो अपने रसमन सेइं परमेशेरो हुक्म टलोडतथ? 4 किजोकि परमेशेरे ज़ोरूए, कि अपने हाज बव्वेरी इज्जत केरा, ते ज़ै कोई अपने हाज बव्वे जो बुरू ज़ोलो तै मारो गालो। 5 पन तुस ज़ोतथ, कि ज़ै कोई बाजी या अम्मा सेइं ज़ोए कि, मीं करां ज़ै किछ महत तुसन मैल्ली सकती थी, तै पेइली बलिदान भोरीए, यानी परमेशेरे जो

चढतल चाढोरीए 6 त तै अपने बाजी केरि इज्जत न केरे, एन्चरे तुस अपने रसमन सेइं परमेशेरो हुक्म टलोइतथ ।
 7 हे पाखंडी लोकव, यशायाह नेबे तुशे बारे मां ई भविष्यवाणी ठीक कियोरीए,
 8 एना लोक ऐशी सेइं त मेरी बड़ी तारीफ़ केरतन,
 पन एन केरे दिल मीं करां बड़े दूर आन ।
 9 एना लोक बेफैइदी मेरी आराधना केरतन,
 किजोकि एना मैन्हु केरे हुक्मां केरि शिक्षा देतन ।”

ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ
 (ⓂⓂⓂⓂⓂⓂ 7:14-23)

10 फिरी मैन्हु एप्पू कां कुजेइतां ज़ोवं, “शुना, ते समझा । 11 जै चीज ऐशी मां गाचे तैस सेइं मैन्हु ज़ुटो न भोए, पन जैन तैसेरे ऐशी मरां बेइरोवं निस्ते, तैन्ने तैस ज़ुटो केरते ।” 12 तैखन चेलेई यीशु कां एइतां ज़ोवं, “कुन तू जानतस कि फरीसी लोकेई ए गल शुन्तां ठोकर खाइ?” 13 तैनी जुवाब दित्तो, “जै बुट मेरे स्वर्गेरे बाजे नई लोरो तै जीलना पुटतां छुडनोए । 14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए, त तैना दुइये गढे मां बिछुडेले ।”

15 एन शुन्तां पतरसे ज़ोवं, “ए मिसाल असन समझा ।” 16 यीशुए ज़ोवं, “कुन तुस हेजू भी बेसमझाथ?” 17 “कुन तुस न जानथ, कि जैन किछ ऐशी मां गाते तैन पेटे मां गाते, ते फिरी पेटे मरां बेइर निस्ते? 18 पन जैन किछ मैनेरे अन्तरेरां निस्ते, तैन दिले मरां निसते, तैन्ने मैन्हु ज़ुटो केरते? 19 किजोकि बुरे खियाल, कत्ल केरनो, अइलाए देइने गलत कम केरनू, बदमाशी, चोरी, झूठी गवाही देनी, ते तुहीन दिले मरां निसचे । 20 एन एरी गल्लन जैना मैन्हु ज़ुटो केरचन, पन हथ धोने बगैर रोट्टी खाने सेइं मैन्हु ज़ुटो न भोए ।”

ⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂⓂ ⓂⓂⓂ ⓂⓂⓂⓂⓂⓂⓂⓂ
 (ⓂⓂⓂⓂⓂⓂ 7:24-30)

21 यीशु तैट्टां चलो जेव, ते सूर ते सैदारे आसेपासेरे इलाकेरे नेडे अव । 22 तैस इलाकेरी अक कनानी कुआन्श यीशु कां आई, ते चिन्डां मैरतां ज़ोने लगगी, “हे प्रभु दाऊदरा मट्टां, मीं पुड़ दया केर, मेरी कुइये पुड़ भूतेरो सैयोए, तैन भूत तैस बडू सताते ।” 23 पन यीशुए कोई जुवाब न दित्तो, तैसेरे चले नेडे एइतां तैस कां मिनत केरने लगगे, “एस भेज, किजोकि ए चिन्डां मारचे ते इशो पीछो न छुडे ।” 24 तैनी जुवाब दित्तो, “अवं इस्राएलेरी हेरोरि भैइडां केरे अलावा होरि कोन्ची कां नई भेजोरो ।” 25 पन तै कुआन्श आई, ते तैस कां मथ्यो टेकतां ज़ोने लगगी, “हे प्रभु मेरी मद्दत केर ।” 26 तैनी जुवाब दित्तो, “बच्चां* केरि रोट्टी नेइतां कुतरन देनी ठीक नई ।” 27 तैसां ज़ोवं “सच्चे प्रभु, पन जैन टुकड़े मालिकेरी मेजे पुड़ेरां बिछुड़तन तैना कुतरां भी खातन ।” 28 यीशुए तैस जुवाब दित्तो, “ए कुआन्श तेरो विश्वास बड़ोए, जेरू तू चातिस तेरे लेइ तेरहु भोए” ते तैसारी कुई तैखने बेज्जोइ जेई ।

ⓂⓂⓂⓂ ⓂⓂⓂ-ⓂⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ

29 यीशु तैट्टां निस्तां गलील समुन्दरेरे बन्ने पुड़ अव, तैखन तै एक्की पहाड़े पुड़ गोइतां विश्शी जेव । 30 ते बड़े लोकां केरि भीड़ तैस कां आई, तैन लोकेई एप्पू सेइं साथी टोंटे, काने, लट्टे, डोंडे ते होरे काई एरे जेरे मैन्हु साथी आने, ते तैसेरे पावन कां छुड़डे, ते तैनी तैना सब बज्झाए । 31 जैखन लोकेई हेरू कि लट्टे गल्लां केरतन कमजोर तकड़े भोतन, टोंटे च़लतन ते काने लातन त तैना बड़े हैरान भोइ जे ते इस्राएलेरे परमेशेरी तारीफ़ केरने लगगे ।

ⓂⓂⓂⓂ 4000 ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂ
 (ⓂⓂⓂⓂⓂⓂ 8:1-10)

32 यीशुए अपने चले कुजेइतां तैन सेइं ज़ोवं, “मीं एन लोकन पुड़ बड़ो तरस एइते, एना मैन्हु टलेइ दिहैडी केरे देंते बराबर मीं सेइं साथिन, ते एन कां खाने जो किछ भी नई । अवं एन नियन्ने भेजने न चैई, कोस्कोई एरू न भोए कि एना बत्ती मां रेइ गान ।” 33 तैसेरे चलेई तैस जुवाब दित्तो “अस इस सुनसान ठैरी मां एतरे लोकां केरे लेइ रोट्टी कोट्टां आनम, जैना सेम्भी केरे लेइ पूरी भोन?” 34 यीशुए पुच्छू, “तुसन कां केतरी रोट्टी आन?” तैनेई ज़ोवं, “सत रोट्टिन ते किछ निक्की मेछली भी आन ।” 35 तैखन तैनी लोकन ज़मीनी पुड़ बिशनेरे लेइ ज़ोवं । 36 ते यीशुए तैना सत रोट्टी ते मेछली टलेइ, ते परमेशेरेरू शुक्र केरतां टलोडी, ते अपने चलन कां दित्ती ते चलेई

* 15:26 15:26 बच्चां; बच्चां केरो मतलब इड़ी यहूदी लोकन कुतरां केरो मतलब गैर कौमां केरे लोकन ।

तैना मैनन् दित्ती। ³⁷ सारे मैन्हु रोट्टी खेइतां रेज्जी जे। तैल्ला पत्ती, यीशुएरे चलेई मेछली त कने रोट्टी केरे बच्चोरे टुक्डन मरां सत टोकरे भेरतां सल्ले। ³⁸ रोट्टी खाने बालां केरि तैधात कुआन्शां ते बच्चां केरे अलावा 4000 मडद थिये। ³⁹ तैखन तैने तैना सब लोक भेजे ते एप्पू किशती मां चेटतां मगदन इलाके जो चलो जेव।

16

[\[११११११ ११ ११११ ११११११ ११११ १११११ १११११ १११११११११ ११११११ ११११११\]](#)
([\[११११११ 8:11-13; १११११ 12:54-56\]](#))

1 किछ फरीसी ते किछ सदूकी लोक यीशु कां आए, “ते तैस अज्जमानेरे लेइ तैस सेइं ज़ोवं, असन कोई अम्बरेरो निशान हिरा।” ² तैनी तैन जुवाब दित्तो, “जैखन इलोझ भोतीए त तुस ज़ोतथ कि मौसम रोडोए किजोकि अम्बर लाले। ³ ते झेझां ज़ोतथ कि अज्ज आँधी एजनीए किजोकि अम्बर लाले ते बिदलारे, तुस अम्बर हेरतां अंदाजो लेइता ज़ोतथ, पन ज़मानेरो निशान न पिशैनी सकतथ! ⁴ इस ज़मानेरे बुरे ते बदमाशी केरनेबाले लोक निशान मगतन, पन तैन योना नेबेरे अलावा होरो कोई निशान न दित्तो गालो।” यीशु तैन शैरतां चलो जेव।

[\[११११११ ११ ११११११ ११११११ १११११ ११११११११११ ११११११ ११११११\]](#)
([\[११११११ 8:14-21\]](#))

5 ते यीशुएरे चले समुन्दरे पार पुज्जी जे, पन तैनेई रोट्टी साथी नेनी बिसरोरी थी। ⁶ यीशुए तैन सेइं ज़ोवं, “खबरदार फरीसी ते कने सदूकी लोकां केरे खमीरे करां हुशार रेइयथ।” ⁷ तैना एप्पू मांमेइं गलबात केरने लगगे, “असेई रोट्टी नई आनोरी, एल्हेरेलेइ तै एरू ज़ोने लोरोए।” ⁸ एन ज़ैनतां, यीशुए ज़ोवं, “हे घट विश्वैसव, तुस एप्पू मांमेइं किजो सोची राओरथ, कि असन कां रोट्टी नई? ⁹ कुन तुसन याद नई? ज़ताली मीं 5000 मैन्हु केरे लेइ पंच रोट्टी टूलोइतां दित्तोरी थी, त तुसेईं बादे मां बच्चोरी रोट्टी केरे केतरे टोकरे भेरतां सल्लोरे थिये? ¹⁰ ते तैन 4000 मैन्हु केरे लेइ सत रोट्टी ते टुकां केरि केतरी टोकरी सैल्लोरी थी? ¹¹ तुस की न समझथ, कि मीं तुसन रोट्टी केरे लेइ न थियूं ज़ोरू? पन फरीसी ते कने सदूकी लोकां केरे खमीरे करां हुशार रेइयथ।” ¹² तैखन तैन केरि समझी मां अव, कि तैनी रोट्टी केरे लेइ नई, बल्के फरीसी ते कने सदूकी लोकां केरे खमीर यानी शिक्षाई करां हुशार रानेरे लेइ ज़ोरू थियूं।

[\[१११११ ११११११ १११११ १११११ ११११११\]](#)
([\[११११११ 8:27-30; १११११ 9:18-21\]](#))

13 जैखन यीशु कैसरिया फिलिप्पी इलाके मां अव, त तैनी अपने चलन पुच्छू: “मैनेरू मट्टू कौने, लोक एस बारे मां कुन ज़ोतन?” ¹⁴ चलेई ज़ोवं, “किछ ज़ोतन यूहन्ना बपतिस्मो देनेबालोए, किछ ज़ोतन एलिय्याह, ते किछ ज़ोतन यिर्मयाह नबी ते किछ ज़ोतन नेबन मरां कोई अक आए।” ¹⁵ यीशुए तैन पुच्छू, “पन तुस मेरे बारे मां कुन सोचतथ कि अवं कौन आई?” ¹⁶ शमौन पतरसे जुवाब दित्तो, “तू ज़ीते परमेशेरू मट्टू मसीह आस।” ¹⁷ यीशुए ज़ोवं, “ए शमौन योनारे मट्टां तू धन आस, किजोकि ए गल मासे या खूने नई बल्के मेरे स्वर्गेरे बाजे तीं पुड़ बांदी कियोरीए। ¹⁸ ते अवं तीं सेइं ज़ोताई, तू पतरस आस ते अवं इस पक्के घोड़े पुड़ अपनि कलीसिया बनेइलो ते पातालेरां दारां तैस पुड़ अस्सर न केरि बटेलां। ¹⁹ अवं अपने स्वर्गेरे राज्जेरी चैबी तीं देइलो, ते ज़ैन किछ तुस ज़मीनी पुड़ बंधेले तैन स्वर्गे मां बंधोलू, ते ज़ैन किछ तू ज़मीनी पुड़ खोल्लेलो तैन सब किछ स्वर्गे मां खुल्लेलू।” ²⁰ तैखन यीशुए चलन जो ज़ोवं, ए गल केन्वी सेइं न ज़ोइयथ कि अवं मसीह आई।

[\[१११११ ११११११ १११११ ११११ १११११ ११११११११११११११११ १११११११\]](#)
([\[११११११ 8:31-33; १११११ 9:22\]](#))

21 एसेरे बाद यीशुए अपने चलन ज़ोने लगगे कि, “तैसेरू यरूशलेम नगरे मां गानू ज़रूरीए ताके यहूदी लोकां केरे बुजुर्गन, प्रधान याजकन ते शास्त्री लोकां केरे हथेइं तै बड़ो दुःख झैल्ले, ते मारो गाए ते तै टूलेइयोवं दिहाड़े फिरी ज़ींतो भोलो।” ²² पतरस तैस अलग नेइतां झिडकने लगगे, “हे प्रभु, परमेशर न केरे, तीं सेइं एरू कधे न भोलू।” ²³ यीशुए मुडतां पतरसे सेइं ज़ोवं, “हे शैतान, मीं करां दूर भो, तू मीं करां पाप करानेरी कोशिश कराने लोरोस। किजोकि तू ज़ेन्चरे परमेशर सोचते तेन्चरे नई बल्के ज़ेन्चरे मैन्हु सोचन तेन्चरे सोचतस।”

[\[११११११ ११११११ ११११११११ ११११११\]](#)
([\[११११११ 8:34; 9:1; १११११ 9:23-27\]](#))

24 तैखन यीशुए अपने चेलन सेइं ज़ोवं, “अगर कोई मीं पत्ती एजनो चाते त तै अपने आपेरो इन्कार केरे, ते अपनू क़रूस छुड़तां मीं पत्ती चले।” 25 “किजोकि ज़ै कोई अपनि जान बचानी चालो, त तै तैस गुवालो, ते ज़ै अपनि जान मेरे लेइ गुवालो, त तै तैस हासिल केरेलो। 26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फैइदो भोलो? या मैन्हु हमेशारे ज़िन्दगरे बदले कुन देलो? 27 किजोकि ज़ैखन मैनेरू मट्टू अपने बाजेरी महिमाई मां अपने स्वर्गादूतन सेइं साथी एज्जेलू, तैखन तै हर केन्ची तैन केरे कियोरे कम्मां केरो फल देलो। 28 अवं तुसन सेइं सज़ ज़ोतई कि ज़ैना इड़ी खड़े आन, ज़ां तगर मैनेरे मट्टे अपने राज्जे मां एइते न लाएले, तांतगर न मरेले।”

17

ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 9:2-13; ⓂⓂⓂⓂⓂ 9:28-36)

1 शेइ दिहाइना बाद, यीशु अपने चले पतरस, याकूब त तैसेरे ढला यूहन्ना सेइं साथी एक्की पहाड़े पुड़ जेव, जेड़ी कोई भी न थियो। 2 तैड़ी तैन केरे सामने तैसेरी शकल बेदलोई जेई, तैसेरू तुत्तर दिहाड़ेरू ज़ेरू चमकने लगू ते तैसेरां लिगड़ां लोअरां ज़ेरां छित्तां भुआं। 3 तैखन तैनेई मूसा ते एलिय्याह नबी यीशु सेइं गल्लां केरते लाए।

4 पतरसे यीशु सेइं ज़ोवं, “हे प्रभु इशू इड़ी रानू रोडूए, अगर तू चातस त आस ट्लाई डेरे बनाम, अक तेरे लेइ ते अक मूसेरे लेइ ते अक एलिय्याहरे लेइ।” 5 तै ए गल ज़ोई राहोरो थियो, अक बड़ी चमकती बिदलार तैन पुड़ एइतां रुकी, ते तैस बिदलारी मरां ई आवाज़ आई, “एन मेरू ट्लारू मट्टूए, ज़ैस पुड़ अवं खुश आई, एसेरी शुना।” 6 चले एन शुन्तां तुत्तेरे भारे बिछड़े ते बड़े डेरि जे। 7 पन यीशुए एइतां तैन सेइं हथ लाव, ते ज़ोवं, “उठा, डरा नन्ना।” 8 ज़ैखन तैनेई च़ेवरे पासन तककू, त यीशुएरे अलावा होरो कोई न लाव।

9 ज़ैखन तैना तैस पहाड़े पुड़ेरां उन्डे ओरे थिये, त यीशुए तैन ई हुक्म दित्तो, ज़ैन किछ तुसेईं लाहेरूए, “ज़ां तगर मैनेरू मट्टू मुड़दन मरां ज़ीतू न भोए तांतगर केन्ची सेइं न ज़ोइयथ।” 10 तैसेरे चलेई तैस पुच्छू, “शास्त्री किजो ज़ोतन कि मसीहेरे एजनेरां पेइले, एलिय्याह नेबेरू दुनियाई मां एजनू ज़रूरी आए?” 11 तैनी जुवाब दित्तो, “एलिय्याह ज़रूर एज्जेलो ते सब किछ बहाल केरेलो। 12 पन अवं तुसन सेइं ज़ोतई कि ‘एलिय्याह’ त पेइले ओरोए, पन लोकेई तै न पिशानो, पन ज़ैन चाऊ तैस सेइं तैन्ने कियूं, एन्चरे मैनेरू मट्टू भी तैन केरे हथ्यन सेइं दुःख भोगेलो।” 13 तैखन चलेई बुझू कि असन सेइं यूहन्ना बपतिस्मा देनेबालेरे बारे मां ज़ोने लोरोए।

ⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ
(ⓂⓂⓂⓂⓂⓂ 9:14-29; ⓂⓂⓂⓂⓂ 9:37-43)

14 ज़ैखन तैना हछे मैन्हु केरि बड़ी भीड़ी कां पुजे, त अक मैन्हु तैस कां अव, ते ज़ैधू केरे भारे बिशतां ज़ोने लगो। 15 “हे प्रभु मेरे मट्टे पुड़ दया केर, तैस मिरगरी वजाई सेइं दौवरे एइतन, ते तैस बड़ो दुखे, ते बार-बार अग्गी मां ते बार-बार पैनी मांजो खिरकते। 16 मीं तैन तेरे चेलन कां आनोरू थियूं, पन तैनेई तैन ठीक न केरि बट्टु।” 17 यीशुए ज़ोवं, “हे घट विश्वावैसव ते ढीठ लोकव, अवं केइस तगर तुसन सेइं साथी भोनोई, केइस तगर तुशशी झैलतो रेइलो? तै मीं कां आनां।” 18 तैखन यीशुए तैन भूत झिडकू, ते तैस पुड़ां सैयो निस्सी जेव, ते तैन मट्टू तैखने ठीक भोइ ज़ोवं।

19 तैखन चलेई अकैल्ले जेरे यीशु कां गेइतां पुच्छू, “अस तैस मट्टे मरां भूतेरो सायो की न केइडी सके?” 20 तैनी तैन सेइं ज़ोवं, “अपने घट विश्वासेरे वजाई सेइं, अवं तुसन सेइं सज़ ज़ोताई, अगर तुशशो विश्वास शेरीएरे ग्लेवे ज़ेतरो भी भोए, त तुस उस पहाड़े जो ज़ोले कि, ‘इट्ठां निस्तां उड़ी गा,’ त तैन गालू, ते तुशशे लेइ कोई भी गल असुखती न भोली। 21 पन इस किसमेरां भूतां प्रार्थना ते बरते बगैर न निस्सन।”

ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂⓂ
(ⓂⓂⓂⓂⓂⓂ 9:30-32; ⓂⓂⓂⓂⓂ 9:43-45)

22 ज़ैखन तैना गलीले मां थी, त यीशुए तैन सेइं ज़ोवं, “मैनेरू मट्टू भी मैन्हु केरे हवाले कियूं गालू। 23 तैना तैस मारेले, ते तैन टलेइयोवं दिहाड़े फिरी ज़ींतो भोलू।” चले एन शुन्तां बड़े परेशान भोए।

ⓂⓂⓂⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂ ⓂⓂⓂⓂⓂⓂ

24 जैखन तैना कफरनहूम नगर मां पुजे, त प्रार्थना घरेरे लेइ चुंगी घिन्ने बाले पतरसे कां एइतां पुच्छू, “कुन तुशुशो गुरू प्रार्थना घरेरी चुंगी न दे?” 25 तैनी जुवाब दित्तो, “हाँ देते।” जैखन पतरस घरे मां पुजो त यीशुए तैसेरे पुछ्छनेरे पेइले तैस सेइं ज़ोवं, “हे शमौन तू कुन समझतस? दुनियारे राजे कोन लोकन करां चुंगी घिन्तन अपने बच्चन करां या होरि लोकन करां?” 26 पतरसे तैस सेइं ज़ोवं, “होरन करां।” यीशुए तैस सेइं ज़ोवं, “त मट्टां बरी भोइ जेआं। 27 फिरी भी एल्हरेलेइ कि अस तैन ठोकर न देम, तू समुन्दरे पुड़ गेइतां कंटो लेइतां मेछ्ली टलेइयां, ते ज़ै मछ्ली पेइली लग्गेली, तैसारू आशी खोल्लां, ते तीं अक सिक्को मैलनोए, ते तै सिक्को नेइतां मेरी ते अपनि चुंगी देइयां।”

18

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂ ⓂⓂⓂⓂⓂ ⓂⓂⓂ?
(ⓂⓂⓂⓂⓂ 9:33-37; ⓂⓂⓂⓂⓂ 9:46-48)

1 तैखन चले यीशु कां आए ते पुच्छ्छने लग्गे, “स्वर्गेरे राजे मां सेबन करां बड्डो कौने?” 2 तैनी अक निकडो बच्चो एप्पू कां कुजाव, ते मझाटे खडो कियो। 3 ते ज़ोने लग्गे, “अवं तुसन सेइं सच्च ज़ोताई, कि तुस अपनो आप बेदलतां निकडे बच्चरो ज़ेरे न बनथ, त तुस स्वर्गेरे राजे मां कधी दाखल न भोले। 4 ज़ै कोई अपनो आप इस बच्चरो ज़ेरो निकडो बनालो, त तै स्वर्गेरे राजे मां बड्डो भोलो। 5 ते ज़ै कोई एरे ज़ेरे निकडे बच्चे मेरे नंवे सेइं कबूल करते, त तै मीं कबूल करते।”

ⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 9:42-48; ⓂⓂⓂⓂⓂ 17:1-2)

6 “ज़ै कोई इन निकडन मरां ज़ैना मीं पुड़ विश्वास केरतन एक्केरे लेइ ठोकर बने, त तैसेरेलेइ एन्ने रोडू आए कि बडे द्वाटेरो द्वालेइटोल तैसेरे गल्ले उन्धो दंढेइतां डुघे समुन्दरे मां डोबतां छडोरो लोइते। 7 ठोकरां केरि वजाई सेइं दुनियाई पुड़ अफ़सोस! ठोकरां लेग्गनी त ज़रुरन पन, अफ़सोस तैस मैन्हु पुड़ ज़ेसेरी वजाई सेइं ठोकर लग्गतीए। 8 अगर तेरो हथ या तेरो पाव तेरे लेइ ठोकरारो ज़िरयो बनते, त तू तैस केटतां छड, किजोकि तेरू टोंटु या कानू बेनतां ज़िन्दगी मां दाखल भोनू रोडूए, ते तेरे दुइये हथ पाव सथे भोने सेइं अगर तू हमेशारी अग्गी मां गास त तैल्ला केरतां तू टोंटो या कानो बेनतां रोडोस। 9 अगर तेरी अछ तेरे लेइ ठोकरी वजा बनती, त तू तैस केढतां शैरी छड, कानू भोइतां ज़िन्दगी मां दाखल भोनू तेरे लेइ रोडूए, कि दुइये एछ्छी भोने सेइं तू नरकेरी अग्गी मां गास त तैल्ला रोडोस।”

ⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ
(ⓂⓂⓂⓂⓂ 15:3-7)

10 “हेरा इन निक्के चलन मरां तुस केन्ची घटिया न बुझा, अवं तुसन सेइं ज़ोताई कि तैन केरे स्वर्गदूत हर वक्त स्वर्गे मां मेरे बाजी केरे हज़ूरी मां रातन। 11 (किजोकि मैनेरू मट्टू यानी अवं हेरोरे लोकन बचाने ओरोई।) 12 तुशुशो खियाल कुने? कि केसकोई कां 100 भैड्डां भोन, ते तैस मरां अक हेरोए, त कुन तै नडेनुवं भैड्डां ज़ैडी खतरो न भोए तैडी छेडतां, तैस हेरोरि न तोपेलो? 13 ते अगर एरू भोए, तैस तै मैल्ले, त अवं तुसन सेइं सच्च ज़ोताई कि तै तैना नडेनुवं केरे लेइ एतरी खुशी न मनालो, ते तैस एक्की भैडारे लेइ जादे खुशी बनालो। 14 एन्चरे तुशुशो बाजी ज़ै स्वर्गे मांए, तै एन न चाए कि एन निकन मरां भी कोई नाश न भोए।”

ⓂⓂⓂⓂⓂⓂ ⓂⓂⓂⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂ

15 “अगर कोई मीं पुड़ विश्वास केरनेबालो द्वाला तीं सेइं बुराई केरते, त तू अकैल्ले मां तैस समझा, अगर तै तेरी गल शुने, त तीं तै वापस परमेशेरे कां आनो। 16 अगर तै तेरी गल न शुने, त तू एप्पू सेइं साथी अक या दूई मैन्हु नेइयां, किजोकि मूसेरे कानूनेरे मुताबिक हर शिकैइतरी मां दूई या द्वालाई मैन्हु गवाह भोतन। 17 अगर तै तैन केरि भी न शुने, त तू कलीसियारे लोकन सेइं ज़ो, अगर तै कलीसियारे लोकां केरि भी न शुने, त तू तैस सेइं एरो बर्ताव केर ज़ेन्चरां तै गैर कौमरो भोए या चुंगी घिन्ने बालो भोए।”

ⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂ

18 “अवं तुसन सेइं सच्च ज़ोताई, ज़ैन किछ तुस ज़मीनी पुड़ बंधेले त समझा कि स्वर्गे पुड़ बंधोलू, ते ज़ैन किछ तुस ज़मीनी पुड़ खोल्लेले त तैन स्वर्गे मां खुल्लेले। 19 फिरी अवं तुसन सेइं सच्च ज़ोताई, कि अगर तुसन मरां दूई

जने धेरती पुड़ अक मन भोइतां कोन्ची मसलेरे हल कढनेरे लेइ परमेशे करां जै स्वर्गे मां आए मद्दत मगन, त तै तैन केरि मद्दत ज़रूर केरेलो। ²⁰ किजोकि जैड़ी दूई या ट्लाई मैन्हु, मेरे नव्वे सेइं परमेशे करां मद्दत मगनेरे लेइ अकोट्टे भोतन, अवं तैड़ी तैन केरि मद्दत केरनेरे लेइ तैन मां भोइताई।”

ॐॐॐ ॐ ॐॐॐॐॐॐॐॐ ॐॐॐॐॐॐ ॐॐॐॐॐॐ

²¹ तैखन पतरसे यीशु कां एइतां पुच्छ, “परभु अगर कोई तीं पुड़ विश्वास केरनेबालो, मीं सेइं बुराई केरतो राए, त अवं केतरे बार तैस माफ़ केरि? कुन सत बार?” ²² यीशुए जुवाब दित्तो, “अवं तीं सेइं इन न ज़ोई सत बार, बल्के सत्तेरे सत्तर बार माफ़ करां (यानी लगातार माफ़ केरतू रानू)। ²³ बस्सा अवं तुसन सेइं इन ज़ोताई, स्वर्गेरू राज तैस राज्जेरू ज़ेरू आए, जैनी सोचू कि अवं अपने नौकरन करां हिसाब धिनी। ²⁴ जैखन तै हिसाब धिन्ने लगो, त अक मैन्हु तैस कां हाज़र कियो, जै दश हज़ार सोन्नेरे सिक्कां केरे तोड़ां* केरो कर्जदार थियो। ²⁵ तैस कां कर्जो मुकाने जो किछ न थियू, राजे हुक्म दित्तो, एसेरे बाल बच्चे ते कुआन्श ते जैन किछ भी आए सब बेचतां कर्जो उसुल केरा। ²⁶ पन तै नौकर ज़ोवले हथ केरतां मालिके कां मिनत केरतां ज़ोने लगो, मीं किछ मौको दे, ते अवं तेरो सारो कर्जो मुकालो। ²⁷ मालिके तैस नौकरे पुड़ बड़ो तरस अव, ते तैनी तै छैडी दित्तो ते तैसेरो कर्जो भी माफ़ कियो।”

²⁸ “पन जैखन तै नौकर तैट्टां चलो जेव, त तैस अक एरो नौकर मैल्लो, जै तैसेरो साथी थियो, ते तैस तैनी 100 दीनार† दित्तोरे थिये, तैनी तै गलेरां ट्लाव ते ज़ोने लगो, भेरो कर्जो कढ। ²⁹ तैसेरो साथी नौकर तैस्से कां मिनत केरने लगो, मीं किछ मौको दे ते अवं तेरो सारो कर्जो मुकालो। ³⁰ पन तैनी तैसेरी अक गल भी न शुनी, ते तैनी तै ढेपतां छड़डो कि ज़ां तगर कर्जो न देस तांतगर ढप्पोरो रा। ³¹ जैखन होरि नौकरेई एन शुनू, त तैना बड़े परेशान भोए, ते मालिके कां गेइतां सारो हाल शुनाव। ³² तैखन मालिके तै अपने नौकर कुजेइतां ज़ोवं, ‘ओ बेईमान नौकरा मीं तेरो सारो कर्जो माफ़ कियो, किजोकि तीं मीं कां छंदे कियोरे थिये। ³³ कुन तेरे लेइ ज़रूरी न थियू, कि जेन्चरे मीं तीं पुड़ दया केरतां तेरो कर्जो माफ़ कियो, तेन्चरे तू भी अपने सैथन पुड़ दया केरतां तैन केरो कर्जो माफ़ केरथो?’ ³⁴ मालिके सरक आई, ते तैनी तै नौकर सज़ा देनेबालां केरे हवाले कियो, कि ज़ां तगर मेरो सारो कर्जो न दे तांतगर ढप्पोरो भोए।

³⁵ “एन्चरे अगर तुसन मरां हर कोई, तैस मैन्हु जै मीं पुड़ विश्वास केरते दिले सेइं माफ़ न केरे त मेरो स्वर्गेरे बाजी यानी परमेशर भी तुसन सेइं एन्चरे पैश एज्जेलो।”

19

ॐॐॐॐॐॐॐ ॐॐॐॐ ॐॐॐ ॐॐॐॐॐॐॐ ॐॐॐॐॐॐ
(ॐॐॐॐॐ 10:1-12)

¹ जैखन यीशुए एन गल्लां ज़ोई छैडी, त तै गलीले मरां गेइतां यरदन दरियारे पार यहूदिया इलाके मां चलो अव। ² बड़े लोक यीशु पत्ती चले जे, ते यीशुए तैना तैड़ी बज्झाए।

³ तैखन फरीसी लोकेई यीशु कां एइतां तैस अज़मानेरे लेइ पुच्छ, “कुन मैन्हु अपनि कुआन्श केन्ची भी वजाई सेइं फारख्ती देनी जेइजे?” ⁴ तैनी जुवाब दित्तो, “कुन तुसेईं नई पढेरू कि जैने तैना बनां तैनी शुरू करां मड़द ते कुआन्श बनेवरां थियां। ⁵ एल्हेरेलेइ मड़द अपने हाज बव्वे करां कनारे बिशतां अपनि कुआन्शी सेइं साथी रालो, ते तैना दुइये अक जान भोलां। ⁶ एल्हेरेलेइ हुनी तैना परमेशेरी नज़री मां दूई नई, पन अक्के आन। एल्हेरेलेइ जैना परमेशेरे ज़ोडोरेन, तैनन् कोई मैन्हु अलग न केरे!”

⁷ तैनेई तैस पुच्छ, “फिरी मूसे ए हुक्म किजो दित्तो कि फारख्ती लिखतां छैडी देथ?” ⁸ तैनी तैन सेइं ज़ोवं, “मूसे तुशेरे सखत दिलेरी वजाई सेइं अपनि कुआन्शन छड़नेरो हुक्म दित्तोरो थियो, पन शुरू करां एन न थियू। ⁹ अवं तुसन सेइं सज़ ज़ोताई, कि जै कोई अपनि कुआन्शी बदमेशेरे अलावा कोन्ची होरि गल्ली पुड़ फारख्ती दे, ते तै केन्ची होरि सेइं इला बनाते, त तै (एप्पू) बदमाशी केरते। ते जै तैस शैरोरी कुआन्शी सेइं इला बनाते, त तै भी बदमाशी केरते।”

¹⁰ चेलेई यीशु सेइं ज़ोवं, “अगर मड़द ते कुआन्शारे रिशतेरो ई हाले त इला न लोडे बनोरो।” ¹¹ यीशुए तैन सेइं ज़ोवं, “ए गल सब कबूल न केरि बटन, सिर्फ तैना जैन परमेशर ई काबलीत दित्तोरीए। ¹² किछ त ज़र्मनेरे

* 18:24 18:24 तोड़ो: अक तोड़ो 15 सालां केरे मज़ुरारे बराबर भोती थी † 18:28 18:28 100 दीनार शौव दिहैड़ी केरू मज़दूरी।

हिजडे भोतन ते किछ्चन लोक बनातन, ते किछ्च एरे भी आन, कि जैन स्वर्गेरे राज्जेरे लेइ इला न बनान, ते जैना इना गल्लां सेमझी सकतन तैना समझन।”

॥॥॥॥ ॥॥॥॥ ॥॥॥॥

(॥॥॥॥ 10:13-16; ॥॥॥॥ 18:15-17)

13 तैखन लोकेई बच्चे यीशु कां आने, कि तैन पुड़ हथ रेखतां प्रार्थना केरे, पन चलेई तैना लोक झिडके।
14 यीशुए ज़ोवं, “बच्चे मीं कां एजने देथ, तैन न ठाका, किजोकि स्वर्गेरू राज्ज एरां केरूए।” 15 ते तै बच्चन पुड़ हथ रेखतां तैट्टां अग्रोवं चलो जेव।

॥॥॥॥ ॥॥॥॥ ॥॥ ॥॥॥॥॥॥॥ ॥॥॥॥॥॥॥

(॥॥॥॥ 10:17-31; ॥॥॥॥ 18:18-30)

16 हेरा, अक मैन्हु यीशु कां अव ते पुच्छने लगो, “हे गुरु अवं कुन भलू कम केरि, कि हमेशारी जिन्दगी हासिल केरि?” 17 यीशुए तैस सेइ ज़ोवं, “तू मीं भलैइये बारे मां किजो पुच्छतस? परमेशेरे अलावा होरो कोई भी रोडो नई, पन अगर तू हमेशारी जिन्दगी हासिल केरनि चातस त हुक्म मनन्।” 18 तैनी ज़ोवं, “कोन हुक्मन पुड़?” यीशुए ज़ोवं, “खून नई केरनो, बदमाशी नई केरनि, चोरी नई केरनि, झूठी गवाही नई देनी, 19 अपने हाज बव्वां केरि सेवा केर, अपने पड़ोसी सेइ अपने बराबर प्यार केर।” 20 तैनी जवाने जुवाब दित्तो, “एना सब हुक्म अवं बचपनेरो मन्तो ओरोई। हुनी मीं मां को कमीए?” 21 यीशुए तैस सेइ ज़ोवं, “अगर तू सिद्ध भोनू चातस, त गा जैन किछ्च तीं कां आए तैन बेचतां गरीब मैनन् दे, तैखन तीं स्वर्गे मां खजानो मैलेलो। ते एइतां मीं पत्ती चल।” 22 पन तैनी जवाने ए गल शुनी, त बडो उदास भोइतां चलो जेव, किजोकि तै बडो अमीर थियो।

23 तैखन यीशुए अपने चलन सेइ ज़ोवं, “अवं तुसन सेइ सच्च ज़ोताई कि अमीर मैनेरू स्वर्गेरे राज्जे मां दाखल भोनू मुशकले। 24 फिरी अवं तुसन सेइ ज़ोताई, परमेशेरे राज्जे मां अमीर मैनेरू दाखल भोने केरां ऊंटेरू सांधनेरे पाए मरां निस्नु सुखू आए!” 25 एन शुन्तां चलेई हैरान भोइतां ज़ोवं, “फिरी कसेरी मुक्ति भोइ बटतीए।” 26 यीशुए तैन केरे पासे तेकतां ज़ोवं, “मैनन् करां त एन न भोइ सके पन परमेशेरे करां सब किछ्च भोइ बटते।” 27 एस पुड़ पतरस ज़ोने लगो, “हेर अस सब किछ्च शैरतां तीं पत्ती चलोरेम ते असन कुन मैलनूए?” 28 यीशुए तैन सेइ ज़ोवं, “अवं तुसन सेइ सच्च ज़ोताई, कि नव्वे दुनियाई मां जैखन अवं मैनेरू मट्टू अपने महिमारे तखते पुड़ बिशेलू, त तुस भी मीं पत्ती चलने बाले 12 तखतन पुड़ बिशतां इस्राएलेरे 12 गोत्रां केरो इन्साफ केरेले। 29 ते जैनी केन्वे अपना घरां ते दूला या बेइन या हाज या बव या बच्चे या ऊडारां छड्डोरेन, तैस 100 गुणा फल मैलेलो, ते हमेशारी जिन्दगरी विरासत मैलेली। 30 पन बडे मैन्हु जैना हुन्ना पेइले आन, तैना बादे मां पत्रोवं भोनेन। त जैना हुन्ना पत्रोवं आन, तैना बादे मां पेइले भोनेन।”

20

॥॥॥॥॥ ॥॥॥॥॥॥॥ ॥॥॥॥ ॥॥॥॥॥॥

1 “स्वर्गेरू राज्ज तैस ज़िमदारेरू ज़ेरूए ज़ै झेझां उट्टतां ते अपने दाछरी बागी मां मज़दूर कम्मे लाए। 2 तैनी अक दीनार* रोज़ मुजुरी देनेरे लेइ तैना बागी मां भेजे। 3 फिरी नौ बजेइं बेइर गेइतां तैनी बज़ारे मां काई लोक बेकार खडे लाए। 4 तैनी तैन सेइ ज़ोवं, ‘तुस भी मेरी बागी मां गाथ, ते जैन किछ्च जेइज भोलू अवं तुसन देलो।’ तैना कम्मे पुड़ जो जे। 5 फिरी तैनी दुपहरेई ते टलेइ बज़न तगर एन्ने कियूं। 6 पंचे बजेइं तैनी बेइर निस्तां किछ्च होरे लोक भी खडखडे लेइतां तैन पुच्छू, ‘तुस झेझेरे देते किजो खेडोरेथ?’ तैनेई जुवाब दित्तो, ‘अस केन्वे कम्मे नई लोरे।’ 7 तैनी तैन सेइ ज़ोवं, ‘तुस भी मेरे बागी मां गाथ ते कम केरा।’”

8 “इलोझी तैनी बागरे मालिके अपने मुन्शी सेइ ज़ोवं कि, ‘पेइले लगगोरे मज़दूर ते पत्ती कम्मे लगगोरे मज़दूर सेबनन अक-अक दीनार दिहाड़ी दे।’ 9 जैना पंचे बजेइं ओरे थिये, तैन भी अक दीनार पूरी दिहाड़ी मैल्ली। 10 जैना मज़दूर झेझां कम्मे लगगोरे थिये तैन केरि बारी आई त तैनेई सोचू कि असन जादे मैलनेन, पन तैन भी अक-अक दीनार मैल्लो। 11 जैखन दिहाड़ी मैल्ली, त तैस मालिकेरे बारे मां तैना एप्पू मांमेइं बुराई केरने लगगे। 12 ‘पत्ती लोरे मज़दूरेई सिर्फ अक घैन्टो कम कियोरूए, ते तीं तैन भी असन बराबर जैनेई सैरी दिहैड़ी कम कियां मुजुरी दित्ती।’ 13 तैनी तैन मरां एक्की जुवाब दित्तो, ‘दोस्त मीं तीं सेइ कोई बेइन्साफी नई कियोरी, कुन मीं तीं सेइ अक

* 20:2 20:2 दीनार एक्की दिहैड़ी मज़दूरी।

दीनार दिहैइरी गल न थी कियोरी? 14 एल्हेरेलेइ जै तेरी मजदूरीए तै ट्ला ते चलो गा, ए मेरी मज्जीए कि बादे मां लग्गोरे मजदूर भी एतरे देई। 15 कुन मीं ए अधिकार नई कि अपने माले मरां जैन चैई तैन केरि? तू मीं पुड़ एल्हेरेलेइ जलतस कि अवं खुल्ले दिले सेइं देने बालोई? 16 एल्हेरेलेइ बड़े मैन्हु जैना हुन्ना पेइले आन, तैना बादे मां पत्रोवं भोनेन, ते जैना हुन्ना पत्रोवं आन, तैना बादे मां पेइले भोनेन।”

[\[20:14-16\]](#) [\[20:17-19\]](#) [\[20:20-22\]](#) [\[20:23-25\]](#) [\[20:26-28\]](#) [\[20:29-31\]](#) [\[20:32-34\]](#) [\[20:35-37\]](#)
([\[20:32-34\]](#); [\[20:35-37\]](#))

17 यरूशलेम नगरे जो गांते बार यीशुए अपने 12 चलन अलग नेइतां तैन सेइं ज़ोवं, कि तैस सेइं कुन भोने बालूए। 18 “हेरा, अस यरूशलेम नगरे जो चलोरेम, मैनेरू मट्टू प्रधान याजकां ते शास्त्री लोकां केरे हवाले कियू गालू, ते तैना तैस मारनेरे काबल ठैरेले। 19 तैस गैर कौमां केरे हवाले केरेले, तैना मैनेरे मट्टेरी यानी मेरी हासी बनाले, ते तैस कोड़े बाहेले, ते फिरी तैस कूरुसे पुड़ चाढ़ेले, ते अवं टलेइयोवं दिहाड़े फिरी जींतो भोलो।”

[\[20:38-40\]](#) [\[20:41-43\]](#) [\[20:44-46\]](#)
([\[20:41-43\]](#))

20 तैखन जब्दी नव्वेरे मैनेरां मट्टां केरि अम्मा अपने मट्टन सेइं साथी यीशु कां आई, ते तैस कां मिनत केरने लाई ते तैस करां किछ मगने लग्गी। 21 तैने तैस पुच्छू, “तीं कुन लोइते?” तैसां ज़ोवं, “वचन दे, कि मेरां इन्ना मट्टां तेरे राज्जे मरां अक तेरे देइने पासे त होरू तेरे बाएं पासे बिश्शन।” 22 पन यीशुए तैन सेइं ज़ोवं, “तुस न जानथ कि कुन मगने लग्गोरेथ! जेन्चरे दुख अवं झलने बालोई, कुन तुस झेल्ली सकतथ? तैनेई जुवाब दित्तो, हाँ झेल्ली सकतम।” 23 तैनी तैन सेइं ज़ोवं, “तुस मेरे ज़ेरो दुःख झललेले, पन एन मेरू कम नई कि एककी देइने पासे ते होरि बाएं पासे बिशैली, ए ठार जेसेरे लेइ मेरे बाजेरे तरफां रखोरीए तै तैसेरे लेइए।”

24 एन शुन्तां होरि दश चलेई तैन दूई दलान पुड़ नराज्ज भोइ जे। 25 यीशुए अपने सारे चले नेडे कुजेइतां, तैन सेइं ज़ोवं, “होरि कौमां केरे प्रधान अपने लोकन पुड़ राज्ज केरतन, ते तैन केरे मालिक तैन पुड़ अधिकार रखतन। 26 पन तुसन मां एरू न लोड़े भोरू, बल्के तुसन मां जै बड़ो बन्नो चाते, तै सेभी केरो सेवक बने। 27 जै कोई तुसन मां प्रधान बन्नू चाए, तै सेभी केरो गुलाम बने, 28 जेन्चरे कि मैनेरू मट्टू एल्हेरेलेइ नई ओरूए कि कोई तैसेरी सेवा केरे, बल्के एल्हेरेलेइ कि सेवा केरे, ते अपनि जान बड़े लोकां केरे छुटकारेरे लेइ दे।”

[\[20:47-49\]](#) [\[20:50-52\]](#) [\[20:53-55\]](#)
([\[20:50-52\]](#); [\[20:53-55\]](#))

29 जैखन यीशु त तैसेरे चले यरीहो नगरे मरां चलोरे थिये, त बड़े लोक तैस पत्पती चले। 30 दूई काने बत्ती मां बिश्शोरे थिये, तैनेई एन शुनू कि यीशु इस बत्तां चलोरोए, त तैना चिन्डां मारने लग्गे, “हे प्रभु दाऊदेरा मट्टां असन पुड़ दया केर।” 31 लोक तैन झिड़कने ते ज़ोने लग्गे कि चुप राथ, पन तैना मना चिन्डां मारने लग्गे, “हे प्रभु, दाऊदेरा मट्टां असन पुड़ दया केर।” 32 तैखन यीशु खेड़ोव ते तैन कुजेइतां पुच्छने लग्गे, “तुस कुन चातस अवं तुश्शे लेइ केरि?” 33 तैन कानेई जुवाब दित्तो, “हे प्रभु अस चातम कि इश्शी एच्छन लौ एज्जे।” 34 यीशुए तैन पुड़ बड़ो तरस अव, ते तैनी तैन केरे एच्छन पुड़ हथ रख्खो ते तैना लहने लग्गे, ते दुइये काने यीशु पत्ती चले जे।

21

[\[21:1-11\]](#) [\[21:12-19\]](#) [\[21:20-27\]](#)
([\[21:1-11\]](#); [\[21:20-27\]](#); [\[21:28-40\]](#); [\[21:41-43\]](#))

1 जैखन यीशु ते कने तैसेरे चले यरूशलेम नगरेरे नेडे पुजे, त यीशुए जैतून पहाड़े पुड़ बैतफगे मरां अपने दूई चले एन ज़ोइतां अग्रोवं भेजे। 2 “अपने सामने उस इलव्वें मां गाथ, ते तैड़ी पुजले, त तुसन अक गधी बंधोरी मैलनिये, ते तैस साथी तैसेरो बच्चो भी भोनोंए, तैस खोलतां इड़ी मीं कां आनां।” 3 अगर तुसन कोई पुच्छे, त तुस ज़ोइयथ, कि प्रभुए एसेरी जरूरत आए, ते तै लूशी तैस वापस भेजेलो। 4 इन सब किछ एल्हेरेलेइ भोवं, कि नेबे जैन वचन ज़ोरू थियू, तैन पूरू भोवं,

5 “सिय्योनेरे कुइये सेइं ज़ोथ,
कि तेरो राज्जो तीं कां ओरोए,
ते तै बड़ो हलीमी ते तै गैधी पुड़ च़ेदतां ओरोए,

बल्के गधेरे बच्चे पुड़।”

6 चले चले जे ते जेन्चरे यीशुए ज़ोरू थियूं, तैनेई तेन्चरे कियूं। 7 तैनेई तै गधी ते तैसारो बच्चो आनो, ते तैन पुड़ अपना लिगड़ां छड़ां, ते यीशु तैस पुड़ च़ेढतां च़लो। 8 बड़े लोकेई अपना लिगड़ां बत्ती मां बिछ्ठां, ते किछेई बुट्टा केरे डाल केटतां बत्ती मामेइं छ़डोरे थिये। 9 ते तैना लोक ज़ैना यीशु सेइं साथी अग्री-अग्री ते पत्ती-पत्ती च़लोरे थिये, तैना नहरे देते थिये, “दाऊदेरे मट्टेरी होशाना (तारीफ़), धने तै, ज़ै प्रभुएरे नंवे सेइं एइते, स्वर्गे मां होशाना*।” 10 ज़ैखन यीशु यरूशलेम नगरे मां पुज़ो, त सारे नगर मां हलचल मेच़ि जेई, ते लोक ज़ोने लगगे, “ए कौने?” 11 लोकेई ज़ोवं, “ई गलीलेरे नासरत नगरेरो नबी यीशुए।”

११:१५-१९; १९:४५-४८; २:१३-२२

(११:१५-१९; १९:४५-४८; २:१३-२२)

12 यीशुए परमेशरेरे मन्दरेरे अंगने मां गेइतां, ज़ैना बुपारी बुपार करते थिये सब तैट्टां कढे, तैनी सुनारां केरि दुकान ते कबूतर बेचने बालां केरि ठारां टलोड़ी। 13 ते तैनी ज़ोवं, “लिखोरूए कि मेरे मन्दरे जो प्रार्थना केरनेरू घर ज़ोले, पन तुसेई त ए डैकू केरो अड्डो बनेवरोए।”

14 तैखन काने ते टोटे मन्दरे मां यीशु कां आए, ते तैनी तैना सब बज्झाए। 15 पन ज़ैखन मन्दरेरे प्रधान याजक ते शास्त्री लोक एना कम्मां ज़ैना तैनी कियां, ते मट्टन मन्दरे मां दाऊदेरी औलादरी होशाना (तारीफ़) ज़ोते लाए, तैन बड्डी सरक आई। 16 ते तैस सेइं ज़ोने लगगे, “तू शुन्ने लोरोस कि एना कुन ज़ोने लोरेन?” यीशुए तैन सेइं ज़ोवं, “हाँ अवं शुन्ने लोरोई, तुसेई कधे नई पढेरू कि, ‘तीं मट्टन ते दुद्ध पीते बच्चन करां भी तीं अपनि पूरी तारीफ़ कमाई?’” 17 तैखन तै तैन शैरतां नगरे बेइरोवं च़लो जेव, ते बैतनिय्याह नगरे मां जेव ते तैड़ी रात गुज़ारी।

११:१२-१४,२०-२४

(११:१२-१४,२०-२४)

18 झेझां ज़ैखन यीशु नगरे मांजो वापस ओरो थियो, त तैस ढलुख लगगी। 19 बत्तारे इलेखी अक फ़ेगेरो बूट लाव ते तैस कां जेव, ते पट्टलां केरे अलावा तैस पुड़ किछ न लाव, तैनेई तैस जो ज़ोवं, “कधे भी तीं पुड़ फल न लगगेलो ते तैखने तै बुट्ट शुक्की जेव।” 20 एन हेरतां च़ेले हैरान भोइतां पुच्छने लगगे, “ई फ़ेगेरो बुट्ट अकदम केन्चरे शुक्की जोरोए?” 21 यीशुए जुवाब दित्तो, “अवं तुसन सेइं सच़ ज़ोताई कि अगर तुस विश्वास रखथ, ते शक न केरथ, ज़ैन फ़ेगेरे बुटे सेइं भोवं तैन तुस भी केरि सकतथ, बल्के उस पहाड़े जो ज़ोले कि इट्टां उखइतां समुन्दरे मां गा, त तैन्ने भोलू।” 22 अगर तुशशो विश्वास पक्कोए त ज़ैन किछ तुस प्रार्थनाई मां मग्गेले, तैन तुसन मैल्ली गालू?

११:२७-३३; २०:१-८

(११:२७-३३; २०:१-८)

23 यीशु मन्दरे मां शिक्षा देने लोरो थियो, त प्रधान याजक, ते लोकां केरे बुजुगेई तैस पुच्छू, तू एन कम कसेरे अधिकारे सेइं केरतस? ते तीं एन कम कैनी दित्तोरोए? 24 यीशुए तैन जुवाब दित्तो, “अवं भी तुसन अक गल पुच्छतई, अगर तुस तैसेरो जुवाब देले, त अवं भी ज़ोइलो कि अवं एन कम कसेरे अधिकारे सेइं केरताई। 25 यूहन्नारो बपतिस्मो कोट्टां थियो? स्वर्गेरे तरफां थियो, या की इन्सानेरी तरफां थियो? तैना एप्पू मामेइं गलबात केरने लगगे, कि अगर अस ज़ोतम कि, स्वर्गेरे तरफां थियो, त फिरी तैनी ज़ोनूए कि फिरी तुसेई तैसेरू याकीन की नई कियेरू? 26 पन अगर अस ज़ोतम कि, ‘इन्सानेरी तरफां थियो,’ त लोकां केरो भी डरे किजोकि लोक यूहन्ना नबी मन्ते थिये।” 27 एल्हेरेलेइ, तैनेई यीशुए जुवाब दित्तो, “अस किछ न ज़ानम।” तैनी भी तैन सेइं ज़ोवं, “अवं भी तुसन सेइं न ज़ोई कि अवं इन कम्मां कसेरे अधिकारे सेइं केरताई।”

२१:९

28 पन तुस इस मिसालरे बारे मां कुन सोचतथ? केन्ची मैनेरां दूई मट्टां थियां, तैनी बड्डे मट्टे कां गेइतां ज़ोवं, “अज़ दाछ़री बागी मां गा ते कम केर।” 29 तैनी जुवाब दित्तो, “अवं न गेई।” पन बादे मां पशतेइतां च़लो जेव। 30 फिरी बाजे होरि मट्टे कां भी गेइतां एन्ने ज़ोवं, तैनी जुवाब दित्तो, “अच्छ़ा खरी गाताई।” पन जेव नन्ना। 31 “एन दुइने मरां केनि अपने बाजेरो हुक्म मन्नो?” तैनेई जुवाब दित्तो बड्डे हुक्म मन्नो, यीशुए तैन सेइं ज़ोवं, कि अवं तुसन सेइं सच़ ज़ोताई, कि चुंगी धिन्ने बाले ते बदचलन कुआन्शां तुसन करां पेइले परमेशरेरे राज़ मां दाखल

* 21:9 21:9 होशाना मतलब बच्चथ

भोली। 32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी ज़िन्दगी केन्द्रां जीनीए पन तुसेई तैसेरू विश्वास न कियो, पन चुंगी घिन्ने बाले ते बदचलन कुआन्शेई तैसेरू विश्वास कियूं, एन हेरतां भी तुसेई पापन करां मन न फिराव ते तैस पुड़ विश्वास न कियो।

ⓂⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂⓂ ⓂⓂⓂⓂⓂ
(ⓂⓂⓂⓂⓂ 12:1-12; ⓂⓂⓂⓂⓂ 20:9-19)

33 अक होरि मिसाल शुना, एक्की ज़मीनदारे अक दाछ़री बाग लाई ते तैसेरे च़ेवरे पासन बाड़ दित्तो, ते दाछ़ारो रस कढनेरे लेइ अक हौवज़ बनावं, ते तैस बागरी हेरगेश केरनेरे लेइ अक उच्ची कूड़ी बनाई ते फिरी तै काशत केरनेबालन ठेके पुड़ देइतां कोन्च दूर प्रदेशे जो च़लो जेव। 34 ज़ैखन दाछ़ टलोङनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे। 35 ते ठेकेदारेइं तैसेरे नौकर कोई झूसो कुटो कोई मारो ते केन्वी जेई घोड़ेई दित्ती। 36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारेइं तैन सेइ भी तेरहो ज़ेरो सलूख कियो। 37 आखकार तैनी अपनू मट्टू तैन कां भेजे, ते सोचू कि मेरे मट्टेरो त लिहाज़ केरेले। 38 “पन ज़ैखन ठेकेदारेइं तैसेरू मट्टू लाव, त तैना एप्पू मामेइं मुशोरो केरने लग्गे, कि एज्जा एस सेवां मारम ते एसेरी बागी पुड़ कब्ज़ो केरम।” 39 “तैखन तैनेई तैन मट्टू टलाव ते बागारे बेइर शेरी छ़ड्डू। 40 एल्हेरेलेइ ज़ैखन बागरो मालिक एप्पू एज्जेलो, त तैन ठेकेदारन सेइं केरो सलूख केरेलो?” 41 तैनेईं जुवाब दित्तो, तै तैन बुरन, बुरे तरीके सेइं मैरतां बागरो ठेको होरि ठेकेदारन देलो, ज़ैना मौके पुड़ तैसेरो हिस्सो तैस देन। 42 यीशुए तैन सेइं ज़ोवं, “तुसेईं पवित्रशास्त्रे मां कधे नईं पढेरू, ज़ै घोड़ मिस्त्रेईं रद्दी कियोरो थियो, तैए कूनेरो घोड़ भोलो, एन कम परमेशरे कियोरूए, ते इश्शी नज़री मां एन आजीब आए?”

43 एल्हेरेलेइ अवं तुसन सेइं ज़ोताई, कि परमेशेरू राज़ तुसन करां निव गालू, ते एरी कौमी कां दित्तू गालू ज़ै वक्ते पुड़ तैस फल दे। 44 ते ज़ै कोई इस घोड़े पुड़ बिछ़ड़ेलो त तैसेरे टुकड़े-टुकड़े भोइ गाले, पन ज़ै एस उन्ढो बिछ़ड़ेलो त तैस पइतां छ़डेले। 45 प्रधान याजक ते फरीसी लोकेईं यीशुएरी ए मसाल शुन्तां सेमझी जे, कि यीशु एन गल्लां इश्शे बारे मां ज़ोने लोरोए। 46 तैनेईं यीशु टलानो चाव, पन लोकन करां डरते थिये किजोकि तैना यीशु नबी मन्ते थिये।

22

ⓂⓂⓂⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂⓂ ⓂⓂⓂⓂⓂ
(ⓂⓂⓂⓂⓂ 14:15-24)

1 यीशु फिरी मसाल देइतां ज़ोने लगो। 2 “स्वर्गेरू राज़ एक्की राज़ेरू ज़ेरूए, ज़ैनी अपने मट्टेरे ड़ला बनाव। 3 ते अपने नौकर भेजे कि तैना लोकन ज़ैन जेई ड़लाएरी धाम बनोरी थी, तैन कुजान पन तैना न आए। 4 तैखन तैनी अपने नौकर एन ज़ोइतां भेजे, कि ज़ैन जेई ड़लाएरी धाम बनेवरीए, तैन ज़ोथ, रोट्टी बनोरीए ते मीं बडे-बडे जानवर कट्टोरन, ते सब किछ़ तियार भोरूए, ते ड़लाएरी धामी मां शामिल भोथ। 5 पन तैनेईं ध्यान न दित्तू ते कोई परवाह न की, कोई अपने ऊडारे मां च़लो जेव, ते कोई अपने कारोबारे मां लगो ते कोई कोरां च़लो जेव। 6 किछ़ेईं तैसेरे नौकर टलेइतां तैन तैना बेइजत किये, ते जानां भी मैरी छ़ड्डे। 7 ज़ैखन राज़े एन शुनू त राज़े बड़ी सरक आई, ते तैनी अपनि फौज भेजतां तैना कातली मैरी छ़ड्डे ते तैन केरां नगरां फुके। 8 तैखन तैनी अपने नौकरन सेइं ज़ोवं, ड़लाएरी धाम तियार आए, पन ज़ैन कुजोरे थिये तैन एस काबल नईं। 9 एल्हेरेलेइ तुस हर पासे गाथ ते ज़ेत्त्रे तुसन मैलतन, तैना सब इरां कुजाथ। 10 तैखन तैना नौकर च़ले जे ते हर पासे गेइतां ज़ेत्त्रे खरे बुरे तैन मैल्ले, सब अकोट्टे ड़लाए मां आने ते मेहमानेइं सेइं घर भेरतां भोवं।

11 “ते राज़ो मेहमान सेइं मिलने अन्तर अव, त तैसेरी नज़र एक्की मैन्हु पुड़ पेईं ज़ै ड़लाए मां ड़लेरां लिगड़ां लेइतां न थियो ओरो।” 12 राज़े तैस पुच्छू, हे दोस्त, तू ड़लाएरे लिगड़न मां की नईं ओरो? पन तैने किछ़ न ज़ोवं। 13 “एस गल्लनी पुड़ राज़े अपने नौकरन सेइं ज़ोवं, ‘एसेरे हथ पाव बंधतां बेइर आंधरे मां छ़ड्डा ज़ैडी ए लेरां देंतो राए, ते दंत चापतो राए।’ 14 किजोकि परमेशरे हमेशारे ज़िन्दगरे लेइ त बडे कुजोरेन पन चुनोरे थोडेन।”

[\[22:13-17\]](#); [\[20:20-26\]](#)

15 तैखन फरीसी लोक तैट्टां चले जे, ते एप्पू मांमेइं मुशोरो केरने लग्गे एस केन्चरे गल्लन मां फसाम। 16 एल्हेरेलेइ तैनेईं अपने किछु चले हेरोदेस राजेरे लोकन सेइं साथी यीशु कां भेजे, ते तैनेईं ज़ोवं, “हे गुरू अस ज्ञानतम कि तू सच्चोस, ते परमेशेरी बत सच्चैइं सेइं शिखालतस ते कोन्चेरी परवाह न केरस किजोकि तू मैन्हु केरू तुतर हेरतां गल्लां न केरस। 17 एल्हेरेलेइ असन ज़ो, तू कुन सोचतस? महाराजे जो चुंगी देनी जेइजे की नईं?” 18 यीशु तैन केरि चाल सेमझतां ज़ोवं, “हे पाखंडी लोकव मीं किजो अज़मातथ? 19 ज़ै सिको चुंगरे लेइ देतथ तैस मीं हिराथ, तैनेईं अक दीनार तैस कां आनो। 20 यीशुए तैन पुच्छू, इस पुड़ कसेरी शकल ते कसेरू नवं लिखोरूए?” 21 तैनेईं जुवाब दित्तो महाजरेरू, तैखन तैनी तैन सेइं ज़ोवं, “ज़ैन महाराजेरूए तैन महाराजे जो देथ, ते ज़ैन परमेशेरेरू ए तैन परमेशेरे जो देथ।” 22 तैना एन शुन्तां हैरान रेइजे, ते तैस तैड़ी छेडतां चले जे।

[\[12:18-27\]](#); [\[20:27-40\]](#)

23 तैस्से दिहैड़ी किछु सद्की लोक ज़ैना ज़ोते थिये कि मरनेरां बाद कोई ज़ीतो नईं भोनो, तैनेईं तैस पुच्छू, 24 “हे गुरू मूसे ज़ोरूए कि, ‘अगर कोई मैन्हु बेऔलाद मेरि गाए, त तैसेरो दूला तैसेरी कुआन्शी सेइं इला बनाए ताके अपने दूलाएरे लेइ औलाद पैदा केरे।’ 25 इश्शे इडी सत दूला थिये, पेइले इला बनेइतां मेरि जेव, तैस औलाद न थी तैनी अपनि कुआन्श अपने दूलाएरे लेइ छेइडी दित्ती। 26 ए वजा आए तैसेरे दुइयोवं ते टलेइयोवं भी एन्चरे कियूं बल्के सत्ते दूलान सेइं एन्ने भोतू राऊं। 27 आखकार तै कुआन्श भी मेरि जेई। 28 हुनी ज़ो तै कुआन्श मुडदन मरां ज़ीते भोनेरे दिहाडे तैन सत्ते दूलान मरां कसेरी कुआन्श भोली? किजोकि तै सेब्भी केरि कुआन्श बनोरी थी।” 29 यीशुए तैन जुवाब दित्तो, “तुस न पवित्रशास्त्र ते न परमेशेरी शक्ति ज्ञानथ, ते एस्से वजाई सेइं तुस टेपलोरेथ। 30 किजोकि ज़ीते भोनेरां पत्ती तैना इला न बनाले, पन तैना स्वर्गे मां परमेशेरेरे स्वर्गदूतां केरे ज़ेरे भोनेन।”

31 “पन मुडदन मरां ज़ीते भोनेरे बारे मां कुन तुसेईं इन वचन नईं पढेरू ज़ैन परमेशर तुसन सेइं ज़ोवं, 32 ‘अवं अब्राहमेरो परमेशर, ते इसहाकेरो परमेशर ते याकूबेरो परमेशर आई?’ तै मुवोरां केरो नईं बल्के ज़ीतां केरो परमेशेरे।” 33 लोक तैसेरी ए शिक्षा शुन्तां हैरान रेइजे।

[\[12:28-34\]](#); [\[10:25-28\]](#)

34 ज़ैखन फरीसी लोकेईं एन शुनू कि तैनी सद्की केरू आशी बंद कियोरूए, त तैना तैस कां सब अकोट्टे भोए। 35 तैन मरां अक शास्त्री तैस अज़मानेरे लेइ यीशुए पुच्छू। 36 “हे गुरू, मूसेरे कानूने मां सेब्भन करां बड्डो हुक्म कौ आए?” 37 तैनी ज़ोवं, “तू परमेशेरे अपने प्रभु सेइं अपने सारे दिले सेइं ते अपनि सैरी जानी सेइं ते अपनि सैरी अक्ली सेइं प्यार केरा। 38 सेब्भन करां बड्डो ते खास हुक्म ईए। 39 एसेरो ज़ेरो ईए, ‘अपने पड़ोसी सेइं अपने बराबर प्यार केर।’ 40 इन्ना दूई हुक्म मूसेरे कानून ते नेबी केरो आधारे।”

[\[12:35-37\]](#); [\[20:41-44\]](#)

41 ज़ैखन फरीसी लोक भी तैड़ी जम्हां भोइजेइ, त यीशुए तैन पुच्छू। 42 “मसीहेरे बारे मां तुश्शो कुन खियाले, कि तैन केसेरू मट्टूए?” तैनेईं जुवाब दित्तो, “दाऊदेरू मट्टू।” 43 यीशुए तैन सेइं ज़ोवं, “फिरी दाऊद आत्माई मां तैस जो प्रभु किजो ज़ोते?” 44 “प्रभुए मेरे प्रभु सेइं ज़ोवं, मेरे देइने पासे बिश ज़ां तगर अवं तेरे दुश्मन तेरे पावन हैठ न दूलेन्चेईं। 45 बस्सा, अगर दाऊद तैस जो प्रभु ज़ोते त तैन तैसेरू मट्टू केन्चरे सेइं भोइ सकते?” 46 तैन मरां केन्चे भी एक्की गल्लरो जुवाब न देइ बटो। पन तैस वक्तेरे बाद फिरी कोन्ची तैस पुच्छूनेरी हिम्मत न भोइ।

23

[\[12:38-39\]](#); [\[11:43,46\]](#); [\[20:45,46\]](#)

1 तैखन यीशुए बडे लोकन सेइं ते अपने चेलन सेइं एन ज़ोवं । 2 “शास्त्री ते फरीसी लोक मूसेरो कानून समझाने बालेन । 3 एल्हेरलेइ ज़ैन किछ तैना तुसन ज़ोतन तैन तुस केरा ते मेन्ना, पन तैन केरा ज़ेरां कम्मां न केरा, किजोकि तैना ज़ोने त ज़ोतन पन केरन नन्ना । 4 तैना अपने मेज़ीं सेइं कानून बनातन ज़ैना लोकां केरे लेइ मन्ने मुशकिल भोतन, पन एप्पू अपने कानूने मन्नेरी कोशिश भी न केरन । 5 तैना ज़ैन किछ केरतन सिर्फ़ मैनन् हिरानेरे लेइ केरतन, तैना अपने कुपाए ते पैखड़न पुड़ पवित्तरशास्त्रेरे वचन लिखतां बड्डे-बड्डे जन्त्रां केरे ज़ेरे बन्धतन, ते अपने चोगन पुड़ लम्मो गुच्छा लातन (ताके लोक समझन तैना बडे धर्मी आन) । 6 तैना धामन मां खास ठैरी बिशनु चातन, ते प्रार्थना घरे मां खास कुर्सन पुड़ बिशनु चातन । 7 ते तैना चातन कि लोक तैनन् जो बज़ारन मां नमस्कार ज़ोन, ते तैनन् जो गुरु ज़ोन । 8 पन तुस अपने आपे जो गुरु न ज़ुवेइयथ, किजोकि तुशुओ अक्के गुरु आए, ते तुस सब ढलां केरे ज़ेरे बराबर आथ । 9 ते दुनियाई मां केन्वी जो (आत्मिक) बाजी न ज़ोइयथ, किजोकि तुशुओ अक्के बाजी आए ज़ै स्वर्गे मां आए । 10 ते न केन्वी जो मालिक ज़ोइयथ किजोकि तुशुओ अक्के मालिके ज़ै मसीह आए । 11 पन ज़ै तुसन मां बड्डो भोनु चाते, त तै तुशुओ सेवक बने । 12 ते ज़ै कोई अपनो आप बड्डो बनानेरी कोशिश केरते, त तै निकड़ो बनाव गालो, ते ज़ै कोई अपनो आप निकड़ो बनाते त तै बड्डो बनाव गालो ।”

([मत्ती 23:1-12](#); [मत्ती 23:13-22](#); [मत्ती 23:23-28](#); [मत्ती 23:29-33](#))
([मत्ती 12:40](#); [मत्ती 11:39-42,44,52](#); [मत्ती 20:27](#))

13 तैखन यीशुए ज़ोवं, “हे पाखंडी शास्त्री ते फरीसी लोकव, तुसन पुड़ अफ़सोस, किजोकि तुस स्वर्गेरे राज़े मां लोकन दाखल भोने न देथ, किजोकि न तुस एप्पू दाखल भोथ, ते न होरन दाखल भोने देथ । 14 हे पाखंडी शास्त्री ते फरीसी लोकव तुसन पुड़ अफ़सोस, तुस विधवा कुआन्शां केरे घरन लुटतथ, ते लोकन हिरानेरे लेइ लेम्मी-लेम्मी प्रार्थना केरतथ, तुसन जादे सज़ा मैलेली ।”

15 “हे पाखंडी शास्त्री ते फरीसी लोकव, तुसन पुड़ अफ़सोस! तुस अक मैन्हु अपने धर्मे मां आन्नेरे लेइ बडे दूर-दूर गातथ, ते ज़ैखन तै तुशुओ शिक्षा मन्ते त तैस एप्पू करां दुगनो नरके मां गानेरे काबल बनातथ ।”

16 “हे बत हिराने बाले कानाव, तुसन पुड़ अफ़सोस, कि तुस ज़ोतथ कि अगर कोई मन्देरी कसम केरे त कोई हर्ज़ नई, पन अगर मन्देरे सोन्नेरी कसम केरे, त तैसेरी कसमारो पाबंद भोलो । 17 हे बेवकूफ़ ते कानाव, बड्डू कुन आए सोन्नु या मन्दर, ज़ेसेरी वजाई सेइं सोन्नु पवित्तर समझू गाते?” 18 “तुस ज़ोतथ कि अगर कोई बलिदान चाढ़नेरे ठारारी कसम केरे, त कोई हर्ज़ नई, पन चैदोरी चीज़री कसम केरे त तैसेरो पाबंद भोलो । 19 हे कानाव! बड्डू कुन आए, चाढ़ोरी चीज़ या बलिदान चाढ़नेरे ठार ज़ेसेरी वजाई सेइं चाढ़ोरी चीज़ पवित्तर समझी गाचे? 20 अगर ज़ै कोई बलिदान चाढ़नेरे ठारारी कसम केरते, त तै सेम्भी चैदोरी चीज़ां केरि कसम केरते । 21 ज़ै कोई मन्देरी कसम केरते त तै मन्देरे मां रानेबाले परमेशेरी कसम केरते । 22 ते ज़ै कोई स्वर्गेरी कसम केरते, तै परमेशेरे तखतेरी ते तैस पुड़ बिशने बालेरी कसम केरते ।”

23 “हे पाखंडी शास्त्री ते फरीसी लोकव, तुसन पुड़ अफ़सोस, तुस पुतनेरो ते सोंफ़ेरो ते ज़ीरेरो दशोवं हिस्सो त दैतथ, पन मूसेरे कानूनेरी खास गल्लां ज़ेन्चरे इन्साफ़ केरनो, दया केरनि ते ईमानदार भोनु शारोए, ज़रूरी थियूं तुस एन भी केरते राथे ते तैन भी न शारेथे । 24 हे बत हिराने बाले कानाव! तुस मशुओ त छानतथ पन सथुओ ऊँट निगलतथ ।”*

25 “हे पाखंडी शास्त्री ते फरीसी लोकव, तुसन पुड़ अफ़सोस, तुस कटोरो ते कने थाली बेइरमेई खूब मांजतथ पन अन्त्रमेई लालत्र ते बे सबरीए भेरताए ।” 26 “हे काने फरीसाव पेइले कटोरो ते थाली अन्त्रमेई मांजा, ते फिरी बेइरमेई भी साफ़ भोए ।”

27 “हे पाखंडी शास्त्री ते फरीसी लोकव तुसन पुड़ अफ़सोस, तुस तैन कबरां केरे ज़ेरेथ ज़ैन बेइरमेई त सफ़ेदीए ते बेड़ि रोड़ी लेहीयोचन, पन अन्त्रमेई मुड़दां केरि हड्डी ते सब किसमेरी गेन्दगी सेइं भेरतन । 28 एन्चरे तुस बेइरमेई लोकन बडे धर्मी लेइयोतथ, पन अन्त्रमेई दुनियारे पाखंडे ते अधर्मे सेइं भेरतथ ।”

([मत्ती 23:1-12](#); [मत्ती 23:13-22](#); [मत्ती 23:23-28](#); [मत्ती 23:29-33](#))
([मत्ती 11:47-51](#))

29 “हे पाखंडी शास्त्री ते फरीसी लोकव तुसन पुड़ अफ़सोस, किजोकि तुस नेबी केरे आसथान सजातथ ते धर्मी लोकां केरि कबरां बनातथ । 30 ते ज़ोतथ कि, “अगर अस अपने दादे-पड़दादां केरे ज़माने मां भोथे त नेबन मारने

* 23:24 23:24 तैना लोक कानूनेरी निक्की-निक्की गल्लां बडे ध्याने सेइं मन्ते थिये ज़ेन्चरे किछ पीनेरी चीज़न मरां मशुओ छान्ने, पन तैना परमेशेरे खास हुक्म न थिये मन्ते । तैन ऊँट निगलनेरू ज़ेरू आए ।

मां तैन केरू साथ न देखे ।’ 31 एन्चरे तुस एप्पू मन्तथ कि तुस नेवी केरे कत्तल केरनेबालां केरि औलादी मरां आथ । 32 हुनी तुस अपने दादे-पड़दादां केरे पापेरे घड़ो भरते राथ ।”

33 “हे ज़हरीले सप्पां केरे ज़ेरे बच्चाव! तुस नरकेरी सज़ाई करां केन्चरे बच्चेले? 34 एल्हेरेलेइ हेरा अवं नेबन ते अक्लमन्दन ते शास्त्री लोकन तुसन कां भेजताई, तुस तैन मरां किछन कत्तल केरेले, ते किछन करूसे पुड़ चाढ़ेले, ते किछन अपने प्रार्थना घरे मां कोड़ेइं सेइं बाले, ते नगरे-नगरे मां तैन मारनेरे लेइ तैन पत्ती लगगोरे राले । 35 एल्हेरेलेइ सारे धेर्मीं केरो कत्तल ज़ै इस धेरती पुड़ भोरोए, तैन केरि सज़ा तुसन पुड़ एज्जे, धर्मीं हाबिलेरे कत्तले करां लेइतां, ते बिरिक्याहरे मट्ठे जकर्याहरे कत्तले तगर ज़ै तुसेईं मन्दरेरे ते बलिदान केरनेरे ठारारे मझाटे मन्दरेरे अंगने मां कत्तल कियोरो थियो । 36 अवं तुसन सेइं सच्च ज़ोताई कि इस ज़मानेरे लोकन एना सैरी गल्लां केरे सज़ा मैलनी ।”

ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂ ⓂⓂⓂ
(ⓂⓂⓂⓂ 13:34-35)

37 फिरी यीशुए ज़ोवं, “हे यरूशलेम नगरेरे लोकव, हे यरूशलेम नगरेरे लोकव, तुसेईं केतरे नबी कत्तल किये ज़ैना बड़े पेइले तुसन कां आए, ते ज़ैना तुसन कां भेजे तुसेईं तैन घोड़ेईं बेई, मीं बड़े बार सोचू कि तेरे बच्चन अकोट्ठे केरि जेन्चरे कुकड़ी अपने बच्चन अपने फंगन हैठ रखचे पन तुस राज़ी न भोए । 38 हेरा तुश्शू घर तुश्शे लेइ बेरान भोइ गाते । 39 किजोकि अवं तुसन सेइं सच्च ज़ोताई, कि तुस मीं हुन्ना करां तैस दिहाड़े तगर कधे न लेई सकेले, ज़ांतगर मेरे बारे मां इन न ज़ोले, तैसेरी तारीफ़ भोए ज़ै प्रभुएरे अधिकारे सेइं एइते ।”

24

ⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂ ⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂ ⓂⓂⓂⓂⓂⓂ
(ⓂⓂⓂⓂⓂ 13:1-2; ⓂⓂⓂⓂ 21:5-6)

1 ज़ैखन यीशु मन्दरे मरां निस्तां चलोरो थियो, ते तैसेरे चले तैस कां आए, ताके तैस मन्दरेरे रोड़े-रोड़े भवन हिरान । 2 तैनी तैन सेइं ज़ोवं, “कुन तुस एन सब किछ हेरने लोरेथ? अवं तुसन सेइं सच्च ज़ोताई कि इड़ी कोई घोड़े पुड़ घोड़ बाकी न रालो, ज़ै बछ्छोड़ो न गालो ।”

ⓂⓂⓂⓂⓂⓂ ⓂⓂ ⓂⓂⓂⓂⓂ
(ⓂⓂⓂⓂⓂ 13:3-13; ⓂⓂⓂⓂ 21:7-19)

3 ज़ैखन तै ज़ैतून पहाड़े पुड़ विशोरो थियो, त तैसेरे चले अलग ज़ेरे तैस कां एइतां तैस सेइं ज़ोने लगगे, “असन ज़ो कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनोए?” 4 यीशुए तैन जुवाब दित्तो, “खबरदार राथ, कोई तुसन न टपलाए! 5 किजोकि बड़े मेरे नंवे सेइं एजनेन ते तैनेईं ज़ोनूए कि, ‘अवं मसीह आई,’ ते तैनेईं बड़े लोक टपलानेन । 6 तुस लड़ाई ते लड़ैईं केरि अफवाह शुनेले, खबरदार डेरथ नन्ना, किजोकि एन गल्लां ज़रूरी भोनिन, पन तैस वक्ते खातमां नईं भोनो । 7 किजोकि कौमी पुड़ कौम, ते राज्जे पुड़ राज्ज चढ़हाईं केरेलू, ते ठारी-ठारी काल पेलो, ते भुंजल एज्जेले । 8 मुसीबतां केरि शुरुआत भी एन्ने गल्लेईं सेइं भोनीए । 9 तैखन ज़ैना तुश्शे खलाफन तैना तुसन टलेइतां बड़ी सखत सज़ा देले, ते कत्तल केरेले, ते मीं पुड़ विश्वास केरनेरे वजाईं सेइं, सैरी कौमां केरे लोक तुसन सेइं बैर रखेले । 10 तैखन बड़े लोक मीं पुड़ विश्वास केरनो शारेले, एक्की होरि टलुवाले, ते एप्पू मांमेइं भी बैर रखेले । 11 ते बड़े झूठे नबी दुनियाईं मां निसनेन ते बड़े लोक टपलानेन । 12 अधर्म बधने सेइं बड़े लोक एप्पू मांमेइं प्यार केरनो शारेले । 13 पन ज़ै कोई आखरी दम्में तगर मीं पुड़ विश्वास केरेलो, त तैस्से मुक्ति मैलनीए । 14 ते परमेशेरेरे राज्जेरी ई खुशखबरी दुनियारे हर पासे शुनाईं गाली, ताके सैरी कौमां केरे लोकन मौको मैले कि तैना इस कबूल केरन, तैखन दुनियारो खातमां भोलो ।”

ⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂ 13:14-23; ⓂⓂⓂⓂ 21:20-24)

15 “ज़ैखन तुस तैस उज़्जाने बाली भिट्टी चीज़ी, ज़ेसेरे बारे मां दानिय्येल नेबे ज़ोरू थियूं, पवित्तर ठैरी खड़ी लाएले, (त पढ़नेबालो भी समझे) । 16 कि ज़ैना तैस मौके यहूदिया इलाके मां भोले तैना पहाड़न पुड़ ज़ो नश्शन । 17 ते ज़ैना लाए पुड़ भोन त तैना कोई चीज़ नेने अन्तर न एजन । 18 ते ज़ै मैन्हु ऊडारे मां भोलो, त तै लिगड़ां नेने अन्तर न एज्जे ।”

19 तैन दिहाइन मां जैना दोजींती त दुद्ध पियाती कुआन्श भोली, तैन केरे लेइ अफ़सोस! 20 “ते प्रार्थना केरा कि तुसन हिवतडे या आरामेरी दिहाडी नश्रनू न पे। 21 किजोकि तेइस एतरी बड्डी मुसीबत भोली, जेरि दुनियारे शुरू करां अज तगर नई ओरी, ते न कधी एज्जेली। 22 अगर तैन दिहाडां केरि तैधात घटेवरी न भोधी, त कोई प्राणी न थियो बचानो, पन चुनोरां केरे लेइ तैना दिहाडे घटेवरेन। 23 अगर कोई तुसन सेइं ज़ोए कि, ‘तक्का, मसीह इडी आए! या उडी आए!’ त तुस विश्वास न केरथ।”

24 “किजोकि झूठे मसीह ते झूठे नबी दुनियाई मां निसनेन, ते तैनेई निशान ते बड्डे-बड्डे चमत्कार हिरानेन, ते भोइसखे त चुनोरे लोक भी टेपलोनेन। 25 हेरा, मीं तुसन सैरी गल्लां भोनेरे पेइले ज़ोरिन। 26 अगर कोई तुसन सेइं ज़ोए कि, ‘हेरा तै जंगले मांए,’ त तुस बेइर न गेइयथ; ‘हेरा, तै घरे मांए,’ त तुस विश्वास न केरथ।”

27 “किजोकि जेन्चरे बिजली पूर्बेरां, पछमें तगर चमकतीए एन्चरे मैनेरू मट्टू भी एज्जेलू।” 28 “जैडी जिगग भोते तैडी इल्लां जम्हां भोइचन।”

📖📖📖📖📖
(📖📖📖📖 13:24-27; 📖📖📖📖 21:25-28)

29 “तैन दिहाइना बाद दिहाडो कालो भोइ गालो, त चांदनी लौ न देली, त कने अम्बेरां तारे बिछ्ड़ने लगगेले, त अम्बेरी सैरी शेक्ति हिलेइ गेली। 30 तैखन मैनेरे मट्टेरो निशान अम्बेरे मां लेइहोनोए, ते दुनियारी सैरी कौमां छाती पिट्टेली, ते मैनेरू मट्टू अम्बेरे मरां बिदलारी पुड बेडि शेक्ति ते महिमा सेइं एइते लाएले। 31 ते तै अपने स्वर्गदूत ते नइशिंगेरी बडी आवाजी सेइं साथी भेजेलो, ते तैसेरे चुनोरे लोकन चेवरे पासन अम्बेरे एक्की पासेरां होरि पासे तगर सेबन जम्हां केरेले।”

📖📖📖📖📖
(📖📖📖📖 13:28-31; 📖📖📖📖 21:29-33)

32 “फ़ेगेरे बुटे करां ई सबक शिखा, जेरे तैसेरे डाल नर्म भोतन ते पट्लां निसतन त तुस बुझतथ कि गेर्मेरो मौसम एजनेबालो आए। 33 एसेरो ज़ेरो, जैखन तुस एना गल्लां, जैना मीं ज़ोई, भोते हेरेले, त तुस बुझ्झी छ्ड़ड्डा कि मैनेरू मट्टू, यानी अवं बडे नेडे पुज्जोरोई। 34 अवं तुसन सेइं सच्च ज़ोताई, कि ज़ां तगर एन सब किछ्छ पूरू न भोए, तांतगर एस पीडरो खातमां न भोलो। 35 अम्बर ते धरती टेली गाली पन मेरी गल्लां कधे न टेलेली।”

📖📖📖📖📖
(📖📖📖📖 13:32-37; 📖📖📖📖 17:26-30,34-36)

36 “मेरे वापस एजनेरे दिहाडेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त कने परमेशेरू मट्टू यानी अवं भी न जैनी, पन सिर्फ मेरो बाजी परमेशर ज़ानते। 37 जेन्चरे नूहेरे ज़माने मां भोरू थियूं, तेन्चरे मैनेरे मट्टेरे एजनेरे वक्ते भोनूए। 38 किजोकि तूफान एजने करां पेइले भी लोक खाते पीते थिये, ते इला भी बनाते थिये, ते नूहेरे किशती मां गाने तगर एन सब किछ्छ भोतू राऊं। 39 तैन पतो भी न थियो कि कुन भोने बालूए, इडी तगर कि तूफान अव ते तैनी सब किछ्छ रुडेइतां नेव, ते मैनेरे मट्टेरू यानी मेरू एजनु भी एरू भोनूए। 40 तैखन ऊडारे मां दूई मैन्हु कम केरते भोले ते अक नीयो गालो, ते दुइयोवं तैडी रालो। 41 ते दूई कुआन्शां दलाट पीती भोली त अक नी गाली ते होरि तैडी राली। 42 तुस बींझे राथ किजोकि तुस न ज़ानथ कि तुशशो प्रभु केइस एजनोए। 43 पन याद रखा, अगर घेरेरे मालिके पतो भोए कि चोर कताली एजनो, त तै बींझे बिशेथो ते अपने घेरे चोरी न भोने देथो। 44 एल्हेरेलेइ तुस भी तियार राथ, किजोकि जैखन तुसन शक भी नई भोनी त मैनेरू मट्टू यानी अवं एज्जी गानोई।”

📖📖📖📖📖
(📖📖📖📖 12:41-48)

45 “ईमानदार ते अक्लमन्द नौकर तैसेरो ज़ेरोए, जेसेरो मालिक तैस अपने नौकरन पुड पुछ्छनो गन्ने रखे ताके तै तैन मौके पुड रोट्टी दे, ते फिरी दूर सफरे पुड गाए।” 46 “तै नौकर धने जेसेरो मालिक एइतां तैस करां एरू जेरू केरतो लाए।” 47 अवं तुसन सेइं सच्च ज़ोताई कि तै मालिक अपने घेरेरो सारो अधिकार तैसेरे सुपुर्द केरेलो। 48 “पन अगर तै बुरो नौकर अपने दिले मां एन ज़ोए कि मेरे मालिकेरे एजने हेजू बडू चिरे। 49 ते अपने सैथन मारने कुटने ते शरैपण सेइं खाए ते पीए। 50 त तैसेरो मालिक कोस्कोई एरी दिहैडी एज्जे जेइस तैस नौकरे उमीदे न

भोए, ते तैसेरो मालिक वापस एज्जी गाए। 51 ते मालिक तैस पक्की सजा देलो, ते तैसेरो हिस्सो पाखंडी लोकन सेइ साथी भोलो, जैडी लेरां देनी ते दंत चापने भोले।”

25

११ ११११११ ११११११ ११११ १११११

1 तैखन यीशुए अपने चलन सेइ ज़ोवं, जैखन मैनेरू मट्टू यानी अवं वापस एज्जेलो तैस मौके स्वर्गेरू राज़ तैन दश अड्लैई कुइयां केरू जेरू भोलू, जैना अपनि मिसालां बैलतां लाड़े सेइ मिलनेरे लेइ निस्सी। 2 तैन मां पंच बेवकूफ थी, पन पंच अक्लमन्द थी। 3 जैना बेवकूफ थी तैनेई मिसालां त नी, पन होरो तेल साथी न नीयो। 4 “पन जैना अक्लमन्द थी तैनेई मिसालां केरे अलावा कुप्पन मां होरो तेल भी साथी नीयो।” 5 लाड़ो एज्जने च़िर लग्गू, ते तैना सब बलगते-बलगते डिगरी लेइ देने, ते झुल्ली जेई।

6 “अध्धी रात भोइ त शौर मच्ची कि लाड़ो ओरोए, ते तैस सेइ मिलनेरे लेइ एज्जा। 7 तैखन सैरी अड्लैई कुइयां बींझी, ते अपनि-अपनि मिसालां ठीक केरने लेगि। 8 बेवकूफ कुइयेई अक्लमन्द अड्लैई कुइयन सेइ ज़ोवं, ‘अपने तेले मरां थोड़ो जेरो तेल असन भी देथ, किजोकि इश्शी मिसालां हिश्शने लोरिन।’ 9 पन अक्लमन्देई जुवाब दित्तो, ‘असन कां एतूरो तेल नई, कि इश्शे लेइ ते तुश्शे लेइ पूरो भोए, तुस एरू केरा कि बेचनेबालन करां आनां।’ 10 जैखन तैना तेल घिन्ने च़ेलोरि थी त तैत्रे मां लाड़ो पुज़ी जेव, ते जैना तियार थी, तैना लाड़े सेइ साथी अन्तर ड़्लाएरे घरे मां च़ेलि जेई, ते दार बंद केरतां छ़डू। 11 बादे मां तैना होरि अड्लैई कुइयां भी वापस पुज़ी ते लाड़े जो ज़ोने लेगि, ‘प्रभु! प्रभु!’ इश्शे लेइ दार खोल्ल। 12 पन तैनी जुवाब दित्तो, ‘अवं तुसन सेइ सज़ ज़ोताई, अवं तुसन न ज़ैनी।’ 13 एल्हेरेलेइ खबरदार राथ, किजोकि तुस मेरे वापस एज्जनेरे दिहाड़ेरे बारे मां न ज़ानथ।”

११११११ ११११ १११११
(११११ 19:11-27)

14 जैखन मैनेरू मट्टू यानी अवं वापस एज्जेलो त स्वर्गेरू राज़ तैस मैनेरो जेरू भोनूए, जै दूर मुलखे जेव, तैनी अपने नौकर कुजाए ते सारी दौलत तैन दित्ती, ते तैन ज़ोवं एस दौलती सेइ होरि भी कमाई केरा। 15 “तैनी एक्की पंच तोड़े दित्ते होरि दूई तोड़े दित्ते, ते एक्की अक्के तोड़ो* दित्तो, हर एक्की तैसेरे काबलीतरे मुताबिक दित्ते, ते एप्पू होरि मुलखे जो च़लो जेव।” 16 जैस नौकरे पंच तोड़े मैलोरे थिये, तैनी गेइतां कारोबार केरतां पंच तोड़े होरे कमाए। 17 एन्चरे जैस नौकरे दूई तोड़े मैल्लोरे, तैनी दूई होरे कमाए। 18 पन जैस नौकरे अक तोड़ो मैल्लेरो थियो, तैनी मित्ती घेइतां मालिकेरी रकम छ़पेइतां छ़डी।

19 बड़े च़िरेरां पत्ती तैसेरो मालिक वापस अव, ते नौकरन सेइ हिसाब केरने लगो कि तैनेई तैन तोड़ां केरू कुन कियू। 20 “जैस नौकरे पंच तोड़े मैल्लोरे थिये, तैनी गेइतां पंच होरे तोड़े हाज़र कमाए ते ज़ोने लगो, हे मालिक तीं पंच तोड़े दित्तोरे, ते हेर मीं पंच तोड़े होरे कमाए।” 21 मालिके तैस सेइ ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइ कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो।”

22 ते जैस दूई तोड़े मैल्लोरे थिये, ते भी अव ते ज़ोने लगो, “हे मालिक तीं मीं दूई तोड़े दित्तोरे थिये, ते हेर मीं दूई तोड़े होरे कमाए।” 23 मालिके तैस सेइ ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइ कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो।”

24 ते जैस अक तोड़ो मैल्लेरो थियो, त तै भी हाज़र भोव ते ज़ोने लगो, “हे मालिक अवं ज़ानतो थियो तू बड़ो सखत मेन्हु आस, तू तैस मैनेरो जेरोस ज़ैनी ऊडारे मां फसल नई बेवरी ते तै तैट्टां फसल कटते।” 25 एल्हेरेलेइ अवं डरो कि अगर अवं तेरी दौलत हिरेइलो त तू मीं सजा देलो, तांए तेरी दौलत मीं ज़मीनी मां देबतां छ़डी, हेर, “तेरी दौलत ई आए।” 26 तैसेरे मालिके जुवाब दित्तो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो जेरोई ज़ैनी जैस ऊडारे मां नई बेवरू त तैट्टां कटते। 27 त तीं एन लोड़तू थियू कियोरू, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरेथो। 28 हुनी एन केरा कि एस करां तै तोड़ो नेइतां तैस देथ जैस कां दश तोड़ेन। 29 एल्हेरेलेइ जैस कां परमेशेरी मर्जी समझनेरी इच्छा आए,

* 25:15 25:15 तोड़ो: अक तोड़ो परहने सालां केरि कुमैयारे बराबर थियो।

तैस परमेशर जादे समझ देलो। पन जैस कां परमेशेरी मर्जी समझनेरी इच्छा नई, तैस केरां, थोड़ी जेरि समझ जै तैस कां आए, तै भी नी गाली। 30 ते एस निकम्मे नौकरे आंधरे मां छड्डा, जैड़ी ए लेरां देंतो ते दंत चापतो राए।

????? ?????????? ?????????? ??????????

31 जैखन मैनेरू मट्टू यानी अवं, अपने महिमा मां अपने स्वर्गदूतन सेइं साथी एज्जेलो त अपने महिमारे तखते पुड़ बिश्तां लोकन पुड़ राज़ करेलो। 32 सैरी कौमां मीं कां अकोट्टी भोली, ते धर्मी लोक बुरे लोकन करां अलग किये गानेन, जेन्चरे पुहाल भैडन, छेल्लन मरां अलग करते। 33 ते अवं धर्मी लोकन सेइं जैना मेरे देइने पासे भोले, ते बुरे लोकन जैना मेरे बांए पासे भोले। 34 तैखन राज़ो यानी अवं अपने देइने पासेरे लोकन सेइं ज़ोलो, “एज्जा मेरे बाजेरे धन लोकव इन राज़, जैन दुनियारे शुरू मां तुशशे लेइ तियार कियोरू। 35 किजोकि अवं नियन्नो थियो, ते तुसेईं मीं रोट्टी खुवाई, अवं टलिशोरो थियो, ते तुसेईं मीं पानी पियांव अवं परदेशी थियो, ते तुसेईं अवं अपने घरे मां कुजाव। 36 अवं नगगो थियो, ते तुसेईं मीं लिगड़ां दित्तां, ते अवं बिमार थियो, ते तुसेईं मेरी हेरगेश की अवं कैद थियो, ते तुस मीं मिलने आए।”

37 तैखन तैना धर्मी मैनन् ज़ोलो, “हे प्रभु असेईं कैखन तू नियन्नो लाव, ते असेईं तीं रोट्टी खुवाई या तू टलिशोरो थियो, ते असेईं तीं पानी पियांव।” 38 असेईं कैखन परदेशी सेमझतां तू अपने घरे मां रख्वो, या तू नगगो थियो, ते असेईं तीं लिगड़ां दित्तां? 39 ते अस कताली तीं बिमार या कैद लेइतां तीं सेइं मिलने आए? 40 तैखन राज़ो यानी अवं जुवाब देलो, “कि अवं तुसन सेइं सच्च ज़ोताई कि जैखन तुसेईं इन लोकन सेइं जैनेईं मीं पुड़ विश्वास कियो एक्की सेइं भी एरो बर्ताव कियो त एन बुझा कि एन तुसेईं मीं सेइं कियूं।”

41 तैखन तै बांए पासे बालन सेइं ज़ोलो, “हे लानती लोकव मेरे तुत्तरे अगरां तैस हमेशारी बैलती अग्गी मांजो गाथ, जै परमेशेरे, शैतान त कने शैतानेरे दूतां केरे लेइ तियार कियोरीए। 42 एल्हेरेलेइ जैखन अवं नियन्नो थियो, ते तुसेईं मीं रोट्टी न खुवाई अवं टलिशोरो थियो, ते तुसेईं मीं पानी न पियांव। 43 अवं परदेशी थियो, ते तुसेईं अवं अपने घरे मां न रख्वो, अवं नगगो थियो, ते तुसेईं मीं लिगड़ां न दित्तां, ते अवं बिमार ते कैद थियो, ते तुस मीं सेइं मिलने न आए।”

44 तैखन तैना लोक भी ज़ोले, “हे प्रभु असेईं कताली तू नियन्नो या ते टलिशोरो या परदेशी ते नगगो या बिमार या कैद लाव ते असेईं तेरी सेवा न की?” 45 तैखन अवं अपने बांए पासेरे लोकन जुवाब देलो, “अवं तुसन सेइं सच्च ज़ोताई कि जैखन तुसेईं मेरे इन निकड़े करां निकड़े लोकन पुड़ जैना मीं पुड़ विश्वास केरतन एक्की सेइं भी एरो ज़ेरो बर्ताव कियो त एन बुझा कि एन मीं सेइं कियूं। 46 एल्हेरेलेइ एन लोकन हमेशारे लेइ सज़ा भोली, पन धर्मी लोकन हमेशारी जिन्दगी मैलेली।”

26

????????? ?????? ??????????

(????????? 14:1-2; ?????? 22:1-2; ?????????? 11:45-53)

1 जैखन यीशुए एन गल्लां की, त तै अपने चलन सेइं ज़ोने लगो। 2 “तुसन पत्तोए कि दूई दिहैइना बाद फ़सह तिहारे, ते मैनेरू मट्टू कूरुसे पुड़ चाढ़नेरे लेइ टलुवाव गाए।”

3 तैखन प्रधान याजक ते कौमरे बुजुर्ग कैफा महायाजकेरे अंगने मां अकोट्टे भोए। 4 ते तैनेईं सल्लाह की, कि यीशु धोखे सेइं टलेइतां मैरी छड्डम। 5 पन तैना ज़ोते थी, कि फ़सह तिहारेरे मौके पुड़ नई, एरू न भोए कि लोक हंगामो केरन।

????????????????? ?????????????? ?????? ?????????????? ?????????????? ??????????????

(????????? 14:3-9; ?????????????? 12:1-8)

6 तैस मौके यीशु बैतनिय्याह डलव्वं मां शमौन कोद्वेरो घरे मां थियो। 7 ते अक कुआन्श शंखमरमरी भांडे मां इत्र घिन्तां यीशु कां आई, तैखन तै रोट्टी खानेरे लेइ बिशोरो थियो, त तैसेरे दोग्गे पुड़ तै इत्र उलटाव। 8 चले एन लेइतां बड़े नाराज़ भोए ते ज़ोने लग्गे, “कि ए किजो बराबर कियो?” 9 अगर ए बेचोरो भोथो, त बड़ी कीमत मैलनी थी, जै गरीबन बेन्टतां देथे। 10 यीशुए एन शुन्तां तैन सेइं ज़ोवं, “तुस एस कुआन्शी किजो तंग केरने लोरेथ? एसां त मीं सेइं रोड़ू कियोरू। 11 गरीब त हमेशा तुसन सेइं साथी भोनेन, पन अवं तुसन सेइं साथी हमेशा नई भोनो। 12 तैसां मेरी जानी पुड़ जै ई इत्र उलटावरोए, तैसां मेरे दबनेरे लेइ कियोरू। 13 अवं तुसन सेइं सच्च ज़ोताई, कि सैरी दुनियाई मां जैड़ी भी खुशखबरी शुनाई गाली, तैड़ी तैसेरी यादगैरी मां एस गल्लरे बारे मां भी ज़ोवं गालू।”

१४:१०-११; २२:३-६)

14 फिरी 12 चेलन मरां अक ज़ेसेरू नवं यहूदा इस्करियोती थियूं, प्रधान याजकन कां जेव ते ज़ोवं । 15 “अगर अवं यीशु तुसन ट्लुवेइं, त तुस मीं कुन देले? तैनेई तैस ट्लाही चैदरे सिके दित्ते । 16 ते तै तेइसेरो तै ठीक मौके बलगने लगो कि यीशु केन्चरे सेइं ट्लुवाए ।”

१४:१२-२१; २२:७-१३,२१-२३; १३:२१-३०)

17 “अखमीरी रोट्टारे तिहारेरी पेइली दिहाड़ी चले यीशु कां एइतां पुच्छने लगगे कि, तू फ़सह तिहारेरी रोट्टी कोड़ि खानी चातस, ताके अस गेइतां तियारी केरम?” 18 तैनी ज़ोवं, “नगर मां अक फ़लानो मैनुए, ते तुस तैस कां गाथ ते तैस ज़ोथ, कि गुरु ज़ोने लगगोरोए, मेरो वक्त नेडे पुजोरोए ते अवं अपने चेलन सेइं साथी फ़सह तेरे घरे मां मनेइलो ।” 19 बस्सा ज़ेरो यीशुए अपने चेलन हुक्म दित्तोरो थियो, तैनेई तेन्चरे फ़सह तिहारेरी रोट्टी तियार की ।

20 ज़ैखन इलोझ भोइ त यीशु 12 चेलन सेइं साथी रोट्टी खाने बिशुओ । 21 ते रोट्टी खांते बार यीशुए तैन सेइं ज़ोवं, “अवं तुसन सेइं सन्न ज़ोताई कि तुसन मरां अक मीं ट्लुवालो ।” 22 “एन शुन्तां तैना सारे चले उदास भोए, तैना बैरी-बैरी सेइं तैस पुच्छने लगगे, हे प्रभु कुन अर्वे त नई?” 23 तैनी जुवाब दित्तो, “ज़ैनी मीं सेइं साथी थैली मां हथ छ़डोरोए, तैए मीं ट्लुवालो । 24 मैनेरे मट्टेरे लेइ त ज़ेरू तैसेरे बारे मां लिखोरूए तैस सेइं तेरहु कियूं गाते, पन अफ़सोस तैस मैन्हु पुड़ ज़ेसेरी वजाई सेइं तैन ट्लुवाव जेव, तैसेरेलेइ एन्ने रोड़ थियूं कि तै ज़मोरो न भोथो । 25 तैखन ट्लुवानेवालो यहूदा ज़ोने लगो, हे गुरु अर्वे त नई? तैनी तैस सेइं ज़ोवं, तीं एप्पू ज़ोवं ।”

१४:२२-२६; २२:१४-२०; ११:२३-२५)

26 खांते बार यीशुए रोट्टी ट्लाती, ते बरकत मेगतां ट्लोड़ी, ते चेलन कां देइतां ज़ोवं यांथ खाथ ई मेरी जाने । 27 फिरी यीशुए दाछ़रे रसेरो कटोरो ट्लातो, ते परमेशेरू शुकर केरतां चेलन कां दित्तो ते ज़ोवं, “यांथ तुस सब इस मरां पीया । 28 किजोकि ई मेरे नंवे करारे मां मेरो तै खूने ज़ै बड़ां केरे पापां केरि मैफारे लेइ दित्तो गाते । 29 अवं तुसन सेइं ज़ोताई, कि अवं दाछ़ारो ई रस फिरी कधे न पियेलो ज़ां तगर परमेशेरे राज़े मां तुसन सेइं साथी नंवो न पीं ।” 30 तैल्ला पत्ती, यीशु त कने तैसेरे चले परमेशेरू भजन ज़ोइतां, यरूशलेम नगरेरे बेइर ज़ैतून नंवेरे पहैड़ी पुड़ चली जे ।

१४:२७-३१; २२:३१-३४; १३:३६-३८)

31 तैखन यीशुए तैन सेइं ज़ोवं, “तुस अजे राती मेरी वजाई सेइं ठोकर खाले, किजोकि लिखोरूए, ‘अवं पुहाले मारेलो ते धनेरी भैइडां तितर-बितर भोली ।’ 32 पन अवं ज़ीतो भोइतां तुसन करां पेइले गलील इलाके मां गेइलो ।” 33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कधी ठोकर न खेइलो ।” 34 यीशुए तैस सेइं ज़ोवं, “अवं तुसन सेइं सन्न ज़ोताई कि अज राती कुकड़ बांग देने करां पेइले तू मेरो ट्लाई बार इन्कार केरेलो ।” 35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चलेई भी एन्ने ज़ोवं ।”

१४:३२-४२; २२:३९-४६)

36 तैखन यीशु अपने चेलन सेइं साथी एक्की ठैरी पुजो, ज़ैस ठारारू नवं गतसमनी थियूं, ते तै अपने चेलन सेइं ज़ोने लगो, तुस इड़ी बिशुआ, ते तांतगर अवं उड़ी अगर गेइतां प्रार्थना केरताई । 37 तैनी पतरस ते जेब्देरां दुइये मट्टां साथी नियां, ते तैड़ी तै बड़े परेशान भोने त कने घबराने लगो । 38 फिरी यीशु तैन सेइं, इस दुखेरे वजाई सेइं मेरे प्राण निसने लोरेन इड़ी बिशुारे राथ ते बींझे राथ । 39 फिरी थोड़ो ज़ेरे अगर गेइतां तल्ले मां मथ्यो टेकतां खिरको ते प्रार्थना की, “हे बाजी अगर भोइसखे त ई कटोरो मीं करां टेली गाए, फिरी भी ज़ैन अवं चाताई तैन नई बल्के ज़ैन तू चातस तैन्ने भोए ।” 40 फिरी तै चेलन कां वापस अव ते तैना झुलोरे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बींझे न बिशुआ सके?” 41 बींझे बिशुआ ते प्रार्थना केरते राथ ताके तुस अजमैइशी मां न राथ, आत्मा त तियारे पन जान कमज़ोरे । 42 यीशुए फिरी जेव, ते ई प्रार्थना की, “हे मेरे बाजी

ई दुख्खेरो कटोरो मेरे पीने बगैर टेली न सखे, त तेरी मर्जी पूरी भोए।” 43 तैखन तै चलन कां एइतां तैना फिरी झुलोरे लाए, किजोकि तैन केरि एछ्छी ओंडले सेइं गिरकी भोरी थी। 44 तै तैन तैड़ी छेइतां चलो जेव, ते फिरी तैए प्रार्थना केरने लगो जै पेइली कियोरी थी। 45 तैसेरां बाद तै चलन कां वापस अव, ते तैन सेइं ज़ोने लगो, “हुनी झुलोरे राथ ते आराम केरा, हेरा तै मौको नेड़े पुजोरोए, ते मैनेरू मट्टू पापी लोकां केरे हवाले कियूं गाते। 46 उठा, च़लम। हेरा! मीं टलुवानेबालो नेड़े पुज्जी जोरोए!”

ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 14:43-50; ⓂⓂⓂⓂⓂⓂ 22:47-53; ⓂⓂⓂⓂⓂⓂⓂ 18:3-12)

47 तै एना गल्लां ज़ोने लोरो थियो, त यहदा जै 12 चलन मरां थियो तैड़ी पुजो, तैस सेइं साथी बड़े मैन्हु थिये जैना तलवारां ते लट्ठां घिन्तां ओरे थिये तैना प्रधान याजकन ते कौमरे बुजुर्ग लोकेई भेजोरे थिये। 48 तैसेरे टलुवाने बाले तैन ई निशान दित्तोरो थियो, कि जैस अवं फुम्मड़ी देइलो त तैए, ते तुस तैस टलेइयथ। 49 ते तैखन यहदा, यीशु कां एइतां ज़ोवं, हे गुरू नमस्कार, ते एइतां तैस फुम्मड़ी दित्ती। 50 यीशुए तैस सेइं ज़ोवं, हे मेरे दोस्ता जैस कम्मेरे लेइ तू ओरोस तैन कम केर, तैखन लोकेई एगरोइतां यीशु पुड़ हथ रखे ते टलाव। 51 यीशुएरे सैथन मरां एक्के अपनि तलवार कढी, ते महायाजकेरे नौकरे पुड़ बाई ते तैसेरो कन्न कटो। 52 तैखन यीशुए तैस जो ज़ोवं, तलवारी मियाने मां रख किजोकि जैना तलवार च़लातन तैना तलवारी सेइं मारे गाले। 53 “कुन तू न ज़ानस अवं अपने बाजी करां मिनत केरि सकताई ते हुन्ना स्वर्गदूतां केरि 12 फौवजां बल्के तैस करां भी जादे भेजते। 54 पन फिरी तैना पवित्रशास्त्रेरी गल्लां केन्चरे पूरी भोनिन ज़ैन केरू पूरू भोनू ज़रूरीए?” 55 तैखन यीशुए तैन हछे लोकन सेइं ज़ोवं, “अवं कुन कोई डैकू आई ते तुस मींजो डांग सोटे ते तलवारां टलेइतां मीं टलाने ओरेथ? अवं त रोज़ मन्दरे मां बिश्तां शिक्षा देतो थियो ते तैखन तुसेईं अवं नई टलातोरो? 56 पन एन सब किछ् एल्हेरेलेइ भोवं, कि पवित्र बचने मां नेबी केरि लिखोरी गल्लां पूरी भोन, तैखन सारे चेले तैस तैड़ी छेइतां च़ले जे।”

ⓂⓂⓂⓂⓂⓂ ⓂⓂⓂ ⓂⓂⓂⓂⓂ

(ⓂⓂⓂⓂⓂⓂ 14:53-65; ⓂⓂⓂⓂⓂⓂ 22:54-55,63-71; ⓂⓂⓂⓂⓂⓂⓂ 18:13-14,19-24)

57 ते यीशु टलानेबाले तैस महायाजक कैफा कां घिन्तां जे, जैड़ी तैना शास्त्री ते बुजुर्ग अकोट्ठे भोरे थिये। 58 ते पतरस भी दूरेरां देंतो पत्पती तैस महायाजकेरे अंगनेरे तगर जेव, ते तैड़ी पेरहेदारन सेइं साथी बिश्तां यीशुएरो अन्त लोरो थियो हेरने कि कुन केरतन। 59 प्रधान याजक ते कने सारी महासभा यीशुएरे खलाफ गवाही तोपनेरी कोशिश केरि राओरे थिये, कि जैस सेइं यीशु कल्ल कियो गाए। 60 पन कोई गवाह न मैल्लो, हालांकी बड़े झूठे गवाह भी पैश भोए, आखकार दूई गवाह पैश भोए। 61 ते ज़ोने लगगे, एनी ज़ोरू कि “अवं परमेशेरू घर डोलतां टलेइ दिहाइन मां फिरी खडू केरि सकताई।” 62 तैखन महायाजक खडो भोइतां यीशु पुच्छने लगो, “कुन तू कोई जुवाब न देस, इना लोक तेरे खलाफ कुन गवाही देतन?” 63 पन यीशु चुप राव, “तैखन महायाजक फिरी पुच्छने लगो, तीं जींते परमेशेरी कसम भोए कि असन ज़ो, कि तू परमेशेरू मट्टू मसीह आस? 64 यीशुए जुवाब दित्तो, तीं एप्पू ज़ोई छडू ते हुनी अवं भी ज़ोताई कि अज्जरे बाद तुस मैनेरे मट्ठे परमेशेरेरे देइने पासे बिश्शोरे लाएले, ते अम्बरे पुड़ बिदलारी मां एइते लाएले।” 65 तैखन महायाजके अपना लिगडां छिंदा, ते ज़ोने लगो, एनी परमेशेरी तुहीन कियोरीए हुनी असन केन्ची गवाहेरी ज़रूरत नई, तुसेईं हुन्ना एसेरू झूठ शुनेरूए। 66 तुश्शी कुन राईए? तैनेई जुवाब दित्तो ए कतलेरे काबल आए? 67 तैखन तैनेई तैसेरे तुत्तरे पुड़ थुकू ते तैस घुसेइं ते होरेई थप्पड़ मैरतां ज़ोवं। 68 “हे मसीह अगर तू नबी आस त भविष्यवाणी केर ते ज़ो, तीं केनि बाहोरिए?”

ⓂⓂⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂⓂⓂ 14:66-72; ⓂⓂⓂⓂⓂⓂⓂ 22:56-62; ⓂⓂⓂⓂⓂⓂⓂⓂ 18:15-18,25-27)

69 पतरस बेइर अंगने मां बिशोरो थियो, ते अक नौकरानी तैस कां आई ते ज़ोने लगगी कि तू भी यीशु गलीली सेइं साथी थियो। 70 तैनी सेब्भी केरे सामने इन्कार कियो ते ज़ोवं, “मीं नई पतो तू कुन लोरिस ज़ोने? 71 तैखन पतरस बेइर फाटकेरे पासे जेव, त अक होरि नौकरानी तैस लेइतां तैन सेइं ज़ैन तैड़ी थी ज़ोने लाई, ई मैन्हु भी नासरतेरे यीशु सेइं साथी थियो।” 72 पन तैनी सेब्भी केरे सामने कसम केरतां इन्कार कियो, ते ज़ोवं, अवं एस मैन्हु सैइयां न ज़ैनी। 73 थोड़े च़िरेरां पत्ती तैना लोक जैना तैड़ी खडखडे थिये, पतरसे कां आए ते ज़ोने लगगे, सच्चे तू भी तैन्ने मरां अक आस, किजोकि तेरी बोली सेइं बुझोते कि तू तैसेरो साथिस। 74 तैखन तै तैस जो गैई देइतां

जोने लगो, ते कसम केरतां जोने लगो, “अवं एस मैन्हु सैइयां न ज़ैनी।” तैखन कुकड़े बांग दित्ती। ⁷⁵ पतरसे तैखन यीशुएरी तै गल याद आई, जै तैनी ज़ोरी थी कि कुकड़ेरे बांग देने करां पेइले तू ट्लेइ बार मेरो इन्कार केरेलो, ते पतरस बेइर गेइतां हुस्बुकैइ-हुस्बुकैइ लेरां देने लगो।

27

([मत्ती 15:1](#); [मत्ती 23:1-2](#); [मत्ती 18:28-32](#))

¹ झेझ भोंते सारे लोक ते प्रधान याजक, ते कौमरे बुजुर्गेई मुशोरो कियो कि यीशुएरे कल्ल केरनेरो फैसलो कियो। ² ते यीशु बंधतां नीयो, ते रोमी गवर्नर पिलातुसे कां नीयो।

([मत्ती 1:18-19](#))

³ जैखन यहूदा जैनी यीशु ट्लुवेवरो थियो तैस एसास भोव, कि यीशु मुर्जम बनोरोए त तैनी बडू पशतावं, ते तैना चैंदरे ट्लही सिक्के प्रधान याजक ते बुजुर्गन कां वापस आने। ⁴ ते जोने लगो, “मीं पाप कियो, कि अक बेकसूर मैन्हु, मारने लेइ ट्लुवाव,” ते तैना जोने लगगे, “असन कुने? तू ज्ञान ते तेरू कम ज्ञाने।” ⁵ तैखन यहूदा तैना सिक्के मन्दरेरे अंगने मां शैरतां छडे, ते तैट्ठां गेइतां अपने आपे फांसी दित्ती।

⁶ प्रधान याजकेई तैना सिक्के सल्ले, ते जोने लगगे, “इन सिक्के इश्शे कानूनेरे मुताबिक मन्दरेरे खजाने मां रखने जेइज नई, किजोकि ए कोन्ची मैन्हु मारनेरी कीमते।” ⁷ एल्हेरेलेइ तैनेई मुशोरो केरतां तैस रकमी सेइं कुम्हारे करां अक ऊडार घिन्नु, ताके परदेशी केरे लेइ कब्रास्तान बनावं गाए। ⁸ तांए त अज तगर भी तैस ऊडारे जो खूनेरू ऊडार जोतन। ⁹ तैखन तै गल पूरी भोइ जै यिर्मयाह नेवे ज़ोरी थी, कि तैनेई तैसेरी पूरी कीमत चैंदरे ट्लही सिक्के नियो, ए कीमत इस्राएलेरे लोकेई कियोरी थी। ¹⁰ ते तैन चैंदरे ट्लही सिक्केइ सेइं कुम्हारेरू ऊडार घिन्ने जो दित्ते जेन्चरे प्रभुए मीं हुक्म दित्तोरो थियो।

([मत्ती 15:2-5](#); [मत्ती 23:3-5](#); [मत्ती 18:33-38](#))

¹¹ जैखन यीशु हाकिमेरे तुत्तरे अगर खडो थियो, ते हाकिम तैस पुच्छ, “तू यहूदी केरो राज़ोस?” यीशुए जुवाब दित्तो, “तू एप्पू जोने लोरोस।” ¹² ते जैखन प्रधान याजक ते बुजुर्ग तैस पुइ इलजाम लाने लोरे थियो त यीशुए कोई जुवाब न दित्तो। ¹³ तैखन पिलातुसे यीशु सेइं ज़ोवं, “हेर एना तेरे खलाफ केत्री गवाहैई लोरेन देने तू शुन्तस की नई।” ¹⁴ पन यीशुए तैस एक्की गल्लारो भी जुवाब न दित्तो; ते इड़ी तगर कि हाकिम बडो हैरान भोइ जेव।

([मत्ती 15:6-15](#); [मत्ती 23:13-25](#); [मत्ती 18:39](#); [19:16](#))

¹⁵ ते हाकिमेरो अक दस्तूर थियो, कि फ़सह तिहारेरे मौके पुइ अक कैदी जैस लोक चाते थियो तैस हथरां छेडतो थियो। ¹⁶ तैस मौके तैन केरो अक बडो मुशूर कैदी थियो, जेसेरू नवं बरअब्बा थियूं। ¹⁷ जैखन तैना लोक पिलातुसे कां जम्हां भोए, त पिलातुसे तैन पुच्छ, “तुस कुन चातथ, अवं केस हथरां छेडडी? बरअब्बा कि यीशु जैस जो मसीह जोतन?” ¹⁸ किजोकि तै ज्ञानतो थियो, कि तैनेई सिर्फ जलनी सेइं तै ट्लुवोरोए। ¹⁹ जैखन तै आदालतरी तखते पुइ बिशोरो थियो, त तैसेरी कुआन्शां तैस जो समाद भेजोरो थियो, “कि तू एस रोडे मैनेरे बारे मां किछ न करां, किजोकि मीं अज राती एसेरी वजाई सेइं सुपने मां बडो दुःख भोरोए।”

²⁰ पन प्रधान याजकेई ते बुजुर्ग लोकेई लोक बमकाए, कि तैना पिलातुसे करां बरअब्बा हथरां छेडन ते यीशु मारन। ²¹ जैखन हाकिमे तैन लोकन पुच्छ, “कि तुस एन दुईन मरां केस चातथ, अवं तैस हथरां छेडडी,” तैन लोकेई ज़ोवं, “बरअब्बा।” ²² पिलातुसे तैन पुच्छ, “फिरी अवं यीशु जैस जो मसीह जोतन तैस सेइं कुन केरि?” सब लोक जोने लगगे “एस क़रूसे पुइ च़ाढ़।” ²³ हाकिमे ज़ोवं किजो? “एनी कुन बुराई कियोरीए? पन तैना मना ज़ोरे-ज़ोरे जोने लगगे कि एस क़रूसे पुइ च़ाढ़।” ²⁴ जैखन पिलातुसे हेरू कि किछ भी बन्ने बालू नई बल्के उलटो फसाद भोने बालोए, त तैनी पानी मेगतां तैन मैन्हु केरे सामने हथ धोए ते ज़ोवं, “कि अवं एस एक्की धेर्मी मैनेरे खूने करां बरी भोइताई, तुसे ज्ञाना।” ²⁵ ते सारे लोकेई जुवाब दित्तो, “एसेरो खून असन पुइ ते इश्शी औलादी पुइ

भोए।” 26 तैखन पिलातुसे बरअब्बा हथरां छड्डो, ते यीशुए कोड़े बावैहीतां तैन केरे हवाले कियो, ताके तैना तैस करूसे पुड़ चाढ़न।

([मत्ती 15:16-20](#); [मत्ती 19:2,3](#))

27 ते तैखन हाकिमेरे सिपैहीयेइं यीशु महलेरे अंगने मां नेइतां सारे फौजरे सिपाही यीशुएरे चुफुरतां जम्हां भोए। 28 तैनेई तैसेरां लिगडां खोल्लां ते तैस अक लाल रंगेरो चोगो लुवाव। 29 फिरी कंटां करू ताज तैसेरे दोगगे पुड़ रखू, ते तैसेरे देइने हथ्ये मां अक निरैठरी लैठ दित्ती, ते तैस कां मथ्यो टेकतां तैसेरी हासी बनाने लगगे, ते ज़ोने लगगे, “हे यहूदी केरे राजा नमस्कार।” 30 तैना तैस पुड़ थुकते ते सोटी सेइं तैसेरे दोगगे पुड़ बाते थिये। 31 ज़ैखन तैनेई तैसेरो मज़ाक बनाव, त तैसेरो चोगो खोल्लो, ते फिरी तैस तैसेरां लिगडां लुवां ते तैट्टां चले, ताके तैस करूसे पुड़ चाढ़न।

([मत्ती 15:21-32](#); [मत्ती 23:26-43](#); [मत्ती 19:17-27](#))

32 ज़ैखन तैना तैट्टां चलोरे थिये, त तैन शमौन कुरेनी नंवेरो अक मैन्हु मैल्लो, तैन लोकेई तै टलातो ताके यीशुएरू करूस छुइतां चलाए। 33 ते यीशु गुलगुता नंवेरी ठैरी पुजे, जेसेरो मतलबे खोपडारी ठार। 34 तैड़ी तैनेई यीशु दाछारो रस ते टलिठो रस मिलेइतां पीने जेई दित्तो, पन तैनी पीनी न चाव। 35 ज़ैखन तैनेई यीशु करूसे पुड़ चाढ़ो त शर्त रेखतां चिट्ठी छेइतां तैसेरां लिगडां भी एप्पू मांमेइं बंटा। 36 ते तैड़ी बिशतां तैसेरो पैरहो केरने लगगे। 37 ते तैनेई तैसेरो जुर्म एक्की पेखडी पुड़ लिखतां तैसेरे दोगगे करां बा लाई ज़ैस पुड़ एन लिखोरू थियूं, “ई यहूदी केरो राजो यीशु आए” 38 तैखन तैस सेइं साथी दूई डैकू भी करूसे पुड़ चाढ़े, अक यीशुएरे देइने पास, ते होरो बांए पास। 39 तैट्टां गानेबाले सारे लोक दोग हिलेइतां गाते थिये ते तैसेरी तुहीन केरते थिये। 40 ते ज़ोते थी इस मन्दरे डोलने बाला ते टलेइ दिहइन मां बनाने बाला, अपनो आप त बच्चा, “अगर तू परमेशेरू मट्टू आस त एस करूसे पुड़रां उन्ढो ओस।” 41 एन्चरे प्रधान याजक ते शास्त्री ते बुजुर्ग भी तैसेरी हासी बनाते थिये, ते ज़ोते थिये। 42 “एनी होरे बच्चाए पन अपनो आप न बच्चेइ बटो, ‘ई त इस्राएलेरो राजो आए।’ अगर हुन्ना भी तू करूसे पुड़रां उन्ढो ओस्स, त अस तीं पुड़ विश्वास केरतम। 43 एसेरो भरोसो परमेशेर पुड़े, अगर तै एस चाते त एस बच्चाए, किजोकि एनी ज़ोरू थियूं, ‘अवं परमेशेरू मट्टू आई।’” 44 ते दूई डैकू भी ज़ैना तैस सेइं साथी करूसे पुड़ चाढ़ोरे थिये, तैना भी तैसेरी तुहीन केरते थिये।

([मत्ती 15:33-41](#); [मत्ती 23:44-49](#); [मत्ती 19:28-30](#))

45 दीसेरे 12 बजेई सारे मुल्ले मां आंधरू भोवं ते टलेइ बज्जन तगर रावं। 46 ते टलेइ बाज्जां केरे लगभग यीशुए बड़े ज़ोरे सेइं ज़ोवं, “एली, एली लमा शबक्तनी?” जेसेरो मतलबे, “हे मेरे परमेशेर, हे मेरे परमेशेर, तीं अवं किजो शारो?” 47 ज़ैना लोक तैड़ी खडखडे थिये, तैन मरां किछ शुन्तां एन ज़ोने लगगे, कि ए त एलिय्याह फुकारने लोरोए। 48 तैखन अक मैन्हु देवइतां जेव, ते अक गलास पैनी मां डोबतां ते निरैठरे सोटी पुड़ टकेइतां पीनेरे लेइ तैसेरे ऐशी सेइं हुरावं। 49 किछ ज़ोने लगगे, “बलगा हुनी हेरतम, कि एलिय्याह एस बच्चाने एइते कि नई।” 50 ते यीशुए फिरी ज़ोरे सेइं चिन्ड मारी ते प्राण दित्ते। 51 तैखन मन्देरो पड़दो बां देंता बुन तगर फेटतां दूई टुकड़े भोइ जे, ते पहाडां ते सारी ज़मीन हीलने लगगी। 52 कबरां खुल्ली जेई, ते बड़े पवित्तर लोक ज़ैना मौतरी निडला मां झुलोरे थिये, जीते भोइ जे। 53 ते कब्रन मरां निस्तां जीते भोनेरां पत्ती पवित्तर नगर मां दाखल भोए, ते तैड़ी बड़े होरि लोकेई भी लाए। 54 तैखन तैनी सूबेदारे ते तैसेरे सैथेई ज़ैन यीशुएरी निगरानी केरने लोरे थिये, भुंजल गांता होरो, त तैना डेरि जे, ते ज़ोने लगगे, “सच्चे एन परमेशेरू मट्टू थियूं!” 55 तैड़ी बेड़ि कुआन्शां ज़ैना गलील इलाके मरां यीशु सेइं साथी तैसेरी सेवा केरती तैस पत्ती ओरी थी, ते दूरेरां तकने लोरी थी। 56 तैन मां मरियम मगदलीनी ते याकूब त योसेसेरी अम्मा मरियम ते जब्देरे मट्टां केरि अम्मा साथी थी।

([मत्ती 15:42-47](#); [मत्ती 23:50-56](#); [मत्ती 19:38-42](#))

57 ज़ैखन इलोझ भोइ त अरिमतियाहरो अक अमीर यूसुफ नंवेरो मैन्हु ज़ै एप्पू भी यीशुएरो चेलो थियो अव। 58 तैनी पिलातुसे कां गोइतां यीशुएरी लाश मगी, ते पिलातुसे लाश देनेरो हुक्म दित्तो। 59 यूसुफे लाश नेइतां

एक्की रोड़ि जेरि च़ादरी मां पलैटी । 60 ते तै लाश एक्की नर्वीं कबरी मां जै शफ़डी मां घड़ोरी थी रख्खी, ते तैस कबरी आग़रोरां अक बड़ो घोड़ तैस उबरो छड़डो । 61 ते मगदलीन डलव्वेरी मरियम ते होरि मरियम तैड़ी तैस कबरारे सामने बिशोरी थी जैस मां यीशुएरी लाश रखोरि थी ।

॥॥॥॥॥॥ ॥॥॥॥॥ ॥॥॥॥ ॥॥॥॥॥

62 हारसां तियैरारे दिहाड़े बाद यहूदी केरे आरामेरे दिहाड़े प्रधान याजक ते फरीसी लोक मिलतां पिलातुसे कां पुज्जे । 63 ते ज़ोने लग्गे महाराज असन यादे कि तैनी धोखे बाज्जे अपने ज़ीते सांसेइं ज़ोरू थियूं, “अवं मरनेरे ट्लेइ दिहाड़ां बाद फिरि ज़ीतो भोनोई । 64 एल्हेरेलेइ हुक्म दे ताके टलाई दिहाड़न तगर कबरी पुड़ पेरहो दित्तो गाए, कि एरू न भोए कि तैसेरे चले एइतां तैसेरी लाश च़ोरन, ते लोकन सेइं ज़ोन कि तै मुड़दन मरां ज़ीतो भोरोए, ए धोखो पेइले धोखे करां भी जादे बुरो भोलो ।” 65 पिलातुसे जुवाब दित्तो, “तुसन कां पेरहो देनेबाले आन, गाथ ज़ेतूरू भोइसखे पेरहो देथ ।” 66 तैखन तैनेईं गेइतां घोड़े पुड़ मोहर लाई, ते कबरारे पेरहे लेइ पेरहेदार रख्खे ।

28

॥॥॥॥॥॥ ॥॥॥॥॥ ॥॥॥॥ ॥॥॥॥॥ ॥॥॥॥

(॥॥॥॥॥ 16:1-10; ॥॥॥॥ 24:1-12; ॥॥॥॥॥॥ 20:1-10)

1 आरामेरे दिहाड़े बाद हफतेरे पेइले दिहाड़े टलेकड़ोते-टलेकड़ोते मगदलीन डलव्वेरी मरियम ते होरि मरियम ज़ैडी यीशुएरी लाश कबरी मां रखोरी थी, हेरने एई । 2 ते हेरा अक बड़ो भुंजल अव, किजोकि परमेशेरो अक स्वर्गदूत स्वर्गोरां ओरो थियो, ते तैस कबरी अगरां घोड़ उन्ढो बिछोड़तां तैस पुड़ बिशुशी जेव । 3 तैसेरी शकल सूरत दिहाड़ेरी जेरि रोड़ी थी, ते तैसेरां लिगड़ां हींवेरां ज़ेरां छित्तां सुफैद थियां । 4 पेरहेदार डेरतां थर-थर कम्बने लग्गे ते ज़ेरे मुड़दे भोए । 5 स्वर्गदूते कुआन्शन सेइं ज़ोवं, “डरा नन्ना, अवं ज़ानताई कि तुस यीशुए तोपने लोरिथ, जै कूरुसे पुड़ च़ादरोए । 6 तै इड़ी नईं बल्के ज़ेन्चरे तैनी ज़ोरू थियूं, तै ज़ीतो भोरोए, एज्जा तै ठार हेरा, ज़ैडी प्रभु थियो । 7 ते जल्दी गेइतां तैसेरे चलन पतो देथ, कि तै मुड़दन मरां ज़ीतो भोरोए, ते तुसन करां पेइलो गलीले मां गाते, ते तुसेईं तै लहनोए हेरा मीं तुसन एन ज़ोरूए ।”

8 तैखन तैना कुआन्शां डेरतां भी ते खुशी सेइं भी कबरी मरां बेइर एई, ते दौवइती-दौवइती जेई ताके चलन पतो देन । 9 तैखन यीशु तैन मैल्लो, ते तैनी ज़ोवं तुसन शान्ति मैल्ले, ते तैनेईं तैसेरे पाव बंते, ते तैस कां मथ्यो टेको । 10 तैखन यीशुए तैन ज़ोवं, डरा न ते गाथ ते मेरे चलन सेइं ज़ोथ कि गलीले मांजो गान, तैना मीं तैड़ी लाएले ।

॥॥॥॥॥॥॥॥ ॥॥॥॥ ॥॥॥॥॥॥॥

11 हेजू तैना कुआन्शां बत्तां थी कि ज़ैना चलन खबर देने च़लोरी थी, त पेरहेदारन मरां किछ नगर मां जे ते प्रधान याजकन सेइं सारो बिस्तार शुनाव । 12 ज़ैखन महायाजकेईं बुजुर्गन सेइं मिलतां मुशोरो कियो, ते तैनेईं ई फैसलो कियो कि सिपेहिन बड़े पेइंसे देन, कि तैना ई गल केन्ची सेइं न ज़ोन, कि कबर केन्चरे खाली भोइ । 13 तैनेईं पेहेरेदारन एन ज़ोवं, कि तुस एन ज़ोइयथ, कि ज़ैखन अस राती झुल्लोरे थिये त तैसेरे चले आए ते तैनेईं तैसेरी लाश नी । 14 अगर ए गल गुवनरि तगर पुज्जेली त अस तैस एप्पू समझामेले त तुसन कोई परेशानी न भोली । 15 ते सिपैहेईं पेइंसे नीए ते ज़ेन्चरे तैनेईं ज़ोरू थियूं तेन्चरे कमाव, ते अज तगर ए गल यहूदन मां मुशूरे ।

॥॥॥॥॥॥॥ ॥॥॥॥॥॥॥ ॥॥ ॥॥॥॥ ॥॥॥॥॥

(॥॥॥॥॥ 16:14-18; ॥॥॥॥ 24:36-49; ॥॥॥॥॥॥ 20:19-23; ॥॥॥॥॥॥ 1:6-8)

16 11 चले गलीले मां जे, ते तैस पहाड़े पुड़ अकोट्टे भोए ज़ैडी गानेरे बारे मां यीशुए तैन ज़ोवरू थियूं । 17 ज़ैखन तैनेईं यीशु लाव त तैस कां मथ्यो टेको, ते किछन हेजू भी शक थी, कि तै ज़ीतो वापस ओरोए । 18 तैखन यीशु तैन केरे नेड़े एइतां ज़ोवं, “धेरतरो ते स्वर्गोरो सारो अधिकार मीं दित्तोरोए । 19 एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्तर आत्मारें नव्वे सेइं बपतिस्मो देथ । 20 ते तैन तैना सब हुक्म मन्ने शिखाला ज़ैना मीं तुसन दित्तोरेन, ते हेरा, अवं दुनियारे आखरी तगर हमेशा तुसन सेइं साथी आई ।”

मरकुस

[३:१-१२](#); [३:१-१८](#); [१:१९-२८](#)

- १ ई यीशु मसीहेरे बारे मां खुशखेबारी शुरुआत आए, जैन परमेशेरू मट्टू आए।
 २ (बड़े पेइले) यशायाह नेवे अपनि किताबी मां लिखोरू थियू कि, (परमेशेरे अपने मट्टे सेइं ज़ोवं,) “शुन, अवं अपने बिस्तार देनेबालो तीं केरां पेइले भेजेलो।”
 “तै तीं केरां पेइलो गेइतां तेरे लेइ बत तियार केरेलो। (यानी, लोकां केरे दिल परमेशेरे लेइ तियार केरेलो)”
 ३ “तै बिस्तार देनेबालो सुनसान ठैरी मां लोकन, जैना तैस कां गाले, तैन हक देइतां ज़ोलो कि ‘तुसन कां प्रभु एजनेबालो आए, एल्हेरेलेइ तुस तैसेरेलेइ बत तियार केरा त कने तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ केरा)”
 ४ जेन्नरां लिखोरू थियू, अक बिस्तार देनेबालो अव। तैस मैनेरू नवं यूहन्ना थियू। लोक तैस जो बपतिस्मो* देनेबालो भी ज़ोते थिये। तै यहूदिया इलाकेरे सुनसान ठैरी मां अव। तैड़ी तै लोकन परमेशेरेरी गल्लां शुनातो थियो कि, “तुस अपने पापन करां मनफिराथ, त कने बपतिस्मो नेथ, ताके परमेशर तुशे पाप माफ़ केरे।” ५ यहूदिया इलाकेरे बड़े लोक त यरूशलेम नगरेरे रानेबालन मरां बड़े लोक यूहन्नारी गल्लां शुन्नेरे लेइ सुनसान ठैरी मां तैस कां आए। तैन लोकेई अपने पाप मेन्तां यूहन्ना करां यरदन दरियाए मां बपतिस्मो नीयो।
 ६ यूहन्ना आम लिगड़ां लातो थियो जैना लिगड़ां ऊंटेरे बालन सेइं बनोरां थियां। तै अपनि कमरी पुड़ चमडेरू मज़ बंधतो थियो। ते तै टिट्टां त कने जंगलेरू माछी खातो थियो। ७ तै लोकन शुनातो थियो कि, “कोई अक, जै मीं केरां भी महान आए, मेरे बाद एजनेबालोए। अवं त तैसेरो गुलाम भोनेरे काबल भी नई कि लिकतां तैसेरे बूटेरे तसमे खोल्ली। ८ अवं त तुसन पैनी सेइं बपतिस्मो देताई, पन तै तुसन पवित्र आत्मा सेइं बपतिस्मो देलो।”

[३:१३](#); [४:११](#); [३:२१-२२](#); [४:१-१३](#)

- ९ तैल्ला पत्ती, तैन दिहाइन मां एरू भोवं कि यीशु गलील इलाकेरे नासरत नगरेरां यूहन्ना कां अव। तैनी यूहन्ना करां यरदन दरियाए मां बपतिस्मो नीयो। १० जैखन यीशु बपतिस्मो नेइतां पैनी मरां बेइर अव, त तैनी अम्बर खुलतू त पवित्र आत्मा कबूतरेरी शकली मां तैस पुड़ एत्तो लाव। ११ तैखन परमेशेरे स्वर्गेरां यीशु सेइं ज़ोवं, “तू मेरू ट्लारू मट्टू आस, अवं तीं पुड़ बड़ो खुश आई।”

[४:१२-१७](#); [४:१४-१५](#)

- १२ तैल्ला पत्ती, अकदम पवित्र आत्मा यीशु सुनसान ठैरी जो भेजो। १३ सुनसान ठैरी मां ४० दिहाइन तगर शैताने यीशु अज़माव। त तैड़ी यीशु जंगली जानवरन साथी थियो। तैखन परमेशेरेरे स्वर्गदूत यीशु कां एइतां तैसेरी सेवा करने लगगे।

[४:१२-१७](#); [४:१४-१५](#)

- १४ किछ वक्तेरां बाद, यूहन्ना नबी कैद कियो जेव। तैल्ला बाद, यीशु गलील इलाके मां जेव। तैड़ी तै लोकन परमेशेरेरे राज़ेरे बारे मां खुशखेबारी शुनाने लगगे। १५ तैनी ज़ोवं कि, “ठीक वक्त ओरोए त कने परमेशेरेरू राज़ नेइ ओरूए! एल्हेरेलेइ, तुस अपने पापन करां मनफिराथ ते इस खुशखेबारी पुड़ विश्वास केरा।”

[४:१८-२२](#); [५:१-११](#)

* 1:4 1:4 बपतिस्मो: मतलब कि, मैन्हु पापेरी ज़िन्दगी छेड़तां परमेशेरेरी बत्ती पुड़ ज़लनेरे लेइ तियार भोते। एल्हेरेलेइ एस रसमी करतन। एसमां कुन भोते कि मैन्हु पैनी मां डुबेइतां बेइर कदतन। † 1:8 1:8 पवित्र आत्मा सेइं बपतिस्मो: ए अक मुहावरो आए। एसेरो मतलब, जैना लोक पापन करां मनफिरातन, तैनन् परमेशर एन आशिर्वाद देते। तैन मां बसनेरे लेइ परमेशर तैन कां अपनि पवित्र आत्मा भेजेलो। पवित्र आत्मा तैनन् शुद्ध केरेलो, त कने परमेशेरेरी मर्ज़ी पुड़ ज़लनेरे लेइ मदत केरेलो त समझ देलो, त कने होरि बड़ी गल्लन मां भी तैन केरि मदत केरेलो।

16 एक्सां, जैखन यीशु गलील नव्वेरे समुन्दरेरे बन्ने चलोरो थियो, तैखन तैनी दूई मैन्हु शमौन त तैसेरो दूला अन्दरयास लाए, जैना मेछली टलानेबाले थिये। तैना मेछली टलानेरे लेइ समुन्दरे मां जाल छेइडी राओरे थिये। 17 यीशुए तैन सेइं ज़ोवं, “एज्जा मेरे चले बना। अवं तुसन शिखालेलो कि केन्चरां होरे मैन्हु मेरे चले बनानेन।” 18 अकदम तैना अपना जालां छेइतां यीशु पत्ती चले जे।

19 जैखन तैना थोडे जेरे अगगर जे, त यीशुए याकूब त कने तैसेरो दूला यूहन्ना लाए। तैना दुइये जेबेरां मट्टां थियां। तैना किशती मां जालां ठीक केरने लगगोरे थिए। 20 अकदम यीशुए तैना अपने चले बनानेरे लेइ कुजाए। तैना दुइये, अपने बाजी जब्दी किशती मां मज़दूरन सेइं साथी छेइतां, यीशु सेइं साथी चले जे।

[\[2222 22222 2222222 222222222 2222222 2222 2222\]](#)
([\[2222 4:31-37\]](#))

21 तैल्ला पत्ती, यीशु त तैसेरे चले तैट्टां कफरनहूम नगरे मां जे। आरामेरे दिहाडे, अकदम यीशु तैन केरे प्रार्थना घरे मां जेव। तैड़ी तै परमेशेरी गल्लां तैन लोकन शुनाने लगो। 22 तैना यीशुएरी शिक्षा शुन्तां हैरान भोए, किजोकि तैनी शास्त्री लोकां केरि जेरि शिक्षा न दित्ती, पन तै अधिकारे सेइं शिक्षा देइ राओरो थियो।

23 जैखन यीशु तैड़ी थियो, त तैन केरे प्रार्थना घरे मां अक मैन्हु थियो, जैस पुड़ भूतेरो सायो थियो। 24 अचानक तैनी मैने चिन्डां मेरतां ज़ोवं, “हे नासरत नगरेरो यीशु! तीं सेइं असन कुन कम? कुन तू असन नाश केरनेरे लेइ ओरोस? अवं जानताई कि तू कौन आस, तू परमेशेरू पवित्र मट्टू आस!” 25 पन यीशुए तैस भूते झिड़कतां ज़ोवं, “चुप रा, एस मैन्हु मरां निस्सी गा!” 26 तैखन भूते तै मैन्हु इलेडेइतां त ज़ोरे सेइं चिन्डां मेरतां तैस मैन्हु मरां निस्सी जेव। 27 एन हेरतां सारे लोक बडे हैरान भोए। तैना एप्पू मांमेइं गलबात केरतां एक्की होरि पुछ्छने लगगे कि, “ए कुन गल आए! ए त अक नव्वी शिक्षा आए जैस मां अधिकार आए! तै त भूतन भी अधिकारे सेइं हुक्म देते ते तैना भी तैसेरो हुक्म मन्तन।” 28 अकदम यीशुएरे बारे मां ए गल गलील इलाकेरे आसेपासेरे सेब्भी टैरन मां फैली जेई।

[\[2222 2222 22222 22222 222222222\]](#)
([\[22222 8:14-17; 22222 4:38-41\]](#))

29 तैना अकदम प्रार्थना घरे मरां निस्तां, याकूब त कने यूहन्ना सेइं साथी शमौन त अन्दरयासेरे घरे जे। 30 शमौनेरी शिखी भुखारे थियो ते तै लेटोरी थी। अकदम तैनेई तैसारे बारे मां यीशु सेइं ज़ोवं कि ऊ बिमार आए। 31 यीशुए तैस कां गेइतां तैसारो हथ टलेइतां खड़ी की। अकदम तैसारो भुखार ठीक भोव। ते तै तैन केरि सेवा केरने लगगी।

32 इलोझी जैखन दिहाड़ो डुब्बो, त लोक सारे बिमार मैन्हु त कने जैन मैनन् पुड़ भूतेरो सायो थियो तैना यीशु कां आन्ने लगगे, ताके तै तैनन् बज्झाए। 33 तैस नगरेरे बडे लोक तैस घरेरे दारे पुड़ अकोट्टे भोए। 34 यीशुए बडे मैन्हु बज्झाए, जैना बडे किसमां केरि बिमैरन सेइं दुखी थिये। त तैनी बडे मैनन् मरां भूतां केरो सायो कड्डो। पन यीशुए भूतन किछ ज़ोने न दित्तू, किजोकि तैना यीशु पिशानतां थियां (कि एन परमेशेरू मट्टू आए)।

[\[2222 2222 222222222 222222 2222222\]](#)
([\[2222 4:42-44\]](#))

35 एग्री दिहाड़ी, झेज्झां-झेज्झां दिहाड़ो निस्ने केरां बडे पेइले, यीशु उठतां बेइर एक्की सुनसान ठैरी मां जेव। तैड़ी तै प्रार्थना केरने लगो। 36 पन थोडे चिरेरां बाद, शमौन त तैसेरे साथी, यीशु तोपने जे। 37 जैखन तैनन् तै मैल्लो, त तैनेई यीशुए सेइं ज़ोवं, “(वापस इलाव्वे मां एई,) सारे लोक तीं तोप्पी राओरेन!” 38 पन यीशुए तैन सेइं ज़ोवं, “एज्जा, अस होरि केन्वी आसेपासेरे इलोव्वन मां गाम, ताके अवं तैन लोकन भी परमेशेरी गल्लां शुनेई। किजोकि अवं एस्से कम्मेरे लेइ दुनियाई मां ओरोई।” 39 तैल्हेरेलेइ यीशु गलील इलाकेरे सारे इलोव्वन मां गेइतां, तैन केरे प्रार्थना घरन मां लोकन परमेशेरी गल्लां शुनातो राव ते बडे लोकन मरां भूतां केरो सायो कढतो राव।

[\[2222 22222 22222 222222 222222222\]](#)
([\[22222 8:1-4; 22222 5:12-16\]](#))

40 तैल्ला पत्ती, एक्सां अक कोढी मैन्हु यीशु कां अव। तैनी मैने यीशुएरे सामने जैन्धु केरे भारे बिशतां तैस कां मिन्नत केरतां तैस सेइं ज़ोवं, “अगर तू चास, त मीं बज्झेई सकतस। (महरबानी केरतां मीं बज्झा।)” 41 यीशुए तैस

मैन्हु पुड़ तरस खाव । यीशुए अपनो हथ अग्रोवं कियो त तैस कोढ़ी मैन्हु सेइ हथ लेइतां‡ ज़ोवं, “अवं चाताई, तू बज्झोस ।” 42 अकदम तै कोढ़ी बज्झोई जेव । 43 तैखन यीशुए तै मैन्हु समझेइतां लूशी भेजो । 44 त तैनी तैस सेइ ज़ोवं, “हेर, एस गल्लरे बारे मां केन्वी सेइ किछ न ज़ोइयां । (तू यरूशलेम नगरेरे मन्दरे मां गा), त कने अपने आपे याजके हिरा । तैल्ला पत्ती, तू अपने बेज्झोनेरे वजाई सेइ चढ़तल चाढ़, जेसेरे बारे मां मूसा नेबे कानूने मां हुक्म दिचोरोए, ताके लोकन पतो चले कि तू बेज्झोरोस ।” 45 पन तै मैन्हु बेइर गेइतां एस गल्लारे बारे मां लोकन बड़ु शुनाने लगो ते इड़ी तगर फैलाने लगो कि यीशु फिरी बांदे नगरे मां न गेइ सको, पन बेइर सुनसान ठैरन मां राव ते च़ेवरे पासां केरे लोक तैस कां एइते राए ।

2

२२२२ २२२२२२ २२२२२२ २२२२२२
(२२२२२ 9:1-8; २२२२ 5:17-26)

1 किछ दिहाइना बाद, यीशु फिरी कफरनहूम नगरे मां जेव । तैट्टेरे मैनेई शुनू कि तै तैड़ी एक्की घरे मां आए । 2 अकदम बड़े मैन्हु तैस घरे मां अकोट्टे भोए । तैड़ी ठार न राई, इड़ी तगर कि दारे केरां बेइर भी ठार न थी । यीशु तैन लोकन परमेशेरी गल्लां शुनाने लगो । 3 तैखन किछ मैन्हु एक्की अधरंगी मैन्हु छुइतां यीशु कां आए । च़ेवरे मैनेई तै अधरंगी मैन्हु खट्टी पुड़ छुइतां आनोरो थियो । 4 मैन्हु केरि भीड़रे वजाई सेइ, तैना यीशुएरे नेड़े न पुज्जी सके । एल्हेरेलेइ तैनेई तैस घरेरी छत ज़ैस मां यीशु थियो पुट्टी छुइडी । तैल्ला बाद, तैनेई तै खट ओसाली ज़ैस पुड़ अधरंगी मैन्हु थियो । 5 यीशुए तैन केरो विश्वास हेरतां अधरंगी मैन्हु सेइ ज़ोवं, “हे मट्टा, तेरे पाप माफ़ भोए ।” 6 तैखन शास्त्री लोकन मरां किछ मैन्हु ज़ैना तैड़ी थिये, अपने-अपने मने मां सोचने लगगे कि, 7 “ए मैन्हु एन्चरां किजो ज़ोते? ए त परमेशेरी तुहीन केरते । परमेशेरे अलावा कौन पाप माफ़ केरि सकेते?” 8 अकदम यीशुए ज़ैनी छुइइ कि तैना अपने-अपने मने मां कुन सोचने लगगोरेन । एल्हेरेलेइ तैनी तैन सेइ ज़ोवं, “तुस अपने-अपने मने मां एन्चरां किजो सोचने लगगोरेथ? 9 एस अधरंगी मैन्हु सेइ कुन ज़ोनू सुख्वा आए? एन ज़ोनू कि ‘तेरे पाप माफ़ भोए,’ या एन ज़ोनू कि ‘उठ, अपनि खट छुइतां चल फिर?’ 10 अवं किछ केरनेबालोई, ज़ैस सेइ तुसेई बुज्झनूए कि मैनेरे मट्टे (यानी मीं) धेरती पुड़ लोकां केरे पाप माफ़ केरनेरो अधिकार आए!” फिरी तैनी तैस अधरंगी मैनेरे पासे मुइतां तैस सेइ ज़ोवं, 11 “अवं तीं सेइ ज़ोतई, उठ, अपनि खट छुइतां अपने घरजो गा!” 12 अकदम तै खड़ो उठो ते अपनि खट छुइतां सारे मैन्हु केरे सामने निस्तां चलो जेव । एस वजाई सेइ सारे मैन्हु हैरान भोए, त परमेशेरी बड़याई केरतां ज़ोने लगगे, “असेई एरू ज़ेरू कधी नई लावरू!”

२२२२ २२२२ २२२२२२२२ २२२२२२ २२२२ २२२२ २२२२२२२ २२२ २२२२२२२
(२२२२२ 9:9-13; २२२२ 5:27-32)

13 तैल्ला पत्ती, यीशु तैट्टां निस्तां फिरी गलील समुन्दरेरे बन्ने जेव । तैखन मैन्हु केरि सारी भीड़ तैस कां आई । तै तैन लोकन परमेशेरी गल्लां केरि शिक्षा देने लगो ।

14 समुन्दरेरे बन्ने गाते-गाते, यीशुए लेवी नंवेरे मैन्हु लाव, ज़ैन हलफईसेरू मट्टू थियूं । तै मैन्हु चुंगी नेनेरे दफ़तेरे मां कम केरतो थियो । तैखन यीशुए तैस सेइ ज़ोवं, “मीं पत्ती एई, ते मेरो चेलो बन ।” अकदम लेवी उठो त यीशु पत्ती चलो । 15 बादे मां, यीशु त तैसेरे चले लेवेरे घरे मां रोट्टी खाने बिशशे । तैखन बड़े चुंगी नेनेबाले त होरे पापी मैन्हु (लोक तैन केरे बारे मां सोचते थिये कि एना पापिन ।) भी यीशु त तैसेरे चलन सेइ साथी रोट्टी खाने बिशशे, किजोकि एन केरे ज़ेरे बड़े लोक यीशु पत्ती चलते थिये । 16 ज़ैखन किछ शास्त्री लोकेई त कने फरीसी लोकेई हेरू कि यीशु पापी मैनन् त चुंगी नेनेबालन सेइ साथी रोट्टी खाने लगगोरोए, तैखन तैनेई यीशुएरे चलन सेइ ज़ोवं, “तै चुंगी नेनेबालन त पैपन सेइ साथी किजो खाते पीते?” 17 यीशुए तैन केरि गल शुन्तां तैन मिसाल देइतां जुवाब दिचो, “सझर लोकन डाक्टेरेरी ज़रूरत न पे, पन बिमार मैनन् ज़रूरत पेचे । तेन्चरां, अवं तैन मैन्हु केरे लेइ नई ओरोई ज़ैना अपने आपे धर्मी समझतन, पन पापी मैनन् कुजाने ओरोई, ताके तैना अपने पापन केरां मन फिरान ।”

‡ 1:41 1:41 हथ लेइतां: पन सारे लोक समझते थिये कि कोढ़ी मैन्हु सेइ हथ लानो ज़ुठो (गंदो) आए ।

१२२२२२ २२२२२२२ २२२२ २२२२२२२ २२२२२२ २२२२२२ २ २२२२ (२२२ २२२२२२ २२२२ २२२ २२२२)

(२२२२२२ 9:14-17; २२२२ 5:33-39)

18 यूहन्नारे चले त कने फरीसी लोक बरत रखते थिये, पन यीशुएरे चले बरत न थिये रखते। किछ लोकेई यीशु कां एइतां तैस पुच्छू, “यूहन्नारे चले ते फरीसी लोकां केरे चले बरत रखतन, पन तेरे चले बरत की न रखन?”

19 यीशुए तैनन् जुवाब दित्तो, “इलाएरे दिहाड़े, जैखन लाडो जैनी सेइं साथी राते, कुन तैना बरत रेखवी सकतन? (बिलकुल नईं) तैल्हेरेलेइ, जांतगर लाडो तैन सेइं साथी राते, तांतगर तैना बरत न रेखवी सकन। (किजोकि तैना खुशी आन।) 20 मेरे चले भी तैन केरे जेरे आन, किजोकि अवं तैन सेइं साथी आईं। पन तैना दिहाड़े एज्जले, जैखन लाडो तैन केरां अलग कियो गालो (यानी मारो गालो), तैस मौके तैना (अपने दुखेरे वजाई सेइं) बरत रेखेले।”

21 “अवं तुसन अक होरि मिसाल देताई, नंवे लिगड़ेरी टलोई पुराने लिगड़े कोई न लाए। अगर कोई एन्चरां केरे, त धोनेरे पत्ती नंवे लिगड़ेरी टलोई पुराने लिगड़े अपने पासे खिच्ची छड्डेली। त तैन पेइले केरां भी जादे छिन्दोलू। 22 तेन्चरे कोई भी पुरैनी मसकन मां नंवे दाछारो रस न रखे, किजोकि दाछारो रस अम्लो भोइतां फुलते बार मसकन छिन्दी छड्डेलो। दाछारे रस त कने मसकां, एना दुइये बरबाद भोइ गाले। एल्हेरेलेइ नंवे दाछारे रस हमेशा नंवे मसकन मां रखेरो लोडे, ताके मसकन न छिन्दे।”

२२२२ २२२२२२२ २२२२२२२२ २२२२२ २२

(२२२२२ 12:1-8; २२२२ 6:1-5)

23 एक्की आरामेरे दिहाड़े, यीशु त कने तैसेरे चले बत्ती मामेइं चलने लगगोरे थिये, जै गेंवां केरे ऊडारन मामेइं थी। चलते-चलते तैसेरे चले गेंवां केरे किछ शिल्लां टलोइतां खाने लगगे। 24 पन किछ फरीसी लोकेई तैन हेरतां यीशु सेइं ज़ोवं, “तक! एना आरामेरे दिहाड़े तैन कम किजो केरतन, जैन मूसेरे कानूनेरे मुताबिक जेइज नईं?”

25 यीशुए तैन सेइं ज़ोवं, “कुन तुसेईं परमेशेरी किताबी मां एन कधी नईं पढोरूए कि (बड़े पेइले) दाऊद राजे कुन कियुं, जैखन तैस त तैसेरे सैथन ढलुख लगगी त तैनन् रोट्टरी ज़रूरत थी? 26 तुसन पतोए कि दाऊद राजे परमेशेरे घरे मां गोइतां, अबियातार नंवेरे महायाजक केरां खाने जो रोट्टी मग्गी। दाऊदे तै रोट्टी खाइ, जै परमेशेरे जो चढोरी थी। कानूनेरे मुताबिक याजक केरे अलावा होरि केन्ची तैना रोट्टी खानेरी अज़ाजत नईं थी। पन दाऊदे अपने सैथन भी रोट्टी दित्ती त तैनेईं भी तैना रोट्टी खेइ? (पन फिरी भी परमेशेरे दाऊदे पुइ दोष न लाव।)” 27 तैखन यीशुए तैन फरीसी लोकन सेइं ज़ोवं, “परमेशेरे आरामेरी दिहाड़ी लोकन मद्दत केरनेरे लेइ बनोरीए, न कि आरामेरे दिहाड़ेरे कानून मन्नेरे लेइ तैनी लोक रचे। 28 एल्हेरेलेइ, मैनेरू मट्टू यानी अवं आरामेरे दिहाड़ेरो भी प्रभु आईं।”

3

२२२२ २२२२२२२ २२२२२२२ २२२२२ २२२२२२ २२ २२२ २२२२२, २२२२२२२२२२ २२२२२ २२२ २२२२ २२२२२२२ २२२२२२ २२२२२२

(२२२२२ 12:9-14; २२२२ 6:6-11)

1 तैल्ला पत्ती, यीशु एक्की प्रार्थना घरे मां जेव। तैड़ी अक मैन्हु थियो, जेसेरो हथ शुक्कोरे थियो। 2 तैड़ी किछ फरीसी लोक भी थिये, जैना यीशु पुइ इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगगोरे थिये कि आरामेरे दिहाड़े तै तैस मैन्हु बज्जाते की नईं। 3 तैखन यीशुए शुक्कोरे हथेबाले मैन्हु सेइं ज़ोवं, “मज़ाटे खड़े भो।” (ते तै मैन्हु खड़ो भोव।) 4 त यीशुए तैन लोकन पुच्छू, “आरामेरे दिहाड़े कुन केरनू जेइजे, मैनेरू भलू केरनू या बुरू केरनू, मैनेरी जान बचानी या मारनी?” पन तैना चुप राए। 5 त तैनी सरकी सेइं तैन केरे च़ेवरे पासन तकू, पन तैन केरे सखत दिलेरी वजाई सेइं उदास भोव। तैखन तैनी तैस मैन्हु सेइं ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो। त अकदम तैसेरो हथ बेज्जोव। 6 तैखन फरीसी लोक प्रार्थना घरे मरां बेइर जे। अकदम तैना हेरोदेस राजेरे लोकन सेइं साथी यीशुएरे खलाफ साज़िश केरने लगगे कि यीशुएरो कोस तरीके सेइं कल्ल केरम।

२२२२ २२२२२ २२२२२२ २२२२ २२२२ २२२२२

7 तैल्ला पत्ती, यीशु अपने चलन सेइं साथी गलील समुन्दरेरे पासे जेव। मैन्हु केरि बड़ी भीड़ तैस पत्ती चली। गलील त यहूदिया इलाकां केरे लोक तैस कां आए। 8 यरूशलेम नगरेरे लोक, इदूमिया इलाकेरे लोक ते यरदन

दरियारे पारेरे लोक त कने सूर त सैदारे आसेपासेरे लोक भी तैस कां ओरे थिये । तैना सब यीशु कां आए, किजोकि तैनेई यीशुएरे सारे चमत्कारेरे कम्मां केरे बारे मां शुनोरू थियूं, जैना तै केरतो थियो । 9-10 यीशुए बड़े लोक हथ लेइतां बज्झावरे थिये, एल्हेरेलेइ हारे बड़े लोक जैना बड़े बिमार थिये, तैना तैस सेइं हथ लानेरे लेइ तैस पुड़ बिच्छड़ी गाते थिये, ताके तैना भी बेज्झोन । मैन्हु केरि भीड़ बड़ी जादे थी । एल्हेरेलेइ यीशुए अपने चलन सेइं ज़ोवं, “मेरे लेइ अक किशती तियार केरा, ताके एना लोक मीं ढलेन्त्री न सकन ।” 11 त ज़ैन लोकन पुड़ भूतां केरो सायो थियो, तैना भी यीशु लेइतां तैसेरे पावन पुड़ बिच्छड़ी गाते थिए । तैना भी ज़ोरे-ज़ोरे सेइं ज़ोते थिए कि, “तू परमेशेरू मट्टू आस ।” 12 यीशुए तैन भूतन सखत हुक्म दित्तो कि, “मेरे बारे मां लोकन न ज़ोथ कि अवं कौन आई ।”

[\[2:1-11\]](#) 12 [\[2:1-11\]](#) [\[2:1-11\]](#), [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#)
([\[2:1-11\]](#) 10:1-4; [\[2:1-11\]](#) 6:12-16)

13 तैल्ला पत्ती, यीशु एक्की पहाड़े पुड़ चढ़ो । जैना मैनन् तै अपने चले बनानो चातो थियो, तैना एप्पू कां कुजाए । तैना तैस कां आए । 14 यीशुए तैन मरां 12 मड़द चुने, ते तैन प्रेरित नवं दित्तू कि तैना तैस सेइं साथी-साथी रान, ताके तै तैन लोकन खुशखबरी शुनाने भेजे । 15 यीशुए तैनन्, लोकां केरि बिमैरी बज्झाने त कने मैनन् मरां भूतां केरो सायो कढनेरो अधिकार दित्तो । 16 तैना 12 मैन्हु केरां नंवां इना थियां: शमौन जेसेरू नवं यीशुए पतरसरखू, 17 याकूब त तैसेरो ढला यूहन्ना, एना दुइये जेबेरां मट्टां थियां, त यीशुए एन दुइयां केरू नवं बुअनरगिसरखू, मतलब कि, गुड़नेरां मट्टां । 18 त अन्दिरयास, फिलिप्पुस, बरतुल्मै, मत्ती, थोमा, याकूब ज़ैन हलफईसेरू मट्टू थियूं, त तद्दे, शमौन जै पेइले रोमी सरकारारे खलाफ यहूदी लोकां केरि आजैदेरे लेइ लड़नेबालो थियो । 19 त कने यहूदा इस्करियोती ज़ैनी बादे मां यीशु धोखे सेइं टलुवाव ।

[\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#)
([\[2:1-11\]](#) 12:22-32; [\[2:1-11\]](#) 11:14-23; 12:10)

20 तैल्ला पत्ती यीशु कफरनहूम नगरेरे एक्की घरे मां जेव । फिरी मैन्हु केरि भीड़ तैस घरे मां अकोट्टी भोइ, कि यीशु त तैसेरे चलन रोट्टी खानेरे लेइ भी मौको न मैल्लो । 21 ज़ैखन यीशुएरे रिशतेदारेई एन शुनू, त तैना तैस टलेइतां अपने घरे वापस आन्नेरे लेइ जे, किजोकि तैना ज़ोने लगगोरे थिये कि तैसेरो दिमाग ठीकाने नई । 22 किछ् शास्त्री लोक, जैना यरूशलेम नगरेरां ओरे थिये, तैना लोकन सेइं ज़ोई राओरे थिये कि, “यीशु मां शैतान आए ।” त एन भी ज़ोई राओरे थिये कि, “ते भूतां केरे प्रधानेरी शेक्ति सेइं लोकन मरां भूतां केरो सायो कढते ।” 23 एल्हेरेलेइ यीशुए तैना नेडे कुजाए ते तैन मिसाल देइतां ज़ोने लगो, “शैतान केन्चरां अपने भूतन लोकन मरां केडडी सकते? 24 अगर एक्की राज्जरे लोक अपने राज्जरे खलाफ लड़ाई केरन, त तैन राज्ज बनोरू न रेइ सके । 25 अगर केन्ची टब्बरेरे लोक अपने टब्बरेरे खलाफ लड़ाई केरन, त तैन टब्बर भी बनोरू न रेइ सके । 26 तेन्चरे, शैतान भी अगर एप्पू अपने भूतां केरे खलाफ लड़ाई केरे, त तै केन्चरां बनोरो रेइ सकते? तैसेरो त बिलकुल खातमां भोइ गालो । 27 अवं होरि मिसाल देताई, कोई मैन्हु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, जांतगर कि तै पेइले तैस ज़ोरेबाले मैन्हु बेंधी न छड़डे । तैखन तै तैस ज़ोरेबाले मैनेरो माल लुट्टी सकते । अवं भी शैतानेरे भूतां केरो सायो लोकन मरां केडडी सकतां । (शैतान तैस ज़ोरेबाले मैनेरो ज़ेरोए) 28 अवं तुसन सेइं सन्न ज़ोतई कि मैन्हु केरे सारे किसमां केरे पाप त कने परमेशेरी तुहीन, ज़ै तैना केरतन, अगर तैना मन फिरान त परमेशर तैन माफ़ केरेलो । 29 पन ज़ै कोई पवित्तर आत्मारी तुहीन केरे, त तैस कधी भी परमेशर माफ़ न केरेलो । पन तै मैन्हु हमेशारे पापेरो दोषी बेनि गालो ।” 30 यीशुए एन्चरां ज़ोवं किजोकि तैना यीशुएरे बारे मां एन ज़ोते थिये कि तैस पुड़ भूतेरो सायो आए ।

[\[2:1-11\]](#) [\[2:1-11\]](#) [\[2:1-11\]](#) [\[2:1-11\]](#)
([\[2:1-11\]](#) 12:46-50; [\[2:1-11\]](#) 8:19-21)

31 तैखन यीशुएरी अम्मा त कने तैसेरे ढला तैड़ी आए । तैना घरेरे बेइर खड़े भोइतां तैस जो बिस्तार भेजो । 32 तैना घरेरे अन्तर न गेइ सके किजोकि मैन्हु केरि भीड़ यीशुएरे च़ेवरे पासन बिशशोरी थी । एल्हेरेलेइ तैन लोकेई यीशु सेइं ज़ोवं, “तक, तेरी अम्मा त तेरे ढला बेइर खड़े आन । तैना तीं सेइं मिलनू चातन ।” 33 पन यीशुए तैनन् जुवाव दित्तो, “अवं तुसन ज़ोताई मेरी अम्मा त कने मेरे ढला कौन आन !” 34 तैखन यीशुए तैन लोकां केरे पासे

तेकतां ज़ोवं, ज़ैना तैसेरे च़ेवरे पासन बिशशोरे थिये, “तक्का, मेरी अम्मा त कने मेरे द्ला इना आन। ³⁵ किजोकि ज़ै कोई परमेशेरी मेर्जी पुड़ च़लते, तैए मेरो द्ला, मेरी बेइन ते मेरी अम्मा आए।”

4

[\[2222 2222 2222222222 2222 222 222222 22222\]](#)
([\[22222 13:1-9; 2222 8:4-8\]](#))

¹ तैल्ला पत्ती, यीशु फिरी गलील समुन्दरेरे बन्ने लोकन शिक्षा देने लगे। मैन्हु केरि एतरी भीड़ तैस कां अकोट्टी भोइ। यीशु समुन्दरे मां एक्की किशती मां च़दो ते बिशशी जेव, ताके तै सेब्भी लोकन परमेशेरी गल्लां केरि शिक्षा देइ सके। मैन्हु केरि सारी भीड़ तैसेरी गल्लां शुन्तां समुन्दरेरे बन्ने पुड़ खड़ी राई। ² यीशुए तैनन् बेड़ि गल्लां मिसालन मां ज़ोई। तैनी शिक्षा देइतां तैन लोकन सेइं ज़ोवं, ³ “ई कहानी शुना! एक्सां अक बीज बेनेबालो बीज बेने जो जेव। ⁴ बीज बेते बार किछ बीज बत्तरे इलेखी बिछड़ू त चुड़ोल्लेई एइतां तैन बीज चुनू। ⁵ किछ बीज घोड़नबाली ज़मीनी पुड़ बिछड़ू, ज़ेड़ी तैस डुग्घी मिक्ती न मेलनेरे वजाई सेइं तैन लूशी उग्गू त बूटो लगे। ⁶ पन ज़ैखन दिहाड़ो निस्सो, त तै निकड़ो बूटो फुक्कोई जेव। ते ज़ील न छड़डनेरे वजाई सेइं शुक्की जेव। ⁷ होरू किछ बीज कंटां केरे झैल्लन मां बिछड़ू। ज़ैखन तैड़ी बूटो लगे, त कंटां केरे झैल्लेई बेड़ोइतां तै बूटो दबेइ छड़डो, त तैनी बुटे फल न दित्तो। ⁸ पन किछ बीज रोड़ी ज़मीनी पुड़ बिछड़ू, त तैन उग्गू त बेडोवं त फलदार भोवं। तैन मरां केन्ची बीजे टलही गुणा फल दित्तो, त केन्ची बीजे शठ गुणा, त केन्चे शौव गुणा।” ⁹ ए मिसाल शुनानेरे बाद, यीशुए लोकन सेइं ज़ोवं, “ज़ै कोई समझनू चाते, तै ध्याने सेइं शुने त समझे।”

[\[2222 22222222 22 2222 22 2222222 2222 2222222 222222\]](#)
([\[22222 13:10-17; 2222 8:9-10\]](#))

¹⁰ तैल्ला पत्ती, ज़ैखन यीशु मैन्हु केरि भीड़ी करां अलग थियो, त तैखन तैसेरे सैथेई त कने तैसेरे 12 चलेई यीशु तैस मिसालेरे बारे मां पुच़्छू। ¹¹ यीशुए तैन सेइं ज़ोवं, “अवं तुसन परमेशेरे राज़ेरो भेद समझेईलो। पन होरि लोकां केरे लेइ मिसालन मां ज़ोवं गाते। ¹² ताके ज़ेन्च़रां परमेशेरी किताबी मां लिखोरूए तेन्च़रां भोए कि, ‘ज़ैन अवं केरतई, तैन तैना बार-बार हेरेले, पन तैना तैसेरो मतलब न बुज्जेले। ज़ैन अवं ज़ोतई, तैन तैना बार-बार शुनेले, पन मेरी गल न समझेले। एरू न भोए कि तैना अपने पापन करां मन फिरान त तैन केरे पाप माफ़ किये गान।’”

[\[2222 2222 22222222222 222222222 2222 222222222\]](#)
([\[22222 13:18-23; 2222 8:11-15\]](#))

¹³ तैल्ला पत्ती, यीशुए तैन सेइं ज़ोवं, “कुन तुसेई तै मिसाल न समझी? अगर तुस तैस मिसाली न समझथ, त फिरी होरि सब मिसालां केन्च़रां समझेले? ¹⁴ अवं तुसन तै मिसाल समझताई। बीज बेनेबालो तै आए, ज़ै परमेशेरी गल्लां लोकन शुनाते। ¹⁵ ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तरे ज़ेरे आन, ज़ेड़ी बीज बिछड़ते। तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केइडी छड़ते। ¹⁶ किछ होरे लोक, ज़ैना परमेशेरी गल्लां शुन्तन, तैना तैस घोड़नबाली ज़मीनेरे ज़ेरे आन। तैना परमेशेरी गल्लां शुन्तन त खुशी सेइं तैन कबूल भी केरतन। ¹⁷ पन ज़ेन्च़रां निकड़ो बूटो घोड़नबाली ज़मीनी मां मिक्ती घट भोनेरे वजाई सेइं लूशी लगते, तेन्च़रां एना मैन्हु भी भोतन। तैना मज़बूत विश्वास न रखन। एल्हेरेलेइ तैना थोड़े दिहाड़न तगर विश्वास रखतन। पन ज़ैखन परमेशेरी गल्लां केरे मुताबिक च़लनेरे वजाई सेइं तैन पुड़ मुसीबतां एच़चन त कने ज़ैखन लोकन केरां सताए गातन, त तैखन तैना अकदम अपने विश्वास छेड़तां ठोकर खातन। ¹⁸ होरे किछ लोक, ज़ैना परमेशेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। तैना परमेशेरी गल्लां त शुन्तन, ¹⁹ पन तैना इस दुनियारी फिकर केरतन, त कने दौलतरे वजाई सेइं धोखो खातन, त तैना बड़े चीज़ां केरू लालच़ केरतन। एसेरे वजाई सेइं तैना परमेशेरी गल्लां बिसरी छड़तन त तैन गल्लन पुड़ न च़लन। ²⁰ पन किछ लोक, ज़ैना परमेशेरी गल्लां शुन्तन त कने तैन पुड़ च़लतन, तैना तैस रोड़ी ज़मीनेरे ज़ेरे आन। तैना परमेशेरी गल्लां शुन्तन त कबूल भी केरतन त फल देतन, मतलब की तैना परमेशेरी गल्लां केरे मुताबिक ज़िन्दगी जीतन। कोई टलही गुणा, कोई शठ गुणा त कोई शौव गुणा फल देतन।”

२२२२२२ २२२२ २२२ २२२२२२/
(२२२२ 8:16-18)

21 तैल्ला पत्ती, यीशुए मैन्हु केरि भीड़ी सेइं ज़ोवं, “कोई बलतो दीयो एन्तां हेटी मां या खट्टी हठ न रखवे। पन केन्ची उच्ची टैरी पुड़ रखवो गाते। (ताके सारे घरे लौ भोए।) 22 कोई गल छप्पोरी न राली, पन सैरी गल्लां बेंदी भोली, ते न कोई भेद छप्पोरो रालो, पन सारो भेद बांदो भोलो। 23 जै कोई समझनू चाते, तै ध्याने सेइं शुने त समझे!”

24 तैल्ला पत्ती, यीशुए मैन्हु केरि भीड़ी सेइं ज़ोवं, “होशियार राथ कि अवं तुसन कुन शिक्षा देइ राओरोई। मेरी शिक्षाई शुन्तां, ज़ेत्ती तुस मेरी गल मन्नेले तेत्ती परमेशर तुसन समझ देलो। हाँ, परमेशर तुशशी समझ होरि भी बधालो।* 25 किजोकि ज़ैस कां परमेशेरी मर्जी समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्जी समझनेरी इच्छा नई, तैस केरां, थोड़ी ज़ेरि समझ, जै तैस कां आए, तै भी नी गाली।”

२२२२ २२२२२२ २२२२ २२२ २२२२२२

26 तैल्ला पत्ती, यीशुए मैन्हु केरि भीड़ी सेइं ज़ोवं, “परमेशेरू राज एरू ज़ेरू आए, कि अक मैन्हु ज़मीनी पुड़ बीज बेते। 27 तै मैन्हु हर राती झुलते त दीसां बींझते। तैन बीज उगने लग्गोरूए त बडोने लग्गोरूए, पन तैस पतो न चले कि तैन केन्चरां भोते। 28 केन्चेरी मद्दतरे बगैर ज़मीन एप्पू फल आन्चे। पेइले मुन्केरे निस्तन, बादे मां शिल्लां निस्तन, तैल्ला पत्ती शिल्लन ग्लेव लगतन। 29 आखरी मां, ज़ैखन ग्लेव पेक्की गातन, तैखन अकदम तै मैन्हु कटाई केरनेरे लेइ मैन्हु भेजते, किजोकि कटाईरो वक्त ओरो भोते।”

२२२२२२२२ २२२२२२२२ २२२२ २२२ २२२२२२/
(२२२२२ 13:31-32,34; २२२२ 13:18-19)

30 तैल्ला पत्ती, यीशुए मैन्हु केरि भीड़ी सेइं ज़ोवं, “अस परमेशेरू राज़ेरी मसाल कोस चीज़ी सेइं देइ सकतम? कोस मिसाली सेइं अस तैस समझेइ सकतम? 31 परमेशेरू राज़ शेरीएरे बीजेरू ज़ेरू आए (जै शेरीयो इस्राएले मां भोते)। ज़ैखन तैन बीज ज़मीनी मां बेव गाते, तैन सारे बीजिन केरां निकडू भोते। 32 पन ज़ैखन तैन बीज बेव गाते, तै उगतां सारे निकके-निकके बुट्टन केरां बडो भोते। तैसेरी एत्ती बेड्डी डेलडी निस्चन, कि अम्बरेरां चुड़ोल्ली तैसेरी छावी मां अपने आले बनेइ सकतन।”

33 एन्चरां बेड़ि मिसालां ज़ोइतां, यीशु तैन लोकन परमेशेरी गल्लां शुनातो थियो, ज़ेत्तूरू तैना शुनी सकते थिये। 34 तै हमेशा मिसाल देइतां परमेशेरे राज़ेरे बारे मां तैन सेइं ज़ोतो थियो। पन ज़ैखन मैन्हु केरि भीड़ी मरां यीशु त तैसेरे चले अलग बिशते थिये, तैखन यीशु अपने चलन सेइं सैरी मिसालां केरो मतलब समझोतो थियो।

२२२२ २२२२२२ २२२२२२/
(२२२२२ 8:23-27; २२२२ 8:22-25)

35 तैस दिहाड़ेरे बादे मां, ज़ैखन ड्लोझ भोइ, यीशुए अपने चलन सेइं ज़ोवं, “एज्जा, अस गलील समुन्दरेरे पार चलम।” 36 तैल्लेरेलेइ मैन्हु केरि भीड़ छेडतां तैना तैस किशती मां चढ़े ज़ैस मां यीशु पेइलो थियो, त तैना तैट्टां चले जे। होरि किछ किशती मां भी लोक तैन सेइं साथी जे। 37 ज़ैखन तैना समुन्दर पार केरने लग्गोरे थिये, तैखन अक बडो तूफान चलो, त छेल्ली एडी तगर पुज्जी कि किशती पैनी सेइं भेरोई जेई। 38 पन यीशु किशतेरी पेट्टी पासे, शेराहने पुड़ क़ोड़ी रेखतां झुल्लोरो थियो। तैखन तैसेरे चलेई तै बींझेइतां तैस सेइं ज़ोवं, “हे गुरू, कुन तीं फिक्र नई, अस त मरने बालेम!” 39 तैखन यीशुए उठतां तूफान डांटो, त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव। 40 तैखन यीशुए अपने चलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?” 41 पन तैना बड़े डेरि जे त एप्पू मामेइं ज़ोने लग्गे, “ए मैन्हु कौन आए कि तूफान त समुन्दर भी एसेरो हुक्म मन्तन!”

5

२२२२ २२२२२२ २२२२२२ २२२२ २२२२ २२२२२२ २२२२ २२२२ २२२२२२/
(२२२२२ 8:28-34; २२२२ 8:26-39)

* 4:24 4:24 मूल भाषाई मां: ज़ैस नापी सेइं तुस नापतथ तैस्से नापी सेइं परमेशर तुसन भी नापेलो, त तुसन परमेशर होरू भी जादे देलो।

1 यीशु त तैसेरे चले गलील समुन्दरेरे पार, गिरासेनी इलाके मां पुज्जे । 2 जैखन यीशु किशती पुडेरां ओस्सो, त तैखन अक मैन्हु, जैस पुड भूतां केरो सायो थियो, कब्रन मामेइं यीशु कां मिलने अव । 3 तै मैन्हु कब्रस्ताने मां रातो थियो । (तै मैन्हु बडो खतरनाक थियो ।) कोई तैस शंगली सेइं भी न बेंधी सकतो थियो । 4 किजोकि (पेइले बडे बार) लोकेईं तैसेरे हथ पाव शंगलन सेइं बंधोरे थिये । पन हर बार तै हथ्यां केरि शंगलां टलोइतो थियो त पव्वां केरि शंगलां केरे टुकडे-टुकडे केरतो थियो । कोई तैस कैबू न केरि सकतो थियो । 5 तै हमेशा रात-दिहाडी कब्रस्ताने मां त कने पहैइन पुडमेइं हन्ठतो थियो त चिन्डां मारतो थियो, त अपने आपे घोइन सेइं ज़ख्मी केरतो थियो ।

6 जैखन तैनी मैने यीशु दूरेरां लाव, त तै दौइतां यीशु कां अव ते तैस कां मथ्यो टेको । 7-8 यीशुए भूते सेइं ज़ोवं, “हे भूता, एस मैन्हु मरां निस्सी गा!” तैनी भूते ज़ोरे सेइं चिन्डां मेरतां ज़ोवं, “हे यीशु, परमप्रधान परमेशेरा मट्टा, मीं तीं सेइं कुन कम? अव तीं परमेशेरी कसम देताईं, मीं दुख न दे ।” 9 एल्हेरेलेइ यीशुए तैस पुच्छू, “तेरू कुन नवं आए?” तैनी यीशु सेइं ज़ोवं, “मेरू नवं फौज आए, किजोकि अस बडे आम ।” 10 तैखन तैनी यीशु कां बडी मिन्नत की, “इस इलाके मरां असन बेइर न भेज ।” 11 तैडी पहैडी पुड सूरं केरो अक बडो घान च़ेरी राहोरो थियो । 12 तैल्हेरेलेइ तैन भूतेईं यीशु कां मिन्नत की, “महरबानी केरतां असन उन सूरन मां भेजी दे ताके अस उन मां गाम!” 13 तैखन यीशुए तैनन्, सूरन मां गानेरी अज़ाज़त दिती, त तैना भूतां तैस मैन्हु मरां निस्तां सूरन मां जेआं । तैखन सूरं केरो घान, जैस मां लगभग दूई हजार सूर थिये, टिब्बे पुडेरां बिछ्छुइतां अकदम समुन्दरे मां डुबतां मेरि जे । 14 जैखन सूरं केरे च़ारनेबालेईं एन हेरू, त तैना डेरि जे । तैनेईं तैट्टां नेशतां नगरी मां त कने आसेपासेरे ड्लोव्वन मां ए खबर शुनाई । तैल्हेरेलेइ लोक एप्पू हेरनेरे लेइ तैडी आए । 15 जैखन नगरेरे लोक यीशु कां पुज्जे, त तैस मैन्हु, जैस मां पेइले भूतां केरि फौजेरो सायो थियो, हुनी लिगडां लगगोरे त कने होशी मां लेइतां डेरि जे । 16 जैनेईं तैना गल्लां पेइले लेवरी थी, तैनेईं तैस मैनेरे बारे मां जैस पुड भूतेरो सायो थियो त कने तैन सूरं केरे बारे मां पूरो हाल लोकन शुनाव । 17 तैना यीशु कां मिन्नत केरतां ज़ोने लगगे कि, “इश्शे इलाके मरां च़ेलि गा!”

18 जैखन यीशु वापस गानेरे लेइ किशती मां च़ढने लगो, त तैनी मैने जैस मां पेइले भूतां केरो सायो थियो, यीशु कां मिन्नत की कि, “मीं एप्पू सेइं साथी च़लने दे ।” 19 पन यीशुए तै एप्पू सेइं साथी च़लने न दितो । पन तैनी तैस सेइं ज़ोवं, “अपने घरे जो गा त कने अपने लोकन सेइं ज़ो, कि प्रभु परमेशेरी तीं पुड दया केरतां तेरे लेइ केतरू बड्डू कम कियोरूए ।” 20 एल्हेरेलेइ तै मैन्हु गेइतां दिकापुलिस इलाके मां लोकन शुनाने लगो कि यीशुए मेरे लेइ केतरू बड्डू कम कियोरूए । सारे लोक ए गल शुन्तां हैरान भोइ जे ।

११११ ११११ ११११११११ १११११११ ११११११ १११ १११११११ ११११११ १ १११ ११११११ ११११११
११११११११ १११११११११११

(११११११ 9:18-26; १११११ 8:40-56)

21 तैल्ला पत्ती, यीशु फिरी किशती मां गलील समुन्दरेरे इस पासे वापस अव, त मैन्हु केरि बडी भीड तैस कां अकोट्टी भोइ । यीशु समुन्दरेरे बन्ने पुड थियो । 22 तैखन याईर नव्वेरो मैन्हु तैडी अव, जै यहूदी लोकां केरे प्रार्थना घरेरे प्रधान्न मरां अक थियो । जैखन तैनी यीशु लाव, त तैसेरे पावन पेव । 23 तैनी एन ज़ोइतां यीशुए सेइं बडी मिन्नत की, “मेरी निकडी कुई मरनेबाली आए । तू मीं सेइं साथी एइतां तैस पुड अपनो हथ रख, ताके तै बेज्जोए ते ज़ींती राए ।” 24 एल्हेरेलेइ यीशु तैस सेइं साथी तैसेरे घरे जेव ।

मैन्हु केरि अक बडी भीड यीशु पत्ती च़ली, इडी तगर कि लोक यीशु पुड बिछ्छुइते थिये । 25 तैस भीडी मां अक कुआन्श भी थी, जैस 12 सालां केरि खून च़लनेरी बिमारी थी । 26 तैसां बडे बेइदन केरां बडो दुख झल्लो । बिमारी ठीक भोनेरे लेइ तैसां अपने सब पेंडसे खेच़ीं दिते, पन तैस कोई फैइदो न भोव । पन तै होरि भी जादे बिमार भोइ जेई । 27-28 तै यीशुएरे बारे मां शुन्तां अपने दिले मां ज़ोती थी, “अगर अवं सिर्फ तैसेरे लिगडे सेइं हथ लाएली, त अवं बेज्जोईं गाली ।” एल्हेरेलेइ तै मैन्हु केरि भीडी मां यीशुएरे पत्रेवरां आई ते तैसेरे लिगडे सेइं हथ लाव । 29 जैखन तैसां यीशुएरे लिगडे सेइं हथ लाव, त अकदम तैसेरो खून च़लनेरी बिमारी बेज्जोईं । तैसां अपनि जानी मां बुज्जू कि अवं तैस बिमारी केरां बेज्जोरी आई । 30 यीशुए अकदम बुज्जू कि मीं मरां शक्ति निस्सोरीए । एल्हेरेलेइ तैनी मैन्हु केरि भीडी मां च़ेवरे पासन मुइतां लोकन पुच्छू, “मेरे लिगडे सेइं केनि हथ लाव?” 31 तैसेरे च़ेलेईं तैस सेइं ज़ोवं, “तू हेरतस कि मैन्हु केरि भीड तीं पुड बिछ्छुइने लगगोरी, फिर भी तू किजो पुच्छुतस कि ‘केनि मीं सेइं हथ लाव?’” 32 पन यीशु तैस हेरनेरे लेइ, जैनी एरू कियोरू थियूं, च़ेवरे पासन तकने लगो । 33 तैखन तै कुआन्श डरती

ते थर्कती थी, किजोकि तै ज्ञानती थी कि तेसां मूसेरो कानून ट्लोडरोए। तै अगगर आई ते यीशुएरे पावन पुड बिछडतां, तैस सेइं सैरी गल्लां सन्न-सन्न जोने लगगी। 34 पन यीशुए तैस सेइं ज़ोवं, “हे कुईए, तेरे विश्वासे, ज़ै तीं मीं पुड रख्वोरो, तैनी तू बज्झाई। खुशी सेइं घरजो गा, ते हुनी तू एस बिमारी केरां बेची जेई।”

35 ज़ताली यीशु ई गल मसां ज़ोई राओरो थियो, तैखन प्रार्थना घरेरे लीडरेरे घरेरां किछ्छ मैनेई एइतां तैस सेइं ज़ोवं, “तेरी कुई मेरि जोरीए, हुनी गुरू किजो तकलीफ देतस?” 36 पन यीशुए तैन केरि गल न शुन्तां प्रार्थना घरेरे लीडरे सेइं ज़ोवं, “न डर। सिर्फ मीं पुड विश्वास रख।” 37 यीशु ते याईर चलने लगगे, पन यीशुए पतरस, याकूब ते तैसेरो द्ला यूहन्नारे अलावा, होरो कोई एप्पू सेइं साथी एजने न दित्तो। 38 प्रार्थना घरेरे लीडरेरे घरे मां पुज्तां यीशुए हल्लो मन्नोरो लाव ते कने लोक बडे लेरां देते त शोग केरते लाए। 39 तैखन यीशुए घरे मां गेइतां तैन सेइं ज़ोवं, “तुस किजो रोलो मन्नातथ त लेरां देतथ? कुई मरीं नई, पन झुल्लोरीए।” 40 ज़ैखन तैन लोकेई एन शुनू, त तैना तैसेरो मजाक बनाने लगगे, किजोकि तैना ज्ञानते थिये कि कुई मेरि जोरीए। तैखन यीशुए सारे मैन्हु तैट्टां केढतां, सिर्फ कुईअरे हाज-बव त कने अपने टलाई चलन सेइं साथी कमरेरे अन्तर जेव, ज़ेडी कुई पेवरी थी। 41 तैखन यीशुए कुईएरो हथ टलेइतां तैस सेइं अपनि भाषाई मां ज़ोवं, “तलीता कूमी!” ज़ेसेरो मतलब कि, “हे निकडी कुईए, अवं तीं सेइं ज़ोतई, खडी उठ!” 42 अकदम कुई उठतां चलने फिरने लगगी, किजोकि तै कुई 12 सालां केरि थी। एन हेरतां तैना बडे हैरान भोए। 43 पन यीशुए तैन हुक्म देइतां ज़ोवं कि, “ए गल केन्ची सेइं न ज़ोइयथ। एस कुईए किछ्छ खाने जो देख।”

6

[\[22222 222222 222 2222 2222 22222222 2 2222\]](#)
([\[22222 13:53-58; 2222 4:16-30\]](#))

1 तैल्ला पत्ती, यीशु तैट्टां निस्तां अपने नगर नासरते जो जेव। तैसेरे चले तैस सेइं साथी चले। 2 आरामेरे दिहाडे, यीशु तैन केरे प्रार्थना घरे मां गेइतां तैन लोकन परमेशेरी गल्लां केरि शिक्षा देने लगगे। तैसेरी शिक्षा शुन्तां बडे लोक हैरान भोए ते एक्की होरि पुछ्छने लगगे, “एनी मैने एना गल्लां कोट्टां शिख्वी? एस एतूरी अक्ल कोट्टां आई? एस एतूरे चमत्कार केरनेरी शक्ति कोट्टां मैल्ली! 3 ए त टलखान आए, जैन मरियमारू मट्टू आए। ए त याकूब, योसेस, यहूदा, ते शमौनेरो द्ला आए! एसेरी बेइनां भी इश्शे इडी रेइचन!” एल्हेरेलेइ तैनेई यीशुएरो इन्कार कियो। 4 तैखन यीशुए तैन लोकन अक कहावत ज़ोई, “नबी बेइरींए लोकन मां इज्जतदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेबालन मां बेइज्जत भोलो।” 5 तैन लोकेई यीशु पुड विश्वास न केरनेरे वजाई सेइं, तैनी तैस नगरी मां सिर्फ थोडे ज़ेरे बिमार मैनन् पुड हथ रेखतां तैना बज्झाए, तैन केरे अलावा होरो कोई चमत्कार न केरि सको। 6 यीशु नासरत नगरेरे लोकां केरो अविश्वास हेरतां हैरान भोव। तैल्ला पत्ती, तै अपने चलन सेइं साथी च़ेवरे पासन केरे इलोव्वन मां परमेशेरी गल्लां केरि शिक्षा देतो राव।

[\[2222222222 222222 2222 2222222222 222 2222 2222 2222 2222222\]](#)
([\[222222 10:5-15; 22222 9:1-6\]](#))

7 तैल्ला पत्ती, यीशुए अपने 12 चले एप्पू कां कुजेइतां, तैन दूई-दूई केरतां भेज्जने लगगे। भेज्जने केरां पेइले, तैनी अपने चलन, लोकन मरां भूतां केरो सायो कढनेरो अधिकार दित्तो। 8 ते तैनी तैन हुक्म दित्तो, “बत्तां चलते-चलते सोटेरे अलावा होरू किछ्छ न नेइयथ। न रोट्टी न झोलो त कने बेटवे मां पेंइसे भी न नेइयथ। 9 पन बूट लेइयथ, पन दूई-दूई कुरते न लेइयथ। 10 ज़ैखन तुस केन्ची इलोव्वे मां गाथ, अगर कोई अपने घरे बिश्नेरेलेइ तुसन कुजाए, त तैस्से घरे मां बिश्शथ, ज़ांतगर तैस इलोव्वेरां न निस्सथ। 11 अगर केन्ची इलोव्वेरे लोक तुसन कबूल न केरन त कने तुश्शी गल्लां न शुनन्, त तैट्टां चलते-चलते तुस अपने पावां केरि धूड झेडी छेइडथ* ताके तैन केरे खलाफ गवाही भोए। (अवं तुसन सेइं सन्न ज़ोतई कि परमेशेरे आदालतरे दिहाडे बुरे लोकन सज़ा देलो, ज़ैना सदोम त कने अमोरा नगरन मां रहते थिये। पन ज़ैना लोक तुश्शी गल्लां न शुनेले, तैस नगरेरे लोकन परमेशर बडी जादे सज़ा देलो)” 12 यीशुएरो हुक्म शुन्नेरे बाद, तैनेई तैट्टां निस्तां बडे नगरन मां गेइतां लोकन परमेशेरी गल्लां

* 6:11 6:11 पावां केरि धूड झाड़ा: एरू केरतां, यीशुएरे चले लोकन इतला देतन कि परमेशेरी गल्लां न शुन्नेरे वजाई सेइं तैनन् सज़ा मैलेली।

शुनेई कि, “तुस अपने पापन करां मनफिराथ ।”¹³ ते तैनेई बड़े लोकन मरां भूतां केरो सायो भी कड्डो, त कने बड़े बिमार मैनन् पुड़ तेल लेइतां बज्झाए ।

ॐॐॐॐॐॐ ॐॐॐॐॐॐॐ ॐॐॐॐॐॐॐॐ ॐॐॐॐॐॐॐ ॐॐॐॐॐॐ ॐॐॐॐॐॐ
(ॐॐॐॐॐ 14:1-12; ॐॐॐॐ 9:7-9)

¹⁴ हेरोदेस राजे भी यीशुएरे बारे मां शुनू, किजोकि यीशुएरू नंव मुशूर भोरू थियूं । तैनी यीशुएरे बारे मां ज़ोवं कि, “शायद, यूहन्ना, ज़ै बपतिस्मो देनेबालो थियो, मुडदन मरां जीतो भोरोए । एल्हेरेलेइ, तै एना चमत्कार केरि सकते ।”¹⁵ होरेई मैनेई यीशुएरे बारे मां ज़ोवं कि, “शायद, तै मैन्हु एलिय्याह नबी आए!” पन किछ होरेई मैनेई ज़ोवं कि, “तै त पराने ज़मानेरे परमेशेरी गल्लां ज़ोनेबालां केरो ज़ेरो अक नबी आए!”¹⁶ पन हेरोदेस राजे लोकां केरि गल्लां शुन्तां ज़ोवं कि, “तै मैन्हु त यूहन्ना आए, ज़ेसेरी क्रोडी मीं कट्टेव्री थी । तै मुडदन मरां जीतो भोरो आए!”¹⁷ हेरोदेस राजे एन्चरां सोचू, किजोकि थोड़े दिहाइना पेइले, तैनी एप्पू अपने सिपाही भेजतां यूहन्ना कैद केरतां छुड्डोरो थियो । तैनी अपने दूला फिलिप्पुसेरी लाडी हेरोदियासेरी वजाई सेइं एन्चरां कियोरू थियूं, ज़ैस सेइं तैनी इला बनोरो थियो ।¹⁸ एल्हेरेलेइ, यूहन्ना हेरोदेस राजे सेइं बार-बार ज़ोतो थियो कि, “तीं अपने दूलाएरी लाडी सेइं इला बनानो जेइज नई ।”¹⁹ तैल्हेरेलेइ हेरोदियास रानी यूहन्ना सेइं दुश्मनी रखती थी ते तैस कल्ल केरनो चाती थी । पन तै तेन्चरां न केरि सकती थी,²⁰ किजोकि हेरोदेस राजे पतो थियो कि यूहन्ना अक धर्मी ते पवित्तर मैन्हु थियो । तैल्हेरेलेइ, हेरोदेस राजे तैसेरी बड़ी इज्जत केरतो थियो त कैदखाने मां हेरोदियास रैनी केरां बचेइतां रखतो थियो । त तै यूहन्नारी गल्लां शुन्तां बड़ो डरतो थियो, पन तैसेरी गल्लां खुशी सेइं शुन्तो भी थियो ।

²¹ आखकार यूहन्ना मारनेरो ठीक मौको मैल्लो । हेरोदेस राजे अपने ज़रमेरी दिहाड़ी मां अक धाम रखी । तैस धामी मां तैनी अपने बड़े खास अफसरन, त कने फौजी अफसरन, त कने गलील इलाकेरे बड्डे-बड्डे मैन्हु कुजाए ।²² तैखन हेरोदियास रैनेरी कुई तैस कमरे मां आई, जेड़ी तैना बिशोरे थिये । त तैसां तैड़ी नेचतां हेरोदेस राजे त कने तैसेरे मेहमान खुश किये । तैखन राजे कुईए सेइं ज़ोवं, “ज़ैन तू चास मीं केरां मग, अवं तीं देलो ।”²³ त राजे तैस कुईए सेइं कसम भी खाइ कि, “ज़ैन किछ तू मीं केरां मग्गेली, अवं तीं देलो, इडी तगर कि अवं अपनू अधू राज भी देलो ।”²⁴ तैल्हेरेलेइ तैस कुइयां बेइर गेइतां, अपनि अम्मा पुच्छू, “अवं हेरोदेस राजे केरां कुन मेग्गी?” तैखन तैसेरी अम्मा ज़ोवं, “यूहन्ना बपतिस्मो देनेबालेरी क्रोडी मग ।”²⁵ अकदम तै कुई अन्तर राजे कां आई त तैस कां मिन्नत की, “अवं चाताई कि, तू यूहन्ना बपतिस्मो देनेबालेरी क्रोडी केटतां एक्की थाले मां हुन्ना आन ।”²⁶ तैसेरी गल शुन्तां राजे बड़ो दुखी भोव, पन अपनि कसमेरे वजाई सेइं त कने अपने मेहमानां केरे वजाई सेइं तैने इन्कार केरनो न चाव ।²⁷ तैल्हेरेलेइ, तैनी अकदम एक्की सिपाही हुक्म दित्तो कि, “यूहन्नारी क्रोडी केटतां आन ।”²⁸ सिपाही कैदखाने मां गेइतां यूहन्नारी क्रोडी कट्टाई, त एक्की थाले मां रखतां आनी त कुईए कां दित्ती । त कुइयां गेइतां अपनि अम्मा कां दित्ती ।²⁹ ए गल शुन्तां यूहन्नारे चले तैड़ी आए, त तैसेरी लाश नेइतां कब्री मां देव्वी छुड्डी ।

³⁰ परमेशेरी गल्लां लोकन शुनानेरे पत्ती, यीशुएरे परेरित तैस कां वापस आए, ज़ैना तैनी भेजोरे थिये । ज़ैन किछ तैनेई लोकन सेइं कियोरू ते शिक्षा दित्तोरी थी, तैन सारी गल्लां यीशु सेइं शुनाई ।³¹ बड़े लोक यीशु त कने तैसेरे चलन कां एइते गाते थिये । एस वजाई सेइं, तैनन् रोट्टी खानेरे लेइ भी मौको न थियो मैल्लोरो । तैल्हेरेलेइ यीशुए अपने चलन सेइं ज़ोवं, “मीं सेइं साथी केन्वी अकेन्ती ठैरी एज्जा, त थोड़ो ज़ेरो आराम केरा ।”³² एल्हेरेलेइ तैना किशती मां च़ेइतां, अकेन्ती ठैरी च़ेलि जे ।

ॐॐॐ ॐॐॐॐॐॐ ॐॐॐॐॐ 5000 ॐॐॐॐ ॐॐॐॐॐ ॐॐॐॐॐॐ
(ॐॐॐॐॐ 14:15-21; ॐॐॐॐ 9:11-17; ॐॐॐॐॐॐ 6:1-14)

³³ पन बड़े लोकेई यीशु त तैसेरे चले गाते लेइतां पिशानी छुड्डे कि तैना कोरां च़लोरेन । तैल्हेरेलेइ, सारे नगरेरे मैन्हु पैदल दौइतां तैन केरां पेइले तैड़ी पुज्तां अकोट्टे भोए ।³⁴ ज़ैखन यीशु किशती पुड़ेरां ओस्सो, त तैनी मैन्हु केरि अक बड़ी भीड़ लेइतां तैन पुड़ तरस खाव, किजोकि तैना मैन्हु तैन भैइडां केरे ज़ेरे थिये, ज़ैन केरो कोई पुहाल न भोए† । तैखन यीशु तैन लोकन परमेशेरे राजेरे बारे मां बेइ गल्लां केरि शिक्षा देने लगे ।

† 6:34 6:34 यानी तैनन् परमेशेरी गल्लन पुड़ च़लानेबालो कोई न थियो ।

35 जैखन दिहाडी डुबने लगगोरी थी, त यीशुएरे चलेई तैस कां एइतां ज़ोवं, “ई सुनसान ठार आए, ते चिर भी बडू भोरू आए। 36 एन मैनन् भेज, ताके एना चेवरे पासां केरे बेस्तन त कने इलोव्वन मां गेइतां अपने लेइ खाने जो रोट्टी घिन्न।” 37 पन यीशुए तैनन् जुवाब दित्तो कि, “तुस्से एन खाने जो रोट्टी देथ।” पन तैनेई तैस सेइं ज़ोवं, “कुन अस दूई शौव दिहाडी केरि कमाई सेइं रोट्टी घिन्तां एन मैनन् खुवाम? एन न भोइ सके!” 38 एल्हेरेलेइ, यीशुए तैन सेइं ज़ोवं, “तुसन कां केत्री रोट्टी आन? गेइतां हेरा।” पतो केरनेरे पत्ती, तैनेई यीशु सेइं ज़ोवं कि, “पंच रोट्टी त कने दूई मेछली आन।” 39 तैखन यीशुए अपने चलन हुक्म दित्तो कि, “सारे मैन्हु नीले घासे पुइ विशाला।” 40 एल्हेरेलेइ तैना मैन्हु शौव-शौव त कने पजां-पजां केरि हुन्डी मां बिशशी जे। 41 तैखन यीशुए अपने हथ्ये मां पंच रोट्टी ते दूई मेछली टलेइ, त अम्बरेरे पासे तेकतां शुकर कियूं। तैल्ला पत्ती, यीशु तैना रोट्टी टलोइतां चलन कां देते जेव कि लोकन खाने जो देन। तेन्चरां दूई मेछली भी तैन सारे लोकन बेंटी दिती। 42 ते सारे मैन्हु खेइतां रेज्जी जे। 43 तैल्ला पत्ती, यीशुएरे चलेई बेच्चोरी रोट्टी त कने मेछली केरे टुकड़न सेइं 12 टोकरी भेरि। 44 जैनेई रोट्टी त मेछली खेइ, तैन मां 5000 मडद थिये।

[\[?\]\[?\]\[?\] \[?\]\[?\]\[?\]\[?\]\[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\]\[?\]](#)
[\(\[?\]\[?\]\[?\]\[?\] 14:22-33; \[?\]\[?\]\[?\]\[?\] 6:15-21\)](#)

45 तैल्ला पत्ती, यीशुए अपने चलन हुक्म दित्तो कि, “तुस किशती मां च्चेदतां मीं केरां पेइले समुन्दरेरे उस पार बैतसैदा नगरे जो चली गाथ, ज़ांतगर अवं एन लोकन न भेज्जी।” त तैना तैट्टां जे। 46 लोकन भेजनेरे पत्ती, यीशु तैट्टां निस्तां नेडे एककी पहैडी पुइ प्रार्थना केरनेरे लेइ जेव।

47 जैखन इलोझ भोइ, त तै किशती, जैस मां यीशुएरे चले थिये, समुन्दरेरे मझाटे थी, त यीशु अकैल्लो ज़मीनी पुइ थियो। 48 तैनी हेरू कि तैसेरे चले किशती मां च्चेप्पू देइ-देइ परेशान भोने लगगोरेन, किजोकि एग्रोवरां बडी तेज हवा चलोरी थी।

लगभग झेज्जरे चेवरे बजेई जैखन हेजू आंधरू थियूं, यीशु समुन्दरेरे पैनी पुइ चेलतां अपने चलन कां अव। तै तैन केरां अग्रोवं निस्नू चातो थियो। 49 पन जैखन तैनेई यीशु समुन्दरेरे पैनी पुइ चलतो लाव, त तैनेई सोचो कि तै भूत आए। तैल्हेरेलेइ, तैनेई चिन्डां मैरी, 50 किजोकि तैना सारे तैस हेरतां बडे डेरि ज़ोरे थिये। पन तैनी अकदम तैन सेइं गल्लां की ते ज़ोवं, “हिम्मत रखा! अवं आई। डरा न!” 51 तैखन तै तैन केरि किशती मां च्चेदो, ते तूफान चलनो बन्ध भोइ जेव। तैखन चले बडे हैरान भोए, 52 किजोकि तैनेई न थियूं समझोरू कि यीशु केन्चरां रोट्टी त कने मेछली बधोरी थी, पन तैन केरे मन बेसमझ भोरे थिये।

[\[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\]](#)
[\(\[?\]\[?\]\[?\]\[?\] 14:34-36\)](#)

53 तैल्ला पत्ती, यीशु त तैसेरे चले गलील समुन्दर पार केरतां गन्नेसरत नंव्वेरे जगाई पुइ पुज्जे। तैडी तैनेई किनारे पुइ किशती बंधतां रख्खी। 54 जैखन तैना किशती पुडेरां ओस्से, त तैट्टेरे लोकेई यीशु पिशैनी छुइडो। 55 एल्हेरेलेइ, तैनेई सारे इलाके मां गेइतां लोकन खबर शुनाई कि यीशु ओरोए। जेडी-जेडी लोकेई शुनू कि यीशु ओरोए, तैडी लोकेई बिमार मैन्हु खट्टी पुइ छुइतां यीशु कां आन्ने लगगे, ताके तै तैनन् बज्जाए। 56 जेडी कोन्ची इलोव्वन मां, नगरन या बेस्तन मां यीशु गातो थियो, तैडी लोक बिमार मैनन् बजारन मां यीशु कां एन्तां रखते थिये। तैना यीशु सेइं मिन्त केरते थिये कि, तैन सिर्फ तैसेरे लिगडे सेइं हरने देन। जेत्रे बिमार मैन्हु यीशु सेइं हथ लाते थिये, तैना सारे बेज्जोते थिये।

7

[\[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\] \[?\]\[?\]\[?\]](#)
[\(\[?\]\[?\]\[?\]\[?\] 15:1-9\)](#)

1 एककी दिहाडे किछ फरीसी लोक त कने शास्त्री लोकन मरां किछ लोक, जैना यरूशलेम नगरेरां ओरे थिये यीशुए कां अकोट्टे भोए। 2 ते तैनेई हेरू कि यीशुएरे किछ चले रीति रुवाजरे खलाफ अधोए हथ्यन सेइं रोट्टी खेइ राओरेन। 3 किजोकि फरीसी लोक त कने सारे यहूदी लोक, ज़ांतगर हथ न धोन तांतगर रोट्टी न खाते थिये। अपने बुजुर्गां केरि परमपरा चलानेरे लेइ तैना एन्चरां केरते थिये। 4 जैखन तैना बजारेरां घरे एइते थिये, ज़ांतगर तैना निहान न देन तांतगर रोट्टी न थिये खाते। होरे भी बडे रीति रुवाज थिये, जैना तैन केरे बुजुर्गन केरां ओरे

थिये, जेन्चरां कटोरे, घडे, ट्लामेरां भांडां रुवाजरे मुताबिक धोना। ⁵ एल्हेरेलेइ फरीसी लोकेई त कने शास्त्री लोकेई यीशु पुच्छू, “तेरे चले इशुशे बुजुर्गां केरि परमपरा पुड की न चलन? पन तैना रुवाजरे खलाफ अधोए हथ्यन सेइं रोटी खातन!” ⁶ तैखन यीशुए तैन सेइं ज़ोवं, “बडे पेइले यशायाह नेबे तुशुशे जेरे पाखंडी केरे बारे मां ठीक भविष्यवाणी कियोरीए कि परमेशरे ज़ोवं,

‘एना लोक ऐशी सेइं त मेरी बड़ी तारीफ़ केरतन,
पन एन केरे दिल मीं केरां बडे दूर आन।

⁷ एना बेफाइदी मेरी आराधना (पूजा) केरतन,

किजोकि एना त मैन्हु केरि बनोरी परमपरान, परमेशरेरे हुक्मां केरे जेरे लोकन शिक्षा देतन।”

⁸ तैखन यीशुए तैन सेइं ज़ोवं, “तुस भी तैन लोकां केरे जेरे आथ, जैना परमेशरेरे हुक्मन टेलतां मैन्हु केरि बनोरी परमपरान मन्तन, जेन्चरां घडे त कने कटोरे रुवाजरे मुताबिक धोने, त कने एसेरे जेरे होरे भी बडे रुवाज्जन मन्तथ।”

⁹ फिरी तैनी तैन सेइं ज़ोवं, “तुस केतूरू गलत केरतथ, कि अपने रीति-रुवाज मन्नेरे लेइ परमेशरेरे हुक्म टलोडतथ।

¹⁰ किजोकि मूसा नेबे ज़ोरूए कि, परमेशरे सारी मैनन् ई हुक्म दित्तो कि, ‘तू अपने हाज बव्वेरी केरि इज्जत केर। त ज़ै कोई अपने हाज बव्वे जो बुरू ज़ोलो, तै ज़रूर मारो गालो।’ ¹¹ पन तुस ज़ोतथ कि अगर कोई मैन्हु अपने हाज बव्वे सेइं सिर्फ एन ज़ोए, त तैन बडू आए कि, ‘मीं करां ज़ै किछ मद्दत तुसन मैल्ली सकती थी, तै पेइली बलिदान भोरीए, यानी परमेशरे जो चढतल चाढोरीए। एल्हेरेलेइ, अवं तुसन किछ न देइ सकी।’ ¹² एरी शिक्षा देइतां तुस लोकन तैन केरे हाज बव्वां केरि किछ मद्दत केरने न देथ। ¹³ एन्चरां तुस अपनि परमपरा चलानेरे लेइ, परमेशरेरी गल्लां टेली छइतथ। एरी ज़ेरि तुस होरि भी बेडि गलत परमपरा मन्ते ओरेथ।”

ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 15:10-20)

¹⁴ तैखन यीशुए फिरी सारे लोक एप्पू कां कुजेइतां तैन सेइं ज़ोवं, “तुस सारे लोक, मेरी गल ध्याने सेइं शुना ते समझा। ¹⁵ एरी कोई चीज नई ज़ै बेइरेरां मैनेरे अन्तर गेइतां तैस ज़ुटो केरे। पन ज़ैना बुरी चीजां मैनेरे अन्तरां, यानी तैसेरे दिले मरां बेइर निस्चन, तैन्नां तैस ज़ुटो केरचन। ¹⁶ अगर कोई समझनो चाते, त तै ध्याने सेइं शुने!”

¹⁷ बादे मां, यीशु मैन्हु केरि भीडी मरां घरे जो जेव। तैखन तैसेरे चलेई तैस मिसालारे मतलबेरे बारे मां तैस पुच्छू। ¹⁸ तैनी तैन सेइं ज़ोवं, “होरि मैन्हु केरे जेरे कुन तुस भी न समझथ? कुन तुस न समझथ कि ज़ै चीज बेइरां मैनेरे अन्तर गाचे, तै तैस ज़ुटो न केरि सके? ¹⁹ किजोकि तै तैसेरे दिले मां नई, पन तैसेरे पेटे मां गाचे ते बादे मां पेटे मरां निस्सी गाचे!” एन ज़ोइतां यीशुए समझावं कि खानेरी चीज कोई भी असन ज़ुटो न केरे।

²⁰ तैखन तैनी अपने चलन सेइं ज़ोवं, “जैन मैनेरे अन्तरेरां निस्ते, तैन्ने परमेशरेरी नजरी मां मैन्हु ज़ुटो केरते, ²¹ किजोकि मैनेरे अन्तरेरां, यानी मैनेरे दिले मरां बुरे खियाल, बदमाशी, चोरी, कत्ल केरनो, ²² अडलाए देइने गलत कम केरनू, लालच, दुष्ट कम केरनू, बेइमानी, बदचलन, जलन, तुहीन, घमण्ड, ते बेवकूफी एच्चन। ²³ एना सैरी बुरी गल्लां मैनेरे अन्तरेरां, यानी दिले मरां निस्तां मैन्हु ज़ुटो केरचन।”

ⓂⓂⓂ-ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 15:21-28)

²⁴ तैल्ला पत्ती, यीशु तैटठां निस्तां सूर त सैदा नगरेरे आसेपासेरे इलाकेरे नेडे अव। ते तैडी तै एक्की घरे मां जेव। ते तै चातो थियो कि कोई न ज़ैनी सके कि अवं इडी आई। पन तै छेप्पी न सको। ²⁵ तैडी अक कुआन्श थी, जेसेरी निकडी कुईए पुड भूतेरो सायो थियो। तै यीशुएरे बारे मां शुन्तां अकदम तैडी आई ते तैसेरे पावन पुड पेई। ²⁶ त तै कुआन्श गैर कौमरी थी ते सुरूफिनिकी इलाकेरी थी। तैसां यीशु सेइं मिन्नत की कि, “मेरी कुईए पुडेरां भूतेरो सायो केडडी देथ।” ²⁷ पन यीशुए तैस सेइं ज़ोवं, “पेइले बच्चन रजने दे, किजोकि बच्चां* केरि रोटी नेइतां कुतरन जो देनी ठीक नई!” ²⁸ तैसां जुवाब दित्तो, “सच्चे, प्रभु! पन कुतरां भी मेजे हेठोरां बच्चां केरि रोट्टन मरां बिछड़ोरे टुकड़े खातन।” ²⁹ तैखन यीशुए तैस सेइं ज़ोवं, “मीं पुड तीं एतूरो विश्वास रखवोरोए, एल्हेरेलेइ तू

* **7:27 7:27** एस कहावती मां, यीशु यहूदी लोकां केरि तुलना बच्चन सेइं केरते, त गैर यहूदी लोकां केरि तुलना कुतरन सेइं केरते। तैस कुआन्शारे विश्वासेरी अज्रमैइश केरनेरे लेइ यीशुए एन्चरां ज़ोवं।

आरामे सेइं घरे जो गा। तेरी कुईए मरां भूतेरो सायो निस्सी जोरोए।” 30 तैसां कुआन्शां तैट्ठां अपने घरे वापस एइतां हेरू कि कुई खट्टी पुड आरामे सेइं झुल्लोरी थी, त भूतेरो सायो तैस मरां निस्सी जोरो थियो।

॥॥॥॥ ॥॥॥॥॥॥ ॥॥॥॥॥॥ ॥॥॥ ॥॥॥॥॥॥, ॥॥॥ ॥॥॥॥॥॥ ॥ ॥॥॥ ॥॥॥॥॥॥ ॥॥॥॥॥॥

31 यीशु फिरी अपने चलन सेइं साथी सूर त सैदारे नगरेरे इलाकन मरां निस्तां, दिकापुलिस इलाके मांमेइं भोइतां गलील समुन्दरेरे नेडे पुज्जो। 32 तैडी किछ लोकेई अक टोव्णो मैन्हु, जै खेखो भी थियो, यीशु कां एन्तां तैस सेइं मिन्नत की कि, “तू अपनो हथ एस पुड रख कि ए मैन्हु बेज्जोए।” 33 यीशुए मैन्हु केरि भीडी मरां तै मैन्हु अलग नीयो। तैखन तैनी अपनि एंगलोई तैस मैनेरे कन्न मां छेइडी, त अपनि एंगलोई सेइं थुक तैस मैनेरी जिभी सेइं लावं। 34 तैल्ला पत्ती, यीशु अम्बरेरे पासे तेकतां ओशा छेइडो, त तैस मैन्हु सेइं अपनि (इब्रानी) भाषाई मां ज़ोवं, “इप्फत्तह!” ज़ेसेरो मतलब “खुल्ली गा!” 35 अकदम तै रोडेचारे शुन्ने लगो ते तैसेरी जिभ भी ठीक भोइ जेई, ते तै साफ-साफ गल्लां करेने लगो। 36 तैखन यीशुए तैन मैनन् हुक्म दित्तो कि, “ए गल केन्ची सेइं न ज़ोइयथ।” पन ज़ेतूरू जादे यीशुए तैनन् हुक्म दित्तोरो थियो, तेतूरू जादे तैना होरि लोकन ए गल शुनाने लगगे। 37 यीशुएरे चमत्कारेरां कम्मां केरे वजाई सेइं, तैना बडे हैरान भोइतां ज़ोने लगगे, “कमाल आए! यीशुए ज़ैन किछ भी कियूं सब किछ रोडू कियोरूए! तै टोव्णन शुन्नेरी ते लट्टन गल्लां करेनेरी शक्ति देते।”

8

॥॥॥॥ ॥॥॥॥॥॥॥ ॥॥॥॥॥॥॥ 4000 ॥॥॥॥॥॥ ॥॥॥॥॥॥॥ ॥॥॥॥॥॥॥
(॥॥॥॥॥॥ 15:32-39)

1 तैन दिहाइन मां एरू भोव कि, मैन्हु केरि बडी भीड यीशु कां फिरी अकोट्टी भोइ। तैन कां किछ खाने जो न थियूं। तैखन यीशुए अपने चले एप्पू कां कुजेइतां तैन सेइं ज़ोवं, 2 “मीं एन मैन्हु केरि भीडी पुड तरस एइते, किजोकि एना टलेइ दिहाडां केरे देते मीं सेइं साथी आन, ते एन कां खाने जो किछ नईं राओरू। 3 अगर अवं एन दलुख्वोरे घरे जो भेज्जी, त चलते-चलते बत्ती मां थेकतां रेइ गानेन, किजोकि एन मरां कोई-कोई दूरेरां भी आन।” 4 तैसेरे चलेई तैस जुवाब दित्तो, “इडी सुनसान ठैरी एन मैनन् जो एतूरी रोट्टी कोट्टां आनम कि एन मैन्हु रेजतां खान?” 5 तैखन यीशुए तैन पुच्छू, “तुसन कां केतूरी रोट्टी आन?” तैनेईं जुवाब दित्तो, “सत रोट्टी आन।” 6 तैखन यीशुए मैन्हु केरि भीडरे पासे मुडतां तैन जो हुक्म दित्तो कि, “जमीनी पुड बिशशी गाथ।” तैखन तैनी तैन सत रोट्टी टलेइतां परमेशेरू शुक्र केरतां टलोडी, ते अपने चलन कां देते जेव कि तैना लोकन खाने जो देन। ते चलेई मैनन् रोट्टी दित्ती। 7 तैन कां थोडी जेरि निक्की मेछली भी थी। यीशुए मेछली केरे लेइ भी परमेशेरू शुक्र केरतां अपने चलन सेइं ज़ोवं, “इना भी लोकन खाने जो देथ।” तेन्चरां तैसेरे चलेई कियूं। 8 तैना सारे मैन्हु रोट्टी खेइतां रेज्जी जे। तैल्ला पत्ती, यीशुएरे चलेई मेछली त कने रोट्टी केरे बच्चोरे टुकडन मरां सत टोकरे भेरतां सल्ले। 9 तैडी लगभग 4000 मडद थिये। लोकन रोट्टी खुवानेरे पत्ती यीशुए मैन्हु भेज्जी दित्ते। 10 तैखन तै अकदम अपने चलन सेइं साथी किशती मां च़ेदतां दलमनूता इलाके जो च़लो जेव।

॥॥॥॥॥ ॥॥॥ ॥॥॥॥ ॥॥॥॥॥॥ ॥॥॥॥॥॥॥॥॥ ॥॥॥॥॥ ॥॥॥॥॥
(॥॥॥॥॥॥ 16:1-4)

11 फिरी किछ फरीसी लोक यीशु कां एइतां तैस सेइं बेंस करेने लगगे। तैना तैस अजमानेरे लेइ तैस पुच्छने लगगे, “असन अम्बरेरां कोई निशान* हिरा।” 12 ज़ैखन यीशुए एन शुनू, त तैनी अक बड्डो ओशा छेइतां ज़ोवं, “इस ज़मानेरे लोक मीं केरां किजो निशान मगतन! अवं तुसन सेइं सज़ ज़ोतई कि इस ज़मानेरे लोकन, यानी तुसन अवं कोई भी निशान न हिरेई।” 13 तैल्ला पत्ती, यीशु तैन लोकन छेइतां, फिरी किशती मां च़दो ते गलील समुन्दरेरे पार च़लो जेव।

॥॥॥॥॥ ॥॥॥॥॥॥ ॥॥॥॥ ॥॥॥॥ ॥॥॥ ॥॥ ॥॥॥ ॥॥॥॥॥॥॥॥ ॥॥॥॥॥॥॥॥ ॥॥॥॥ ॥॥॥, ॥॥॥॥॥ ॥॥॥॥॥ ॥॥॥॥॥
(॥॥॥॥॥॥ 16:5-12)

* 8:11 8:11 यीशुए पेइले बडे चमत्कार कियोरे थिये, पन फरीसी लोक तैस पुड विश्वास न कियो। तैना सिर्फ यीशुए गल्लन मां फसानेरे लेइ एन्चरां सवाल पुच्छते थिये।

14 जैखन यीशुएरे चले किशती मां चढे, त तैना एप्पू सेइं साथी रोट्टी नेनी बिसरी जे । किशती मां तैन कां अक्के रोट्टी थी । 15 जैखन तैना समुन्दरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खमीरेरे† बारे मां ते कने हेरोदेस राजेरे खमीरेरे बारे मां होशियार रेइयथ ।” 16 चले यीशुएरी गल गलत सेमझतां एप्पू मांमेइं गलबात केरने लगगे कि, “असन कां त रोट्टी नई, एल्हेरेलेइ यीशुए एन्चरां ज़ोवं ।” 17 तैखन यीशुए तैन केरि गल ज़ेनतां, तैन सेइं ज़ोवं, “तुस एप्पू मांमेइं एन्चरां किजो सोची राओरेथ कि असन कां रोट्टी नई? कुन तुस हेजू भी मेरी गल न समझी ते कने न बुझी? कुन तुशे मन बेसमझ भोइ जोरेन? 18 कुन तुसन एछ्छी भोइतां भी न लेइहोए? ते कन भोइतां भी न शुनोए? कुन तुसन याद नई? 19 ज़ताली 5000 मैन्हु केरे लेइ पंच रोट्टी टलोइतां दित्तोरी थी, त तुसेईं बादे मां बच्चोरी रोट्टी केरे केतरे टोकरे भेरतां सल्लोरे थिये?” तैनेईं तैस जुवाब दित्तो, “बारहे टोकरे ।” 20 तैखन तैनी तैन पुच्छू, “ज़ताली मीं 4000 मैन्हु केरे लेइ सत रोट्टी टलोइतां दित्तोरी थी, त तुसेईं रोट्टी केरे केतरे टोकरे भेरतां सल्लोरे थिये?” तैनेईं तैस जुवाब दित्तो, “सत टोकरे ।” 21 तैखन तैनी तैन पुच्छू, “कुन तुसन हेजू भी समझ न आई?”

ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂⓂ

22 तैल्ला पत्ती, यीशु त तैसेरे चले बैतसैदा नगरे मां आए । लोकेईं अक कानो मैन्हु यीशु कां आनो ते तैस कां मिन्नत की कि, “एस मैन्हु सेइं हथ लाथ ताके ए बेज्जोए ।” 23 तैखन यीशुए तैस काने मैनेरो हथ टलेइतां इलोव्वे केरां बेइर नीयो । तैखन तैनी तैस काने मैनेरी एछ्छन पुइ थुकतां, तैस पुइ हथ रखे, ते तैस पुच्छू, “कुन तू किछ लातस?” 24 तैखन तैनी मैने उबरे तेकतां ज़ोवं, “हाँ, अवं मैनन् हेरी सकतई, तैना मीं च़लते बुट्टां केरे ज़ेरे लेइहोतन ।” 25 तैखन यीशुए दुइयोवं हटे तैसेरी एछ्छन पुइ हथ रखे । तै कानो ध्याने सेइं लाने लगगे । तैसेरी एछ्छी ठीक भोइ जेई, त तै सब किछ साफ-साफ हेरने लगगे । 26 तैल्ला पत्ती, यीशुए तै मैन्हु एन ज़ोइतां घरे जो भेजो, “तू इस इलोव्वे मां पाव भी न रेखां (ते कने ई गल केन्ची सेइं न ज़ोइयां ।)”

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂ ⓂⓂ

(ⓂⓂⓂⓂⓂ 16:13-20; ⓂⓂⓂⓂ 9:18-21)

27 तैल्ला पत्ती, यीशु ते तैसेरे चले बैतसैदा नगरे मरां निस्तां कैसरिया-फिलिप्पी नंव्वेरे नगरेरे इलोव्वन मां च़ेलि जे । बत्तां च़लते-च़लते यीशुए अपने चलन पुच्छू, “जैखन लोक मेरे बारे मां गल्लां केरतन, त तैना मेरे बारे मां कुन ज़ोतन कि अवं कौन आई?” 28 तैसेरे चलेईं जुवाब दित्तो, “किछ ज़ोतन कि तू यूहन्ना आस, ज़ै बपतिस्मो देनेबालो थियो, पन किछ होरे मैन्हु ज़ोतन कि तू एलिय्याह आस, ज़ै नबी थियो, पन किछ होरे मैन्हु एन भी ज़ोतन कि तू परमेशेरी गल्लां ज़ोनेबालन मरां अक मैन्हु आस ।” 29 तैखन यीशुए अपने चलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू मसीह‡ आस ।” 30 त यीशुए तैनन् समझावं कि, “मेरे बारे मां ई गल केन्ची सेइं न ज़ोइयथ ।”

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂ Ⓜ ⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 16:21-23; ⓂⓂⓂⓂ 9:22)

31 तैखन यीशु अपने चलन शिक्षा देनो लगगे कि, “मैनेरे मट्ठेरे लेइ, यानी मेरे लेइ एन ज़रूरी आए कि मीं बडे दुख झल्लनेन । यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोईं त मारो गानोईं । पन टलेइ दिहाइना पत्ती अवं फिरी जीतो भोनोईं ।” 32 यीशुए एना गल्लां तैन सेइं साफ-साफ ज़ोई । तैखन पतरस तैस अलग नेइतां डांटेने लगगे, “मसीह न मरे ।” 33 पन यीशुए मुइतां अपने बाकी चेलां केरे पासे तक्कू, ते पतरसे सेइं झिडकेइतां ज़ोवं, “हे शैतान, मीं करां दूर भो! (मतलब एन्चरां न सोच! शैतान तीं करां एन्चरां ज़ुवाते) मीं करां दूर भोइ गा । तू परमेशेरी गल्लन पुइ नई, पन मैन्हु केरि गल्लन पुइ मन लातस ।”

ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ, ⓂⓂⓂⓂⓂ ⓂⓂⓂ-ⓂⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 16:24-28; ⓂⓂⓂⓂ 9:23-27)

† 8:15 8:15 इड़ी खमीरेरो मतलब गलत शिक्षा आए, पन यीशुएरे चलेईं तैसेरी गल न समझी । ‡ 8:29 8:29 मसीह: मतलब की, परमेशेरे तरफां भेजोरो राजो ।

34 तैखन यीशुए अपने चले त कने मैन्हु केरि भीड़ एप्पू कां कुजेइतां सेबन सेइं ज़ोवं, “तुस अगर मेरे चेलो बन्नु चातथ, त तुस अपने आपेरो इन्कार[§] केरा त कने तुस अपनू कूरूस* छुइतां मीं पत्ती चला। 35 किजोकि ज़ै कोई अपनि ज़िन्दगी बचानी चाते, त तै हमेशारी ज़िन्दगी गुवालो। पन ज़ै कोई मेरे वजाई सेइं त कने मेरे बारे मां खुशखबरी होरि लोकन शुनानेरी वजाई सेइं अपनि ज़िन्दगी गुवाते, यानी बलिदान केरते, त तै तैस बचालो, यानी हमेशारी ज़िन्दगी हासिल केरेलो। 36 मैन्हु अगर सारी दुनियाई हासिल केरे त अपनि हमेशारी ज़िन्दगी गुवाए, त तैस फिरी कुन फैइदो भोलो? 37 मैन्हु अगर अपनि हमेशारी ज़िन्दगी गुवालो, त गुवानेरे पत्ती तै कुन देइतां तैस वापस घिन्नी सकते? 38 अज्जेरे ज़मानेरे लोक परमेशेरे करां दूरन त कने पापी आन। एस ज़माने मां, अगर कोई मैन्हु मीं केरां त कने मेरी गल्लन केरां शरमाते, त मैनेरू मट्टू भी, यानी अवं भी तैस केरां शरमालो। ज़ेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।”

9

1 तैखन यीशुए तैन सेइं ज़ोवं, “अवं तुसन सेइं सच्च ज़ोतईं कि ज़ैना इडी खड़े आन, तैन मरां किछ मैन्हु एरे आन कि ज़ांतगर तैना परमेशेरे राज्जेरी शक्ति न हेरेले, तांतगर तैना न मरेले।”

¶¶¶¶¶ ¶¶¶¶¶ ¶¶¶¶¶¶¶¶¶ ¶¶¶¶¶ ¶¶¶¶¶
 (¶¶¶¶¶ 17:1-13; ¶¶¶¶¶ 9:28-36)

2 शेइ दिहाइना बाद, यीशु अपने चले पतरस, याकूब त कने यूहन्ना सेइं साथी एक्की पहाड़े पुड़ चढ़ो, ज़ेडी कोई भी न थियो। तैडी तैन केरे सामने यीशुएरी शकल बेदलोई जेई। 3 तैसेरां लिगडां हियूंवेरां ज़ेरां बडां चमकने लगगां कि एतरे छित्तां भुआं कि धेरती पुड़ कोई भी लिगडां धोनेबालो एरां ज़ेरां छित्तां न केरि सके। 4 तैखन तैडी मूसा नबी त कने एलिय्याह भी यीशु सेइं साथी लेइहोए। ते तैना यीशु सेइं गल्लां केरने लगगे। 5 ज़ैखन पतरसे एन हेरू, त तैनी यीशु सेइं ज़ोवं, “हे गुरू, इशू इडी रानू रोडू आए! एल्हेरेलेइ, अस टलाई डेरे बनाम, अक तेरे लेइ, अक मूसेरे लेइ, त कने अक एलिय्याहरे लेइ।” 6 पतरसे एन्चरां एल्हेरेलेइ ज़ोवं किजोकि तैस पतो न थियो कि कुन ज़ोईं, किजोकि तै त कने होरे दूई चले भी बड़े डेरि जोरे थिये। 7 तैखन तैडी तैन पुड़ बिदलार आई ते तैस बिदलारी मरां परमेशेरी आवाज़ आई, “एन मेरू टलारू मट्टू आए। ध्याने सेइं एसेरी गल शुना!” 8 अकदम, ज़ैखन यीशुएरे चलेईं च़ेवरे पासन तकू, त यीशुएरे अलावा तैडी तैन कोई भी न लेइहोव।

¶¶¶¶¶¶¶¶¶ ¶¶¶¶¶ ¶¶¶¶¶¶¶¶¶¶¶¶¶¶¶¶¶¶¶¶ ¶¶¶¶¶ ¶¶¶¶¶ ¶¶¶¶¶ ¶¶¶¶¶¶¶¶¶

9 पहाड़े पुड़ेरां ओस्ते-ओस्ते यीशुए अपने चलन हुक्म दित्तो कि, “ज़ांतगर मैनेरू मट्टू, यानी अवं, मेरतां ज़ीतो न भोईं, तांतगर ज़ैन किछ तुसेईं पहाड़े पुड़ लावरूए, तैन केन्वी सेइं न ज़ोइयथ।” 10 तैनेईं तैन केन्वी सेइं न ज़ोवं, ते तैना एप्पू मांमेइं गलबात केरने लगगे कि, “मेरतां ज़ीतो भोनेरो कुन मतलब भोइ सकते।”

11 तैखन तैनेईं यीशुए पुच़्छू, “शास्त्री लोक किजो ज़ोतन कि मसीहेरे एजनेरां पेइले एलिय्याह नेबेरू दुनियाई मां एजनु ज़रूरी आए?” 12 यीशुए तैन जुवाब दित्तो, “ते तै सच्चि गल आए कि मसीहेरे एजने केरां पेइले एलिय्याह एजतां सैरी गल्लां ठीक केरनिन। पन परमेशेरी किताबी मां मैनेरे मट्टेरे बारे मां, यानी मेरे बारे मां एन किजो लिखोरूए कि, ‘मीं बड़े दुख झल्लनेन त लोक मीं निकम्मो समझेले?’ 13 पन अवं तुसन सेइं ज़ोतईं कि ‘एलिय्याह’ त पेइले ओरोए, (यूहन्ना, एलिय्याहरे जगाई अवं) त ज़ेन्चरां तैसेरे बारे मां परमेशेरी किताबी मां लिखोरू थियूं, तेन्चरां तैनेईं तैस सेइं कियूं, यानी ज़ेन्चरां तैना चाते थिये, तेन्चरां तैनेईं तैस सेइं बुरू कियूं।”

¶¶¶¶¶ ¶¶¶¶¶¶¶ ¶¶¶¶¶¶¶¶¶¶¶¶¶¶¶¶¶¶¶¶ ¶¶¶¶¶ ¶¶¶¶¶ ¶¶¶¶¶¶¶¶¶ ¶¶¶¶¶ ¶¶¶¶¶
 (¶¶¶¶¶ 17:14-21; ¶¶¶¶¶ 9:37-43)

14 तैल्ला पत्ती, यीशु त तैसेरे टलाई चले पहाड़े पुड़ेरां ओस्तां, होरि चलन कां पुज्जे, ज़ैना बुन थिये। तैडी एजतां यीशुए तैन चलन केरे च़ेवरे पासन मैन्हु केरि बड़ी भीड़ लाई। शास्त्री तैन चलन सेइं बेंस केरि राओरे थिये। 15 यीशु लेइतां सारे लोक बड़े हैरान भोए। तैना तैसेरे पासे दौइतां आए ते तैस जो नमस्कार कियूं। 16 तैखन यीशुए तैन पुच़्छू, “मेरे चलन सेइं कुन बेंस केरि राओरेथ?” 17 मैन्हु केरि भीड़ी मरां एक्की मैने यीशु जुवाब दित्तो,

§ 8:34 8:34 इन्कार केरनु: मतलब की, अपनि खुवाइश छुइडी देनी कने अपनि मर्जी पुड़ नई च़लनु। * 8:34 8:34 कूरूस छुइतां यीशु पत्ती च़लनु: मतलब कि, यीशुएरे पत्ती च़लनेरे वजाई सेइं दुख या मुसीबत झलनेरे लेइ, त मरनेरे लेइ भी तियार भोनु।

“हे उस्ताद, मीं अपनू मट्टू तीं कां आनेरू थियूं, ताके तैन ठीक भोए। किजोकि तैस पुड भूतेरो सायो आए, ते तैस गल केरने न दे। 18 कोन्ची भी ठैरी तैन भूत मेरे मट्टे टलाते, ते ज़मीनी पुड बिछोडते। तैखन तैसेरे ऐशी मरां शैम्फ एच्चे ते तैन दंत कटते ते ठठमुकर भोइ गाते। मीं तेरे चलन सेइं ज़ोरू थियूं कि, भेरे मट्टे पुडेंरां भूतेरो सायो केडडी देथ। पन तैना केडडी न सके!” 19 एन गल्लां शुन्तां यीशुए तैन जुवाब दित्तो, “हे गैर विश्वासी मैनाव! अवं केइस तगर तुसन सेइं साथी रालो? त केइस तगर अवं तुशशो अविश्वास झैल्ललो? तैस मट्टे मीं कां आनां!” 20 तैखन तैनेई तैन मट्टू यीशु कां आनू। ज़ैखन तैनी भूते यीशु लाव, त तैनी अकदम तैन मट्टू मरोडू, ते मट्टू तल्ले बिछूडू। ते तैसेरी ऐशी मरां शैम्फ निस्ने लग्गी त तैन ड्लेडने लग्गू।

21 यीशुए तैसेरे बाजी पुच्छू, “ऐसेरी ए हालत केइसेरी देंती आए?” तैसेरे बाजे ज़ोवं, “बचपनेरी देंती। 22 एस मारनेरे लेइ एन भूत बडे बार कधी अग्गी मां ते कधी पैनी मां बिछोडतू राते, पन अगर तू किछू केरि सकतस, त असन पुड तरस खेइतां इशशी मद्दत केर!” 23 यीशुए तैस मट्टेरे बाजी सेइं ज़ोवं, “तू ए को गल केरतस! अगर तू विश्वास केरस, त एन भोइ सकते। किजोकि मीं पुड विश्वास केरनेबालां केरे लेइ सब किछू भोइ सकते।” 24 तैस मट्टेरे बाजे अकदम ज़ोरे सेइं लेरां देइतां ज़ोवं, “हे प्रभु, अवं विश्वास केरतई, मेरी मद्दत केर कि अवं शक न केरि।”

25 ज़ैखन यीशुए हेरू कि बडे लोक दौडतां अकोट्टे भोने लग्गोरेन, त तैनी भूत एन ज़ोइतां डांटू, “हे भूता, ज़ै एस मट्टे टोन्नु त लट्टू बनातस। अवं तीं हुक्म देताई, एस मट्टे मरां निस्सी गा, ते एसमां फिरी कधी भी न एज्जां!” 26 तैखन तैनी भूते चिन्डां मारी त तैन मट्टू मरोडू, फिरी तैन तैस मट्टे मरां निस्सी जेव। त मट्टू मरू ज़ेरू भोइ ज़ोवं, इडी तगर कि बडे लोक ज़ोने लग्गे कि मट्टू मेरि ज़ोवं। 27 पन यीशुए मट्टेरो हथ टलेइतां खडू कियूं। ते मट्टू ठीक भोइतां खडू भोवं।

28 तैल्ला पत्ती, यीशु ते तैसेरे चेले घरे जो जे। ज़ैखन तै अकैल्लो थियो तैखन तैसेरे चेलेई तैस पुच्छू, “अस तैस मट्टे मरां भूतेरो सायो की न केडडी सके?” 29 यीशुए तैन सेइं ज़ोवं, “बगैर प्रार्थनारे (त कने बगैर बरत रखनेरे) अलावा, होरि केन्ची तरीके सेइं, तुस एरे ज़ेरे भूतेरो सायो न केडडी सकतथ।”

[\[22:22-23\]](#), [\[9:43-45\]](#), [\[18:1-5\]](#), [\[9:46-48\]](#)

30 तैल्ला पत्ती, यीशु ते तैसेरे चेले तैट्टां निस्तां गलील इलाके मामेइं ज़ेलि राओरे थिये। यीशु न चातो थियो कि कोई तैसेरे बारे मां ज़ाने कि तै तैडी ओरोए, 31 किजोकि तैखन तै अपने चलन शिक्षा देतो ते तैन सेइं ज़ोतो थियो कि, “मेरे दुश्मनेई मैनेरू मट्टू, यानी अवं कैद केरनोई। त तैनेई अवं मारनोई, पन मारनेरां टलेइयोवं दिहाडे अवं मुडदन मरां फिरी ज़ींतो भोनोई।” 32 पन यीशुएरी ए गल चेलां केरि समझी मां न आई, ते तैना एस गल्लारो मतलब पुच्छने केरां भी डरते थिये।

[\[18:1-5\]](#), [\[9:46-48\]](#)

33 तैल्ला पत्ती, यीशु ते तैसेरे चेले कफरनहूम नगरे मां आए। तैना तैडी एक्की घरे मां जे। तैखन यीशुए अपने चलन पुच्छू, “बत्तां ज़लते-ज़लते तुस एप्पू मामेइं कोस गल्लारे बारे मां बेंस केरि राओरे थिये?” 34 तैना सब शरमेइतां चुप राए, किजोकि तैनेई बत्तां एप्पू मामेइं एसेरे बारे मां बेंस कियोरी थी कि असन मां बडडो मैन्हु कौन आए। 35 तैखन यीशुए तल्ले विश्तां अपने 12 चेले कुजाए ते तैन सेइं ज़ोवं, “अगर कोई परमेशेरी नज़री मां बडडो बन्नू चाते, त तै सेभन केरां निकडो बने, ते कने सेब्नी मैन्हु केरो सेवक बने।” 36 तैखन यीशुए अक निकडो बच्चो हथ्यन मां टलेइतां, तैन केरे मझाटे खडो कियो। तैनी तै बच्चो अपने कुम्मे मां रेखतां अपने चलन सेइं ज़ोवं, 37 “जैना लोक मीं सेइं प्यार केरनेरे वजाई सेइं एरे ज़ेरे बच्चन मरां अक भी कबूल केरतन, तैना मीं कबूल केरतन। जैना मीं कबूल केरतन, तैना सिर्फ मीं नई, पन तैना परमेशेरे भी कबूल केरतन, जैनी अवं इडी भेजोरोई।”

[\[9:49-50\]](#)

38 तैखन यूहन्ने यीशु सेइं ज़ोवं, “हे गुरू, असेई अक मैन्हु लाव, ज़ै तेरू नवं घिन्तां लोकन मरां भूतेरो सायो केडडी राओरो थियो। एल्हेरेलेइ, असेई तै मैन्हु ठाको, किजोकि तै असन सेइं साथी तीं पत्ती नई ज़ले।” 39 पन

यीशुए जुवाव दित्तो, “तैस न ठाका, किजोकि अगर कोई मेरे नंव घिन्तां चमत्कारेरां कम्मां केरे, त तै मेरे बारे मां लूशी बुरी गल्लां न ज़ोए। ⁴⁰ किजोकि ज़ैना इश्शे खलाफ कम न केरन, तैना इश्शे पासेन। ⁴¹ अगर कोई मेरे नव्वे सेइं तुश्शी मद्दत केरे, अक गिलास पानी भी तुसन पियाए, कि मसीहेरे आथ, त अवं तुसन सेइं सच्च ज़ोतां कि तै मैन्हु परमेशेरे केरां अपनो फल ज़रूर हासिल केरेलो।

⁴² “जै कोई इन निकडे बच्चन मरां ज़ैना मीं पुड़ विश्वास केरतन, केन्ची भी पाप करवाए, त तैस मैनेरे लेइ एन रोडू आए कि द्लाटेरो अक बड्डो दलेइटोल तैसेरे गल्ले सेइं बेंधतां समुन्द्रे मां शारो गाए। ⁴³ अगर तेरो हथ तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई हथ भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू डोण्डो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे। ⁴⁴ तैडी तैन केरे कीडे, ज़ैना तैन खातन न मरन ते कने अग भी न हिश्शे। ⁴⁵ त अगर तेरो पाव तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई पाव भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू टोंटो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे। ⁴⁶ तैडी तैन केरे कीडे, यानी ज़ैना तैन खातन न मरन त अग भी न हिश्शे। ⁴⁷ अगर तेरी अछ्छ तीं पाप केरनेरे लेइ ठोकर खुवाए, त तैस केइडी छड। किजोकि तेरे लेइ दूई एछ्छी भोंते सांते नरकेरी अग्गी मां छड्डे गाने केरां एन रोडू आए, कि एक्की अछ्छी सेइं तू परमेशेरे राज्जे मां दाखल भोस। ⁴⁸ नरके मां तैन केरे कीडे, ज़ैना तैन खातन न मरन त अग भी न हिश्शे। ⁴⁹ जेन्चरां हर बलिदाने* मां लून छडनू ज़रूरी आए, तेन्चरां परमेशर हरां एक्की मैनेरी अज़मैइश घिन्नलो, जै बडी दुखे बाली भोनी आए, जेन्चरां कि अग्गी‡ मांमेइं निसनूए। ⁵⁰ लून त रोडू आए, पन अगर लूनेरो स्वाद चेलि गाए, त फिरी दुबारां केन्चरे तैसेरो स्वाद वापस आनेले? तेन्चरां तुस भी एप्पू मां लून रखाS, यानी परमेशेरो हुक्म मन्ना, त एप्पू मांमेइं मेल मिलापे सेइं राथ।”

10

ⓂⓂⓂⓂ Ⓜ ⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 19:1-12; ⓂⓂⓂⓂⓂⓂ 16:18)

¹ तैल्ला पत्ती, यीशु त तैसेरे चले तैट्टां उठतां यहूदिया इलाके मां आए, त फिरी यरदन दरियारे उस पार चले जे। तैडी मैन्हु केरि भीड़ फिरी तैस कां अकोट्टी भोइ। त तै अपने रीतरे मुताबिक तैन फिरी शिक्षा देने लगो। ² तैखन फरीसी लोकेई यीशु कां एइतां तैस अज़मानेरे लेइ तैस पुच्छू, “कुन एन जेइज आए कि मइद अपनि कुआन्शी फारख्ती दे?” ³ पन यीशुए तैनन् पुच्छू, “बडे पेइले मूसा नेबे तुसन कुन केरनेरो हुक्म दित्तोरो थियो?” ⁴ तैखन तैनेई यीशुए जुवाव दित्तो, “मूसे मइदे अज़ाजत दित्तोरीए कि तै लिखतां फारख्ती दे।” ⁵ तैखन यीशुए तैनन् जुवाव दित्तो, “तुश्शे सखत दिलेरी वजाई सेइं, मूसे तुश्शे लेइ ए हुक्म दित्तोरो थियो। ⁶ पन दुनियारी शुरुआती मां, ज़ैखन परमेशेरे मैन्हु केरि रचना की, तैखन तैनी तैना मइद ते कुआन्श बनोरेन। ⁷ एल्हेरेलेइ, ड्लाएरे पत्ती मइद अपने हाज-बव्वे केरां अलग भोइतां अपनि कुआन्शी सेइं साथी रालो, ⁸ ते तैना दुइये अक्के जान भोले।” तैल्ला पत्ती यीशुए ज़ोवं, “एल्हेरेलेइ तैना हुनी परमेशेरी नज़री मां दूई नई, पन तैना अक्के आन। ⁹ एल्हेरेलेइ ज़ैना परमेशेरे ज़ोडोरेन, तैनन् कोई मैन्हु अलग न केरे।”

¹⁰ बादे मां, ज़ैखन यीशु ते तैसेरे चले घरे मां थिये, तैखन तैसेरे चलेई फारख्ती देनेरे बारे मां तैस फिरी पुच्छू। ¹¹ यीशुए तैन सेइं ज़ोवं, “जै कोई अपनि कुआन्शी फारख्ती देइतां होरो ड्ला बनाए, त तै तैस पेइली कुआन्शारे खलाफ बदमाशी केरते। ¹² त अगर कुआन्श अपने मइदे छेडतां होरो ड्ला बनाए, त तै अपने पेइले मइदेरे खलाफ बदमाशी केरचे।”

ⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 19:13-15; ⓂⓂⓂⓂⓂⓂ 18:15-17)

* **9:49** 9:49 पुराने ज़माने मां बलिदाने पुड़ लून छडते थिये। तेन्चरां यीशुएरो हर अक चेलो ज़ीतो बलिदानेरो ज़ेरो भोनोए। मतलब की, मसीहेरे लोक अगारे ज़ेरे मुसीबतन मां भी, परमेशेरो हुक्म मन्नोरे लोडे। † **9:49** 9:49 मूल भाषाई मां: हर अक मैन्हु अग्गी सेइं लूनो कियो गालो। ‡ **9:49** 9:49 परमेशर अगारे ज़ेरे मुसीबतन सेइं हर एक्की मैन्हु अज़मालो, यानी इमतिहान नेलो। एन्चरां केरतां परमेशर सावत केरते की सच्चे मां तैसेरे लोक कौन आन, त तै तैन सेइं अपनो रिश्तो मज़बूत केरते। § **9:50** 9:50 यीशु चाते कि तैसेरे चले नरम दिले सेइं राए (वचन 35-37), ताके तैना एप्पू मांमेइं बेंस न केरे कि असन मरां बड्डो कौन आए, त तैन मरां कोई भी एन्चरां न सोचे कि अक्के बड्डोई, त केन्ची ठोकर न खुवाए।

13 तैल्ला पत्ती, किछ लोक अपने निक्के बच्चन यीशु कां आन्ने लगगे ताके तै तैन पुड़ हथ रेखतां आशिर्वाद दे, पन तैसेरे चेलैई तैना लोक डांटे। 14 यीशुए एन हेरतां सेरकोइतां अपने चलन सेइं ज़ोवं, “निक्के बच्चन मीं कां एजने देथ, तैनन् न ठाका, किजोकि परमेशेरू राज़ एरे ज़ेरे लोकां केरे लेइ आए। 15 अवं तुसन सेइं सच्च ज़ोतई कि ज़ै कोई परमेशेरू राज़े* निकडे बच्चेरू ज़ेरू कबूल न केरे, त तै परमेशेरू राज़े मां कधी भी दाखल न भोइ सके।” 16 तैखन यीशुए तैना बच्चे कुम्मे मां रेखां, तैन पुड़ हथ रेखतां तैनन् आशिर्वाद दित्तो।

¶¶¶¶¶¶¶¶ ¶¶¶¶¶¶¶¶¶¶¶¶ ¶¶¶¶¶ ¶¶¶¶ ¶¶¶¶¶ ¶¶¶¶¶ ¶¶¶¶¶ ¶¶¶¶¶¶¶¶¶¶¶¶
(¶¶¶¶¶¶¶¶ 19:16-30; ¶¶¶¶¶¶ 18:18-30)

17 तैल्ला पत्ती, ज़ैखन यीशु त तैसेरे चले घेरं बेइर निस्तां बत्तां चेलि राओरे थिये, ते अक मैन्हु यीशु कां दौड़तो अव। तैनी तैस कां मथ्यो टेकतां तैस पुच्छू, “हे रोडे गुरू, हमेशारी ज़िन्दगी हासिल केरनेरे लेइ अवं कुन केरि?” 18 पन यीशुए तैस पुच्छू, “किजो तू मींजो रोड़ ज़ोतस? परमेशेरू अलावा होरो कोई भी रोड़ो नई। 19 तू त परमेशेरू हुक्मन ज़ानतस, यानी खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बब्बां केरि इज्जत केरा।” 20 पन तैनी मैने यीशु जुवाब दित्तो, “हे गुरू, एना सब हुक्म अवं बचपनेरो मन्तो ओरोई।” 21 तैखन यीशुए तैस तेकतां तैस सेइं प्यार कियो, त तैस सेइं ज़ोवं, “तीं मां एक्की गल्लारी कमी आए। गा, ज़ैन किछ तीं कां आए तैन बेचतां गरीब मैनन् दे, तैखन तीं स्वर्गे मां खज़ानो मैलेलो। तैल्ला पत्ती, एइतां मेरो चेलो बना, त अपन कूरूस † छुइतां मीं पत्ती च़ल।” 22 यीशुएरी ए गल शुन्तां तैस मैनेरू तुत्तर टलक्कू, त तै बड़ो दुखी भोइतां च़लो जेव, किजोकि तै बड़ो अमीर थियो त तै अपनो धन छुडने न चातो थियो।

23 तैखन यीशुए च़ेवरे पासन अपने चलन तेकतां तैन सेइं ज़ोवं, “अमीर मैन्हु केरू परमेशेरू राज़े मां दाखल भोनू बड़ मुश्किल आए।” 24 यीशुएरे च़ेले तैसेरी गल्लां शुन्तां हैरान‡ भोए। पन यीशुए फिरी तैन सेइं ज़ोवं, “हे मट्ठाव, ज़ैना धने पुड़ भरोसो रखतन, तैन केरे लेइ परमेशेरू राज़े मां दाखल भोनू बड़ मुश्किल आए! 25 परमेशेरू राज़े मां अमीर मैनेरू दाखल भोने केरां ऊंटेरू सांधनेरे पाए मरां निस्नू सुखू आए!” 26 तैखन तैना बडे हैरान भोइतां एप्पू मांमेइं ज़ोने लगगे, “अगर अमीर मैनेरे लेइ मुक्ति§ हासिल केरनि नमुमकिन आए, त फिरी केसेरी मुक्ति भोइ सकचे?” 27 यीशुए तैन केरे पासे तेकतां ज़ोवं, “मैन्हु अपने आपे न बच्चेइ सकन, यानी मुक्ति हासिल न केरि सकन, पन परमेशर एन केरि सकते, किजोकि परमेशर सब किछ केरि सकते।”

28 तैखन पतरस यीशु सेइं ज़ोने लगगे, “तक, अस त सब किछ छेडतां तीं पत्ती च़लोरेम! असन कुन इनाम मैलेलू?” 29 यीशुए अपने चलन सेइं ज़ोवं, “अवं तुसन सेइं सच्च ज़ोतई कि, ज़ैनेई मेरे लेइ त कने मेरे बारे मां खुशखबरी होरे लोकन शुनानेरे लेइ अपने घर या दला या बेइन या हाज या बव या बच्चे या ऊडारां शारोरन, 30 तैनन् इस दुनियाई मां शौव गुणा मैलेलू। तैना घरन, दलान, बेइनन, हेईयन, बच्चन त कने ऊडारां हासिल केरेले। लोक भी तैनन् सताले, पन एजनेबाली दुनियाई मां परमेशर तैनन् हमेशारी ज़िन्दगी देलो। 31 पन बडे मैन्हु ज़ैना हुन्ना पेइले आन, तैना बादे मां पत्रोवं भोनेन। त ज़ैना हुन्ना पत्रोवं आन, तैना बादे मां पेइले भोनेन।”

¶¶¶¶¶ ¶¶¶¶¶¶¶¶ ¶¶ “¶¶¶¶¶ ¶¶¶¶¶¶¶¶¶¶, ¶¶¶¶¶¶¶¶¶¶¶¶ ¶¶¶¶¶¶¶¶¶¶¶¶
(¶¶¶¶¶¶¶¶ 20:17-19; ¶¶¶¶¶¶ 18:31-34)

32 तैल्ला पत्ती, यीशु त तैसेरे चले ते किछ लोक यरूशलेम नगरे जो च़लते-च़लते, तैना हेजू बत्तां थिये। यीशु तैन केरे अग्री-अग्री पासे च़ेलि राओरो थियो। ते तैसेरे चले हैरान भोए त होरे लोक डरते-डरते तैस पत्ती च़ली राओरे थिये। तैखन यीशु अपने 12 चलन बत्ती मरां अलग नेइतां फिरी तैन सेइं तैना गल्लां ज़ोने लगगे, ज़ैना तैस सेइं भोनेबैली थी। 33 तैनी ज़ोवं, “शुना, अस सारे यरूशलेम नगरे जो गेइ राओरेम। तैड़ी मैनेरू मट्टू (यानी अवं) प्रधान याजकन त कने शास्त्री लोकन केरां कैद कियो गानोई, त तैना मीं मारनेरो हुक्म देले त गैर यहूदी लोकां केरे हवाले केरले। 34 त होरि कौमां केरे लोक मेरो मज़ाक बनाले, त मीं पुड़ थुकेले, त मीं कोडे मारेले, त तैना मीं मैरी छुडेले, पन टलेइ दिहाइना पत्ती अवं मुड़दन मरां फिरी जीतो भोलो।”

* 10:15 10:15 परमेशेरू राज़ेरे दई मतलब आन। इशरी ज़िन्दगी मां, हुन्ना भी परमेशर राज़ केरते। या स्वर्गे मां भी तै हमेशा असन पुड़ राज़ केरेलो। † 10:21 10:21 कूरूस छुइतां यीशु पत्ती च़लनू: मतलब कि, यीशुएरे पत्ती च़लनेरे वजाई सेइं दुख या मुसीबत झलनेरे लेइ, ते मरनेरे लेइ भी तियार रानू। ‡ 10:24 10:24 यहूदी लोक एरो विश्वास केरते थिये कि अगर कोई अमीर आए त तै स्वर्गे मां गेइ सकते। एल्हेरेलेइ यीशुएरे चले तैसेरी ए गल शुन्तां हैरान भोए। § 10:26 10:26 मुक्ति हासिल केरनि या परमेशेरू राज़े मां दाखल भोनू, एना दुइये लगभग अक्के गल आए।

२२२२२ २ २२२ २२२२२२२, २२२२ २२२२ २२ २२२२२२ २२२२२२
(२२२२२ 20:20-28)

35 तैखन याकूब त यूहन्ना, जैना जब्दी नंव्वेरे मैनेरां मट्ठां थियां, यीशुएरे नेडे एडतां तैस सेइं ज़ोने लगगे, “हे गुरु, अस चातम कि ज़ैन किछ अस तीं केरां मग्गम, तैन तू असन देइयथ।” 36 यीशुए तैन पुच्छू, “तुसन कुन लोडते, ज़ैन अवं तुसन देई?” 37 तैनेई तैस सेइं ज़ोवं, “असन एन दे कि ज़ैखन तू महिमा सेइं साथी राज़ केरेलो, तैखन तीं सेइं साथी राज़ केरनेरे लेइ असन मरां अक तेरे देइने पासे त होरो तेरे बाएं पासे राज़गेही पुड़ बिश्शे।” 38 पन यीशुए तैन सेइं ज़ोवं, “तुस न ज़ानथ कि तुस कुन मगने लगगोरेथ! ज़ेन्चरे दुख अवं झलने बालोई, कुन तुस झेल्ली सकतथ? ज़ेन्चरे अवं मारनोई कुन तुस भी मारे गानेरे लेइ तियारथ?” 39 तैनेई तैस जुवाब दित्तो, “हाँ, अस एन केरि सकतम।” एल्हेरेलेइ, यीशुए तैन सेइं ज़ोवं, “सच्चे, ज़ेन्चरे अवं दुख झलने बालोई, तेन्चरे तुस झललेले? ज़ेन्चरे अवं मारनोई तेन्चरे तुस मारे गाले। 40 पन तै ठार ज़ैन केरे लेइ पेइले तियारी कियोरीए, तैन छेडतां होरे केन्ची अपने देइने पासे त कने अपने बाएं पासे राज़गेही पुड़ बिशालनू मेरू कम नई।”

41 एन शुन्तां यीशुएरे बाकी दश चले याकूब त कने यूहन्ना सेइं नराज़ भोइ जे। 42 तैखन यीशुए अपने सारे चले नेडे कुजेइतां, तैन सेइं ज़ोवं, “तुसन पतोए कि ज़ैना होरि कौमां केरे लोकां केरे राज़ केरनेबाले समझे गातन, तैना अपने लोकन पुड़ राज़ केरतन। तैन मरां ज़ैना बड्डे अफसर आन, तैना अपने लोकन पुड़ हकोमत चलातन। 43 पन तुसन मां एरी ज़ेरि गल न लोडे, पन ज़ै कोई तुसन मां बड्डो बन्नू चाए, त तै निकडो बेनतां तुश्शो सेवक बने। 44 त ज़ै कोई तुसन मां प्रधान मैन्हु बन्नू चाए, त तै सारे मैन्हु केरो सेवक बने। 45 किजोकि मैनेरू मट्टू, यानी अवं एस दुनियाई मां एल्हेरेलेइ नई ओरो कि कोई मेरी सेवा केरे, पन एल्हेरेलेइ ओरोई कि अवं होरि लोकां केरि सेवा केरि त कने बडे लोकां केरे लेइ अपनि जान बलिदान केरि, ताके तैन अपने पापां केरे सज़ाई केरां छुटकारो मैल्ले।”

२२२२ २२२२२२२ २२२२२२२२ २२२२ २२२२२२ २२२२२२२२२२
(२२२२२ 20:29-34; २२२२ 18:35-43)

46 तैल्ला पत्ती, यीशु त तैसेरे चले यरीहो नगरे मां पुज्जे। बादे मां, ज़ैखन तैना मैन्हु केरि बड़ी भीड़ी सेइं साथी यरीहो नगरी मरां निस्सी राओरे थिये, त तैखन बरतिमाई नंव्वेरो कानो भिखारी सडकेरे इलेखी बिश्तां भीख मेग्गी राओरो थियो। तैसेरे बाजी केरू नंव्व तिमाई थियूं। 47 ज़ैखन तैनी शुनू कि नासरत नगरेरो यीशु इलमेइं निस्सी राओरोए, त तै भिखारी ज़ोरे सेइं ज़ोने लगगे, “हे यीशु, दाऊद राज़ेरा मट्ठा*! मीं पुड़ दया केर!” 48 त बडे लोकेई तै डांटो कि, “चुप रा।” पन तै पेइले केरां जादे चिन्डां मारने लगगे, “हे दाऊद राज़ेरा मट्ठा, मीं पुड़ दया केर!” 49 तैखन यीशुए रुकतां लोकन सेइं ज़ोवं, “तुस तैस इरां कुजाथ।” लोकेई तै कानो कुजेइतां तैस सेइं ज़ोवं, “हिम्मत रख! उठ! यीशु तीं एप्पू कां कुजाने लगगोरेन।” 50 तै अपनि च़ादर श़ैरतां लूशी उठो, ते यीशु कां अव। 51 तैखन यीशुए तैस पुच्छू, “तीं कुन लोडते कि अवं तेरे लेइ केरि?” काने मैने जुवाब दित्तो, “हे गुरु, अवं लानू चाताई।” 52 तैखन यीशुए तैस सेइं ज़ोवं, “तू गा। तीं मीं पुड़ विश्वास कियूं एल्हेरेलेइ अवं तीं बज्झाताई।” अकदम तै लाने लगगे त कने यीशु पत्ती च़लो।

11

२२२२ २२२२२२२२ २२२२ २२२ २२२२
(२२२२२ 21:1-11; २२२२ 19:28-40; २२२२२२२ 12:12-19)

1 ज़ैखन यीशु त तैसेरे चले यरूशलेम नगरेरे नेडे आए, त तैखन ज़ैतून नंव्वेरे पहाड़ेरे नेडे, बैतफगे त कने बैतनिय्याह इलोव्वन कां पुज्जे। तैखन यीशुए अपने चलन मरां दुइयन सेइं एन ज़ोइतां पेइले भेजे कि, 2 “अपने सामनेबाले इलोव्वे मां गाथ। तैडी पुजते तुसन अक गैधेरो बच्चो बंधोरो मैलेलो, ज़ैस पुड़ कधी कोई नई च़ढोरो। तैस खोलतां इडी मीं कां आनां। 3 अगर तुसन कोई पुच्छे, ‘किजो एन केरने लगगोरेथ?’ त तैस सेइं ज़ोइयथ, ‘प्रभुए एसेरी ज़रूरत आए।’ त तै अकदम गधेरे बच्चे तुसन सेइं साथी इडी भेजेलो।” 4 तैना दूई चले तैस इलोव्वे मां जे। तैडी गैधेरो बच्चो एक्के घेरेरे दारे बेइर बंधोरो लाव, त तैना तैस खोलने लगगे। 5 ज़ैना तैडी खडे थिये, तैन मरां किछ मैनेई तैन पुच्छू, “एन कुन केरने लगगोरेथ, गधेरे बच्चे किजो खोलने लगगोरेथ?” 6 ज़ेन्चरां

* 10:47 10:47 दाऊद राज़ेरू मट्टू: यहूदी लोक ज़ानते थिये कि परमेशेरे तरफां एजनेबालो मसीह, दाऊद राज़ेरे खानदाने मरां भोलो। एस विश्वासे सेइं तैनी काने मैने यीशु एन्चरां कुजाव कि दाऊद राज़ेरा मट्ठा।

यीशुए अपने चलन सेइं जोरू थियूं, तेन्चरां तैनेईं तैन मैनन् सेइं ज़ोवं। तैखन तैन मैनेईं चले तैट्ठां गाने दित्ते। 7 यीशुएरे चलेईं बच्चो यीशु कां एन्तां यीशुए तैस पुड़ विशालनेरे लेइ, तैस पुड़ अपने लिगड़ां छुड़डो। त यीशु तैस पुड़ बिश्शो (त तैना यरूशलेम नगरेरे पासो जो चलने लगगे)। 8 तैखन बडे लोकेईं (तैसेरी इज्जत केरनेरे लेईं) अपना लिगड़ां बत्ती मां बिच्छां त कने किच्छ, मैनेईं पटलनबाली डैलडी एन्तां बत्ती मां बिच्छेईं। 9 जैना यीशुएरे अग्री-अग्री त कने पत्ती-पत्ती चलने लगगोरे थिये, तैना खुशी सेइं ज़ोरे सेइं ज़ोने लगगे, “होशाना! (परमेशेरी तारीफ़ भोए) परमेश तैस बरकत दे, जै परभु-परमेशेरे अधिकारे सेइं साथी एज्जी राओरोए!” 10 “परमेश तै आशिर्वाद दे, जैखन तू इश्शे पड़दादे दाऊदेरू राजेरू जेरू राज* केरे! परमेशेरी होशाना (तारीफ़) भोए, जै उच्चे स्वर्गे मां आए!” 11 तैल्ला पत्ती, तैन लोकन सेइं साथी, यीशु यरूशलेम नगरी मां पुज्तां मन्दरे मां जेव। यीशु मन्दरे मां च़ेवरे पासन तककू कि जैन तैडी भोइ राओरू थियूं। तै अपने 12 चलन सेइं साथी नगरे मरां निस्तां, राती विशनेरे लेइ बैतनिय्याह इलोव्वे जो वापस च़लो जेव, किजोकि इलोझ भोइ जोरी थी।

ⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ
(ⓂⓂⓂⓂⓂⓂ 21:18-19)

12 त एग्री दिहाड़ी, जैखन यीशु त तैसेरे चले बैतनिय्याह इलोव्वेरां निस्तां यरूशलेम नगरे जो वापस एज्जी राओरे थिये, तैखन यीशुए ढलुख लगगी। 13 तै दूरेरां फ़ेगेरो अक नीलो बुट लेइतां तैसेरे नेडे जेव कि खाने जो शायद तैस मां किच्छ मैल्ले। पन, जैखन तै बुटे कां जेव, त तैडी पटलां केरे अलावा तैस किच्छ न मैल्लू, किजोकि तै फल्लेरो मौसम न थियो। 14 तैखन यीशुए तैस बुटे फिटकार देइतां तैस सेइं ज़ोवं, “हुन्नेरे पत्ती, तीं मां कोई फल कधी न लगगलो!” त तैसेरे चले एन शुनी राओरे थिये।

ⓂⓂⓂⓂ ⓂⓂⓂⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ
(ⓂⓂⓂⓂⓂⓂ 21:12-17; ⓂⓂⓂⓂⓂ 19:45-48; ⓂⓂⓂⓂⓂⓂⓂⓂ 2:13-22)

15 तैल्ला पत्ती, तैना फिरी यरूशलेम नगरे मां पुज्जे, त यीशु मन्दरेरे अंगने मां जेव। तैडी लोक जानवरां केरू त कने मन्दरे मां च़ाढनेरू सामान धिन्नेरू त कने बेचनेरो कारोबार केरि राओरे थिये। यीशु तैनन् बेइर कढने लगो, ते तैनी तैडी पेंडसे बदलनेबालन† केरे मेज़न त कने कबूतर बेचनेबालन केरि कुर्सी उलटेइ दित्ती। 16 त मन्दरेरी ठैरी मां केन्ची बेचनेरे लेइ कोई चीज़ एन्तां चलने न दित्तू। 17 तैखन यीशुए तैन लोकन शिक्षा देइतां ज़ोवं, “परमेशेरी किताबी मां एस मन्दरेरे बारे मां एन लिखोरूए कि परमेशेरे ज़ोवं, मेरू मन्दर सैरी कौमां केरे लोकां केरे लेइ प्रार्थनारू घर भोलू! पन तुस लोकेईं इन मन्दर डैकू केरो अड्डो बनोरोए।” 18 एन शुन्तां प्रधान याजक त कने शास्त्री लोक यीशु कल्ल केरनेरो मौको तोपने लगगे। पन तैना यीशु केरां डरते थिये, किजोकि सारे लोक तैसेरी शिक्षाई शुन्तां हैरान भोते थिये। 19 जैखन इलोझ भोइ, त यीशु त तैसेरे चले (रात गुज़ारनेरे लेइ) नगरेरां बेइर च़ेलि जे।

ⓂⓂⓂⓂⓂⓂⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂⓂⓂⓂⓂ
(ⓂⓂⓂⓂⓂⓂ 21:20-22)

20 एग्री दिहाड़ी, ज़ेज्ज़ां यीशु त तैसेरे चले तैट्ठां यरूशलेम नगरे जो च़ले त तैनेईं तै फ़ेगेरो बुट लाव, जैस यीशुए पेइले फिटकार दित्तोरो थियो। तै बुट ज़ीलन तगर शुक्की जोरो थियो। 21 पतरसे तै गल याद आई कि यीशुए एस बुटे फिटकार दित्तोरो थियो, त तैनी यीशु सेइं ज़ोवं, “हे गुरू, तक! ए फ़ेगेरो बुट जैस तीं फिटकार दित्तोरो थियो, शुक्की जोरोए! (एन केन्चरां भोवं)” 22 यीशुए अपने चलन जुवाब दित्तो, “तुस परमेशेरे पुड़ विश्वास रखा। 23 अवं तुसन सेइं सन्न ज़ोताई कि जै कोई एस पहाड़े सेइं ज़ोए, ‘तू उखड़तां समुन्दरे मां बिच्छड़ी गा,’ त एन्चरां ज़ोइतां अपने दिले मां शक न केरे, पन विश्वास केरे कि ‘जैन अवं ज़ोतईं तैन भोइ गालू,’ त तैसेरेलेइ तैन्ने भोलू। 24 एल्हेरेलेइ अवं तुसन सेइं ज़ोतईं कि, जैखन तुस प्रार्थना केरतां परमेशेरे केरां जैन भी मगले, त विश्वास केरा कि तुसन तैन ज़रूर मैल्ली गालू, तैखन परमेशेरे केरां तैन तुसन दित्तू गालू। 25 ते जैखन कधी तुस खड़े भोइतां परमेशेरे कां प्रार्थना केरतथ, त अगर तुसन केन्ची सेइं गिलो भोए, त पेइले तुस तैस माफ़ केरा, ताके तुश्शो

* 11:10 11:10 बडे पेइले परमेशेरे दाऊद राजे सेइं ए वादो कियोरो थियो कि तैसेरी औलादी मां अक मैन्हु राजो भोइतां हमेशेरे लेइ परमेशेरे लोकन पुड़ राज केरेलो। एल्हेरेलेइ, सारे लोक तैस राजेरे लेइ इंतज़ार केरि राओरे थिये। यीशु मसीह जै आए तैए तै राजो आए। † 11:15 11:15 जैन पेंडसे लोकन मन्दरे मां आनतन, तैन मां रोमी सरकारेरे राजेरी शकल भोती थी। एल्हेरेलेइ तैन पेंडसे मन्दरे मां इस्तेमाल न थिये करते। मन्दरे मां इस्तेमाल केरनेरे लेइ अलग पेंडसे रखते थिये। तैस पेंडसे सेइं बलिदाना केरि चीज़ां धिन्ते थिये।

स्वर्गेरो बाजी भी तुशशे पाप माफ़ केरे। 26 अगर तुस होरि लोकन माफ़ न केरथ, त तुशशो बाजी परमेशर भी, ज़ै स्वर्गे मां आए, तुशशे पाप माफ़ न केरेलो।”

([मरकुस 21:23-27](#); [मरकुस 20:1-8](#))

27 तैल्ला पत्ती, यीशु त तैसेरे चेले फिरी यरूशलेम नगरे मां आए। ज़ैखन यीशु मन्देरे अंगने मामेइ हंठने लगगोरो थियो, त तैखन प्रधान याजक त कने शास्त्री त कने यहूदी लोकां केरे बुजुर्ग तैस कां आए, त तैस सवाल पुछ्छने लग्गे, 28 “तू एन कम्मांः कोस अधिकारे सेइं केरतस, त कने एन कम्मां केरनेरो तीं केनि अधिकार दित्तोरोए?” 29 पन यीशुए तैन सेइं ज़ोवं, “अवं भी तुसन अक सवाल पुछ्छतई। मीं तैसेरो जुवाब देथ, तैखन अवं भी तुसन ज़ोलो कि अवं एन कम्मां कोस अधिकारे सेइं केरतई। 30 मीं जुवाब देथ। यहून्ना ज़ै बपतिस्मो देनेबालो थियो, तैस बपतिस्मो देनेरो अधिकार कोट्टां मैल्लो, परमेशेरी तरफां मैल्लो या मैन्हु केरि तरफां?” 31 तैखन तैना एप्पू मामेइं गलबात केरने लग्गे कि, “अगर अस ज़ोम कि, ‘परमेशेरी तरफां मैल्लो,’ त एनी पुछ्छनूए कि, ‘फिरी तुसेईं तैसेरो विश्वास की न कियो?’” 32 पन अस एन भी नईं ज़ोईं सकम कि, ‘यहून्ना अधिकार, मैन्हु केरि तरफां मैल्लो,’ किजोकि असन लोकां केरो डर आए कि तैना असन पुड़ क्रोध केरले, किजोकि सारे लोक समझते थिये कि सच्चे यहून्ना नबी आए।” 33 एल्हेरेलेइ तैनेईं यीशु एन जुवाब दित्तो कि, “असन नईं पतो।” यीशुए तैन सेइं ज़ोवं, “अवं भी तुसन सेइं न ज़ोईं कि अवं एन कम्मां कोस अधिकारे सेइं केरतई।”

12

([मरकुस 21:33-46](#); [मरकुस 20:9-19](#))

1 तैल्ला पत्ती, यीशु यहूदी लोकां केरे लीडरन सेइं मिसालन मां गल्लां केरने लग्गे, “एक्सां, एक्की मैने दाछ्छरी बाग लाई, ते बागारे चेवरे पासन बाड़ दित्तो, त दाछ्छारो रस कढनेरे लेइ कुण्ड बनावं, ते तैनी तैस बागारी रखवाली केरनेरे लेइ अक उच्ची कूड़ी बनाई। तैल्ला पत्ती, तै मैन्हु तैस बागारो ठेको किछ्छ ज़मीनदारन देइतां होरि मुल्खे जो ज़लो जेव। 2 ज़ैखन फल्लेरो मौसम अव, त तैनी ज़मीनदारन कां अक नौकर भेजो कि ज़मीनदारन केरां दाछ्छारे बागारे फल्लां केरो अपनो हिस्सो आने। 3 पन ज़ैखन तै नौकर बागी मां पुज्जो, त तैन किसानेईं तै टलेइतां मड्डो त खाली हथ्येइं वापस भेजो। 4 ज़ैखन बागारे मालिके शुनू कि तैनेईं एन कुन कियूं, त तैनी होरो अक नौकर फिरी भेजो। पन तैनेईं तैसेरो भी दोग बन्नो ते तैसेरी बेजती केरतां भेजो दित्तो। 5 फिरी तैनी मालिके होरो अक नौकर तैन कां भेजो। तैनेईं तै भी मैरी छ्छड्डो। तैखन तैनी होरे जादे नौकर भेजे। तैन मरां तैनेईं किछ्छ मड्डे, ते किछ्छ मारे। 6 तैस मालिके कां अक्के रेवरो थियो, ज़ैन तैसेरू ट्लारू मट्टू थियूं। आखरी मां, तैनी तै भी तैन कां एन सोचतां भेजो कि तैना मेरे मट्टेरी इज्जत केरले। 7 पन ज़ैखन मालिकेरू मट्टू तैन कां अव, त तैन किसानेईं एप्पू मामेइं ज़ोवं, ‘ए त एस बागारो वारिस आए। एज्जा, अस एस भी मैरी छ्छड्डम, तैखन एसेरी जेइदात इश्शी भोनी।’ 8 एल्हेरेलेइ, तैनेईं तै टलेइतां मैरी छ्छड्डो, ते बागारे बेइर शेरी छ्छड्डो।” 9 तैखन यीशुए तैन मैनन् पुच्छ्छ, “हुनी बागारो मालिक तैन ज़मीनदारन सेइं कुन केरेलो? अवं ज़ोतईं कि तैनी कुन केरनू, तै एइतां तैन किसानां केरो नाश केरेलो, ते बागारो ठेको होरि केन्ची ज़मीनदारन देलो*!”

10 “कुन तुसेईं पवित्रशास्त्रे मां मसीहेरे बारे मां ई गल नईं पढोरी? तैस मां लिखोरूए कि, ज़ै घोड़ राज-मिस्त्रेईं निकम्मो ठहरेवरो थियो, तै मकानेरो खास घोड़ बेनि जेव।

11 एन प्रभु परमेशेरी तरफां एन्त्ररां भोव, ते कने इश्शी नज़री मां ए हैरान भोनेरी गल आए!”

‡ 11:28 11:28 एन कम्मांमतलब कि, यीशुए पेइले मन्देरे मरां बुपारिन बेइर कढे। तैस कम्मेरे बारे मां तैना यीशु करां सवाल पुछ्छतन। * 12:9 12:9 एस मिसाली मां, बागारो मालिक परमेशर आए, त बुरे किसान यहूदी लोक त कने तैन केरे लीडर आन, त फल्लेरो मतलब परमेशेरी गल्लन पुड़ ज़लनेबाली ज़िन्दगी, त मालिकेरे नौकर तैना आन, ज़ैना परमेशेरे गल्लां ज़ोनेबालेन, त मालिकेरू मट्टू, यीशु मसीह आए। त तै मालिक तैन ज़मीनदारन सज़ा देते, मतलब कि परमेशर यहूदी लोकन सज़ा देलो। त होरे किसान गैर-यहूदी लोक आन।

12 जैखन यहूदी लोकां केरे लीडरेई एन शुनू, त तैनेई सेमझी छड्डू कि यीशुए ई मिसाल इशशे खलाफ जोरीए। एल्हेरेलेइ, तैना सेरकोए। त तैनेई यीशु कैद केरनू चाव। पन तैना लोकन केरां डरे, एल्हेरेलेइ तैस छेडतां चेलि जे।

॥॥॥॥॥ ॥॥॥॥॥ ॥॥॥॥॥ ॥॥॥॥॥ ॥॥॥॥॥॥ ॥॥॥॥॥ ॥॥॥॥॥॥ ॥॥॥ ॥॥॥॥॥॥॥ ॥॥॥ ॥॥॥ ॥॥॥॥॥ ॥॥॥॥॥॥॥॥
(॥॥॥॥॥ 22:15-22; ॥॥॥॥॥ 20:20-26)

13 तैल्ला पत्ती, यहूदी लोकां केरे लीडरेई यीशु कां किछ फरीसी† लोक त कने हेरोदेस राजेरे लोक‡ भेजे, ताके तैना यीशुए अपनि गल्लन मां फसान। 14 तैनेई यीशु कां एइतां तैस सेइं ज़ोवं, “हे गुरु, अस ज्ञानतम कि तू सच्चो आस, त केन्चेरी परवाह न केरस, किजोकि तू सारे मेनन् बराबर समझतस, त तू परमेशेरी गल्लां लोकन सच्चोई सेइं शुनातस। एल्हेरेलेइ असन ज़ो, कुन रोम-मुल्खेरे महाराजे जो चुंगी देनी जेइज आए कि नई? 15 अस देम या न देम?” यीशुए तैन केरू पाखंड ज़ेनतां तैन सेइं ज़ोवं, “मीं किजो अज़मातथ? अक सिक्को (दीनार) मीं कां आनां कि अवं तैस हेरी।” 16 तैनेई आनो, तैखन यीशुए तैन पुच्छू, “इस सिक्के पुड़ केसेरी शकल त केसेरू नवं आए?” तैनेई जुवाब दित्तो, “महाराजेरू आए।” 17 यीशुए तैन सेइं ज़ोवं, “जैन महाराजेरू आए तैन बड्डे राजे देथ, ते ज़ैन परमेशेरेरू आए तैन परमेशेरे देथ।” जैखन फरीसी लोकेई ते कने हेरोदेस राजेरे लोकेई एन शुनू, त तैखन तैना बडे हैरान भोए।

॥॥॥॥॥ ॥॥॥ ॥॥ ॥॥॥॥॥ ॥॥॥॥॥॥ ॥॥॥॥॥ ॥॥ ॥॥॥॥॥॥॥ ॥॥॥॥॥॥ ॥ ॥॥॥॥॥
(॥॥॥॥॥ 22:23-33; ॥॥॥॥॥ 20:27-40)

18 तैल्ला पत्ती, सद्की लोक यीशु कां आए। तैना ज़ोतन मुडदे ज़ीते न भोन। त तैनेई यीशु पुच्छू, 19 “हे गुरु, बडे पेइले मूसे असन जो कानूने मां लिखेरू थियूं कि अगर कोई मैन्हु बेऔलाद मेरि गाए त तैसेरी कुआन्श रेइ गाए, त तैसेरो ढला तैसेरी लैडी सेइं इला बनाए, त अपने ढलाएरे लेइ औलाद पैदा केरे, ताके तैसेरी खानदानी राए। 20 सत ढला थिये। पेइलो ढला इला बनेइतां बेऔलाद मेरि जेव। 21 तैखन दुइयोवं ढलाए तैस कुआन्शी सेइं इला बनाव। तै भी बेऔलाद मेरि जेव। तेन्चरां टलेइयोवं ढलाए भी कियूं। 22 त सते ढलाएई तैस कुआन्शी सेइं एक्केरे पत्ती एक्के इला कियो, पन औलाद न भोइ। सैरेन पत्ती तै कुआन्श भी मेरि जेई। 23 एल्हेरेलेइ, परमेशर लोक मुडदन मरां ज़ीते केरनेरे पत्ती, यानी जैखन लोक ज़ीते भोले, त तैखन तै कुआन्श तैन सत्तन मरां केसेरी लाडी भोली? किजोकि तै इडी धेरती पुड़ सत्तां केरि लाडी भोरी थी।”

24 यीशुए तैन सेइं ज़ोवं, “तुशशी सोच केतरी गलत आए! कुन तुसन पतो किजो? किजोकि तुस पवित्त्रशास्त्रे मां लिखेरी गल्लन त कने परमेशेरी शक्ति न ज्ञानथ! 25 तुसेईं जै कहानी ज़ोई, तैस मां तै कुआन्श तैन सत्तन मरां केन्चेरी लाडी नई भोनी, किजोकि जैखन लोक मुडदन मरां ज़ीते भोले, त तैखन कोई केन्ची सेइं इला न बनालो, पन तैना स्वर्गे मां परमेशेरेरे स्वर्गदूतां केरे ज़ेरे भोले, ज़ैना इला न बनान। 26 मुडदां केरे ज़ीतो भोनेरे बारे मां, कुन तुसेईं मूसेरी किताबी मां एन नई पढेरू जैखन मूसे बलतू झैल्ल लाव, तैखन (यानी अब्राहम, इसहाक त याकूब मरनेरे बडे सालना पत्ती) परमेशेरे मूसा सेइं ज़ोवं, ‘अवं अब्राहमेरो परमेशर, ते इसहाकेरो परमेशर, ते याकूबेरो परमेशर आई?’ 27 परमेशर मुडदां केरो परमेशर नई, पन ज़ीतां केरो परमेशर आए, एल्हेरेलेइ तुशशी सोच बिलकुल गलत आए।”

॥॥॥॥॥॥॥॥॥ ॥॥॥ ॥॥॥॥॥॥
(॥॥॥॥॥ 22:34-40; ॥॥॥॥॥ 10:25-28)

28 तैखन शास्त्री लोकन मरां एक्की मैने एजतां यीशु ते सद्की लोकां केरि गलबात शुनी। तैस पतो चलो कि यीशुए तैनन् ठीक जुवाब दित्तो, ते तैनी यीशु कां एइतां तैस पुच्छू, “परमेशेरेरे सारे हुकमन मरां बड्डे खास हुकम को आए?” 29 यीशुए तैस जुवाब दित्तो, “सारे हुकमन मरां बड्डे खास हुकम ई आए, जेन्चरां परमेशेरी किताबी मां लिखेरूए कि, ‘हे इस्राएलेरे लोकव शुना, प्रभु इशशो परमेशर, अक्के प्रभु आए, 30 एल्हेरेलेइ प्रभु अपने परमेशेरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अक्ली सेइं, त अपनि सैरी ताकती सेइं प्यार केरा।’ ए बड्डे खास हुकम आए। 31 तैसेरो ज़ेरो दुइयोवं बड्डे खास हुकम ई भी आए कि, ‘तू अपने पेड़ोसन*’

† 12:13 12:13 फरीसी लोक सोचते थिये कि रोम-मुल्खेरे बड्डे राजे जो चुंगी देनी गलत आए। ‡ 12:13 12:13 हेरोदेस राजेरे लोक सोचते थिये कि रोम-मुल्खेरे बड्डे राजे जो चुंगी देनी ठीक आए। § 12:27 12:27 किजोकि ज़ैना इस धेरती पुड़ मेरि गातन, तैना परमेशेरे सेइं साथी ज़ीते भोइ गानेन! एस सेइं एन सावत भोते कि परमेशर लोकन मुडदन मरां ज़ीतो केरेलो। * 12:31 12:31 पड्डोसी सेइं: मतलब कि होरे सारे मैनन् सेइं प्यार केरनोए।

सेइं अपने बराबर प्यार केर ।' एन दूई हुक्मन केरां होरो कोई भी बड्डो हुक्म नई ।”

32 तैखन शास्त्री मैन्हु यीशु सेइं ज़ोवं, “हे गुरु, तीं बडू ठीक ज़ोवं! त तीं सच्च ज़ोवं कि परमेशर अक्के आए, ते तैसेरे अलावा होरो कोई नई। 33 त असेईं परमेशरे सेइं अपने सारे दिले सेइं, ते अपनि सैरी जानी सेइं, ते अपनि सैरी अक्ली सेइं, त अपनि सैरी ताकती सेइं प्यार कियोरो लोड़े। ते कने असेईं अपने पेड़ोसन सेइं अपने बराबर प्यार कियोरो लोड़े। जानवरां केरू बलिदान केरनू या होरि चीजां केरि चढ़तल चढ़ने करां भी बेधतां, एना दुइये हुक्मन मन्ने परमेशरेरे लेइ बडे खास आन!” 34 ज़ैखन यीशुए हेरू कि तैनी अक्ली सेइं जुवाब दित्तो, त तैनी तैस सेइं ज़ोवं, “तू परमेशरेरे राज़े मां दाखल भोने करां दूर नई।” ते तैल्ला पत्ती, केन्ची यीशु किछ पुछ्छनेरी हिम्मत न भोइ ।

[\[2222 2222222 2222222 2222 222 2222 22 2222 2222222\]](#)
([222222 22:41-46](#); [2222 20:41-44](#))

35 मन्दरे मां शिक्षा देते बार यीशुए लोकन अक सवाल पुच्छो, “शास्त्री किजो ज़ोतन कि ज़ै मसीह आए, तै दाऊद-राजेरी औलादी मरां भोलो? 36 बडे पेइले दाऊद राजे एप्पू पवित्र आत्मार शक्ति सेइं एन्चरां ज़ोरू थियूं कि, प्रभु परमेशरे मेरे प्रभु मसीहे सेइं ज़ोवं, ‘तू मेरे देइने पासे बिश, ज़ांतगर कि अवं तेरे दुश्मन बिलकुल न हारेई।’ 37 दाऊद राजे त एप्पू मसीहेरे बारे मां एन ज़ोवं कि ‘तै मेरो प्रभु आए,’ फिरी मसीह तैसेरू मट्टू केन्चरां भोइ सकते?” त मैन्हु केरि भीड़ यीशुएरी गल्लां खुशी सेइं शुन्ती थी ।

[\[22222222 2222222 2222 222222 222\]](#)
([222222 23:1-36](#); [2222 20:45-47](#))

38 यीशुए शिक्षा देते बार लोकन सेइं ज़ोवं, “शास्त्री लोकन करां खबरदार राथ, ज़ैना लम्मे-लम्मे चोले लेइतां हन्टनू चातन, ताके लोक समझन कि तैना बडे धर्मी आन, त तैना चातन कि बज़ारन मां लोक असन बडी इज़्जती सेइं नमस्कार केरन । 39 त कने प्रार्थना घरन मां बडे खास मैन्हु केरे लेइ रख्वोरी कुर्सी पुड़ बिशनू चातन, त धामन मां भी गोइतां बडे खास मैन्हु केरे लेइ रख्वोरी कुर्सी पुड़ बिशनू चातन । 40 तैना विधवां केरे घरन लुटतन त कने होरि मैनन् हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बडे धर्मी आन । परमेशर तैनन् बडी जादे सज़ा देलो!”

[\[22 2222 22222 2222222222 222\]](#)
([22222 21:1-4](#))

41 लोकन शिक्षा देनेरे पत्ती, यीशु मन्दरेरे दान-पेट्टेरे सामने बिशतां एन तकने लगगोरो थियो कि, लोक दान-पेट्टी मां केन्चरां पेंडसे छडतन । बडे मैनेई, ज़ैना अमीर थिये, तैडी एइतां तैस मां बडे पेंडसे छडने लगगोरे थिये । 42 तैखन अक गरीब विधवां एइतां दूई सिक्के छड्डे, ज़ैन केरि कीमत बडी घट थी । 43 ज़ैखन यीशुए तैन हेरू, तैनी अपने चले एप्पू कां कुजेइतां तैन सेइं ज़ोवं, “अवं तुसन सेइं सच्च ज़ोतई कि मन्दरेरे दान-पेट्टी मां पेंडसे छडनेबालन मरां, एस गरीब विधवां तैन सारे मैनन् करां जादे छड्डोरेन । 44 किजोकि तैन सैरेई अपने जादे पेंडसन मरां थोड़े ज़ेरे छड्डे, पन ए विधवा त बडी गरीबी आए, फिरी भी तैसां सब किछ ज़ैन तैस कां थियूं छेड्डी दित्तू, यानी अपनि ज़रूरतरे लेइ रख्वोरे पेंडसे भी छेड्डी दित्तै!”

13

[\[2222 22222 22 22222222 2222222 2222222222 222 222 222222\]](#)
([222222 24:1-2](#); [2222 21:5-6](#))

1 ज़ैखन यीशु त तैसेरे चले मन्दरे मरां निस्सी राओरे थिये, तैखन तैसेरे चलन मरां एक्के तैस सेइं ज़ोवं, “हे गुरु, इडी हेर! केत्रे बड्डे-बड्डे घोड़न सेइं बनोरी दिवारां कने केत्रू रोड़े भवन आए!” 2 यीशुए तैन सेइं ज़ोवं, “हुन्ना त तुस एना बड्डे-बड्डे घोड़न सेइं बनोरे भवनन लातथ, पन एक्की दिहाड़े इडी घोड़े पुड़ घोड़ भी न रालो, यानी सब नाश भोइ गालू!”

[\[2222 22222 2222222 2222, 22 2222 2 222, 222222 22222 22222 2222222222 222\]](#)
([222222 24:3-14](#); [2222 21:7-19](#))

3 तैल्ला पत्ती, यीशु ज़ैतून नव्वेरे पहैडी पुड़ चढ़ता पार मन्दरेरे सामने बिशो । तैखन पतरस, याकूब, यूहन्ना ते अन्दरयास यीशु कां अलग गोइतां तैस केरां पुछ्छने लगगे, 4 “असन ज़ो कि एना गल्लां केइस भोनिन? तैन

दिहाडी केरो कुन निशान आए, जैखन एना सब गल्लां पूरी भोनिन?" 5 तैखन यीशु तैन सेइं ज़ोने लगो, "खबरदार राथ कि कोई तुसन धोखो न दे। 6 किजोकि बड़े मैन्हु मेरे नंवे सेइं एइतां ज़ोले कि, 'अवं मसीह आई।' ते तैना बड़े मैन्हु धोखो देले। 7 जैखन तुस लड़ाई ते कने लड़ाइयां केरि अफवाह शुनेले, त तुस घबरेइयथ न, किजोकि लड़ाइयां केरू भोनू ज़रूरी आए, पन एस दुनियारो अन्त अकदम न भोलो। 8 किजोकि एक्की जातारे लोक होरि कौमरे लोकां केरे खलाफ लड़ाई केरले, त अक मुलख होरि मुल्खेरे खलाफ लड़ाई केरेलो। हर टैरी भुंजल एज्जले, त काल पेलो। एन सब त सिर्फ मुसीबतां केरि शुरुआत आए।

9 "पन तुस अपने बारे मां खबरदार राथ, किजोकि लोक तुसन सभां केरे हवाले केरले, प्रार्थना घरन मां नेइतां मड्डले, त तुस मेरे वजाई सेइं गवर्नरन ते कने राजन कां खड़े किये गाले, ताके तुस तैन केरे सामने मेरे गवाह भोथ। 10 पन इस युगगेरो अन्त भोनेरे पेइले एरू भोनू ज़रूरी आए कि परमेशरेरे राज्जेरे बारे मां खुशखबरी सैरी कौमां केरे लोकन शुनेई गाए।"

11 जैखन लोक तुसन नेइतां आदालतां केरे हवाले केरले, त पेइले फिक्र न केरथ त न सोचथ कि अस कुन ज़ोमेले, पन जैन किछ परमेशर तुसन तैस घड़ी ज़ोनेरे लेइ ज़ोवं गालू, तैन्ने ज़ोइयथ। किजोकि ज़ोनेबाले तुस नई, पन पवित्र आत्मा तुशे ज़िरिये ज़ोलो। 12 ढला (जै मीं पुइ विश्वास न केरे, तै) अपने ढलाए मरानेरे लेई हवाले केरेलो। त बाजी भी अपने मट्टे तेन्चरां हवाले केरेलो, ते बच्चे अपने हाज-बव्वेरे खलाफ भोइतां तैननू मैरी छुडेले। 13 मीं पुइ विश्वास केनेरे वजाई सेइं सारे लोक तुसन सेइं नफरत केरले, पन जै मरने तगर विश्वासे मां बनरो रालो, तैस परमेशर मुक्ति देलो।

ॐॐॐॐ ॐॐॐॐ ॐॐॐॐ ॐॐॐॐॐॐॐॐ ॐॐॐॐ ॐॐॐ ॐॐॐॐॐॐॐॐ
(ॐॐॐॐॐॐ 24:15-28; ॐॐॐॐ 21:20-24)

14 तैल्ला पत्ती, यीशुए तैन सेइं ज़ोवं, "बड़ी बुरी गंदी चीज़, जै नाश केरचे, एजनेबाली आए। तै भिट्टी चीज़ तैस जगाई पुइ खड़ी भोली, जेडी तैसारू खडू भोनू जेइज नई। बड़े पेइले दानिय्येल नेबे तैस चीजेरे बारे मां ज़ोरू थियूं। (जै कोई एन पढ़े, तै ए गल समझे।) जैखन तुस तै चीज़ी तैडी खड़ी लाएले, त तैखन जैना लोक यहूदिया इलाके मां रातन, तैना बच्चनेरे लेइ पहाड़न पुइ नेश्शी गान। 15 ते अगर कोई मैन्हु अपने घरेरे छते पुइ भोलो, त तै अकदम तैट्टां नेश्शी गाए, ते अपने घरेरां किछ नेने अन्तर न गाए (ताके वक्त बरबाद न भोए)। 16 ते अगर कोई मैन्हु ऊडारे मां कम केरि राओरो भोलो, त तै भी अकदम तैट्टां नेश्शी गाए। तै अपना लिगडां भी नेनेरे लेइ पत्रोवं न एज्जे। 17 तैन दिहाड़न मां जैना दोज़ींती त दुद्ध पियाती कुआन्शां भोली, तैन केरे लेइ अफ़सोस! (किजोकि तैन केरे लेइ बड़ी मुश्किल भोली।) 18 ते तुस प्रार्थना केरा कि एन हियूतडेरे दिहाड़न मां न भोए। 19 किजोकि तैन दिहाड़न मां लोकन बड़ी मुसीबत भोली, कि दुनितयारी शुरुआती केरां देंती जैन परमेशरे बनोरीए, अज तगर एरी मुसीबत नई ओरी। ते एरी ज़ेरि मुसीबत फिरी कधी न भोली।"

20 "अगर प्रभु परमेशर तैन मुसीबतेरी दिहाड़न न घटाए, त कोई मैन्हु भी न बचलो। पन परमेशर अपने चुनोरे लोकां केरे वजाई सेइं तैन दिहाड़न घटालो। 21 तैस मुसीबतेरे दिहाड़न मां, अगर कोई तुसन सेइं ज़ोए कि, 'तक्का, मसीह इडी आए!' या 'तक्का, उडी आए!' त विश्वास न केरथ। 22 किजोकि झूठे मसीह ते कने झूठे नबी एज्जले। तैना लोकन धोखो देनेरे लेइ निशान ते कने चमत्कारेरां कम्मां हिराले, कि अगर भोइ सके, त तैना परमेशरेरे चुनोरे लोकन भी धोखो देले। 23 एल्हेरेलेइ, तुस होशियार राथ! हेरा, मीं तुसन सैरी गल्लां भोनेरे पेइले ही ज़ोरिन।"

ॐॐॐॐ ॐॐॐॐ ॐॐॐॐ ॐॐॐॐॐॐॐॐ ॐॐॐॐ ॐॐॐ ॐ ॐॐॐ ॐॐॐॐॐॐॐॐॐ ॐॐॐॐॐॐॐॐ ॐॐॐॐ ॐॐॐॐ
(ॐॐॐॐॐॐ 24:29-31; ॐॐॐॐ 21:25-28)

24 तैल्ला पत्ती, यीशुए तैन सेइं ज़ोवं, "तैन दिहाड़न मां, तैस मुसीबतेरे वक्तेरे पत्ती, दिहाड़ो कालो भोइ गालो, त चाँदनी लौ न देली, 25 त अम्बरेरां तारे बिछड़ने लग्गले, त अम्बरेरी सैरी शेक्ति* हिल्लेली।"

* 13:25 13:25 शेक्ति: मतलब कि शैतान त कने शैतानेरी दुष्ट फौज

26 “तैखन लोक मैनेरे मट्ठे (यानी मीं) बड़ी शेक्ति त कने बड़ी महिमा सेइं साथी धेरती पुड़ जो बिदलारी मां एजते हेरेले। 27 तैखन अवं अपने स्वर्गदूतन सारी दुनियाई मां भेजतां धेरतारे हर पासेरां अपने चुनोरे लोकन अकोट्ठे केरेलो।”

[\[२२२२२२२२ २२२२२ २२२२२२ २२ २२२ २२२२२२२\]](#)
([२२२२२२ २४:३२-३५](#); [२२२२२ २१:२९-३३](#))

28 तैल्ला पत्ती, यीशुए तैन सेइं ज़ोवं, “फेगोरे बुटेरे मिसाले केरां अक सबक शिख्वा! जैखन तैसेरी डैलड़ी नरम भोइतां, त नंव्वां पट्लां निस्ने लगतन, ते तुस बुज्झी छुडतथ कि गोमेरो मौसम एजनेबालो आए। 29 एसेरो जेरो, जैखन तुस एना गल्लां, जैना मीं ज़ोई, भोते हेरेले, त तुस बुज्झी छुडडा कि मैनेरू मट्ठू, यानी अवं बडे नेडे पुज्जोरोई। 30 अवं तुसन सेइं सच्च ज़ोतई कि ज़ांतगर एना सैरी गल्लां न भोली, तांतगर एना लोक, ज़ैना हुन्ना ज़ीतेन, तैना न मरेले। 31 अम्बर त कने धरती टेली गाली, पन मेरी गल्लां कधी न टेलेली।”

[\[२२२२२२२२ २२२२२ २२२२२२२ २२२ २२२२२२ २२२ २२२\]](#)
([२२२२२२ २४:३६-४४](#))

32 तैल्ला पत्ती, यीशुए तैन सेइं ज़ोवं, “मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन त परमेशेरू मट्ठू यानी अवं भी न ज़ैनी, पन सिर्फ मेरो बाजी परमेशर ज़ानते। 33 एल्हेरेलेइ, मेरे वापस एजनेरे लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि तै वक्त कताली एज्जलो। 34 मैनेरे मट्ठेरू, यानी मेरू वापस एजनु तैस मैनेरू ज़ेरू आए, ज़ै अपनू घर छेइतां होरे मुखे जो गाते। गाने केरां पेइले, तै अपने नौकरन कुजेइतां अपने घेरी रखवाली केरनेरो अधिकार देते, ते हर एक्की अपनू-अपनू कम देते, त दारे पुड़ रखवाली केरनेरे लेइ संतरी बीड़ो रानेरो हुक्म भी देते, किजोकि तै कधी भी वापस एज्जी सकते।”

35 “एसेरे जेरे, तुस भी हमेशा मेरे वापस एजनेरे लेइ तियार राथ, किजोकि तुस न ज़ानथ कि घेरो मालिक यानी अवं कताली वापस एज्जेलो। शायद इलोझी या एध्धी राती या कुकड़ेरे बांग देनेरे मौके या झेज्झां। 36 एल्हेरेलेइ तियार राथ! एरू न भोए कि अवं अचानक एइतां लेई कि तुस तियार नई। 37 ज़ैन अवं तुसन सेइं ज़ोतई, तैन्ने सारे मैनन् सेइं भी ज़ोतई कि, ‘हमेशा तियार राथ!’ ”

14

[\[२२२२२२ २२२२२२ २२२२२ २२२२२ २२२२२ २२२२२२२२२ २२२ २२२२२२ २२२२२२\]](#)
([२२२२२२ २६:१-५](#); [२२२२२ २२:१-२](#); [२२२२२२२२ ११:४५-५३](#))

1 फ़सहेरू तिहार त कने अखमीरी रोट्टारू तिहार दूई दिहाइन पत्ती एजनेबालां थियां। प्रधान याजक त कने शास्त्री मौको तोपने लगगोरे थिये कि अस यीशु केन्चरां चुपचारे ट्लाम ते तैस मैरी छुड्डम। 2 पन तैनेई एप्पू मांमेइं ज़ोवं कि, “अस तिहारेरे दिहाइन मां यीशुए कैद न केरम, किजोकि तैन दिहाइन मां बडे लोक च़ेवरे पासन भोतन, ते एरू न भोए कि यीशुएरे कैद भोनेरे वजाई सेइं लोकन मां दंगोफसाद भोइ गाए।”

[\[२२ २२२२२२२ २२२२२ २२२२२ २२२२२ २२२२२२२२ २२२२२२२ २२२२२२२ २२२२२२\]](#)
([२२२२२२ २६:६-१३](#); [२२२२२२२२ १२:१-८](#))

3 यीशु बैतनिय्याह इलोव्वे मां शमौन नंव्वेरे मैनेरे घरे मां थियो, ज़ैस पेइले कोद्वेरो रोग थियो। ज़ैखन यीशु तैड़ी रोट्टी खेइ राओरो थियो, त तैखन अक कुआन्श संगमरमेरे सेइं बनोरे भांडे मां इत्र एन्तां यीशु कां आई, ज़ै बड़ो कीमती थियो त कने ज़ैस जो जटामासी ज़ोतन। तैसां तै इत्र बोटल टलोइतां खोल्ली ते यीशुएरी इज्जत केरनेरे लेइ तैसेरे दोग्गे पुड़ इत्र उलटव। 4 पन किछ मैन्हु, ज़ैना तैड़ी खडे थिये, तैस कुआन्शी हेरतां अपने दिले मां सेरकोइतां एप्पू मांमेइं ज़ोने लगगे, “ए कुआन्श किजो एस बड़ी कीमतारो इत्र ज़ाया केरचे? 5 ए इत्र त एक्की सालेरी मज़दूरेरे पेंडसन केरां भी जादे भाए मां बेचतां, ते तैना पेंडसे गरीब मैनन् देइ सकती थी!” ते तैना सेरकोइतां तैस सेइं डांटने लगगे। 6 पन यीशुए तैन सेइं ज़ोवं, “एस छेइडी देथ! एस किजो तंग केरतथ? एसां त मीं सेइं भलाई कियोरीए। 7 गरीब मैन्हु त हमेशा तुसन सेइं साथी रातन। ज़ैखन भी तुस चाथ, तैखन तैन सेइं भलाई केरि सकतथ, पन अवं तुसन सेइं साथी हमेशा न रालो। 8 ज़ैन किछ ए कुआन्श केरि सकती थी, तैन एसां कियूं। एसां मेरी जानी पुड़ खुशबूदार तेल लेइतां मेरे मरनेरां पेइली मेरी जान दबनेरे लेई तियार कियोरीए। 9 अवं

तुसन सेइं सच्च ज़ोतईं कि सैरी दुनियाईं मां ज़ेड़ी कोन्ची मेरे बारे मां खुशखबरी लोकन शुनाईं गाली, तैड़ी ज़ैन कम एसां मीं सेइं कियोरूए तैन भी एसेरी यादी मां ज़ोवं गालू ।”

([मरकुस 26:14-16](#); [मरकुस 22:3-6](#))

10 तैल्ला पत्ती, यहूदा इस्करियोती, ज़ै 12 चेलन मरां अक थियो, प्रधान याजकन कां जेव कि तै यीशु ट्लुवानेरे लेइ तैन केरि मद्दत केरे । 11 एन शुन्तां तैना बड़े खुश भोए, ते तैसेरे मद्दतरे लेइ तैनेईं चैदेरे रुपेइये देनेरो वादो कियो । एल्हेरेलेइ, तै ठीक मौके बलगने लगो कि यीशु केन्चरां सेइं ट्लुवाए ।

([मरकुस 26:17-25](#); [मरकुस 22:7-14,21-23](#); [मरकुस 13:21-30](#))

12 तैखमीरी रोट्टारे तिहारेरी पेइली दिहाड़ी, ज़ैखन लोक फ़सहेरे तिहारेरे गबड़े बलिदान केरते थिये, तैखन यीशुएरे चलेईं तैस पुच्छू, “तू कोड़ि चातस कि अस गेइतां तेरे लेइ फ़सह तिहारेरी रोट्टी तियार केरम?” 13 तैखन यीशुए अपने दूई चले एन ज़ोइतां भेजे, “यरूशलेम नगरे मां गाथ, ते अक मैन्हु तुसन पैनेरो घडो छुवोरो मैलेलो, तैस पत्ती-पत्ती गेइयथ । 14 ते तै ज़ैस घरे मां गालो, तैस घरेरे मालिके सेइं तुस एन ज़ोइयथ कि, इश्शे गुरे ज़ोवरूए कि, भेरे लेइ तियार कियोरो मेहमान कमरो कोड़ि आए, ज़ेड़ी अवं अपने चेलन सेइं साथी फ़सह तिहारेरी रोट्टी खेइ?” 15 तैखन घरेरो मालिक तुसन दुइयोवं छती पुड़, तियार कियोरो, अक बड्डो कमरो हिरालो । तैड़ी इश्शे लेइ रोट्टी तियार केरथ ।” 16 ते चले तैट्टां निस्तां नगरे मां आए, त ज़ेन्चरां यीशुए तैन सेइं ज़ोरू थियूं, तेन्चरां तैनेईं लावं । ते तैनेईं फ़सह तिहारेरी रोट्टी तियार की ।

([मरकुस 26:17-25](#); [मरकुस 22:7-14,21-23](#); [मरकुस 13:21-30](#))

17 ज़ैखन इलोझ भोइ, त यीशु अपने 12 चेलन सेइं साथी मेहमान कमरे मां अव । 18 ज़ैखन तैना बिश्तां रोट्टी खेइ राओरे थिये, त यीशुए तैन सेइं ज़ोवं, “अवं तुसन सेइं सच्च ज़ोतईं कि तुसन मरां अक, ज़ै मीं सेइं साथी रोट्टी खेइ राओरोए, मीं धोखे सेइं ट्लुवालो ।” 19 एन शुन्तां तैना सारे चले उदास भोए, ते तैना अक-अक केरतां यीशु सेइं पुच्छने लगगे, “कुन अवं आईं? कुन अवं आईं?” 20 यीशुए तैन सेइं ज़ोवं, “तै तुसन बारहन मरां अक आए, ज़ै मीं सेइं साथी बिश्तां इश्शी एक्की थैली मां रोट्टी खेइ राओरोए । 21 ज़ेन्चरां मैनेरू मट्टू यानी मेरे बारे मां परमेशेरी किताबी मां लिखोरूए, तेन्चरां अवं मारो गानोईं । अफ़सोस! (किजोकि तैस मैन्हु बड़ी सज़ा मैल्लनीए एजने बालीए) ज़ेसेरे वजाईं सेइं मैनेरू मट्टू यानी अवं ट्लुवाव गानोईं! अगर तै मैन्हु ज़रमोरो न भोथो, त तैसेरे लेईं तैन भलू थियूं ।”

([मरकुस 26:26-30](#); [मरकुस 22:14-20](#); 1 [मरकुस 11:23-25](#))

22 ज़ैखन यीशु त तैसेरे चले फ़सहेरी रोट्टी खेइ राओरे थिये, यीशुए अक रोट्टी ट्लेइतां परमेशेरू शुक्र केरतां ट्लोड़ी । तैल्ला पत्ती, तैनी तै अपने चेलन दित्ती, ते तैन सेइं ज़ोवं, “ट्लाथ ते खाथ । ई मेरो जिसम आए ।” 23 फ़िरी यीशुए दाछ़ारे रस्सेरो कटोरो ट्लेइतां परमेशेरू शुक्र कियूं । तैल्ला पत्ती, तैनी तै अपने चेलन दित्तो, ते तैनेईं सैरेईं पियो । 24 तैखन तैनी तैन सेइं ज़ोवं, “ए दाछ़ारे रस मेरो खून आए, ज़ै परमेशर त कने लोकां केरे मझाटे नव्वों करार बनाते, ज़ै बड़े लोकां केरे मैफ़ारे लेइ बगाव गालो । 25 अवं तुसन सेइं सच्च ज़ोतईं कि अवं दाछ़ारो रस तैस दिहाड़ी तगर फ़िरी कधी न पीलो, ज़ांतगर परमेशेरे राज़े मां अवं नव्वो दाछ़ारे रस पी । 26 तैल्ला पत्ती, यीशु त कने तैसेरे चले परमेशेरू भजन ज़ोइतां, यरूशलेम नगरेरे बेइर ज़ैतून नव्वेरे पहैड़ी पुड़ चले जे ।”

([मरकुस 26:31-35](#); [मरकुस 22:31-34](#); [मरकुस 13:36-38](#))

27 तैखन यीशुए अपने चेलन सेइं ज़ोवं, “तुस सारे मीं छेडतां नश्शेले, किजोकि परमेशेरी किताबी मां लिखोरू कि, ‘अवं पुहाले मैरेलो ते तैसेरी भैड्डां इरां उरां नश्शी गाली ।’ 28 पन अवं मेरतां मुडदन मरां फ़िरी जीतो भोनोईं । तैल्ला पत्ती, अवं तुसन केरां पेइले गलील इलाके जो गालो त तैड़ी तुस मीं लाएले ।” 29 तैखन पतरसे यीशु सेइं ज़ोवं, “अगर सारे तीं छेडतां नश्शेले त नश्शन, पन अवं कधे न नश्शेलो ।” 30 यीशुए पतरसे सेइं ज़ोवं, “अवं तीं सेइं सच्च ज़ोतईं कि अज़्जेरी राती कुकड़ेरे दूई बार बांग देने केरां पेइले, तू ट्लाईं बार मेरो इन्कार केरेलो कि तू मीं

न जानस।” 31 पन पतरसे मना ज़ोरे सेइं यीशु सेइं ज़ोने लगो, “अगर मीं तीं सेइं साथी मरनू भी पे, त फिरी भी अवं तेरो इन्कार कधी न केरेलो।” एन्चरां होरि चलेईं भी ज़ोवं।

[\[22222 22222222 222222222 22222 2222 2222 2222222222 2222222\]](#)
([2222222 26:36-46](#); [22222 22:39-46](#))

32 तैल्ला पत्ती, यीशु ते तैसेरे चले गतसमनी नंब्बेरे एक्की बागी मां जे, ते तैड़ी यीशुए अपने किछ् चेलन सेइं ज़ोवं, “इड़ी बिश्शोरे राथ, ज़ां तगर अवं प्रार्थना न केरि।” 33 फिरी यीशुए पतरस ते याकूब ते यूहन्ना एप्पू सेइं साथी बागी मां अगगर निये, ते तैड़ी तै बड़े परेशान भोने ते कने घबराने लगो। 34 ते तैखन यीशुए तैन सेइं ज़ोवं, “मेरो दिल बड़ो उदास आए, इड़ी तगर कि अवं मरनेवालोई। तुस इड़ी बलगा, ते बींझे राथ।”

35 फिरी तै बागी मां थोड़ो ज़ेरे अगगर गेइतां, तल्ले मां जैन्धु केरे भारे बिश्तां प्रार्थना केरने लगो कि अगगर भोइ सके त ए दुख्खेरी घड़ी मीं पुड़ेरां टेली गाए। 36 ते तैनी प्रार्थनाई मां एन ज़ोवं, “बैपू! हे मेरे बाजी, तुसन केरां सब किछ् भोइ सकते। एस दुख्खेरो कटोरो मीं केरां दूर केरा। फिरी भी ज़ैन अवं चाताईं तैन नई, पन ज़ैन तुस चातथ तैन्ने भोए।”

37 फिरी तै अपने ट्लाई चेलन कां वापस अव, त तैना झुल्लोरे मैल्ले, ते तैनी तैना बींझाए, त तैनी शमौन-पतरसे सेइं ज़ोवं, “हे शमौन, कुन तू झुल्लोरोस? कुन तू अक घड़ी भी बींझो न रेइ सकस?” 38 तैखन यीशुए तैन सैरेन सेइं ज़ोवं, “बींझे ते प्रार्थना केरते राथ ताके तुस अज़मैइशी मां न पेथ। तुस त अज़मैइश रोकनी चातथ, पन तुसन कां रोकनेरी ताकत नई।”

39 ते यीशु फिरी अपने चेलन केरां थोड़े दूर चलो जेव, त ज़ैना गल्लां तैनी पेइले ज़ोइतां प्रार्थना कियोरी थी, तैन्नां गल्लां दुबारां ज़ोइतां प्रार्थना की। 40 ते फिरी वापस एइतां हेरू कि तैना चले झुल्लोरेन, किजोकि तैन एत्री निडली थी, कि तैन केरि एछ्छी भी न थी लोरी खुलने। ज़ैखन यीशुए तैना बींझाए, त तैना शरमाने लगगे कि यीशुए कुन जुवाब देम! 41 फिरी टलेइयोवं बार गेइतां यीशुए प्रार्थना की ते वापस एइतां फिरी तैन सेइं ज़ोवं, “कुन तुस हेजू झुल्लोरेथ! बडू आए! हुनी घड़ी एज्जी जोरी! हेरा, मैनेरू मट्टू (यानी अवं) पापी मैन्हु केरे हथ्थन मां टलुवेइयोव गानोई। 42 उठा, च़लम। हेरा! मीं टलुवानेवालो नेडे पुज्जी जोरो!”

[\[22222-222222222222 22222 22222 22222 2222222222\]](#)
([2222222 26:47-56](#); [22222 22:47-53](#); [222222222 18:3-12](#))

43 यीशु एन्ने ज़ोई राओरो थियो कि अकदम यहूदा ज़ै 12 चेलन मरां अक थियो, एप्पू सेइं साथी मैन्हु केरि अक बड्डी भीइ एन्तां तैड़ी पुज्जी जेव, ज़ैन कां तलवारां ते डंडे थिये। तैना प्रधान याजक ते शास्त्री लोक ते कने यहूदी लोकां केरे बुजुर्गां केरि तरफां यीशु कैद केरनेरे लेइ भेजोरे थिये। 44 यीशुएरो टलुवानेवालो यहूदा तैड़ी पुज्जने केरां पेइले, तैन मैनन् जो निशान दित्तोरो थियो कि ज़ैस अवं फुम्मड़ी देलो तैए यीशु आए, तैस टलेइतां ध्याने सेइं नेइयथ। 45 ज़ैखन यहूदा ते मैन्हु केरि भीइ बागी मां आई, त तैनी अकदम यीशु सेइं ज़ोवं, “हे रब्बी (गुरू)” ते तैस फुम्मड़ी दिती। 46 तैखन तैनेई यीशु टलेइतां कैद कियो। 47 यीशुएरे चेलन मरां, ज़ैना तैसेरे नेडे खडे थिये, एक्के अपनि तलवारे सेइं महायाजकेरे एक्की नौकरे पुइ च़लाई त तैसेरो अक कन केट्टी छ्इडो। 48 यीशुए तैन मैनन् सेइं ज़ोवं, “कुन तुस मीं डैकू समझतां टलानेरे लेइ तलवारां ते डंडे घिन्तां ओरेथ? 49 अवं त हर दिहाड़ी मन्दरे मां तुसन सेइं साथी रेइतां परमेशेरे बारे मां लोकन शिक्षा देतो थियो, पन तैखन तुसेईं अवं न टलाव। पन एन एल्हेरेलेइ भोने लगगेरू कि पवित्रशास्त्रे मां मेरे बारे मां ज़ैना गल्लां लिखोरिन तैना पूरी भोन।”

50 तैखन यीशुएरे सारे चले तैस छेइतां नेश्शी जे। 51 ते अक जवान ज़ैनी अपनि नग्गी जानी पुइ अक लिगड पलेट्टेरू थियूं, यीशु पत्ती च़लो। ते भीड़ी मरां किछ् मैनेई तै टलाव। 52 पन तै तैन केरे हथ्थन मां अपनू लिगड छेइतां नग्गो नेश्शी जेव।

[\[2222 222222222 222222222 22222222 2222 2222 22222222 22222222 2222 222222\]](#)
([2222222 26:57-68](#); [22222 22:54-55,63-71](#); [222222222 18:13,14,19-24](#))

53 तैल्ला पत्ती, मैन्हु केरि भीइं यीशु महायाजकेरे घरे मां नीयो। ते सारे प्रधान याजक ते कने बुजुर्ग त कने शास्त्री यीशुएरू इमतिहान नेनेरे लेइ महायाजके सेइं साथी तैड़ी अकोट्टे भोए। 54 यीशु त कने मैन्हु केरि भीड़ी केरा दूर-दूर रेइतां पतरस तैन पत्ती-पत्ती महायाजकेरे महलेरे अंगने तगर पुज्जी जेव। ते तैड़ी तै महायाजकेरे पैरदारे सेइं साथी बिश्तां अग तपने लगो।

55 मेहलेरे अन्तर, प्रधान याजक त कने सारी महासभा यीशुएरे खलाफ गवाही तोपनेरी कोशिश केरि राओरे थिये, ताके तैना तैस मैरी सकन, पन तैनन् किछ् न मैल्लू। 56 किजोकि बड़े मैन्हु यीशु पुड़ झूठी गवाही देने लगगोरे थिये, पन तैन केरि गवाही अक्कां जेरि न थी। 57 आखरी मां किछ् मैनेई उठतां तैसेरे खलाफ ई झूठी गवाही दिती कि, 58 “असेई एस केरां एन ज़ोते शुनेरू कि, ‘अवं मैन्हु केरू बनोरू एस मन्दरे बिछोड़तां ट्लेइ दिहाइन मां होरू मन्दर बनालो, जैन मैन्हु केरू बनोरू न भोलू।’” 59 पन एन ज़ोइतां भी तैन केरि गवाही अक्कां जेरि न निस्सी।

60 तैखन महायाजके आदालतेरे मझाटे खड़े भोइतां यीशु पुच्छू, “एना लोक तेरे खलाफ गवाही देतन, कुन तू कोई जुवाब नई देस?” 61 पन यीशु चुप राव, ते किछ् जुवाब न दित्तो। तैखन महायाजके तैस फिरी पुच्छू, “कुन तू परमेशेरू मट्टू मसीह आस?” 62 यीशुए ज़ोवं, “हाँ, अवं तै आई। ते ज़ेन्चरां परमेशेरी किताबी मां लिखोरू कि ‘तुस सारे लोक, मैनेरू मट्टू (यानी मीं) सर्वशक्तिमान परमेशेरी देइने पासे बिशोरे त अम्बरे मरां बिदलारे सेइ साथी धेरती पुड़ एजते हेरेले।’” 63 तैखन महायाजके सेरकोइतां, अपना चोगो छिन्दतां आदालतेरे मैनन् सेइ ज़ोवं, “हुनी असन होरि केन्चेरी गवाहेरी ज़रूरत नई! 64 तुसेई एप्पू परमेशेरी तुहीन शुनी! ते तुस एसेरो कुन फैसलो केरतथ?” तैखन तैनेई सारे मैनेई ज़ोवं कि, “ए मैन्हु दोषी आए किजोकि एनी परमेशेरी तुहीन की, एल्हेरेलेइ, एस मौतरी सज़ा दे।” 65 तैखन तैन मरां किछ् मैन्हु, तैसेरी बेजती केरनेरे लेइ, तैस पुड़ थुकने लगगे। ते किछ् मैन्हु तैसेरी एछ्छी लिगड़े सेइ ढेकतां तैस मुक्केई बाने लगगे ते तैस सेइ ज़ोने लगगे, “भविष्यवाणी केर कि केनि तीं बाई।” ते नौकरेई भी तैस ट्लेइतां थप्पड़ बाए।

[\[2\]\[2\]\[2\]\[2\]\[2\] \[2\]\[2\]\[2\]\[2\]\[2\] \[2\]\[2\]\[2\]\[2\]\[2\] \[2\]\[2\]\[2\]\[2\]\[2\] \[2\]\[2\]\[2\]\[2\]\[2\]](#)
[\(\[2\]\[2\]\[2\]\[2\]\[2\] 26:69-75; \[2\]\[2\]\[2\]\[2\]\[2\] 22:56-62; \[2\]\[2\]\[2\]\[2\]\[2\] 18:15-18,25-27\)](#)

66 ज़ैखन पतरस, महायाजकेरे महलेरे अंगने मां थियो, त महायाजकेरे नौकरेनन मरां अक कुआन्श तैड़ी आई। 67 तैसां पतरस अग तपतो लाव। ते तै कुआन्श पतरस तेकतां तैस सेइ ज़ोने लगगी, “तू भी एस नासरत नगरेरो यीशु सेइ साथी थियो।” 68 पन पतरसे यीशुएरो इन्कार कियो ते ज़ोवं, “अवं न ज़ैनी ते न सेमझी कि तू कुन लगोरिस ज़ोने।” फिरी तै तैट्टां बेइर डेवढी मां जेव। तैखन कुकड़े बांग दिती।

69 ज़ैखन तैसां नौकरेनां फिरी पतरस लव, त तै तैन सेइ, ज़ैना नेड़े खड़े थिये, ज़ोने लगगी, “ए मैन्हु तैसेरे चलन मरां अक आए!” 70 पन पतरसे फिरी यीशुएरो इन्कार कियो।

थोड़े चिरे बाद, ज़ैना पतरसेरे नेड़े खड़े थिये, तैनेई तैस सेइ ज़ोवं, “पक्को तू भी तैसेरे चलन मरां अक आस, किजोकि तू गलील इलाकेरो मैन्हु भी आस।” 71 तैखन पतरस कसम केरतां ज़ोने लगगे, “मीं फिटकार लगगे, अगर अवं झूठ ज़ोई कि अवं एस मैन्हु ज़ानतो भोई, ज़ेसेरे बारे मां तुस गल्लां केरने लगगोरेथ!” 72 तैखन अकदम दुइयोवं बार कुकड़े बांग दिती। ज़ै गल यीशुए पतरसे सेइ पेइली ज़ोरी थी, तै गल तैस याद आई कि, “कुकड़ेरे दूई बार बांग देने केरां पेइले तू ट्लाई बार मेरो इन्कार केरेलो कि तू मीं न ज़ानस।” तैखन तैनी बड़ी लेरां दिती, किजोकि तैनी यीशुएरो इन्कार केरनेरे वजाई सेइ बड़ो दुखी भोव।

15

[\[2\]\[2\]\[2\]\[2\]\[2\] \[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]](#)
[\(\[2\]\[2\]\[2\]\[2\]\[2\] 27:1-2,11-14; \[2\]\[2\]\[2\]\[2\]\[2\] 23:1-5; \[2\]\[2\]\[2\]\[2\]\[2\]\[2\]\[2\]\[2\] 18:28-38\)](#)

1 झेज्झ भोते, अकदम प्रधान याजकेई, ते यहूदी लोकां केरे बुजुर्गेई, ते कने शास्तरी लोकेई ते कने सारे महासभारे मैनेई यीशुएरे खलाफ सलाह केरतां तै बन्धाव ते तैट्टां नेइतां रोमी गवर्नर पिलातुसेरे हवाले कियो। 2 पिलातुसे यीशु पुच्छू, “कुन तू यहूदी लोकां केरो राज़ो आस?” यीशुए तैस जुवाब दित्तो, “तू एप्पू ज़ोई राओरोस।” 3 तैखन प्रधान याजक तैस पुड़ बेइ गल्लां केरो झूठो इलज़ाम लेइ राओरे थिये। पन यीशुए किछ् न ज़ोवं। 4 पिलातुसे तैस फिरी पुच्छू, “तू किछ् भी जुवाब की न देस? हेर, एना लोक तीं पुड़ केतरी गल्लां केरो इलज़ाम लेइ राओरेन!” 5 हांलाकि यीशुएरी किछ् भी गलती न थी, तैनी किछ् जुवाब न दित्तो, इड़ी तगर कि पिलातुस बड़ो हैरान भोव।

[\[2\]\[2\]\[2\]\[2\]\[2\] \[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]\[2\]](#)
[\(\[2\]\[2\]\[2\]\[2\]\[2\] 27:15-26; \[2\]\[2\]\[2\]\[2\]\[2\] 23:13-25; \[2\]\[2\]\[2\]\[2\]\[2\]\[2\]\[2\]\[2\] 18:39-19:16\)](#)

6 हर साल फ़सल तिहारेरे वक्ते पुड़ यहूदी लोकां केरे लेइ केन्वी एक्की कैदी, ज़ैस तैना लोक चाते थिये तैस पिलातुस छेइडी देतो थियो। 7 तैन दिहाइन बरअब्बा नंवेरो अक मैन्हु किछ् दंगेफसाद केरनेबालन सेइं साथी कैदखाने मां थियो, ज़ैनेई दंगेफसादे मां कल्ल कियोरो थियो। 8 तैखन मैन्हु केरि भीड़ पिलातुसे कां गेइतां मिन्नत केरने लग्गी कि, “ज़ैन तू इश्शे लेइ हर साल केरतो ओरोस तैन्ने केर।” 9 पन पिलातुसे तैनन् पुच्छ्, “तुस कुन चातथ कि अवं तुश्शे लेइ यहूदी केरे राज़े यानी तुश्शे राज़े छेइडी देई?” 10 पिलातुसे लोकन एन्चरां पुच्छ्, किजोकि तै ज़ानतो थियो कि प्रधान याजक यीशु पुड़ ज़लतन तांए तैनेई तै ट़लुवोरोए। 11 पन प्रधान याजकेई लोक बमकाए, ताके पिलातुस तैन केरे लेइ यीशुएरे बदले बरअब्बा छेइडी दे। 12 एन शुन्तां पिलातुसे लोकन फिरी पुच्छ्, “अगर अवं बरब्बे छेइडी देई, त ज़ैस तुस यहूदी लोकां केरो राज़ो ज़ोतथ, तैसेरू अवं कुन केरि?” 13 तैना पिलातुसे सेइं फिरी शोर केरतां ज़ोने लग्गे कि, “एस क़रूसे* पुड़ चाढ़!” 14 पिलातुसे तैनन् पुच्छ्, “किजो ए क़रूसे पुड़ चाढ़नो, एनी कुन बुराई कियोरीए?” पन तैना लोक पेइले केरां जादे शोर केरने लग्गे कि, “एस क़रूसे पुड़ चाढ़!” 15 तैखन पिलातुसे लोक खुश केरनेरे इरादे सेइं, बरअब्बा तैन केरे लेइ छेइडी दित्तो, ते यीशु कोड़े लुवेइतां सिपेही केरे हवाले कियो कि तैना यीशु क़रूसे पुड़ चाढ़न।

☞☞☞☞☞☞☞☞☞☞☞☞☞☞☞☞☞☞☞
(☞☞☞☞☞ 27:27-31; ☞☞☞☞☞☞☞ 19:2-3)

16 तैखन सिपाही यीशुए पिलातुसेरे महलेरे अंगने मां नेइ जे, ज़ैस जो प्रीटोरियम ज़ोतन। ते तैनेई सारी रोमी पलटन कुजेइतां आनी। 17 तैखन तैनेई यीशुएरो मज़ाक बनानेरे लेइ तैसेरां लिगड़ां खोल्लां, ते तैस लाल रंगेरो चोलो लुवाव ते कने कंटां केरू ताज बनेइतां तैसेरे दोग्गे पुड़ रखवू। 18 ते एन ज़ोने लग्गे कि, “हे यहूदी केरा राज़ा, नमस्कार!” 19 तैना यीशुएरे दोग्गे पुड़ अक्केरे पत्ती अक केरतां सोटी सेइं बाने लग्गे, ते तैसेरी बेज़ती केरनेरे लेइ तैस पुड़ थुकने लग्गे, ते मज़ाक बनानेरे लेइ तैसेरे अग्गर ज़ैन्धु केरे भारे बिश्तां तैस नमस्कार केरते राए। 20 तैसेरो मज़ाक बनानेरे पत्ती, तैनेई तैस पुड़ेरां लाल रंगेरो चोगो खोलतां तैसेरां लिगड़ां लुवां। तैखन तैना यीशु क़रूसे पुड़ चाढ़नेरे लेइ यरूशलेमेरे नगरे केरां बेइर नीयो।

☞☞☞☞☞☞☞☞☞☞☞☞☞☞☞☞☞☞☞
(☞☞☞☞☞ 27:32-44; ☞☞☞☞ 23:26-43; ☞☞☞☞☞☞☞ 19:17-27)

21 ज़ताली तैना तैट्टां च़ेलि राओरे थिये, त तैखन शमौन नंवेरो मैन्हु इलोव्वेरां तैलमेइं एज्जी राओरो थियो। तै मैन्हु कुरेनी नंवेरे नगरेरां ओरो थियो ते तै सिकन्दर ते कने रूफुसेरो बाजी थियो। तैखन सिपाहेई शमौन मजबूर कियो कि तै यीशुएरे लेइ तैसेरी क़रूसे छुइतां च़ले। 22 ते तैनेई यीशु गुलगुता नंवेरी ठैरी पुड़ आनो, ज़ेसेरो मतलब “खोपड़ारी ठार” आए। 23 फिरी किछ् लोकेई मुरं नंवेरी दवाई, दाछ़ारे रस्से मां मिलेइतां यीशु पीने जो दिती†, पन तैनी तैसेरो इन्कार केरतां न पी। 24 तैखन तैनेई यीशु क़रूसे पुड़ चाढ़ो ते तैसेरां लिगड़ां केरे लेइ पेरची छेइडी कि तैसेरां लिगड़ां केस मैलतन। तैल्ला पत्ती, तैनेई तैसेरां लिगड़ां बेन्टी छेइडां। 25 ज़ैखन तैनेई तै क़रूसे पुड़ चाढ़ो, तैखन झेज्जेरे नौ बज़्जारे थिये। 26 ते एक्की फेट्टी पुड़ तैसेरी सज़ारी वजा लिखतां तैसेरे क्रोड़ी केरां बां लेइ छेइडी। तैस मां लिखोरू थियू कि, “ए यहूदी लोकां केरो राज़ो आए।” 27 सिपाहेई यीशु सेइं साथी हारे दूई डैकू भी, अक तैसेरे देइने पासे ते अक तैसेरे बाएं पासे अलग-अलग क़रूसन पुड़ चाढ़े। 28 तैखन परमेशेरी किताबी मां लिखोरी गल पूरी भोइ। तैस मां मसीहेरे बारे मां एरू लिखोरू थियू कि, “ते पापी मैन्हु केरे साथी गनो गालो।”

29 तैखन बत्तां च़लनेबालन मरां किछ् मैन्हु अपनि क्रोड़ी हिलेइ-हिलेइतां ते कने एन ज़ोइतां तैसेरी तुहीन केरते थिये कि, “वाह! वाह! मन्दर बिछोइनेबालो, त कने ट़लेइ दिहाइन मां बनानेबालो! 30 अगर तू शक्तिशाली आस त क़रूसे पुड़ेरां ओस्तां अपने आपे बच्चा!” 31 एन्चरां प्रधान याजक भी शास्त्री लोकन सेइं साथी तैसेरो मज़ाक बनेइ राओरे थिये, त तैना एण्पू मांमेइं ज़ोते थिये कि, “एनी हारे मैन्हु त बच्चाए, पन अपने आपे बच्चेइ न सको। 32 ए ज़ोरो थियो कि ‘अवं इस्राएल लोकां केरो राज़ो आई, यानी मसीह आई,’ अगर ए गल सच आए त हुन्ना

* 15:13 15:13 क़रूसे पुड़ चाढ़नू: सरकारेरे खलाफ़ दंगेफसाद केरनेबालन, ते कल्ल खराबन ते कने हुक्म न मन्नेबाले गुलामन जो रोमी-सरकार एरी सज़ा देती थी। ए बड़ी दुख देनेबाली ते कने शरमेरी सज़ा आए। दूई बड़डी लेकडी जुडेइतां क़रूस बनातन। दोषी मैनेरे पावन त हथ्यन पुड़ मेखां देइतां, क़रूसे पुड़ टैंगी छेइतन, जातगर तैस मैनेरे प्राण न निस्सन। † 15:23 15:23 मुरं नंवेरी दवाई दाछ़ारे रस्से मां मिलेइतां तैस पीनेरे लेइ देतन, ताके तैसेरो दुख घट भोइ गाए।

कुरुसे पुडेरं ओस्से, ताके अस हेरतां विश्वास केरम कि ए इश्शो राजो आए।” त दूई डैकू, जैना तैस सेइं साथी कुरुसे पुड च़ादोरे थिये, तैनेई भी तैसेरी बेजती की।

११:११-१२; ११:१३-१४; ११:१५-१६

(११:११-१२ 27:45-56; ११:१३-१४ 23:44-49; ११:१५-१६ 19:28-30)

33 दीसारे बारे बजेई सारे मुल्खे मां आंधरू भोवं, ते टलेइ बजन तगर रावं। 34 टलेइ बजेई यीशुए बडी ज़ोरे सेइं अपनि बोली मां ज़ोवं कि, “इलोई, इलोई, लमा शबक्तनी!” ज़ेसेरू मतलब, “हे मेरे परमेशर, हे मेरे परमेशर, तीं किजो अवं छेडडी दित्तो!” 35 तैखन जैना तैडी नेडे खडे थिये, तैन मरां किछ्छ मैनेई एन शुन्तां गलत सेमझतां एप्पू मांमेइं ज़ोवं, “हेरा, ए मैन्हु एलिय्याहे जो मद्दत केरनेरे लेइ कुजेई राओरोए।” 36 तैखन तैन मरां एक्की मैने दौइतां स्पन्जे (जै पेनेरी ज़ेरि चीज़ चूसी सकचे) खटटे दाछ़ारे रस्से मां डुबेइतां डांगी पुड रेखतां यीशु जो चुसावं त ज़ोवं, “बलगा, हेरम, एलिय्याह एस कुरुसे पुडेरं उसालने एजते कि नई।” 37 तैखन यीशुए बडे ज़ोरे सेइं आवाज़ देइतां प्राण दित्ते। 38 ते तैखन मोट्टो पर्दां, जै मन्दरे मां लोरो थियो, बां देता बुन तगर फेटतां दूई टुकडे भोइ जे। 39 ज़ैखन फौजी-अफसर, जै यीशुएरे सामने खडो थियो, यीशु एन्चरां ज़ोरे सेइं आवाज़ देइतां प्राण देंतो लाव, तैखन तैनी ज़ोवं, “सच्चे, ए मैन्हु परमेशेरू मट्टू थियूं।”

40 किछ्छ कुआन्शां भी दूरेरां एन हेरी राओरी थी। तैन मां मगदलीन नगरेरी मरियम, निकडो याकूब ते योसेसेरी अम्मा मरियम, त कने सलोमी भी थी। 41 ज़ैखन यीशु गलील इलाके मां थियो, त तैखन एना कुआन्शां तैस पत्ती-पत्ती च़ेलती थी त तैसेरी सेवा केरती थी। त तैडी होरि भी बडी कुआन्शां थी, जैना तैस सेइं साथी गलील इलाके मरां यरूशलेम नगरे मां ओरी थी।

११:१७-१८; ११:१९-२०; ११:२१-२२; ११:२३-२४

(११:१७-१८ 27:57-61; ११:१९-२० 23:50-56; ११:२१-२२ 19:38-42)

42 ज़ैखन इलोइ भोइ, ते एल्हेरेलेइ कि तै तिहारेरी दिहाडी थी, यानी आरामेरे दिहाडेरें पेइली दिहाडी ज़ैखन लोक आरामेरी दिहाडेरें लेइ तियार भोते थिये, त तैखन 43 अरिमतियाह नगरेरो रानेबालो यूसुफ नंव्वेरो मैन्हु तैडी अव, जै यहूदी लोकां केरे बड्डे आदालतेरे खास मैनन् मरां अक थियो। तै एप्पू भी परमेशेरें राज्जे बलगने लोरो थियो। तै मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके तै तैस दबनेरे लेइ ने। 44 तैखन पिलातुस हैरान भोव कि केन्चरां तै एतूरी लूशी मेरि जेव। त तैनी फौजी-अफसर कुजेइतां पुच्छ्छ, “कुन तै मेरि जोरोए?” 45 ज़ैखन तैनी फौजी-अफसर केरां हाल ज़ानो कि यीशु सच्चे मेरि जेव, त तैनी यूसुफे लाश नेनेरी अज़ाजत दित्ती। 46 तैखन यूसुफे अक कीमती लिगड घिन्नु ते यीशुएरी लाश कुरुसे पुडेरं ओसैलतां यहूदी लोकां केरि रसमेरे मुताबिक तैस लिगडे मां पलेटतां एक्की कबूरी मां छेडडी, जै पहैडी पुड एक्की घोडे मां घडोरी थी। त तैस कबूरेरे बेइर दारे पुड अक बड्डो घोड घिसैइतां छेड्डो। 47 मगदलीन इलव्वेरी मरियम, ते योसेसेरी अम्मा मरियम, एना दुइये हेरी राओरी थी कि यीशुएरी लाश कोडि रखतन।

16

१६:१-२; १६:३-४; १६:५-६; १६:७-८; १६:९-१०

(१६:१-२ 28:1-8; १६:३-४ 24:1-12; १६:५-६ 20:1-10)

1 होरसां इलोइनी, ज़ैखन आरामेरी दिहाडी खतम भोरी थी, त तैखन मगदलीन इलव्वेरी मरियम, त कने याकूबेरी अम्मा मरियम, त कने सलोमी, एन सेब्भेई रोडी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुड तेल लान। 2 हफतेरे पेइले दिहाडे झेज्झां-झेज्झां, ज़ैखन मसां दिहाडो निस्सी राओरो थियो, त तैना कबूरी कां जेई ज़ैस मां यीशुएरी लाश रखोरि थी। 3 तैखन तैना एप्पू मांमेइं ज़ोती थी, “इश्शो लेइ कबूरेरे दारे पुडेरं घोड कौन गिसालो?” 4 किजोकि तै घोड बडो बड्डो थियो। पन तैडी पुजनेरे बाद, तैनेई कबूरेरे पासे उबरी तकू त हेरू कि घोड पेइलो कबूरेरे दारे पुडेरं गिस्सोरो थियो। 5 तैनेई कबूरेरे अन्तर गेइतां अक जवान* लाव ते तैना बेडि हैरान भोइ जेई। तैस छित्तां लिगडां लेग्गोरां थियां, ते तैडी तैन केरे सिध्धे पासे बिश्शोरो थियो। 6 तैनी जवाने तैन सेइं ज़ोवं, “डरा न, अवं ज़ानताई कि तुस नासरत नगरेरे यीशु तोप्पी राओरिथ, जै कुरुसे पुड च़ादोरे थियो। तै मुडदन मरां जीतो भोरोए। तै इडी नई। हेरा, ई तैए ठार आए, जेडी तैसेरी लाश रखोरी थी। 7 पन

* 16:5 16:5 तै जवान मैन्हु स्वर्गदूत थियो

तुस गेइतां तैसेरे चेलन सेइं त कने पतरसे सेइं भी जोइयथ कि यीशु तुसन करां पेइलो गलील इलाके जो गालो । जेन्चरां तैनी पेइलू तुसन सेइं जोरू थियूं, तेन्चरां तुस तैस तैडी लाले ।”⁸ तैना कुआन्शां कबरी मरां बेइर निस्तां तैट्ठां नेश्शी जेई, किजोकि तैनन् थर्क लगगोरी त घेबरोरी थी । बत्तां तैनेई केन्ची सेइं किछ् न जोवं, किजोकि तैना डेरी थी ।

[\[2222 222222 22222222 222222222 222222 22222222 22222222\]](#)
([\[222222 28:9-10; 22222222 20:11-18\]](#))

⁹ हफ्तेरे पेइले दिहाडे झेज्झ भोते, यीशु मुइदन मरां जींतो भोइतां पेइले मगदलीन नगरेरी मरियमी लेइहोव, जैस मरां तैनी पेइलां सत भूतां केरो सायो कड्डोरो थियो ।¹⁰ मरियमां यीशु लानेरे पत्ती, गेइतां तैसेरे चेलन खबर दिती, जैना यीशुएरे लेइ शोग केरने लगगोरे ते कने लेरां देने लगगोरे थिये ।¹¹ पन जैखन तैनेई तैसारी गल शुनी कि यीशु फिरी जींतो भोरोए ते तैसां लेवरोए, त तैनेई तैसारी गल्ली पुइ याकीन न कियूं ।

[\[2222 22222 2222 22222 222222222\]](#)
([\[22222 24:13-35\]](#))

¹² तैल्ला पत्ती, यीशु अपने चेलन मरां दूई चेलन होरि रूपे मां लेइहोव, जैखन तैना (यरूशलेम) नगरेरां अपने डलोंवे जो चलोरे थिये ।¹³ तैखन तैनेई भी नगरे वापस एजतां यीशुएरे होरे चेलन खबर दिती, पन तैनेई तैन केरि गल्लारो भी विश्वास न कियो ।

[\[2222 22222 22222 222222 22222 22 2222222 22222 22222 222222222 222222\]](#)
([\[222222 28:16-20; 22222 24:36-49; 22222222 20:19-23; 22222222. 1:6-8\]](#))

¹⁴ तैल्ला पत्ती, यीशु अपने 11 चेलन भी लेइहोव, जैखन तैना रोट्टी खेइ राओरे थिये । त तैन केरे अविश्वास त कने सखत दिलेरे वजाई सेइं यीशुए तैना डांटे, किजोकि तैनेई तैन केरो विश्वास न कियो, जैनेई यीशु जींतो भोनेरे पत्ती तै लेवरो थियो ।

¹⁵ यीशुए अपने चेलन जोवं, “तुस सैरी दुनियाई मां गेइतां सारे लोकन मेरे बारे मां खुशखबरी शुनाथ ।¹⁶ जै कोई मीं पुइ विश्वास केरे ते बपतिस्मो ने, तैस पापां केरि सजाई करां मुक्ति मैलेली । पन जै कोई विश्वास न केरे, तैस अपने पापां केरि सजा मैलेली ।¹⁷ जैना मीं पुइ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंवे सेइं लोकन मरां भूतां केरो सायो कढेले, ते नंवी-नंवी बोली केरले ।¹⁸ ते अगर तैना जेहरीले सप्पन टलाले त कने जेहरीली चीज भी पीले, तांभी तैनन् किछ् नुकसान न भोलो । ते जैखन तैना बिमारन पुइ हथ रखेले, ते तैना बेज्झोइ गाले ।”

[\[2222 222222222 22 22222\]](#)
([\[22222 24:50-53; 22222222. 1:9-11\]](#))

¹⁹ यीशु अपने चेलन सेइं गल्लां करेनेरां पत्ती, परमेशेरे तै स्वर्गे जो नीयो । ते यीशु परमेशेरे देइने पासे राजगेद्दी पुइ बिश्वी जेव ।²⁰ ते यीशुएरे चेलेई बेइर हर जगाई गेइतां लोकन खुशखबरी शुनाने लगगे । ते प्रभु तैन सेइं साथी कम केरतो राव । तैना चमत्कारेरां कम्मां (निशानन) केरे जिरिये, जैना साथी-साथी भोतां थियां, प्रभु साबत केरतो राव कि तैन केरि गल्लां सन्न आन । आमीन ।

लूका

११११ ११११ ११११११ ११११ ११११११ ११ ११११ ११११ ११११११ ११११११११ ११११ १११ १ ११११११
१११११

1-2 जनाब थियुफिलस, बड़े लोकेई तैना गल्लां हेरी जैना प्रभु-यीशुए कियोरी थी, जैखन तै असन सेइं साथी थियो, जेइसेरां तैनी अपनू सेवारू कम शुरू कियेरू थियूं। तैन मैनेई होरि मैनन् यीशुएरे बारे मां शिक्षा देइतां परमेशेरी सेवा की। बड़े मैनेई तैन केरि गल्लां शुन्तां यीशुएरे बारे मां इशे लेइ इतिहासेरी किताब लिखी। 3 मीं एप्पू तैन सैरी गल्लां केरि बड़े रोडेचारे छानबीन की। एल्हेरेलेइ, मीं एन रोडू लग्गू, कि अवं भी तुशे लेइ तैन गल्लां केरे बारे मां ठीक डंगे सेइं इतिहासेरी किताब लिखी। 4 अवं चाताई कि तीं पतो लग्गे कि यीशुएरे बारे मां तैना गल्लां सच्चि आन, जैन केरे बारे मां तुसन शिक्षा मैल्लोरी थी।

११११११११११ ११११११११११ ११११११११११ ११११११११ १११११ १११११११ ११ ११११११११ ११११११११ ११११११११११
११११११ ११११११

5 यहूदिया इलाके मां, जैखन हेरोदेस राजो राज करतो थियो, त तैखन जकर्याह नंवेरो अक यहूदी याजक* थियो। तै मैन्हु याजकां केरे टोली मां अबिय्याह नंवेरो टोली मरां थियो। तैसेरी कुआन्शारू नव एलीशिबा थियूं। एलीशिबा हारूनेरे खानदेनी मरां थी, (हारून इस्राएल लोकां केरो पेइलो याजक थियो)। 6 तैना दुइये प्रभु-परमेशेरी नजरी मां धर्मी थियां ते कने परमेशेरे सारे कानून ते सारे हुक्मन पुड़ बेइलजाम चलनेबालां थियां। 7 पन तैन केरि कोई औलाद न थी, किजोकि एलीशिबा बाँझ थी, ते तैना दुइये बुढां थियां।

8 एक्की फेरे, जकर्याहेरी टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशेरी हजरी मां अपनू याजकेरू कम लोगोरो थियो केरने। 9 याजकां केरे रीतरे मुताबिक तैनेई परची छेडतां जकर्याह चुनो कि तै प्रभु-परमेशेरे मन्दरे मां गेइतां गुग्गल बाले। 10 जैखन तै गुग्गल बालने लोरो थियो, त तैखन मैन्हु केरि सारी भीड़ मन्दरेरे बेइर प्रार्थना केरि राओरी थी। 11 तैखन अचानक प्रभु-परमेशेरो अक स्वर्गदूत गुग्गल बालनेरी ठारारे देइने पासे खड़े भोइतां जकर्याह लेइहोव। 12 जैखन जकर्याहे स्वर्गदूत लाव, त तै घेमरोव ते बड़ो डेरि जेव। 13 पन स्वर्गदूते तैस सेइं ज़ोवं, “हे जकर्याह, न डर! जैखन तीं प्रार्थना की, त परमेशे तेरी प्रार्थना शुनी। एल्हेरेलेइ, तेरी कुआन्श एलीशिबाई मट्टू भोनूए, ते तू तैसेरू नव यूहन्ना रेख्वां। 14 तैसेरे जर्म भोने सेइं तू बड़ो खुश भोलो। त बड़े लोक भी खुश भोले। 15 तै प्रभु-परमेशेरी नजरी मां महान भोलो, ते तैनी कोन्वी भी किसमेरी नशे बाले चीज त कने शराब कधे न लोड़े पियोरी, ते तै अपनि अम्मारे पेटे मां भोते वक्तेरां परमेशेरी पवित्र आत्मारी शेक्ति सेइं भरपूर भोलो। 16 तै इस्राएली लोकन मरां बड़े लोक परमेशेरे पासे जै तैन केरो प्रभु परमेशेरे वापस तैस कां आनेलो, जैना अपने पापां केरि वजाई सेइं परमेशे करां दूर भोरे थिये। 17 ते तै एरो मैन्हु भोलो जैस पुड़ एलिय्याहरी आत्मा ते कने शक्ति भोली। तै परमेशेरी बत तियार केरेलो, तैस अग्री-अग्री चल्लेलो ताके हाज बव्वां केरो दिल औलादरे पासे ते परमेशर न मन्नेबाले लोकन धर्मी लोकां केरे बत्तां केरे पासे बदलेलो, ताके जैखन प्रभु एज्जे त लोक तियार भोन।”

18 जकर्याहे स्वर्गदूते पुच्छू, “अवं केन्चरे मेन्नी एन असन सेइं भोनूए, अवं त बुढोइं ते मेरी कुआन्श भी बुढी भोरीए।” 19 स्वर्गदूते जुवाब दित्तो, “अवं जिब्राईल आई अवं परमेशेरे कां खड़ो भोताई, अवं एल्हेरेलेइ भेजोरोई, कि अवं तीं सेइं गल केरि ते तीं ए खुशखबरी शुनेई। 20 ते हेर जां तगर एना गल्लां पूरी न भोन तेरी ज़बान बंद भोली, ते तू गल न केरि सकेलो किजोकि तीं मेरी गल्लां केरू याकीन नई कियेरू जैना अपने वक्ते पुड़ पूरी भोनिन।” 21 ते जैखन जकर्याह ते स्वर्गदूत मन्दरे मां गल्लां लोरे थिये केरने त लोक मन्दरेरे बेइर अंगने मां जकर्याहे बलगने लोरे थिये, तैना बड़े हैरान भोइजेइ कि जकर्याहे मन्दरे मां एतूरू चिरि किजो लाव। 22 जैखन तै बेइर निस्सो, त तै कुजी न बटो ते तैन लोकेई बुझी छूडू, कि एनी मन्दरे मां किछू दर्शन लाहेरूए किजोकि तै इशारो केरतो थियो, पन कुजी न थियो बटतो। 23 जेइस यरूशलेम नगरेरे मन्दरे मां जकर्याहरू एक्की हफतेरे याजकेरी सेवारू कम पूरू भोवं, त तै अपने घरे जो चल्लो जेव।

* 1:5 1:5 याजक याजक यहूदी मन्दरे मां सेवा करनेबालो अक सेवक भोतो थियो, तै बलिदानां चाढ़नेरि सेवा केरतो थियो जैना लोक मन्दरे मां आनते थिये।

24 किछु वक्तेरां बाद तैसेरी कुआन्श एलीशिबा दोजींतीए भोइ, ते तै पंच महीन्न तगर बेइर लोकन मां न जेई । तैसां ज़ोवं, 25 “प्रभुए मीं पुड़ दया केरतां केतरू महान कम कियूं, ते अवं दोजींती भोइ, ते ज़ैस गल्लरे वाजाई सेइं लोक मीं घटिया समझते थिये, तै गल दूर की ।”

????????? ?????????? ?????

26 एलीशिबारे दोजींती भोनेरे शइयोवं महीने जिब्राईल स्वर्गदूत परमेशेरी तरफां गलील इलाकेरे नासरत नगरे मां, 27 एक्की अड्लैई कुइये कां भेजो । तैसारी कुइमाइ दाऊदेरे खानदाने मरां एक्की मड्दे सेइं भोरी थी जेसेरू नवं यूसुफ थियूं, ते तैस कुइयरू नवं मरियम थियूं । 28 स्वर्गदूते तैस कां एइतां ज़ोवं, “आनन्द ते ज़ीत तेरी भोए, तीं पुड़ परमेशेरी बड़ी दया भोरीए, प्रभु तीं सेइं साथिये!” 29 मरियम स्वर्गदूतेरी गल शुन्तां परेशान भोइतां सोचने लगी एन केरहु नमस्कारे? 30 स्वर्गदूते तैस सेइं ज़ोवं “हे मरियम, डर न, किजोकि परमेशेरो तीं पुड़ बड़ो अनुग्रह भोरोए । 31 तू दोजींती भोली तीं अक मट्टू भोलू, ते तू तैसेरू नवं यीशु रेखां । 32 तैन महान भोलू ते तैस जो परमप्रधान परमेशेरू मट्टू ज़ोले, ते परमेश तैस तैसेरे पूर्वज दाऊद राजेरू जेरो राजो बनालो । 33 ते तै याकूबेरे खानदाने पुड़ हमेशा राज करेलो, ते तैसेरू राज कधे खतम न भोलू ।” 34 मरियमा स्वर्गदूते पुच्छू, “एन केन्चरे भोइ सकते? अवं त अड्लाइ आई ।” 35 स्वर्गदूते जुवाब दित्तो, “पवित्र आत्मा तीं पुड़ उतरेलो, ते परमप्रधान परमेशेरी शक्ति तीं पुड़ सैयो केरेली एल्हेरेलेइ तै बच्चो ज़ै जर्मएलो तै पवित्र भोलो तैस जो परमेशेरू मट्टू ज़ोले । 36 ते हेर तेरी रिशतेदार एलीशिबाई भी बुढ़े बारे मट्टू भोने बालूए तैस जो लोक बाँझ ज़ोते थिये, तैस दोजींती शा महीने भोरेन । 37 किजोकि परमेशेरे लेइ किछु भी नमुमकिन नई ।” 38 मरियमा स्वर्गदूते जुवाब दित्तो, “अवं परमेशेरी सेवा केरती ज़ैन तीं ज़ोरूए तैन भोए ।” तैखन स्वर्गदूत तैस करां चलो जेव ।

????????? ?????????? ?????? ??????????

39 किछु दिहाइन पत्ती मरियम तियार भोइतां यहूदियारे इलाकेरे एक्की पहाड़ी नगरे मां जेई । 40 ते जकर्याहरे घरे मां गेइतां एलीशिबा जो नमस्कार कियूं । 41 ज़ैखन एलीशिबा मरियमारू नमस्कार शुनू त बच्चो तैसारे पेटे मां उछड़ने लगो ते एलीशिबा पवित्र आत्माई सेइं भेरोई जेई । 42 ते बड़े ज़ोरे सेइं ज़ोने लगी, “तू कुआन्शन मां धन आस ते ज़ै बच्चो तीं ज़ानोए तै भी धने! 43 ते मेरे लेइ बड़ी इज्जतरी गल आए कि, मेरे प्रभुएरी अम्मा मीं कां आई! 44 किजोकि हेर ज़ेरि तेरे नमस्कारेरी आवाज़ मीं शुनी त बच्चे खुशी सेइं मेरे पेटे मां छालां लगो मारने । 45 तू धन आस तीं तैन गल्लन पुड़ विश्वास कियो ज़ैना प्रभुए तीं सेइं ज़ोई कि, तैना पूरी भोली ।”

????????? ?????????? ?????? ?????

46 ते मरियमा ज़ोवं,
“अवं प्रभुएरी तारीफ़ केरती ।

47 ते मेरी आत्मा मेरे मुक्ति देनेबाले
परमेशे सेइं खुशी भोइ ।

48 किजोकि तैनी अपनि सेवा केरने बैलरी गिरोरी हालती पुड़ नज़र की,
अज़ेरां देइतां हर ज़मानेरे लोक
मींजो धन ज़ोले ।

49 किजोकि परमेशेरे मेरे लेइ बड़ां-बड़ां
कम्मां कियोरन ते तैसेरू नवं पवित्र भोए ।

50 तैसेरी दया तैस करां डरने बालन
पुड़ पीड़ी-पीड़ी तगर राचे ।

51 तैनी अपने शेक्ति सेइं बड़ां-बड़ां कम्मां कियोरन
तैनी घमण्डी तितर-बितर किये ।

52 तैनी राजे राज करेने करां रोके,
ते तैनी नम्र लोकन आदर दित्ती ।

53 तैनी नियन्ने रोड़ी-रोड़ी चीज़ेइं सेइं रज़ाने
ते धन दौलती बाले खाली हथेइं भेजे ।

54 तैनी अपने वादे ज़ैना तैनी इशे दादन-पड़दादन सेइं कियोरे थिये याद किये, तैनी अपनि सेवा केरनेबाले
इस्राएली लोकां केरि महत की,

55 तैनी हमेशारे लेइ अब्राहमे पुड़ ते तैसेरी औलादी पुड़ दया केरनि याद रख्खी।”

56 मरियम कोई ट्लाई महीन्न तगर एलीशिबा सेइ साथी राई ते फिरी अपने घरजो आई।

????????? ?????????? ?????????? ??????

57 एलीशिबारो गल्हे बिशनेरो वक्त एज्जी अव ते तैस मट्टू भोवं। 58 तैसारे आसेपासेरे रिशतेदारेइ एन शुनू कि परमेशेर तैस पुड़ बड़ी दया कियोरिये ते तैस सेइ साथी खुशी मनाई। 59 अठोवं दिहाड़े तैना मट्टेरो खतनो केरने आए, ते तैना तैसेरू नवं तैसेरे बाजी केरे नव्वे पुड़ जकर्याह रखनू चाते थिये। 60 पन तैसेरी अम्मा ज़ोने लगी, “नई एसेरू नवं यूहन्ना भोलू।” 61 किछ तैस जो ज़ोने लगे, “तुशशी खानदेनी मां कोई भी एस नव्वेरो नई।” 62 तैखन तैन लोकेई जकर्याहरे पासे इशारे सेइ पुच्छू कि तू मट्टेरू नवं कुन रखनू चातस? 63 ते तैनी पटारी मगी ते तैस पुड़ लिखू, “एसेरू नवं यूहन्ना आए,” ते सब लोक हैरान रेइजे। 64 तैखने तैसेरी जिभ खुल्ली ते जकर्याह गल्लां लगो केरने ते परमेशेरी तारीफ़ केरने लगो। 65 ते आसे-पासेरे लोक एस तमाशे हेरतां हैरान रेइजे, ते यहूदियारे इलाकेरे एक्की पहाड़ी नगर मां एस गल्लरी चरचा भोने लगी। 66 ते शुन्ने बाले अपने-अपने मन्न मां सोचते थिये, “एन मट्टू बड्डू भोइतां केरहु भोनूए?” किजोकि परमेशेरी शक्ति अज्जेरी देंतीं एस सेइ साथीए?

????????? ?????????? ?????????? ?????????? ?????????? ??????????

67 तैखन तैसेरो बाजी जकर्याह पवित्तर आत्माई सेइ भेरोवं ते भविष्यवाणी केरने लगो।

68 “प्रभु इस्राएलेरो परमेशर धन भोए, किजोकि तैनी एइतां अपने लोकन मुक्ति दितोरिये।

69 ते तैसेरे दास दाऊदेरे घराने मरां इशशे लेइ अक मुक्ति देनेबालो भेजोरोए।

70 (बड़े पेइले जेन्चरे पवित्तर नेबी केरे ज़िरिये ज़ोरू थियूं, जैन शुरू करां देंते ओरूए।)

71 असां अपने दुश्मन करां ते बैर रखने बालन करां मुक्ति हासिल केरम।

72 ते तै इशशे दादे पड़दादन पुड़ दया केरे ते अपनो पवित्तर करार याद केर।

73 तै करार जै तीं इशशे पूर्वज अब्राहमे सेइ कियोरो थियो।

74 कि तै असन हिम्मत देलो, कि असां अपने दुश्मन करां बगैर केन्ची भी डरे सेइ बेंची सखम।

75 ते अपनि जिन्दगी तैस सोंफम ते सारी जिन्दगी पवित्त्रेइ ते धार्मिकता ज़ीम।

76 ते हे बच्चां तू नबी भोलो किजोकि तू परमेशेरे अग्री-अग्री चेलतां लोकन तियार केरेलो कि परमेशर एजनोए।

77 तै अपने लोकन तैन केरे पाप माफ़ केरनेरे ज़िरिये मुक्तरे बारे मां ज्ञान देलो।

78 ते इशशे परमेशेरी दया एरी भोली जेन्चरे दिहाड़ो लौ देते तेन्चरे मसीह स्वर्गेरां एज्जेलो।

79 ताके तैन केरे लेइ जैना पापे मां जीतन ते हमेशारे मौतरे खतरे मां रातन लौ दे, ते तै असन बत हिराए ताके अस सुखे सेइ जिन्दगी ज़ीम।”

80 तैन मट्टू यानी यूहन्ना बेडोतो जेव ते आत्माई मां बद्धतो जेव ते इस्राएलेरे लोकन प्रचार केरने तगर सुनसान ठैरन मां राव।

2

????????? ??????
(????????? 1:18-25)

1 तैन दिहैडन मां रोम मुलखेरे महाराजे औगुस्तुसे एलान कियूं कि, दुनियारे सारे मैन्हु केरि गिनती की गाए। 2 ए पेइली मैन्हु केरि गिनती थी, जै सीरिया इलाकेरे गवर्नर क्विरिनियुसेरे वक्ते मां भोइ। 3 ते सारे लोक, मैन्हु केरि गिनतरे लेइ नव लिखाने अपने-अपने पूर्वजां केरे नगर जो चले जे। 4 यूसुफ भी गलील इलाकेरे नगर नासरते मरां यहूदिया इलाके मां दाऊदेरे नगर बैतलहम मांजो चलो, किजोकि तै दाऊद राजेरे खानदाने मरां थियो। 5 ताके तैड़ी मरियमी सेइं साथी जैस सेइं तैसेरी कुड़माइ भोरी थी ते तै दोजींती थी नव लिखाए। 6 तैन केरे तैड़ी रेइतां तैसारे गल्हे बिशनेरो वक्त अव। 7 ते तैस पेइलू मट्टू भोवं ते तैसां तैन फैल्हड़ी मां पलेटतां खुरली मां रखू किजोकि तैन धर्मशाली मां कोन्च ठार न थी मैल्लोरी।

??

8 किछ पुहाल राती एक्की डलबड़े मां गब्बां केरो पैरहो केरते थिये। 9 ते परमेशेरो स्वर्गदूत तैन कां बांदो भोव ते परमेशेरी महिमारी लौ तैन केरे च्चेरे पासन बलने लगी ते तैना बड़े डेरि जे। 10 तैखन स्वर्गदूते तैन जो ज़ोवं, “डरा नन्ना, किजोकि अवं तुसन अक बड़ी खुशखबरी शुनाने ओरोई, जै खुशी सैरी लोकां केरे लेइ भोली। 11 अज्र बैतलहमे मां जैन दाऊद राजेरू नगर थियूं, तुशे लेइ अक मुक्ति देनेबालो ज़रमोरोए यानी यीशु मसीह प्रभु। 12 तैसेरो तुशे लेइ ए निशान भोलो कि तुसन अक मट्टू फैल्हड़ी मां पलेटटेरू गाल्हरे बेइर खुरली मां मैलेलू।” 13 ते अकदम तैस स्वर्गदूते सेइं होरे भी स्वर्गदूत बांदे भोए ते तैना परमेशेरी तारीफ़ केरने लगे ते एन ज़ोने लगे, 14 “स्वर्गे मां परमेशेरी महिमा भोए, ते ज़मीनी पुड़ तैन मैनन् शान्ति मैल्ले, जैन पुड़ परमेशर खुशे।”

15 जैखन स्वर्गदूत पुहालां केरे सामने वापस स्वर्गे मांजो चले जे। पुहाल एप्पू मांमेइं ज़ोने लगे, “एज्जा अस बैतलहम नगरे मां गाम जै बिस्तार प्रभुए असन दित्तोरोए तैस हेरम।” 16 एल्हेरेलेइ तैना लूशी तैट्टां चले जे ते तैड़ी पुजे ते सच्च्चे तैड़ी मरियम, यूसुफ ते निकडो बच्चो फैल्हड़ी मां पलेटटोरो गोरू केरि गाल्हरे बेइर खुरली मां मैल्लो। 17 ते पुहाल एन हेरतां जै गल तैन एस बच्चेरे बारे मां ज़ोरी थी सेब्बन सेइं ज़ोने लगे। 18 पुहालां केरि गल्लां शुन्तां सारे लोक हैरान रेइजे। 19 पन मरियम सैरी गल्लां अपने दिले मां रेखतां सोचने लगी। 20 ते पुहालन जेन्चरे तैनी स्वर्गदूते ज़ोरू थियूं, तैनेई अपनि एछ्छेई तैन सब किछ लेइतां परमेशेरी तारीफ़ केरते वापस घरजो चले जे।

????????????????????????????????????

21 अठोवं दिहाड़े जेइस तैसेरो खतनो केरनेरो वक्त अव त तैसेरू नव यीशु रखू। एन तैन नव आए, जैन स्वर्गदूते मरियमारे दोजींतीए भोने करां पेइले रखेरू थियूं।

????????????????????????????????????

22 जैखन मूसेरे कानूनेरे मुताबिक तैसेरे शुच्चे भोनेरे दिहाड़े पूरे भोए, त यूसुफे ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन। 23 जेन्चरे प्रभुएरे कानूने मां लिखोरूए, “सारां पेइलां मट्टां परमेशेरे लेइ पवित्र भोलां।” 24 जेन्चरे प्रभुएरे कानूने मां लिखोरूए कि, “अक जोड़ी गुधू केरि या कबूतरेरे दूई बच्चे बलिदानेरे लेइ आन।”

????????????????????

25 तैस वक्ते यरूशलेम नगरे मां अक मैन्हु थियो, तैसेरू नव शमौन थियूं, तै बड़ो धर्मी ते भक्त मैन्हु थियो, तै मसीह बलगने लोरो थियो, कि तै एज्जेलो ते इस्राएली लोकन शान्ति देलो, ते तैस पुड़ पवित्र आत्मा थियो। 26 पवित्र आत्मा तैस पुड़ बांदू कियूं, कि ज़ां तगर तू प्रभुएरे मसीह न लाएलो तांतगर न मरेलो। 27 तैस दिहाड़े शमौन पवित्र आत्मा चलाव, तै आत्मिक शेक्ति सेइं मन्दरे मां अव तैखन यीशु भी तैसेरे अम्मा बाजेई अन्तर आनोरो थियो, कि तैसेरेलेइ मूसेरे कानूनेरे मुताबिक कमाम। 28 त शमौने बच्चो कुम्मे मां ट्लातो ते परमेशेरी तारीफ़ केरने लगे।

29 “हे प्रभु तीं जै अपनो वादो कियोरोए अपने दासे आनन्दे सेइं मरने दे।

30 किजोकि मीं अपने एछ्छेई सेइं मुक्ति देनेबालो लाव, जै तीं सैरी लोकां केरे लेइ भेजोरोए।

31 जै तीं सैरी कौमां केरे सामने तियार कियोरोए।

32 तै, परमेशर गैर कौमन पुड़ बांदो केरनेरे लेइ लौ आए,

ते इस्राएली लोकां केरे लेइ अक बड़ी महिमा भोए ।”

३३ यीशुएरे अम्मा बाजी शमौनेरी एना गल्लां शुन्तां हक्के-बक्के भोए । ३४ तैखन शमौने तैन बरकत दिक्ती, ते तैसेरी अम्मा मरियम सेइं ज़ोवं, “हेरा, इन मट्टू एल्हेरेलेइ ठहरावरो, कि इस्राएले मां बड़े लोकां केरे लेइ नाश भोनेरी ते मुक्ति मैलनेरी वजा भोए, तै परमेशेरी तरफां अक निशान आए पन बड़े लोक तैसेरे खलाफ भोले । ३५ ताके बड़े दिलां केरे खियाल खुल्ली गान ते तीं बड़ो दुःख भोनेए ज़ेन्चरे तलवार कटतीए ।” ३६ तैड़ी अक कुआन्श थी ज़ै नबिन थी, तैसारू नवं हन्नाह थियूं, अशेरेरे खानदाने मरां अक मैन्हु ज़ेसेरू नवं फनूएल थियूं, हन्नाह तैसेरी कुई थी तै बड़ी बुढी थी तै अपने इलाहेरां बाद सत साल अपने मुन्शे सेइं साथी रहोरी थी । ३७ तै विधवा थी तैसारी उमर चूरासी साल थी तै मन्दरे मरां न थी गाती ते रात दिहैड़ी प्रार्थना ते कने बरतां रखती ते परमेशेरी आराधना केरती रहती थी । ३८ तैखन तै भी तैड़ी एइतां परमेशेरू शुक्र केरने लगी ते बच्चेरे बारे मां तैन सेब्भन सेइं गल्लां लाई केरने, ज़ैना बलगने लोरे थिये कि परमेशेरे यरूशलेम नगरेरे लोकन छुटानेरे लेइ मसीह भेज्जोए ।

३९ ज़ैखन मरियम ते यूसुफे मूसेरे कानूनेरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे । ४० तैन मट्टू बडोतू जेवं ते अक्लमन्द भोतू जेवं किजोकि परमेशेरो तैस पुइ बड़ो अनुग्रह थियो ।

४१ यीशुएरे अम्मा बाजी हर साल फ़सह तिहारेरी दिहाड़ी बनाने यरूशलेम नगरे मां गाते थिये । ४२ ज़ैखन यीशु १२ सालां केरो भोव त तैना रीतरे मुताबिक यरूशलेम नगरे मां जे । ४३ ज़ैखन तिहार बीतू त यीशुएरे अम्मा बाजी वापस घरजो आए त यीशु यरूशलेम नगरे मां रेइ जेव ते तैसेरे अम्मा बाजी कोई पतो न थियो । ४४ तैनेई बुझू कि यीशु होरि मैनन् सेइं साथी अग्रोवं जोरोए, तैना अपने रिशतेदारन ते ज़ान पिशानी बालन मां तोपने लगे । ४५ ज़ैखन तैन यीशु न मैल्लो त तैना वापस तोपते-तोपते यरूशलेम नगरे मां पुजे । ४६ टलेइयोवं दिहाड़े तैन यीशु मन्देरेरे अंगने मां बुज़ुर्ग लोकन सेइं गलबात केरतो ते तैन सेइं सवाल जुवाब केरतो मैल्लो । ४७ ज़ैना लोक तैसेरी गल्लां शुन्ने लोरे थिये तैना यीशुएरी गल्लां शुन्तां हैरान रेइजे । ४८ ज़ैखन तैसेरे हाज बव्वेई यीशु लाव त तैना हैरान रेइजे ते ज़ोने लगे, “मट्टां तीं असन सेइं एन कुन कमाव? तेरे हाज बव तीं तोपते-तोपते परेशान भोइ जे ।” ४९ यीशु तैन सेइं ज़ोवं तुस मीं किजो तोपने लगगोरो थिये? “तुसन पतो नई कि मीं अपने बाजेरे घरे मां रानू ज़रूरी थियूं?” ५० पन तैन तैना गल्लां केरि समझ न आई कि, एन केरो कुन मतलब आए । ५१ तैखन तै अपने अम्मा बाजी सेइं साथी नासरत नगरे मां अव ते अपने अम्मा बाजी कां राव ते मरियमा एना सैरी गल्लां अपने दिले मां रेख्खी । ५२ यीशु अक्ली मां भी ते कदे मां भी बेडोतो जेव ते परमेशेरी ते इन्सानेरी कृपाई मां बद्धतो जेव ।

3

१ (३:१-१२; १:१-८; १:१९-२८)

१ तिबिरियुस महाराजरे हुकुमतरे परनोहूँ साले मां ज़ेइस पुन्तियुस पिलातुस यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो, तैसेरो दूला फिलिप्पुस इतूरैया ते त्रखोनीतिस इलाकां केरो गवर्नर थियो, लिसानियास, अबिलेन इलाकेरो गवर्नर थियो । २ तैस वक्ते हन्ना ते कैफा महायाजक थिये, तेइस परमेशेरे जकर्याहरे मट्टे यूहन्ना सेइं गल्लां की । ज़ैन सुनसान ठैरी मां रातू थियूं । ३ ते यूहन्ना यरदन दरियारे आसेपासेरे इलाकन मां गेइतां ई प्रचार केरने लगे, कि अपने पापन करां मनफिराथ, ते बपतिस्मो नेथ ताके परमेशेर तुशशे पाप माफ़ केरे । ४ ज़ेन्चरे यशायाह नेबेरी किताबी मां लिखोरूए, “सुनसान ठैरी मां फुकारने बालेरी आवाज़ एइचे कि, ‘प्रभुएरी बत बनाथ ते तैसेरी बत्तां पैठ्ठी केरा ।’”

५ “डुग्धी ठारां सैरी भेरोई गैनिन,
हर अक पहाड़ ते च़ौदु बछ़ोइनोए

ते ज़ैना टलेढी बत्तन तैना सिधी केरनिन ज़ैना उन्ढी उबरिन तैना पैठ्ठी केरनिन ।

6 ते सब लोक तैस हेरेले, जै परमेशरे तैन मुक्ति देने भेजोरोए।”

7 ते यूहन्ना तैन लोकन सेइं ज़ोवं, ज़ैना जथन मां तैस करां बपतिस्मो नेने ओरे थिये, “तुस ज़ेहरीले सप्पेरे ज़ेरे बुरे आथ! तुसन केनि ज़ोवं कि, एजनेबाले परमेशेरे कोपे करां नशशा? 8 बस्सा, सज़ाई करां बचनेरे लेइ तैना कम्मां केरा, ज़ैन सेइं पतो लगगे तुसेईं सच्चे पापन करां मन फिरावरोए। ते अपने-अपने मने मां एन न ज़ोथ कि, अब्राहम जेन्चरे इशशो बाजीए, किजोकि अवं तुसन सेइं ज़ोताई कि परमेशर इन घोड़न मरां अब्राहमेरे लेइ औलाद पैदा केरि सकते। 9 ते हुन्ना त बुट्टां केरे ज़ीलन पुड़ परमेशेरो मैक्कु रख्वोरोए, एल्हेरेलेइ ज़ै कोई तैस बुट्टेरो जेरो भोते, ज़ै रोड़ो फल न दे, तै कटनोए ते अग्गी मां छडनोए।” 10 लोकेई तैस पुच्छू, “फिरी असां परमेशेरी सज़ाई करां केन्चरे बचम?” 11 यूहन्ना तैन सेइं ज़ोवं, “ज़ैस कां दूई कुरतेन त अक कुरतो तैस देथ ज़ैस कां अक भी नई ते ज़ैस कां रोट्टी आए त तै भी रोट्टी बंटे ज़ैन कां नई।” 12 ते धड़त नेनेबाले भी बपतिस्मो नेने ओरे थिये तैनेई तैस पुच्छू, “हे गुरु जी असां कुन केरम?” 13 तैनी तैन सेइं ज़ोवं, “ज़ैन तुशशे लेइ सरकारी कानूनेरे हिसाबे सेइं रख्वोरूए तैस करां जादे धड़त न नेइयथ।” 14 ते तैखन होरि सिपाहीएइ भी तैस पुच्छू, “असां कुन केरम?” यूहन्ना तैन सेइं ज़ोवं, “केन्ची पुड़ ज़ुलम केरतां बेहक न नेइयथ, ते न केन्ची पुड़ झूठो दोष लेइयथ, पन अपनि तनखुवाही पुड़ गुज़ारो केरथ।”

15 तैखन लोक इतज़ारे मां थिये कि, मसीह जल्दी एजनोए, ते सब लोक अपने दिले मां यूहन्नारे बारे मां सोचते थिये कि ज़ै ओरोए तै मसीह आए या नई? 16 ते यूहन्ना तैन जुवाबे मां तैन सेइं ज़ोवं, “अवं त तुसन पैनी सेइं बपतिस्मो देताई पन ज़ै मीं करां महाने तै एजनेबालो आए। अवं तैसेरो गुलाम बेनतां तैसेरी जुट्टी केरे तसमे भी खोलनेरे काबल नई। तै तुसन पवित्त्र आत्माई ते अग्गी सेइं बपतिस्मो देलो। 17 तैसेरू छज्ज तैसेरे हथ्ये मां आए ते तै खलाइ रोड़ेचारे साफ केरेलो, ते गेहुं अपने कोठारे मां रखेलो पन झाझी तैस अग्गी मां फुकेलो ज़ै कधी हिशनेरी न भोली।”

18 बस्सा तै बड़े रोड़ेचारे लोकन समझेइतां परमेशेरी खुशखबरी शुनातो राव। 19 हेरोदेस च़ेवरोवं मुलखे पुड़ राज़ केरतो थियो। यूहन्ना तै झिड़कावरो थियो, कि हेरोदेस अपने दूला फिलिप्पुसेरी कुआन्श हेरोदियास ज़ै थी तैस सेइं इला कियोरो थियो, ते होरां भी बड़ां बुरां कम्मां कियोरां थियां। 20 हेरोदेस एन सेब्बन करां जादे बुरू कम कियूं कि यूहन्ना कैद केरतां छड्डो।

[\[?\]\[?\]\[?\]\[?\]\[?\] \[?\]\[?\]\[?\] \[?\]\[?\]\[?\]\[?\]\[?\] \[?\]\[?\]\[?\]](#)
([\[?\]\[?\]\[?\]\[?\] 3:13-17](#); [\[?\]\[?\]\[?\]\[?\] 1:9-11](#))

21 ज़ैखन सब लोक बपतिस्मो नेने लोरे थिये त यीशुए भी बपतिस्मो नीयो, ते ज़ैखन तै प्रार्थना लोरो थियो केरने, त एरू भोवं कि स्वर्ग खुल्ली जेवं। 22 ते पवित्त्र आत्मा कबूतेरी शकली मां यीशु पुड़ उत्तरो ते अम्बरे मरां ई आवाज़ आई, “तू मेरू टलारू मट्टू आस, अवं तीं पुड़ बड़ो खुश आई।”

[\[?\]\[?\] \[?\]\[?\]\[?\]\[?\] \[?\]\[?\]\[?\]\[?\] \[?\]\[?\]\[?\]\[?\]](#)
([\[?\]\[?\]\[?\] 1:1-17](#))

23 ज़ैखन यीशुए अपने सेवारू कम शुरू कियूं त तैसेरी उमर 30 साल थी (जेन्चरे समझू गातू थियूं) एन यूसुफेरू मट्टूए, ते तैन एलेरू 24 एली मत्तातेरू ते तैन लेवेरू ते तैन मलकेरो ते तैन यन्नेएरो ते तैन यूसुफेरू मट्टू थियूं, 25 ते तैन मत्तित्याहेरू ते तैन आमोसेरो ते तैन नहूमेरू ते तैन असल्ल्याहेरू ते तैन नग्गईएरू मट्टू थियूं। 26 ते तैन मत्तातेरो ते तै मत्तित्याहेरू ते तैन शिमीएरू ते तैन योसेखेरू ते तैन योदाहेरू मट्टू थियूं। 27 ते तैन यूहन्नारू ते तैन रेसारू ते तै जरुब्बाबेलेरू ते तैन शालतियेलेरू ते तैन नेरेरू मट्टू थियूं। 28 ते तैन मलकीएरू ते तैन अद्दीयेरू ते तैन कोसामेरू ते तैन एल्मदामेरू ते तैन एरेरू मट्टू थियूं। 29 ते तैन येशूएरू ते तैन एलीएजेरेरू ते तैन योरीमेरू ते तैन मत्तातेरू ते तैन लेवेरू मट्टू थियूं। 30 ते तैन शमौनेरू ते तैन यहूदेरू ते तैन यूसुफेरो ते तैन योननेरू ते तैन एलयाकीमेरू मट्टू थियूं। 31 ते तैन मलेआहेरू ते तैन मिन्नाहेरो ते तैन मत्ततेरो ते तैन नातानेरो ते तैन दाऊदेरू मट्टू थियूं। 32 ते तैन यिशूएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरू मट्टू थियूं। 33 ते तैन अम्मीनादाबेरू ते तैन अरनेरू ते तै हेस्रोनेरू ते तैन पेरेसेरू ते तैन यहूदेरू मट्टू थियूं। 34 ते तैन याकूबेरू ते तैन इसहाकेरो ते तैन अब्राहमेरू ते तैन तेरहेरो ते तैन नाहोरेरू मट्टू थियूं। 35 ते तैन सरूगेरो ते तैन रऊएरो ते तैन पेलेगेरो ते तैन एबेरेरू ते तैन शिलहेरू मट्टू थियूं। 36 ते तैन केनानेरू ते तैन अरफक्षदेरो ते तैन शेमेरो ते

तैन नूहेरो ते तैन लेमेकेरू मट्टू थियूं। 37 ते तैन मथूशिलहेरू ते तैन हनोकेरो ते तैन यिरिदेरू ते तैन महललेलेरू ते तैन केनानेरू मट्टू थियूं। 38 ते तैन एनोशेरू ते तैन शेतेरू ते तैन आदमेरो ते तैन परमेशेरू मट्टू थियूं।

4

ⓄⓄⓄⓄⓄⓄ ⓄⓄⓄⓄⓄⓄ
(ⓄⓄⓄⓄⓄ 4:1-11; ⓄⓄⓄⓄⓄ 1:12-13)

1 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाडे पवित्र आत्मा रे चलाने सेइं सुनसान टैरी जो चलो जेव। 2 तैन 40 दिहाडन मां शैतान तैस अजमातो राव, तैन दिहैडन मां तैनी किछ न खाव पीवं ते जैखन तैना दिहाडे पूरे भोए त तैस ढलुख लगगी। 3 शैताने तैस जो ज़ोवं, “अगर तू परमेशेरू मट्टू आस त इन घोडन जो जो कि एना रोट्टी बन्न।” 4 यीशु तैस जुवाब दित्तो, “पवित्रशास्त्रे मां लिखोरूए, ‘मैन्हू सिर्फ रोट्टेइं सेइं जीतो न राए।’” 5 फिरी शैताने यीशु एक्की उच्चे पहाडे पुड घिन्तां जेव ते तैट्टां एक्की पले मां तैस तैडी दुनियारां सारां राज्जां हिरां। 6 ते तैनी यीशु सेइं ज़ोवं, “एन सब किछ मेरे अधिकारे मां आए, ते एसेरी सारी धन दौलत अवं तीं देलो एन मेरे स्पुर्दे। अवं जैस चाताई तैस देइ सकताई। 7 बस अगर तू मीं कां मथ्यो टेकस त एन सब किछ तेरू भोलू।” 8 यीशुए तैस जुवाब दित्तो, “पवित्रशास्त्र मां लिखोरूए, ‘तू सिर्फ अपने परभु परमेशेरे कां मथ्यो टेकतां ते सिर्फ तैसेरी भक्ति केरां।’” 9 ते तैनी यीशु यरूशलेम नगरेरे मन्देरी उच्ची छम्पी पुड नेइतां खडो कियो ते तैस सेइं ज़ोवं, “अगर तू परमेशेरू मट्टू आस त अपनो आप इट्टां उन्ढो बछोड। 10 किजोकि पवित्रशास्त्रे मां लिखोरूए, ‘तै तेरे लेइ अपने स्वर्गदूतन ज़ोलो ते तैना तेरी हफाजत केरेले।’ 11 ते तैना तीं अपने हथ्यन पुड छूले ताके एरू न भोए कि तेरे पावन घोडन सेइं ठोकर लगगे।’” 12 यीशु तैस जुवाब दित्तो, “पवित्रशास्त्रे मां इन भी लिखोरूए तू अपने परभु परमेशेरी अजमैइश न केरां।” 13 जैखन शैताने तैसेरी बडे तरीकेई अजमैइश की, त किछ चिरेरां बाद तैस करां चलो जेव।

ⓄⓄⓄⓄⓄⓄ ⓄⓄⓄⓄⓄⓄ ⓄⓄ ⓄⓄⓄⓄ
(ⓄⓄⓄⓄⓄ 4:12-17; ⓄⓄⓄⓄⓄ 1:14-15)

14 फिरी यीशु पवित्र आत्मा शक्ति सेइं भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ। 15 यीशु तैन केरे प्रार्थना घन मां शिक्षा देतो राव, ते सब लोक तैसेरी तारीफ़ केरते थिये।

ⓄⓄⓄⓄⓄ ⓄⓄⓄⓄ ⓄⓄⓄ ⓄⓄⓄⓄ
(ⓄⓄⓄⓄⓄ 13:53-58; ⓄⓄⓄⓄⓄ 6:1-8)

16 फिरी तै नासरत नगर मां वापस अव ज़ैडी तै पलोरो थियो। अपने रीतरे मुताबिक आरामेरे दिहाडे तै प्रार्थना घरे मां जेव ते वचन पढनेरे लेइ खडो भोव। 17 ते तैस यशायाह नेबेरी किताब दिती ते तैनी खोलतां तैन वचन कडू ज़ैडी लिखेरू थियूं, कि,

18 “परभुएरी आत्मा मीं पुडे,
एल्हेरेलेइ कि तैनी गरीबन खुशखबरी शुनानेरे लेइ
मेरू अभिषेक कियोरूए,
तैनी अवं भेजोरोई कि कैदन हथरां छेइडी (जैना शैतानेरे कब्जे मां आन)
ते कांना केरि एछ्छन ठीक भोनेरी खबर शुनेई, ते
जैन पुड ज़ुलम भोते तैन लोकन आज़ाद केरि।

19 ते तैस वक्तेरू एलान केरि जेइस परमेशर लोकन पुड दया केरेलो।”

20 फिरी तैनी तै किताब बंद केरतां सेवके कां वापस देइतां बिशशी जेव। जेत्ते प्रार्थना घरे मां थिये सब तैसेरां तकते थिये। 21 ते तै तैन सेइं ज़ोने लगो, “अज पवित्रशास्त्रेरू तैन वचन तुशे सामने पूरू भोवं।” 22 ते सब तैसेरी तारीफ़ केरने लगो, ते तैसेरी गल्लन पुड बडो अनुग्रह थियो, जैना गल्लां तैसेरे ऐशेरां निसती थी, ते लोक हैरान भोइतां ज़ोने लगो, “कुन एन यूसुफेरू मट्टू नई?” 23 यीशु तैन सेइं ज़ोने लगो, “ए कहावत तुस मीं पुड ज़ुरुर ज़ोले, ‘कि हे बेईद जी अपनो आप त ठीक केर, जैन किछ असेई कफरनहूम नगर मां केरतू शुनेरूए, तैन इडी अपने नगरे मां भी केर।’” 24 ते तैनी इन भी ज़ोवं, “अवं तुसन सेइं सच ज़ोताई, कि कोई नबी अपने मुलखे मां कबूल न कियो गाए। 25 अवं तुसन सेइं सच ज़ोताई कि एलिय्याह नेबेरे वक्ते मां जैखन साडे ट्लाई साल अम्बर बंद

भोवं (यानी झंझी न भोइ) ते इझी तगर कि सैरी मुलखे मां बड़ो काल पेई जेव ते तैस वक्ते बेड़ि विधवा कुआन्शां इस्राएले मुलखे मां थी। 26 पन एलिय्याह नबी, तैन मरां केन्ची कां नई पन सैदा नगरेरे नेडे सारफत नगर मां एक्की विधवा कां भेजो, जै यहूदी न थी। 27 ते एलीशा नेबेरे जमाने मां इस्राएलेरे मुलखे मां बड़े कोढ़ी थिये पन तैन मरां कोई भी कोढ़े करां साफ न थियो भोरो, पन सिर्फ अक सीरियारो रानेबालो नामान कोढ़े करां साफ भोरो थियो, जै गैर कौमी मरां थियो।” 28 जेतरे लोक प्रार्थना घरे मां थिये एना गल्लां शुन्तां सरकी सेइं लाल-लाल भोइ जे। 29 ते खडे उट्टतां तैस नगर करां बेइर निस्से ते तै तैस पहाड़ेरी चौटी पुड़ घिन्तां जे जैस पुड़ तैन केरू नगर आबाद थियूं, ताके तैस तैट्ठां उन्डे बछोड़तां मारन। 30 पन यीशु तैन मरां निस्तां जलो जेव।

११११११ ११११ ११११ ११११ ११११११ ११११११
(१११११ 1:21-28)

31 फिरी तै गलील इलाकेरे कफरनहूम नगरे मांजो जेव। ते आरामेरे दिहाड़े तैन शिक्षा देने लगगोरो थियो। 32 ते लोक तैसेरी शिक्षा शुन्तां हैरान रहते थिये किजोकि तैसेरी शिक्षा बड़े अधिकारे सेइं थी। 33 प्रार्थना घरे मां अक मैन्हु थियो, जैस पुड़ भूतेरो सायो थियो। तै बड़े ज़ोरे सेइं चिन्डां मारने लगे। 34 “हे नासरत नगरेरे यीशु! असन तीं सेइं कुन कम? कुन तू असन नाश केरनेरे लेइ ओरोस? अवं ज्ञानताई कि तू कौन आस, तू परमेशेरू पवित्र मट्टू आस!” 35 यीशुए तैस झिड़क देइतां ज़ोवं, “चुप रा, एस मैन्हु मरां निस्सी गा!” तैखन भूते तै मैन्हु ज़मीनी पुड़ शैरी दित्तो, ते तैस मरां निस्सी जेव। 36 एन हेरतां सारे लोक बड़े हैरान भोए ते एप्पू मांमेइं ज़ोने लगे, “ए कुन गल आए! तै अधिकारे ते शेक्ति सेइं भूतन हुक्म देते ते तैना तैस मरां निस्सी गातन।” 37 ते सारे मुलखेरे मां च़ेवरे पासन तैसेरी खबर फैली जेई।

११११ १११११११ ११११ ११ ११११ ११११ १११११११
(१११११ 8:14-17; १११११ 1:29-34)

38 फिरी तै प्रार्थना घरे मरां उट्टतां शमौनेरे घरे जेव ते शमौनेरी शिखी बड़ो भुखार थियो, ते लोकेई तैसारे बारे मां यीशु सेइं ज़ोवं। 39 तै खड़ो भोइतां तैसारे पासे फिरो ते बिमारी झिड़की, ते तैसारो सारो भुखार उतरी जेव ते तै खड़ी भोइ, ते तैन केरि सेवा केरने लगी। 40 जैखन दिहाड़ी लाई डुबने त लोकेई तैना सब लोक जैन मां किसमां-किसमां केरि बिमैरी थी तैस कां आने, ते यीशुए तैन पुड़ हथ रेखतां तैना सब बज्झाए। 41 भूतां भी चिन्डां मारतां थियां, ते ज़ोतां थियां, “तू परमेशेरू मट्टूस!” ते बड़े लोकन मरां भूतां केरो सैयो निस्सी जेव, ते तै तैन झिड़कतो थियो, ते तैन गल भी न थियो देतो केरने, किजोकि तैना भूतां ज्ञानतां थियां कि ए मसीह आए।

११११११११११ १११ १११ १११११११ १११११११
(१११११ 1:35-39)

42 जैखन झेझ भोइ त यीशु उट्टतां बेइर एक्की सुनसान ठैरी मां जेव, ते पतोरं सारे लोक तैस तोपते-तोपते तैस कां पुजे ते रोकने लगे कि तू असन करां न गा। 43 पन यीशुए तैन सेइं ज़ोवं, “मीं होरि नगरन मां भी परमेशेरूरे राज्जेरी खुशखबरी शुनानी ज़रूरीए किजोकि अवं एल्हेरेलेइ भेजोरोई।” 44 ते तै यहूदिया इलाकेरे प्रार्थना घरन मां प्रचार केरतो राव।

5

१११११ ११११ १११११११
(१११११ 4:18-22; १११११ 1:16-20)

1 एक्की दिहाड़े यीशु गन्नेसरतेरे समुन्दरे* बन्ने पुड़ खेड़ोरो थियो, ते बड़े लोक तैस कां करां परमेशेरू वचन शुन्नेरे लेइ तै उन्डे बिछड़ी गाते थिये। 2 तैनी दूई किशती बन्ने लेगोरी लेई, ते मेछली टलानेबाले किशती इलेखी छेड़तां अपना ज़ालां धोने लगगोरो थिये। 3 यीशु एक्की किशती मां चढ़ो ते किशतरे मालिके शमौने सेइं ज़ोने लगे, तुस किशती इट्ठां बन्ने पुड़ेरां नेइतां थोड़ी दूर लाथ। फिरी यीशु किशती मां बिशतां तैन लोकन उपदेश देने लगे। 4 जैखन तैनी लोकन शिक्षा दित्ती त तै शमौने सेइं ज़ोने लगे, “तुस किशती डुग्घी ठैरी चलाथ ते मेछली टलानेरे लेइ ज़ाल छड़ा।” 5 शमौने जुवाब दित्तो, “हे गुरू, असेई सैरी राती तरले कियोरेन ते अक मेछली भी नई टलेइयोरी, पन असां तेरे ज़ोने सेइं ज़ाल छड़तम।” 6 आखकार पतरस ते तैसेरे सैथेई ज़ालां छेड़ी दित्तां ते एतरी मेछली लेगि, कि ज़ालां छिन्दोइतां मेछली बेइरोवं निस्सने लेगि। 7 तैखन तैनेई अपने सैथन जो जैना होरि किशती पुड़ थिए,

* 5:1 5:1 गन्नेसरतेरे समुन्दरे इन गलील समुन्दरेरू दुइयोवं नव आए

इशारो कियो कि एज्जा इशरी मद्दत केरा, ते तैना भी आए ते किशती मेछलेई सेइं एतरी भेरोई जेई कि किशती डुबने लगी।⁸ शमौन पतरस एन हेरतां यीशुएरे पावन पुड़ पेइतां ज़ोने लगे, “हे प्रभु, अवं पापी मैन्हु आईं तू मीं करां दूर भो!”⁹ गल ए थी कि तै त तैसेरे साथी एतरी मेछली लेइतां हैरान भोइ जोरे थिये।¹⁰ तेरहो हाल जेब्देरे मट्टां केरो यानी याकूब त कने यूहन्नारो भी थियो, जैना शमौने सेइं साथी थिये, यीशुए शमौने सेइं ज़ोवं, “डर नन्ना अज्जेरे बाद तू मेछली टलाने बालो नई, बल्के मैनन् अकोट्टे केरतां मेरे चले बनानेबालो भोलो।”¹¹ तैनेई किशती ड्लेखी एन्तां लेई, ते अपनू सब किछ छेडतां यीशु पत्ती चले जे।

ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 8:1-4; ⓂⓂⓂⓂⓂ 1:40-45)

¹² जैखन यीशु एक्की नगर मां थियो, ते एरू भोवं कि तैड़ी अक मैन्हु थियो, जेसेरे सैरी जानी कोढ़ थियूं, तैनी यीशु लाव, ते तै जैन्धु केरे भारे बिशतां तैस कां मिन्नत केरतां ज़ोने लगे, “हे प्रभु तू चास त मेरू कोढ़ बज्झेई सकतस।”¹³ यीशुए अपनो हथ तैस पुड़ रख्खो ते ज़ोवं, “अवं चाताई, तू बज्झोस।” ते तैखने तैसेरू कोढ़ साफ भोइ जेवं।¹⁴ तैखन यीशुए तैस मैन्हु हुक्म दित्तो, “हेर, एसेरे बारे मां केन्ची सेइं किछ न ज़ोइयां। बल्के अपनो आपे याजके हिरा। तैल्ला पत्ती, तू अपने बेज्झोनेरे वजाई सेइं चढतल चाढ़, जेसेरे बारे मां मूसा नेबे कानूने मां हुक्म दित्तोरोए। ताके लोकन पतो चले कि तू बेज्झोरोस।”¹⁵ पन यीशुएरे बारे मां सेबन पतो लगे ते लोक दूरेरां देंते एजने लगे ताके यीशुएरी गल्लां शुन्न कने अपनि बिमैरन करां बेझोन।¹⁶ पन यीशु जादे केरतां सुनसान ठैरी चलो गातो थियो, ते प्रार्थना केरतो रातो थियो।

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 9:1-8; ⓂⓂⓂⓂⓂ 2:1-12)

¹⁷ एक्की दिहैड़ी एरू भोवं कि यीशु शिक्षा देने लगगोरो थियो, ते तैखन किछ फरीसी ते शास्त्री लोक ज़ोते थिये, तैना गलील इलाके ते यहूदियारे सैरी इलाकन मरां यरूशलैम नगरे मां ओरे थिये; ते परमेशेरी शक्ति यीशु सेइं साथी थी, ते बिमार बेज्झोइतां गाते थिये।¹⁸ किछ मैनेई अक अधरंगी मैन्हु खट्टी पुड़ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुजाम।¹⁹ पन अन्तर एतरी तंगी थी कि तैना अन्तर न गेइ सके फिरी तैनेई तैस घेरेरी छत पुट्टी जैस घरे मां यीशु थियो, ते खट्टां सने तै अधरंगी मैन्हु अन्तर यीशुएरे तुतरे अगर ओसालो।²⁰ यीशु तैन केरो विश्वास हेरतां ज़ोवं, “हे दोस्त तेरे पाप माफ़ भोए।”²¹ शास्त्री ते फरीसी लोक सोचने लगे, “ए कौन मैन्हु आए, जै परमेशेरी तुहीन केरते, परमेशेरे अलावा कौन पाप माफ़ केरि सकते?”²² यीशुए तैन केरि गल्लां बुझी ते तैन जुवाब दित्तो, “तुस अपने-अपने मने मां एन्चरां किजो सोचने लगगोरेथ? ²³ कुन ज़ोनू सुखतुए, ‘तेरे पाप माफ़ भोए,’ या एन ज़ोनू ‘उठ, ते चल फिर?’ ²⁴ पन तुसन पतो लगगे, मैनेरे मट्टे ज़मीनी पुड़ पाप माफ़ केरनेरो अधिकारे,” फिरी यीशुए तैस बिमारे जो ज़ोवं, “अपनि खट सल्ल ते घरजो चलो गा।”²⁵ तै अधरंगी बिमार मैन्हु सेभी केरे सामने ते खड़े उठो ते जैस खट्टी पुड़ तै झुलतो थियो, अपने दोगगे पुड़ छुइतां परमेशेरी बडयाई केरतो-केरतो घरजो चलो जेव।²⁶ तैना सारे लोक हैरान राए ते परमेशेरी तारीफ़ केरने लगे ते कने ज़ोने लगे, “ए त असेई अज नव्वीं गल लाई।”

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 9:9-13; ⓂⓂⓂⓂⓂ 2:13-17)

²⁷ एना गल्लां बीतनेरां बाद यीशु तैट्टां निस्सो, ते एक्की चुंगी घिन्ने बाले कां चले जेव, तैसेरू नवं लेवी थियूं। ते तै चुंगी नेनेबाले दफ़तरे मां बिशरो लोव, ते यीशुए तैस जो ज़ोवं, “तू मीं पत्ती चले ते मेरो चलो बन।”²⁸ तै तैखने यीशु पत्ती चलो जेव।²⁹ ते फिरी लेवी यीशुएरे लेइ अपने घरे अक बड़ी धाम दित्ती। ते तैड़ी चुंगी नेनेबाले ते होरे भी बड़े लोक थिये जैना तैस सेइं साथी रोट्टी खाने बिशो।³⁰ फरीसी लोक ते शास्त्री यीशुएरे चलन सेइं ज़ोने लगगे, “तुस चुंगी नेनेबालन ते पापी लोकन सेइं साथी किजो खातथ पीतथ?”³¹ यीशुए तैन सेइं ज़ोवं, “बिमारेन डाक्टेरेरी ज़रूरत भोचे, न कि सझर लोकन।³² अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान।”

ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 9:14-17; ⓂⓂⓂⓂⓂ 2:18-22)

33 तैना लोक यीशु सेइं ज़ोने लगे, “यूहन्नारे चले त बरत रखतन ते प्रार्थना भी केरतन ते एन्चरे फरीसी लोक भी केरतन, पन तेरे चले त खातन पीतन?” 34 यीशुए तैनन् जुवाब दित्तो, “इलाएरे दिहाड़े, कुन लाड़ो साथी भोंते सांते जन बरत रेखी सकतथ? 35 पन तैना दिहाड़े एज्जले, ज़ैखन लाड़ो तैन केरां अलग कियो गालो (यानी मारो गालो)। तैन दिहैडन मां तैना (अपने दुख्वेरे वजाई सेइं) बरत रख्वेले।” 36 फिरी यीशु तैन अक होरि मसाल दित्ती, “पुराने लिगड़े पुड़ नंवे लिगड़ेरी टलोई कोई न लाए, नता तै टलोई तैस मरां होरू भी छिंदेली, ते कने पुराने सेइं तै मिले भी नन्ना। 37 नंवो दाछारो रस पुरैनी मसकी मां कोई न छड़डे, नन्ना त नंवे दाछारो रस सेइं मसक भी फैट्टी गाचे, ते दाछारो रस भी डुल्ली गाते, ते तै मसक भी बरबाद भोचे। 38 किजोकि नंवो दाछारो रस नव्वीं मसकन मां भरोरो लोड़ते। 39 कोई मैन्हु पुरानो दाछारो रस पीतां नव्वीं न पीनो चाए, किजोकि तै ज़ोते कि पुरानो दाछारो रस जादे रोड़ोए।”

6

[\[2222 2222222 22222222 22222 22\]](#)
([\[22222 12:1-8; 22222 3:23-28\]](#))

1 एक्की फेरे यीशु त तैसेरे चले आरामेरे दिहाड़े ऊडारन मामेइं एक्की बत्तां चलोरे थिये, ते तैसेरे चले शिल्लां हथेइं सेइं प्रोड़तां खाने लगगे। 2 एन लेइतां किछु फरीसी लोकेईं तैन सेइं ज़ोवं, “तुस एन कम किजो लोरेथ केरने, ज़ैन आरामेरे दिहाड़े केरनू जेइज नईं?” 3 यीशुए तैन जुवाब दित्तो, “कुन तुसेईं पवित्रशास्त्रे मां कधे नईं पढेरू कि जेइस इश्शो पूर्वज दाऊद राज़ो त तैसेरे साथी दलुखोरे थिये त तैनेईं कुन कियेरू थियूं? 4 तैनेईं केन्चरे परमेशेरे घरे मां गेइतां चैदोरी रोट्टी खोरी थी, ते अपने सैथन भी दित्तोरी थी। तैना रोट्टी खैनी सिर्फ याजकां केरे लेइ जेइज थी।” 5 फिरी तैने तैन सेइं ज़ोवं, “मैनेरू मट्टू, यानी अवं आरामेरे दिहाड़ेरो भी प्रभु आई।”

[\[22222222 22222 2222 222222 2222222\]](#)
([\[22222 12:9-14; 22222 3:1-6\]](#))

6 एक्की बार यीशु प्रार्थना घरे मां गेइतां उपदेश शुनेई राहोरो थियो, ते तेइस भी आरामेरी दिहाड़ी थी तैड़ी अक मैन्हु थियो, जेसेरो देइनो हथ शुक्कोरो थियो। 7 शास्त्री त फरीसी लोक यीशुएरी ताके मां थिये कि अगर यीशु आरामेरे दिहाड़े केन्ची बझालो त असन इलज़ाम लानेरो मौको मैलनोए। 8 पन यीशु तैन केरे बारे मां सेमझी जेव, यीशुए तैस शुक्कोरे हथेबाले मैन्हु सेइं ज़ोवं, “मझाटे खड़े भो।” तै खड़ो भोव। 9 तैखन यीशु तैन सेइं ज़ोवं, “अवं तुसन पुछतां कि आरामेरे दिहाड़े भलाई केरनि रोड़ीए या बुराई केरनि रोड़ीए, मैनेरी जान बचानी या मारनी?” 10 ते तैनी च़ेवरे पासना तैन केरां तकू ते तैस मैन्हु जो ज़ोवं, “अपनो हथ हिरा।” तैनी मैने अपनो हथ अग्रोवं कियो। त अकदम तैसेरो हथ बेज्जोव। 11 पन याजकन त फरीसन बड़ी सरक अई तैना एप्पू मामेइं बेंस केरने लगगे, कि असां यीशुए सेइं कुन केरम?

[12 \[22222222 2222222\]](#)
([\[22222 10:1-4; 22222 3:13-19\]](#))

12 तेइस एरू भोवं कि यीशु प्रार्थना केरनेरे लेइ एक्की पहाड़े पुड़ चढ़ो, ते सैरी राती परमेशेरे कां प्रार्थना केरतो राव। 13 ज़ैखन ट्लेकड़ोने लगू त तैनी अपने चले एप्पू कां कुजाए ते तैन मरां 12 प्रेरित चुने। 14 अक शमौन ज़ैस जो पतरस भी ज़ोते थिये तैसेरो दूला अन्दिरयास, याकूब, यूहन्ना, फिलिप्पुस, बरतुल्मै, 15 मत्ती, थोमा, हलफईरू मट्टू याकूब, ते शमौन ज़ैस जो जेलोतेस ज़ोतन। 16 ते याकूबेरू मट्टू यहूदा ते यहूदा इस्करियोती ज़ै तैसेरो टलुवाने बालो बनो।

[\[222222 22222 22 222222 2222222\]](#)
([\[22222 4:23-25\]](#))

17 तैखन यीशु तैन सेइं साथी चौरस ठैरी मां खड़ो भोव, ते तैसेरे चले भी तैड़ी अकोट्टे भोए ते सारे यहूदिया ते यरूशलेम नगरन त कने सूर ते सैदारे आसेपासेरे लोक समुन्देरे बन्नेरे बड़े लोक ज़ैना तैड़ी थिये। 18 एन लोक यीशु केरां ज्ञान शुन्ने ते अपनि-अपनि बिमैरी तैस कां बझाने ओरे थिये, ते ज़ैन लोकन पुड़ भूतां केरे सैये सेइं दुखे मां थिये तैना भी बेज्जोइ जे। 19 सब लोक तैस सेइं हथ लानेरी कोशिश केरते थिये किजोकि तैस मां शक्ति थी ज़ैस सेइं तैना बेज्जोते थिये।

॥॥॥॥ ॥॥ ॥॥॥ ॥॥॥॥॥॥ ॥॥॥
(॥॥॥॥॥ 5:1-12)

20 तैखन यीशु अपने चेलां केरे तकने लगो ते ज़ोने लगो,

“परमेशर तुसन बरकत देलो ज़ैना नमरथ,

किजोकि स्वर्गेरू राज़ तुशू आए ।

21 परमेशर तुसन बरकत देलो ज़ैना दलुखोरेथ,

किजोकि तुस रज़नेथ,

परमेशर तुसन बरकत देलो ज़ैना अज़ लेरां देतथ,

किजोकि तुसेई हसनुए ।”

22 “परमेशर तुसन बरकत देलो,

ज़ैखन मैनेरे मट्टे, यानी मेरे चेलो भोनेरे वाजाई सेइं लोक तुशुशी तुहीन केरन,

ते तुसन भाईचारे करां कनारे छुडेले,

ते तुसन बेइज़त केरेले,

ते तुशू नवं केट्टी छुडेले ।”

23 “तैस दिहाड़े खुशी भोइतां उछुड़थ, किजोकि हेरा तुशुशे लेइ स्वर्गे मां बडू इनामे । तैन केरे दादे-पड़दादे नेबन सेइं भी एरो ज़ेरो बर्ताव केरते थिये ।”

24 “पन अफ़सोस! तुसन पुड़ ज़ैना दौलतमन्दथ,

किजोकि तुसन सब किछ मैलेरूए ।

25 अफ़सोस! तुसन पुड़, ज़ैन तुस चाते थिये, तुसन तैन मैल्लू,

किजोकि तुस नियन्ने भोले,

अफ़सोस! तुसन पुड़ ज़ैना अज़ हसतथ

किजोकि तुस शोग केरेले ते लेरां देले ।

26 पन अफ़सोस! तुसन पुड़ ज़ैखन लोक तुसन जो भलू ज़ोन,

किजोकि तुशुशे दादे-पड़दादेई भी झूठे नेबन सेइं एरो बर्ताव कियोरो थियो ।”

॥॥॥॥ ॥॥॥॥ ॥॥॥॥ ॥॥॥॥ ॥॥॥॥॥॥ ॥॥॥॥ ॥॥॥॥॥॥ ॥॥॥॥
(॥॥॥॥॥ 5:38-48; 7:12)

27 “अवं तुसन शुन्नेबालन सेइं ज़ोताई कि अपने दुश्मन सेइं प्यार केरा । ज़ैना तुसन सेइं बैर रखतन तैन केरू

भलू केरा । 28 ज़ैना तुसन जो बुरू ज़ोतन तुस तैन केरे लेइ बरकत मग्गा, ज़ैन तुसन बेइज़त केरन तुस तैन केरे

लेइ प्रार्थना केरा । 29 अगर कोई तुशुशे एक्की खैखोड़ी पुड़ थपपड़ बाहे त होरो पासो भी तैसेरे पासे रखा, ते अगर

कोई तुशुशू कोट नेते त कमीज़ भी तैस देथ । 30 ज़ै कोई तीं करां किछ मग्गे त तैस देथ अगर कोई तेरो सबाब नेते

ते तैस करां वापस न मग्गा । 31 ते ज़ेन्चरे तुस चातथ कि लोक तुसन सेइं केरन तेन्चरे तुस भी तैन सेइं तेरहु केरा ।

32 अगर तुस तैन्ने सेइं प्यार केरथ ज़ैना तुसन सेइं प्यार केरतन त तुशुशू कुन एवसाने? किजोकि पापी लोक भी

अपने प्यार केरनेबालन सेइं प्यार केरतन । 33 अगर तुस तैन केरू भलू केरतथ ज़ैना तुशुशू भलू केरतन त तुशुशू

कुन एवसाने? किजोकि पापी लोक भी अपने प्यार केरनेबालन सेइं प्यार केरतन । 34 अगर तुस तैन्ने ओधार देतथ

ज़ैन करां तुसन वापस भी मैलनेरी उमीदे, त परमेशर तुशुशी बड़याई किजो केरे? किजोकि बुरे लोक भी अपने प्यार

केरनेबालन पेंइसे देतन ताके तैन करां वापस मैलन । 35 पन तुस अपने दुश्मन सेइं प्यार केरा ते तैन केरू भलू केरा,

ओधार देइयथ पन तैन करां वापस मैलनेरी उमीद न रेखथ, एल्हेरो स्वर्गे मां तुशुशे लेइ अक बड़ो फले, किजोकि

तुस परमप्रधान परमेशरेरे बच्चे भोले, किजोकि तै परमेशर न मन्ने बालन पुड़ ते ज़ालमन पुड़ भी दया केरते ।

36 ज़ेरो दया दिल तुशुशो बाजी तेरहे दया दिल तुस भी भोथ ।”

॥॥॥॥॥॥ ॥ ॥॥॥॥
(॥॥॥॥॥॥ 7:1-4)

37 “दोष न लाथ, तुसन पुड़ भी दोष न लव गालो, निन्दा न केरा, तुशुशी भी निन्दा न की गाली, तुस होरन

माफ़ केरेले त तुसन भी माफ़ कियू गालू । 38 तुस होरि किछ देले त तुसन भी किछ दिचू गालू तुशुशू बरकतरू भांड

जेन्चरे अन्नेरी हाटी हिलेइतां देतां तैन भी तेन्चरे जैस हैटी सेइं तुस होरि केरे लेइ मिनतथ तैस्से सेइं तुशशे लेइ भी मिनेले ।”

39 यीशुए तैन अक मिसाल शुनाई, “कुन कानो होरि काने बत हेरेई सकते? तैना त दुइये गढे मां बिछ्छेले? 40 चेलो अपने गुरू करां बड्डो न भोए पन हर एक्की गल्ली मां जैखन सब शिखेलो त अपने गुरेरो जेरो भोलो । 41 तू अपने द्लाएरी एछ्छी मां कूडो किजो तकतस, पन तेरी एछ्छी मां त नग आए, ते तैसेरो तू खियाल भी न केरस? 42 तू अपने द्लाए केन्चरे जोई सकतस कि, ‘तेरी एछ्छी मरां कूडो केढी?’ हे पाखंडी पेइले अपनि एछ्छी मरां नग कढ फिरी अपने द्लाएरी एछ्छी मरां कूडो केढी सकतस ।”

[\[?\]\[?\]\[?\]\[?\] \[?\]\[?\] \[?\]\[?\]\[?\]\[?\] \[?\]\[?\]](#)
([\[?\]\[?\]\[?\]\[?\] 7:16-20; 12:33-35](#))

43 “किजोकि केन्ची भी रोडे बुटे बुरो फल न लगगे ते न केन्ची बुरे बुटे रोडो फल लगगे । 44 हर बुट अपने फले सेइं पिशैनोते । किजोकि न झलन सेइं फैगू लगन ते न झल्लन सेइं दाछ्छ लगगे । 45 रोडो मैन्हु अपने दिलेरे रोडे खजाने मरां रोडो चीजां कढते ते बुरो मैन्हु अपने दिलेरे बुरे खजाने मरां बुरी चीजां कढते किजोकि जैन दिले मां भरेरू भोते तैन्ने जबानी पुइ एइते ।”

[\[?\] \[?\]\[?\]\[?\]\[?\] \[?\]\[?\]\[?\] \[?\]\[?\] \[?\]\[?\]\[?\]\[?\]](#)
([\[?\]\[?\]\[?\]\[?\] 7:24-27](#))

46 “जैखन तुस मेरे जोने पुइ अमल न केरथ त मीजो, ‘हे प्रभु, हे प्रभु,’ किजो जोतथ? 47 जै मीं कां एइते ते मेरी गल्लां शुन्तां तैन पुइ अमल केरते त अवं तुसन सेइं जोताई कि तै केसेरो जेरो भोलो? 48 तै तैस मैनेरो जेरोए जैनी अपनू घर डुग्घी खाइ केढतां पेक्की ठैरी घर बनावं जैखन हडाई आई त तैस घरे किछ्छ न भोवं, किजोकि तैसेरी मुनीयाद पेक्की ठैरी थी । 49 पन जै मेरी गल्लां शुन्तां तैन पुइ अमल न केरे त तै तैस मैनेरो जेरोए, जैनी अपनू घर रेती पुइ बनाव ते जैखन हडाई अई त तैन घर डुल्ली जेवं ते तब्बा भोइ जेवं ।”

7

[\[?\]\[?\]\[?\]\[?\] \[?\]\[?\]\[?\]\[?\]\[?\]\[?\] \[?\]\[?\]\[?\] \[?\]\[?\] \[?\]\[?\]\[?\]\[?\]](#)
([\[?\]\[?\]\[?\]\[?\] 8:5-13](#))

1 जैखन तैनी लोकन अपनी सब गल्लां शुनेई छैडी, त तै कफरनहूम नगर मां अव । 2 तैडी केन्ची सूबेदारेरो अक ट्लारो सेवक बिमार थियो ते मरने बालो थियो । 3 तैनी यीशुएरी मुशूरी शुन्तां यहूदी केरे किछ्छ बुजुर्ग तैस कां मिनत केरनेरे लेइ भेजे, कि तै एइतां मेरो सेवक बज्झाए । 4 तैना यीशु कां आए ते तैस कां मिनत केरने लगगे, “तै इस काबले, कि तू तैसेरेलेइ इन केरस । 5 किजोकि ते इशशी कौमी सेइं बडी हमदरदी रखते, ते इशशू प्रार्थना घर तैन्नी बनेवरुए ।” 6 यीशु तैन सेइं साथी-साथी चलो जेव, पन जैखन तैस घरे नेडे पुजो त सूबेदारे होरि दोस्तन सेइं समाद भेजो कि, “प्रभु तकलीफ न केर, किजोकि अवं एस काबल नई कि तू मेरे घरे मां एज्जी सखत । 7 एस्से वजाई सेइं अवं भी अपनो आप तीं कां एजनेरे काबल न सेमझी बल्के अपनि जबानी सेइं जोस त मेरो नौकर बेज्झोइ सकते । 8 तै मैन्हु जोने लगगे कि अवं भी केन्चरे अधिकारे मां कम केरताई, ते सिपाही मेरे अधीन आन, ते जैखन एक्की जो जोतां कि ‘गा,’ त तै गाते, ते होरि जो जोतां एई, त तै ‘एइते,’ ते अपने सेवके जो जोताई, ‘इन कम केर,’ त तै केरते ।” 9 यीशु एन शुन्तां हैरान रेइ जेव, ते पत्रोवं लोकां केरे पासे लगगे तकने जैना तैस पत्पती ओरे थिये तैन जो जोने लगगे, “कि अवं तुसन सेइं सच्च जोताई कि मीं इसराएल मुलखे मां इस गैर यहूदी मैनेरो जेरो मैन्हु नई लोवरो जै मीं पुइ एत्रो विश्वास केरे ।” 10 ते जैना लोक यीशु कां भेजोरे थिये वापस जैखन घरे आए त तै सेवक बेज्झोरो लव ।

[\[?\]\[?\]\[?\]\[?\]\[?\] \[?\]\[?\]\[?\]\[?\] \[?\]\[?\]\[?\]\[?\] \[?\]\[?\]\[?\]\[?\]](#)

11 थोडे चिररां पत्ती एरू भोवं कि यीशु नाईन नव्वेरे नगर मां चलो जेव, ते तैसेरे चले ते होरे भी बडे लोक तैन सेइं साथी थिये । 12 जैखन तैना नगरेरे फाटके पुइ नेडे पुजे, त हेरतन, कि अक मुडदो बेइर जो चलेवरोए, ते तैन अपनि अम्मरू अक्के मट्टू थियुं, ते नगरेरे बडे लोक तैस विधवा कुआन्शी सेइं साथी थिये । 13 एन लेइतां प्रभुए बडो तरस अव, ते तैस जो जोवं, “लेरां न दे ।” 14 फिरी यीशु नेडे एइतां शिडी सेइं हथ लाव, ते छूनेबाले रुके, ते यीशुए जोवं, “ए जवान, अवं तीं सेइं जोतां, खडो उठ!” 15 तैखन मुडदो उठो, ते गल्लां लगगे केरने, ते यीशुए

तै तैसेरी अम्मा सोंफतां छड्ड। 16 इन हेरतां सब लोक डेरि जे, ते परमेशेरी तारीफ़ करने लगे, “अक महान नबी असन मां ओरोए, ते परमेशेर अपने लोकन पुड़ अपनि सिधी नज़र रखोरिए। 17 एस्से गल्लरी वजाई सेइं ए खबर यहूदियारे ते आसेपासेरे सेब्भी मुलखन मां फैली जेई।”

११:२-१९

18 ते यूहन्ना तैसेरे चलेईं एन सैरी गल्लां केरि खबर दिती। 19 तैखन यूहन्ना एन शुन्तां दूई चले कुजेइतां यीशु कां पुच्छने भेजे कि, “एजनेबालो तू आस, या असां होरि बलगम?” 20 तैनेईं यीशु कां एइतां पुच्छू, “असां यूहन्ना बपतिस्मो देनेबाले तीं कां पुच्छने भेजोरेम, कि एजनेबालो तू आस, या असां होरि बलगम?” 21 तैखन यीशुए बडे लोक बिमैरन ते तकलीफ, ते भूतन करां छुटाए, ते बडे काने लोकन एछ्छन लौ दिती। 22 यीशु तैन ज़ोवं, “जैन किछ तुसेईं लाहेरूए ते शुनेरूए गेइतां यूहन्ना सेइं ज़ोथ, कि काने लातन, ते टोंटे चलतन, ते कोढ़ी केरू कोढ़ साफ भोते, ते टोंऊने शुन्तन, ते मुड़दे जीते भोतन, ते गरीबन खुशखबरी शुनाई गाचे। 23 परमेशर तैस बरकत देते, जै मीं पुड़ शक न केरे।”

24 जैखन यूहन्नारे बिस्तार देनेबाले लोक वापस चले जे, त यीशु यूहन्नारे बारे मां गवाही देने लगे, “तुस जंगले मां कुन हेरने जोरे थिये? कुन हवाई सेइं हिलते निरैठरे डाल? 25 त फिरी तुस होरू कुन हेरने जोरे थिये? कुन रोड़ां लगगोरां लिगइन बालो मैन्हु? हेरा, जैना मगां लिगड़ां लाने बाले मैन्हु, ते जैना एश करनेबाले लोक भोतन। तैना राज महलन मां रातन, 26 त फिरी तुस होरू कुन हेरने जोरे थिये? कुन कोई नबी? हाँ, अवं तुसन सेइं ज़ोताई, नेबी करां बड्डे। 27 ए तैए, जेसेरे बारे मां लिखोरूए, हेर, अवं अपनो बिस्तार देनेबालो तीं अग्री-अग्री भेजताई, जै तेरी बत अगरोवं तियार केरेलो।”

28 यीशुए ज़ोवं, “अवं तुसन सेइं सच ज़ोताई, कि जै कुआन्शन करां ज़रमोरोए, तैन मां यूहन्ना बपतिस्मो देनेबाले करां बड्डो कोई नई। पन जै परमेशेरे राज़े मां निकडोए, तै यूहन्ना करां बड्डोए।” 29 जैखन तैन लोकेईं एन गल्लां शुनी त धड़त नेनेबालेईं भी यूहन्ना बपतिस्मो देनेबाले करां बपतिस्मो नेइतां परमेशर धर्मी मन्नो। 30 पन फरीसी लोकेईं ते शास्त्री लोकेईं तैस करां बपतिस्मो न नेइतां परमेशेरी मर्जी अपने बारे मां टाली।

31 “बस्सा, अवं इस ज़मानेरे लोकां केरि मिसाल केस सेइं देई, तैना केसेरे ज़ेरेन? 32 तैना तैन मट्टां केरे ज़ेरेन जैना बज़ारे मां बिशोरां एक्की होरि जो हक देइतां ज़ोतन, ‘असेईं तुशे लेइ बेंशोई बज़ाई, ते तुस न नच्चे, असेईं शौग मनाव, पन तुसेईं लेरां न दिती!’ 33 किजोकि यूहन्ना बपतिस्मो देनेबालो न रोट्टी खांतो अव, न शराब पीतो अव, ते तुस ज़ोतथ, कि एस पुड़ भूतेरो सैयो आए। 34 मैनेरू मट्टू खातू पीतू अव, ते तुस ज़ोतथ, हेरा, तै पेटू ते शराबी मैन्हु, कने धड़त नेनेबाले ते पापी लोकां केरो दोस्त। 35 पन अक्ल अपने सेब्भी मट्टन करां जादे सच्ची साबत भोइ।”

११:२०-२९

36 फिरी केन्चे फरीसे यीशु कां मिनत की, कि मीं सेइं साथी रोट्टी खा, बस्सा, तै तैस सेइं साथी तैसेरे घरे जेव, ते तैस सेइं साथी रोट्टी खाने लगे। 37 त हेरा, अक बदचलन कुआन्श जै तैस नगरेरी थी एन बुझतां कि यीशु फरीसेरे घरे रोट्टी खाने बिशोरोए, संगमरमरेरे एक्की भांडे मां इत्र आनो। 38 ते यीशुएरे पावन कां नेडे लेरां देंती खड़ी भोइ, ते तैसेरे पाव एंखेइं सेइं सेले ते अपने दोगगरे बालेईं सेइं पोंछने लगी ते तैसेरे पावन फुम्मड़ी देने लगी कने पावन पुड़ इत्र लाव। 39 जैनी फरीसे यीशु कुजोरो थियो, तैनी एन लाव, त ज़ोने लगे, “अगर ए मैन्हु नबी भोथो त बुझेथो कि जै कुआन्श तैस कांए तै कौने ते ए केरि कुआन्शे? किजोकि ए बदचलने।” 40 यीशु तैसेरे इन खियाल जैनतां तैस सेइं ज़ोवं, “हे शमौन, मीं तीं सेइं किछ ज़ोनूए।” फरीसे ज़ोवं, “हे गुरू ज़ो।” 41 यीशुए तैस सेइं मिसाल देइतां ज़ोवं “केन्ची शोहुकारेरो केन्ची दूई ज़न्न कां कर्जो थियो, एक्की कां 500 दीनार*, ते होरि कां 50 दीनार थियो। 42 जैखन तैन कां देने जो किछ न राऊं, त तैनी शोहोकरे दुइने कर्जो माफ़ कमाव। बस्सा, कौन तैन मरां जादे शोहुकारे सेइं प्यार केरेलो?” 43 शमौने जुवाब दिती, “मेरे समझी सेइं त जेसेरो जादे कर्जो माफ़ कियो।” यीशुए ज़ोवं, “तीं ठीक फैसलो कियो।” 44 यीशु तैस कुआन्शरे पासे तेकतां शमौने ज़ोवं, “कुन तू इस कुआन्शरां तकतस? अवं तेरे घरे अव, तीं मीं (रीतरे मुताबिक) पव धोने जो पानी न दितू, पन इसां मेरे पाव एंखेइं सेइं पव

* 7:41 7:41 शौव दीनार, शौव दिहैड़ी केरि मज़दूरी।

धोए ते अपने दोगगरे बालेई सेइं पौंछे।” 45 तीं मीं (रीतरे मुताबिक) फुम्मडी न दित्ती, पन एसां जैखनेरो अवं इडी ओरोई मेरे पव्वन फुमडी देनी न उडैई। 46 तीं मेरे दोगगे पुड़ तेल न मल्लो, पन एसां मेरे पावन पुड़ इतर मल्लो। 47 “एल्हेरेलेइ अवं तीं सेइं ज़ोताई कि, एसारे जादे पाप ज़ैना एसां कियोरे थिये, माफ़ भोए, किजोकि एसां जादे प्यार कियो, पन ज़ेसैरे थोड़े पाप माफ़ भोतन तै थोड़ो प्यार करते।” 48 यीशुए तैस कुआन्शी जो ज़ोवं, “गा तेरे पाप माफ़ भोए।” 49 एस गल्ली पुड़ ज़ैना तैस सेइं साथी रोट्टी खाने बिशशोरे थिये, अपने-अपने मने मां सोचने लगे, “ए कौने ज़ै पाप भी माफ़ करते, पाप त सिर्फ परमेशर माफ़ करते?” 50 पन यीशुए तैस कुआन्शी सेइं ज़ोवं, “परमेशर तू एल्हेरेलेइ बज़ाई कि तीं मीं पुड़ विश्वास कियो, हुनी तू खुशी सेइं गा।”

8

???????? ???? ?

1 थोड़े च़िरेरां बाद एरू भोवं यीशु अपने तैन 12 च़ेलेन सेइं साथी नगर-नगर ते डलव्वे-डलव्वे हंटतो ते प्रचार केरतो राव, ते परमेशरेरे राज़ेरी खुशखबरी शुनातो राव। 2 किछ कुआन्शां भी तैन सेइं साथी थी, ज़ैन मरां भूतां केरो सैयो कढोरो थियो। ते ज़ैन केरि बिमैरी दूर भोरी थी, तैना केरां नव्वां इना आन, मरियम ज़ै मगदलीन डलव्वेरी राने बाली थी, ज़ैस पुड़ां सत भूतां केरो सैयो कढोरो थियो, 3 हेरोदेस राज़ेरे भण्डारी खोज़ेरी कुआन्श योअन्ना ते सूसन्नाह ते होरि भी काई कुआन्शां थी ज़ैना अपनि जेइदात देइतां यीशु ते तैसेरे च़ेलां केरि सेवा केरती थी।

???? ???? ?

(???? 13:1-9; ???? 4:1-9)

4 फ़िरी ज़ैखन बड़े लोक तैस कां अकोट्टे भोए, ज़ैस मां नगरां-नगरां केरे लोक तैस कां एइते थिये। यीशुए तैन मिसाल देइतां ज़ोवं। 5 “एक्सां अक बीज बेनेबालो बीज बेने जो जेव। बीज बेते बार किछ बीज बत्तेरे डलेखी बिछड़ू ते अम्बेरे चुड़ोल्लेई एइतां तैन बीज चुनू। 6 ते किछ बीज घोड़नबाली ज़मीनी पुड़ बिछड़ू, ते लगू पन जल्दी शुक्की जेव, एल्हेरेलेइ कि तैस पानी न मैल्लू। 7 किछ बीज कंटां केरे झैल्लन मां बिछड़ू। ज़ैखन तैडी बूटो लगो, त कंटां केरे झैल्लेई भी बेड़ोइतां तै बूटो दबेइ छड़ो। 8 ते किछ बीज रोड़ी ज़मीनी मां बिछड़ू, ते लगू ते शौव गुणा फल लगो,” एन शुनेइतां तैनी तैन सेइं उच्ची आवाज़ी मां ज़ोवं, “ज़ै कोई समझनू चाते, तै ध्याने सेइं शुने ते समझे।”

???? ???? ?

(???? 13:10-17; ???? 4:10-12)

9 तैसेरे च़ेलेई तैस पुच्छू, “एस मिसालरो कुन मतलबे?” 10 यीशुए तैन ज़ोवं, “तुसन परमेशरेरे राज़ेरे भेदां केरि समझ दित्तोरीए, पन अवं होरि लोकन मिसाल देइतां ज़ोताई, तैन तैना बार-बार शुनेले, पन मेरी गल न समझेले।”

???? ???? ?

(???? 13:18-23; ???? 4:13-20)

11 “एस मिसालरो ई मतलबे, कि बीज परमेशरेरू वचने। 12 ज़ैना मैन्हु परमेशरेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ैडी बीज बिछड़ते। तैना त परमेशरेरी गल्लां शुन्तन, पन शैतान अकदम एइतां तैन मैन्हु केरे दिले मरां तैन वचन घिनी गाते, कि एरू न भोए कि तैना विश्वास केरन ते तैन मुक्ति मैल्ले। 13 ते घोड़नबाले ज़मीनी मां बेवरू बीज तैने, ज़ैना वचन शुन्तां खुशी सेइं मन्तन पन ज़ील न छड़ने सेइं तैना थोड़े च़िरे तगर विश्वास रखतन ते अज़मैइशरे मौके मुड़ी गातन। 14 ते ज़ैन झल्लन मां बीज झड़ू तैना इना आन, ज़ैना वचन शुन्तन, पन अग्रोवं च़ेलतां फ़िकर ते दौलत ते ज़िन्दगरो एशो-अशरती मां फेसी गातन ते तैन केरो फल न पक्के। 15 पन रोड़ी ज़मीनी पुड़ेरूए बीज तैन्न, ज़ैना वचन शुन्तन ते अमल भी केरतन, ते रोड़ेच़ारे दिले मां बसातन ते सबरी सेइं फल भी लगते।

???? ???? ?

(???? 4:21-25)

16 “कोई दीयो बैलतां केन्ची भांडे हैठ ओड़कतां न रखे, ते न खट्टी हैठ रखे बल्के उच्ची टैरी रखतन ताके दीयो अन्तर एजने बालन लौ दे। 17 किजोकि कोई एरी चीज छपोरी नई, ज़ै बांदी नई भोनी, ते कोई भेद छपोतो न रालो, पन सारो भेद बांदो भोलो। 18 बस्सा हुशार राथ, कि तुस केन्चरे शुन्तथ? ज़ैस कां परमेशरेरी मर्जी समझनेरी

इच्छा आए, तैस परमेश्वर जादे समझ देलो। पन जैस कां परमेश्वरेरी मर्जी समझनेरी इच्छा नई, तैस केरां थोड़ी जेरि समझ, जै तैस कां आए, तै भी नी गाली।”

[\(लूका 12:46-50; लूका 3:31-35\)](#)

19 फिरी तैसेरी अम्मा ते तैसेरे दूला तैस कां आए, पन हछे मैन्हु केरि वजाई सेइ तैस कां न पुज्जी सके। 20 ते यीशुए पतो दित्तो, “तेरी अम्मा ते तेरे दूला बेइर खडे आन ते तैना तीं सेइ गल केरनि चातन।” 21 यीशुए तैन जुवाब दित्तो, “मेरी अम्मा ते मेरे दूला इना आन जैना परमेश्वरेरू वचन शुन्तन ते तैस पुड़ अमल भी केरतन।”

[\(लूका 8:23-27; लूका 4:35-41\)](#)

22 फिरी एककी दिहाड़े एरू भोवं, कि यीशुए अपने चलन सेइ ज़ोवं, “एज्जा, समुन्दरे पार गाम ते तैना किशती मां च़ेदतां समुन्दरे पार च़ले जे।” 23 पन जैखन किशती च़लोरी थी, त यीशुए झुली जेव ते समुन्दरे पुड़ बड़ो तूफान अव, ते किशती पैनी सेइ भेरोने लगगी, ते तैन खतरो भोइ जेव। 24 च़ेलेई तै बीझेइतां तैस सेइ ज़ोवं, “हे गुरु, असां मेरि गातम यीशु खडे उठो ते हवाई जो ते पैनी जो ज़ोवं, रुकी गाथ ते तूफान रुकी जेव।” 25 यीशुए अपने चलन सेइ ज़ोवं, “तुश्शो विश्वास कोरां जेव?” तैना डेरि जे ते हैरान भोइतां एप्पू मामेइं ज़ोने लगे, “ए कौने! ए हवाई त पैनी भी हुक्म देते ते तैना एसेरो हुक्म मन्तन।”

[\(लूका 8:28-34; लूका 5:1-20\)](#)

26 फिरी तैना गिरासेनी इलाके मां पुजे, जै गलील समुन्दरे सामने पारे। 27 जैखन तै बन्ने पुड़ ओस्सो, त तैस नगरेरो अक मैन्हु मैल्लो जैस पुड़ भूतां केरो सायो थियो, ते तै बड़े दिहाड़े केरो देंतो न लिगडां लातो ते न घरे रातो थियो, बल्के कबरन मां रातो थियो। 28 तैनी मैने यीशु लाव ते चिन्डां लगो मारने, ते तैसेरे सामने झुकतां ज़ोरे सेइ ज़ोने लगे, “हे यीशु परमप्रधान परमेश्वेरा मट्ठा! तीं मीं सेइ कुन कम्मे? अवं तीं कां मिनत केरताई मीं दुख न दे।” 29 किजोकि यीशु तैस भूते तैस मैन्हु मरां निसनेरो हुक्म देने लोरो थियो, एल्हेरेलेइ तै बड़े बुरे तरीके सेइ टलेइतां रखोरो थियो, ते लोक तैस कैबू केरनेरे लेइ अग्री भी रसन ते शंगलन सेइ बेंधतां रखते थिये, ते तै तैन भी टलोइतो थियो, ते भूत तैस मैन्हु जंगले मां नेतू थियूं। 30 यीशुए तैस पुच्छू, “तेरू कुन नवं आए?” तैनी ज़ोवं “मेरू नवं फौज आए,” किजोकि तैस मां बड़ां भूतां थियां। 31 ते तैनेई तैस कां मिन्नत की, “असन अथाह कुण्डे मां गानेरो हुक्म न दे।” 32 तैड़ी पहैड़ी पुड़ अक सूरां केरो बड़ो घान थियो, ते तैनेई तैस कां मिनत की, “असन एन मां गाने दे ते यीशुए गाने दित्तां।” 33 ते तैना भूतां तैस मैन्हु मरां निस्तां तैन सूरन मां च़ेलि जेआं, ते सूरां केरो सारो घान उतरेई उन्डे छ़ालां मैरतां समुन्दरे मां डुबतां मेरि जेव।

34 सूरां केरे च़ारनेबाले एन हेरतां नेश्शी जे, ते नगर मां ते ड़्लोव्वन मां एस गल्लरी खबर शुनाई। 35 लोक तै तमाशो हेरने आए, ते यीशु कां जैस मैन्हु मरां भूतां केरि फौजरो सैयो निसोरो थियो, तैनी लिगडां लां ते होशी मां एइतां यीशु कां बिश्शोरो लाव ते डेरि जे। 36 जैनेई तैना गल्लां पेइले लेवरी थी, तैनेई ज़ोवं, इस मैन्हु पुड़ भूतां केरो सैयो थियो ते ए केन्च़रे बेज्जोव। 37 ते गिरासेनियों इलाके मां च़ेवरे पासां केरे लोक यीशु कां मिनत केरने लगगे, कि इट्ठां च़लो गा, किजोकि तैना बड़े ड़रे थिये, ते यीशु किशती मां बिश्तां वापस च़लो जेव। 38 पन जैस मैन्हु मरां भूतां निस्सोरां थियां तै यीशु कां मिनत केरतां ज़ोने लगे, मीं एप्पू सेइ साथी रख पन यीशुए तै भेजो ते ज़ोवं। 39 “अपने घरे च़लो गा ते लोकन सेइ ज़ो, कि प्रभु परमेश्वरे तीं पुड़ दया केरतां तेरे लेइ केतूरू बड्डू कम कियोरूए। तैखन तै च़लो जेव ते सारे नगर मां एस गल्लारो प्रचार केरने लगगे, कि यीशुए मेरे लेइ केतूरू बड्डू कम कियोरूए।”

[\(लूका 9:18-26; लूका 5:21-43\)](#)

40 जैखन यीशु वापस एज्जी राहोरो थियो, ते लोक बड़े खुशी सेइ तैस सेइ मिले, किजोकि तैना सब तैस बलगते थिये। 41 ते हेरा यार्डर नव्वेरो अक मैन्हु जै प्रार्थना घरेरो अक प्रधान थियो, यीशु कां अव ते तैसेरे पावन पुड़ पेइतां मिनत केरने लगगे, “तू मेरे घरे च़ल।” 42 किजोकि तैसेरी अक्के कुई जै 12 सालां केरि थी, तै मरनेबाली थी।

ते जैखन यीशु चल्लोरो थियो, त लोक तैस उन्हे बिछ्छुइते थिये।⁴³ ते अक कुआन्श भी थी, जैस 12 सालां केरि खून चलनेरी बिमारी थी। ते तैसां अपनो सारो जिनन्दगरो पेंडसो हकीमन कां अल्लाजरे लेइ खर्च कियोरो थियो, ते ते केन्चेरे हथ्ये ठीक न भोइ।⁴⁴ ते कुआन्श यीशु पतोरं एइतां तैसेरे चोगे सेइं हुरी, त अकदम तैसेरी खून चलनेरी बिमारी बेज्जोई।⁴⁵ यीशुए ज़ोवं, “मेरे लिगडे सेइं केनि हथ लाव?” जैखन सब लोक इन्कार केरने लगे, त पतरसे ते तैसेरे सैथेईं ज़ोवं, “ए गुरु, लोक तीं द्वालांने ते तीं उन्हे बिछ्छुइने लोरेन।”⁴⁶ पन यीशु ज़ोवं, “केन्चे मीं सेइं हथ लोरोए किजोकि मीं पतो लगो कि मीं मरां शक्ति निसोरिए।”⁴⁷ तैखन तैस कुआन्शां हेरू, कि अवं छेप्पी न बेटि, त तै डरती-डरती सामने अई ते यीशुएरे पावन पुइ बिछ्छुइतां सैरी लोकां केरे सामने ज़ोने लगी, मीं तीं सेइं हथ लोरोए, ते ज़ेरो मीं हथ लोरोए अवं अकदम बेज्जोरी।⁴⁸ यीशुए तैस कुआन्शी ज़ोवं, “हे कुईए, तेरे विश्वासे तू बज्झाई ते खुशी सेइं चली गा।”⁴⁹ यीशु एन हेजू ज़ोतो थियो, त प्रार्थना घरेरे प्रधानेरे तैट्टां केन्चे मैने एइतां ज़ोवं, “तेरी कुई मेरि जेवरिए, हुनी गुरु तकलीफ न दे।”⁵⁰ पन यीशु एन शुन्तां जुवाब दित्तो, “न डर। सिर्फ मीं पुइ विश्वास रख कुई बेची गानीए।”⁵¹ जैखन तै तैस घरे मां जेव, त तैनी पतरस यूहन्ना ते याकूब ते कुइयरे हाज बव्वेरे अलावा होरो कोई अन्तर एजने न दित्तो।⁵² सब लोक तैस कुइयरे लेइ लेरां देंते थिये, पन यीशुए ज़ोवं, “लेरां न देथ, ए कुई मूओरी नई बल्के झुलोरोए।”⁵³ लोक एन शुन्तां हसने लगे, किजोकि तैना ज़ानते थिये कुई मेरि जेवरिए।⁵⁴ पन यीशुए तैस कुइयरो हथ ट्लाव ते ज़ोवं, “कुइये खडी उट!”⁵⁵ ते तैसारे प्राण वापस आए ते तै लूशी खडी भोइ, ते यीशुए तैन ज़ोवं, एस कुइये किछ्खाने जो देथ।⁵⁶ तैस कुइयरे हाज बव हैरान रेइजे, पन तैनी तैन सेइं समझेइतां ज़ोवं, जैन किछ्छ इडी भोवं एन केन्ची सेइं न ज़ोइयथ।

9

12 [\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#)
([\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 10:5-15; [\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 6:7-13)

1 यीशुए अपने 12 चले एप्पू कां कुजाए ते तैन शक्ति ते अधिकार दित्तो कि सैरी भूतन कदन ते बिमैरी दूर केरन।² ते यीशुए तैना परमेशेरे राजेरो प्रचार केरनेरे लेइ ते बिमार बज्झानेरे लेइ भेजे।³ तैनी तैन सेइं ज़ोवं, “बत्तां जो किछ्छ न नेइयथ, न सोटी न झोलो न रोट्टी न पेंडसे ते न दुइयोवं लिगडां।⁴ जैस घरे मां गाथ त तैडी विश्शी रेइयथ ज़ां तगर तुस तैस नगरे मरां न गाथ।⁵ ते जैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूइ ठुइकथ, ताके तैन पुइ गवाही भोए।”⁶ बस्सा, तैना चल्ले जे, ते इलोव्वे-इलोव्वे गेइतां परमेशेरी खुशखबरी शुनाते, ते लोकन बिमैरन करां बज्झाते चल्ले जे।

[\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#)
([\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 14:1-12; [\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 6:14-29)

7 मुलखेरो च़ेवरोवं हिस्से पुइ हेरोदेस राज़ो राज़ केरतो थियो, तै एन सब शुन्तां डेरि जेव। किजोकि किछ्छ ज़ोते थिये यूहन्ना मुइदन मरां ज़ीतो भोरोए।⁸ ते किछ्छ ज़ोते थिये एलिय्याह लेइहोरोए, ते किछ्छ ज़ोते थिये नेबन मरां कोई ज़ीतो भोरोए।⁹ पन हेरोदेसे ज़ोवं, “यूहन्नारी क़ोडी त मीं कट्टेवरी थी, पन ए कौन आए, जेसेरे बारे मां एरी ज़ेरि गल्लां शुन्ने मां एजने लोरिन?” ते हेरोदेस यीशु हेरनेरी इच्छा की।

[\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#)
([\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 14:13-21; [\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 6:30-44; [\[?\]\[?\]\[?\]\[?\]\[?\]\[?\]\[?\]\[?\]\[?\]\[?\]](#) 6:1-14)

10 फिरी प्रेरितेईं वापस एइतां ज़ैन किछ्छ कियेरू थियूं, यीशु सेइं शुनावं, ते यीशु तैन अलग नेइतां बैतसैदा नव्वेरे नगर मां चल्लो जेव।¹¹ ते बडे लोक तैस पत्ती चल्ले, ते यीशु बडे खुशी सेइं तैन सेइं मिलो। ते तैन सेइं परमेशेरे राज़ेरी गल्लां केरने लगो, ते ज़ैना बिमार ठीक भोनू चाते थिये, तैनी तैना बज्झाए।¹² जैखन दिहाडी डुबने लगी त तैन 12 चलेईं यीशु सेइं ज़ोवं, “एन लोकन भेजी छ्छुइ एना कोस्कोई इलोव्वन मां गेइतां बिशन ते रोट्टारो इंतज़ाम केरन। किजोकि असां गैर आवाद ठैरी आम।”¹³ तैनी तैन सेइं ज़ोवं, “तुस्से एन किछ्छ खाने जो देथ।” तैनेईं ज़ोवं, “असन कां पञ्च रोट्टी ते दूई मेछ्छलीन करां जादे किछ्छ भी नई, पन असां गेइतां एन जेई रोट्टी मुल्ले घिन्तां आनतम, त इन भोइ बटते।”¹⁴ (किजोकि तैन लगभग 5000 मइद थिये।) यीशुए अपने चलन सेइं ज़ोवं, “एन लोकन 50-50 मैन्हु केरि हुन्डी मां विशाला।”¹⁵ ते चलेईं तैन्ने कियूं ते तैना तेन्चरे विशाले।¹⁶ तैखन तैनी तैना पञ्च रोट्टी ते दूई मेछ्छलीनी, ते अम्बेरां तेकतां शुकर कियूं, फिरी तैनी तैना रोट्टी टलोडी ते चलन कां

दिती, कि तैन विशालोरे लोकन खाने जो देन। 17 सारे मैन्हु खेइतां रेज्जी जे। तैल्ला पत्ती, यीशुएरे चलेई बच्चोरे टुकड़न सेइं 12 टोकरी भेरि।

([मैन्हु 16:13-20](#); [मैन्हु 8:27-30](#))

18 एक्की बार यीशु अकैल्लो प्रार्थना करने लोरे थियो, ते चले भी तैस सेइं थिये। यीशुए तैन पुच्छू, “कि लोक मींजो कुन ज़ोतन?” 19 चलेई जुवाब दिती, “किछ ज़ोतन यूहन्ना बपतिस्मो देनेबालो, ते किछ ज़ोतन एलिय्याह, ते किछ ज़ोतन नेबन मरां कोई अक ज़ीतो भोरोए।” 20 तैखन यीशुए चलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दिती, “तू परमेशेरो मसीह आस।” 21 तैखन तैनी तैन खबरदार केरतां ज़ोवं, “कि ए गल केन्ची सेइं न ज़ोइयथ।”

([मैन्हु 16:21-23](#); [मैन्हु 8:31-33](#))

22 यीशुए ज़ोवं, “मैनेरे मट्टेरे लेइ जरूरी आए, कि तै बड़ो दुःख झैल्ले, यहूदी लोकां केरे बुजुर्गन, प्रधान याजकन, ते शास्त्री तैस घटिया सेमझतां मारेले, ते तै टलेइयोवं दिहाड़े फिरी ज़ीतो भोलो।”

([मैन्हु 16:24-28](#); [मैन्हु 8:34-9:1](#))

23 फिरी यीशुए तैन सेबन ज़ोवं, “अगर कोई मीं पत्ती एजनो चाए, त अपने आपेरो इन्कार केरे, ते रोज अपनू कूरुस छूए ते मीं पत्ती चले। 24 किजोकि ज़ै कोई अपनि जान बच्चांनी चाते तै तैस गुवालो, पन ज़ै मेरे लेइ अपनि जान गुवालो त तै तैस बच्चालो। 25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फेइदो? 26 किजोकि अगर कोई मैन्हु मीं करां त कने मेरी गल्लन करां शरमाते, त मैनेरू मट्टू यानी अवं भी तैस केरां शरमालो। जेइस अवं अपने बाजी केरि महिमा सेइं साथी त कने पवित्तर स्वर्गदूतन सेइं साथी वापस एज्जलो, त तेइस अवं तैस केरां भी शरमालो।” 27 “अवं तुसन सेइं सच्च ज़ोतई कि ज़ैना इडी खड़े आन, तैन मरां किछ मैन्हु एरे आन कि ज़ांतगर तैना परमेशेरे राज्जेरी शक्ति न हेरेले, तांतगर तैना न मरेले।”

([मैन्हु 17:1-8](#); [मैन्हु 9:2-8](#))

28 एन गल्लां केरे लगभग अठ दिहाड़ना बाद पतरस, ते यूहन्ना ते याकूब साथी नेइतां एक्की पहाड़े पुड़ प्रार्थना करने चले जे। 29 ते ज़ैखन यीशु प्रार्थना लोरो थियो करने, त तैसेरी शकल बेदलोई जेई, ते तैसेरां लिगड़ां लोअरां जेरां चमकने लगो। 30 ते हेरा, मूसा, ते एलिय्याह, इन्ना दूई मड़द तैस सेइं गल्लां करने लगो। 31 इन्ना महिमा सेइं साथी लेइहोए, ते तैसेरे मरनेरी गलबात करने लोरे थिये, ज़ैन किछ यरूशलेम नगरे मां भोनेबालू थियूं। 32 पन पतरस ते तैसेरे साथी केरि एछ्छी निडली सेइं गिरकी भोरी थी, ज़ैखन तैना बींझे, त तैनेई तैसेरी महिमा ते तैना दूई मड़द भी लाए, ज़ैना तैस सेइं साथी खड़े थिये। 33 ज़ैखन तैना तैस करां चले, त पतरसे यीशु सेइं ज़ोवं, “हे गुरू, इशू इडी रानू रोड़ोए, कि असां टलाई डेरे बनाम, अक तेरे लेइ, ते अक मूसेरे लेइ, ते एलिय्याहरे लेइ।” तैस पतो न थियो, कि तै कुन लोरोए ज़ोने। 34 तै इन ज़ोई राओरो थियो, तैन पुड़ बिदलार घिरी जेई, ते ज़ैखन तैन केरे चेवरे पासन बिदलारी घिरी त तैना डेरि जे। 35 तैखन तैस बिदलारी मरां अक आवाज़ अई, “एन मेरू टलारू मट्टू आए। ध्याने सेइं एसेरी गल शुना!” 36 ते तैस आवाज़ी सेइं साथी तैनेई यीशु अकैल्लो लाव, ते तैना चुप राए ते ज़ैन किछ लाहेरू थियूं, तैन केन्ची सेइं न ज़ोवं।

([मैन्हु 17:14-18](#); [मैन्हु 9:14-27](#))

37 होरसां एरू भोवं कि ज़ैखन तैना पहाड़े पुड़ेरां उन्डे ओरे थिये, त बड़े मैन्हु केरि भीड़ तैन कां आई। 38 ते हेरा, एक्की मैने तैन लोकन मरां बड़े ज़ोरे सेइं हक देइतां ज़ोवं, “ए गुरू अवं तीं कां ज़ोवले हथ केरतां कि मेरे मट्टे पुड़ दया केर; तैन मेरू अक्के मट्टूए। 39 ते हेर, अक भूत तैस अपने कब्जे मां केरते, ते तैन अकदम चिन्डां मारते, ते कम्बने लगते, ते तैसेरे ऐशेरां शैमफ निसचे, ते भूत तैस बड़े बुरे तरीके सेइं ज़खमी केरतां शारते। 40 ते मीं तेरे चलन कां बिनती कियोरी थी, कि तैस कढन, पन तैना न केढी सके।” 41 यीशुए जुवाब दिती, “हे विश्वास न करने बालाव ते ढीठ लोकव, अवं केइस तगर तुसन सेइं साथी रेइलो ते तुशशी झैल्लेलो? अपने मट्टे इडी आन।” 42 तै

मसां ओरो थियो, त भूते तैन मट्टू मुरोडतां शारू, पन यीशुए भूत झिडकतां कदू, ते तैन मट्टू बज्जेइतां तैसेरे बाजेरे हवाले कियूं।

[\(22222 22222 22222 2222 22222 22222222 2222 22222\)](#)
([222222 17:22-23](#); [222222 9:30-32](#))

43 ते सब लोक परमेशेरी बेडि कुदरती हेरतां हैरान रेइजे, ते जैखन सब लोक तैन कम्मां जैन यीशु केरतो थियो हैरान रहते थिये। त तैनी अपने चलन सेइं ज़ोवं। 44 “मेरी इन गल्लां रोडेचारे शुना किजोकि मैनेरू मट्टू मैन्हु केरे हवाले भोने बालूए।” 45 पन यीशुएरी ए गल चेलां केरि समझी मां न आई, किजोकि तैन करां ए गल छपोरी थी। कि तैन न समझन, ते चेले एस बारे मां यीशु पुच्छने करां डरते भी थिये।

[22222222 222222 22222](#)
([222222 18:1-5](#); [222222 9:33-37](#))

46 फिरी चलन एप्पू मांमेइं बड़ी बेंस भोइ, कि असन मां बड्डो कौन आए? 47 यीशु तैन केरि दिलेरी गल्लां बुझतां निकडो बच्चो आनो ते तै एप्पू कां खडू कियूं। 48 ते अपने चलन सेइं ज़ोवं, “जै इस बच्चे मेरे नव्वे सेइं कबूल केरते, तै मीं कबूल केरते, ते जै मीं कबूल केरते, तै मेरे भेजने बाले कबूल केरते। किजोकि जै तुसन मां निकडे करां निकडोए तै सेबन करां बड्डोए।”

[22 22222 2222 22 2222 2222](#)
([222222 9:38-40](#))

49 तैखन यूहन्ना यीशु सेइं ज़ोवं, “ए गुरू, असेई अक मैन्हु तेरे नव्वे सेइं भूतां केरो सैयो कढतो लाव, ते असेई तैस ठाकू किजोकि तै असन सेइं साथी मिलतां तीं पत्ती न चले।” 50 पन यीशुए जुवाब दित्तो, “तैस न ठाका, किजोकि जै तुशे खलाफ नई तै तुशे पासे।”

[222222 22222 22222222 22222222 222222](#)

51 जैखन यीशुएरे उबरे नेनेरे दिहाडे पूरे भोने पुड थी त तैनी पक्के चारे यरूशलेम नगरेरे पासे गानेरो खियाल कियो। 52 ते एप्पू करां अग्री-अग्री किछ बिस्तार देनेबाले लोक भेजे। ते लोक सामरी लोकां केरे एक्की डलोव्वे मां जे ताके यीशुएरे एजनेरी ठार तियारी केरन। 53 पन लोकेई तै एजने न दित्तो, किजोकि तै यरूशलेम नगरे जो चलोरो थियो। 54 एन हेरतां तैसेरे चेले याकूब ते यूहन्ना ज़ोने लगे, “हे प्रभु, कुन तू चातस, कि अस हुक्म देम, अम्बेरां अग बखेनतां एन लोकन भस्म केरे?” 55 पन तैनी बेदलोइतां तक्कू, ते तैना झिडके (ते ज़ोवं, “तुस न जानथ कि तुस कौस आत्मारे आथ। 56 किजोकि मैनेरू मट्टू लोकां केरे प्राणन नाश केरने लेइ नई बल्के बचाने ओरोए)” तैखन तैना होरि डलोव्वेरे पासे चले जे।

[22222222 22222 22222222 22222](#)
([222222 8:19-22](#))

57 जैखन तैना बत्तां चलोरे थिये, त केन्चे तैस सेइं ज़ोवं, “तू जैडी-जैडी भी गालो, अवं तीं पत्ती चलेलो।” 58 यीशुए तैस सेइं ज़ोवं, “लौई केरि कूढां ते अम्बेरेरे चुडोल्लू केरे आले भोतन, पन मैनेरे मट्टे यानी मीं कां कोई ठार नई जैडी अवं झुल्ली सेक्वी।” 59 फिरी यीशु एक्की होरि जो ज़ोवं, “मीं पत्ती चले,” पन तैनी मैने ज़ोवं, “हे प्रभु मीं घरे गानेरी अजाजत दे, मेरे बाजेरे मनेरां बाद अवं तैस देबतां एज्जेलो ते फिरी तीं पत्ती चलेलो।” 60 यीशुए तैस जो ज़ोवं, “जैना लोक आत्मिक तरीके सेइं मरेन तैन अपने मैन्हु मरने बलगने दे, पन तू गा ते परमेशेरे राज्जेरे बारे मां लोकन मां प्रचार केर।” 61 एक्के होरे भी ज़ोवं, “ए प्रभु अवं तीं पत्ती चलेलो, पन पेइले मीं भेज कि अवं अपने घरेबालन ज़ोई।” 62 यीशुए तैस सेइं ज़ोवं, “जै कोई हल्ली पुड हथ रेखतां पत्रोवं फिरतां तकते, तै परमेशेरे राज्जेरे काबल नई।”

10

70 [22222 222222](#)

1 ते इन गल्लां केरे बाद प्रभुए 70 होरे चेले ठहराए, कि तै जैस-जैस नगर ते ठैरी तैनी एप्पू गानेरे बारे मां सोचोरू थियूं, तैडी दूई-दूई मैन्हु एप्पू अग्री भेजे। 2 ते तैनी तैन सेइं ज़ोवं, “पकोरी फसलरे जेरे बडे लोक तियार आन जैना परमेशेरे वचने पुड विश्वास केरनू चातन, पन कम केरनेबाले थोडे आन जैना तैन परमेशेरे राज्जेरे

बारे मां ज़ोन । एल्हेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशेरे राजेरे बारे मां ज़ोन ।” 3 गाथ, अवं तुसन भेइडां केरे जेरे गिदन मां भेजताई । 4 एप्पू सेइं साथी न बेटवे, न झोलो, न बूट नेइयथ, ते न बत्तां केन्ची जो नमस्कार जोइयथ । 5 जेसेरे घरे मां गाथ त पेइले ज़ोथ कि, “इस घरे मां शान्ति भोए ।” 6 अगर तैड़ी एरे लोक ज़ैना परमेशेरी शान्ति चातन तैड़ी रहते भोलो, त तुशशी शान्ति तैस पुड़ राली, नई त तुशशी शान्ति तुसन पुड़ एज्जेली । 7 तैस्से घरे मां राथ, ते ज़ैन किछ तैन करां मैल्ले, तैन्ने खाथ-पीथ किजोकि मज्जदूर अपनि मज्जदूरारो हकदार भोते, घरे-घरे न गोइयथ । 8 ते ज़ैस नगर मां गाथ, ते तैट्टेरे लोक तुसन अपने घरे मां नेन, त ज़ैन किछ तुशशे सामने रख्वू गाए तैन्ने खाथ । 9 तैट्टेरे बिमारन बज्जाथ, ते तैन सेइं ज़ोथ, “परमेशेरे राजे नेडे ओरूए ।” 10 पन ज़ैस नगर मां गाथ, ते तैट्टेरे लोक तुसन कबूल न केरन, त तैट्टेरे बजारन मां गोइतां ज़ोथ । 11 “कि तुशशे नगरेरी धूड भी इशशे पावन सेइं ज़ै लगोरीए अस तुशशे सामने ठुडकतम ते फिरी भी बुझा कि परमेशेरे राजे तुशशे नेडे पुजेरूए ।” 12 अवं तुसन सेइं सन्न ज़ोताई, तैस दिहाडे तैस नगरेरी हालत सदोम नगरेरी हालत झैल्लनेरे काबल भोली ।

१११ ११११११११ ११११ १११११११
(१११११ ११:२०-२४)

13 “हे खुराजीन! तीं पुड़ अफ़सोस! हे बैतसैदा तीं पुड़ अफ़सोस! कि एना चमत्कार मीं तुसन इड़ी हिराए अगर मीं एना कम्मां सूर ते सैदा मां हरेवरां भोथां, त तैन लोकेई केइसेरे देंते टाट पलेटतां ते दोग्गे पुड़ मांजन छेइतां पापन करां मनफिरावरो भोथो । 14 पन फिरी भी इन्साफेरे दिहाडे तुशशो हाल सूर ते सैदारे हाले करां जादे बुरो भोलो । 15 ते हे कफरनहूम नगरेरे लोकव, कुन तुस सोचतथ कि स्वर्गे मां तुशशी आदर भोनीए! ई तुस त नरके गाले ज़ैड़ी पैपी लोकन सज़ा मैलेली! 16 ज़ै तुशशी शुन्ते, तै मेरी शुन्ते ज़ै तुसन घटिया समझते तै मीं घटिया समझते, ते ज़ै मीं घटिया समझते ते मेरे भेजने बाले घटिया समझते ।”

७० ११११११ ११११ ११११ ११११

17 तैना सतर चले खुशी सेइं वापस आए, ते ज़ोने लगे, “हे प्रभु तेरे नंवे सेइं भूतां भी इशशो हुक्म मन्तन ।” 18 तैनी तैन सेइं ज़ोवं, “मीं शैतान एन्चरे बिछड़तो लाव जेन्चरे चडक अम्बेरां पेचे । 19 हेरा, मीं तुसन सप्पन ते बिचन डल्लेचनेरो, ते दुश्मनेरी (शैतानेरी) सैरी शेक्ति पुड़ अधिकारे दित्तोरोए, ते केन्ची चीजी सेइं तुसन नुकसान न भोलो । 20 फिरी भी तुस इस गल्ली सेइं खुशी न भोइयथ कि भूतां तुशशो हुक्म मेनचन, पन इस गल्ली सेइं खुश भोइयथ कि तुशशू नवं स्वर्गे मां लिखोरूए ।”

११११११११ १११ १११११
(१११११ ११:२५-२७; १३:१६-१७)

21 तैखन यीशु पवित्र आत्मा सेइं मघन भोवं, ते ज़ोने लगे, “हे बाजी, स्वर्गेर त धेरतरे प्रभु, अवं तेरू शुक्र केरताई, कि तीं इना गल्लां, अक्लमन्द ते समझदारन करां छपेइतां रेख्वी, ते बच्चन पुड़ बेदी की, हाँ, हे बाजी, किजोकि तेरी खुशी एस्से मां थी । 22 सैरी चीजां मेरे बाजेरी तरफां मेरे सुपुर्द कियोरिन, कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टू ज़ानते, या तै मैन्हु बाजी ज़ानते ज़ैस पुड़ मट्टू बांदो केरने चाए ।”

23 तैखन तैनी अपने चेलां केरे पासे फिरो अकैल्ले मां ज़ोवं, “धन आन तैना एच्छी ज़ैना एना गल्लां हेरचन ज़ैना गल्लां तुस लातथ, 24 किजोकि अवं तुसन सेइं ज़ोतां, कि बडे नेबन ते राजां केरि खुवैइश थी, कि एना गल्लां हेरन, ज़ैना तुसेईं लेई, पन न लेई सके, ते एना गल्लां शुन्न ज़ैना तुस शुन्तथ पन न शुनी बेटि ।”

१११ १११ ११११११११ ११११११

25 एक्सां यीशु लोकन शिक्षा देने लोरो थियो, ते हेरा, अक शास्त्री खडो भोव, ते इन ज़ोइतां तैस अज़माने लगे, “ए गुरू, हमेशारी ज़िन्दगी हासिल केरनेरे लेइ अवं कुन केरि?” 26 तैनी तैस जुवाब दित्तो, “मूसेरे कानूने मां कुन लिखोरूए? तू केन्चरे समझतस?” 27 तैनी जुवाब दित्तो, “तू प्रभु अपने परमेशेरे सेइं अपने सारे दिले, सैरी जानी सेइं, ते अपनि सैरी ताकती सेइं ते अपनि सैरी अक्ल सेइं प्यार रख, ते अपने पडोसी सेइं अपने बराबर प्यार केर ।” 28 तैनी तैस सेइं ज़ोवं, “तीं ठीक जुवाब दित्तो एन्ने केर, फिरी तीं हमेशारी ज़िन्दगी मैलेली ।” 29 पन तैनी अपनो आप धर्मी ठहरानेरे लेइ यीशु पुच्छू, “फिरी मेरो पडोसी कौने?” 30 यीशुए तैस मिसाल देइतां जुवाब दित्तो, “अक मैन्हु यरूशलेम नगरेरां यरीहो नगरे जो चलोरो थियो, ते तै डैकेइ तैस पुड़ हमलो कियो, ते ज़ैन किछ

तैस कां थियूं नेव । ते तैसेरां लिगडां खोल्लां, ते मारो कुट्टो ते ज़ख्मी केरतां अधमरो बनेइतां तैड़ी जेरे छडतां चले जे । 31 ते एरू भोवं कि, अक याजक तैस बत्तां चलोरो थियो, तैनी तै लव ते थरकतो तैसेरी मद्दत केरने बगैर इलखमेइं निस्सो । 32 एन्चरे अक मन्दरे मां कम केरनेबालो लेवी भी निस्सो, ते तैस लेइतां तै भी इलखमेइं निस्सो । 33 फिरी अक सामरी मुसाफर भी तैस बत्तां निस्सो, ते तैस लेइतां तैस बड़ो तरस अव । 34 ते तै तैस कां जेव, ते तैसेरे ज़खमन तेल मल्लो ते दाछोरो रस लाव, ते तैसेरे ज़खमन पट्टी बंधी ते अपने गधे पुड़ च़ेढ़तां एक्की धर्मशाली मां तैसेरी सेवा की । 35 होरसां तैनी दूई दीनार केढतां धर्मशाले मालिके कां दित्ते, ते ज़ोवं, 'एसेरी हेरगेश करां अगर जादे लग्गले त अवं वैपसी पुड़ देलो ।' 36 तेरे समझी मां एन टलेइन मरां कौन तैसेरो पड़ोसीए ज़ै डैकेइं ट्लातोरो थियो?" 37 तैनी जुवाब दित्तो, "जैनी तैस पुड़ दया की ।" यीशुए तैस सेइं ज़ोवं, "गा, तू भी एरू केर ।"

॥॥॥॥॥ ॥॥ ॥॥॥॥॥॥॥॥॥ ॥॥॥॥ ॥॥॥॥॥॥

38 फिरी ज़ैखन यीशु त कने तैसेरे चले गेइ रावरे थियो, त तैना एक्की इलव्वें मां जे, ते मार्था नव्वेंरी एक्की कुआन्शां यीशु अपने घरे नीयो । 39 ते मरियम नव्वेंरी तैसेरी अक बेइन थी, तै यीशुएरे पावन कां बिशतां तैसेरी गल्लां शुनती थी । 40 पन मार्था किछ् खास चीज़ बनेइ रावरी थी, ते यीशु कां आई ते ज़ोने लगी, "हे प्रभु तुसन ज़रां भी खियाल नई कि, मेरी बेइनां अवं कम केरनेरे लेइ अवं अकैल्ली छडोरी? ते एस ज़ोथ, तै मेरी मद्दत केरे ।" 41 प्रभुए तैस जुवाब दित्तो, "मार्था, हे मार्था, तू बेइ गल्लां केरे फिक्र केरतिस, 42 पन अक गल ज़रूरीए, मरियमा तै रोड़ो हिस्सो चुनोरोए, ज़ै तैस करां कोई न नेइ सके ।"

11

॥॥॥॥ ॥॥॥॥॥॥॥॥॥ ॥॥॥॥॥ ॥॥॥॥॥॥॥॥॥
(॥॥॥॥॥ 6:9-13)

1 फिरी यीशु एक्की ठैरी प्रार्थना लोरे थियो केरने । ते ज़ैखन तैनी प्रार्थना की, त तैसेरे चलन मरां एक्के ज़ोवं, "हे प्रभु, जेन्चरे यूहन्ना अपने चलन प्रार्थना केरनि शिखालोरिये तेन्चरे तू भी असन शिखाल ।"

2 यीशुए तैन सेइं ज़ोवं, "ज़ैखन तुस प्रार्थना केरथ, त एन ज़ोइयथ, हे बाजी, लोक तेरी आदर केरन किजोकि तू पवित्तर परमेशर आस । ते तेरू राज एज्जे ।"

3 इशरी रोज़ेरी रोट्टी असन दे ।

4 इशे पाप माफ़ केर, किजोकि अस भी ज़ैना इशे खलाफ बुराई केरतन, तैन माफ़ केरतम । अज़मैइशेरे ज़िरिये असन पाप केरने न दे ।"

॥॥॥॥॥॥॥॥॥॥॥ ॥॥॥॥ ॥॥॥ ॥॥॥॥॥॥॥॥ ॥॥॥॥॥॥
(॥॥॥॥॥ 7:7-11)

5 फिरी यीशुए तैन सेइं ज़ोवं, "फर्ज केरा तुसन मरां केन्चेरो अक दोस्त एध्धी राती अपने दोस्ते ज़ोए, 'तू मीं ट्लाई रोट्टी दे । 6 किजोकि मेरो अक दोस्त बड़े दूरेरां हंठतो मेरे कां ओरोए, ते मेरे कां रोट्टी नई, कि अवं तैस रोट्टी देइ सेखी ।' 7 ते तै तैसेरो दोस्त अत्रां जुवाब दे, मीं दुःख ने दे, हुनी त दार बंदे, मीं कां मेरे बच्चे झुलोरेन, ते अवं तीं रोट्टी न देइ सेखी । 8 अवं तुसन सेइं ज़ोताई कि, अगर तै तैसेरो दोस्ते ते तैस रोट्टी न दे, त तैसेरो दोस्तेरे बार-बार मिनत केरने सेइं ज़रूर तैस रोट्टी देलो ते ज़ेत्त्री रोट्टी केरि तैस ज़रूरत भोली देलो । 9 ते अवं तुसन सेइं ज़ोताई, मग्गा त तुसन दित्तू गालू । ते तोप्पा, त तुसन मैल्ली गालू । ते दार गुड़काथ, त तुशे लेइ खोल्लू गालू । 10 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुड़काते त तैसेरेलेइ खोल्लू गाते । 11 तुसन मरां कौन ज़ेरो बाजी एरो भोए, कि ज़ैखन तैसेरू मट्टू रोट्टी मग्गे त तैस घोड़ दे? या मच्छली मग्गे, ते तै सप दे? 12 या ठूल मग्गे त तैस बिच्चू दे? 13 ते तुस बुरे भोनेरे बावजूद भी अपने मट्ठन रोड़ी चीजां देनी ज़ानतथ त तुशो स्वर्गेरो बाजी तैन, ज़ैना तैस करां मगतन पवित्तर आत्मा किना देलो ।"

॥॥॥॥ ॥॥ ॥॥॥॥॥॥
(॥॥॥॥॥ 12:22-30; ॥॥॥॥॥ 3:20-27)

14 फिरी तैनी एक्की लट्टे मरां भूतेरो सैयो कढो, ज़ैखन भूतेरो सैयो निस्सो, त तै लट्टो गल्लां लगो केरने, ते लोक हैरान रेइजे । 15 पन तैन मरां किछ् मैनेई ज़ोवं, "ए त भूतां केरे गुरू शैतानेरे मद्दती सेइं भूतां कढते ।"

16 ते किछेई अजमानेरे लेइ तैस करां कोई अक अम्बेरो निशान मग्गो। 17 पन यीशुए तैन केरे मन्नां केरे खियाल जैनतां तैन सेइं ज़ोवं, “जैस-जैस राज्जे मां फूट पेचे, तैन राज्ज बनोरू न राए, ते जैस खानदाने मां फूट पेचे, तैन भी बनोरू न राए। 18 अगर शैतान अपनि खलाफत एप्पू केरे, त फिरी तैसेरू राज्ज केन्चरे रेइ सकते? फिरी तुस केन्चरे ज़ोतथ कि अवं शैतानेरे मद्दती सेइं भूतां कढताई। 19 अगर अवं शैतानेरी मद्दती सेइं भूतां कढताई त तुश्शी औलाद कसेरे मद्दती सेइं कढती? तैन्ना तुश्शो फैसलो केरनेबाले हाकिम भोले। 20 पन अगर अवं परमेशेरे शक्ति सेइं भूतां कढताई त परमेशेरू राज्ज तुश्शो नेडे पुजोरूए। 21 जैखन कोई ज़ोरेबाले मैन्हु अपने घेरो पेरहो केरते, त तैसेरू सब किछ बंचेरू रहते। 22 पन जैखन तैस करां कोई निगर मैन्हु तैस पुड़ हमलो केरते त तैस अपने कब्जे मां केरतां तैसेरे सारे हथियार धिनी गाते जैस पुड़ तैसेरो भरोसो थियो, ते तैसेरी सारी जेइदाद लुटी गाते। 23 जै मीं सेइं साथी नई तै मेरे मुखालफे, ते जै मीं सेइं साथी अकोट्टू न केरे ते तै खिलारते।

ⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂ ⓂⓂⓂ
(ⓂⓂⓂⓂⓂ 12:43-45)

24 “जैखन केन्ची मैन्हु मरां भूत निसते त तैन शुक्कोरो ठैरन मां आराम तोपते ते जैखन तैस तै आराम न मैल्ले त ज़ोते कि अवं वापस तैस्से घरे मां गालो ज़ैट्टां अवं निसोरोई। 25 ते तैखन तैन भूत वापस एइतां तैन घर साफ सुथरू रोडू लाते। 26 तैखन तै एप्पू सेइं साथी सत होरां भूतां साथी घिन्तां तैस मां अन्तर गेइतां बिश्शतन, ते तैस मैनेरो हाल पेइले हाले करां जादे बुरो भोते।”

ⓂⓂ ⓂⓂⓂⓂⓂ

27 जैखन यीशु इना गल्लां ज़ोने लगगोरो थियो, त भीडी मरां अक कुआन्श जोरे सेइं ज़ोने लगी, “धने तै कुआन्श जैसां तीं ज़र्म दित्तू ते तू पालो।” 28 पन यीशुए ज़ोवं, “हाँ, पन धन आन तैना लोक ज़ैना परमेशेरू वचन शुन्तन ते तैस पुड़ अमल केरतन।”

ⓂⓂⓂⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂⓂ
(ⓂⓂⓂⓂⓂ 12:38-42)

29 जैखन हछे लोक भोने लगे त यीशु ज़ोवं, “इस ज़मानेरे लोक बुरेन, तैना निशान तोपतन, पन योनेरे निशानेरे अलावा एन होरो कोई निशान न दित्तो गालो। 30 किजोकि ज़ेन्चरे योना नबी नीनवेरे लोकन जो निशान बनो तेन्चरे मैनेरू मट्टू भी इस ज़मानेरे लोकां केरे लेइ निशान बनेलू। 31 पन दक्षिणेरी रानी आदालतरे दिहाडे इस ज़मानेरे लोकन दोषी बनाली, किजोकि तै बडे दूरेरां सुलैमानेरे ज़ानेरे बारे मां शुन्तां ओरी थी। ते इडी हेरा सुलैमाने करां भी बड्डोए। 32 नीनवेरे लोक आदालतरे दिहाडे इस ज़मानेरे लोकन सेइं साथी खडे भोइतां मुर्जम बनाले। किजोकि तैनेई योनारे प्रचारे सेइं पापन करां मनफिरावरो थियो, पन इडी हेरा तै आए, जै योना करां भी बड्डोए।

ⓂⓂⓂⓂⓂ ⓂⓂⓂⓂⓂ
(ⓂⓂⓂⓂⓂ 5:15; 6:22-23)

33 “कोई मैन्हु दीयो बैलतां भांडे हैठ या ओइकतां न छडे, बल्के उच्ची ठैरी रखतन ताके अन्तर एजने बालन लौ भोए। 34 अछ्छ जानेरे लेइ दीयेरी ज़ेरि आए, अगर तेरी अछ्छ रोडीए, त तेरी जानी मां भी लौए, ते अगर तेरी अछ्छे बुरीए त तेरी जान भी आंधरीए। 35 एल्हेरेलेइ खबरदार रेइयां, कोस्कोई एरू न भोए कि जै लौ तीं मां आए तै आंधरू न भोए। 36 अगर तेरी जानी मां लौए, त तैसेरो कोई भी हिस्सो आंधरो न भोए, त सब एरू भोलू, जैखन दीयो चमकतां लौ देते।”

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂ 23:1-36; ⓂⓂⓂⓂⓂ 12:38-40)

37 जैखन तै एना गल्लां ज़ोने लोरो थियो, त केन्चे फरीसे यीशु कां मिनत की, कि मीं सेइं साथी रोट्टी खा, ते यीशु तैसेरे घरे जेव ते तैसेरे कां गेइतां रोट्टी खाने बिश्शो। 38 फरीसी लोक एन हेरतां हैरान भोव, कि ए बगैर हथ-पाव धोने रोट्टी खाने बिश्शी जेव। 39 पन प्रभुए फरीसी सेइं ज़ोवं, “हे फरीसाव तुस कटोरो, ते थाली बेइरमेई त बडी साफ केरतथ, पन तुश्शो अन्तर ज़ुलम ते लालच भेरतां। 40 हे बेअक्लाव, जैनी बेरीयोवं हिस्सो बनावरोए, तैनी आंटलेइयों हिस्सो नई बनेरो? 41 बस्सा एन्त्री चीज दान केरा, त हेरा, सब किछ तुश्शो लेइ साफ भोइ गालू। 42 पन हे फरीसाव, तुसन पुड़ अफ़सोस! तुस पुतनेरो ते ज़ीरेरो ते कने सेब्ज़ारो दशोवं हिस्सो देतथ, पन तुस इन्साफ केरने करां त परमेशेरे प्यारे करां दूर रातथ, लोइतू थियूं कि दशोवं हेसे सेइं साथी इन भी केरेथे।

43 हे फरीसाव, तुसन पुड अफ़सोस! तुस लोक चातथ कि प्रार्थना घरन मां तुसन एग्री कुर्सन पुड विशालन ते बजारन मां लोक तुसन कां झुकतां नमस्कार केरन। 44 पन हे फरीसाव तुसन पुड अफ़सोस! तुस तैन छेपूरी कब्रां केरे ज़ेरेथ, जैन पुड लोक चलतन, पन तैन पतो न भोए।”

45 तैखन शास्त्री मरां एक्के तैस जुवाब दित्तो, “हे गुरु एना गल्लां ज़ोइतां तू इशरी तुहीन लोरोस केरने।” 46 यीशुए ज़ोवं, “हे शास्त्री लोकव, तुसन पुड अफ़सोस! तुस मैनन् पुड त एत्रो भारो लदतथ ज़ै छूनो असुखतो भोते ते पन एप्पू अपने कानूने मन्नेरी कोशिश भी न केरन। 47 तुसन पुड अफ़सोस! तुस नेबी केरि कब्रां बनतथ ते तुशशे दादे-पडदादेई तैना मारोरे थिये। 48 बस्सा, तुस शहातथ कि तुस अपने दादे-पडदादां केरे कम्मां केरि पूरी तैइद केरतथ, किजोकि तैनेई त नबी कत्ल कमाए ते तुस तैन नेबी केरि कब्रां बनातथ। 49 एल्हेरेलेइ प्रभु परमेशेरी अक्लां ज़ोवं, नबी त प्रेरित तैन कां भेजनेन तैना तैन मरां किछ कत्ल केरेले ते किछन सताले। 50 बस्सा ई कौम सारे नेबी केरे खूनेरे ज़ै दुनियारे शुरू करां देंतो बगेवरोए ज़िमेवार भोली। 51 हाबिलेरे खूने करां देंतो ते जकर्याहरे कत्ले तगर ज़ै तुसेई मन्देरे ते बलिदान केरनेरे ठारारे मझाटे मन्देरे अंगने मां कत्ल कियोरो थियो। अवं ज़ोताई कि ए कौम तैन केरे खूनेरी ज़िमेवार भोली। 52 पन हे फरीसाव तुसन पुड अफ़सोस! तुसेई शास्त्री लोकेई चाबी त अपने कब्जे मां रखवी, पन तुस एप्पू भी दाखल न भोए ते ज़ैना दाखल भोनू चाते थिये तैना भी रोके।” 53 ज़ैखन यीशु तैट्टां निस्सी जेव त शास्त्री ते फरीसी लोकेई तै घेरो ते सरकरे मारे च़ेवरे पासना बड़े असुखते सवाल पुच्छने लगे। 54 ताके यीशुएरे ज़बा एरी गल निस्से ज़ैस सेइ लोक तैस पुड गलती लांन।

12

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ
(ⓂⓂⓂⓂⓂⓂ 10:26-27)

1 एत्रे मां हज़ारेई मैन्हु अकोट्टे भोइ जे, ते एक्की होरि उन्डे खिरकते थिये त यीशुए सेबन करां पेइले अपने चलन खड़े भोइतां ज़ोवं, “फरीसी लोकां केरे पाखंडेरे खमीरे यानी तैन केरे रीति रूवाज़न करां हुशार रेइयथ। 2 कोई चीज़ ओड़कोरी नई ज़ै बांदी न भोए, ते न कोई चीज़ छपूरीए ज़ै ज़ानी न गाए। 3 एल्हेरेलेइ ज़ैना गल्लां तुसेई आंधेरे मां ज़ोरिन तैना गल्लां लोई मां शुनोनिन, ते ज़ैना गल्लां तुसेई अन्तर ज़ोरिन तैन केरू एलान लाए पुड भोनूए।

ⓂⓂⓂ ⓂⓂⓂⓂⓂ ⓂⓂⓂⓂⓂ
(ⓂⓂⓂⓂⓂⓂ 10:28-31)

4 “दोस्तव अवं तुसन सेइ सत्र ज़ोताई कि तैन करां न डेरथ ज़ैना जानी नुकसान पुजातन तैसेरे बाद तैना किछ न केरि बटन। 5 पन अवं तुसन सेइ सत्र ज़ोताई कि केस करां डरू लोड़ते, ज़ैस जानी मारनेरे बाद तैसेरी आत्माई नरके मां छडनेरो अधिकारे, हाँ अवं तुसन सेइ सत्र ज़ोताई कि तैस करां डरा। 6 कुन दूई पेंडसन मां पंच च़डोली न बिकन? पन परमेश तैन मरां केन्ची भी न बिसरे। 7 बल्के तुशशे दोग्गेरे सारे बाल गनोरेन डरा नन्ना तुस त काई चुडोलन करां भी जादे कीमती आथ।

ⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂⓂ 10:32-33; 12:32; 10:19-20)

8 “अवं तुसन ज़ोताई कि ज़ै कोई मैन्हु केरे सामने मेरो इकरार केरेलो, त अवं मैनेरू मट्टू भी परमेशेरे स्वर्गदूतां केरे सामने इकरार केरेलो 9 पन ज़ै मैन्हु केरे सामने मेरो इन्कार केरेलो त तैसेरो इन्कार परमेशेरे स्वर्गदूतां केरे सामने कियो गालो।

10 “ज़ैना लोक मैनेरे मट्टेरे खलाफ किछ ज़ोले तै तैस माफ़ केरेलो पन ज़ै पवित्र आत्मा तुहीन केरेलो तैस माफ़ न केरेलो।

11 “ज़ैखन तैना तुसन प्रार्थना घरन मां ते बड़े-बड़े ते अधिकैरन कां नेले त फिकर न केरथ कि अस कुन ज़ोम ते केन्चरे जुवाब देम। 12 किजोकि पवित्र आत्मा तुसन तैस वक्ते ज़ोलो कि तुसेई कुन ज़ोनूए।”

ⓂⓂⓂⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂⓂⓂⓂⓂⓂⓂ ⓂⓂⓂⓂⓂⓂⓂ

13 फीरी भीड़ी मरां केन्चे एक्के यीशु सेइ ज़ोवं, “हे गुरु जी मेरे ढलाए जो ज़ो, कि इशशे बाजी केरि जेइदाती मरां मेरो हिस्सो मेरे हवाले केरे।” 14 यीशुए तैस जुवाब दित्तो, “अवं केनि तुशशो हाकिम या बंटने बालो बनेवरोइ?”

15 ते यीशुए तैन सेइ ज़ोवं, “हर किसमेरे लालच़े करां दूर भोइयथ ते न केन्चेरी जेइदाद केन्चेरी जानी करां जादे

भोए।” 16 तैखन यीशुए तैन अक मिसाल शुनाई, “केन्ची अमीरेरे ज़मीनी मां बड़ी फसल बनी। 17 तै अपने दिले मां सोचतां ज़ोने लगी, कि अवं कुन केरि, मीं कां ठारे नई कि ज़ैड़ी अवं अन्न रेख्खी सेखी? 18 तैखन तैनी ज़ोवं कि, ‘अवं अक कम केरताई, अपने पुराने कोठार पुटतां होरे बड्डे कोठार बनेइ ते अपनू सारू अन्न तैस मां रखेलो। 19 फिरी मीं अपने आपे सेइं ज़ोनूए कि, मीं कां त बडे सालन तगर अन्न जम्हां भोरूए, मेरी जान आरामे सेइं खा ते एश केर।’ 20 पन परमेशरे तैस मैन्हु जो ज़ोवं, ‘हे बेवकूफ अज़े राती तू मरेलो, ते ज़ैन किछ् तीं अपने लेइ जम्हां केरतां रखेरूए तैन केसेरू भोलू?’ 21 एल्हेरेलेइ ज़ै अपने लेइ दौलत जम्हां केरते, पन परमेशरेरी नज़री मां तै अमीर न भोए एसेरो भी एरो हाल भोनोए।”

ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ
(ⓂⓂⓂⓂⓂⓂ 6:25-34)

22 तैखन यीशुए अपने चलन सेइं ज़ोवं, एल्हेरेलेइ तुस न अपने ज़िन्दगरी ज़रूरतरे लेइ फिक्र केरा, कि तुस कुन खाले, ते न अपने जानारी कि कुन लामेले। 23 किजोकि प्राण रोट्टी करां ते जान लिगडे करां बेधतां भोते। 24 कांवां केरां तक्का, तैना न बेन ते न कटन ते न तैन कां गुदाम या कोठार भोन, तांभी परमेशर तैन खाने जो देते ते तुस त चुड़ोलन करां भी जादे कीमती आथ। 25 तुसन मां एरो कौन आए, ज़ै फिक्र केरतां अपनि उमर अक घड़ी भी बधैई सकते? 26 बस्सा, ज़ैखन तुस ए अक निकड़ी ज़ेरि गल भी न केरि बटथ, त बाकी बेड्डी चीज़ां केरि फिक्र किजो केरतथ? 27 सोसनेरे फूडू केरे तक्का कि तैना केन्चरे बेडोतन? तैना न मेहनत केरन ते न कत्तन, फिरी भी अवं तुसन सेइं ज़ोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगडा न लां। 28 बस्सा ज़ैखन परमेशरे मैइदानेरो घास, ज़ै अज़ आए ते कालां लौवंने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड न देलो? 29 ते एस फिक्रे मां न रेइयथ, कुन खामेले, या कुन पीमेले, या कुन लामेले, ते न शक केरथ। 30 किजोकि दुनियारी सैरी कौमां एस्से फिक्रे मां लेगोरी रेइचन, पन तुशशो बाजी जानते, कि तुसन कोनां-कोनां चीज़ां केरि ज़रूरत आए। 31 पेइले परमेशरेरे राज़ेरे तलाश केरा, फिरी तुसन एना सैरी चीज़ां मैल्ली गैली।

ⓂⓂⓂⓂⓂⓂ ⓂⓂⓂⓂ
(ⓂⓂⓂⓂⓂⓂ 6:19-21)

32 “तुस भैड्डां केरे निकडे केन्चरे ज़ेरेथ, तुस कोन्ची गल्लरे लेइ न डरा, किजोकि तुशशे बाजेरी खुशी एस्से मां आए, कि तै तुसन राज़ दे। 33 अपनू घरबार बेचतां धर्मरथ देथ, ते एप्पू जो अक बेटुवो बनाथ, ज़ै पुरानो न भोए, स्वर्गे मां दौलत जम्हां केरा ज़ै कधे न मुक्के, ज़ैड़ी न चोर पुजे ते न कीड़ो खाए। 34 किजोकि ज़ैड़ी तेरी दौलत भोली, तैड़ी तेरो दिल भी लगगेलो।

ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ

35 “सेवा केरनेरे लेइ रोडेचारे कमर बेद्धतां तियार भोथ, ते तुशशे दीये सैरी राती बलते रान। 36 तुस मेरे एजनेरे लेइ एन्चरे तियार राथ, ज़ेन्चरे मैन्हु केरे अपने मालिके, ज़ै इलाएरे धामी मरां वापस एजने बलगतन, कि ज़ैखन तै एज्जे ते दार गुडकान त अस दार खोल्लम। 37 तैना नौकर धन आन ज़ैना अपने मालिकेरे वापस एजने पुड बींझे मैलतन, अवं तुसन सेइं सच्च ज़ोताई, कि तै एप्पू तैन रोडेचारे नौकरन लिगडां लेइतां तियार लाएलो, ते मालिक तैन सेइं खुश भोइतां एप्पू सेइं साथी रोट्टी खाने बिशालेलो ते तैन केरि सेवा केरेलो। 38 अगर मालिक एध्धी राती या झेझेरेपार एइतां अपने नौकरन बींझे लाए त तैन नौकरां केरे लेइ केतूरी रोड़ी गल्ले। 39 पन याद रखा, अगर घरेरे मालिके, चोर एजनेरो पतो भोए त तै बींझो राथो ते अपने घरे चोरी न देथो भोने। 40 बस्सा, तुस भी मेरे वापस एजनेरे लेइ तियार राथ, मैनेरू मट्टू यानी अवं तैस वक्ते एज्जेलो ज़ेइस तुसन खियाल भी न भोलो।”

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂ
(ⓂⓂⓂⓂⓂⓂ 24:45-51)

41 पतरसे पुच्छू, “हे प्रभु ज़ै मिसाल तीं शुनाई तै सिर्फ इशे लेइए या सेब्भी केरे लेइए?” 42 प्रभुए ज़ोवं, “कौने ईमानदार अक्लमन्द नौकर ज़ेसेरो मालिक तैस अपने नौकरन पुड मुन्शी रखे ताके तैन केरि खूराक ठीक मौके पुड रोडेचारे बंटतो राए? 43 तै नौकर धने कि ज़ेसेरो मालिक एज्जे ते मालिक तैस रोडेचारे कम केरतू लाए। 44 अवं तुसन सेइं सच्च ज़ोताई कि तै अपने सारे घरबारेरी हेरगैशरो अधिकार तैसेरे सुपुर्द केरेलो। 45 पन अगर तै नौकर अपने दिले मां ज़ोए कि मेरे मालिके एजने हेजू बड् चिरे ते होरि नौकरन ते नौकरेनन मार धाड़ केरनि शुरू

केरे ते खेइ पीतां नशे मां मसत भोइ गाए। 46 ते तैस नौकरेरो मालिक केन्ची एरे दिहाडे एज्जे जेइस तैस नौकरे एजनेरो पतो न भोए ते तै मालिक एज्जी गाए त तैस नौकरेरे टुकड़े-टुकड़े केरतां ते तैसेरी हालत बेइमाना केरि जेरि भोली। 47 हर तै नौकर जै ज्ञानते कि तैसेरे मालिकेरी कुन मर्जी आए, कि तै कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्जी पूरी न केरे तैस पक्की मार बजनीए। 48 पन अगर कोई नौकरे जैस नई पतो कि मेरे मालिकेरी कुन मर्जी, कि अवं कुन केरि, ते तैन केरे जैस सेइं तैस सज्जा मैल्ले, त तैस घट सज्जा मैलेली।”

ॐॐॐॐॐॐ ॐॐॐॐॐॐ ॐॐॐॐॐॐ
(ॐॐॐॐॐॐ 10:34-36)

49 यीशुए ज़ोवं, “अवं धेरती पुड़ अग लाने ओरोई ते अगर अग लगगोरी भोथी त रोडू थियूं। 50 पन मीं बड़े जल्दी दुःख झैल्लनोए, ते अवं बड़ो परेशानई ज़ां तगर दुख न झैल्ली। 51 कुन तुस एन सोचतथ कि अवं धेरती पुड़ मेल कराने लेइ ओरोई? नई! अवं तुसन सेइं ज़ोताई, कि अलग केरने ओरोई। 52 अज्जेरे बाद अगर एक्की घरे मां पंच मैन्हु भोले त तैना एप्पू मांमेई बेंटोले, टलाई ज़ैना मीं पुड़ विश्वास न केरन तैना दुइयां केरे खलाफ भोले, ते दई, टलेइयां केरे खलाफ भोले। 53 बाजी मट्टेरे खलाफ भोलो ते मट्टू बाजेरे खलाफ भोलू, हैई कुइयरे खलाफ ते कुई हैईयरे खलाफ ते शिख नुशारे ते नुश शिखारे खलाफ भोनीए।”

ॐॐॐॐॐॐ ॐॐॐॐॐॐ
(ॐॐॐॐॐॐ 16:2-3)

54 फिरी यीशुए बड़े मैनन् मां ज़ोवं, “कि ज़ैखन तुस बिदलार डुबते पासेरां चलती लातथ त तुस ज़ोतथ कि झड़ी एजने बालीए ते तैन्ने भोते। 55 ते दक्षिणेरे पासेरां हवा चली त तुस ज़ोतथ गर्मी भोरीए ते तैन्ने भोते। 56 हे पाखंडी लोकव, तुस धरती ते अम्बरेरो हाल हेरतां मौसमेरो अंदाजो केरनो ज्ञानतथ, पन इन न ज़ैनी बटथ कि, परमेशर कुन चाते?”

ॐॐॐॐ ॐॐॐॐॐॐ ॐॐॐॐ ॐॐॐॐॐॐॐॐ
(ॐॐॐॐॐॐ 5:25-26)

57 “तुस एप्पू फैसलो केरा कि, तुशे लेइ कुन रोडूए। 58 ज़ैखन तू लीडरे सेइं साथी हाकिमे कां गाथ त बत्ते मां तैस सेइं फैसलो की न केरस, एरू न भोए तै तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास। 59 अवं तुसन सेइं ज़ोताई कि ज़ां तगर तू पाई-पाई न देले त तांतगर तैट्टां छुट्टी न सकेलो।”

13

ॐॐॐॐ ॐॐॐॐ ॐॐॐॐ ॐॐॐॐॐॐॐॐ ॐॐ ॐॐॐ ॐॐॐ

1 तैस मौके किछ लोक तैड़ी आए, तैना यीशु सेइं तैन गलील इलाकेरे लोकां केरे बारे मां ज़ोने लगे, ज़ैन केरो खून, रोमेरे गवर्नर पिलातुसे मन्दरे मां जानवरां केरे बलिदाने सेइं साथी मलेवरो थियो।

2 यीशुए तैन जुवाब दित्तो, “कुन तुस एन समझतथ कि तैन गलीलेरे लोकां केरो एत्रो बुरो हाल एल्हेरेलेइ भोवं, कि तैना बाकी गलीलेरे लोकन करां जादे पापी थिये? 3 अवं तुसन सेइं ज़ोताई कि, अगर तुस भी पापन करां मन न फिराले त सब एन्चरे नाश भोनेथ। 4 या कुन तैना अठारे ज़न्हे ज़ैन उन्डो शीलोहेरो गुम्मट बिछड़ो थियो, ते तैना सब तैस हैठ मेरि जे, ते तैना यरूशलेम नगरेरे होरि लोकन करां पापी थिये? 5 अवं तुसन सेइं सच्च ज़ोताई, कि नई बल्के अगर तुस भी पापन करां मन न फिराले त तुस सब एन्चरे नाश भोइ गानेथ।”

ॐॐॐॐ ॐॐॐॐॐॐॐॐ ॐॐॐॐॐॐ ॐॐॐॐॐॐ

6 तैसरां बाद यीशुए तैन अक मिसाल देइतां ज़ोवं, “केन्चे मैने अपनि बागी मां अक फ़ेगेरो बुट लोरो थियो, ते तैस बुट्टे पुड़ हर साल फल तोपने अव पन तैस फल न मैल्लो। 7 तैखन तैनी बागबने सेइं ज़ोवं, ‘हेर अवं टलाई सालां केरो देंतो इस फ़ेगेरे बुट्टे पुड़ फल लोरोई तोपने, पन अज तगर एस पुड़ फल न मैल्लो एस केट्टी छड़ एनी किजो रोड़ी ठार चिकतां रखोरीए?’ 8 पन तैनी तैस जुवाब देइतां ज़ोवं, मीं निदतां एसेरे च़ेवरे पासन खाद छड़नियें। 9 अगर फिरी भी फल न लगो त फिरी केट्टी देनोए*।”

ॐॐॐॐॐॐॐॐ ॐॐॐॐॐॐॐॐ ॐॐॐॐॐॐ ॐॐॐॐॐॐॐ ॐॐॐॐॐॐॐॐ

* 13:9 13:9 फ़ेगेरो बुट इस्राएली लोकन हिराते।

10 एक्की आरामेरे दिहाडे यीशु प्रार्थना घरे मां शिक्षा देने लोरो थियो। 11 हेरा, तैडी अक कुआन्श थी जैस अठारे सालां केरि देती भूतेरे सैइयेरे वजाई सेइं कुबड़ी भोरी थी। तै सिधी न थी भोइ बटती। 12 यीशुए तै कुबड़ी कुआन्श लाई त एप्पू कां कुजाई ते ज़ोवं, “हे कुआन्श, तू अपनि तकलीफी करां छुटी जेई।” 13 ते यीशुए तैस कुआन्शी पुड़ हथ रखे ते तै लूशी बेज्जोइं ते परमेशेरी तारीफ़ केरने लगी। 14 पन प्रार्थना घरेरो प्रधान यीशु पुड़ नराज भोव कि, एनी ए कुआन्श, आरामेरे दिहाडे किजो बज्जाई ते ज़ोने लगे, “हफते मां शा दिहाडे कम काज केरनेरे लेइ आन, ते तैन्ने मां कोई बज्जावरो भी लोइचे, ते आरामेरी दिहैडी न।” 15 प्रभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाडी अपने दांत या गधे खोलतां तैन पानी पियाने न नेथ? 16 त कुन एन रोडू न भोवं कि जै कुआन्श बेज्जोइ तै अब्राहमेरे खानदाने मरां ए, जै अठारे सालां केरि देती शैताने गुलैमी मां रखोरि थी त आरामेरे दिहाडे ए कुआन्श छुटानी न थी?” 17 जैखन यीशुए एना गल्लां ज़ोई त तैसेरे खलाफ ज़ोने बाले सेभी केरि बेइजती भोइ, ते सारे लोक यीशुए जैना महिमारां कम्मां अपने हथेइं कियोरां थियां खुशी मनाने लगे।

ॐॐॐॐॐॐॐ ॐॐॐॐॐ ॐॐॐॐॐ
(ॐॐॐॐॐ 13:31-32; ॐॐॐॐॐ 4:30-32)

18 तैखन यीशु तैन सेइं ज़ोने लगे, “परमेशेरे राज कौस चीजरी जेरूए अवं केस सेइं ज़ोई? 19 तन शेरीएरे बीजेरू जेरू आए, जैन एक्की मैने एन्तां अपनि बागी मां बेवं, पन जैखन तैन बीज बेव गाते, तै उगतां सारे निक्के-निक्के बुट्टन केरां बडो भोते। ते अम्बरेरां चुडोल्लू भी तैस पुड़ बिशने लगां।”

ॐॐॐॐॐॐॐ ॐॐॐॐॐ
(ॐॐॐॐॐ 13:33)

20 यीशुए फिरि ज़ोवं, “अवं परमेशेरे राजेरी मसाल केस सेइं देई? 21 तैन खमीरेरू जेरूए, जैन केन्ची कुआन्शां आनू, ते हछे अट्टे मां मलाव ते सारू अट्टू खमीर बेनि ज़ोवं।”

ॐॐॐॐॐॐॐ ॐॐॐॐॐ
(ॐॐॐॐॐ 7:13-14,21-23)

22 यीशु अपने चलन सेइं साथी यरूशलेम नगरे मांमेइं गांते बार नगरन मां ते ड्लोव्वन मां शिक्षा देतो ज़लोरो थियो। 23 केन्चे यीशु पुच्छू, “हे प्रभु कुन थोडे जेरे लोक हमेशारी सजाई करां बचले?” यीशु तैन सेइं ज़ोवं। 24 “परमेशेरे राजे मां सुन्कडे दारेरां बत्तां गानेरी कोशिश केरा, किजोकि अवं तुसन सेइं ज़ोताई कि बडे लोक अन्तर गानेरी कोशिश केरेले पन न गेइ सकेले। 25 जैखन घरेरो मालिक एक्की बार दार बंद केरि छडते, त तुस बेइर खड खडे दार गुडकाते, ते बिनती केरते राथ कि, ‘हे प्रभु इश्शे लेइ दार खोल्ल, ते तै तुसन जुवाब देते कि अवं तुसन न जैनी तुस कौन आथ ते कोट्टां ओरेथ? 26 तैखन तुस ज़ोले कि, ‘असेई तीं सेइं साथी खोरी पियोरी नई, ते तीं इश्शे अंगने मां असन शिक्षा नई दित्तोरी।’ 27 पन तै तुसन सेइं ज़ोलो, ‘अवं तुसन न जैनी तुस कौन आथ, ते कोट्टां ओरेथ हे बेइमानव मीं करां दूर भोथ।’ 28 जैखन तुस अब्राहम, इसहाक ते याकूब ते सब नेबन परमेशेरे राजे मां सामने लाएले ते अपनो आप बेइरोवं कढते लाएले, त लेरां देते ते दंत ज़ापते राले। 29 लोक पूर्बेरां ते पछमेरां ते उत्तर ते दक्षिणेरे देते यानी दुनियारे सारे लोकन मरां लोक परमेशेरे राजेरी धामी मां एइते लाएले। 30 ते हेरा किछ एरेन कि जैना पेइले आन, तैना पत्रोवं भोनेन ते जैना पत्रोवं आन, तैना पेइले भोनेन।”

ॐॐॐॐॐॐॐॐॐ ॐॐॐॐॐॐॐॐॐ

31 तैखने किछ फरीसी लोक यीशु कां आए ते ज़ोने लगे, “इट्टां निस ते ज़लो गा, किजोकि हेरोदेस तीं मारने चाते।” 32 पन यीशुए तैन ज़ोवं, तैस मैन्हु सेइं जै लोई अरो जेरो आए, गेइतां तैस सेइं ज़ोथ कि, “अवं अज ते कालां भूतां केरो सैयो कढने ते बिमारन बज्जानेरेरू कम केरने लोरोई ते एन कम टलेइ दिहाइन मां मीं पूरू केरनूए। 33 बस्सा मीं अज ते कालां ते टलेईदी मीं सफर केरनूए, किजोकि नबी सिर्फ यरूशलेम नगरे मां मारे गाले।

ॐॐॐॐॐॐॐ ॐॐॐॐॐॐॐ ॐॐॐ ॐॐॐ
(ॐॐॐॐॐ 23:37-39)

34 “हे यरूशलेमे नगरेरे लोकव, हे यरूशलेमे नगरेरे लोकव, तुसेई केतरे नबी कल्ल किये, जैना बडे पेइले तुसन कां आए, ते जैना तुसन कां भेजे तैन घोडेई बेई, मीं केही फेरेई सोचू कि तेरे बच्चन अकोट्टे केरि जेन्चरे कुकड़ी अपने बच्चन अपने फंगन हैठ रखचे, पन तुस राजी न भोए। 35 हेरा तुशू घर तुशे लेइ छडूइ गाते, ते अवं तुसन

सेइं ज़ोताई कि तुस मीं केन्ची तरीके भी न लेईं सकेले, ज़ांतगर तुसन एन ज़ोनेरो मौको न एज्जेलो, धने तै ज़ै प्रभुएरे नंवे सेइं एइते ।”

14

???????? ???? ???? ?????

1 यीशु फिरी आरामेरे दिहाड़े एक्की फरीसेरे घरे रोट्टी खाने जेव त बड़े फरीसी लोक ध्याने सेइं लोरे थिये तकने, ताके तैसेरी कोई गलती टलान । 2 तैड़ी अक बिमार मैन्हु थियो ज़ेसेरी ज़ंघां पैखड़ी शोजती थी ते पस-पाक च़लती थी, तै तैड़ी बिशोरो थियो । 3 यीशुए शास्त्री ते फरीसी लोकन पुच्छू, “कि आरामेरे दिहाड़े कानूनेरे मुताबिक कोई बज्झानो जेइंजे की नईं?” 4 तैना चुप राए, तैखन यीशुए तैस बिमारे पुड़ अपनो हथ रख्खो ते तै बज्झाव, ते घरजो भेजो । 5 ते फरीसन सेइं ज़ोवं, “तुसन मरां एरो कौने, ज़ेसेरू मट्टू या दांत खड्डे मां खिरके ते आरामेरी दिहाड़ी भोए, ते तैस तैट्टां बेइर न कढे?” 6 ते तैन लोकेईं यीशुएरी गल्लां केरो जुवाब न देइ बटो ।

???????? ? ???? ???? ???? ?

7 ज़ैखन यीशुए हेरू कि, ज़ैना लोक धाम ज़ोइतां रोट्टी खाने कुजोरेन केन्चरे खास लोकां केरि ठार चुनतन, तैनी तैन अक मिसाल दिती । 8 “ज़ैखन तुसन कोई इलाएरी धामी मां कुजाए । ज़ै तैनेईं खास मैन्हु केरे लेइ ठार रख्खोरी भोए, तुस तैड़ी न बिश्शथ, भोइ सकते कि होरो कोई तुसन करां जादे खास मैन्हु कुजेवरो भोए । 9 ते तुसन दुइये ज़न्न कुजाने बालो तुसन कां एइतां ज़ोए, ए ठार होरि केरे लेइए ते तुसन शरमेइतां खडे उठनू पे, ते सेब्भन करां पत्र बिशनू पे । 10 ज़ैखन भी कोई तुसन धाम ज़ोइतां कुजाए त सेब्भन करां पत्र बिश्शा, ताके ज़ैखन तेरो कुजाने बालो एज्जे ते ज़ोए, ‘दोस्त, अगर एइतां खास ठैरी बिश,’ त तैन लोकां केरे सामने तेरी केत्री बड़याई भोनीए । 11 किजोकि ज़ै कोई अपनो आप बड़ो बनालो त तै निकड़ो बनाव गालो ते ज़ै कोई अपनो आप निकड़ो बनालो त तै बड़ो बनाव गालो ।”

12 फिरी यीशुए, तैस फरीसी मैन्हु सेइं ज़ैनी तै कुजोरो थियो ज़ोवं, “ज़ैखन तुस दिसेरी या रातरी धामी मां मैनन् कुजाथ, त अपने दोस्तन या ढलान रिशतेदारन या अपने अमीर पड़ोसन न कुजेइयथ । किजोकि तैना भी तीं कुजेइतां तेरू एवसान मुकेइ छुडेले । 13 बल्के ज़ैखन तुस धाम देथ त टोंटे, कानो, गरीब गुरबे, परदेशी कुजेइयथ । 14 ते परमेशर तुसन बरकत देलो, किजोकि तैन कां किछ भी नईं ज़ैस सेइं तैना तुशू एवसान मुकेइ बटन, ते तेरे एस एवसानेरो फल धेमीं लोकन ज़ीते भोने सेइं साथी फैसलेरी दिहैड़ी मैलेलो ।”

???????? ???? ???? ????
(???????? 22:1-10)

15 ट्लाहनन् मरां एक्के एन गल्लां शुन्तां यीशु सेइं ज़ोवं, “परमेशेरे राज्जेरी धामी मां खाने बालो धन भोलो ।” 16 यीशुए तैस जुवाब दितो, “केन्चे मैने अक बड़ी धाम दिती ते बड़े लोक कुजाए । 17 ज़ैखन रोट्टी खानेरो वक्त अव त तैनी अपनो नौकर भेजो कि तैन लोकन ज़ैन जो इलाएरी धाम बनोरी थी, ‘एज्जा, रोट्टी बनोरोए ।’ 18 पन धामी बालेईं सेब्भेईं मिलतां एतराज कियो ते पेइले मैने ज़ोवं, ‘मीं ऊडार घिन्नेरू आए, मीं तैस हेरने गानूए ते अवं तीं कां मिनत केरतां कि मीं राने दे ।’ 19 त होरो ज़ोने लगो, ‘मीं पंन्न हल्लां दांत घिन्नोरेन ते अवं तैन लाने परखने च़लोरोईं । अवं तीं कां मिनत केरतां कि मीं राने दे ।’ 20 अक होरो मैन्हु लगो ज़ोने, ‘मीं इला बनावरोए, एल्हेरेलेइ अवं न एज्जी बेटि ।’ 21 तैखन नौकरे वापस एइतां एन सैरी गल्लां अपने मालिके शुनेईं, त मालिके बड़ी सरक अई, तैनी अपने नौकरे जो ज़ोवं, ‘इस नगर मां गा ते लेंगे लुथे, गरीब गुरबे नग्गे, नियन्ने भत्ते, टोंटे, कानो इरां कुजा ।’ 22 नौकरे ज़ोवं, ‘हे मालिक ज़ैन तीं ज़ोवं, मीं तैन्ने कमाव, पन फिरी भी ठार खाली आए ।’ 23 मालिके नौकरे सेइं ज़ोवं, ‘बत्तारे आसे पासे ऊडारन मांमेइं गा ते लोक मजबूर केरतां आन, ताके मेरू घर भेरतां भोए । 24 किजोकि अवं तीं सेइं ज़ोताई कि ज़ैन लोक पेइले कुजेवरे थिये, यानी खास ठैरारे लेइ कुजेवरे थिये, तैन मरां कोई भी मेरी धामी मां रोट्टी न खेइ सकेलो ।”

???? ???? ???? ????
(???????? 10:37-38)

25 बड़े लोक यीशु पत्ती च़लोरे थिये, यीशुए पत्रोवं तकू ते ज़ोवं । 26 “अगर कोई मीं कां एज्जे, ते अपने अम्मा बाजी, कुआन्श, बच्चन, ढलान ते बेइन्न ते अपने जानी करां जादे प्यार मीं सेइं न केरे त तै मेरो चेलो न भोइ सके ।

27 ते जै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै मेरो चेलो न भोइसखे । 28 तुसन मरां एरो कोई भोए, जै गुम्मत बनानू चाए, ते पेइले बिशतां हिसाब न केरे, कि पूरो केरनेरे लेइ मीं कां खर्चो आए कि नई । 29 कधे एरू न भोए कि खाइ कटनेरे बाद तैस बनेइ न सके ते तकने बाले हसते रान । 30 'ते ज़ोन एनी मैने बनानू त शुरू कियूं, पन बनेइ न बटो ।' 31 या फर्ज केरा कि कोई राजो होरि राजे सेइं लड़ाई केरनेरे लेइ सोची राहोरो भोए त कुन पेइले एन न सोचे कि 10000 फौजी जवानन् सेइं अवं 20000 फौजी जवावन सेइं तैसेरो मुकाबलो केरि सकतां कि नई? 32 अगर तै मुकाबलो न केरि सखे त तैस फौजी सेइं जै दूरे, मैन्हु भेजतां तैस सेइं सल्लारी मिनत केरेलो । 33 एन्चरे अगर जै कोई तुसन मरां अपनू सब किछ न छुडे त मेरो चेलो न भोइसखे ।

??????????

(?????? 5:13; ?????? 9:50)

34 "लून रोड़ी चीजे, पन अगर लूनेरो लूनार मुकी गाए त तैन कोस सेइं लूने बनाव गालू? 35 लोक तैस बेइरोवं शेरी देले, जै कोई समझनू चाते, तै ध्याने सेइं शुने ते समझे ।"

15

??????????

(?????? 18:12-14)

1 बड़े लोक धड़त घिन्ने बाले ते पापी लोक* यीशु कां एइतां तैसेरी गल्लां शुन्ने लोरे थिये । 2 फरीसी ते शास्त्री लोक शिकयत केरतां ज़ोने लगे, "कि ए मैन्हु पापी लोकन सेइं तालमेल रखते, ते तैन सेइं साथी खाते पीते ।"

3 यीशुए तैन अक मिसाल देइतां ज़ोवं । 4 "तुसन मां एरो कोई आए ज़ैस कां 100 भैडडां भोन ते तैन मरां अक हेरोए ते 99 भैडडां तैड़ी ज़ेरे जंगले मां छेइतां तोपने न गाए, ज़ां तगर तैस मैल्लोरी नई? 5 ते ज़ैखन ते तैस मैल्ले त खुशी सेइं कंधे पुड़ छुइतां आने । 6 ते अपने घरे एइतां अपने दोस्तन ते भियालन कुजेइतां ज़ोए कि, 'अज़ मीं सेइं साथी खुशी मनाथ, किजोकि अज़ मेरी हेरोरि भेड मैलोरीए ।' 7 अवं तुसन सेइं ज़ोताई कि, एन्चरे 99 धर्मी ज़ैनेई पेइले अपने पापन करां मनफिरावरो तैन करां जादे ज़ैखन अक पापी, पापन करां मन फिराते स्वर्गे मां बड़ी खुशी बनाई गाचे ।

??????????

8 "कुन एरी भी कोई कुआन्श भोली ज़ैस कां चेंदरे दश सिके भोन ते अक हेरोए ते तै दीयो बैलतां घरे अन्तर धूनी न दे, ते ज़ां तगर मैल्ले न तांतगर तोप्ती न राए? 9 ते तोपनेरे बाद अपने पड़ोसन ते अपनि सेहेलन कुजेइतां एन न ज़ोए कि, 'एज्जा मीं सेइं साथी खुशी मनाथ किजोकि अज़ मेरो हेरोरो सिको मैलोरोए ।' 10 बस्सा, अवं तुसन सेइं ज़ोताई कि एक्की पैपेरे, पापन करां मन फिराने सेइं परमेशेरे स्वर्गदूतां केरे सामने बड़ी खुशी मनाई गाचे ।"

??????????

11 यीशु फिरि होरि मिसाल दित्ती, "केन्ची मैनेरां दूई मट्टां थियां । 12 तैन मरां निकड़े मट्टे अपने बव्वे सेइं ज़ोवं, 'हे बाजी जेइदाती मां ज़ै मेरो हिस्सो बनते तै मीं दे ।' तैनी दुइने हिस्सो बेंटतां दित्तो । 13 थोड़े दिहैइना पत्ती निकड़े मट्टे अपनू सब किछ जेइदात होरि मुलखे जो नी, ते बुरे कम्मन मां लुट्टाई । 14 ज़ैखन तैनी सब किछ मुकेइ छुइइ त तैस मुलखे मां बड़ो काल पेव, ते तैस कां खाने जो किछ न राऊं । 15 तैखन तै तैस मुलखेरे एक्की रानेबाले कां कम तोपने पुजो । तैनी तै अपने ऊडारन मां सूर चारनेरे कम्मे लाव । 16 तैड़ी तै बड़ो दलुखोरो थियो, तै तैन खाने मां राजी थियो ज़ैन सूर खाते थिये, किजोकि तैस केन्चे किछ खाने जो न दित्तू । 17 तैखन तैस समझ आई ते ज़ोने लगे, 'मेरे बाजी केरे मज़दूर रेजतां रोट्टी खातन, पन अवं इड़ी फाके लोरोई मरने । 18 मीं खड़े उठतां अपने बाजी कां गानूए ते तैस सेइं ज़ोनूए हे बाजी अवं परमेशेरी नज़री मां ते तुशुशी नज़री मां पापी आई । 19 हुनी अवं एस काबल त नई, कि तुशु मट्टू भोइ, पन मीं भी अपने मज़दूर मां रखा ।' "

20 "बस्सा, तैनी तै मुलख शारो ते वापस अपने बाजी कां चलो, ते हेजू तै बड़े दूरे थियो, ते तैसेरे बाजे तै लाव ते तैसेरे बाजी तैस पुड़ बड़ो तरस अव, ते तै दौवइतो अपने मट्टे कां जेव, ते तैन गले लाव ते बड़ो खुशी भोव । 21 मट्टे अपने बाजी सेइं ज़ोवं, 'ए बाजी अवं परमेशेरी नज़री मां ते तुशुशी नज़री मां पापी आई । हुनी अवं एस काबल त नई कि, अपने आपे जो तुशु मट्टू ज़ोई ।' 22 पन बाजे अपने नौकरन सेइं ज़ोवं, 'लूश केरा ते सेभन

* 15:1 15:1 पापी लोक लोक तैन केरे बारे मां पापी समझते थिये ।

थियो। 11 फरीसी मैन्हु खडो भोइतां प्रार्थना करने ते अपने बारे मां सोचने लगो, कि हे परमेश्वर अवं तेरू शुक्र करताई, अवं होरि मैन्हु केरो ज़ेरो नई ज़ैना डैकू, अधर्मी, बदमाशी करनेबाले, ते इस धड़त नेने बालेरो ज़ेरोई नई, 12 अवं हफते मां दूई बार बरत रखताई, ते अपनि कमैईयरो दशोवं हिस्सो तींजो देताई।

13 “पन तै धड़त नेनेबालो ज़ै दूर खडखडो थियो, तैनी एत्तू भी न केरि बटु, कि अम्बरेरे पासे तक्के बल्के छाती पिट्टतां ज़ोने लगो, हे परमेश्वर मीं पैपी पुड़ दया केरतां माफ़ केर!” 14 अवं तुसन सेइं सत्र ज़ोताई, ए धड़न नेनेबाले मैन्हु तैस फरीसी मैन्हु करां धर्मी निस्तां अपने घरजो जेव। किजोकि ज़ै कोई अपनो आप बड्डो बनालो तै निकडो बनाव गालो ते ज़ै अपनो आप निकडो बनालो तै बड्डो बनाव गालो।”

ॐॐॐॐ ॐॐॐॐ ॐॐॐॐ

(ॐॐॐॐ 19:13-15; ॐॐॐॐ 10:13-16)

15 फीरी किछ लोक निक्के बच्चन यीशु कां आन्ने लगे ताके यीशु तैन पुड़ हथ रेखतां बरकत दे। चलेई तैन लाव त तैन धमकाए ते ठाकू। 16 पन यीशुए बच्चे एप्पू कां कुजाए ते चेलन सेइं ज़ोवं, “बच्चन मीं कां एजने देथ एन न ठाका, किजोकि परमेश्वरेरू राज़ एरां ज़ेरां केरूए। 17 अवं तुसन सेइं सत्र ज़ोताई, ज़ै कोई परमेश्वरेरे राज़ मां गानेरे लेइ अपनो आप निक्के बच्चन बराबर न बनाए, तांतगर परमेश्वरेरे राज़े मां दाखल न भोइसखे।”

ॐॐॐॐॐॐॐ ॐॐॐॐॐॐ ॐॐ ॐॐॐॐॐॐॐॐ ॐॐॐॐॐॐॐॐ

(ॐॐॐॐ 19:16-30; ॐॐॐॐ 10:17-31)

18 केन्ची यहूदी मैने यीशुए पुच्छू, “हे रोडे गुरू हमेशारी ज़िन्दगी हासिल केरनेरे लेइ अवं कुन केरि?” 19 यीशु जुवाब दित्तो, “तू मींजो रोडू किजो ज़ोतस? परमेश्वरेरे अलावा होरो कोई भी रोडो नई। 20 तू त परमेश्वरेरे हुकमन ज़ानतस, यानी खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बव्वां केरि इज्जत केरा।” 21 तैनी मैने ज़ोवं, “एना सब हुकम अवं बचपनेरो मन्तो ओरोई।” 22 ज़ैखन यीशुए एन शुन्तां ज़ोवं, “तीं मां एक्की गल्लारी कमी आए, तू ज़ैन किछ तीं कां आए, तैन बेचतां गरीब मैनन दे, तैखन तीं स्वर्गे मां खज़ानो मैलेलो। ते एइतां मीं पत्ती चल।” 23 ए गल शुन्तां तै बड्डो उदास भोइ जेव किजोकि तै बड्डो अमीर थियो। 24 यीशुए तैस हेरतां ज़ोवं, “अमीरां केरू परमेश्वरेरे राज़े मां दाखल भोनू केतू आसुखतुए। 25 परमेश्वरेरे राज़े मां अमीर मैनेरू दाखल भोने केरां ऊंटेरू सांधनेरे पाए मरां निस्नू सुखू आए!” 26 ज़ैनेई ए गल शुनी त तैना पुच्छूने लगे, “फीरी कसेरी मुक्ति भोइ सखे।” 27 यीशुए जुवाब दित्तो, “मैनन् करां त एन न भोइ सके पन परमेश्वरे करां सब किछ भोइ बटते।” 28 पतरसे यीशु सेइं ज़ोवं, “हेर असां त सब किछ छेडतां तीं पत्ती चल्लोरेम।” 29 यीशु तैन सेइं ज़ोवं, “अवं तुसन सत्र ज़ोताई, कि एरो कोई नई ज़ैनी परमेश्वरेरे राज़ेरे लेइ अपनू घर या कुआन्श ते हाज या बव, दला या बच्चे शारोरे भोन। 30 तैस इस दुनियाई मां बड्ड जादे, ते एजने बैली दुनियाई मां हमेशारी ज़िन्दगी मैलनीए।”

ॐॐॐॐ ॐॐॐॐ ॐॐॐॐॐॐ ॐॐॐॐ ॐॐॐ ॐॐॐॐॐॐॐॐॐ ॐॐॐॐ ॐॐॐॐ

(ॐॐॐॐ 20:17-19; ॐॐॐॐ 10:32-34)

31 यीशुए अपने 12 चले एप्पू सेइं साथी निये ते तैन ज़ोने लगो, हेरा, “अस यरूशलेम नगरे जो चल्लोरेम ते नेवेई ज़ैन किछ मैनेरे मट्टेरे बारे मां लिखोरूए तैन पूरू भोलू। 32 तै गैर कौमां केरे हथ्ये देनोए, ते तैना तैसेरो मज़ाक बनाले ते तैस बे इज्जत केरेले ते तैसेरे तुतरे पुड़ थुकनूए। 33 तैस कोडे मारेले ते तैस मैरी छडेले पन तै टलेइयोवं दिहाडे फीरी ज़ींतो भोलो।” 34 तैनेई ए गल न सेमझी बटी ते यीशुएरी एस गल्लरो मतलब तैन करां छप्पोरो राव।

ॐॐॐॐ ॐॐॐॐॐॐॐॐ ॐॐॐॐॐ

(ॐॐॐॐ 20:29-34; ॐॐॐॐ 10:46-52)

35 ते एरू भोवं कि ज़ैखन तैना यरीहो नगरेरे नेडे पुज्जे त अक कानो मैन्हु बत्तारे इलेखी बिशोरो भीख मगतो थियो। 36 ज़ैखन तैनी हछे मैन्हु केरि छैड शुनी त तै पुच्छूने लगो, “ए कोलहेरी शौर लोरी भोने?” 37 लोकेई तैस ज़ोवं, “यीशु नासरी कोस्कोई चल्लोरे।” 38 तै चिन्डां मैरतां ज़ोने लगो, “हे यीशु नासरी दाऊदेरा मट्टां मीं पुड़ दया केर।” 39 यीशुए सेइं साथी चलने बाले लोक तैस काने मैन्हु झिङकने ते ज़ोने लगगे, चुप रा, पन तै मना जादे ज़ोरे-ज़ोरे चिन्डां मैरतां ज़ोने लगो, “हे यीशु नासरी दाऊदेरे मट्टा मीं पुड़ दया केर।” 40 यीशु खेडोव ते हुकम दित्तो, एस मीं कां आनां ज़ैखन तै तैस कां अव त यीशुए तैस पुच्छू। 41 ज़ो, “अवं तेरे लेइ कुन केरि?” तैनी काने

मैने ज़ोवं, “हे प्रभु अवं चाताई कि अपनि एछ्छेई सेइं लेईं बेटि।” 42 यीशुए तैस सेइं ज़ोवं, “बेज्जोईं गा तेरे विश्वासे तू बज्जावरिस।” 43 तै तैखने बेज्जोव ते लहने लगो ते परमेशेरी तारीफ़ केरतो यीशु पत्ती चलो जेव। एन हेरतां सब लोक परमेशेरी तारीफ़ केरने लगे।

19

११११ ११११११११ ११११११

1 यीशु यरीहो नगरे मांमेइं निस्तां चलोरे थियो। 2 तैड़ी अक मैन्हु थियो, जेसेरू नवं जक्कई थियूं, तै धडत घिन्ने बालां केरो अफसर थियो, तै बड़ो अमीर थियो। 3 तैस यीशु हेरनेरो चाऊ थियो, पन तैसेरू कद छोटे थियूं, तांए तै हछे मैनन् मरां लेईं न थियो बटतो। 4 एल्हेरेलेइ तै देवइतां अगर जेव ते फ़ेगेरे बुट्टे उबरो गुस्सो किजोकि जैखन यीशु एज्जे त तै तैस रोडेचारे लेईं सके। 5 जैखन यीशु तैस ठैरी पुजो त तैनी उबरू तेकतां ज़ोवं, “जक्कई लूशी उन्ढो ओस, किजोकि अज मीं तेरे घरे ट्लाहन चारेई एजनूए।” 6 जक्कई तैखने उन्ढो ओस्सो ते यीशु बेडि खुशी सेइं अपने घरे नीयो।

7 एन हेरतां सब लोक शकैइत केरतां ज़ोने लाए, “कि यीशु त एक्की पैपी मैनेरो मेहमान बनोरोए।”

8 जक्कई रोटी खांते बारे खड़ो भोइतां प्रभु सेइं ज़ोने लगो, “हे प्रभु यीशु तक अवं अपनि अध्धी जेइदात कंगालन देताई, अगर केन्चेरू किछ खोरू भोलू त तैस च़ेवरे हिस्से वापस देइलो।” 9 तैखन यीशुए तैस सेइं ज़ोवं, “अज इस घरे मां मुक्ति ओरिए, एल्हेरेलेइ इन भी पूर्वज अब्राहमेरू अक मट्टूए। 10 किजोकि मैनेरू मट्टू यानी अवं होरि लोकन हमेशारी सज़ाई करां मुक्ति देने एवरोई।”

११ ११११११ ११११ ११११११
(१११११ 25:14-30)

11 जैखन लोक यीशुएरी गल्लां शुन्ने लगगोरो थिये त तैनी तैन अक मिसाल देइतां ज़ोवं, किजोकि तैना यरूशलैम नगरेरे नेडे पुजोरे थिये ते लोकां केरो खियाल थियो परमेशेरेरू राज लूशी एजनू आए। 12 तैनी तैन ज़ोवं, “अक बड़ो अमीर मैन्हु होरि मुलखे मां चलो, ताके तैस मुलखेरो मेंतरेरो ओदो घिन्तां वापस एज्जे। 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, ‘मेरे वापस एजने तगर इस पेंडसे सेइं कारोबार केरथ।’ 14 पन तैस ठैरी लोक तैस सेइं नफरत केरते थिये, तैनेई किछ लोक भेजतां तैस जो बिस्तार भेजो, कि अस न चाम ए मैन्हु असन पुड़ राज केरे।”

15 “जैखन तै हुकुमतरो ओदो हासिल केरतां वापस अवं त तैनी अपने सेवादारे जो समाद भेजो। जैना तैनी कारोबारेरे लेइ पेंडसे दित्तोरे थिये ताके सेन्भी केरो पतो केरे कि केनि केतरू कियेरू आए। 16 पेइले मैने एइतां ज़ोवं, ‘हे मालिक मीं तेरी दश अशरेफेइं सेइं दश होरि कमैई।’ 17 तैनी तैस सेइं ज़ोवं, ‘तीं दश अशरेफेइं सेइं इमानदेरी सेइं कम कियूं गा तीं दश नगरन पुड़ अधिकार दित्तो गाते।’ 18 दुइयोवं मैने एइतां ज़ोवं, ‘हे मालिक मीं तेरी पंच अशरेफेइं सेइं पंच होरि कमैई।’ 19 तैनी तैस सेइं भी ज़ोवं, ‘तीं भी पंच नगरन पुड़ अधिकार दित्तो गाते।’ 20 तैखन एक्की मैने एइतां ज़ोवं, ‘हे मालिक इना रेइ तेरी अशरेफी मीं एन रूमाले मां बंधतां रखोरि थी।’ 21 किजोकि तू सखत मैनुस ते अवं तीं करां डरतो थियो। किजोकि तू तै चीज़ जै तीं न भोए रखोरि तू तैस भी नेतस ते ज़ैन न भोए बेवरू तू तैन भी लुनतस। 22 तैनी तैस सेइं ज़ोवं, ‘हे दुष्ट नौकरा अवं तेरी गल्लेईं सेइं तींए मुर्जम बनताइं। ज़द तीं पतो थियो, कि अवं बड़ो सखत मैन्हु आई, ते जै चीज़ मीं नई रखोरि अवं तैस भी सल्हतां ते ज़ैन नई बेवरू अवं तैन भी लुनतां। 23 फिरी तीं मेरे रुपैइये केन्ची कां किजो नई रखोरे ताके अवं वापस एइतां तैस करां सूते समेत उसुल केरेथो?’ 24 तैखन तैनी तैन सेइं ज़ोवं, ‘जैन तैड़ी खड़खड़े थिये एस करां एन अशरेफी एन्तां उस देथ ज़ैस कां दश अशरेफीन।’ 25 तैना ज़ोने लगे हे मालिक एस कां पेइली दश अशरेफीन! 26 तैनी तैन जुवाब दित्तो, अवं तुसन सेइं ज़ोताई कि, ‘जैस कां परमेशेरी मर्जी समझनेरी खुवाइश आए, तैस परमेशर जादे समझ देलो। पन ज़ैस कां परमेशेरी मर्जी समझनेरी खुवाइश नई, तैस करां, थोड़ी ज़ेरि समझ जै तैस कां आए, तै भी नी गाली।’ 27 पन मेरे इन दुश्मन ज़ैन मीं न थिये सुखाते कि, ए असन पुड़ राज केरे एन इरां आनां ते मेरे सामने एन मैरी छड़डा।”

११११ ११११११११ ११११ ११११

(१११११ 21:1-11; १११११ 11:1-11; १११११११ 12:12-19)

28 एना गल्लां ज़ोइतां यीशु अपने चलन सेइं साथी अग्रोवं जेव कि यरूशलैम नगरे मां गाए।

29 जैखन तैना जैतूनेरे पहाड़े बैतफगे ते बैतनिय्याह मां पुजे त यीशुए दूई चले एन ज़ोइतां अग्रोवं भेजे । 30 “तुस सामने उस डलव्वे मां गाथ ते तैड़ी तुसन अक गधेरो बच्चो बन्धोरो मैलनोए । जैस पुड़ अज तगर कोई नई चढोरो तैस खोलतां इड़ी मीं कां आनां । 31 ते अगर तुसन कोई पुच्छे, कि तुस एस किजो लोरेथ खोलने त तुस जोइयथ, कि प्रभुए एसेरी जरूरत आए ।”

32 अग्रोवं गानेबाले चलेई तैन्ने कियूं जैन यीशुए ज़ोरू थियूं । 33 जैखन तैना गधेरो बच्चे खोलने लगगोरो थिये त तैसेरो मालिक तैन पुच्छने लगो, “तुस एस बच्चे किजो लोरेथ खोलने?” 34 तैनेई जुवाब दित्तो, “प्रभुए एसेरी जरूरते ।” 35 तैनेई तै बच्चो खोलतां यीशु कां आनो, ते यीशुए तैस पुड़ अपना लिगाडां छेडतां तैस पुड़ चढतां चलो जेव । 36 जैखन तैना चलोरे थिये त लोकेई अपना लिगाडां बत्ती मां बिछां । 37 जैखन तैना यरूशलेम नगरे नेडे पुजे त जैट्टां बत जैतून पहाड़े पुड़ेरां उन्दी गातीए तैड़ी सारे चलेई एना चमत्कार हेरतां ते खुशी भोइतां परमेशेरी तारीफ़ केरने लगे कि,

38 “धने तै राज़ो जै परमेशेरे नव्वे सेइ एइते!
ते स्वर्गे मां महिमा ते अम्बरे मां शान्ति भोए ।”

39 तैन मैनन् मां किछ फरीसी लोक भी थिये । तैना यीशु सेइ ज़ोने लगे, “हे गुरु अपने चलन ज़ो कि चुप केरन ।” 40 यीशुए तैन जुवाब दित्तो, “अवं तुसन ज़ोताई, अगर एना लोक चुप केरन त इना घोड़ ज़ोरे सेइ परमेशेरी तारीफ़ केरेले ।”

????????? ?????????? ????? ???? ???? ?

41 यरूशलेम नगरे मां पुजतां यीशु यरूशलेम नगरेरो हाल हेरतां तैस लेरां छुटी । 42 ते ज़ोने लगो, “अगर तुस सिर्फ़ इस दिहैडरे बारे मां ज़ानते भोथे, जै तुसन शैन्तरे पासे नेती! पन ई गल हुना तुशे एछ्छन करां छपोरीए । 43 तीं तैना दिहाड़े हेरने पेनेन जेइस तेरे दुश्मन तेरे च़ेवरे पासन मोरचो बंधतां ते तीं घेरो देले, ते हर पासेरां तीं पुड़ हमलो केरेले । 44 तुशे दुश्मन तुसन नाश केरेले, ते सैरी लोकन मारेले, ते तीं पुड़ घोड़े पुड़ घोड़ बाकी न रालो । किजोकि जेइस परमेशर तुसन बचानेरे लेइ ओरो थियो तुसेई न पिशानो ।”

????????????? ?????????? ????? ?

(???????? 21:12-17; ??????? 11:15-19; ????????? 2:13-22)

45 तैखन तै मन्दरे मां जेव ते तैड़ी तैने बुपारी ते गाक बेइरोवं कढने शुरू किये । 46 तैनी तैन सेइ ज़ोवं, “पवित्रशास्त्रे मां लिखोरूए भैरू मन्दर प्रार्थनारू घर भोलू; पन तुसेई त डैकू केरो अड्डो बनेइतां रख्वोरोए ।”

47 ते तै तैस पवित्र दहैड़ी मन्दरे मां शिक्षा देतो थियो, पन प्रधान याजक ते शास्त्री लोकेई यीशु मारनेरी कोशिश मां लगगोरो थिये । 48 पन तैन एन केरनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ च़ेवरे पासन बिशोरे रहते थिये ।

20

????????????? ?????????????? ?????? ??????

(???????? 21:23-27; ????????? 11:27-33)

1 एक्की दिहाड़े जैखन यीशु मन्दरे मां शिक्षा लोरो थियो देने, ते तैन खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग यीशु कां पुजे । 2 ते तैना ज़ोने लगे, “तू एन सैरी गल्लां कसेरे अधिकारे सेइ केरतस या तीं ए अधिकारे केनि दित्तोरोए?” 3 यीशु तैन जुवाब दित्तो, “अवं भी तुसन अक गल पुछ्तई, मीं ज़ोथ । 4 यूहन्नारो बपतिस्मो स्वर्गे तरफां थियो या मैन्हु केरे तरफां थियो?” 5 तैना एप्पू मांमेइं बंस केरने लगे, “कि अगर अस ज़ोम, ‘स्वर्गे तरफां थियो;’ त तै पुछ्छलो कि, ‘फिरी तुसेई याकीन की नई कियेरू?’ 6 पन अगर अस ज़ोम कि, ‘मैन्हु केरे तरफां थियो;’ त लोकेई असन घोड़ेई देनिन, किजोकि तैना यूहन्ना नबी मन्ते थिये ।” 7 एल्हेरेलेइ तैनेई जुवाब दित्तो, “कि अस न ज़ानम कि केसेरी तरफां थियो ।” 8 यीशु तैन सेइ ज़ोवं, “त अवं भी तुसन सेइ न ज़ोई कि एना कम्मां कसेरे अधिकारे सेइ केरताई ।”

????????? ?????????????????? ?????? ??????????

(???????? 21:33-46; ????????? 12:1-12)

9 फिरी यीशु तैन लोकन अक मिसाल देइतां ज़ोने लगो, “एक्की मैने दाछरी बाग लाई ते तै ठेकेदारन ठेके पुड़ देइतां एप्पू खरे च़िरे कोस्कोई दूर मुलखे च़लो जेव । 10 जेइस दाछ पकनेरो मौसम अव त तैनी अपनो हिस्सो

नेनेरे लेइ अक नौकर बागी मां भेजो। पन तैनेई तै खूब कुटो ते खाली वापस भेजो। 11 ते फिरी तैनी अक होरो नौकर भेजो, पन तैनेई तैसेरी भी बेइजती की, ते तै भी झुस कुट केरतां खाली वापस भेजो। 12 फिरी तैनी अक ट्लेइयोवं होरो नौकर भेजो, पन तैनेई तैसेरी भी बेइजती की ते जखमी केरतां कढो। 13 तैखन बागारे मालिके ज़ोवं, 'अवं अपनू ट्लारू मट्टू भेजताई शैइद तैना तैसेरो लिहाज केरेले।' 14 पन ज़ैखन ठेकेदारेइं तै लाव त एप्पू मामेइं मुशोरो केरने लगे, ए मालिके, एज्जा एस्से मारम ताके जेइदात इशशी भोइ गाए। 15 तैनेई तैन मट्टू बागी मरां बेइर शैरी छड़इ, ते मारू तुस सोचा कि फिरी बागारे मालिके तैन सेइं कुन केरेलो। 16 ते मालिक एइतां तैन मैरी छड़ेलो ते बाग होरि केरे हवाले केरेलो।" तैनेई एन शुन्तां ज़ोवं, "परमेशर न केरे एरू न भोए।" 17 तैनी तैन केरे पासे तेकतां ज़ोवं, "फिरी इन कुने ज़ैन पवित्रशास्त्रे मां लिखोरूए कि,

‘जै घोड़ मिस्तरेई रद्दी कियो,
तैए घोड़ कूनेरो घोड़ भोलो।’

18 जै मैन्हू इस घोड़े पुड़ बिछड़ेलो त तैसेरे टुकड़े-टुकड़े भोइ गाले, ते ज़ैस उन्ढो ए घोड़ बिछड़ेलो तैस ए पितां छड़ेलो।”

[\[22:15-22; 12:13-17\]](#)

19 शास्त्री लोकेईं ते प्रधान याजकेईं यीशु ट्लानेरी कोशिश की। किजोकि तैना बुझी जोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये। 20 तैना लोक यीशुए ट्लानेरो मौको तोपने लोरे थिये, तैनेई विशवैसी केरे रूपे मां जासूस भेजे ताके तैसेरी कोई गल ट्लेइ सखन ते फिरी राजेरे अधिकारे मां देइ देन। 21 तैनेई यीशु पुच्छू, “हे गुरू अस ज्ञानतम कि तू सच्चो आस ते सच्चेरी शिक्षा देतस, ते केन्चेरी तरफदारी न केरस बल्के सच्चे सेइं परमेशेरी बत्तरी शिक्षा देतस। 22 कुन असन महाराजे जो धड़त देनी जेइजे कि नेई?” 23 यीशुए तैन केरि ज़लाकी बुझतां तैन जो ज़ोवं। 24 “मीं अक दीनार हिराथ ते एस पुड़ केसेरी शकल ते केसेरू नंवे?” तैनेई ज़ोवं, “महाराजेरी।” 25 यीशु तैन सेइं ज़ोवं, “जैन महाराजेरू तैन महाराजे जो देथ, ते ज़ैन परमेशेरू ए, तैन परमेशे जो देथ।” 26 ते तैना लोकां केरे सामने तैसेरी कोई गल न ट्लेइ सखे बल्के तैसेरे जुवाबे सेइं तैना हैरान भोइतां चुप रेइजे।

[\[22:23-33; 12:18-27\]](#)

27 फिरी सद्की ज़ैन ज़ोते थिये कि मुवोरे जीते न भोन ते फिरी किछ यीशु कां एइतां पुच्छने लगे। 28 “हे गुरू असन जो मूसेरो हुक्मे कि अगर केन्चेरो द्ला अपनि कुआन्शारे भोते संते ओईटल मेरि गाए त तैसेरो द्ला तैस कुआन्शी सेइं इला बनाए, ताके तै अपने द्लाएरे लेइ औलाद पैदा केरे। 29 सत द्ला थिये पेइले इला बनाव ते ओईटले मेरि जेव। 30 फिरी होरे तैस सेइं इला बनाव। 31 फिरी तैल्ला पत्ती ट्लेइयोवं तै कुआन्श रख्वी फिरी एन्चरे सेइं सत्तेईं ज़नेई इला बनाव, पन सब बेऔलाद मेरि जे। 32 ते आखकार तै कुआन्श भी मेरि जेई। 33 ते जीते भोने पुड़ तै केसेरी कुआन्श भोली? किजोकि तै सत्ते द्लां केरि कुआन्श बनोरी थी।” 34 यीशुए तैन सेइं ज़ोवं, “इस दुनियारे लोकन मां त इला बनानेरो दस्तूरे। 35 पन ज़ैना लोक एजने बैली दुनियारे काबल भोले, ते ज़ैना मुड़दन मरां जीते भोले तैना इला न बनाले। 36 तैना मरेले भी नन्ना एल्हेरेलेइ की तैना स्वर्गदूतां केरे ज़ेरे भोले ते तैन जो जीते भोनेरां ते परमेशेरां मट्टां ज़ोले। 37 ते ज़ैडी तगर मुड़दां केरो जीते भोनेरी गल्ले, ज़ेन्चरे मूसा नेबेरे ज़लते झैल्लोवेरे बारे मां, तेन्चरे इशारो कियो किजोकि तै परमेशर अब्राहमेरो परमेशर, इसहाकेरो परमेशर ते याकूबेरो परमेशर ज़ोइतां फुकारतो थियो। 38 पन परमेशर मुड़दां केरो नई बल्के जीतां केरो परमेशेरे। किजोकि तैसेरे नेडे सब जीतेन।” 39 शास्त्री लोकन मरां किछेईं जुवाब दित्तो, “हे गुरू तीं त बडू रोडू ज़ोवं।” 40 फिरी तैन मरां केन्ची हिम्मत न अई, कि एस होरू किछ पुच्छन।

[\[22:41-46; 12:35-37\]](#)

41 फिरी यीशुए तैन सेइं ज़ोवं, “फिरी मसीह जो दाऊदेरू मट्टू केन्चरे सेइं ज़ोतन? 42 किजोकि दाऊद त एप्पू भजना केरे किताबी मां ज़ोते, परमेशेरे मेरे प्रभु सेइं ज़ोवं,

मेरे देइने पासे बिश ।

43 कि ज्ञां तगर अवं तेरे दुश्मन तेरे पावन हैठ न बिशैली ।

44 दाऊद त तैस जो प्रभु जोते, फिरी तैन तैसेरू मट्टू केन्चरे भोवं?”

[लूका 23:1-36](#); [लूका 12:38-40](#)

45 जैखन सब लोक शुनी राहोरे थिये त यीशुए अपने चलन सेइं ज़ोवं । 46 “शास्त्री लोकन करां हुशार रेइयथ तैना लम्मे-लम्मे कुरते लाने पसंद केरतन, ते होरू एन चातन कि लोक बजारन मां तैन जो नमस्कार ज़ोन, ते तैना प्रार्थना घरे मां उच्ची कुर्सी तोपतन ते धामन मां बड़े खास बन्नू चातन । 47 तैना विधवां कुआन्शां केरां घरां लुटतन ते लोकन हिरानेरे लेइ बड़ी लम्मी प्रार्थना केरतन । तैन हच्छी सज़ा मैलनीए ।”

21

[लूका 12:41-44](#)

1 यीशु अमीर लोकां केरे पासे तकने लगो, जैना-जैना दान-पेट्टी मां दान लोरे थिये छडने । 2 तैनी अक बड़ी गरीब विधवा कुआन्श लाई जैसां दूई पेंडसे यानी अक धेलो ज़ाढ़ो । 3 तैखन यीशुए ज़ोवं, “अवं तुसन सेइं सन्न ज़ोताई कि दान-पेट्टी मां दान देने बालन मरां सेबन करां जादे इस विधवा कुआन्शां दान दित्तू । 4 किजोकि तैनेई त अपनि दौलती मरां सिर्फ धगसेरे पेंडसे परमेशरे घरे मां दित्तोरेन पन इस कुआन्शां अपनि गरीब हालती सेइं जैन किछ एसारे पल्ले थियूं सब किछ देइ छडू ।”

[लूका 24:1-2](#); [लूका 13:1-2](#)

5 किछ लोक मन्दरे बारे मां ज़ोने लोरे थिये, कि बड़े माघे घोड़ेई सेइं ते दान कियोरी चीज़न सेइं बनोरूए, त यीशुए ज़ोवं । 6 “तैना दिहाड़े एजने बालेन कि इन चीज़ां जैना तुस इड़ी लहने लोरेथ इड़ी घोड़े पुड़ घोड़ नई रानो जै बछोड़ो न गालो ।”

[लूका 24:3-14](#); [लूका 13:3-13](#)

7 तैनेई यीशुए पुच्छू, “हे गुरू जी एन गल्लां केइस भोनिन? ते तैन केरो दुनियाई मां एजनेरो कुन निशान भोनोए ।” 8 यीशुए तैन ज़ोवं, “खबरदार टेपलोईयथ नन्ना, किजोकि काई लोक मेरे नव्वे सेइं एजनेन ते तैनेई ज़ोनूए कि अव्वे मसीह आई, ते मौको भी नेडे पुजोरोए तुस तैन पत्ती न गोइयथ । 9 ते जैखन तुस लड़ेइयरी त उलझनरी अफुवां शुनेले त डेरथ नन्ना, किजोकि एन गल्लां केरू पेइले भोनू ज़रूरीए, पन तेइसे खातमां नई भोनो ।”

10 तैखन यीशुए ज़ोवं, “किजोकि कौमी पुड़ कौम, ते राज़े पुड़ राज़ चढहाई केरेलू । 11 ठारी-ठारी बड़े-बड़े भुंजल एजनेन ते काल पेनोए ते बिमारी फैलनिं ते बुरी-बुरी गल्लां भोनिन ते अम्बरे मां आजीब निशान लेइहोनेन । 12 एन सब गल्लां भोने करां पेइले तुशे दुश्मन तुसन सिर्फ मेरे नव्वेरे वजाई सेइं ढप्पेले ते तुसन सताले ते प्रार्थना घरेरी आदालती मां हाज़र केरेले ते कैद केरेले ते गवर्नरन ते कने राज़न कां पैश केरेले । 13 तैखन तुसन मेरी गवाही देनेरो रोड़ो मौको मैलेलो । 14 पन तुसन कोई ज़रूरत नई, कि पेइले फिक्कर करने लगथ कि अस कुन ज़ोमेले । 15 किजोकि अवं तुसन एरी ज़बान ते अकल देइलो, कि कोई भी मुखालफ तुशे सामने खड़ो न भोइ सकेलो ते न लोक तुशे खलाफ किछ ज़ोई सकेलो । 16 ते तुशे हाज़ बव ते ढला ते रिशतेदार ते दोस्त तुसन सेइं बैर केरेले ते तुसन मरां किछन मारेले भी । 17 ते मेरे नव्वेरे वजाई सेइं सारे लोक तुसन सेइं नफरत केरेले । 18 पन तुशे दोग्गेरो कोई बाल बांको न भोलो । 19 सब किछ झेलतां तुस अपनि जान बचेइ साखेलो ।”

[लूका 24:15-21](#); [लूका 13:14-19](#)

20 “जेइस तुस यरूशलेम नगर च़ेवरे पासन फौवजेइं सेइं घेरेरू लाले, त बुझथ कि एस नाश भोनेरे दिहाड़े नेडे ओरेन । 21 तैस मौके जैन यहूदिया मां भोले तैना पहाड़े पुड़ जो नेशी गान ते जैना यरूशलेम नगरे मां भोले त तैन बेइरोवं निसन ते जैना इल्लोवन मां भोले त तैना नगर मांजो न गान । 22 किजोकि एना बदलेरे दिहाड़े भोले,

एन मां तैन सब किछु जैन पेइलू पवित्रशास्त्रे मां लिखोरूए तैन पूरू भोनूए ।²³ तैन दिहाइन मां जैना दोर्जींती त दुद्ध पियाती कुआन्श भोली, तैन केरे लेइ अफ़सोस! किजोकि धेरती पुड़ बड़ी मुसीबत एजनीए ते एस कौमी पुड़ बड़ी आफत एजनीए ।²⁴ तैना सब तलवारी सेइं मारे गाले ते गुलाम बेनतां सेब्भी कौमन मां पुजेले ते गैर कौमां केरो मौको पूरो भोने तगर यरूशलेम नगर गैर कौमेईं सेइं पस्त भोंतो रालू ।

[\[22:22-24\]](#) [\[22:22-24\]](#) [\[22:22\]](#) [\[22:22\]](#)
([\[22:22\]](#) 24:29-31; [\[22:22\]](#) 13:24-27)

²⁵ “दिहाड़े चेंदनरी ते तारन मां निशान बांदे भोनेन ते धेरती पुड़ कौमन बड़ी तकलीफ पुजनियें, किजोकि समुन्दरेरी लैहेरां केरि शौरी सेइं तैना डेरि गानेन ।²⁶ डेरें मारे एजने बैली मुसीबतरे इंतज़ार केरते-केरते तैन केरे होश उड़ी गानेन, किजोकि अम्बरेरी सैरी शेक्ति हिल्लेली ।²⁷ तैखन लोक मैनेरू मट्टू बेड़ि शेक्ति ते महिमा सेइं बिदलारी मां एंडतू लाएले ।²⁸ जैखन एन गल्लां भोनी शुरू भोली त सिधे खड़े भोइतां उबरू तेकथ, किजोकि तुशशो छुटकारो भोने बालोए ।”

[\[22:22-24\]](#) [\[22:22-24\]](#) [\[22:22\]](#)
([\[22:22\]](#) 24:32-35; [\[22:22\]](#) 13:28-31)

²⁹ फिरी यीशुए तैन अक मिसाल देइतां ज़ोवं, “तुस फ़ेगोरे बुट ते होरि बुट्टन भी हेरतथ ।³⁰ ज़ेरि तैस गुडी लेगनी शुरू भोइचन? त तुस हेरतां बुझतथ कि नेला ओरोए ।³¹ एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुझ्जी छुड्डा कि परमेशेरू राज़ नेड़े ओरूए ।³² अवं तुसन सेइं सज़ ज़ोताई, कि ज़ां तगर एन गल्लां पूरी न भोन, एस कौमरो खातमों न भोलो ।³³ धरती अम्बर टेली गालू पन मेरी गल्लां कधे न टेलेली ।

[\[22:22\]](#) [\[22:22\]](#)
([\[22:22\]](#) 24:36-44; [\[22:22\]](#) 13:32-37)

³⁴ “बस्सा खबरदार भोथ कोस्कोई एरू न भोए कि तुशशो दिल नशे मां मसत भोइतां इस ज़िन्दगरे फिकरे सेइं कमज़ोर भोए, ते तैस दिहाड़े तुशशे लेइ अक मुसीबत बने ।³⁵ किजोकि तै इस सैरी धेरती पुड़ ज़ेत्तरे लोकन तैन सेब्वन पुड़ एन्चरे एजनीए ।³⁶ बस्सा, हर वक्त तियार राथ ते प्रार्थना केरते राथ, ताके तुस एन गल्लन करां ज़ैना भोने बैलिन बेंचतां राथ, ते मैनेरे मट्टे कां खड़े भोनेरे काबल भोथ ।”

³⁷ यीशु रोज़ मन्दरे मां शिक्षा देतो थियो, ते राती ज़ैतून पहाड़े पुड़ रातो थियो ।³⁸ झेझां सारे लोक यीशुएरी गल्लां शुन्नेरे लेइ मन्दरे मां तैस कां एइते थिये ।

22

[\[22:22-24\]](#) [\[22:22\]](#) [\[22:22\]](#)
([\[22:22\]](#) 26:1-5; [\[22:22\]](#) 14:1-2; [\[22:22\]](#) 11:45-53)

¹ अखमीरी तिहारेरी दिहाड़ी ज़ैस जो फ़सह ज़ोतन नेड़े ओरी थी ।² प्रधान याजक ते शास्त्री मौको तोपने लोरे थिये कि यीशु केन्चरे मारम । किजोकि तैना लोकन करां डरते थिये ।

[\[22:22\]](#) [\[22:22\]](#) [\[22:22\]](#) [\[22:22\]](#)
([\[22:22\]](#) 26:14-16; [\[22:22\]](#) 14:10-11)

³ ते शैतान यहूदा मां बेस्सी जेव तैस जो इस्करियोती भी ज़ोते थिये, ते तै यीशुएरे 12 चेलन मां गनो गातो थियो ।⁴ दे तै प्रधान याजकन ते प्रार्थना घरेरे किछु खास पुच्छने गन्ने लोकन कां जेव ते तैन सेइं मुशोरो केरने लगो कि केन्चरे सेइं यीशु तैन केरे हवाले केरी बटते ।⁵ तैना बड़े खुशी भोए ते तैस पेंडसे देनेरो वादो कियो ।⁶ तैनी तैन केरि गल मन्नी ते मौको तोपने लगो, कि यीशु केन्चरे सेइं तैन केरे हावाले केरे ते केन्ची पतो न लगगे ।

[\[22:22\]](#) [\[22:22\]](#) [\[22:22\]](#) [\[22:22\]](#) [\[22:22\]](#) [\[22:22\]](#) [\[22:22\]](#)
([\[22:22\]](#) 26:17-25; [\[22:22\]](#) 14:12-21; [\[22:22\]](#) 13:21-30)

⁷ अखमीरी रोट्टरू तिहार नेड़े ओरू थियूं, ज़ैस फ़सह तिहारे मां गबड़ेरू बलिदान देनू ज़रूरी थियूं ।⁸ यीशुए पतरस ते यूहन्ना एन ज़ोइतां भेजे, “कि गाथ ते इशे लेइ फ़सह तिहारेरी रोट्टी तियार केरा ।”⁹ चेलेईं पुच्छू, “कि तू कोड़ि चातस कि अस तीजो फ़सह तिहारेरी रोट्टी तियार केरम?”¹⁰ यीशुए तैन जुवाब दित्तो, “नगर मां गाते तुसन अक मैन्हु मैलनोए ज़ै पैनेरो घड़ो घिन्तां च़लोरो भोनोए, तैस पत्ती गोइयथ ते ज़ैस घरे मां तै गालो तुस भी

गोइयथ । 11 तैसेरे मालिके सेइं जोइयथ कि गुरे जोरूए कि ट्लाहना केरि ठार कोडि आए, जैडी अवं अपने चलन सेइं साथी फ़सह तिहारेरी रोट्टी खेइ सेखी? 12 तै तुसन दोपरे नेइतां अक बड्डो कमरो हिरालो जै खूब रोडेचारे सजैवरो भोनेए तैडी इश्शे लेइ तियारी केरथ ।” 13 तैनेई तैडी गोइतां सब किछ्छ तेरहु लाव जेरू तैनी जोरू थियूं, ते तैडी फ़सह तिहारेरी रोट्टी तियार की ।

????? ???

(????? 26:26-30; ???? 14:22-26; 1 ???? 11:23-25)

14 जैखन रोट्टी खानेरो मौको अव त यीशु अपने परेरितन सेइं साथी बिश्शारे थिये । 15 ते यीशुए तैन सेइं जोवं, “मेरी ए बडी इच्छा थी, कि अपनो दुःख झल्लने (मरने) करां पेइले एककी बार फ़सह तिहारेरी रोट्टी तुसन सेइं साथी खेइ । 16 किजोकि अवं तुसन सेइं जोताई, कि अजेरां पत्ती तांतगर न किछ्छ खेइ सेखी, जां तगर परमेशरेरे राज्जेरू कम पूरू न भोए ।” 17 फिरी यीशुए दाछ्छरे रसेरो कटोरो ट्लातो ते परमेशेरू शुक्र केरतां चलन दित्तो ते जोवं, “यांथ ते एप्पू मामेइं बंटा । 18 किजोकि अवं तुसन सेइं जोताई कि अजेरां पत्ती दाछ्छारो ए रस फिरी तांतगर न पीलो जां तगर परमेशेरू राज्ज न एज्जे ।” 19 फिरी यीशुए रोट्टी ट्लाती ते परमेशेरू शुक्र केरतां टलोडी ते तैसेरे टुकडे बनेइतां अपने चलन एन जोइतां दित्ती, “कि ई मेरी जाने जै तुश्शे लेइ अवं देताई ते तुस भी मेरी यादगैरी मां एन्ने केरते रेइयथ ।” 20 एन्चरे रोट्टी खानेरे बाद तैनी कटोरो ट्लातो ते चलन कां दित्तो ते जोवं, “कि ई कटोरो मेरो तैस खूनेरो नंवो करारे जै तुश्शे लेइ दित्तोरोए । 21 पन हेरा मीं टलुवांने बालो मीं सेइं साथी खाने लोरोए । 22 किजोकि मैनेरू मट्टू त हुनी ज़लोरोस जेन्चरे कि तैसेरेलेइ पेइले एन पक्कू भोरूए पन तैस मैन्हु पुड़ अफ़सोस जेसेरे हथेइं तै गिरफ़्तार भोए ।” 23 एन शुन्तां तैना एप्पू मामेइं पुच्छ्छने लगे, “असन मां एरो जेरो कौने जै एन कम केरेलो?”

????? ???? ?? ?? ???? ???? ?

24 तैन एस गल्ली पुड़ एप्पू मामेइं बेंस भोइ कि असन मां बड्डो कौने? 25 यीशु तैन सेइं जोवं, “गैर कौमन पुड़ तैन केरे राजे राज्ज केरतन, ते जैन केरो तैन पुड़ अधिकारे भोते तैन जो भलाई केरनेबाले जोतन । 26 पन तुसन मां एरू लोडे भोवरू, तुसन मां जै बड्डोए तै निकड़ेरे बराबर बने ते जै खास आए तै सेवकेरे बराबर बने । 27 किजोकि बड्डो कौने? जै तैस कां साथी बिशोरोए या तै जै तैसेरो चेलोए? कुन तै तैस कां नई बिशोरो? पन अवं त तुसन मां अक सेवकेरे बराबर आई । 28 पन तुस तैना आथ जैना मेरी अज्जमैइशरे मौके बराबर मीं सेइं साथी रातथ । 29 जेन्चरे बाजी मीं अक राज्ज दित्तोरूए अवं भी तुसन अक राज्ज देताई । 30 ताके तुस मेरे राज्जे मां मीं सेइं साथी बिश्तां खाथ पीथ, बल्के बडे-बडे शाही तखतन पुड़ बिश्तां इस्राएलेरे 12 गोत्रां केरो इन्साफ़ केरेले ।”

????????? ???? ???? ???? ???? ?

(????? 26:11-35; ???? 14:27-31; ???? 13:36-38)

31 “शमौन, शमौन, खबरदार रा, शैताने परमेशरे करां अजाजत मग्गोरीए कि तुसन सेबन परखे, कि रोडे बुरे करां अलग केरे जेन्चरे ज़मीनदार गेहुंन करां झाझ अलग केरते । 32 पन मीं तेरे लेइ प्रार्थना की, कि तू मीं पुड़ विश्वास केरनो न शारस, जैखन तू मन फिरास त अपने विश्वासी दलान मज्जबूत केरां ।” 33 पतरसे यीशु सेइं जोवं, “हे परमेशर तीं सेइं अवं कैद भोने बल्के मरनेरे लेइ भी तियार आई ।” 34 पन यीशुए जोवं, “हे पतरस अवं तीं सेइं जोताई कि अज्ज कुकड़े बांग देने करां पेइले तू मेरो ट्लाई बार इन्कार केरेलो कि अवं एस न जैनी ।”

?????, ???? ?? ???? ?

35 यीशुए तैन सेइं जोवं, “कि जेइस मीं तुस खुशखबरी शुनाने, बगैर बेटवे, बूटां ते झोलेरे बगैर भेजोरे थिये त तुस केन्वी चीजारे घटी भोइ?” तैनेई जोवं, “केन्वी चीजरी नई ।” 36 यीशु तैन सेइं जोवं, “पन हुनी जैस कां बेटवो भोए ते साथी रखे ते एन्चरे झोलो भी ते जैस कां तलवार न भोए तै अपनू कोट बेजतां भी तलवार घिन्ने । 37 अवं तुसन सेइं जोताई कि ई गल्ले जै पवित्रशास्त्रे मां लिखोरीए, कि तै पूरी भोए । तै बुरे लोकन सेइं साथी गनो जेव! एल्हेरेलेइ मेरे बारे मां लिखोरी गल्लां पूरी भोने लोरिन ।” 38 तैनेई जोवं, “हे प्रभु हेर इडी दूई तलवारन ।” तैनी तैन सेइं जोवं “बेडि आन ।”

????????? ???? ???? ???? ???? ?

(????? 26:36-46; ???? 14:32-42)

39 फिरी तै बेइर निस्सो ते जेन्चरे तैसेरो दस्तूर थियो, तै जैतून पहाड़े पुड़ जो चलो जेव ते तैसेरे चले भी तैस सेइं साथी चले जे। 40 तैस ठैरी पुजतां तैनी तैन सेइं ज़ोवं, “प्रार्थना केरा ताके तुस अज़मैइशी मां न पेथ।” 41 यीशुए तैन करां थोड़े ज़ेरे अगगर गेइतां ज़ैधू केरे भारे बिशतां प्रार्थना करने लगो। 42 “हे बाजी अगर तेरी मर्जी भोए त ई दुखेरो कटोरो मीं करां दूर केर, पन फिरी भी मेरी मर्जी पूरी न भोए बल्के तेरी मर्जी पूरी भोए।” 43 तैखन तैनी अम्बेरां अक स्वर्गदूत लाव ज़ै तैस शक्ति देतो थियो। 44 ते तै परेशान भोइतां होरि जादे दिले सेइं प्रार्थना करने लगो ते तैसेरो पिसीनो बुझा कि खूनेरे बडे-बडे तेप्पु तल्ले झड़ते थिये। 45 प्रार्थना केरनेरे बाद यीशु अपने चलन कां वापस अव ते तैना गम्मेरे मारे झुलोरे मैल्ले। 46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना केरा ताके अज़मैइशी मां न राथ।”

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂⓂ 26:47-56; ⓂⓂⓂⓂⓂⓂ 14:43-50; ⓂⓂⓂⓂⓂⓂⓂ 18:3-12)

47 हेजू यीशुए गल ज़ोने लोरो थियो, त मैन्हु केरो अक जथो तैड़ी पुजो ते बारहन मरां अक जेसेरू नवं यहूदा थियूं, तैन सेइं अग्री-अग्री थियो, ते तै यीशु फुम्मड़ी देने अगर अव। 48 पन यीशुए तैस सेइं ज़ोवं, “यहूदा कुन तू एक्की फुम्मड़ी सेइं मीं मैनेरे मट्ठे टलुवातस?” 49 ज़ैखन यीशुएरे सैथेई एन सब हेरू त तैनेई ज़ोवं, “हे प्रभु कुन अस तलवार च़लाम?” 50 ते तैन मरां एक्के महायाजकेरे नौकरे पुड़ तलवारां च़लाई ते तैसेरो तैनी कन्न उड़ाव। 51 पन यीशुए जुवाब दित्तो, “बस्सा बडू भोइ जेवं।” ते यीशुए तैसेरो कन्न तैखने हथ लेइतां बझाव। 52 तैखन यीशुए प्रधान याजकन ते मन्देरे सिपाही ते बुज़ुर्ग ज़ैन तैस गिरफ्तार केरने ओरे थिये तैन जो ज़ोवं, “तुस कुन तलवारां ते डंडे घिन्तां मीं डैकू बुझतां टलाने ओरेथ? 53 ज़ेइस अवं तुसन सेइं साथी मन्देरे मां भोतो थियो, त तुसेईं मीं सेइं हथ न लाव, पन ई त तुशशे आंधेरेरे मौकेरो अधिकारे।”

ⓂⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂⓂ 26:57-58,69-75; ⓂⓂⓂⓂⓂⓂ 14:53-54,66-72; ⓂⓂⓂⓂⓂⓂⓂ 18:12-18,25-27)

54 ज़ैखन तैनेई यीशु टलातो तैस तैट्ठां नेइतां महायाजकेरे घरे नीयो, पतरस भी पत्तपति बल्हे-बल्हे तैरां जेव। 55 तैनेई अंगने मां अग बालोरी थी ते सब बिशतां अग तपने लोरे थिये ते पतरस भी तैन मां थियो। 56 ते अक कुआन्श अगगी कां बिशोरी तकने लोरी थी ते पतरसेरां तेकतां ज़ोने लगी, “कि ई मैन्हु भी तैस सेइं साथी थियो।” 57 पन पतरसे इन्कार केरतां ज़ोवं, “हे कुआन्शे अवं एस न ज़ैनी ए कौने।” 58 थोड़ी सैइत्रां पत्ती होरे एक्के पतरसेरां तेकतां ज़ोवं, “तू भी तैन्ना केरो साथिस।” पन पतरसे ज़ोवं, “नई अवं नई।” 59 कोई एक्की घेंटेरे बाद केन्चे होरे बडे याकीने सेइं ज़ोवं, “ई मैन्हु पक्को तैस सेइं साथी थियो, किजोकि ए भी गलीली आए।” 60 पन पतरसे इन्कार केरतां ज़ोवं, “अवं एस न ज़ैनी तू कुन ज़ोतस?” हेजू पतरसे ए गल ज़ोने लोरो थियो, त कुकड़े बांग दित्ती। 61 ते प्रभुए फिरतां पतरसेरे पासे तककू ते पतरसे परमेशेरी तै गल याद आई, ज़ै तैनी पतरसे सेइं ज़ोरी थी, “कि अज़ कुकड़ बांग देने करां पेइले तू मेरो टलाई बार इन्कार केरेलो।” 62 ते पतरस बेइर गेइतां ज़ोरे-ज़ोरे लेरां देने लगो।

ⓂⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂⓂ 26:67-68; ⓂⓂⓂⓂⓂⓂ 14:65)

63 ज़ैने मैनेई यीशु अपने कब्जे मां कियोरो थियो, तैना तैसेरी हासी बनाते थिये ते कने तैस बाते थिये। 64 तैना यीशुएरी एछ्छन पुड़ पट्टी बेन्धतां बाते थिये ते पुछ्छते थिये, “भविष्यवाणी केर ते ज़ो केनि बाहोरिए?” 65 ते तैनेई एन्चरे होरि भी बेड़ि गल्लां ज़ोई ते तैसेरी तुहीन की।

ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂⓂⓂ 26:59-66; ⓂⓂⓂⓂⓂⓂ 14:55-64; ⓂⓂⓂⓂⓂⓂⓂ 18:19-24)

66 झेझां बुज़ुर्ग लोक ते प्रधान याजक ते शास्त्री लोकेई यीशु अपने महासभाई मां आनो, 67 ते ज़ोने लगे, “अगर तू मसीह आस त ज़ो!” यीशुए तैन सेइं ज़ोवं, “अगर अवं तुसन ज़ोई भी त तुस मेरू याकीन न केरेले। 68 ते अगर अवं तुसन पुछ्छी त तुस जुवाबे न देले। 69 पन अज़ेरां बाद मैनेरू मट्टू परमेशेरे देइने पासे बिशोरू लाएले।” 70 एस गल्ली पुड़ तैना सब ज़ोने लगे, “तू परमेशेरेरू मट्टू आस?” यीशुए जुवाब दित्तो, “तुस एप्पू मींजो ज़ोतथ कि तू आस?” 71 तैनेई ज़ोवं, “हुनी असन होरि शाहादतां केरि कुन ज़रूरीए? किजोकि असेईं एसेरी ज़बान शुनेरूए।”

‘असन उन्हे बिछड़ा ते उच्ची ठारन जो ज़ोले, कि असन छपाथ।’³¹ किजोकि ज़ैखन तैनेई सब्ज बुट्टे सेइं एन केरू, त शुक्कोरे बुट्टे सेइं कुन न केरेले?”

³² ते सिपाहेई दूई होरे मुर्जम भी यीशु सेइं साथी च़लवरे थिये ताके तैन भी मारन। ³³ ज़ैखन तैना तैस ठैरी पुज़े ज़ैस जो “खोपड़ी” ज़ोतन त तैड़ी यीशु क़रूसे पुड़ चाढ़ो, ते तैना दूई मुर्जमन भी एक्की यीशुएरे देइने पासे ते होरि बांए पासे क़रूसे पुड़ चाढ़े। ³⁴ यीशु ज़ोवं, “हे बाजी एन माफ़ करां एन न ज़ानन् कि एना कुन लोरेम केरने।” ते तैनेई तैसेरे लिगड़ां केरे लेइ पेरची छेडतां शर्त रखवू ते एप्पू मांमेइं बंटां। ³⁵ लोक खड़खड़े एन सब किछ् हेरने लोरे थिये ते सरदार ज़ोरे-ज़ोरे सेइं ज़ोते थिये, “एनी होरे त बचाए ते अगर ए मसीहे ते परमेशेरो चुनोरे त अपने आपे किजो न बचाए।” ³⁶ सिपाही भी तैस कां एइतां तैसेरी हासी बनाने लगे (किजोकि तै अपनो आप राज़ो बनातो थियो), ते घटया दाछारो रस पीनेरे लेइ तैस देने लगे। ³⁷ “ते ज़ोते थिये तू अगर यहूदी केरो राज़ोस त अपनो आप बचा!” ³⁸ ते तैस क़रूसे पुड़ यानी यीशुएरे दोग्गे करां बहा अक पखड़ी लिखतां लेवरी थी, ते तैस पुड़ एन लिखेरू थियूं, “ए यहूदी केरो राज़ आए।”

२२ २२२२२२ २२२२ २२२२

³⁹ तैन दूई डैकू ज़ैना मारे जे तैन मरां एक्के यीशु जो तुहीन केरतां ज़ोवं, “अगर तू मसीह आस त एप्पू भी बंञ ते असन भी बचा।” ⁴⁰ पन होरे दुइयोवं डैके तैस जो झिड़कतां ज़ोवं, “तीं परमेशेरो भी डर नई? ज़ै सज़ा तैस मैलने लावरी तीं भी त तैए सज़ा मैलने लोरीए। ⁴¹ असन त इन्साफेरे मुताबिक अपने बुरे कम्मं केरि सज़ा मैलने लोरी पन एनी त कोई गलत कम नई कियेरू।” ⁴² तैखन तैनी ज़ोवं, “हे यीशु ज़ैखन तू अपने राज़े मां एज्जेलो त मीं भी याद केरां।” ⁴³ यीशुए तैस जो ज़ोवं, “अवं तीं सेइं सञ ज़ोताई कि तू अज़े मीं सेइं साथी स्वर्गे मां भोलो।”

२२२२ २२२२२२ २२२ २२२२२ २२२२

(२२२२२२ 27:45-56; २२२२२२ 15:33-41; २२२२२२२ 19:28-30)

⁴⁴ दीसारे 12 बजेई सारे मुलखे मां आंधरू भोवं, त टलेइ बज़न तगर रावं। ⁴⁵ दिहाड़ो भी कालो भोव ते मन्देरो पड़दो बां देंता बुन तगर फेटतां दूई टुकड़े भोइ जे। ⁴⁶ यीशुए बड़े ज़ोरे सेइं ज़ोवं, “हे बाजी अवं अपनि आत्मा तेरे हथ्थे मां सोंफताई,” ते एन ज़ोइतां यीशुए प्राण दित्ते। ⁴⁷ ज़ैखन रोमी सूबेदारे एन सब हेरू त परमेशेरी तारीफ़ केरते ज़ोवं, “ए मैन्हु सञ्चे धर्मी थियो।” ⁴⁸ ते सारे लोक ज़ैना तैड़ी थिये ए अनर्थ हेरतां छाती पिट्टते च़ले जे। ⁴⁹ पन यीशुएरे सारे दोस्त ते तैना कुआन्शां ज़ैना गलील इलाके मरां यीशुए पत्पती ओरी थी दूर ज़ेरे खेड़ोइतां, ज़ैन किछ् भोइ रावरू थियूं सब किछ् हेरी रेवरी थी।

२२२२ २२२२

(२२२२२२ 27:57-61; २२२२२२ 15:42-47; २२२२२२२ 19:38-42)

⁵⁰ अक मैन्हु थियो, ज़ेसेरू नवं यूसुफ थियूं, तै यहूदी केरि आदालतरो अक मुलाज़म भी थियो, ते अक बड़ो नेक ते धर्मी मैन्हु थियो। ⁵¹ तै बेड्डी आदालत अफसरां केरे फैसलेरे हके मां न थियो। तै यहूदी केरे नगर अरिमतियाह रानेबालो थियो, ते परमेशेरे राज़ेरे तलाशी मां थियो। ⁵² तैनी पिलातुसे कां गेइतां यीशुएरी लाश मगी। ⁵³ ते लाश क़रूसे पुड़ेरां ओसैलतां मलमलेरे कपड़े मां पलेटतां ते एक्की कबरी मां रखी, ज़ै एक्की शफ़ड़ी मां बनेवरी थी, तैस कबरी मां पेइले कोई लाश न थी रखोरि। ⁵⁴ तै तियेरी दिहाड़ी थी ज़ै आरामेरी दिहाड़ी शुरू भोने बाली थी। ⁵⁵ ते तैना दूई कुआन्शां ज़ैना गलील इलाके मरां यीशुए पत्पती ओरी थी, यूसुफे पत्पती जेई ते तैनेई तै कब्र हेरी, कि यीशुएरी लाश एसमां केन्चरे सेइं रखोरि। ⁵⁶ तैखन तैना अपने घरे वापस आए, ते खुशबूदार चीज़ां ते इत्र तियार कियो ते आरामेरे दिहाड़े मूसेरे कानूनेरे मुताबिक आराम कियो।

24

२२२२२२२ २२२२२ २२२२

(२२२२२२ 28:1-10; २२२२२२ 16:1-8; २२२२२२२ 20:1-10)

¹ हफतेरी पेइले दिहैड़ी झेझां किछ् कुआन्शां खुशबूदार चीज़ां नेइतां जेई, ज़ैना तैनेई तियार कियोरी थी ते एन्तां कबरी कां पुज़ी। ² पन तैनेई तै घोड़ कबरी करां बिछड़ोरो लाव। ³ ज़ैखन तैना अन्तर जेई त तैन यीशुएरी लाश न मैल्ली। ⁴ तैखन तैना एन हेरतां परेशान भोइ त दूई मैन्हु ज़ैन छिच़तां लिगड़ां लेग्गोरां थियां, तैन कुआन्शन कां एइतां खेड़ोए। ⁵ तैना कुआन्शां डेरि जेई ते तैना ज़मीनेरे पासे तकने लगगी। तैन मैनेई तैन जो ज़ोवं, “तुस जीते,

मुड़दन मां किजो लोरिथ तोपने । 6 तै इड़ी नई बल्के जीतो भोरोए तुसन याद नई कि जेइस तै गलीले मां थियो, त तैनी तुसन जोरू थियूं कि, 7 मैनेरू मट्टू यानी अवं पापी लोकां केरे हथ्ये देनोए ते करूसे पुड़ चाढनोई ते फिरी ट्लेइ दिहाड़ा बाद फिरी जीतो भोनोई ।” 8 तैखन तैना यीशुएरी गल्लां याद एई । 9 तैखन तैना कबरी करां चेलि जेई, त तैनेई यीशुएरे 11 चेलन ते बाकी होरि चेलन भी एस गल्लरो पतो दित्तो । 10 जैनेई प्रेरितन सेइं गल्लां की, मरियम मगदलीनी योअन्ना ते याकूबेरी अम्मा मरियम ते तैस सेइं साथी होरि भी काई कुआन्शां थी । 11 पन तैन, तैन केरि गल्लां कहानी लगगी, ते तैनेई तैन केरू याकीन न कियूं । 12 पन पतरस उठो ते तै कबरेरे पासे दौवड़तो तैस ठैरी कां जेव, ते तैड़ी तैनी लिक्तां अन्तर तकू ते सिर्फ कफन तैड़ी लाव, ते एस गल्ली पुड़ हैरान भोइतां तैट्ठां चलो जेव ।

ॐॐॐॐॐॐॐॐ ॐॐॐॐॐॐ ॐॐॐॐ ॐॐॐॐॐॐ
(ॐॐॐॐॐ 16:12-13)

13 फिरी एरू भोवं कि तैन मरां दूई चले तैस दिहैड़ी एक्की इलोव्वेरे पासे चलोरे थिये, तैस इलोव्वेरू नवं इम्माऊस थियूं । तैन यरूशलेम नगरेरां 11 किलोमीटर दूर थियूं । 14 तैना एप्पू मांमेइं एस्से बारे मां गल्लां केरते चलोरे थिये जै बितना बीतोरी थी । 15 जैखन तैना गल्लन मां मसत थिये, ते एप्पू मांमेइं गलबात लोरे थिये केरने त यीशु एप्पू तैन कां नेडे एइतां तैन सेइं साथी-साथी चलने लगो । 16 पन तैनेई यीशु न पिशानो किजोकि परमेशेरे तैना पिशान्ने करां रोकोरे थिये । 17 यीशुए तैन जो ज़ोवं, “तुस लोक एप्पू मांमेइं कुन गल्लां केरने लोरेथ?” तैना रुकी जे, ते तैन केरू तुतर उदास लेइहोने लग्गू । 18 तैखन तै जेसेरू नवं क्लियुपास थियूं, तैस सेइं ज़ोने लगो, “यरूशलेम नगरे मां सिर्फ तू अक मैन्हु आस जैस पतो नई कि, आखरी दिहाड़न मां कुन-कुन भोने लोरूए ।” 19 यीशुए ज़ोवं, “कुन लोरूए भोने?” तैनेई तैस सेइं ज़ोवं, “नासरत नगरेरो यीशु, जै नबी थियो, तै परमेशेरेरे ते मैन्हु केरे सामने कम्मन मां ते शिक्षा देने मां बेड़ि शेक्ति बालो थियो । 20 तै प्रधान याजकेई ते हाकिमेई केन्चरे सेइं रोमी गवनरे हवाले कियो ते तैस जो कतलेरे हुकम देइतां तै करूस पुड़ चाढो । 21 पन असन त उमीद थी कि ए मैनुए, जै इस्राएली लोकन रोमेरे राज्जे करां आज़ाद केरेलो, एन गल्लन अज़ ट्लेइयोवं दिहाड़ीए । 22 हुन्ना असन मरां किछ कुआन्शां अज़ झेझां कबरी कां जोरी थी, तैन केरे ज़ोने सेइं असां हैरान भोए । 23 जैखन तैन लाश न मैल्ली त तैना एन ज़ोती एई, असेई स्वर्गदूत लाए ते तैनेई ज़ोवं, कि यीशु जीतो भोरोए । 24 तैखन किछ इश्शे साथी भी कबरी कां जे, ते जेन्चरे कुआन्शेई ज़ोरू थियूं, तेरहु लाव पन यीशु न लाव ।” 25 यीशु तैन दूई चेलन सेइं ज़ोवं, “हे बेअक्ल लोकव! तुश्शे लेइ पवित्रशास्त्र मां नेबी केरि ज़ोरी गल्लन पुड़ भी विश्वास केरनो केतरो मुशकले । 26 कुन मसीहेरे लेइ ज़रूरी न थियूं, कि दुःख झल्लले ते फिरी अपनि महिमा मां दाखल भोए?” 27 यीशु अपने बारे मां तैना सैरी गल्लां समझेइ, जैना पवित्रशास्त्रे मां मूसा करां देंते सारे नेबेई ज़ोरिन ।

28 एतरे मां तैना तैस इलव्वें नेडे पुजे जैड़ी तैनेई गानू थियूं, तैनेई बुझू कि यीशु अग्रोवं गानूए । 29 पन तैनेई एन ज़ोइतां मजबूर कियो, “कि असन कां बिश किजोकि दिहाड़ी डुबोरीए आंधरू भोने बालूए ।” बस्सा तै बिशनेरे लेइ तैन सेइं साथी अन्तर चलो जेव । 30 जैखन तै तैन सेइं साथी रोट्टी खाने बिश्शो त तैनी रोट्टी ट्लाती ते बरकत देइतां टलोड़ी ते तैन देने लगो । 31 तैखन तैन केरि एछ्छी खुल्ली ते तैनेई तै पिशानो, पन तै तैन करां आलोप भोइ जेव । 32 तैना एप्पू मांमेइं ज़ोने लगे, “जैखन तै बत्तां असन सेइं साथी गल्लां लोरो थियो केरने, ते असन पवित्रशास्त्रेरो मतलब मसमझातो थियो, त असन केरी उमीद भोरी थी ।” 33 तैना तैखने तैट्ठां उठे ते यरूशलेम नगरे मां आए जैड़ी तैना यारहे चले ते होरे तैन केरे साथी एक्की ठैरी मैल्ले । 34 तैना ज़ोने लोरे थिये, “कि प्रभु सच्चे जीतो भोरोए ते शमौन पतरसे लाहोरोए ।” 35 तैनेई बत्तरी सैरी गल्लां शुनेई ते फिरी केन्चरे असेई यीशु रोट्टी टलोइते बार पिशानो ।

ॐॐॐॐ ॐॐॐॐ ॐॐॐॐ ॐॐॐ ॐॐॐॐॐ ॐॐॐॐ
(ॐॐॐॐॐ 28:16-20; ॐॐॐॐॐ 16:14-18; ॐॐॐॐॐॐॐ 20:19-23; ॐॐॐॐॐॐॐ 1:6-8)

36 तैना गल्लां केरने लोरे थिये त यीशु तैन केरे मझाटे खड़ो भोइतां ज़ोने लगो, “तुसन शान्ति मैल्ले ।” 37 पन तैना एतरे डेरि जे, कि तैना समझने लगे कि असां आत्मा लहने लोरेम । 38 यीशुए तैन सेइं ज़ोवं, “तुस किजो डेरेंथ ते तुश्शे मने मां शक किजो भोतीए । 39 मेरे हथ पाव हेरा अवं तैए आई, मी हथ लेइतां हेरा, किजोकि आत्माई हड्डी त कने मास न भोए जेरू तुस मीं मां लातथ ।”

40 एन ज़ोंनेरे पत्ती तैनी अपने हथ पाव हिराए। 41 पन खुशी सेइं तैन याकीन न भोवं, कि यीशु जींतोए, ते तैना हैरान भोए, यीशुए तैन सेइं ज़ोवं, “तुसन कां खाने जो किछ् आए?” 42 तैनेईं तैस ट्लाडोरी मेछ् लरो अक टुकडो दित्तो। 43 तैनी ट्लाती ते तैन केरे सामने खाइ। 44 तैनी तैन सेइं ज़ोवं, “जैखन अवं तुसन सेइं साथी थियो, त मीं तुसन एना गल्लां ज़ोरी थी, कि मूसैरे कानूने मां ते नेबी केरि किताबन मां ते भजना केरि किताबी मां मेरे बारे मां जैन किछ् लिखोरूए तैन पूरू भोनू ज़रूरीए।”

45 तैखन तैनी तैन केरि मद्दत की, ताके पवित्रशास्त्रे सेमझी सखन। 46 ते तैन सेइं ज़ोवं, “एन पवित्रशास्त्र मां लिखोरूए कि मसीह दुःख झैल्लेलो ते ट्लेइयोवं दिहाड़े मुडदन मरां जींतो भोलो। 47 ते तैसेरे नंवे सेइं यरूशलेम नगरेरां शुरु केरतां सैरी कौमन मां पापन करां मनफिरानेरे मैफारो प्रचार कियो गालो। 48 किजोकि तुस एना सैरी गल्लां केरे गवाहथ। 49 हेरा, अवं एप्पू तुसन पवित्र आत्मा देइलो, जेसेरो वादो बाजी परमेशरे कियोरोए। पन जां तगर स्वर्गेरां शक्ति न मैल्ले तांतगर इस नगर मां राथ।”

ⓂⓂⓂⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂ
(ⓂⓂⓂⓂⓂⓂ 16:19-20; ⓂⓂⓂⓂⓂⓂⓂ. 1:9-11)

50 फिरी यीशुए तैना नगरेरे बेइर बैतनिय्याह ड्लोंव्वेरे नेडे ने। ते अपनो हथ खडो केरतां तैन बरकत दित्ती। 51 जैखन तै तैन बरकत देने लोरो थियो, त तैन करां अलग भोइ जेव ते परमेशरे तै स्वर्गे जो नीयो। 52 चेलेईं तैसेरी आराधना की ते फिरी खुशी सेइं यरूशलेम नगरे जो वापस चले जे। 53 ते तैना हर वक्त मन्दरे मां एइतां परमेशरेरी तारीफ़ केरते थिये।

यूहन्ना

????????? ?????????? ?????? ? ?????????? ??????

????? ?????????????? ????? ???

1 (दुनियारे रचनेरे पेइलो) शुरुआती मां वचन थियूं। तैन वचन परमेशरे सेइं साथी थियूं। तैन वचन परमेशर थियूं। 2 शुरुआती मां परमेशरे सेइं साथी तैन वचने थियूं। 3 सब किछ् वचनेरे जिरिये बनाव जेव। त जैन किछ् बनाव ज़ोवं, तैस मरां कोई भी चीज़ तैसेरे बगैर न बनाई जेई। 4 तैस (वचने) मां ज़िन्दगी थी; ते तै ज़िन्दगी सारे मैनन् लौ देचे। 5 त तै लौ आंधरे मां (हमेशा) चमकचे, त आंधरू लोई कधी कैवू न केरि सके।

6 परमेशरेरी तरफां अक मैन्हु भेजो जेव, जेसेरू नवं यूहन्ना थियूं। 7 तै तैस लोअरे बारे मां ज़ोने ओरो थियो, ताके सब लोक तैसेरे जिरिये सेइं (तैस लोई पुड़) विश्वास केरन। 8 तै एप्पू लौ न थियो, पन लोअरे बारे मां लोकन गवाही देने ओरो थियो। 9 सच्च्नी लौ जै हर एककी मैन्हु (परमेशरेरे बारे मां ज़ान्नेरी) लौ देचे, तै दुनियाई मां एजनेबाली थी।

10 तैन वचन दुनियाई मां (ओरू) थियूं, त दुनिया तैसेरे जिरिये बनाई जेई, पन दुनियारे लोकेई तैन न पिशानू (कि तै कौन आए)। 11 तै अपने लोकन कां अव, पन तैसेरे अपने लोकेई तै कबूल न कियो। 12 पन ज़ेत्तरे लोकेई तै कबूल कियो, तैनी तैनन् परमेशरेरे बच्चे भोनेरू हक दित्तू; यानी सारे लोकन ज़ैना तैसेरे नंवे पुड़ विश्वास केरतन। 13 तैना न हाज-बव्वे सेइं, न मैन्हु केरे मेर्जी सेइं, न तैस मैनेरे मेर्जी सेइं जै बच्चे पैदा केरनेरी इच्छा रखते, बल्के परमेशरेरे मेर्जी सेइं पैदा भोरेन!

14 तैन वचन मैन्हु बेनतां किछ् वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बड़ो अनुग्रह कियो ते परमेशरेरे बारे मां सारी सच्च्चाई हिराई। (जताली तै इड़ी थियो, तैखन) असेई तैसेरी महिमा लाई। (जेन्चरां की) तै अपने बाजी परमेशरे करां अव, त तैसेरी जेरि महिमा कोन्ची मां नई थी। 15 यूहन्ने तैसेरे बारे मां गवाही दित्ती, ते ज़ोरे सेइं लोकन सेइं ज़ोवं, “ई तै आए, जेसेरे बारे मां मीं ज़ोरू थियूं, कि जै मेरे बाद एज्जी राओरोए, तै मीं करां बड़ो महान आए, किजोकि तै मीं करां पेइलो थियो। 16 तैसेरी भरपूरी सेइं (यानी, तैसेरे सारे अनुग्रह ते सच्च्चाई सेइं) असन सेब्बन आशिर्वाद पत्ती आशिर्वाद मैल्लू। 17 मूसा नेबेरे जिरिये असन कानून मैल्लो, पन यीशु मसीहेरे जिरिये असन कां (परमेशरे करां) अनुग्रह ते सच्च्चाई पुज्जी। 18 परमेशर केन्चे कधी भी नई लावरो, पन तैसेरू अक्के मट्टू (यीशु) जैन बाजी परमेशरेरे कुम्मे मां आए, तैन्ने असन परमेशर हिराव।”

????????? ?????????????? ?????????????? ?????????????? ?????? ?????? ?????????? ??????????
(????????? 3:1-12; ?????????? 1:1-8; ?????????? 3:1-18)

19 यूहन्ने यीशु मसीहेरे बारे मां ई गवाही दित्ती, (एक्सां) जैखन यहूदी लोकां केरे लीडरेई यरूशलेम नगरेरां यूहन्ना कां किछ् याजक त लेवी भेजे, त तैनेई तैस पुच्छू, “तू कौन आस?” 20 यूहन्ने तैन सेइं सच्च् ज़ोवं ते किछ् भी छ़पानेरी कोशिश न की, त तैनी तैन सेइं ज़ोवं, “अवं मसीह नई।” 21 तैखन तैनेई तैस पुच्छू, “फिरी तू कौन आस? कुन तू एलिय्याह नबी आस?” यूहन्ने तैनन् जुवाब दित्तो, “अवं तै नई।” तैनेई फिरी पुच्छू, “कुन तू कोई नबी आस?” तैनी जुवाब दित्तो, “नई।” 22 तैखन तैनेई तैस पुच्छू, “फिरी तू कौन आस? (असन ज़ो) ताके अस तैनन् जुवाब देम ज़ैनेई अस भेजोरेम। तू अपने बारे मां कुन ज़ोतस?” 23 तैनी जुवाब दित्तो, “जेन्चरे यशायाह नेबे (मेरे बारे मां) ज़ोरूए, तेन्चरे अवं सुनसान ठैरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)”

24 फरीसी लोकां केरे तरफां किछ् मैन्हु यूहन्ना कां भेजोरे थिये। 25 तैनेई यूहन्ना पुच्छू, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?” 26 यूहन्ने जुवाब दित्तो, “अवं त (लोकन) पैनी सेइं बपतिस्मो देताई, पन तुसन सेइं साथी रानेबालो अक एरो आए, जैस तुस हकीकित मां न पिशानथ। 27 ई तै आए, जै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नई कि तैसेरे बूटेरे तसमे खोल्ली।”

28 एना गल्लां, यरदन दरियारे पार बैतनिय्याह नगरे मां भोइ, जैड़ी यूहन्ना लोकन बपतिस्मो देतो थियो।

२९ एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइं ज़ोवं, “तक्का, परमेशरे तरफां भेजोरू (बलिदानेरू) गबडू, जैन सैरी दुनियारे लोकां केरे पाप नेते! ३० ई तै आए, जेसेरे बारे मां मीं ज़ोरू थियू कि, ‘अक मैन्हु मेरे बाद एजनेबालो आए, जै मीं करां बड़ो महान आए, किजोकि तै मीं करां पेइलो थियो।’ ३१ हुन्ना तगर अवं त एप्पू भी तैस पिशानतो न थियो। पन एल्हेरेलेइ अवं (इडी) एजतां लोकन पैनी सेइं बपतिस्मो देताई, ताके तै मैन्हु इस्राएलेरे लोकन मां बांदो भोए।”

३२ तैखन यूहन्ने लोकां केरे सामने गवाही दित्ती, “मीं पवित्र आत्मा कबूतरेरे शकली मां अम्बरेरां एइतो लाव, ते तै तैस पुड़ बिशो। ३३ अवं त एप्पू पिशानतो न थियो कि यीशु हकीकत मां कौन थियो, पन परमेशरे जैनी अवं लोकन पैनी सेइं बपतिस्मो देने भेजो, तैनी मीं सेइं ज़ोवं, ‘जैस पुड़ तू पवित्र आत्मा एइतो त बिशतो लाएलो, तैए लोकन पवित्र आत्मा सेइं बपतिस्मो देनेबालो आए।’ ३४ तै मीं लाव, त अवं तुसन गवाही देताई, कि ए मैन्हु परमेशेरू मट्टू आए!”

३५ दुइयोवं दिहाड़े, फिरी यूहन्ना त तैसेरे चलन मरां दूई तैडी खड़े भोरे थिये, ३६ त यीशु तैलमेइं च़लोरो थियो। जैखन यूहन्ने यीशु लाव, त तैनी यीशुएरे बारे मां अपने चलन सेइं ज़ोवं, “तक्का, इन परमेशरे तरफां भेजोरू (बलिदानेरू) गबडू आए!” ३७ जैखन यूहन्नारे दुइये चलेई एन शुनू, त तैना यीशु पत्ती च़ले। ३८ यीशुए बेदलोइतां तैना एइते लाए ते तैन पुच्छू, “तुस केस लगोरेथ तोपने?” तैनेई ज़ोवं, “हे गुरू, तू कोड़ि रातस?” ३९ तैनी तैन ज़ोवं, “च़ला तुस एप्पू हेरेले।” तैखन तैनेई गेइतां तैसेरे रानेरी ठार हेरी, ते तैस दिहाड़े तैना तैस साथी राए। तै कोई डलोझी च़ेवरे बजां केरो मौको थियो।

४० तैन दूई चलन मरां, जैना यूहन्नेरी गल्लां शुन्तां यीशु पत्ती च़लोरे थिये, अक अन्दिरयास थियो, जै शमौन-पतरसेरो ढ़ला थियो। ४१ तैनी पेइलू एन कम कियू कि अपने ढ़ला शमौन-पतरस तोप्तां तैस सेइं ज़ोवं, “असन मसीह मैलोरोए!” * ४२ तैखन अन्दिरयासे यीशु कां शमौन आनो। यीशुए तैसेरे पासे तक्कू ते ज़ोवं, “तू यूहन्नेरू मट्टू शमौन आस। पन अज्जेरे बाद तेरू नवं कैफा भोलू।” यूनानी भाषाई मां कैफारो मतलब “पतरस” आए। (एसेरो मतलब घोड़।)

४३ होरसां दुइयोवं दिहाड़े यीशुए गलील इलाके मां गानू चाव। तैनी फिलिप्पुस लेइतां तैस सेइं ज़ोवं, “मीं सेइं साथी च़ल (ते मेरो चेलो बन)।” (फिलिप्पुस यीशु सेइं साथी च़लो।) ४४ फिलिप्पुस बैतसैदा नगरे मां रातो थियो, जैडी अन्दिरयास त पतरस भी राते थिये। ४५ तैल्ला पत्ती फिलिप्पुस गेइतां नतनएले सेइं मिलो त ज़ोने लगो, “असन मसीह मैलोरोए, जेसेरे बारे मां (बड़े पेइले) मूसेरे कानूने मां लिखोरोए त कने नेबेई भी अपनि किताबी मां लिखोरोए। तै यूसुफेरू मट्टू नासरत नगरे बालो यीशु आए, जै नासरत नगरेरो आए!” ४६ नतनएले तैस सेइं ज़ोवं, “कुन नासरते मरां कोई रोडी चीज़ निस्सी सकतीए?” फिलिप्पुसे ज़ोवं, “एइतां एप्पू हेर।” (त नतनएल फिलिप्पुसे सेइं साथी च़लो।)

४७ यीशुए नतनएल अपने पासे एइतो लाव ते तैनी तैसेरे बारे मां एन ज़ोवं, “ई असली इस्राएली मैन्हु आए, एसमां कोई पाखंड नई!” ४८ नतनएले यीशु पुच्छू, “तू मीं केन्त्रे ज़ानतस?” यीशुए तैस जुवाब दित्तो, “फिलिप्पुस तीं कुजाने करां पेइले जैखन तू फ़ेगोरे बुट्टे हैठ थियो, मीं तू तैडी लावरो थियो।” ४९ तैखन नतनएले ज़ोवं, “हे गुरू, (हुन्ना अवं ज़ानतां कि) तू परमेशेरू मट्टू आस! तू इस्राएल लोकां केरो राज़ो आस!” ५० यीशुए तैस जुवाब दित्तो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन ज़ोवं, कि मीं तू फ़ेगोरे बुट्टे हैठ लावरो थियो? तू इस करां भी बेइडी-बेइडी गल्लां लाएलो!” ५१ फिरी तैल्ला पत्ती यीशुए ज़ोवं, “अवं तुसन सेइं सच-सच ज़ोताई कि, तुस स्वर्ग खुल्लू त कने परमेशेरेरे स्वर्गदूतन उबरे गाते त मैनेरे मट्टे पुड़, यानी मीं पुड़ उतरते लाएले।”

2

१:४१ १:४१ मसीह: यूनानी भाषाई मां मसीहेरो मतलब “ख्रिस्त” आए। (एसेरो मतलब “परमेशेरेरां तरफां भेजोरो राज़ो।”)

1 तैल्ला पत्ती, टलेइयोवं दिहाड़े गलील इलाकेरे काना नगरे मां केन्चेरो इला थियो। यीशुएरी अम्मा भी तैडी थी। 2 यीशु ते तैसेरे चलन भी धाम कियोरी थी। 3 जैखन दाछेरो रस मुक्को, त यीशुएरी अम्मा तैस सेइं लगी ज़ोने, “एन कां दाछेरो रस मुकोरोए।” 4 यीशु लगे ज़ोने, “अम्मा, मीं तीं सेइं कुन कम? हेजू मेरो वक्त नई ओरो।”

5 तैसेरे अम्मा नौकरन सेइं ज़ोवं, “जैन किछ् यीशु तुसन सेइं ज़ोए, तैन्ने केरथ।” 6 तैडी नेडे घोड़ां केरे शा (बड्डे) घड़े रखोरे थिये, जैन मां दूई-दूई टलाई-टलाई मन (पानी) लगतू थियूं। यहूदी लोक अपने रुवाजोरे मुताबिक (अपने आपे त कने चीज़न) धोनेरे लेइ एन घड़े (मां पानी भेरतां) इस्तेमाल केरते थिये। 7 यीशुए नौकरन सेइं ज़ोवं, “घड़न मां पानी भरा।” तैनेई पूरे घड़े भरे। 8 तैखन यीशुए तैन सेइं ज़ोवं, “हुन्ना, घड़े मरां किछ् पानी केढतां धामारे प्रधाने कां (चखनेरे लेइ) देथ। तैनेई तैस कां नेव। 9 जैखन धामारे प्रधाने तैन पानी चखू, जैन दाछेरो रस बनोरू थियूं, तै न थियो ज़ानतो कि एन कोट्टां ओरूए, पन नौकर ज़ानते थिये, जैनेई तैन केढतां आनेरू थियूं। एल्हेरेलेइ धामारे प्रधाने लाडो कुजाव, ते तैस सेइं ज़ोवं, 10 ‘हर कोई मैन्हु (आम तौरै, धामी मां) पेइलो रोडो दाछारो रस देते, त जैखन लोक पीतां रज़तन, त बादे मां घट रोडो ज़ेरो दाछारो रस देते, पन तीं रोडो हेजू पत्रोवं रखोरो थियो!’”

11 गलील इलाकेरे काना नगरे मां यीशुए पेइलो चमत्कार कियो। एन केरतां तैनी अपनि महिमा बांदी की, त तैसेरे चलेई तैस पुड़ (होरो भी जादे) विश्वास कियो कि तै मसीह आए।

12 तैल्ला पत्ती यीशु त तैरेरी अम्मा ते तैसेरे दूला ते कने तैसेरे चले कफरनहूम नगरे मां जे, ते किछ् दिहाड़े तैडी राए।

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂ
(ⓂⓂⓂⓂⓂ 21:12-13; ⓂⓂⓂⓂⓂ 11:15-17; ⓂⓂⓂⓂ 19:45-46)

13 जेइस यहूदी लोकां केरू फ़सह तिहार नेडे अव, त यीशु यरूशलेम नगरे जो च़लो जेव। 14 त तैडी मन्देरे अंगने मां तैनी (बलिदानेरे लेइ) दांत, भैडडां त कबूतर बेचने बाले लाए त कने पेंडसे बदलनेबाले भी अपने मेज़न पुड़ बिशोरे लाए। 15 तैखन तैनी रेस्सरो अक कोडो बनेइतां, तैनन् सेबनन त भैडडां त दांत मन्देरे मरां बेइर कढे, त बुपारी केरे पेंडसे (इरां उरां) शारे, त तैन केरे मेज़ उलटाए। 16 त कबूतर बेचनेबालन सेइं ज़ोवं, “इना इट्टां नेइ गाथ! मेरे बाजी केरे मन्देरे बुपारी लोकां केरू घर न बनाथ!” 17 जैखन तैसेरे चलेई एन शुनू, त तैनन् याद अव कि (परमेशेरी किताबी मां) लिखोरूए कि (मसीहे परमेशेरे सेइं ज़ोवं) “तेरे घेरेरे लेइ मेरी भक्ति, (हे परमेशेरे) मेरे अन्तर अगारी ज़ेरि ज़लतीए!”

18 तैखन यहूदी लोकां केरे किछ् लीडेरेई तैस सेइं ज़ोने लगगे, “तू असन कोई निशान (चमत्कार) हिरा कि मन्देरे अंगने मरां लोकन कढनेरे लेइ तीं कां परमेशेरे तरफां अधिकार आए?” 19 यीशुए तैन जुवाब दित्तो, “एस मन्देरे डोला, ते अवं टलेइ दिहैइन मां एस (दुबारो) बनेइलो।” 20 यहूदी लोकेई यीशु जुवाब दित्तो, “कुन इस मन्देरे बन्ने मां 46 साल लगोरेन, कुन तू एस टलेइ दिहैइन मां (दुबारो) बनेइ सकतस?” 21 तैनेई गलत समझू यीशुए जैस मन्देरेरी गल कियोरी थी, तै तैसेरी अपनि जान थी। 22 एल्हेरेलेइ (बादे मां) जैखन यीशु (क़रूसे पुड़ मरो त) मुड़दन मरां ज़ींतो भोव, त तैखन तैसेरे चलन याद अवं कि यीशुए (अपने मौत त कने ज़ींतो भोनेरे बारे मां) असन ई गल ज़ोरी थी। त (एसेरे वजाई सेइं) तैनेई पवित्रशास्त्रे मां लिखोरी गल्लन पुड़ त कने यीशु मसीहेरी ज़ोरी गल्लन पुड़ होरो भी जादे विश्वास कियो।

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂⓂⓂⓂ

23 ज़ताली यीशु फ़सह तिहारेरे मौके यरूशलेम नगरे मां थियो, त बडे लोकेई तैसेरे चमत्कार, जैना तैनी किये, लेइतां तैस पुड़ विश्वास कियो। 24 पन फिरी भी यीशुए तैन पुड़ अतबार न कियो, किजोकि तै सेभी केरो इन्सानी सोच ज़ानतो थियो। 25 तैस ए ज़रूरत न थी कि कोई मैन्हु तैस केन्ची होरि मैनेरे बारे मां ज़ोए, किजोकि तै (पेइले) मैन्हु केरि सोच ज़ानतो थियो।

3

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂ

1 फरीसी लोकन मां अक मैन्हु थियो ज़ेसेरू नवं नीकुदेमुस थियूं। तै यहूदी लोकां केरो अक लीडर थियो। 2 एक्की राती तै यीशु कां एइतां ज़ोने लगगे, “हे गुरू, अस ज़ानतम कि तू परमेशेरी तरफां गुरू भोइतां ओरोस; किजोकि

31 “(मसीह) जै स्वर्गेरां एइते तै होरि सेब्बन करां महान भोते । त जै मैन्हु धेरती पुडेरं भोते, तै धेर्तारोए त धेर्तारी गल्लां केरते । जै स्वर्गेरां एइते तै सेब्बना उच्चो महान भोते । 32 तैनी (परमेशरे तरफां) जैन किछ लाव ते शुनेरू, तैसेरे बारे मां लोकन शुनाते, पन तैसेरी गवाही कोई न शुने । 33 जै कोई तैसेरी गवाही पुड विश्वास केरते, तै तैसेरी तसदीक केरते कि परमेशर सच्चो आए । 34 किजोकि (मसीह) जै परमेशरे भेजोरोए, तै परमेशरेरी गल्लां ज़ोते, किजोकि परमेशर तैस पवित्तर आत्मा नैपतां न दे । 35 (परमेशर) बाजी मट्ठे सेइं प्यार रखते, त तैनी सब किछ तैसेरे हावाले कियोरूए । 36 जै (परमेशरेरे) मट्ठे पुड विश्वास केरते तैस हमेशारी ज़िन्दगी मैलचे, पन जै मट्ठे पुड विश्वास न केरे तै ज़िन्दगी करां दूर रालो, ते तैस पुड परमेशरेरो क्रोध (हुन्ना करां लेइतां हमेशा) राते ।”

4

???? ? ? ???? ? ? ???? ?

1 फिरी जैखन प्रभु पतो लगो कि फरीसी लोकेईं शुनोरूए, यीशु, यूहन्ना करां जादे चले बनाते ते बपतिस्मो देते । 2 (हालांकी सच्च एन थियूं यीशु एप्पू नईं बल्के तैसेरे चले बपतिस्मो देते थिये), 3 तैखन तैना यहूदिया इलाके शैरतां गलील इलाके जो चले जे । 4 ते तैसेरू सामरिया इलाके मांमेइं भोइतां गानू ज़रूरी थियूं । 5 एल्हेरेलेइ तै सामरिया इलाकेरे सूखार नगर मां अव, तै ठार तैस ज़मीनरे नेडे थी जै याकूबे अपने मट्ठे यूसुफे दित्तोरी थी । 6 याकूबे जैन खुह बनोरू थियूं तैन तैडी थियूं, ते यीशु सफर केरतां थकोरो थियो, ते तैस खुहे पुड बिश्शो । तैखन दुपाहरां केरो मौको थियो ।

7 एत्रे मां अक सामरी कुआन्श तैडी पानी भरने आई । यीशुए तैस जो ज़ोवं, “मीं पानी पीया ।” 8 किजोकि तैसेरे चले रोट्टी आन्नेरे लेइ नगर मां जोरे थिये । 9 तैस सैमरी कुआन्शां तैस जो ज़ोवं, “तू यहूदिस ते अवं त सामरी, तू मीं पानी पीयानेरे लेइ किजो ज़ोतस?” किजोकि यहूदी सैमरन सेइं मिलनू जुलनु न थिये सुखाते । 10 यीशुए तैस जुवाब दित्तो, “अगर तू ज़ानेथी कि परमेशर तीं कुन देनू चाते, त एन भी ज़ानेथी कि, तीं करां कौन पानी मगने लोरोए, त तू तैस करां मगेथी, ते तै तीं ज़िन्दगरू पानी देथो ।” 11 तैस कुआन्शां ज़ोवं, “हे प्रभु, तीं कां पानी भरनेरे लेइ कोई भांड नईं, ते खुह बडू डुघू आए, ते तीं ज़िन्दगरू पानी कोट्टां मैल्लू? 12 कुन तू इश्शे पूर्वज याकूबे करां भी बड्डोस, जैनी एन खुह असन दित्तेरूए, ते तैनी एप्पू भी ते तैसेरी औलादां ते तैसेरे गोरू गब्बेइं भी एस्से मरां पिव?” 13 यीशुए तैस जुवाब दित्तो, “जै कोई एस खुहे मरां पियेलो तैस फिर भी ट्लिश रानीए । 14 पन जै कोई तैन पानी पीते ज़ैन अवं देताईं तै हमेशारे लेइ ट्लिशोरो न रालो, बल्के ज़ैन पानी अवं तैस देलो तैन तैस मां अक नाग बनेलो जै पानी देतो रालो, जैस सेइं तैस हमेशारी ज़िन्दगी मैलेली ।” 15 तैस कुआन्शां यीशु जो ज़ोवं, “हे प्रभु, मीं भी तैन पानी दे ताके मीं ट्लिश न लगगे ते मीं बार-बार पानी भरने इस खुहे पुड न एजनु पे ।”

16 यीशुए तैस जो ज़ोवं, “गा, अपनो मुन्श कुजा ।” 17 तैसां कुआन्शां जुवाब दित्तो, “मेरो कोई मुन्श नईं ।” यीशुए तैस जो ज़ोवं, “तीं सच्च ज़ोवं, कि मेरो कोई मुन्श नईं ।” 18 किजोकि तीं पंच मुन्श बनोरेन ते ज़ैस सेइं साथी तू हुन्ना आस, तै तेरो मुन्श नईं, तीं ज़ैन किछ ज़ोवं तैन सच्च ज़ोरूए ।” 19 तैस कुआन्शा ज़ोवं, “हे प्रभु, मीं लगगते तू कोई नबी आस । 20 इश्शे दादे-पडदादेईं इस पहाडे पुड आराधना की, पन तुस यहूदी लोक ज़ोतथ कि ज़ैडी आराधना कियोरी लोडचे, तै ठार सिर्फ यरूशलेम आए ।” 21 यीशुए तैस कुआन्शी जो ज़ोवं, “हे कुआन्श, मेरी गल्लरो विश्वास केर, कि तै मौको भी एज्जी राहोरोए, कि तुस लोक बाजी केरि आराधना न त इस पहाडे पुड केरेले ते न यरूशलमे मां केरेले । 22 तुस सामरी लोक ज़ेसेरी आराधना केरतथ तैस न ज़ानथ, पन अस यहूदी लोक ज़ेसेरी आराधना केरतम तैस ज़ानतम, किजोकि मुक्ति यहूदन मरां आए । 23 पन तै मौको एज्जी राहोरोए बल्के ओरोए, ज़ैखन सच्च भक्त बाजेरी आराधना आत्मा ते सच्चैईं सेइं केरेले, किजोकि बाजी एरे ज़ेरे सच्च भक्त तोपते । 24 परमेशर आत्मा आए, एल्हेरेलेइ तैसेरे भक्त तैसेरी आराधना आत्मा ते सच्चैईं सेइं केरन ।” 25 कुआन्शां तैस सेइं ज़ोवं, “अवं ज़ानती कि मसीह, ज़ैस जो खिरस्त ज़ोतन एजनेबालोए, ज़ैखन तै एज्जेलो तै सब किछ समझालो ।” 26 तैखन यीशुए ज़ोवं, “अवं ज़ै तीं सेइं गल्लां लगोरोइं केरने तैए मसीह आई ।”

???? ? ? ???? ? ? ???? ?

27 एतरे मां तैसेरे चले आए ते तैनेई तै एक्की कुआन्शी सेइं गल्लां केरतो लेइतां हैरान राए, पन केन्चे तैस एन न पुच्छू, “तू कुन चातस?” या “एस कुआन्शी सेइं किजो गल्लां लगोरोस केरने?” 28 तै कुआन्श पैंनेरो घड़ो तैड़ी छेइतां वापस नगर मां जेई ते मैनन् सेइं ज़ोने लगी। 29 “एज्जा, एक्की मैन्हु सेइं मिला तैनी मीं सेइं सब किछ ज़ोवं ज़ैन मीं अज़ तगर कियेरू थियूं, कुन ए तै मसीह त नई?” 30 तैना मैन्हु नगर मरां निस्तां यीशु हेरनेरे लेइ तैसेरे पासे च़लने लगे। 31 यीशुएरे च़ेले तैस कां मिनत केरने लगगे, “हे गुरू, रोट्टी खा।” 32 पन यीशुए तैन सेइं ज़ोवं, “मीं कां खानेरे लेइ अक एरी रोट्टी आए, पन तुसन तैसेरे बारे मां कोई पतो नई।” 33 तैखन च़ेले एप्पू मामेइं ज़ोने लगे, “कुन केन्चे पेइलू एसेरे लेइ किछ खाने जो आनोरूए?” 34 यीशुए तैन सेइं ज़ोवं, “मेरी रोट्टी ईए कि, परमेशेरी मर्जी पूरी केरि ज़ैनी अवं भेजोरोई ते तैन कम पूरू केरि ज़ैन तैनी दितोरूए। 35 कुन तुस न ज़ोथ कि, फसल पकने हेजू च़ेवरे महीन्न बाकिन? अवं तुसन जो ज़ोताई कि, अपनि एछ्छी घाड़ा! ते एजनेबाले मैनन् हेरा, ज़ैना पक्कोरे ऊडारां केरि फसलारे ज़ेरे आन। 36 फसल कटने बालन कम केरतां मज़दूरी मैल्ली राओरीए, यानी तैना लोकन अकोट्टे केरि राओरेन ज़ैना लोकन हमेशारी ज़िन्दगी हासिल केरेले, ताके ज़ै बेते ते कटते साथी खुशी मनान। 37 एल्हेरेलेइ अक कहावते कि बेनेबालो कोईए ते कटने बालो होरो कोईए, तैन सच्चे। 38 मीं तुस भेजे कि गाथ तैस फसली कट्टा ज़ै तुसेईं नई बेवरी, होरेई मेहनती सेइं कम कियूं ते तुसन तैन केरि मेहनतरो फल मैल्लो।”

२२२२२ २२२ २२२२ २२२ २२२२२२२ २२२२२

39 नगरेरे बड़े लोकेई तैस सेमरी कुआन्शरी गल शुन्तां यीशु पुड़ विश्वास कियो, किजोकि तैसां तैन लोकन सेइं ज़ोवं कि तैनी मीं सेइं सब किछ ज़ोवं, ज़ैन मीं कियेरू थियूं। 40 ज़ैस नगरेरे सामरी लोक यीशु कां ओरे थिये, मिनत केरतां ज़ोने लगे, असन कां बिश फिरी तै दूई दिहाड़े तैड़ी राव। 41 होरे भी बड़े लोक थिये ज़ैनेई तैसेरी गल्लां शुन्तां तैस पुड़ विश्वास कियो। 42 तैनेई तैस कुआन्शी जो ज़ोवं, “असेई तेरी गल्लां शुन्तां विश्वास नई कियोरो, बल्के असेई अपने कन्नेई शुनेरूए ते असेई एन हुनी बुझू कि ए मैन्हु सच्चे दुनियाई मुक्ति देनेबालोए।” 43 दूई दिहैइना बाद यीशु फिरी गलीलेरे पासे च़लो जेव। 44 ते यीशुए एप्पू ज़ोरू थियूं, कि कोई नबी अपने मुलखे मां इज्जतरे काबल न समझो गाए। 45 ज़ैखन तै गलीले मां अव त गलीली लोक तैस सेइं खुशी सेइं मिले, एल्हेरेलेइ कि तैनेई तैन सब किछ ज़ैन तैनी फ़सहरे मौके यरूशलेम नगरे मां कियेरू थियूं, तैनेई अपनि एछ्छेई सेइं लावरू थियूं तैखन तैना एप्पू भी तैड़ी थिये।

२२२२२ २२२२२२२ २२२२२ २२२२२२

46 दुइयोवं बार ज़ैखन तै गलील इलाकेरे काना इलव्वें मां ओरो थियो ज़ैड़ी तैनी पानी दाछारो रस बनोरो थियूं। तैड़ी अक बड़ो बड़ो राज़ेरो अफसर थियो तैसेरू मट्टू कफरनहूम नगर मां बिमार भोरू थियूं। 47 ज़ैखन तैनी अफसरे शुनू कि यीशु यहूदिया इलाकेरां गलील इलाके मां ओरोए त तै यीशु कां पुजो ते मिनत केरतां ज़ोने लगे मेरू मट्टू मरने बालूए तू च़ल ते तैस बज्झा, किजोकि तैन मरने बालू थियूं। 48 यीशुए तैस सेइं ज़ोवं, “जातगर तुस लोक निशान ते चमत्कार न लाएले कधे विश्वास न केरेले कि, अवं मसीह आई।” 49 तैनी बड़डे अफसरे ज़ोवं, “प्रभु लूश केर एरू न भोए कि मेरू मट्टू मेरि गाए।” 50 यीशुए जुवाब दितो, “च़ल तेरू मट्टू ज़ीतू भोनूए।” तैनी तैसेरी गल्लरो विश्वास कियो ते तैट्टां च़लो जेव। 51 तै हेजू बत्तां थियो त तैसेरे नौकर तैस मैल्ले ते ज़ोने लगे, “तेरू मट्टू ज़ीतूए।” 52 तैखन तै पुच्छने लगगे, “मेरू मट्टू कैखन ज़ेरे बेज्झोने लगगोरू थियूं?” ते तैनेई ज़ोवं “तैसेरो भुखार हीज दीसां एक्की बजे उतरी जोरो थियो।” 53 तैखन तैसेरे बाजी याद अवं कि, तैए मौको थियो, ज़ैखन यीशुए ज़ोरू थियूं, “गा तेरू मट्टू ज़ीतूए” तैखन तैनी भी ते तैसेरे पूरे टब्बरे यीशु पुड़ विश्वास कियो। 54 ई दुइयोवं चमत्कारेरो निशान थियो ज़ै यीशुए यहूदिया इलाकेरां वापस एजनेरां बाद गलील इलाके मां कियोरो थियो।

5

२२२२ 38 २२२२२ २२२२ २२२२२२ २२२२२२२ २२२२२२२

1 एन गल्लन पत्ती यहूदी केरू अक तिहार भोवं, ते यीशु यरूशलेम नगरे जो जेव। 2 यरूशलेम नगरे मां भैइडां केरे दारे कां अक हावदे, ज़ैस जो इब्रानी भाषाई मां बैतहसदा ज़ोतन, तैसेरां पंच अंगना थियां। 3 एन मां बड़े बिमार, काने, टोंटे, नीपाते (पानी हीलनेरे इंतज़ारे मां) भोते थिये। 4 (किजोकि वक्ते पुड़ परमेशेरो स्वर्गदूत हावदे

पुड़ एडतां पानी हिलातो थियो, ते पानी हिलनेरां पत्ती जै कोई पेडलो हवदे मां गातो थियो तै ठीक भोतो थियो, चाए तैसेरी कोई भी बिमारी किना भोए)। ⁵ तैडी अक मैन्हु थू, जै 38 सालां केरो बिमार थू। ⁶ यीशुए तै तैडी बिशोरो लाव ते एन जेनतां कि ए बडो चरोकनो इस हालती मांए, ते तैस पुच्छू, “कुन तू ठीक भोनू चातस?” ⁷ तैने बिमारे जुवाब दित्तो, “हे प्रभु, मीं कां कोई मैन्हु नई, कि जताली पानी हिलावं गाए त मीं कोई हावदे मां गाने लेइ मेरी मद्दत केरे, मेरे पुजते-पुजते तांतगर होरो कोई गाते।” ⁸ यीशुए तैस सेइं ज़ोवं, “उठ अपनि खट सल्ल ते चल फिर।” ⁹ तै मैन्हु तैखने ठीक भोव, ते अपनि खट छुइतां चलने फिरने लगो।

¹⁰ तै आरामेरी दिहाड़ी थी एल्हेरेलेइ यहूदी लीडर तैस सेइं जै ठीक भोरो थियो, ज़ोने लगगे, “अज त आरामेरी दिहाड़ी आए, तीं खट छूनी जेइज नई।” ¹¹ तैने तैन जुवाब दित्तो, “जैने अव ठीक कियो, तैने मीं सेइं ज़ोवं, ‘अपनि खट छू ते चल फिर।’” ¹² तैनेई तैस पुच्छू, “तै कौन मैनुए जैने तीं सेइं ज़ोवं, ‘खट छुइतां चल फिर?’” ¹³ जै ठीक भोरो थियो तै न थियो ज़ानतो कि तै कौन आए, किजोकि तैस ठैरी भीड़ भोनेरे वजाई सेइं यीशु तैस ठैरां होरि पासे चुपचारे चल्लो जोरो थियो। ¹⁴ एन गल्लन पत्ती यीशु तै मन्दरेरे अंगने मां मैल्लो, यीशुए तैस सेइं ज़ोवं, “तक, तू ठीक भोरोस, फिरी पाप न करां, एरू न भोए कि, एस करां बड्डी आफत एज्जे।” ¹⁵ तैने मैने यहूदी लीडरन सेइं ज़ोवं, कि जैने अवं ठीक कियोरोई तै यीशुए। ¹⁶ एल्हेरेलेइ यहूदी लीडर यीशु सताने लाए, किजोकि तै एरां ज़ेरां कम्मां आरामेरे दिहाड़े केरतो थियो। ¹⁷ एस पुड़ यीशुए तैन सेइं ज़ोवं, “मेरो बाजी यानी परमेशर हमेशा कम केरते, मीं भी कम कियोरू लोडे।” ¹⁸ एस वजाई सेइं यहूदी लीडर मनां जादे तैस मारनेरी कोशिश केरने लाए, किजोकि तै न सिर्फ आरामेरे दिहाड़ेरो हुक्म न थियो टलोतो बल्के परमेशरे अपनो बाजी ज़ोतो थियो ते अपनो आप परमेशरे बराबर बनातो थियो।

????????

¹⁹ यीशुए तैन सेइं ज़ोवं, “अवं तुसन सेइं सच्च-सच्च ज़ोताई, मट्टू यानी अवं एप्पू किच्छ न केरि बेटि, सिर्फ तैन ज़ैन बाजी परमेशरे करां केरतू लाताई, किजोकि ज़ैना-ज़ैना कम्मां बाजी करां केरतो लाते तैन मट्टू भी तैस्से तरीके सेइं केरते। ²⁰ किजोकि बाजी, मट्टे सेइं प्यार केरते, ते ज़ैना-ज़ैना कम्मां तै एप्पू केरते, तैना सब मट्टे भी हिराते, ते तैन एस करां भी बड्डां कम्मां हिरालू, ताके तुस हैरान भोथ। ²¹ किजोकि ज़ेन्चरे बाजी मुइदन ज़ीतो केरते, तेन्चरे मट्टू भी ज़ैस चाते तैस ज़ीतो केरते। ²² बाजी केन्चरी इन्साफ न केरे, पन तैन इन्साफ केरनेरू सारू कम मट्टे दित्तेरूए। ²³ कि सब लोक ज़ेन्चरे बाजेरी आदर केरतन तेन्चरे मट्टेरी भी आदर केरन, जै मट्टेरी आदर न केरे, तै बाजी केरि ज़ैने तैन भेजोरूए तैसेरी आदर न केरे। ²⁴ अवं तुसन सेइं सच्च ज़ोताई जै मेरू वचन शुन्तां मेरे भेजने बाले पुड़ विश्वास केरते, हमेशारी ज़िन्दगी तैसेरीए, ते तैस पुड़ सज़ारो हुक्म न भोए, बल्के तै मौतरां पार भोइतां हमेशारे ज़िन्दगी मां दाखल भोते।”

²⁵ “अवं तुसन सेइं सच्च-सच्च ज़ोताई, कि तै वक्त एजनेबालोए, बल्के हुन्नाए ज़ैस मां मुइदे परमेशरे मट्टेरी यानी मेरी आवाज्ज शुनेले, ते ज़ैना शुनेले तैना हमेशा जीएले। ²⁶ किजोकि ज़ेन्चरे बाजी अपने आपे मां ज़िन्दगी रखते तेन्चरे तैने मट्टे भी ए अधिकार दित्तोरुए, कि अपने आपे मां ज़िन्दगी रखे एल्हेरेलेइ तैन मैनेरू मट्टूए। ²⁷ बल्के बाजी परमेशरे तैस सैरी लोकां केरि आदालत केरनेरो भी अधिकार दित्तोरुए, एल्हेरेलेइ कि तैन यानी अवं मैनेरू मट्टू आई। ²⁸ एसमां हैरान न भोथ, किजोकि तै वक्त एइते कि ज़ेत्ते कब्रन मां आन तैसेरी आवाज्ज शुन्तां ज़ीते भोनेन। ²⁹ ज़ैनेई भलाई कियोरीए हमेशारे ज़िन्दगरी लेइ ज़ीते भोनेन ज़ैनेई बुरी ज़िन्दगी ज़ियोरीए तैना सज़ारी लेइ ज़ीते भोनेन।”

????????

³⁰ “अवं अपने आपे सेइं किच्छ न केरि बेटि, ज़ेन्चरे मेरो बाजी मीं ज़ोते तेन्चरे अवं लोकां केरि आदालत केरताई, ते मेरी आदालत सच्चिीए, किजोकि अवं अपने मेर्जी सेइं नई पन अपने भेजने बालेरी मर्जी सेइं चाताई। ³¹ अगर अवं अपनि गवाही एप्पू देई, त मेरी गवाही सच्चिी नई। ³² अक होरो आए, यानी मेरो बाजी जै मेरी गवाही देते, ते अवं ज़ानताई जै गवाही तै मेरे बारे मां देते तै सच्चिीए। ³³ तुसेई मैन्हु यूहन्ना कां मेरे बारे मां पुच्छने भेजे, ते तैनी सच्चिी गवाही दित्तोरीए। ³⁴ पन अवं अपने लेइ मैनेरी गवाही न चैई, पन यूहन्ना जै गवाही दित्ती तैसेरे बारे मां मीं एल्हेरेलेइ ज़ोवं ताके तुसन मुक्ति मैल्ले। ³⁵ तै त बलतो ते चमकतो दीयेरो ज़ेरो थियो, पन तुसन थोड़े चिरेरे लेइ तैसेरी लोई मां खुश भोनू रूडू लग्गू। ³⁶ पन मीं कां जै गवाहीए तै यूहन्नारी गवाही करां भी बड्डीए।

किजोकि जैन कम बाजे मीं केरनेरे लेइ दित्तेरू मतलब इन्ने कम्मां जैना अवं केरताई, तैना मेरी गवाही देतन कि बाजे अवं भेजोरोई। 37 ते बाजी जैने अवं भेजोरोई तैने मेरी गवाही दित्तोरीए, तुसेई न कधी तैसेरी आवाज शुनोरी, ते न तै आमने सामने लोरोए। 38 तुसेई तैसेरी शिक्षा अपने मने मां नई रख्खोरी, किजोकि तुसेई मीं पुड़ विश्वास न कियो, कि अवं परमेशरे भेजोरोई। 39 तुस पवित्रशास्त्रे मां एन पढतथ, किजोकि तुस सोचतथ कि हमेशारी जिनन्दगी तैस मां मैलतीए, तै ईए, जै मेरे बारे मां गवाही देते। 40 फिरी भी तुस हमेशारे जिनन्दगी हासिल केरनेरे लेइ मीं कां न एजनु चाथ। 41 अवं मैनन् करां तारीफ न चैई। 42 पन अवं तुसन ज्ञानताई तुशे दिले मां परमेशरेरे लेइ प्यार नई। 43 अवं अपने बाजेरे अधिकारे सेइ ओरोई, ते तुस मेरी गल न मन्थ। अगर होरो कोई अपने अधिकारे सेइ एज्जे, त तैसेरी गल मन्नेले। 44 तुस मीं पुड़ विश्वास न केरि बटथ, किजोकि तुस एक्की होरि करां तारीफ चातथ, ते तुस तै तारीफ न चाथ जै सिर्फ परमेशरेरे तरफाए। 45 इन न समझा कि अवं बाजेरे सामने तुसन पुड़ दोष लेइएलो, तुसन पुड़ दोष लानेबालोए त मूसोए, जैस पुड़ तुसेई भरोसो रख्खोरोए। 46 किजोकि अगर तुसेई मूसेरो विश्वास कियोरो भोथो, त मेरो भी विश्वास केरथे, किजोकि तैने मेरे बारे मां लिखोरूए। 47 तुस त तैसेरे कानूनेरे गल्लन पुड़ विश्वास न केरथ, ते फिरी तुस किजो मेरी गल्लन पुड़ विश्वास केरेले?”

6

5000 14:13-21; 6:30-44; 9:10-17

1 एन गल्लन पत्ती यीशु गलीलेरे समुन्दरेरे मतलब तिबिरियुसेरे समुन्दरेरे पार जेव। 2 ते अक बड़ी भीड़ तैस पत्ती चली, किजोकि जैना चमत्कार तै बिमारन पुड़ हीरतो थियो, ते तैना ठीक भोते थिए ते लोक एन हेरते थिए। 3 तैखना यीशु पहाड़े पुड़ चढतां अपने चलन साथी तैड़ी बिशुओ। 4 ते यहूदी केरे फसहेरू तिहार नेडू थियूं।

5 जैखन यीशुए अक बड़ी भीड़ अपने पासे एंडती लाई, त तैने फिलिप्पुसे सेइ ज़ोवं, “असां एना केरे लेइ रोट्टी कोट्टां घिन्म?” 6 पन तैनी तै गल तैस अजमानेरे लेइ ज़ोई, किजोकि तै एप्पू ज्ञानतो थियो कि तै कुन केरेलो। 7 फिलिप्पुसे तैस जुवाब दित्तो, “एन केरे लेइ 200 दीनारां केरि रोट्टी भी पूरी न भोली कि तैन थोड़ी-थोड़ी मैली गैली।” 8 तैसेरे चलन मरां शमौन पतरसेरे ढलाए अन्दरयासे तैस सेइ ज़ोवं। 9 “इड़ी अक मट्टूए ज़ैस कां जोआं केरि पंच रोट्टिन, तै दूई मेछलीन, पन एतरे लोकन जो कुन तैना पूरी भोनिन?” 10 यीशुए ज़ोवं, “लोकन विशाला।” तैड़ी बड़ो घास थियो। तैखन लोक जैना लगभग 5000 मड़द बिशुओरे थिये। 11 तैखन यीशुए रोट्टी टलेइ ते शुक्र केरतां बिशने बलना दिती, ते तेन्चरे मेछलीन मरां भी जेत्ती तैना चातो थियो बेन्टी। 12 जैखन तैना खेइतां रज्जे त तैनी अपने चलन सेइ ज़ोवं, “बच्चोरे टुकड़े अकोट्टे केरा, ताके किछ शारू न गाए।” 13 ते तैनेई अकोट्टे केरे, ते जोआं केरे पंच रोट्टी केरे टुकड़न मरां जैना खाने बालन करां बच्चोरे थिए 12 टोकरे थिए। 14 तैखन तै चमत्कार जै तैनी कियोरो थियो लोक हेरतां ज़ोने लाए, “तै नबी जै दुनियाई मां एजनेबालो थियो सच्चे ईए।” 15 यीशुए एना जेनतां कि एना मीं राजो बनानेरे लेइ टलानो चातन, फिरी तै अकैल्लो पहाड़े पुड़ जेव।

14:22-33; 6:45-52

16 जैखन इलोझ भोइ, त तैसेरे चले समुन्दरेरे बन्ने जे। 17 ते किशती मां चढतां समुन्दरेरे पार कफरनहूम नगर जो चले, तैस वक्ते आंधरू भोरू थियूं, ते यीशु हेजू तगर तैन कां न थियूं ओरो। 18 ते बड़ी तेज हवा चलोरी थी ते समुन्दरे मां छेल्ली उठने लेइ। 19 जैखन तै लगभग टलाई च़ेवरे मील नेडे अव, त तैनेई यीशु समुन्दरे पुड़ चलतो लाव ते किशतरे नेडे एइतो लाव ते डरे। 20 पन यीशुए तैन सेइ ज़ोवं, “अवं आई डरा न।” 21 ते तै तैस किशती मां च़डनेरे लेइ तियार भोव, ते तैखने किशती तैस ठैरी पुड़ पुजी ज़ैड़ी तैना च़लोरे थिये। 22 दुइयोवं दिहाड़े तैस मैन्हु केरि भीड़ां जै समुन्दरेरे पार खड़ी थी, इन हेरतां कि एक्की किशतरे अलावा होरि कोई न थी, यीशु अपने चलन साथी तैस किशती पुड़ न च़ढोरो थियो, पन सिर्फ तैसेरे चले थिये। 23 (तैखन होरि किशती तिबिरियुस नगरेरां तैस ठैरी एई, ज़ैड़ी तैनेई प्रभुएरू शुक्र केरतां रोट्टी खोरी थी) 24 एल्हेरेलेइ ज़ैखन लोकेई हेरू कि इड़ी न यीशु ते न तैसेरे चले, ते तैना फिरी तैना निक्की-निक्की किशतन पुड़ च़ढतां यीशु तोपते कफरनहूम नगर ए पुजे। 25 समुन्दरेरे पार ज़ैखन तैना तैस मैल्ले त तैने ज़ोवं, “हे गुरू, तू इड़ी कताली अव?” 26 यीशुए तैन जुवाब दित्तो, “अवं तुसन सेइ सच्च-सच्च ज़ोताई, तुस मीं एल्हेरेलेइ न तोपथ कि तुसेई चमत्कार लाव, बल्के एल्हेरेलेइ कि रोट्टी खेइतां रज्जे।

27 नाश भोनेबैली रोट्टरे लेइ मेहनत न केरा। पन तैस रोट्टरे लेइ मेहनत केरा जै हमेशारी ज़िन्दगी देतीए, जै मैनेरू मट्टू यानी अवं तुसन देइलो, किजोकि बाजी परमेशरे मीं एन्चरां केरनेरो अधिकार दित्तोरोए।” 28 तैनेई तैस्से सेइं ज़ोवं, “परमेशरेरू कम केरनेरे लेइ अस कुन केरम?” 29 यीशुए तैन जुवाब दित्तो, “परमेशर तुसन करां एन कम चाते कि तुस तैस पुड़ यानी मीं पुड़ विश्वास केरा जैनी अवं भेजोरोई।” 30 तैखन तैनेई तैस सेइं ज़ोवं, “फिरी तू कुन निशान हीरातस कि अस तैस हेरतां तेरो विश्वास केरम? तू कोन ज़ेरू कम हीरातस? 31 इश्लो दादेई-पड़दादेई जंगले मां स्वर्गेरी रोट्टी खेइ, जैस जो मन्नो ज़ोतन। जेन्चरे पवित्रशास्त्रे मां लिखोरूए, तैनी तैन खानेरे लेइ स्वर्गेरां रोट्टी दित्ती।” 32 यीशुए तैन सेइं ज़ोवं, “अवं तुसन सेइं सच्च-सच्च ज़ोताई कि मूसा तुसन तै रोट्टी स्वर्गेरां न दित्ती, पन मेरो बाजी तुसन सच्चची रोट्टी स्वर्गेरां देते। 33 किजोकि जै रोट्टी परमेशर देते, ते तै ईए जै स्वर्गेरां एइतां दुनियारे लोकन ज़िन्दगी देतीए।” 34 तैखन तैनी तैस्से सेइं ज़ोवं, “हे प्रभु, ए रोट्टी असन स्वर्गेरां देतो री।”

35 यीशुए तैन सेइं ज़ोवं, “ज़िन्दगी रोट्टी (जै ज़िन्दगी देनेबाली रोट्टी) अवं आई, जै मीं कां एजते तै कधी निअन्नो न भोलो, ते जै मीं पुड़ विश्वास केरेलो तै कधी टलिशोरो न भोलो। 36 पन मीं तुसन सेइं पेइलू ज़ोरूए, कि तुसेई अवं लोरोई फिरी मीं पुड़ विश्वास न केरथ। 37 ज़ैन किछ बाजी मीं देते तैन सब किछ मीं कां एजनूए, ते जै कोई मीं कां एज्जेलो अवं तैस ज़रूर कबूल केरेलो। 38 किजोकि अवं अपनि मर्जी नई, बल्के परमेशरेरी मर्जी पूरी केरनेरे लेइ स्वर्गेरां ओरोई जैनी अवं भेजोरोई। 39 ईए मेरे बाजेरी मर्जी आए जैनी अवं भेजोरोई कि ज़ैन किछ तैनी मीं दित्तोरोए तैस मरां अवं किछ न हिरेई, पन आखरी दिहैडी फिरी तैस ज़ीतो केरेलो। 40 किजोकि मेरे बाजेरी मर्जी ईए कि जै कोई मट्टे हेरे ते तैस पुड़ विश्वास केरे, तैस हमेशारी ज़िन्दगी मैल्ले, ते अवं तैस आखरी दिहैडी फिरी ज़ीतो केरेलो।”

41 एल्हेरेलेइ यहूदी लोक तैस पुड़ कुड़कुड़ाने लगगे, किजोकि तैनी ज़ोरू थियुं, “जै रोट्टी स्वर्गेरां ओरिए तै अवं आई।” 42 ते तैनेई ज़ोवं, “कुन एन यूसुफेरू मट्टू यीशु नई, जेसेरे अम्मा बाजी अस जानतम? त ते केन्चरे ज़ोते कि अवं स्वर्गेरां ओरोई?” 43 यीशुए तैन जुवाब दित्तो, “एप्पू मामेइं न कुड़कुड़ाने। 44 कोई मीं कां न एज्जी बट्टे ज़ांतगर बाजी, जैनी अवं भेजोरोई, तैस मीं कां न आने, ते अवं तैस आखरी दिहैडी फिरी ज़ीतो केरेलो। 45 नेबी केरे पवित्रशास्त्रे मां एन लिखोरूए, तैना सब परमेशरेरे तरफां शिखोरे भोनेन। जैनी बाजी करां शुनोरूए त शिखोरूए तै मीं कां एइते। 46 एसेरो मतलब ई नई कि केन्चे बाजी लोरोए, पन जै परमेशरेरे तरफांए यानी मीं बाजी लोरोए। 47 अवं तुसन सेइं सच्च-सच्च ज़ोताई जै कोई विश्वास केरते हमेशारी ज़िन्दगी तैसेरीए। 48 ज़िन्दगी रोट्टी (ज़िन्दगी देनेबाली रोट्टी) अवं आई। 49 तुश्लो दादे-पड़दादेई जंगले मां मन्नो खाऊ ते मरे। 50 ई तै स्वर्गेरी रोट्टीए कि मैन्हु खान ते न मरन। 51 ज़िन्दगी रोट्टी जै स्वर्गेरां ओरिए अवं आई। अगर कोई इस रोट्टी मरां खाए, त हमेशा ज़ीतो रालो, ते ज़ैस रोट्टी सेइं दुनियारे लोकन हमेशारी ज़िन्दगी मैलचे, तैन मेरू मासे।”

52 एस पुड़ यहूदी लोक एप्पू मामेइं बेंस केरने लाए, “ई मैन्हु असन अपनू मास केन्चरे खाने जो देइ बटते?” 53 यीशुए तैन सेइं ज़ोवं, “अवं तुसन सेइं सच्च-सच्च ज़ोताई, कि ज़ांतगर तुस मैनेरे मट्टेरू यानी मेरू मास न खाले, ते मेरो खून न पीले, तुसन हमेशारी ज़िन्दगी न मैलेली। 54 जै मेरू मास खाते ते मेरो खून पीते हमेशारी ज़िन्दगी तैसेरीए ते आखरी दिहैडी अवं फिरी तैस ज़ीतो केरेलो। 55 किजोकि हकीकत मां मेरू मास खानेरी चीजे ते मेरो खून पीनेरी चीजे। 56 जै मेरू मास खाते ते खून पीते तै मीं मां बनोरो राते, ते अवं तैस मां। 57 जेन्चरे जीते बाजी अवं भेजोरोई, ते अवं बाजी केरे कारन ज़ोताई, तेन्चरे तै भी जै मीं खालो मेरे कारन ज़ीतो रालो। 58 जै रोट्टी स्वर्गेरां ओरिए, तैस रोट्टी जेरि नई जै तुश्लो दादे-पड़दादेई खाइ ते बादे मां मरे, पन जै कोई ई रोट्टी खालो तै हमेशा ज़ीतो रालो।” 59 इना गल्लां तैनी कफरनहूम नगरेरे एक्की प्रार्थना घरे मां ज़ोई।

???????? ???? ?

60 एल्हेरेलेइ तैसेरे चलन मरां बड़ेई एन शुन्तां ज़ोवं, “ए शिक्षा सकते, एस कौन मेन्नी बटते?” 61 यीशु अपने मने मां एना बुझतां कि मेरे चले एस गल्ली पुड़ एप्पू मामेइं कुड़कुड़ाने लोरेन, तैन पुच्छू, “कुन इना गल्लां तुसन मीं पुड़ विश्वास केरने करां रोकतिन?” 62 अगर तुस मैनेरू मट्टू यानी अवं जैडी पेइलो थियो उबरे (स्वर्गे) गातो लाएले, त कुन भोलू? 63 परमेशरेरी आत्मा त ज़िन्दगी देने बालीए, मैन्हु केरि ताकती सेइं किछ न केरोए, जैना गल्लां मीं तुसन सेइं ज़ोई तैना परमेशरेरी आत्मा तरफां आन ते तैना ज़िन्दगी भी आन। 64 पन तुसन मां किछ

एरे आन ज़ैना विश्वास न केरन । किजोकि यीशु पेइलो ज़ानतो थियो कि ज़ैना विश्वास न थी केरते तैना कौन आन, ते तैस कौन टलवालो । 65 ते तैनी ज़ोवं, “एल्हेरेलेइ मीं तुसन सेइं ज़ोरू थियूं, ज़ांतगर बाजी केरे तरफां एन वरदान न मैल्ले तांतगर कोई मीं कां न एज्जी बट्टे ।”

११११११११ ११११११११

66 एस पुड़ तैसेरे चलन मरां बड़े उलटे फिरे, ते तैल्ला पत्ती तैस साथी न चले । 67 तैखन यीशुए 12 चलन सेइं ज़ोवं, “कुन तुस भी चलू गानू चातथ?” 68 शमौन पतरस तैस जुवाब दित्तो, “हे प्रभु अस केस कां गाम? हमेशारी ज़िन्दगरी देने बैली गल्लां त तींए कां आन । 69 ते असेईं तीं पुड़ विश्वास कियो ते ज़ानू कि तू परमेशेरो पवित्तर मैन्हु आस ।” 70 यीशुए तैन जुवाब दित्तो, “कुन मीं तुस 12 न चुने । फिर भी तुसन मरां अक मैन्हु शैताने ।” 71 तैने इन तैस शमौन इस्करियोतेरे मट्टे यहूदा इस्करियोतेरे बारे मां ज़ोवं । हांलाकि तै तैन 12 चलन मरां अक थियो, ज़ै यीशु टलवाने बालो थियो ।

7

१११११ ११ १११११११ १११११

1 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थिये, एल्हेरेलेइ तै यहूदिया इलाके मां फिरनू न चातो थियो । 2 यहूदी केरू झोंफडी केरू तिहार* (तेम्बु) नेडू थियूं । 3 एल्हेरेलेइ तैसेरे ढलाएई तैस ज़ोवं, “इडी न रा । यहूदिया इलाके मां गा ज़ैडी तिहार मनाने लोरेन, कि ज़ैना चमत्कार तू केरतस तैना तेरे तैना चेले भी हेरन, ज़ैना यहूदिया इलाके मां रातन । 4 किजोकि एरो कोई न भोलो कि ज़ै मशूर भोनू चाए, ते छेपतां कम केरे । अगर तू कम केरतस, त अपनो आप हिरा ।” 5 किजोकि तैसेरे ढला भी तैसेरो विश्वास न थी केरते । 6 तैखन यीशुए तैन सेइं ज़ोवं, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ सकतथ । 7 इस दुनियारे लोक तुसन सेइं बैर न केरि सकन, पन मीं सेइं बैर रखतन किजोकि अवं तैन केरे खलाफ इन ज़ोताई कि तैना बुरां कम्मां केरतन । 8 तुस तिहारे मां गाथ, मीं हुना एस तिहारे मां नई एजनू, किजोकि मेरो हेजू ठीक वक्त नई ओरो ।” 9 ते तै तैन सेइं एना गल्लां केरतां गलीले मां राव ।

१११११११ १११११ ११११११११ ११११ १११११

10 पन ज़ैखन तैसेरे ढला तिहारे मां चले जे त तै बांदो न पन छेपतां जेव । 11 यहूदी लीडर तिहारे मां यीशु तोपने लाए । तैना लोकन पुच्छ्छी राओरे थिये, “तै मैन्हु कोडि आए?” 12 ते लोकन मां तैसेरे बारे मां बल्हे-बल्हे बेडि गल्लां भोइ, किछ ज़ोते थी, “तै रोडो मैनुए ।” ते किछ ज़ोते थी, “नई तै मैनु गुमरा केरते ।” 13 फिरी भी यहूदी लोकां केरे प्रधानां केरे डरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ ।

१११११११ ११११ १११११११११ ११११११११

14 ज़ैखन तिहारेरे अध्ये दिहाड़े बीते, त यीशु मन्देरेरे अंगने मां गेइतां शिक्षा देने लगो । 15 तैखन यहूदी लीडरेई हैरान भोइतां ज़ोवं, “एनी त पवित्तरशास्त्रेरी शिक्षा केन्ची करां नई पढोरीए, फिरी एस केन्चरे एना गल्लां एई?” 16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेशेरे तरफां आए, ज़ैने अवं भेजोरोई ।” 17 अगर कोई तैसेरी मेर्जी पुड़ चलनू चाए, त तै इस शिक्षारे बार मां ज़ानेलो कि ए परमेशेरे तरफांए या अवं अपने तरफां ज़ोताई । 18 ज़ै अपने तरफां किछ ज़ोते तै अपनि बड़याई चाते, पन ज़ै अपने भेजने बालेरी बड़याई चाते तै ईमानदार आए, ते तैस मां कोई बेइमानी नई । 19 तुसन मूसे कानून दित्तो, पन तुसन मरां कोई भी तैस पुड़ न चले! पन तुस लोक मीं मारनेरी कोशिश केरतथ ।” 20 लोकेई जुवाब दित्तो, “तीं पुड़ भूतेरो सैयोए! कौन तीं मारनेरी कोशिश केरते?” 21 यीशुए जुवाब दित्तो, “मीं अक चमत्कार कियो, ते तुस हैरान भोए । 22 एल्हेरेलेइ मूसा तुसन खतनेरो हुक्म दित्तो (एना नई कि मूसेरे तरफांए बल्के बाप दादां करां चलतो ओरोए) ते तुस आरामेरे दिहाड़े मैनेरो खतनो केरतथ । 23 एल्हेरेलेइ आरामेरे दिहाड़े मैनेरो खतनो कियो गाते ताके मूसेरे कानूनेरो हुक्म न टले, त तुस मीं पुड़

* 7:2 7:2 झोंफडी केरू तिहार: इन तिहार यहूदी लोकां केरे टलाई खास तिहारन मरां अक आए, ज़ैने यरूशलेम नगरे मां अठ दिहाड़न तगर मनाव गाते । बड़े दूरां लोक यरूशलेम नगरे मां एइतां अकोट्टे भोते थिये, तैना लोक निक्की-निक्की झोंफडी बनेइतां तैन मां रातन । तैस तिहारे मां तैना परमेशेरे याद केरतां खुशी मनाते थिये ।

किजो क्रोध केरतथ, कि मीं आरामेरे दिहाड़े अक मैन्हु रोड़ेचारे ठीक केरो। 24 तुतर हेरतां इन्साफ न केरा बल्के ठीक-ठीक आदालत केरा।”

“” “” “” “”

25 तैखन किछ् यरूशलेम नगरेरे रानेबाले एप्पू मांमेइं एक्की होरि पुच्छ्ने लगे, “कुन ए तै नई, जैस मारनेरी कोशिश च़लोरिए? 26 पन तक्का, तै त खुले आम गल्लां केरते, ते कोई एस किछ् न ज़ोए। कुन लीडरेई सच्च्चे, सच्च्च जानू कि ए मसीहे? 27 पन ए मैन्हु मसीह केन्च़रे भोइ सकते? एस त अस जानतम कि ए कोट्टां ओरोए, पन ज़ेइस मसीह एज्जेलो त कोई न ज़ानेलो कि तै कोट्टां एज्जेलो।” 28 तैखन यीशुए मन्दरे अंगने मां शिक्षा देते बारे ज़ोरे सेइं ज़ोवं, “तुस मीं जानतथ ते इन भी कि अवं कोट्टां ओरोई। अवं एप्पू नई ओरो, पन मेरो भेजने बालो सच्च्चोए, तैस तुस न ज़ानाथ। 29 पन अवं तैस ज़ानताई, किजोकि अवं तैसेरे तरफां ओरोई, ते तैनी अवं भेजोरोई।” 30 एस पुड़ लीडरेई तै ट्लानो चाव, फिरी भी केन्चे तैस सेइं हथ न लव, किजोकि तैसेरो मरनेरो वक्त हेजू न थियो ओरो। 31 फिरी भी भीड़ी मरां बड़े लोकेई तैस पुड़ विश्वास कियो, ते ज़ोने लाए, “मसीह जैखन एज्जेलो ते एट्टां जादे चमत्कार हिरालो ज़ैना एने हीराहे?”

“” “” “” “” “” “”

32 फरीसी लोकेई, लोक तैसेरे बारे मां बल्हे-बल्हे एना गल्लां केरते शुने, ते प्रधान याजकेई ते फरीसी लोकेई तैस ट्लानेरे लेइ मन्दरेरे पहरदार भेजे। 33 एस पुड़ यीशुए ज़ोवं, “अवं थोड़े च़िरे तगर हेजू तुसन साथी आई, फिरी अवं अपने भेजने बाले कां वापस गानोई। 34 तुस मीं तोप्पेले, पन अवं नई मैलनो, ते ज़ैड़ी अवं आई, तैड़ी तुस न एज्जी बटथ।” 35 एस पुड़ यहूदी लीडर एप्पू मांमेइं ज़ोने लगे, “ए कोरां च़लोरे, ज़ेरां अस न गेइ बटम? कुन ए तैन कां गालो ज़ैना यूनान नगरे मां तितर-बितर भोइतां रातन, ते यूनानेरे लोकन भी शिक्षा देलो?” 36 एस गल्लरो कुन मतलबे ज़ै एनी ज़ोई, कि तुस मीं तोप्पेले, पन अवं तुसन न मैलेलो, ते ज़ैड़ी अवं आई तैड़ी तुस न एज्जी बटतथ?

“” “” “” “” “” “” “” “”

37 तिहारेरे आखरी दिहाड़े, ज़ै खास दिहाड़ी भोतीए, तेइस यीशु खड़ो भोइतां ज़ोने लगे, “अगर कोई ट्लिशशोरो भोए त मीं कां एज्जे ते पीये। 38 ज़ै मीं पुड़ विश्वास केरे, ज़ेन्च़रे पवित्तरशास्त्रे मां लिखेरूए, तैसेरे दिले मरां तै पैनेरे दरिया निस्सेले ज़ैना ज़िन्दगी देतन।” 39 यीशुए एना गल्लां पवित्तर आत्मारे बारे मां ज़ोई, ज़ै विश्वास केरेने बालन पुड़ एजनेबाली थी, किजोकि पवित्तर आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए।

40 तैखन भीड़ी मरां किछ्ई एना गल्लां शुन्तां ज़ोवं, “सच्च्चे ई तै नबी आए, ज़ेसेरे एजनेरी अस उमीदी मां आम।” 41 किछ् लोकेई ज़ोवं, “ई मसीहे,” पन किछ्ई ज़ोवं, “कुन मसीह गलील इलाकेरां एज्नोए? 42 पवित्तरशास्त्र मां लिखेरू कि मसीह दाऊदेरे खानदाने ते बैतलहम इलव्वें मरां एज्जेलो, ज़ैड़ी दाऊद राज़ो रातो थियो।” 43 यीशुएरे बारे मां लोकां केरो अलग-अलग खियाल थियो, एल्हेरेलेइ तैन एप्पू मांमेइं अनबन भोइ। 44 किछ् तैन मरां तैस ट्लाने चाते थिये, पन केन्चे तैस सेइं हथ न लव।

“” “” “” “” “” “” “” “” “” “” “”

45 तैखन मन्दरेरे पहरदार, प्रधान याजकन ते फरीसन कां एइतां तैन सेइं ज़ोवं, “तुसेईं तै किजो न आनो?” 46 पहरदारेई जुवाब दित्तो, “केन्चे मैने कधी एत्त्री रोड़ो गल्लां न कियोरी, ज़ेरि गल्लां ए मैन्हु केरते।” 47 फरीसेई तैन जुवाब दित्तो, “कुन तुस भी टेपलोरेथ? 48 कुन सरदारन ते फरीसन मरां केन्चे तैस पुड़ विश्वास कियोरोए? 49 पन एन लोक ज़ैना मूसेरे कानूने न ज़ानन तैन पुड़ परमेशेरो फिटकार भोते।” 50 नीकुदेमुसे ज़ै पेइलो तैस कां राती ओरो थियो, ते तैना मरां अक थियो, तैनी ज़ोवं, 51 “कुन इश्शे कानून केन्ची मैन्हु सज़ा देनेरी अज़ाज़त देते, ज़ांतगर तैसेरी गल शुन्तां इन न ज़ानम कि तै कुन केरते?” 52 तैनेई तैस जुवाब दित्तो, “कुन तू भी गलील इलाकेरो आस! पवित्तरशास्त्रे मां तोप ते ज़ान, कि गलीलेरां कोई नबी त नई निसने बालो!” 53 (तैखन सब अपने-अपने घरे च़ले जे)।

1 पन यीशु अपने चलन सेइं साथी ज़ैतून पहाड़े पुड़ जेव । 2 होरसां तै झेझां-झेझां मन्दरेरे अंगने मां जेव, बड़े लोक तैस कां आए ते तै बिश्तां तैन शिक्षा देने लगो । 3 तैखन शास्त्री ते फरीसी लोक एक्की कुआन्शी ज़ै बदमैशी मां ट्लेइयोरी थी, तै मझाटे खड़ी केरतां यीशु सेइं ज़ोवं, 4 “हे गुरु, ई कुआन्श बदमाशी केरते वक्त ट्लोरीए । 5 मूसेरे कानूने मां मूसा असन हुक्म दित्तोरोए कि एरी जेरि कुआन्शी घोड़ेई बैइतां मारा, ते तू एस कुआन्शरे बारे मां कुन ज़ोतस, कि अस एस कुन केरम?” 6 तैनेई यीशु परखनेरे लेइ ए गल ज़ोई, ताके तैस पुड़ दोष लाने जो गल मैल्ले । पन यीशु उन्डे लिक्तां एंगलोई सेइं ज़मीनी पुड़ लिखने लव । 7 ज़ैखन तैना तैस पुछते राए, त तैनी उबरे तेक्तां तैन सेइं ज़ोवं, “तुसन मरां ज़ैनी पाप न भोए कियोरोए, तैए पेइलो घोड़े बाए ।” 8 ते फिरी उन्डे लिक्तां एंगलोई सेइं ज़मीनी पुड़ लिखने लव । 9 पन तैना एना शुन्तां बड्डन करां निकडन तगर सारे एक्की पत्ती अक तैट्टां चले जे, ते यीशु अकैल्लो राव, ते तै कुआन्श मझाटे खड़ी राई । 10 यीशुए उबरे तेक्तां तैस पुछ्छू, “हे कुआन्श, तैना कोरां जे? कुन केन्चे तीं पुड़ सज़ारो हुक्म न दित्तो?” 11 तैसां ज़ोवं, “हे प्रभु केन्चे नई ।” यीशुए ज़ोवं, “अवं भी तीं सज़ारो हुक्म न देई । अपने घरे जो गा ते फिरी पत्ती पापेरी न ज़िन्दगी ज़ीयां ।”

???? ???? ???? ??

12 यीशुए फिरी लोकन सेइं ज़ोवं, “दुनियारी लौ अक्के आई, ज़ै मीं पत्ती एज्जेलो त तै आंधरे मां न चलेलो, पन तै लौ हासिल केरेलो ज़ै ज़िन्दगरी देचे ।” 13 फरीसी लोकेई तैस सेइं ज़ोवं, “तू अपनि गवाही एप्पू देतस, तेरी गवाही सच्ची नई ।” 14 यीशुए तैन जुवाब दित्तो, “भला अवं अपनि गवाही एप्पू देताई फिरी भी मेरी गवाही सच्चीए, किजोकि अवं ज़ानताई कि अवं कोट्टां ओरोई ते कोरां गाताई? पन तुस न ज़ानाथ कि अवं कोट्टां ओरोई ते कोरां गाताई । 15 तुस इन्सानेरी सोचरे मुताबिक इन्साफ केरतथ, अवं केन्चेरी इन्साफ न केरि । 16 ते अगर अवं इन्साफ केरि भी त मेरो इन्साफ सच्चीए, किजोकि अवं अकैल्लो नई, पन अवं ते मेरो बाजीए, ज़ैनी अवं भेजोरोई । 17 मूसेरे कानूने मां भी लिखोरोए कि दूई ज़नां केरि गवाही मिलतां सच्ची भोतीए । 18 अक त अवं अपनि गवाही देताई, ते दुइयोवं गवाही मेरो बाजी देते ज़ैनी अवं भेजोरोई ।” 19 तैनेई तैस पुछ्छू, “तेरो बाजी कोडि आए?” यीशुए जुवाब दित्तो, “न तुस मीं ज़ानतथ न मेरे बाजी, अगर मीं ज़ानते त मेरे बाजी भी ज़ानते ।” 20 एना गल्लां तैनी मन्दरेरे अंगने मां शिक्षा देते भण्डार घरे मां ज़ोई, ते केन्चे तै न ट्लाव, किजोकि तैसेरो वक्त हेजू न थियो ओरो ।

???? ???? ???? ???? ???? ???? ???? ???? ??

21 यीशुए फिरी तैन सेइं ज़ोवं, “अवं ज़ानताई कि तुस मीं तोप्पेले ते पाप केरते-केरते मरेले, ज़ैडी अवं गाताई तैडी तुस न एज्जी बटथ ।” 22 एस पुड़ यहूदी लीडरेई ज़ोवं, “कुन एने अपनो आप मारनोए, ज़ैन ज़ोते कि ज़ैडी अवं गाताई तैडी तुस न एज्जी बटतथ?” 23 यीशुए तैन सेइं ज़ोवं, “तुस इस दुनियाई मां ज़मोरिथ, अवं स्वर्गोरां ओरोई । तुस दुनियारेथ, अवं दुनियारो नई । 24 एल्हेरेलेइ मीं तुसन सेइं ज़ोरू थियूं, कि तुस अपने पापन मां मरेले, किजोकि अगर तुस विश्वास न केरेले कि अवं तैए आई त अपने पापन मां मरेले ।” 25 यहूदी लीडरेई तैस सेइं ज़ोवं, “तू कौन आस?” यीशुए तैन सेइं ज़ोवं, “ज़ैन शुरू करां ज़ोतो ओरोई, अवं तैए आई । 26 तुशशे बारे मां मीं बडू किछ ज़ोनूए ते फैसलो केरनोए, पन मेरो भेजने बालो सच्चीए, ते ज़ैन मीं तैस करां शुनोरूए तैन दुनियारे लोकन सेइं ज़ोताई ।” 27 तैनेई एन न समझू कि असन सेइं बाजी केरे बारे मां कुन ज़ोने लोरोए । 28 तैखन यीशुए ज़ोवं, “ज़ैखन तुस मैनेरे मट्टे यानी मीं उच्चे पुड़ चाढ़ेले, त ज़ानेले कि अवं तैए आई, अवं अपने आपे सेइं किछ न केरि, ज़ेन्चरे मेरो बाजी मीं शिखालते तेन्चरे तैना गल्लां केरताई । 29 मेरो भेजने बालो मीं साथीए, तैनी अवं अकैल्लो नई शारोरो किजोकि अवं हमेशा तैन कम केरताई ज़ैस सेइं तै खुश भोते ।” 30 बड़े लोकेई यीशुएरी तैना गल्लां शुन्ते वक्त ज़ैना तै ज़ोई राओरो थियो तैस पुड़ विश्वास कियो ।

??? ???? ???? ???? ???? ??

31 तैखन यीशुए तैन यहूदन सेइं ज़ैनेई तैस पुड़ विश्वास कियोरो थियो ज़ोवं, “अगर तुस मेरे वचने मां बनेरे राले, त सच्चे मेरे चेले भोले । 32 तुस सच्च ज़ानेले ते सच्च तुसन आज़ाद केरेलू ।” 33 तैनेई तैस जुवाब दित्तो, “अस त अब्राहमेरे औलादी मरां आम, ते कधी केन्चेरे गुलाम नई भोरे, फिरी तू केन्चरे ज़ोतस कि तुस आज़ाद भोले?” 34 यीशुए तैन जुवाब दित्तो, “अवं तुसन सेइं सच्च-सच्च ज़ोताई कि ज़ै कोई पाप केरते तै पापेरो गुलामे । 35 गुलाम हमेशा घरे न रेइ सके, मट्टू हमेशा रहते । 36 एल्हेरेलेइ अगर मट्टू तुसन आज़ाद केरे त सच्चे तुस आज़ाद भोले । 37 अवं ज़ानताई कि तुसा अब्राहमेरे औलादी मरां आथ, फिरी भी मेरी शिक्षा तुस मन्नथ, एल्हेरेलेइ तुस मीं

मारने चातथ। 38 अवं तैन्ने ज़ोताई ज़ैन मीं लव, ज़ैखन अवं अपने बाजी सेइं साथी थियो, ते तुस तैन्ने केरतथ ज़ैन तुसेईं अपने बाजी केरां शुनोरूए।”

39 तैनेईं तैस जुवाब दित्तो, “इश्शो पूर्वज त अब्राहमे।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरेथ। 40 पन हुन्ना तुस मीं मारनो चातथ, किजोकि मीं तुसन तैना सच्चि गल्लां ज़ोईं ज़ैना मीं परमेशेरे करां शुनी, एरू त अब्राहमे न थियू कियोरू। 41 तुस अपने बाजेरां ज़ेरां कम्मां केरतथ।” तैनेईं तैस सेइं ज़ोवं, “अस बदमैशो सेइं नईं ज़मारे, इश्शो अक्के बाजीए, ते तै परमेशेरे।” 42 यीशुए तैन सेइं ज़ोवं, “अगर परमेशेर तुश्शो बाजी भोथो, त तुस मीं सेइं प्यार केरेथ, किजोकि अवं परमेशेरे करां ओरोईं, अवं अपने तरफां नईं ओरो, बल्के तैनी भेजोरोईं। 43 तुस मेरी गल्लां किजो न समझथ? एल्हेरेलेइ कि तुस मेरी शिक्षा मन्नी न चाथ। 44 तुस अपने बाजी शैतानेरेथ, ते तैसेरी मर्जी पूरी केरनि चातथ। तै त शुरु करां खूनी आए ते सच्चि पुड़ बनोरो न राव, किजोकि सच्च तैस मां अथ्थी नईं। ज़ैखन तै झूठ ज़ोते त अपने सुभावेरे मुताबिक ज़ोते, किजोकि तै झूठो बल्के झूठेरो बाजीए। 45 पन अवं सच्च ज़ोताई तांए तुस मेरो विश्वास न केरथ। 46 तुसन मां मीं कौन पापेरो दोष लाते? अगर अवं सच्च ज़ोताई त फिरी मेरो विश्वास की न केरथ? 47 ज़ै परमेशेरे तरफां भोते तै परमेशेरेरी गल्लां केरते, ते तुस एल्हेरेलेइ न शुनथ किजोकि तुस परमेशेरे तरफां नईं।”

????? ?? ?????????

48 एना शुन्तां यहूदेईं तैस सेइं ज़ोवं, “कुन अस ठीक न थिये ज़ोते, कि तू सामरी मैन्हु आस, ते तीं मां भूते!” 49 यीशुए जुवाब दित्तो, “मीं मां भूत नईं, पन अवं अपने बाजेरी इज्जत केरताई, ते तुस मेरी निरादर केरतथ। 50 पन अवं अपनि बड़याई न चैई, हाँ अक्के ज़ै चाते कि लोक मेरी बड़याई केरन, ते तै आदालत केरनेबालो भी आए। 51 अवं तुसन सेइं सच्च-सच्च ज़ोताई कि ज़ै कोई मैन्हु मेरे वचने पुड़ चले तै कधे न मरेलो।” 52 यहूदेईं तैस सेइं ज़ोवं, “हुनी त असेईं बुझू, कि तीं मां भूते, अब्राहम ते नबी भी मरे, ते तू ज़ोतस, अगर कोई मेरे वचने पुड़ चले त तै कधी न मरेलो। 53 इश्शो पूर्वज अब्राहम मरो, कुन तू तैस करां भी बड़डो आस? ते नबी भी मरे, तू अपने बारे मां कुन सोचतस कि तू कौन आस?” 54 यीशुए जुवाब दित्तो, “अगर अवं अपनि बड़याई केरि त मेरी बड़याई किछ भी नईं। पन मेरी बड़याई केरनेबालो मेरो बाजीए, ज़ैस तुस ज़ोतथ कि तै तुश्शो परमेशेरे। 55 तुसेईं त तै न ज़ानो, पन अवं तैस ज़ानताई, अगर अवं ज़ोईं कि तैस न ज़ैनी, त तुश्शो ज़ेरो झूठो भोइ। पन अवं तैस ज़ानताई ते तैसेरे वचने पुड़ चलताई। 56 तुश्शो पूर्वज अब्राहम मेरी दिहाड़ी हेरनेरे उमीदी पुड़ बड़ी खुश थियो, ते तैनी हेरी, ते खुश भोव।” 57 यहूदेईं तैस्से सेइं ज़ोवं, “हेजू तू 50 साला केरो भी नईं भोरो फिरी भी तीं अब्राहम लोरोए?” 58 यीशुए तैन सेइं ज़ोवं, “अवं तुसन सेइं सच्च-सच्च ज़ोताई कि अब्राहम पैदा भोने करां पेइलो, अवं आई।” 59 तैखन तैनेईं तैस मारनेरे लेइ घोड़ सल्ले, पन यीशु छेपतां मन्देरे मरां निस्सी जेव।

9

????????? ?????? ?? ??????

1 फिरी यीशुए अपने चलन सेइं साथी चलोरो थियो, ते तैनेईं अक मैन्हु लाव, ज़ै ज़र्मनेरो कानो थियो। 2 तैसेरे चलेईं तैस पुच्छू, “हे गुरु, केने पाप कियो कि ए कानो ज़रमो, एने मैने या एसेरे अम्मा बाजे?” 3 यीशुए जुवाब दित्तो, “न एने पाप कियो, न एसेरे अम्मा-बाजेईं, पन तै एल्हेरेलेइ कानो ज़रमो ताके परमेशेरेरे चमत्कार एसमां लेईहोन। 4 ज़ैने अवं भेजोरोईं, असेईं तैसेरू कम लूशी केरनू ज़रूरीए, ज़ैन कम तैनी असन दित्तोरूए, तै रात एजने बालीए ज़ैस मां कोई भी कम न केरि सके। 5 ज़ांतगर अवं दुनियाईं मां आई, अवं दुनियारी लौ आई।” 6 एन ज़ोइतां तैनी ज़मीनी पुड़ थुकू, ते तैस थुके सेइं मिच्ची सन्नी, ते तै मिच्ची कानेरे एच्छून्न पुड़ लाई। 7 ते तैस सेइं ज़ोवं, “गा शीलोह नंवेरे हावदे मां अपनू तुत्तर धो” (शीलोहेरे मतलब भेजरो) तैनी गेइतां धोवं, ते लांतो वापस अव। 8 तैखन तैस मैनेरे पड़ोसेईं त ज़ैनेईं तै भीख मगतो लावरो थियो, एक्की होरि सेइं ज़ोने लगगे, “कुन ई तैए मैन्हु नईं ज़ै पेइलो बिश्तां भीख मगतो थियो?” 9 किछ मैन्हु ज़ोने लाए, “ई तैए,” होरेईं ज़ोवं, “नईं तैसेरो ज़ेरो कोई होरो भोनोए,” तैनी ज़ोवं, “अवं तैए आई।” 10 तैखन तैना तैस पुच्छूने लगगे, “तेरी एच्छून्न केन्चरां लौ आई?” 11 तैनी जुवाब दित्तो, “यीशु नंवेरे एक्की मैने मिच्ची सन्नी, ते मेरी एच्छून्न पुड़ लेइतां मीं सेइं ज़ोवं, गा शीलोह

हावदे मां गोइतां अपनू तुत्तर धो, ते अवं जेव ते मीं तुत्तर धोवं, ते लाने लाव ।” 12 तैनेई तैस पुच्छ, “तै मैन्हु कोडि आए?” तैनी ज़ोवं, “मीं नई पतो ।”

13 लोकेई तै ज़ै पेइलो कानो थियो फरीसी लोकन कां नेव । 14 ज़ैस दिहाड़े यीशुए मित्ती सैनतां तैसेरी एच्छी लौ दित्तो थी, तै आरामेरी दिहाड़ी थी । 15 फिरी फरीसी लोकेई भी तैस पुच्छ, “तैसेरी एच्छन लौ केन्चरे आई?” तैनी तैन सेइं ज़ोवं, “तैनी मेरी एच्छन पुड़ मित्ती लाई, फिरी मीं तुत्तर धोवं, ते अवं हुनी लाताई ।” 16 एस पुड़ किछ फरीसी लोक ज़ोने लगे, “ए मैन्हु परमेशेरे तरफां नई, किजोकि ए आरामेरी दिहाड़ी न मन्ने ।” होरेई ज़ोवं, “एरो ज़ेरो पापी मैन्हु एरे चमत्कार केन्चरे हिरेई बटते?” ते तैन एप्पू मांमेइं अनबन भोइ । 17 तैनेई काने फिरी पुच्छ, “ज़ैने तेरी एच्छी खोलोरेन, तू तैसेरे बारे मां कुन ज़ोतस?” तैनी ज़ोवं, “तै नबी आए ।”

18 पन यहूदी लीडरन विश्वास न भोव, कि तै कानो थियो ते हुनी लाते, ज़ांतगर तैनेई, तैसेरे अम्मा-बाजी न कुजाए । 19 तैन पुच्छ, कुन एन तुश्शू मट्टूए, “ज़ैस तुस ज़ोतथ कि कानो ज़र्मोरू थियूं? फिरी हुना केन्चरां लाते?” 20 तैसेरे अम्मा बाजीए जुवाब दित्तो, “असां त ज़ानतम कि एन इश्शू मट्टूए, ते कानो ज़र्मोरू थियूं । 21 पन अस इन न ज़ानतम कि अज़ केन्चरे लाते, ते न इन ज़ानतम कि केने एसेरी एच्छन लौ दित्ती, एन हुनी बड्डूए एस पुच्छा, ए अपने बारे मां एप्पू ज़ोलो ।” 22 एना गल्लां तैसेरे अम्मा बाजे एल्हेरेलेइ ज़ोई तैना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई ज़ोए, कि ए मसीहे त तै प्रार्थना घरे मरां कडडो गाए । 23 एल्हेरेलेइ तैसेरे अम्मा बाजे ज़ोवं, “एन बड्डूए, एस्से पुच्छा ।”

24 तैखन तैस मैन्हु ज़ै कानो थियो, दुइयोवं बार कुजेइतां ज़ोवं, “सत्र ज़ोइतां परमेशेरी बड्याई केर, अस ज़ानतम तै मैन्हु पापीए ।” 25 तैनी जुवाब दित्तो, “अवं न ज़ैनी कि ए पापी कि नई, अवं अक गल ज़ानताई, कि अवं कानो थियो हुनी लाताई ।” 26 तैनेई तैस पुच्छ, “तैने तीं सेइं कुन कियूं? तैनी केन्चरे तेरी एच्छन लौ दित्ती?” 27 तैनी तैन सेइं ज़ोवं, “मीं त तुसन सेइं ज़ोवरूए, ते तुसेईं न शुनू, हुनी दुइयोवं बार किजो शुनू चातथ? कुन तुस भी तैसेरे चले बन्ने चातथ?” 28 तैखन तैना तैस बुरू भलू ज़ोने लाए, “तूए तैसेरो चेलोस, अस त मूसेरे चलेम ।” 29 अस ज़ानतम परमेशेरे मूसा सेइं गल्लां की, पन एस न ज़ानम कि ए कोट्टां ओरोए । 30 तैनी तैन जुवाब दित्तो, “ए त बडी बडडी गल्ले कि तुस न ज़ानाथ कि ए कोट्टां ओरोए, फिरी भी तैनी मेरी एच्छन लौ दित्ती । 31 अस ज़ानतम की परमेशर पापी केरि न शुने, पन कोई परमेशेरो भक्त भोए त तैसेरे मेर्जी पुड़ चलतो भोए, त परमेशर तै तैसेरी शुनते । 32 दुनिया रचनेरे वक्ते करां कथे शुन्ने मां नई ओरोए कि केन्चे ज़र्मनेरे कानेरी एच्छन लौ दित्तोरी, 33 अगर ए मैन्हु परमेशेरे तरफां न भोथो त किछ न केरि सकेथो ।” 34 तैनेई तैस ज़ोवं, “तू त बिलकुल पापन मां ज़र्मोरुस, तू असन शिखालतस?” ते तैनेई तै प्रार्थना घरे मरां बेइरोवं कडडो ।

??????

35 यीशुए शुनू कि तै बेइरोवं कडडोरोए, ते ज़ैखन तैसेरी तैस सेइं मुलाकात भोइ, त तैस सेइं ज़ोवं, “कुन तू मैनेरे मट्टे पुड़ विश्वास केरतस?” 36 तैनी तैस जुवाब दित्तो, “हे प्रभु, मीं सेइं ज़ो कि तै कौने, ताके अवं तैस पुड़ विश्वास केरि?” 37 यीशुए तैस सेइं ज़ोवं, “अव्वें आई, तीं अवं पेइलो लोरोई, ज़ै तीं सेइं गल्लां केरि राओरोए ।” 38 तैनी ज़ोवं, “हे प्रभु, अवं तीं पुड़ विश्वास केरताई ।” ते तैस कां मथ्यो टेको । 39 तैखन यीशुए ज़ोवं, “अवं इस दुनियाई मां ई इन्साफ केरने ओरोई, ज़ैना न लान तैना लान, ते ज़ैना लातन तैना काने भोन ।” 40 ज़ैना फरीसी लोक तैस सेइं साथी थिये तैनेई ज़ोवं, “कुन तू असन जो भी काने ज़ोतस?” 41 यीशुए तैन सेइं ज़ोवं, “अगर तुस काने भोथे त पापी न भोथे, पन हुनी ज़ोतथ कि अस लातम, एल्हेरेलेइ तुश्शे पाप माफ़ न भोले ।”

10

??????

1 “अवं तुसन सेइं सत्र-सत्र ज़ोताई, कि ज़ै कोई दारेरे बत्तां बाड़े मां न गाए, पन होरि बत्तां गाते, तै चोर ते डैकूए । 2 पन भैड्डां केरो पुहाल दारेरे बत्तां गाते । 3 तैसेरेलेइ दरबान दार खोलते, ते भैड्डां तैसेरी गल पिशैनतिन, ते तै अपनि भैड्डन नव्वे सेइं कुजाते ते बेइर नेते । 4 ते ज़ैखन तै अपनि सैरी भैड्डां बेइर कढते, त तैन केरे अग्री-अग्री चलते, ते भैड्डां तैस पत्ती-पत्ती गैतिन, किजोकि तैना तैसेरी आवाज़ पिशैनचन । 5 तैना बखले पत्ती न गैली, पन

तैस करां नशशेली, किजोकि तैना बखलेरी आवाज न पिशानन ।” 6 यीशुए तैन सेइ मिसाल देइतां ज़ोवं, पन तैनेई न समझू कि एसेरी गल्लां केरो कुन मतलबे, ज़ैना तै असन सेइ ज़ोते ।

7 तैखन यीशुए तैन सेइ फिरी ज़ोवं, “अवं तुसन सेइ सच-सच ज़ोताई, भैड्डां केरू दार अक्वे आई । 8 ज़ेतरे मीं करां पेइले आए सब चोर ते डैकून, पन मेरी भैड्डेई तैन केरि न शुनी । 9 दार अवं आई, अगर कोई मेरे ज़िरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खूराक पालो । 10 चोर होरि कोन्ची कम्मेरे लेइ न एज्जे, बल्के चोरी केरने ते मारने ते नाश केरने एइते, अवं एल्हेरेलेइ ओरोई कि तैन भरपूर ज़िन्दगी जीन । 11 रोडो पुहाल अक्वे आई, रोडो पुहाल भैड्डां केरे लेइ अपनि जान देते । 12 ज़ैखन नौकर गिद एइतू लाते त तै भैड्डां शैरतां नेशशी गालो । किजोकि तै तैन केरो न पुहाले न मालिके, ते गिद तैन पुइ हमलो केरतां तितर-बितर केरते । 13 तै एल्हेरेलेइ नशते कि तै नौकर आए, ते तैस भैड्डां केरि फिकर नई । 14 रोडो पुहाल अवं आई, अवं अपनि भैड्डां पिशानताई, ते मेरी भैड्डां मीं पिशैनचन । 15 ज़ेन्चरे बाजी मीं ज़ानाते, तेन्चरे अवं भी तैस ज़ानताई, ते अवं भैड्डां केरे लेइ अपनि जान देताई । 16 ते मेरी होरि भी भैड्डन, ज़ैना इस बाड़े मां नई, मीं तैना भी ऐनिन ज़रूरिन, तैना मेरी आवाज पिशैनेली, फिरी अक्के डेरो ते अक्के पुहाल भोनोए । 17 अवं अपनि जान देताई, एल्हेरेलेइ बाजी मीं सेइ प्यार केरते, कि अवं फिरी ज़ींतो भोई । 18 कोई मेरी ज़िन्दगी मीं करां न थसोड़े, बल्के अवं एप्पू देताई, मीं तैस देनेरू भी अधिकारे ते नेनेरो भी अधिकारे, ई हुक्म मीं मेरे बाजी करां मैलोरोए ।” 19 एल्लां पत्ती, यहूदन मां फिरी अनबन भोइ । 20 तैन मरां बड़े ज़ोने लाए, “तैस मां भूते, ते तै पागले, तैसेरी किजो शुनातथ?” 21 होरे लोकेई ज़ोवं, “एना गल्लां एरे मैनेरी नई ज़ैस मां भूत भोए, कुन भूत कांना केरि एच्छूछी खोल्ली बटते?”

????? ????? ???????????

22 यरूशलेम नगरे मां तिहार भोवं, ते हीवतडेरो मौसम थियो । 23 यीशु सुलैमानेरे मन्दरेरे अंगने मां हंठने फिरने लगगोरो थियो । 24 तैखन यहूदेई तै घेरो ते पुच्छू, “तू केइस तगर इशे दिले डामाडोल केरतस? असन सेइ साफ-साफ ज़ो । कुन तू मसीह आस?” 25 यीशुए तैन जुवाब दित्तो, “मीं तुसन सेइ ज़ोवं पन तुस विश्वास न केरथ । ज़ैना कम्मां अवं अपने बाजी केरे अधिकारे सेइ केरताई तैना मेरे गवाह आन । 26 पन तुस एल्हेरेलेइ विश्वास न केरथ कि मेरी भैड्डन मरां नई । 27 मेरी भैड्डां मेरी आवाज पिशैनचन, अवं तैन ज़ानताई, ते तैना मीं पत्ती-पत्ती चेलचन । 28 ते अवं तैन हमेशारी ज़िन्दगी देताई, तैना कधी नाश न भोले, ते कोई तैन मेरे हथ्थे मरां न थसोड़ी सके । 29 मेरो बाजी, ज़ैनी तैना मीं दित्तोरिन, सेब्बन करां महान आए, ते कोई तैन बाजी केरे हथ्थे मरां न नेइ बटे । 30 अवं त बाजी अक्के आम ।”

31 दुबारां फिरी, यहूदेई तैस घोडेव देनेरे लेइ फिरी घोड़ सल्ले । 32 एस पुइ यीशुए तैन सेइ ज़ोवं, “मीं अपने बाजी केरे तरफां बड़ां रोड़ां कम्मां हिरां, तैन मरां कोस कम्मेरे लेइ घोडेव देतथ?” 33 यहूदेई तैस जुवाब दित्तो, “रोड़ां कम्मां केरे लेइ अस तीं पुइ घोडेव नई केरने लेवरे, पन परमेशेरी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर बनातस ।” 34 यीशुए तैन जुवाब दित्तो, “मूसेरे कानूने मां एन लिखोरू कि परमेशेरे अपने लोकां केरे लीडरन सेइ ज़ोवं कि तैना ईश्वरन । 35 (तुसन पत्तोए पवित्रशास्त्रेरी गल कोई भी बेदली न बटे) अगर परमेशेरे तैन लोकन जो ईश्वर ज़ोवं ज़ैन कां परमेशेरेरू वचन पुज्जू, 36 फिरी तुस किजो ज़ोतथ कि तू तुहीन केरतस, ज़ैखन अवं ज़ोताई कि अवं परमेशेरेरू मट्टू आई? बाजी परमेशेरे अवं पवित्र ठहरेइतां दुनियाई मां भेजो । 37 अगर अवं अपने बाजेरू कम न केरि, त मेरो विश्वास न केरा । 38 पन अगर अवं अपने बाजेरू कम केरताई, त चाए तुस मेरो विश्वास न भी केरा, पन तैन कम्मन पुइ विश्वास केरा । तैखन तुस बुज्जले ते समझेले कि बाजी मीं मां आए, ते अवं बाजी मां आई । 39 तैनेई फिरी तैस ट्लानेरी कोशिश की, पन तै तैन करां चलो जेव ।”

40 फिरी यीशु यरदन दरियारे पार तैस ठैरी जेव, ज़ैडी यूहन्ना पेइले बपतिस्मो देतो थियो, ते तैड़ी राव । 41 बड़े लोक तैस कां एइतां ज़ोते थिये, “यूहन्ना त कोई चमत्कारी निशान न हिराव, पन ज़ैन किछू यूहन्ना एसेरे बारे मां ज़ोवं, तैन सब सच थियूं ।” 42 ते तैड़ी बड़ेई यीशु पुइ विश्वास कियो ।

1 मरियम ते तैसेरी बेइन माथरि इलव्वे बैतनिय्याह मां लाज़र नव्वेरो अक मैन्हु थियो 2 ई तैए मरियम थी जैसां बादे मां प्रभु पुड़ इतर छेडतां अपने बालन सेइं तैसेरे पाव पूछोरे थी, एसेरो ढला लाज़र बिमार थियो। 3 तैखन तैसेरी बेइने यीशु कां अक बिस्तार भेजो, “हे प्रभु, जैस सेइं तू प्यार केरतस तै बिमारे।” 4 जैखन यीशुए एन शुनू त जोवं, “ए बिमारी मरनेरे लेइ नई बल्के परमेशेरी महिमारे लेइ आए, ताके तैसेरे जिरिये परमेशेरे मट्टेरी महिमा भोए।”

5 यीशु मार्था ते तैसेरी बेइन मरियम ते लाज़रे सेइं प्यार केरतो थियूं। 6 जैखन यीशुए शुनू कि, लाज़र बिमारे, पन फिर भी दूई दिहाडे तैड़ी बिशुओ जैड़ी तै थियो। 7 दूई दिहैइना बाद यीशुए अपने चेलन सेइं जोवं, “एज्जा, अस फिरी यहूदिया इलाके मां गाम।” 8 चले जोने लगे, “हे गुरू, थोडे चिर पइले यहूदी लीडर तीं घोडेईं बाते थिये, ते तू फिरी तैड़ी गानू चातस?” 9 यीशुए जुवाब दित्तो, “कुन दिहैड़ी मां 12 घंटे न भोन? जै दीसां चलते तैस ठोकर न लगे, एल्हेरेलेइ कि तै दुनियारी लोईं मां चेलि सकते। 10 पन अगर तै राती चलते त आंधरे मां तैस ठोकर लगचे, किजोकि तैस कां लौ नई।” 11 तैनी एना गल्लां जोई, ते अपने चेलन सेइं जोने लगे, “इशुओ दोस्त लाज़र झुलोरोए पन अवं तैस बीझाने चलोरोई।” 12 तैसेरे चले जोने लगे, “हे प्रभु अगर तै झुलोरोए त तै बीझेलो।” 13 यीशुए लाज़रेरे मरनेरे बारे मां जोरू थियूं, पन तैसेरे चलेईं बुझू कि तैसेरो मतलब निडलारे बारे मां झुलोरोए, पन अवं तैस बीझाने चलोरोई। 14 तैखन यीशुए रोडेचारे जोवं, “लाज़र मेरि जेवरोए। 15 अवं खुश आई कि तुशुओ लेइ फैइदोए, कि अवं तैड़ी न थियो जैस सेइं विश्वास केरथ। हुनी एज्जा अस तैड़ी गाम।” 16 तैखन थोमा जैस जो दिदुमुस जोतन, होरि चेलन सेइं जोने लगे, “एज्जा, अस भी तैस सेइं साथी मरनेरे लेइ गाम।”

???? ???? ? ? ???? ? ?

17 जैखन यीशुए बैतनिय्याह इलव्वे मां पुज्जो त तैस पतो लगे, कि लाज़र दब्बोरे चेवरे दिहाडे भोरेन 18 बैतनिय्याह यरूशलेम नगरेरां कोई टलाई किलोमीटर दूर थियूं। 19 बडे यहूदी लोक मार्था ते मरियमी कां तैन केरे ढला लाज़रेरे मरनेरां पत्ती तैना तसल्ली देने ओरे थियो। 20 जैखन मार्था शुनू कि यीशु ओरोए तै तैस सेइं मिलनेरे लेइ बेइर निस्सी, पन मरियम बेइर न निस्सी। 21 मार्था यीशुए सेइं जोने लगी, “हे प्रभु, अगर तू इड़ी भोथो त मेरो ढला न थियो मरनो। 22 पन अवं जानती, हुनी जैन किछ तू परमेशे करां मगेलो, ते परमेशर तीं देलो।” 23 यीशुए तैस जोवं, “तेरो ढला जींतो भोइ गानोए।” 24 मार्था तैस सेइं जोवं, “अवं जानती तै आदालतरे दिहाडे जेइस सारे लोक जीते भोनेन, तेइस तै भी जींतो भोइ गानोए।” 25 यीशुए तैस जोवं, “मैनन् मुडदन मरां जीते केरनेबालो अव्वे आई। जै मीं पुड़ विश्वास केरते तै मरनेरां बाद भी जींतो रालो। 26 ते जै कोई जींतोए, ते मीं पुड़ विश्वास केरते, तै कधे न मरेलो, कुन तू इस पुड़ विश्वास केरचस?” 27 मार्था जुवाब दित्तो, “हाँ प्रभु, मेरो विश्वास तीं पुड़े, कि तू परमेशेरू मट्टू मसीह जैन दुनियाई मां एजनेबालू थियूं।”

???? ???? ???? ? ?

28 जैखन तैसां ए गल जोई त तै वापस चली जेई, ते अपनि बेइन मरियम कनारे कुजेइतां जोने लगी, “गुरू जी ओरेन ते तीं कुजाने लगोरेन।” 29 तै एन शुन्तां लूशी उट्टतां यीशु सेइं मिलने चली आई। 30 यीशु हेजू इलव्वे मां न थियो पुजोरो, पन तै तैड़ी थियो जैड़ी मार्था तैस सेइं मिलोरी थी। 31 तैखन तैना यहूदी लोक जैना मरियमी तस्सली देने ओरे थिये मरियम लूशी खड़ी उट्टतां बेइर जेई, त तैना भी तैस पत्ती बेइर जे, कि भोइ सकते ए लेरां देने कबरी पुड़ चलोरिए। 32 जैखन मरियम तैस ठारी पुज्जी जैड़ी यीशु थियो त तैस लेइतां तै तैसेरे पवन पुड़ बिछड़ी जेई ते जोने लगी, “हे प्रभु अगर तू इड़ी भोथो त मेरो ढला न थियो मरनो।” 33 जैखन यीशुए तै ते तैस सेइं साथी एजनेबाले यहूदी लोक लेरां देते लाए, तै आत्माई मां उदास भोइतां बड़ो दुःखी भोव। 34 ते पुच्छू, “तुसेईं लाज़र कोडि रखवोरोए?” तैना जोने लगे, “हे प्रभु, असन सेइं साथी एइते एप्पू हेर।” 35 यीशु लेरां देने लगे। 36 तैखन यहूदी लोक जोने लगे, “हेरा, ए लाज़रे सेइं केतरो प्यार केरतो थियो।” 37 पन तैन मरां किछ जोने लगे, “कुन जैनी कानेरी एछ्छन लौ दित्ती, इन भी न केरि बट्टू, कि ए मैन्हु न मरेथो?”

???? ???? ???? ? ?

38 यीशु दुखी दिले सेइं कबरी कां अव, तै अक कुढ थी, जैस पुड़ अक घोड़ छडोरो थियो। 39 यीशु जोने लगे, “घोड़ खडो केरा।” मार्था जै लाज़री बेइन थी तै जोने लगी, “हे प्रभु एस मरां त मुशक लोरोए एजने, किजोकि

एस च़ेवरे दिहाड़े मर्रे भोरेन ।” 40 यीशुए तैस सेइं ज़ोवं, किजोकि, “मीं तुसन न थियूं ज़ोरू कि अगर तेरो विश्वास भोलो, त तू परमेशेरी महिमा हरेली ।” 41 तैखन तैनेईं तै घोड़ घिसाव, ते यीशुए उबरे तेकतां ज़ोने लगो, “हे बाजी, अवं तेरू शुक्र केरतां कि तीं मेरी शुनी । 42 अवं ज़ानतो थियो, कि तू मेरी प्रार्थना शुन्तस पन अवं एन लोकां केरे लेइ ज़ैना च़ेवरे पासन खेडोरेन एन ज़ोरू थियूं कि एना भी विश्वास केरन, कि तीं अवं भेजोरोईं ।” 43 एन ज़ोनेरां पत्ती यीशुए ज़ोरे सेइं ज़ोवं, “लाज़र बेइर निस!” 44 ते तै मुओरो लाज़र बेइर निस्सो ज़ेसेरे हथ पाव कफने सेइं बंधोरे थिये ते दोगगे अक कपड़ो बंधोरो थियो । यीशुए तैन सेइं ज़ोवं, “एस खोल्ला ते एस गाने देथ ।”

ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂⓂ 26:1-5; ⓂⓂⓂⓂⓂⓂ 14:1-2; ⓂⓂⓂⓂⓂⓂ 22:1-2)

45 बड़े यहूदी लोक ज़ैना मरियम सेइं मिलने ओरे थिये । ते तैसेरां इन्ना कम्मां हेरतां तैस पुड़ विश्वास कियो । 46 पन तैन मरां किछेईं फरीसन कां गेइतां सब शुनावं ज़ैना यीशुए कियेरू थियूं । 47 एस पुड़ प्रधान याजकन ते फरीसी लोक महासभारे लोक अकोट्टे किये ते ज़ोने लगो, “अस कुन केरम? ए मैन्हु त इडी बड़े चमत्कार लोरोए केरने । 48 अगर अस एस हुन्ना न रोकमेले त सारे लोक तैस पुड़ विश्वास केरेले, कि ए मसीह आए, ते फिरी रोमेइं इडी एइतां इश्शे मन्दरे ते इश्शी कौमी दुइने नाश केरेले ।” 49 तैखन तैन केरे टोली मरां अक ज़ेसेरू नवं कैफा थियूं, ज़ै तैस साल मन्दरेरो महायाजक थियो ज़ोने लगो, “तुस लोक किछ न ज़ानाथ, 50 तुसन इन न समझथ कि, तुश्शे लेइ रोड़ए, इश्शे लोकां केरे लेइ अक मैन्हु मरे, न कि इश्शे सारे लोक ।” 51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इस्एलेरे सारे लोकां केरे लेइ अपनि जान देलो । 52 तै सिर्फ इस्एलेरे लोकां केरे लेइ नईं, पन एल्हेरेलेइ भी कि ज़ैना परमेशेरे बच्चे तितर-बितर भोरेन तैन अकोट्टे केरतां अक बनाए । 53 बस्सा, यहूदी लीडरेईं तैस दिहाड़े बाद यीशु मारेरो इरादो कियो ।

54 एल्हेरेलेइ यीशुए तैस वक्ते करां यहूदन मां बांदे मां न फिरो, पन जंगलेरे नेडे एप्रैम नगरे मां जेव, ते अपने चेलन सेइं साथी तैडी राने लगो ।

55 तेइस यहूदी केरू फ़सह तिहार नेडे अव, ते बड़े लोक आसेपासेरे इलाकन मरां यरूशलेम नगरे मांजो च़ले जे, ताके अपना आप शुद्ध केरन । 56 तैना यीशु तोपते थिये तेइस तैना मन्दरे मां अकोट्टे भोए, ते एक्की होरि सेइं ज़ोने लगो, “तुस कुन समझतथ? कोई पत्तोए कुन तै इडी फ़सह तिहारे मां एज्जेलो कि नईं?” 57 ते प्रधान याजकेईं ते फरीसी लोकेईं हुकम दित्तोरो थियो कि अगर केन्ची पतो लगो कि यीशु कोड़ि आए त ज़ोथ दे ताके असां तैस गिरफ्तार केरम ।

12

ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂⓂ 26:6-13; ⓂⓂⓂⓂⓂⓂ 14:3-9)

1 फ़सह तिहारे करां शा दिहाड़े पेइले यीशु बैतनिय्याह इलव्वें मांजो च़लो अव, ज़ैडी लाज़र रातो थियो, ज़ै यीशुए मुइदन मरां जीतो कियोरो थियो । 2 तैडी तैनेईं यीशुएरी खातरदारी केरनेरे लेइ धाम बनाई । ते मार्था सेवा लोरी थी केरने, लाज़र भी तैन मरां अक थियो ज़ैना यीशु सेइं साथी रोट्टी खाने बिश्शोरे थिये । 3 तैखन मरियमा जटामासी सेइं बनोरो अध्धो लीटर खुशबूदार इत्र ज़ै बड़ो कीमती थियो, यीशुएरे पावन मल्लो, ते अपने दोगगेरे बालन सेइं पोंछने लगी, ते सारू घर रोड़ी मुशकी सेइं भेरोई जेव । 4 पन तैसेरे चेलन मरां अक यहूदा इस्करियोती नव्वेंरो अक चेलो, ज़ैनी यीशु ट्लुवेवरो थियो ज़ोने लगो, 5 “ई इत्र 300 दीनारन मां बेचतां गरीबन किजो न दित्तो?” 6 तैनी एना गल्लां एल्हेरेलेइ न थी ज़ोरी, कि तैस गरीबां केरो खियाल थियो, पन एल्हेरेलेइ ज़ोवं कि तै च़ोर थियो, तैस कां पेइंसां केरि झोली भोती थी, ते ज़ैन किछ तैस मां रखते थी तै कढतो थियो । 7 यीशुए ज़ोवं, “एस तंग न केरा, एसां वक्तेरे पेइले मेरी जान दव्वनेरी तियारी कियोरीए । 8 किजोकि गरीब लोक त तुसन सेइं साथी सदा रातन, पन अवं तुसन सेइं साथी सदा नईं रानो ।”

ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ

9 मैन्हु केरि बड़ी भीड़ी तैडी आईं ज़ैखन तैनेईं शुनू कि यीशु तैडी अव । तैना सिर्फ यीशु नईं बल्के लाज़रे भी हेरने ओरे थिये, ज़ै तैनी मुइदन मरां जीतो कियोरो थियो । 10 तैखन प्रधान याजके लाज़र भी मारनेरी सलाह की । 11 किजोकि बड़े लोक यहूदी लीडरन करां च़ले जे, ते तैनेईं यीशु पुड़ विश्वास कियो ।

२२:२२-२३ २२:२४ २२:२५

(२२:२२ 21:1-11; २२:२४ 11:1-11; २२:२५ 19:28-40)

12 होरसां मैन्हु केरि बड़ी भीड़ तिहारे मां आई। जैखन तैनेई शुनू कि यीशु भी यरूशलेम नगरे मां एजनेबालोए,
13 त तैनेई खजूरां केरि डेलडी हथ्यन मां रेखतां नहरे देते तैस सेइं मिलनेरे लेइ निस्से ते ज़ोने लगे, “होशाना (तारीफ़) धने इसराएलेरो राज़ो, जै प्रभुएरे नंवे सेइं एइते।” 14 जैखन यीशु अक गधरो बच्चो मैल्लो, ते तै तैस पुड़ विश्वासां यरूशलेम नगरे मांजो अव, जेन्चरे पवित्रशास्त्रे मां लिखोरूए तेन्चरे एन भोवं,
15 “हे सिध्योनेरी कुई (यरूशलेमेरे लोक),

तू न डर, हेर,

तेरो राज़ो एज्जी राओरोए,

ते तै गधेरे बच्चे पुड़ च़ेढ़तां एज्जी राओरोए।”

16 पेइलू त यीशुएरे चेलेईं किछ न समझू, पन जैखन यीशुएरी महिमा बांदी भोइ, तैनेई तैना सैरी गल्लां याद की, एन सब गल्लां तैसेरे बारे मां लिखोरी थी, ते लोकेईं एरो ज़ेरो सलूख कियोरो थियो। 17 तैखन भीड़रे लोकेईं जैना तैस सेइं थी, ई गवाही दिती, कि तैनी लाज़र कबरी मरां कुजाव, ते मुड़न मरां जींतो कियो। 18 एल्हेरेलेइ लोक तैस सेइं मिलनेरे लेइ आए, किजोकि तैनेई शुनोरू थियूं, तैनी ई चमत्कार कियोरे। 19 फरीसी लोक एन हेरतां एक्की होरि सेइं ज़ोने लगे, “सोचा, तुस लोक किछ नईं केरि लोरे बटने, हेरा सारी दुनिया एस पत्ती च़ली।”

२२:२६-२७ २२:२८ २२:२९

20 जैना लोक फसह तिहारे मां यरूशलेम नगरे मां आराधना केरने ओरे थिये, तैन मां किछ यूनानी थिये। 21 तैना फिलिप्पुसे कां जे जै गलीलेरे नगर बैतसैदा मां रातो थियो, तै ज़ोवले हथ केरतां ज़ोने लगे, “जनाब अस यीशु सेइं मिलनू चातम।” 22 फिलिप्पुसे अन्दरयासे सेइं ज़ोवं, ते अन्दरयास फिलिप्पुसे सेइं साथी जेव ते यीशु सेइं ज़ोवं। 23 यीशुए तैन जुवाब दित्तो, “कि मैनेरे मट्टेरी यानी मेरी महिमा बांदी भोनेरो वक्त ओरोए। 24 अवं तुसन सेइं सन्न-सन्न ज़ोताई, कि ज़ांतगर गेहुं केरो ग्लेव मित्ती मां न मरे, तै अक्के रहते, पन जैखन मरते त बड़ो फल आनते, (तेन्चरे मीं सेइं साथी भोनूए)*। 25 जै अपनि जान ट़लारी रखते ते अपनि जान गुवाते, पन जै अपनि जानी सेइं बैर रखते ते अक हमेशारी ज़िन्दगी बच़ालो। 26 जै कोई मेरी सेवा केरनि चाते त तैसेरेलेइ ज़रूरीए तै मेरो चेलो बने, ताके ज़ैडी अवं आईं तैडी मेरो सेवक भी भोए, जै मेरी सेवा केरते मेरो परमेशर तैस इज्जत देलो।”

२२:२९-३० २२:३१ २२:३२

27 “हुना मेरो दिल बड़ो उदास भोरोए। एल्हेरेलेइ अवं कुन ज़ोईं? हे बाजी इस दुखेरी घेडी करां मीं बच़ा, पन अवं इस दुनियाई मां एल्हेरेलेइ ओरोईं कि दुःख झेल्ली। 28 हे बाजी तू केत्तरो महिमा बालोस इन बांदू केर।” तैखन स्वर्गेरां अक आवाज़ अई, “मीं तेरी केत्तरी महिमा बांदी कियोरीए ते फिरी भी केरेलो। 29 तैखन तैडी जैना मैन्हु खडे भोइतां शुनी रावरे थिये, तैनेई ज़ोवं, गुड़ने लोरूए,” ते होरेईं ज़ोवं, “केन्चे स्वर्गदूते तैस सेइं गल की।” 30 यीशुए ज़ोवं, “ई आवाज़ मेरे फ़ैइदेरे लेइ नईं बल्के तुशुशे लेइ आए। 31 इस वक्त परमेशर दुनियारे लोकां केरो इन्साफ़ केरेलो, ते अवं इस शैतानेरी शक्ति नाश केरेलो जै इस दुनियाई पुड़ राज़ केरते। 32 ते जैखन अवं ज़मीनी पुड़ा उच्चे च़ाढ़ो गालो, तैखन अवं सैरी लोकन एप्पू कांजो आनेलो।” 33 एन ज़ोइतां तैनी साफ़ च़ारे बांदू कियूं, ते तै केन्चरां मरने बालो। 34 एस पुड़ लोकेईं ज़ोवं, “असेईं मूसेरे कानूने मां ई गल शुनोरीए, कि मसीह हमेशा रानोए, फिरी तू केन्चरे ज़ोतस कि मैनेरू मट्टू उच्चे पुड़ च़ढ़नू ज़रूरीए? एन मैनेरे मट्टे कौने?” 35 यीशुए तैन सेइं ज़ोवं, “लौ† तुसन कां थोड़े च़िरे तगरे आए, ज़ां तगर लौ तुसन साथीए, तांतगर च़लते राथ, एरू न भोए आंधरू तुसन घेरे, जै आंधरे मां च़लते तै न जाने तै कोरां च़लरोए। 36 ज़ांतगर लौ तुसन सेइं साथीए, त लोई पुड़ विश्वास केरा ताके तुस लोअरे बच्चे बनथ।” इना गल्लां ज़ोइतां यीशु छेप्पी जेव।

२२:३३-३४ २२:३५ २२:३६ २२:३७ २२:३८

37 तैनी तैन केरे सामने बड़े चमत्कार हिराए, फिरी भी तैनेई विश्वास न कियो। 38 ताके यशायाह नेबेरू ज़ोरू वचन पूरू भोए,

“हे प्रभु, केन्चे इशुशे खुशखेबरी पुड़ विश्वास न कियो,

* 12:24 12:24 यीशु अपने बारे ज़ोने लोरो थियो, कि केन्चरां तैसेरे मरने ते जीते भोनेरे वजाई सेइं होरि कौमां केरे लोक तैस पुड़ विश्वास केरेले।

† 12:35 12:35 लौ: यीशु अपने बारे मां ज़ोने लोरो थियो।

ते बड़े लोकेई परमेशेरी शक्ति हेरतां भी कबूल न की ।”

39 एल्हेरेलेइ तैना विश्वास न केरि सके यशायाह एककी होरि ठैरी ज़ोते:

40 “तैनी तैन केरि एछ्छी केनि की, ते मन सखत कियोरोए,

एरू न भोए कि तैना एछ्छन सेइं लान ते मने सेइं बुझन,

ते माफ़ी मगन ते अवं तैन बज्जेई ।”

41 यशायाह नबी एल्हेरेलेइ ज़ोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की । 42 फिरी भी लीडरन मरां बड़ेई यीशु पुड़ विश्वास कियो, पन फरीसी लोकां केरे वजाई सेइं बांदे मां न थिये मन्ते, एरू न भोए कि असन प्रार्थना घरे मरां कढन । 43 किजोकि मैन्हु केरि बड़याई तैन परमेशेरी बड़याई करां जादे रोड़ी लगती थी ।

???????? ???? ???? ????????????? ???? ?

44 तैखन यीशुए ज़ोरे सेइं ज़ोवं, “जै कोई मीं पुड़ विश्वास केरते तै मीं पुड़ नई पन मेरे भेजने बाले परमेशेरे पुड़ विश्वास केरते । 45 ते जै मीं हेरते तै मेरे भेजने बाले हेरते । 46 अवं दुनियाई मां अक लौ बेनतां ओरोई, ताके जै मीं पुड़ विश्वास केरे तै आंधरे मां न रालो । 47 अगर कोई मेरी गल्लां शुन्तां तैन पुड़ अमल केरे, त अवं तैस दोष न लेइलो, अवं दुनियारे लोकन पुड़ दोष लाने नई पन मुक्ति देने ओरोई । 48 जै मेरो इन्कार केरते ते मेरी गल्लां कबूल न केरे, तैस पुड़ दोष लानेबालो अक्के, मतलब जैन वचन मीं ज़ोरूए, तैन आखरी दिहाड़े तैस दोषी ठैरालू । 49 किजोकि मीं अपने अधिकारे सेइं किछ नई ज़ोरू, पन बाजी जैने अवं भेजोरोई तैनी मीं हुकम दित्तोरुए, कि कुन-कुन ज़ोई ते कुन-कुन शुनेई? 50 ते अवं जानताई कि तैसेरो हुकम मन्ने सेइं हमेशारी जिन्दगीए मैलतीए, एल्हेरेलेइ अवं तुसन सेइं तैने ज़ोताई जैन ज़ोनेरो हुकम मेरे बाजे मीं दित्तोरुए ।”

13

????? ???? ???? ???? ???? ???? ?

1 फ़सह तिहाररे पेइले दिहाड़े यीशुए जैनी छड्डू, कि मेरो दुनियाई मरां बाजी कां वापस गानेरो वक्त ओरोए । तै अपने लोकन सेइं जैना दुनियाई मां थिये जेरो प्यार केरतो थियो, तेरहो प्यार आखरी तगर केरतो राव । 2 शैताने शमौनेरे मट्टे यहूदा इस्करियोतेरे दिले मां पेइले यीशु टलुवानेरो खियाल छडोरो थियो । यीशु त कने तैसेरे चेले इलाई खानेरो लोरे थिये । 3 यीशु पतो थियो कि बाजे सैरी चीज़ां तैसेरे हथ्थे मां दित्तोरिन, ते कने तै परमेशेरी तरफां ओरोए ते परमेशेरे कांजो वापस ज़लरोए । 4 एल्हेरेलेइ तै रोट्टी छेडतां खडो उठो ते अपनू कोट खोल्लू, ते अक तोलियो अपने लखे सेइं पलैटो । 5 तैखन तैनी अक भांड टलावं ते तैस मां पानी छाडु ते अपने चेलां केरे पाव धोइतां लखे बन्धोरे तोलिये सेइं पोंछे । 6 जैखन तै शमौन पतरस कां अव त पतरसे ज़ोवं, “हे प्रभु, कुन तू मेरे पाव धोने लोरस?” 7 यीशुए जुवाब दित्तो, “जैन अवं केरने लोरोई तू हुन्ना न बुझस, पन पत्ती तू बुझेलो ।” 8 पतरसे तैस सेइं ज़ोवं, “तू मेरे पाव कधे न धोई सकस!” यीशुए तैस सेइं ज़ोवं, “अगर अवं तेरे पव न धोई, त तू मेरो चेलो नई ।” 9 शमौन पतरस यीशु सेइं ज़ोने लगो, “हे प्रभु, तू मेरे पाव नई बल्के हथ ते दोग भी धो ।” 10 यीशुए तैस सेइं ज़ोवं, “जैनी निहावरुए, तैस पावां केरे अलावा होरू धोनेरू किछ ज़रूरत नई । तै बिलकुल शुद्धे, ते तुस शुद्धथ, पन सारे नई ।” 11 तै त टलुवाने बाले जानतो थियो एल्हेरेलेइ तैनी ज़ोवं, “तुस सब शुद्ध नई ।”

12 जैखन यीशुए सेबभी केरे पाव धोए त अपनू कोट लेइतां अपनि ठैरी बिशो तैखन तैनी तैन पुच्छू, “कुन तुस समझतथ कि मीं तुसन सेइं कुन कियू? 13 तुस मींजो गुरु, ते प्रभु ज़ोतथ, तुशू ज़ोनु ठीके, किजोकि अवं आई । 14 अगर मीं तुशो गुरु त कने प्रभु भोइतां तुशो पाव धोए, त तुशो भी फर्जे कि एककी होरेरे पाव धोथ । 15 किजोकि मीं तुसन अक नमूनो हिराव, कि जेन्चरे मीं पाव धोए तुस भी एरू केरथ । 16 अवं तुसन सेइं सच्च-सच्च ज़ोताई, कि नौकर अपने मालिके करां बड्डो न भोए, ते न भेजोरो भेजने बाले करां । 17 तुस त एना गल्लां जानतथ, ते अगर तैन पुड़ अमल केरतथ त तुस धन आथ । 18 अवं तुसन सेबभी केरे बारे मां न ज़ोई, जैना मीं चुनोरेन अवं तैन जानताई, पन इन एल्हेरेलेइ आए, कि पवित्तरशास्त्रेरू एन वचन पूरू भोए, जैने मेरी रोट्टी खाइ, तैए मेरे खलाफ भोव । 19 अवं तैन भोने करां पेइले तुसन ज़ोताई कि जैखन भोए त विश्वास केरथ कि अवं तैए आई । 20 अवं तुसन सेइं सच्च-सच्च ज़ोताई कि, जै मेरे भेजोरे कबूल केरते तै मीं कबूल केरते, ते जै मीं कबूल केरते तै मेरे भेजनेबाले बाले कबूल केरते ।”

२२:२०-२५; २२:२६-२७; २२:२८

(२२:२०-२५; २२:२६-२७; २२:२८ 22:21-23)

21 एना गल्लां ज़ोइतां यीशु आत्माई मां उदास भोइतां बड़ो दुःखी भोव, ते अपने चलन सेइं ज़ोने लगो, “अवं तुसन सेइं सन्न-सन्न ज़ोतां, कि तुसन मरां एक्के अवं टलुवानोई।” 22 चले एक्की होरेरे पासे तकने लगो, किजोकि तैन पतो न थियो कि ए केसेरे बारे मां ज़ोने लोरोए। 23 तैसेरे चलन मरां अक चेलो ज़ैस सेइं यीशु प्यार केरतो थियो, यीशुएरे नेड़े बिशोरो थियो। 24 तैखन शमौन पतरसे तैसेरे पासे इशारे सेइं पुच्छू, “जो कसेरे बारे मां ज़ोने लोरोए?” 25 तैखन तेन्चरे यीशुएरे छैतरे पासे लिकतां पुच्छू, “हे प्रभु, तै कौने?” 26 यीशुए जुवाब दित्तो, “ज़ैस अवं ई रोट्टरो टुकड़ो डोबतां देइलो तैए।” ते यीशुए टुकड़ो डोबतां शमौनेरे मट्ठे यहूदा इस्करियोती दित्तो। 27 ते टुकड़ो नेनेरे पत्ती तै शैतानेरे बस्से मां भोइ जेव, तैखन यीशुए तैस ज़ोवं, “तीं ज़ैन किछ् केरनूए, लूशी केर।” 28 पन होरि केन्ची ए पतो न लगो कि ए गल यीशुए केसेरे बारे मां की। 29 यहूदा कां पेइंसां केरी थलड़ी भोती थी, ते किछेईं समझू, कि यीशु तैस सेइं ज़ोते, कि ज़ैन किछ् असन तिहारेरे लेइ लोइते तैन घिन्ने, या गरीबन किछ् दे। 30 तैखन यहूदा टुकड़ो खेइतां बेइर चलो जेव, तै रातरो वक्त थियो।

२२:२८-२९; २२:३०

31 ज़ैखन तै बेइर जेव त यीशु ज़ोने लगो, “हुनी मैनेरे मट्ठे यानी मेरी महिमा भोइ, ते मेरे ज़िरिये परमेशेरी महिमा भोइ, 32 ते परमेशर भी मीं एप्पू महिमा बालो केरेलो, बल्के जल्दी केरेलो। 33 हे मेरे दोस्तव, अवं किछ् चिरेरे लेइ हेजू तुसन सेइं साथी आई, फिरी तुस मीं तोपेले, ते जेन्चरे मीं यहूदन भी ज़ोवं, ज़ैडी अवं गाताई तैडी तुस न एज्जी बटथ, तेन्चरे अवं तुसन सेइं भी ज़ोताई। 34 अवं तुसन अक नंव्वो हुक्म देताई कि, एक्की होरि सेइं प्यार केरा, जेन्चरे मीं तुसन सेइं प्यार कियो तुस भी एक्के होरि सेइं प्यार केरा। 35 अगर तुस एक्के होरि सेइं प्यार केरेले त सेम्भी लोकन पतो लग्गेलो, कि तुस मेरे चलेथ।”

२२:३०-३५; २२:३६-३७; २२:३८

(२२:३०-३५; २२:३६-३७; २२:३८ 22:31-34)

36 शमौन पतरसे तैस पुच्छू, “हे प्रभु तू कोरां चलोरोस?” यीशुए जुवाब दित्तो, “जेरां अवं चलोरोई तू हुना मीं सेइं साथी न एज्जी सकस, पन बादे मां एज्जी सकतस।” 37 पतरसे ज़ोवं, “हे प्रभु अवं हुना तीं सेइं साथी किना एज्जी सेखी? अवं त तेरे लेइ अपनि जान भी देनेरे लेइ तियार आई।” 38 यीशुए जुवाब दित्तो, “कुन तू मेरे लेइ अपनि जान देलो, अवं तीं सेइं सन्न-सन्न ज़ोताई कि कुकड़ बांग देने करां पेइले तू मेरो टलेइ बार इन्कार केरेलो।”

14

२२:३८-४०; २२:४१-४२; २२:४३

1 “तुशुओ दिल उदास न भोए, तुस परमेशेरे पुड़ विश्वास केरतथ, मीं पुड़ भी विश्वास केरा। 2 मेरे बाजेरे घरे मां बड़े कमरेन, अगर न भोथी त अवं तुसन सेइं ज़ोथो, किजोकि अवं तुशुओ लेइ ठार तियार केरने चलोरोई। 3 अगर गेइतां तुशुओ लेइ ठार तियार केरि त वापस एइतां तुसन एप्पू सेइं साथी नेलो, ताके ज़ैडी अवं भोलो तुस भी तैडी भोथ। 4 ते ज़ेरां अवं चलोरोई तुस तैठेरी बत ज़ानतथ।” 5 थोमा तैस ज़ोवं, “हे प्रभु, असन नई पतो तू कोरां चलोरोस, ते फिरी बत केन्चरे ज़ानम?” 6 यीशुए तैस सेइं ज़ोवं, “बत, सन्न-सन्न ते हमेशारी ज़िन्दगी अव्वे आई, कोई मेरे ज़िरियेरे बगैर बाजी कां न एज्जी सके। 7 अगर तुसेईं अवं पिशानोरो भोथो त मेरे बाजी भी पिशानेथे, पन हुनी तुस तैस ज़ानतथ ते कने लाव भी।” 8 फिलिप्पुसे तैस सेइं ज़ोवं, “हे प्रभु असन बाजी हिरा, तैन्ने इशुओ लेइ बडू आए।” 9 यीशुए तैस सेइं ज़ोवं, “फिलिप्पुस, एतरे चिरे अवं तुसन सेइं साथी राव कुन तू मीं न ज़ानस ज़ैनी अवं लाव तैनी बाजी भी लाव तू किजो ज़ोतस असन बाजी हिरा? 10 कुन तू विश्वास न केरस, कि अवं बाजी मां आई ते बाजी मीं मां आए? अवं ज़ैना गल्लां तुसन सेइं ज़ोताई तैना गल्लां अवं अधिकारे सेइं न ज़ोई, बल्के बाजी मीं मां रेइतां अपनू कम करते। 11 मेरो विश्वास केरा, कि अवं बाजी मां आई ते बाजी मीं मां आए, नई त ज़ैना कम्मां केरताई तैन हेरतां मीं पुड़ विश्वास केरा।” 12 अवं तुसन सेइं सन्न-सन्न ज़ोताई, “कि ज़ै मीं पुड़ विश्वास केरते, एना कम्मां ज़ैना अवं केरताई तै भी केरेलो, बल्के मीं करां भी बडां कम्मां केरेलो, किजोकि अवं बाजी कां चलोरोई। 13 ज़ैन किछ् तुस मेरे नंव्वे सेइं मगले अवं तुसन देलो कि बाजी केरि महिमा मट्ठेरे वजाई सेइं बांदा भोए। 14 अगर तुस मेरू नंव्वे सेइं किछ् भी मगले त अवं तैन केरेलो।”

२२२२२२ २२२२२२२ २२२२

15 “अगर तुस मीं सेइं प्यार केरतथ त मेरे हुक्मन मन्नेले। 16 ते अवं बाजी कां प्रार्थना केरेलो ते तै तुसन अक महतगार देलो कि हमेशा तुसन सेइं साथी रालो। 17 मतलब तै आत्मा जै परमेशेरे बारे मां सच्च बांदू केरेली, जै दुनिया कबूल न केरि सके, किजोकि न तैस लेइहोए न जाने, तुस तैस जातथ किजोकि तै तुसन साथी रहती, ते तै तुसन मां भोली। 18 अवं तुसन अकैल्लो न शेरेलो बल्के अवं तुसन कां एज्जेलो। 19 ई दुनिया किछ् चिरेरां बाद मीं न लाएली, पन तुस मीं लांते राले, किजोकि अवं जीतोई ते तुस भी जीते राले। 20 जैखन अवं जीतो भोलो तेइस तुसन पतो लग्गेलो, कि अवं अपने बाजी मां आई ते तुस मीं मां आथ ते अवं तुसन मां आई। 21 जैस कां मेरे हुक्म आन ते तैन मन्ते, त तैए मीं सेइं प्यार केरते ते मेरो बाजी तैस सेइं प्यार केरेलो, ते अवं तैस सेइं प्यार केरेलो, ते अपनो आप तैस पुड़ बांदो केरेलो।” 22 तैखन यहूदा (तै यहूदा इस्करियोती न थियो बल्के होरो चेलो थियो) तैस सेइं ज़ोवं, “हे प्रभु कुन भोव कि तू अपनो आप असन पुड़ बांदो केरनो चातस ते दुनियारे लोकन पुड़ नई?” 23 यीशुए जुवाब दित्तो, अगर कोई मीं सेइं प्यार केरते त तै मेरी शिक्षाई मन्ते, ते मेरो बाजी भी तैस सेइं प्यार केरेलो, ते अस तैस कां एजमेले ते तैस सेइं साथी रामेले। 24 जै मीं सेइं प्यार न केरे, तै मेरे शिक्षाई न मन्ने, जै शिक्षा तुस शुन्ने लोरेथ, मेरी नई पन मेरे बाजी केरि जैने अवं भेजोरोई।

25 “एना सैरी गल्लां मीं तुसन साथी रेइतां ज़ोई। 26 पन तै महतगार यानी पवित् आत्मा जैस बाजी मेरे ठैरी भेजेलो, तुसन सैरी गल्लां शिखालेलो, ते हर गल जै मीं तुसन सेइं ज़ोरी याद करालो।” 27 अवं तुसन शान्ति देइतां जै मीं कां आए, जेन्चरे दुनिया देचे तेन्चरे नई, तुश्शो दिल उदास न भोए ते न डेरथ। 28 तुसेईं शुनू, मीं तुसन सेइं ज़ोवं, अवं गाताई तुसन कां फिरी एज्जेलो अगर तुस मीं सेइं प्यार केरते भोते त खुशी भोने थिये, कि अवं बाजी कां च़लरोई किजोकि बाजी मीं करां बड़ोए। 29 मीं सैरी गल्लां पेइले तुसन ज़ोरिन कि जैखन तैना पूरी भोन त तुस विश्वास केरेले। 30 हुनी अवं तुसन सेइं जादे गल्लां न केरेलो, किजोकि शैतान एइते, जै इस दुनियाई पुड़ राज़ केरनेबालोए। मीं पुड़ तैसेरो किछ् अधिकार नई। 31 जेन्चरे बाजीए मीं हुक्म दित्तो, अवं तेन्चरे केरताई। पन एन एल्हेरेलेइ भोते कि दुनिया जाने, कि अवं बाजी सेइं प्यार केरताई। ते उठा इट्ठा च़लम।

15

२२२२ २२२२२२२ २२२२२२ २२२२

1 यीशुए ज़ोवं “अवं दाछारू सच्चू बड़ह अक्वें आई, ते मेरो बाजी बागबाने। 2 जै डालड़ी मीं मां आए, ते तैस फल न लगे, तै कट्टी गानीए, ते जैस फल लगते तैस छांटते कि जादे फल लगे। 3 तुस तैस शिक्षाई सेइं जै मीं तुसन दित्तोरीए शुद्ध आथ। 4 तुस मीं मां बनोरे राथ, ते अवं तुसन मां, जेन्चरे डालड़ी अगर बड़हे सेइं बनोरी न राए, त अपने आप सेइं तैस फल न लगे। तेन्चरे तुसन भी अगर मीं मां बनोरे न राले त तुस फलदार न भोइ सकेले। 5 अवं दाछारू बड़ह आई, तुस डेलड़ी आथ, जै मीं मां बनोरो रहते तैस खूब फल लगते, किजोकि मीं करां अलग भोइतां तुस किछ् न केरि सखत। 6 अगर कोई मीं मां बनोरो न राए, त तैस डेलड़ारो ज़ेरोए जैस केटतां शारतन, ते शुक्की गाचे, ते लोक घेरतां अग्गी मां फुकी छ़डतन। 7 अगर तुस मीं मां बनोरे रातथ ते मेरी गल्लां तुसन मां बनोरी रैतिन त जैन चाहेले ते मगले तुसन दित्तू गालू। 8 मेरे बाजेरी महिमा एसमां आए कि तुस हछो फल आनां, फिरी तुस मेरे चले भोले। 9 जेन्चरे बाजे मीं सेइं प्यार कियो, तेन्चरे मीं भी तुसन सेइं प्यार कियो। मेरे प्यारे मां बनोरे राथ। 10 अगर तुस मेरे हुक्मन मन्नेले, त मेरे प्यारे मां बनोरे राले, जेन्चरे मीं अपने बाजेरे हुक्म मन्ने, ते तैसेरे प्यारे मां बनोरो राव। 11 मीं एना गल्लां एल्हेरेलेइ तुसन ज़ोरिन, कि मेरी खुशी तुसन मां बनोरी राए।”

12 “मेरो हुक्मे ई आए जेन्चरे मीं तुसन सेइं प्यार कियो, तुस भी एक्की होरि सेइं प्यार केरा 13 एस करां जादे प्यार केन्चे नई कियोरो, कि कोई अपने दोस्तां केरे लेइ अपनि जान दे। 14 जै हुक्म अवं देताई, अगर तुस तैस मन्थ, त मेरे दोस्त आथ। 15 अज्जेरे बाद अवं तुसन जो नौकर न ज़ोइलो, किजोकि नौकर न जाने कि तैसेरो मालिक कुन केरते। मीं तुसन जो दोस्त ज़ोरूए, किजोकि जैन किछ् मीं बाजी करां शुनोरूए तुसन भी शुनावरू आए। 16 तुसेईं अवं नई चुनोरो पन मीं तुस चुनोरेथ ते ठहरावरे भी आथ, ताके तुस गेइतां फल आनथ, ते तुश्शो फल बनोरो राए, कि तुस मेरे नव्वे सेइं बाजी करां जैन किछ् मगथ, तै तुसन देलो किजो तुस मेरे चलेथ। 17 अवं इन गल्लां केरो हुक्म एल्हेरेलेइ देताई, कि तुस एक्की होरि सेइं प्यार केरा।”

११११११११ ११११

18 “अगर दुनियारे लोक तुसन सेइं दुश्मनी रखतन, त याद रखा कि तैनेईं पेडले मीं सेइं दुश्मनी रखवोरी ।
19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नईं किजोकि मीं तुस दुनियाईं मरां चुनोरेथ तांए दुनियारे लोक तुसन सेइं दुश्मनी रखतन । 20 तै गल जै मीं तुसन सेइं ज़ोरी थी याद रखवा, नौकर अपने मालिके करां बड्डो न भोए, अगर दुनियां अवं सतेवरोइं त तैना तुसन भी सताले, अगर तैनेईं मेरी गल्ली पुड़ अमल कियूं त तुश्शी गल्ली पुड़ भी अमल केरेले । 21 पन तैना लोक तुसन सेइं एरो ज़ेरो बर्ताव केरेले, किजोकि तुस मेरे चलेथ । तैना मेरे भेजने बाले परमेशरे न ज्ञानन् । 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नईं । 23 जै मीं सेइं दुश्मनी रखते, ते तै मेरे बाजी सेइं भी दुश्मनी रखते । 24 अगर मीं तैन केरे सामने तैना चमत्कार न भोथे कियोरे, जैना कधी होरे केन्चे नईं कियोरे त तैना पापी न थिये भोने, पन हुनी तैनेईं सब किछ लाव, ते मीं भी ते बाजी सेइं दुश्मनी रखवी । 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेईं मीं सेइं खामखा दुश्मनी रखवी । 26 पन जैखन तै महतगार एज्जेलो जैस अवं अपने बाजेरे तरफां भेजेलो, मतलब सच्चरी आत्मा, जै बाजी केरि तरफां एइतीए, तै मेरी गवाही देली । 27 ते तुस भी गवाह आथ किजोकि तुस भी शुरू करां मीं सेइं साथी थिये ।”

16

1 “मीं तुसन एना सैरी गल्लां एल्हेरेलेइ जोईं कि तुश्शो विश्वास न टलुटे । 2 तैनेईं तुस प्रार्थना घरन मरां कढनेथ, खास केरतां एरो ज़ेरो वक्त एज्जी राहोरोए, जै तुसन मारेलो तै इन समझेलो कि तै परमेशेरी सेवा केरने लोरोए । 3 तैन एन सब एल्हेरेलेइ केरेले कि न तैनेईं कधी मेरो बाजी ज्ञानो ते न कधी अवं । 4 पन मीं एना सैरी गल्लां एल्हेरेलेइ तुसन सेइं जोईं, कि जैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेडलू ज़ोरू थियूं, जेइस तुस मेरे चले बनोरे थिये । मीं एना गल्लां केरे बारे मां पेडलू एल्हेरेलेइ न ज़ोवं, कि अवं एप्पू तुसन सेइं साथी थियो ।”

११११११ ११११११११ १११११११

5 “पन हुन्ना अवं अपने भेजने बाले कां चलोरोईं, पन तुसेईं केन्चे भी न पुच्छू कि तू कोरां चलोरोस? 6 पन मीं तुसन सेइं जोईं छुडेरूए एल्हेरेलेइ तुश्शो मन उदास आए । 7 फिरी भी अवं तुसन सेइं सच्च ज़ोताईं कि मेरू इट्ठां गानू तुश्शे लेइ फैइदोए, अगर अवं न गेइलो त तै महतगार तुसन कां नईं एजनो, पन अवं चलो जेव त तैस अवं तुसन कां भेजी देलो । 8 ते जैखन तै एज्जेलो त दुनियाईं पाप ते धार्मिकता ते इन्साफेरे बारे मां सब किछ बांदू केरेलो । 9 पापेरे बारे मां एल्हेरेलेइ कि दुनियां मीं पुड़ विश्वास न कियो, 10 धार्मिकतारे बारे मां एल्हेरेलेइ कि अवं वापस बाजी कां चलोरोईं ते तुसेईं अवं फिरी नईं लहनो, 11 इन्साफेरे बारे मां एल्हेरेलेइ कि, शैतान जै दुनियाईं पुड़ राज़ केरनेबालो मुर्जम बनोरोए ।”

12 “अवं तुसन सेइं होरू भी बडू किछ ज़ोनू चाताईं, पन हुन्ना तुसेईं तैन झैली नईं बटनू । 13 पन जैखन तै मतलब सच्चरी आत्मा एज्जेली त तै सच्चरी बत हिराली, किजोकि तै अपने तरफां न ज़ोली, पन जैखन किछ परमेशेरे करां शुनेली तैन्ने ज़ोली, ते एजने बैली गल्लां ज़ोली । 14 ते मेरी महिमा केरेली किजोकि तै मेरी गल्लां ज़ोली, किजोकि तै मेरी गल्लन मरां तुसन सेइं ज़ोली । 15 जैन किछ बाजी केरूए, तैन सब मेरूए, एल्हेरेलेइ मीं ज़ोवं, कि तै मेरी गल्लन मरां शुनालो ।”

१११११ १११११ १११११ १११११ १११११११ १११११ १११११ ११११ ११११११११११

16 “थोड़े चिरेरां पत्ती तुसेईं अवं फिरी नईं लहनो, ते तैसेरे थोड़े चिरेरां पत्ती तुसेईं अवं फिरी लांनोईं ।” 17 तैखन तैसेरे किछ चलेईं एप्पू मांमेइं ज़ोवं, इन कुने, “ए कुन ज़ोते, थोड़े चिरेरां पत्ती तुस मीं न लाएले, ते फिरी थोड़े चिरेरां पत्ती तुस मीं लाएले? कि अवं बाजी कां गाताईं?” 18 तैखन तैनेईं ज़ोवं, “थोड़े ज़ेरे चिरेरां बाद, एन जै ए ज़ोते, कुन आए? अस न ज्ञानम कि कुन?” 19 यीशुए एन जैनतां, कि एना मीं पुछनू चातन, “कुन तुस मेरी इस गल्लेरे बारे मां एप्पू मांमेइं गलबात केरने लोरेथ, कि एस गल्लारो कुन मतलबे, थोड़े चिरेरां पत्ती मीं न लाएले, ते फिरी थोड़े चिरेरां पत्ती लाएले? 20 अवं तुसन सेइं सच्च-सच्च ज़ोताईं, कि तुस लेरां देले ते शोग बनाले, पन दुनियारे लोक खुशी भोले, पन जैखन तुस मीं दुबारां लाएले त तुश्शो दुःख, खुशी मां बेदलोईं गानोए । 21 जैखन

कुआन्श ज्ञातीए त तैस बडी तकलीफ भोतीए, किजोकि तैसेरे दुःखेरी घडी नेडे पुजोरीए, पन जैखन बच्चो जर्मते त एस खुशी मां कि दुनियाई मां अक मैन्हु पैदा भोरोए अपनि तकलीफ विस्सरी गाचे । 22 ते तुसन भी हुन्ना तेरही तकलीफे, पन अवं तुसन सेइं फिरी मिलेलो, ते फिरी तुशशे मने मां खुशी भोली, ते खुशी तुसन करां कोई न नेही सकेलो । 23 तैस वक्ते तुस मीं कोई किछ् न पुछ्छेलो, अवं तुसन सेइं सन्न-सन्न जोताई, तुस मेरे नंवे सेइं बाजी करां जैन किछ् मगथ, तै तुसन देलो किजो तुस मेरे चलेथ । 24 तुसेईं मेरू नवं घिन्तां हुना तगर बाजी करां किछ् नई मगेरू, मगेले त तुसन मैल्ली गालू, ते तुशशी खुशी पूरी भोली ।”

२२२२२२२२ २२२२ २२२२

25 “अवं तुसन एना गल्लां मिसाल देइतां जोताई, पन तै वक्त ओरोए कि अवं कहैन्न मां फिरी न जोइलो, पन रोडे चारे बाजरे बारे मां तुसन सेइं गल्लां केरेलो । 26 तैस वक्ते तुस मेरू नवं घिन्तां प्रार्थना केरेले, अवं इन न जोई, कि तुशशे लेइ बाजी सेइं विनती केरि । 27 किजोकि बाजी परमेशर तुसन सेइं एप्पू प्यार केरते, एल्हेरेलेइ कि तुसेईं मीं सेइं प्यार कियो, ते तुसेईं विश्वास कियोरोए कि अवं परमेशेरी तरफां ओरोई । 28 अवं बाजी करां दुनियाई मां ओरोई, हुनी दुनियाई मरां भोइतां वापस बाजी कां चलोरोई ।”

29 तैसेरे चलेईं जोवं, “हुन्ना तू साफ-साफ गल लोरस केरने, ते कोई मिसाल देइतां न जोस । 30 हुन्ना असेईं बुझ् कि तीं सब किछ् पचोए, ते जरूरत नई कि कोई तीं पुछ्छे, असां विश्वास केरतम कि तू परमेशेरे करां ओरोस ।” 31 यीशुए तैन सेइं जोवं, “हुनी तुस विश्वास केरतथ! 32 हेरा, तै वक्त एज्जी राओरोए बल्के पुजोरोए, कि तुस सब नेशतां अपने-अपने बत्तां गानेथ, ते अवं अकैल्लो शारनोई पन फिरी भी अवं अकैल्लो नई, किजोकि मेरो बाजी मीं सेइं साथीए । 33 मीं तुसन एना गल्लां एल्हेरेलेइ जोई, ताके तुसन शान्ति मैल्ले, किजो तुस मेरे चलेथ, तुस दुनियाई मां मुसीबत त उठाताथ, पन हिम्मत रखा, मीं शैताने पुड़ जीत हासिल कियोरीए, जै इस दुनियाई पुड़ राज् केरते ।”

17

२२२२२२२२ २२२२ २२२ २२२२२२२२२२

1 जैखन यीशुए अपने चलन सेइं एना सब गल्लां जोई, त तैनी उबरू स्वर्गेरां तेकतां जोवं, “हे बाजी हुन्ना तै वक्त ओरोए कि तू अपने मट्टेरी महिमा केर, कि मट्टू भी तेरी महिमा केरे । 2 किजोकि तीं तैस सेब्मी मैनन् पुड़ अधिकार दित्तोरोए, जैना तीं तैस दित्तोरेन हमेशारी जिन्दगी दे । 3 ते हमेशारी जिन्दगी तै आए, कि तैना सिर्फ तीं एक्की सच्चे परमेशेरे ज्ञानन् ते यीशु मसीहे भी ज्ञानन् जै तीं भेजोरोए । 4 मीं तैन कम जैन तीं मीं दित्तेरू थियूं मुकेइतां धेरतली पुड़ तेरी महिमा की । 5 ते हुनी हे बाजी मीं एप्पू सेइं साथी मेरी तै महिमा केर जै दुनियारे पेइली मेरी तीं साथी थी ।”

२२२२२ २२२२२२ २२२२२ २२२२ २२२२२२२२२२२ २२२२२२

6 “मीं तेरू नवं तैन कां बांदू कियूं, जैना तीं दुनियाई मरां चुनतां मीं दित्तोरेन तैना तेरे थिये, पन तीं मींजो दित्तोरेन ते तैनेईं तेरे बचने पुड़ अमल भी कियोरूए । 7 हुनी तैना ज्ञानतन, कि जैन किछ् तीं मीं दित्तेरू तैन सब तेरी तरफांए । 8 एल्हेरेलेइ मीं तैना गल्लां जैना तीं मीं दित्तोरी थी, मीं तैन पुजेईं ते तैनेईं तैन पुड़ विश्वास कियो, ते सन्न पिशानू, कि अवं तेरी तरफां ओरोई, ते ई भी विश्वास कियो कि तीं अवं भेजोरोई । 9 अवं तैन केरे लेइ प्रार्थना केरताई, दुनियारे लोकां केरे लेइ न केरि, पन तैन केरे लेइ जैना तीं मीं दित्तोरेन, किजोकि तैना सब तेरे आन । 10 ते जैन किछ् मेरू आए, तैन सब किछ् तेरूए, ते जैन तेरू तैन मेरूए, ते इन सेइं मेरी महिमा बांदी भोई । 11 मीं हुनी इस दुनियाई मां नई रानू, पन तैना हेजू इस दुनियाई मां आन, ते अवं तीं कां एजताई, हे पवित्र बाजी, अपने तैस नंवे सेइं जैन तीं मीं दित्तोरूए, तैन केरि हफाजत केर, कि तैना असन बराबर भोन । 12 जैखन अवं तैन सेइं साथी थियो, मीं तेरे तैस नंवे सेइं, जैन तीं मीं दित्तोरूए, तैन केरि हफाजत की, मीं तैन केरि देख भाल की, नाश भोनेबाले मैनेरे अलावा कोई नाश न भोव, एल्हेरेलेइ पवित्रशास्त्रेरी गल पूरी भोइ । 13 पन हुन्ना अवं तीं कां एजताई, ते इना गल्लां अवं दुनिया मां जोताई, कि तैना मेरी खुशी एप्पू मां पूरी केरन । 14 मीं तैन तेरू वचन तैन कां पुजेवरुए, ते दुनियारे लोकेईं तैन सेइं दुश्मनी रख्खी, किजोकि जेन्चरे अवं दुनियारो नई, तैना भी नई । 15 मेरी प्रार्थना ई नई कि तू तैन दुनियाई मरां ने, पन तू तैन शैताने करां बचेइतां रख्ख । 16 जेन्चरे अवं दुनियारो नई तैन भी इस दुनियारे नई । 17 तेरू वचन सच्चे । सच्चेरे जिरिये सेइं तैन पवित्र केर । 18 जेन्चरे तीं अवं दुनियाई मां भेजोरोई तेन्चरे

मीं भी तैना दुनियाई मां भेजोरेन। 19 अवं अपनो आप तैन केरे लेइ पवित्र केरताई, ताके तैना भी सच्चेरे जिरिये सेइ पवित्र भोन।”

२० “मेरी प्रार्थना सिर्फ चले केरे लेइ नई, पन तैन केरे लेइ भी जैना तैन वचनेरे जिरिये मीं पुड़ विश्वास केरेले।

21 कि तैना सब अक भोन, जेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तीं अवं भेजोरोई। 22 ते तै महिमा जै तीं मीं दित्तोरीए, कि जेन्चरे अस अक आम तैन भी अक भोन। 23 अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज्ञाने कि तीं अवं भेजोरोई। जेन्चरे तीं मीं सेइं प्यार कियो, तेन्चरे तीं तैन सेइं भी प्यार कियो। 24 हे बाजी अवं चाताई कि जैना तीं मीं दित्तोरेन, जैडी अवं आई तैडी तैना भी मीं सेइं साथी भोन, कि तैना भी मेरी महिमा हेरन, जै तीं मीं दित्तोरीए। दुनियारे रचने करां भी पेइले तीं, मीं सेइं प्यार कियोरोए। 25 हे धर्मी बाजी, दुनियां तू न पिशानो, पन मीं तू पिशानो, ते तैन चलेई भी अवं पिशानो कि तीं अवं भेजोरोई। 26 मीं तैन पुड़ बांदू कियूं, कि तू कौन आस, ते बांदू केरतो रालो, जैस प्यारे सेइं तीं मीं प्यार कियो, तै तैन मां भोए, ते अवं तैन मां बनोरो रेई।”

18

२२ २२:२२-२२:२२

(२२:२२ 26:47-56; २२:२२ 14:43-50; २२:२२ 22:47-53)

1 यीशुए ए प्रार्थना केरतां झाडी, त अपने चलन सेइं साथी किदरोन वैदरे पार जेव। तैडी अक बाग थी तै ते तैसेरे चले तैडी जे। 2 तैस टलुवाने बालो यहूदा तैस ठारारो बाकम थियो, किजोकि यीशु अपने चलन सेइं साथी तैडी केही फेरेई जोरो थियो। 3 तैखन यहूदे, रोमी सिपाही ते किछ प्रधान याजक ते फरीसी केरे तरफां भेजोरे लोकन सेइं साथी एन्तां दीये ते मिसालां ते हथियार घिन्तां तैडी पुजाए। 4 तैखन यीशु सब गल्लां जैना तैस सेइं भोनेबैली थी, बुझतां तैन सेइं जोने लगो, “तुस केस लोरेथ तोपने?” 5 तैनेई तैस जुवाब दित्तो, “यीशु नासरी।” यीशुए तैन सेइं जोवं, “अवं तैए आई।” तैस टलुवाने बालो यहूदा भी तैन सेइं साथी खड़खड़ो थियो। 6 जैखन यीशुए जोवं, “अवं तैए आई,” तैना पत्रोवं जमीनी पुड़ झड़े। 7 एल्हेरेलेइ तैनी फिरी पुच्छू, “तुस केस लोरेथ तोपने?” तैनेई जुवाब दित्तो, “यीशु नासरी।” 8 यीशुए जुवाब दित्तो, “मीं त जोवं कि अवं तैए आई, अगर तुस मीं तोप्पतथ, त एन लोकन गाने देथ।” 9 एन एल्हेरेलेइ भोवं, कि तैन वचन पूरू भोए, “जैना तीं मीं दित्ते, तैन मरां मीं अक भी न हिरव।” 10 शमौन पतरसे कां अक तलवार थी, तैनी तलवार केढतां महायाजकेरे नौकरे बाई ते तैसेरो देइने कन्न केटव। तैस नौकरे नवं मलखुस थियूं। 11 तैखन यीशुए पतरसे जोवं, “अपनि तलवार मियाने मां रख, कुन अवं तै दुखेरो कटोरो न पीं जै मेरे बाजे मीं पीनेरे लेइ दितोए?”

२२ २२:२२ २२:२२

12 तैखन रोमी फौवजी ते तैन केरे सूबेदार ते यहूदी केरे लीडरेई यीशु टलाव तै बंधे। 13 ते पेइलो हन्ना कां नीयो किजोकि तै कैफारो शेरहो थियो जै तैस सालेरो महायाजक थियो। 14 ई तैए कैफाए जैनी यहूदन सलाह दित्तोरी थी, कि इश्शे लोकां केरे लेइ एक्की मैनेरू मरनू रोइ आए।

२२ २२:२२ २२:२२

(२२:२२ 26:69-70; २२:२२ 14:66-68; २२:२२ 22:55-57)

15 शमौन पतरस ते अक होरो चेलो यीशु पत्ती जे। तै चेलो महायाजकेरो बाकम थियो, तै यीशु सेइं साथी महायाजकेरे अंगने मां जेव। 16 पन पतरस बेइर दारे पुड़ खड़ो थियो, तै होरो चेलो जै महायाजकेरो बाकम थियो वापस अव, ते तैस नौकरैनी सेइं जै दारे पुड़ थी गल केरतां पतरस अन्तर नीयो। 17 तैस नौकरेनां जै दारे पुड़ थी पतरसे पुच्छू, “कुन तू भी तैसेरे चलन मरां आस?” पतरस जोवं, “नई अवं नई।” 18 ठंडारे वजाई सेइं नौकरेई ते मन्देरे परदारेई अग बालोरी थी, ते पतरस भी तैन सेइं साथी अग लोरो थियो तपने।

२२ २२:२२ २२:२२

(२२:२२ 26:59-66; २२:२२ 14:55-64; २२:२२ 22:66-71)

19 तैखन महायाजक यीशुएरे चेलां त कने तैसेरी शिक्षारे बारे मां पुच्छने लगो। 20 यीशुए जुवाब दित्तो, “मीं त सेभी केरे सामने सैरी गल्लां कियोरिन, मीं त रोज तुश्शे प्रार्थना घरन ते मन्देरे मां, ते जैडी यहूदी अकोट्टे

भोतन तैड़ी शिक्षा दित्ती, ते छेपतां किछ भी न ज़ोवं। ²¹तू मीं ए सवाल किजो पुच्छतस? शुन्नेबालन पुच्छू, कि मीं तैन सेइं कुन ज़ोवरूए? हेर तैन पतोए, कि मीं कुन ज़ोवरूए।” ²²जैखन तैनी ज़ोवं, त मन्दरेरे पहरदारन मरां अक ज़ै तैड़ी खड़ो थियो, तैनी यीशुए थप्पड़ बैइतां ज़ोवं, “कुन तू महायाजक एन्चरे जुवाब देतस?” ²³यीशुए तैस जुवाब दित्तो, “अगर मीं किछ बुरू ज़ोरूए त साबत केर, पन अगर रोडू ज़ोरूए त थप्पड़ किजो बातस?” ²⁴तैसेरां बाद हन्ना यीशुएरे हेजू बन्धोरो थियो तेन्चरे महायाजक कैफा कां भेजो।

[\[22:21-22\]](#) [\[22:23-24\]](#) [\[22:25-26\]](#)
([\[22:21-22\]](#) 26:71-75; [\[22:23-24\]](#) 14:69-72; [\[22:25-26\]](#) 22:58-62)

²⁵शमौन पतरस खड़खड़ो अग लोरो थियो तपने। तैखन केन्चे तैस पुच्छू, “कुन तू भी तैसेरे चलन मरां आस?” पतरस इन्कार केरतां ज़ोवं, “नई अवं नई।” ²⁶महायाजकेरे नौकरन मरां अक ज़ै तैसेरो रिशतेदार थियो, ज़ेसेरो कन्न पतरसे तलवारी सेइं कटोरो थियो, ज़ोने लगो, “कुन मीं तू बागी मां यीशु साथी नई लाहोरो?” ²⁷पतरसे फिरी इन्कार कियो, ते तैखन कुकड़े भी बांग दित्ती।

[\[22:27-28\]](#) [\[22:29-30\]](#) [\[22:31-32\]](#)
([\[22:27-28\]](#) 27:1-2,11-14; [\[22:29-30\]](#) 15:1-5; [\[22:31-32\]](#) 23:1-5)

²⁸तैनेई यीशु झेझां कैफा करां रोमी गवर्नर पिलातुसेरे महले मां नीयो, पन तैना एप्पू अन्तर न जे, ताके भिटे न भोन, ते फ़सह तिहारेरी रोट्टी खेइ बटन। ²⁹तैखन पिलातुस तैन कां बेइर अव ते ज़ोने लगो, “तुस इस मैन्हु पुड़ कुन इलज़ाम लातथ?” ³⁰तैनेई तैस जुवाब दित्तो, “ए मैन्हु मुर्जम न भोथो त असेई ए तीं कां न थियो आन्नो।” ³¹पिलातुसे तैन सेइं ज़ोने लगो, “तुस एस नेथ ते अपने कानूनेरे हिसाबे सेइं फैसलो केरा।” यहूदी लीडर ज़ोने लगे, “असन त केन्ची भी मारनेरी अज़ाज़त नई।” ³²एन एल्हेरेलेइ भोवं कि ज़ैन गल्लां यीशुए ज़ोरी थी, कि तै केरही मौतां मरेलो पूरी भोन।

³³तैखन पिलातुस फिरी महले मां जेव ते तैनी यीशु कुजेइतां तैस पुच्छू, “कुन तू यहूदी केरो राज़ोस?” ³⁴यीशुए जुवाब दित्तो, “तू ए गल अपनि भोती ज़ोने लोरोस कि होरेई मेरे बारे मां तीं सेइं ज़ेवरीए?” ³⁵पिलातुसे जुवाब दित्तो, “कुन अवं यहूदी आई? तेरी कौमरे ते प्रधान याजकेई तू मेरे हवाले कियोरोस, तू ज़ो तीं कुन कियोरूए?” ³⁶यीशुए जुवाब दित्तो, “मेरू राज़ इस दुनियारू नई, अगर दुनियारू भोथू त मेरे चले जंग केरेथे, ते मीं यहूदी लोकां केरे प्रधानां केरे हथ्ये ट्लेयोने न देखे, पन हुन्ना मेरू राज़ इट्ठेरू नई।” ³⁷पिलातुसे ज़ोवं, “त कुन तू राज़ोस?” यीशुए जुवाब दित्तो, “तू ज़ोतस कि, अवं राज़ोई, अवं एल्हेरेलेइ ज़रमोरोई, ते एल्हेरेलेइ दुनियाई मां ओरोई कि सच्चरे बारे मां शिक्षा देई। ज़ैना सच्चरे मन्तन तैना मेरी गल शुन्तन।” ³⁸पिलातुसे पुच्छू, “सच कुने?”

[\[22:33-34\]](#) [\[22:35-36\]](#) [\[22:37-38\]](#)
([\[22:33-34\]](#) 27:15-31; [\[22:35-36\]](#) 15:6-20; [\[22:37-38\]](#) 23:13-25)

एन ज़ोइतां तै यहूदी लीडरन कां जेव ते ज़ोने लगो, “अवं त एस मैन्हु मुर्जम न सेमझी।” ³⁹पन तुश्शे रीतरे मुताबिक अवं फ़सह तिहारेरे मौके पुड़ अक कैदी हथरां छड़ताई। कुन तुस चातथ कि अवं तुश्शे लेइ यहूदी केरे राज़े हथरां छेड्डी? ⁴⁰तैना फिरी ज़ोरे-ज़ोरे सेइं ज़ोने लगे, ए नन्ना इश्शे लेइ बरअब्बा हथरां छड़। बरअब्बा अक डैकू थियो।

19

¹पिलातुसे सिपेहिन हुक्म दित्तो, कि यीशु नेइतां कोड़े बान। ²ते सिपाहीयेइं कंटां केरू ताज बनेइतां यीशुएरे दोग्गे पुड़ रखू, ते तैस बैजनी रंगेरां लिगड़ां लुवां। ³ते तैन केरे सामने तैन कां एइतां ज़ोने लगो, “हे यहूदी केरे राज़ा, नमस्कार!” ते तैस थप्पड़ बाहे। ⁴तैखन पिलातुसे फिरी बेइर गेइतां लोकन सेइं ज़ोवं, हेरा, “अवं तैस तुसन कां फिरी बेइर आनताई, तुसन पतो लगे कि मीं एसमां कोई जुर्म न लेइहोव।” ⁵जैखन यीशु कंटां केरू ताज दोग्गे पुड़ रेखतां ते बैजनी लिगड़ां लेइतां बेइर आनो त पिलातुसे तैन सेइं ज़ोवं, “हेरा ई मैन्हु।” ⁶जैखन प्रधान याजक ते मन्दरेरे पहरदारेई यीशु लाव त ज़ोरे-ज़ोरे चिन्डां मैरतां ज़ोने लगे, “एस क़रूसे पुड़ चाढ़ा, एस क़रूसे पुड़ चाढ़ा!” पिलातुसे तैन सेइं ज़ोवं, “तुसे एस नेथ ते क़रूसे पुड़ चाढ़ा, किजोकि अवं एसमां कोई दोष न लेहीं।” ⁷यहूदी लीडर ज़ोने लगे, “इश्शो भी कानूने, ते तैसेरे कानूनेरे मुताबिक ए मौतरे सज़ारे काबले। किजोकि ए अपने

आपे जो परमेशेरू मट्टू ज़ोते।” 8 ज़ैखन पिलातुसे एन शुनू त तै मन्ना डरो। 9 ते फिरी अपने महले मां जेव ते यीशु सेइं फिरी ज़ोवं, “तू कोट्टां ओरोस?” पन यीशुए तैस किछ् जुवाब न दित्तो। 10 पिलातुसे तैस सेइं ज़ोवं, “तू मीं सेइं गल कि न केरस? कुन तीं पतो नई कि मीं अधिकार कि अवं तीं हथरां छैडी या कूरुसे पुड़ च़ैदेई।” 11 यीशुए जुवाब दित्तो, “अगर ए अधिकार तीं परमेशे करां न भोथो मैलोरो त तेरो कोई अधिकार मीं पुड़ न थियो भोनो, पन ज़ैनी अवं तेरे हवाले कियोरोई ते हछे पापेरो हकदार भोरोए।”

12 तैसेरां बाद पिलातुसे यीशु हथरां छडनो चाव, पन यहूदी लोक चिन्डां मेरतां ज़ोने लगे, “अगर तू एस मैन्हु हथरां छाडेलो त तू महाराज्जेरे पासे नई, ज़ै कोई अपनो आप राज़ो बनाते तै महाराज्जेरे खलाफ भोते।” 13 ज़ैखन पिलातुसे एन शुनू त तैनी यीशु बेइर कुजेइतां अपने आदालतरे तखते पुड़ बिश्शो ज़ैस जो इब्रानी भाषाई मां, गब्वता, ज़ोतन। 14 तै फ़सह तिहारेरी तियैरारी दिहाड़ी थी ते दुपाहरां केरे करीब थियो, तैखन पिलातुसे यहूदी लोकन जो ज़ोवं, “हेरा, ई तुश्शो राज़ो!” 15 पन तैना ज़ोरे-ज़ोरे सेइं ज़ोने लगे, “एस इट्टां दूर ने! इट्टां दूर ने! ते एस कूरुसे पुड़ च़ाढ़!” पिलातुसे ज़ोवं, “कुन अवं तैस ज़ै तुश्शो राज़ो कूरुसे पुड़ च़ैदी?” प्रधान याजकेई ज़ोवं, “महाराज्जेरे अलावा इश्शो कोई राज़ो नई।” 16 एसेरां बाद पिलातुसे यीशु तैन केरे हवाले कियो, ताके तैना तैस कूरुसे पुड़ च़ाढ़न।

(27:32-44; 15:21-32; 23:26-43)

17 यीशु अपनू कूरुस छुइतां खोपड़ी जो च़लो ज़ैस जो इब्रानी मां गुलगुता ज़ोतन। 18 तैड़ी तैनेई यीशु ते तैस सेइं साथी दई डैकू भी कूरुसे पुड़ च़ाढ़ो, अक तैसेरे देइने पासे होरो बांए पासे ते यीशु मझाटे। 19 पिलातुसे एककी पेखड़ी पुड़ तैसेरो दोष लिखतां कूरुसे पुड़ लाई तैस पुड़ लिखोरू थियूं, “यीशु नासरी यहूदी केरो राज़ो।” 20 काई यहूदेई तैन पढ़, किजोकि ज़ैस जगाई यीशु कूरुसे पुड़ च़ाढ़ो थियो ते जगा यरूशलेम नगरेरे नेडे थी, ते पेखड़ी पुड़ इब्रानी, लातीनी ते यूनानी भाषाई मां लिखोरू थियूं। 21 यहूदी केरे प्रधान याजकेई पिलातुसे कां दरखुवास की, “यहूदी केरो राज़ो न लिखा पन एन लिखा कि ए ज़ोते, ‘अवं यहूदी केरो राज़ोई।’” 22 पिलातुसे जुवाब दित्तो, “मीं ज़ैन लिखी छाडु, तैन लिखू।”

23 ज़ैखन स्पेहियेई यीशु कूरुसे पुड़ च़ाढ़ो त तैनेई यीशुएरे लिगड़ा बंटां ते तैन केरे च़ेवरे हिस्से किये, ताके सेबन अक-अक हिस्सो मैल्ले सिर्फ तैसेरू कोट बाकी राऊं, ज़ैन बा ते बुना तगर अक्के थियूं। 24 तैना एप्पू मामेइं ज़ोने लगे, “एसेरे टोटे केरनेरे बजाए शर्त रखम ज़ेसेरे नंवे पुड़ परची निसेली लिगड़ां तैस भोलां।” एन एल्हेरेलेइ भोवं कि ज़ैन पवित्रशास्त्रे मां लिखोरू थियूं तैन पूरू भोए कि, “तैनेई मेरां लिगड़ां बंटा ते मेरे कोटेरे लेइ शर्त रखवू ते सिपैहीयेइ एन कियूं।”

25 यीशुएरे कूरुसे कां तैसेरी अम्मा ते तैसेरी अम्मारी बेइन मरियम ज़ै क्लोपासेरी कुआन्श थी, मरियम मगदलीनी खडखड़ी थी। 26 यीशुए अपनि अम्मा ते अक अपनो चेलो ज़ैस सेइं तै प्यार केरतो थियो, तैस कां नेडे खडखड़ो लाव त तैनी अपने अम्मा सेइं ज़ोवं, “हे कुआन्श, हेर, तेरू मट्टूए।” 27 ते चले जो ज़ोवं, “अजेरां बाद, ई तेरी अम्मा आए, तैनी चले तैखने तै अपने घरे नेइ।”

(27:45-56; 15:33-41; 23:44-49)

28 ज़ैखन यीशुए ज़ानू कि हुनी सैरी गल्लां पूरी भोइजेइ, एल्हेरेलेइ ज़ेन्त्रेरे पवित्रशास्त्रेरे मां लिखोरू थियूं तैन पूरू भोवं त तैनी ज़ोवं, “मीं टलिश लगगोरीए।” 29 तैड़ी अक भांड सिरके सेइं भेरतां रखोरू थियूं, केन्चे जूफेरी डालड़ी तैस मां डोबतां यीशुएरे ऐशी सेइं हुराई। 30 ज़ैखन यीशुए च़खवू त तैनी ज़ोवं, “पूरू भोवं” ते क़ोड़ी टलोइतां अपने प्राण दित्ते।

(27:45-56)

31 ते एल्हेरेलेइ कि तै तियेरी दिहाड़ी थी, होरसां आरामेरी दिहाड़ी ते कने फ़सह तिहार थियूं। ई यहूदी केरे लेइ खास दिहाड़ी थी, यहूदी न थिये चाते कि आरामेरे दिहाड़े लाशां कूरुसन पुड़ टंगोरी रान, एल्हेरेलेइ तैनेई पिलातुसे कां गेइतां ज़ोवं, कि मुर्जमां केरि ज़न्धां टलोइतां तैन केरि लाशां उन्दी उसालम। 32 सिपाही आए तैनेई पेइले मैनेरी ज़न्धां टलोड़ी, फिरी होरेरी भी, ज़ैना यीशु सेइं साथी कूरुसे पुड़ च़ाढ़ोरे थिये। 33 पन ज़ैखन यीशुएरी

बारी अई त तैनेई हेरू कि ते पेइले मेरि जेवरोए, ते तैनेई तैसेरी जन्घां न टलोडी। ³⁴ पन सिपेहिन मरां एक्के अपनि बलम एन्तां यीशुएरे देल्लोडी मां बाई ते तैखने खून त पानी बगने लगू। ³⁵ जैनी मैने एन हेरू, तैनी गवाही दिक्ती, ते तैसेरी गवाही सच्चोए, ते तै ज्ञानते, कि सच्च ज़ोते कि तुस भी विश्वास केरा। ³⁶ एना सैरी गल्लां एल्हेरेलेइ भोइ कि पवित्रशास्त्रे मां लिखोरू पूरू भोए, “तैसेरी कोई हडी न टलोडी गाए।” ³⁷ पवित्रशास्त्रेरे एक्की होरि वचने मां लिखोरूए, “तैस ज़ैनेई बलमी सेइं बाई तैना तैस हेरेले।”

ॐॐॐॐ ॐॐॐ

(ॐॐॐॐ 27:57-61; ॐॐॐॐ 15:42-47; ॐॐॐॐ 23:50-56)

³⁸ एना गल्लां केरे पत्ती अक मैन्हू यूसुफ नंवेरो ज़ै अरिमतियाह इलोव्वेरो रानेबालो थियो, पिलातुसे कां बिनती केरने लगो, कि यीशुएरी लाश दे, ए मैन्हू यहूदी लोकां केरे प्रधानां केरे डरे सेइं छेपतां यीशुएरो चेलो थियूं, तै पिलातुसे तैस अजाजत दिक्ती, ते तैनी यीशुएरी लाश नेही। ³⁹ नीकुदेमुस भी अव, जैनी एक्की बार राती यीशु सेइं मुलाकात कियोरी थी, तैनी गन्धरस ते एलवा आनोरे थिये, एन तेत्ती किल्लो थियूं। ⁴⁰ तैखन तैनेई यीशुएरी लाश नेइतां यहूदी केरे दबनेरे रसमरे मुताबिक तैस खुशबूदार चीजां लेइतां कफने मां पलेटतां रख्खी। ⁴¹ जैडी यीशु कूरूसे पुड़ ज़ाढोरो थियो तैडी बागी मां अक नंवी कबर थी, जैस मां पेइली कोई लाश न थी। ⁴² ते ए यहूदी केरि आरामेरी तियेरी दिहाडी थी ते कबर भी नेडे थी तैनेई यीशुएरी लाश तैडी रख्खी।

20

ॐॐॐॐ ॐॐॐॐ

(ॐॐॐॐ 28:1-8; ॐॐॐॐ 16:1-8; ॐॐॐॐ 24:1-12)

¹ हफतेरी पेइली दिहैडी झेझां हेजू आंधरू थियूं मगदलीन इलंवेरी मरियम कबरी पुड़ आई, तैसां हेरू कि कबरी करां घोड़ भी खडो कियोरोए। ² ते दौवइती शमौन पतरस ते होरि चले कां पुज़ी ज़ै यीशु सेइं प्यार केरतो थियो, ज़ोने लगी, “तैनेई प्रभुएरी लाश कबरी मरां केढतां नीयोरो, ते असन नई पतो तै कोडि रख्खोरोए।” ³ एना शुन्तां पतरस त अक होरो चेलो कबरारे पासे चले। ⁴ ते दुइये साथी-साथी दौवइतां चलोरे थिये, पन तै होरो दुइयोवं चेलो पतरस करां अग्रोवं निस्सी जेव, ते तैस करां पेइलो कबरी पुड़ पुजो। ⁵ तैनी लिक्तां तक्कू ते कफन लाव ते अन्तर न जेव। ⁶ तैखन शमौन पतरस भी पत्ती-पत्ती तैडी पुजो ते सिधो कबरी मां जेव तैनी हेरू कि तैडी लिगडां थियां। ⁷ ते कफनेरो तै रुमाल भी ज़ै यीशुएरे दोग्गे सेइं पलेटोरो थियो, लिगडन मां नई पन अलग ठैरी थियो। ⁸ तैखन तै होरो चेलो भी ज़ै कबरी पुड़ पेइलो पुजोरो थियूं अन्तर जेव तैस भी लेइतां याकीन भोवं। ⁹ किजोकि तैनेई पवित्रशास्त्रेरी ए गल न थी समझोरी जेसेरे बारे मां यीशुएरू मुडदन मरां जीतू भोनू ज़रूरी थियूं। ¹⁰ तैखन एना चले वापस घरजो चले जे।

ॐॐॐॐ ॐॐॐॐॐॐॐ ॐॐॐॐ ॐॐॐॐॐॐॐ ॐॐॐॐ

(ॐॐॐॐॐ 28:9-10; ॐॐॐॐॐ 16:9-11)

¹¹ पन मरियम कबरी करां बेइर लेरां देंती थी। लेरां देंती-देंती तैसां लिक्तां कबरी मांजो तक्कू। ¹² त तैडी तैसां दूई स्वर्गदूत लाए ज़ैन छित्तां लिगडां लग्गोरां थियां, ज़ैडी यीशुएरी लाश रखोरि थी तैडी अक शरेइते ते होरो परेइंते बिश्शोरे लाए। ¹³ तैनेई तैस पुच्छू, “हे कुआन्शे तू किजो लोरिस लेरां देने?” मरियमा ज़ोवं, “तैनेई मेरे प्रभुएरी लाश नेवरीए ते पतो नई कोडि रख्खोरोए।” ¹⁴ एना ज़ोते तै पत्रोवं बेदलोई त तैडी यीशु खडखडो लाव, पन तैस पिशान न आई कि ए यीशुए। ¹⁵ यीशुए ज़ोवं, “हे कुआन्शे तू किजो लेरां देने लोरिस? तू केस तोपने लोरिस?” तैसां समझू कि कोई बागबाने, तैसां ज़ोवं, “हे जनाब अगर तीं तै नीयोरोए त ज़ो कि तीं कोडि रख्खोरोए ते अवं तैस नेइ।” ¹⁶ यीशुए तैस सेइं ज़ोवं, “मरियम!” तैसां तैसेरे पासे फिरतां इब्रानी मां ज़ोवं, “रख्खनी!” जेसेरो मतलबे हे गुरू। ¹⁷ यीशुए ज़ोवं, “मीं सेइं न हुरा किजोकि अवं बाजी कां बाह हेजू नई जोरो, पन मेरे दलान गेइतां ज़ो कि अवं अपने बाजी ते तुश्शे बाजी ते अपने परमेशर ते तुश्शे परमेशरे कां बा चलोरोई।” ¹⁸ मरियम मगदलीनी तैट्ठां चली जेई ते चलन कां गेइतां तैन पतो दिक्तो, “मीं प्रभु लाहोरोए ते तैनी मीं सेइं एना गल्लां की।”

ॐॐॐॐ ॐॐॐॐ ॐॐॐॐॐ ॐॐॐॐ

(ॐॐॐॐॐ 28:16-20; ॐॐॐॐॐ 16:14-18; ॐॐॐॐ 24:36-49)

तैनी ज़ोवं, “हाँ प्रभु, अवं तीं सेइं प्यार केरताई।” यीशुए तैस सेइं ज़ोवं, “मेरी भैड्डां सम्भाल।” ¹⁷ तैनी ट्लेइयोवं फेरे फिरी पुच्छू, “शमौन यूहन्नेरे मट्टा, कुन तू मीं सेइं प्यार केरतस?” पतरस दुःखी भोइतां ज़ोवं, “प्रभु तू एप्पू सैरी गल्लां ज्ञानतस, तू ज्ञानतस, कि अवं तीं सेइं प्यार केरताई,” यीशुए, ज़ोवं, “मेरी भैड्डां चार।” ¹⁸ अवं तीं सेइं सच्च ज़ोताई, ज़ैखन तू नौजवान थियो त अपनू मज़ एप्पू बंधतो थियो, ते ज़ैडी चातो थियो, एप्पू गातो थियो, पन ज़ैखन तू बुढो भोलो, त अपने हथ अग्रोवं केरेलो, ते होरो तेरू मज़ बंधेलो ज़ैडी तू न चालो तैडी तीं नेले। ¹⁹ यीशुए ए गल ज़ोइतां इशारो कियो कि पतरस कोस मौतां मेरतां परमेशेरी महिमा बांदी केरेलो। तैखन यीशुए ज़ोवं, “मीं पत्ती चल!”

???? ? ? ???? ???? ???? ???? ?

²⁰ पतरसे फिरतां तक्कू, कि यीशु सेइं प्यार केरनेबालो चेलो तैस पत्ती चलोरोए थियो, ए तै चेलो थियो ज़ैनी रोट्टी खाते यीशुएरे पासे लिक्तां पुच्छेरू थियूं, “हे प्रभु तै कौने, ज़ै तीं ट्लुवालो?” ²¹ पतरसे तैसेरे पासे तेकतां यीशुए पुच्छू, “हे प्रभु एस चले सेइं कुन भोलू।” ²² यीशुए जुवाब दित्तो, अगर अवं चैई कि, “अगर मेरे वापस एजने तगर ज़ींतो राव त एसमां तीं कुन? तू मीं पत्ती चल।” ²³ एन्चरे द्लान मां ए गल सेभीए फैली जेई, कि ए चेलो न मरेलो, पन यीशुए एन न थियूं ज़ोरू, कि तै न मरेलो अगर अवं चैई कि, “अगर मेरे वापस एजने तगर ज़ींतो राव, त एसमां तीं कुन?”

???? ???? ?

²⁴ ई तै चेलोए, ज़ै इना गल्लां केरि गवाही देते, ते ज़ैनी एना गल्लां लिखोरिन, असां ज्ञानतम कि तैसेरी गवाही सच्चि।

²⁵ यीशुए होरां भी बडां कम्मां कियोरां थियां, अगर सेभी केरे बारे मां लिखनू भोए त अवं समझताई, कि तैना किताबां अज़ भोथी त तैन केरे लेइ इस दुनियाई मां ठार न थी भोनी।

प्रेरितां केरां कम्मां

१ २२२२२२ २२२२ २२२२२२२२

1 जनाब थियुफिलुस, मीं अपनि पेइली किताब मां तैना सैरी गल्लां लिखोरिन, जैना यीशु शुरू मां केरतो ते शिखालतो राव, 2 तैस दिहैड़ी तगर जेइस तै स्वर्गे मांजो नीयो जेव । तैस करां पेइले तैनी अपने चुनोरे प्रेरितन पवित्र आत्मा रे शेक्तेरे जिरिये सेइं किछ हुक्म भी दित्तोरे थी । 3 यीशुए दुःख झैलनेरां ते मौतरे बाद तैनी अपने जीते भोनेरां काई पक्कां सबूतां तैन हिरां, ते 40 दिहाइन तगर तैन लेइहोतो राव, ते परमेशेरे राज्जेरे गल्लां शुनातो राव । 4 एक्की फेरे जैखन यीशुए अपने चलन सेइं साथी थियो तैनी तैन ठाकू, “कि तुस यरूशलेम नगरे मरां बेइर न गेइयथ ते मेरे बाजी परमेशेरो तै वादो पूरो भोनेरो इंतजार केरथ, जेसेरे बारे मां तुसेईं मीं करां शुनोरू भी आए । 5 किजोकि यूहन्ना त लोकन पैनी सेइं बपतिस्मो दित्तो, पन तुसन थोडे दिहैड़ना पत्ती पवित्र आत्मा सेइं बपतिस्मो दित्तो गालो (यानी परमेश पवित्र आत्मा भेजेलो जै तुसन सेइं साथी रालो)”

२२२२२२२ २२२२२२२ २२ २२२२

6 जताली प्रेरित दुबारा यीशु सेइं मिले, त तैनेईं तैस पुच्छू, “हे प्रभु, कुन तू इस वक्ते फिरी इस्राएले तैसेरू राज देने बालोस?” 7 तैनी तैन सेइं ज़ोवं, “तैस वक्तेरो या जेइस तैना गल्लां भोली, तैन केरे बारे मां तुसन ज्ञान्नेरी कोई जरूरत नई, जैना बाजी परमेशेरे अपने अधिकार मां रेखोरिन । 8 पन पवित्र आत्मा जैखन तुसन पुड़ उतरेली त तुसन शक्ति मैलेली, ते तुस यरूशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोले ।” 9 एना गल्लां ज़ोनेरां पत्ती यीशु तैन केरे सामने हेरते-हेरते परमेशेरे तै स्वर्गे जो नीयो, ते बिदलारां तै तैन केरे एछ्छन करां छुपाव । 10 जैखन तैना यीशुए अम्बरे मांजो गांतो तकने लोरे थिये, त अचानक, दईं मडद जैन छित्तां लिगडां लगगोरां थियां तैन कां एइतां खड़े भोए । 11 ते ज़ोने लगे, “हे गलीली मडदाव तुस खड़खड़े अम्बेरे पासे कुन तकने लोरेथ? एहे यीशु जेन्चरे तुशे सामने परमेशेरे, स्वर्गे मांजो नीयो, जेन्चरे तुसेईं स्वर्गे मांजो गांतो लाहोरोए तेन्चरे फिरी एइतो लाएले ।”

२२२२२२२२२ २२२२२२२२ २२२२२ २२२२२

12 जैखन चले जैतून पहाड़े पुड़ेरां जैन यरूशलेम नगरेरे नेडे एक्की किलोमीटर दूरे, यरूशलेम नगरे मांजो वापस आए । 13 नगरे मां एइतां तैना तैस कमरे मां जे जैड़ी तैना रहते थिये, तै कमरो दुइयोवं छते थियो । तैना प्रेरित इना थिये, पतरस, यूहन्ना, याकूब, अन्दरयास, फिलिप्पुस थोमा, बरतुल्मै, मत्ती ते हलफईरू मट्टू याकूब ते शमौन जेलोतेस ते याकूबेरू मट्टू यहूदा रहते थिये । 14 एना सब मडद ते किछ होरि कुआन्शां जैनेईं यीशुएरी महत कियोरी थी, ते यीशुएरी अम्मा मरियम ते यीशुएरे दलान सेइं साथी अक मन भोइतां लगातार प्रार्थनाई मां लगगोरे थिये ।

15 ते तैने दिहाइन मां पतरस तैन दलां केरि टोली मां जैन केरि तैधात कोई 120 थिये, पतरस खड़ो भोइतां ज़ोने लगे । 16 “हे मेरे दलाव, पवित्रशास्त्रेरी तै गल जै पवित्र आत्मा दाऊद राजेरी जिरिये पेइले ज़ोरी थी, पूरी भोनी जरूरी थी, तै गल यहूदारे बारे मां ज़ोरी थी, जैनी यीशुएरे टलुवांने बालां केरि महत कियोरी थी । 17 तै असन सेइं साथी सेवा करनेबालो थियो, ते असन साथी तै गनो गातो थियो । 18 तैनी नीच कमैयरे लेइ यीशु टलुवाव, ते फिरी तैनी तैना पेइंसे यहूदी लीडरन वापस दित्ते, ते तैनेईं तैन पेइंसां केरू अक ऊडार धिन्नु, जैड़ी तै दोगोरे भारे खिरकोरो थियो, ते तैसेरू पेट फेटतां तैसेरी एंटलोडी बेइर निस्सी ।” 19 यरूशलेम नगरेरे सारे लोकन ए पतो लगगोरो थियो, तैनेईं अपने भाषाई मां तैस उडारेरू नवं हकलदमा रख्खू, जेसेरो मतलबे, “खूनेरू ऊडार ।”

20 किजोकि दाऊदे भजना केरि किताबी मां लिखोरूए कि,
“तैसेरू घर उजड़े,
ते तैस मां कोई बसने बालो न भोए,
ते इन भी लिखोरूए, तैसेरी पदवी कोई होरो ने ।”

21 एल्हेरेलेइ एन जरूरीए कि अक एरो मैन्हु चुनो गाए, जै प्रभु यीशुएरे सारे कम्मां केरे गवाह भोए, यानी यीशुएरो यूहन्ना करां बपतिस्मो नेने करां लेइतां असन करां यीशुएरे स्वर्गे गाने तगर 22 तैन मरां अक मैन्हु चुनो

गाए, जै असन सेइं साथी यीशुएरे जीते भोनेरो गवाह भोए। 23 तैखन तैनेईं दुइये जने नामजद किये, अक यूसुफ जैस जो बरसब्बास ज्रोते थिये, जेसेरो खताब यूस्तुस थियो, ते दुइयोवं मत्तियाह थियो। 24 ते एन ज्रोइतां प्रार्थना की, “हे प्रभु, तू सेब्भी केरे दिले ज्ञानतस ते असन पुड़ बांदू केर, कि इन दुईन मां तीं कौन ज़ेरो चुनोरोए। 25 कि तै इस सेवकाईं ते प्रेरिताइयोरो पद ने, जै यहूदा शैरतां अपने ठैरी जेवरोए।” 26 तैनेईं तैसेरे बारे मां शर्त रखेरू थियूं, जैन मत्तियाह नव्वे पुड़ निस्सू, एल्हेरेलेइ तै 12 प्रेरितन सेइं साथी गनो जेव।

2

?????? ????????? ?????

1 जेइस यहूदी केरे पिन्तेकुस्त तिहारेरी दिहाड़ी अई, त तैना सब एक्की ठैरी अकोट्ठे थिये। 2 अचानक अम्बरेरां आवाज आई, जेन्चरे बड़ो बात चलने लोगोरो थियो, ते तैस सेइं सारू घर घुमने लगू जैड़ी तैना विशोरे थिये। 3 ते तैनेईं अगारी लप्परी जेरि जिभां लेई, जैना अलग-अलग भोइतां तैन सेब्भन पुड़ एइतां टिकी। 4 ते तैना सब पवित्र आत्माईं सेइं भरपूर भोए, ते आत्मारो वरदाने सेइं तैना अलग-अलग भाषा केरने लगे। 5 तैस वक्ते मां, बड़े यहूदी भक्त जैना तिहारे मां दुनियारी सैरी मुलखन मरां ओरे थिये, तैना यरूशलेम नगरे मां राने लोरे थिये। 6 जैखन तैनेईं ए बातेरी जेरि आवाज शुनी त बड़े लोक जम्हां भोए, ते सब लोक बड़े हैरान रेइजे, किजोकि हर कोई चलन अपने-अपने भाषाईं मां गल्लां केरते शुन्ने लोरे थियो। 7 ते सब बड़े हैरान भोइतां ज्रोने लगे, हेरा, “कुन एना ज्रोनेबाले सारे गलील इलाकेरे रानेबाले नईं? 8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए। 9 असन मरां किछ् इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पदकिया, पुन्तुस ते आसिया, 10 फरूगिया, पंफूलिया, मिस्र मुलख, ते लीबिया मुलखे जै कुरेन नगरेरे नेडे, इन सब मुलखां केरे रानेबाले ते रोमी मुसाफर, 11 कुन यहूदी, ते कुन यहूदी पंथ धारण केरनेबाले, क्रेती ते अरब मुल्खेरे लोक भी आन, पन अस अपनि-अपनि भाषाईं मां तैन करां परमेशेरां बड्डां-बड्डां कम्मां केरि चर्चा शुन्ने लोरेम।” 12 तैना सब बड़े हैरान भोइ जे ते घबरेइतां एक्की होरि पुच्छ्ने लगे, “कि एन कुन भोइ रावरूए?” 13 पन किछ् तैन केरि हासी बनेइतां ज्रोने लगे, “कि एनेईं सज़री शराप पियोरीए।”

???????? ?????

14 तैखन पतरस 11 प्रेरितन सेइं साथी खड़ो भोव, ते बड़े ज़ोरे सेइं ज्रोने लगो, “हे लोकव हे यहूदियारे रानेबालव ते हे यरूशलेम नगरेरे राने बालाव, मेरी गल ध्याने सेइं शुना, अवं तुसन ज्रोताईं इड़ी एन कुन भोने लोरूए। 15 जैन तुस बुझने लोरेथ तैन नईं, एना मैन्हु नशे मां नईं, किजोकि हुन्ना त झेझेरे नौ बज़ोरेन, 16 बल्के ए तै गल्ले, जै परमेशेरे योएल नेबेरे ज़िरिये ज़ोरी थी,

17 परमेशर ज़ोते कि, आखरी दिहैइन मां एरू भोलू,
अवं अपनि आत्मा सेब्भी लोकन देइलो,
ते तुश्शां मट्टां कुइयां भविष्यवाणी केरेलां,
ते तुश्शे नौजवान दर्शन हेरेले,
ते बुढे सुपना हेरेले।

18 बल्के अवं तैन दिहैइन मां अपने सेवादर मड्डन ते सेवादर कुआन्शन पुड़
अपनि आत्मा उतरेलो, ते तैना भविष्यवाणी केरेले।

19 अवं अम्बरे मां आजीब-आजीब कम्मां
ते ज़मीनी पुड़ निशान,
यानी अग, खून ते कालो तूएरी विदलार हिरेयेलो।

20 प्रभुएरी दिहाड़ी एजने करां पेइले,
दिहाड़ो आंधरो भोइ गानोए,
ते चाँदनी खूनेरी जेरि भोनीए,
तै अक महान ते खास दिहाड़ी भोनीए।

21 ते जै कोई परमेशेरेरू नवं घिन्नेलो तैस मुक्ति मैलेली।”

22 “हे इस्राएलेरे लोकव, इना गल्लां शुना, यीशु नासरत नगरेरो अक मैन्हु थियो, जै परमेशर तुशशे लेइ भेजोरो थियो, ते एस गल्लारी तसदीक तैसेरे खास चमत्कारां केरे सबूतेई सेइं भोचे, जैना परमेशरे तैसेरे जिरिये सेइं इशशे सामने हिरां, जेन्चरे कि तुस एप्पू भी ज्ञानतथ । 23 जैखन तै परमेशरेरे इंतजामेरे पूरे मौके पुइ ज्ञानेरे हिसाबे सेइं ट्लुवाव, ते तुसेई तै अधर्मी लोकां केरे हथ्ये कूरुसे पुइ टंगेइतां माराव । 24 पन परमेशरे तै मौतरे सकेंजे मरां छुटेइतां जीतो कियो, किजोकि एन भोइ न थियूं सकतु, कि तै मौतरे कब्जे मां राए । 25 किजोकि दाऊद मसीहेरे बारे मां एन ज़ोते,

हेरा, प्रभु हर वक्त मेरे सामने,

अवं तैन लोकन करां न डरेलो जैना मेरो नुकसान चातन ।

26 तांए मेरो दिल बड़ो खुश भोव, ते अवं खुशी सेइं ज़ोइलो,

बल्के मेरी जान उमीदी सेइं जीएली ।

27 किजोकि तू मेरे प्राणन पाताले मां राने न देलो,

ते न अपने पवित्र मैन्हु शडने देलो!

28 तीं मीं ज़िन्दगरी बत हेरेवरिए,

तू अपने हज़ूरी सेइं मीं भरपूर केरेलो ।”

29 “हे मेरे ढूलाव, अवं कौमारे बुज़ुर्ग दाऊदरे बारे मां तुसन सेइं साफ-साफ ज़ोई सकताई, कि तै मेरि भी जेव, ते दब्बो भी ते तैसेरी कबर अज़ तगर इशशे सामने मौजूद । 30 तै नबी थियो, ते तै ज्ञानतो थियो, कि परमेशरे तैस सेइं वादो कियोरो थियो, ‘अवं तेरी खानदेंनी मरां अक मैन्हु तैसेरे तखते पुइ विश्लेलो ।’ 31 तैनी पेइले भोनेवैली गल्लां ते मसीहेरे मुइदन मरां जीते भोनेरे बारे मां बियांन कियेरू थियूं, कि न तै पाताले मां राने देलो, ते न अपने पवित्र मैन्हु शडने देलो!

32 “एहे यीशु परमेशरे जीतो कियो जेसेरे अस सब गवाह आम । 33 ते हुना तै स्वर्गे मां खास टैरी यानी परमेशरेरे देइने पासे आए । ते तैने बाजी परमेशरे करां पवित्र आत्मा हासिल की, जेसेरो तैने वादो कियोरो थियो, यीशुए असन पवित्र आत्मा भरपूरी सेइं दित्तोरीए, जैन तुस लातथ ते शुन्तथ ।

34 किजोकि दाऊद त एप्पू स्वर्गे मां नईं जोरो, पन फिर भी तै एप्पू ज़ोते, प्रभु परमेशरे मेरे प्रभु सेइं ज़ोवं, मीं सेइं साथी राज़ केर ।

35 ज़ांतगर अवं तेरे दुश्मन तेरे अधीन न केरि ।

36 एल्हेरेलेइ, इस्राएलेरे सारे लोकन पतो लगगे, कि परमेशरे, यीशु जै तुसेईं कूरुसे पुइ च़ाढ़ो तै प्रभु भी कियो ते मसीह भी कियो ।” 37 एना गल्लां शुन्तां तैन बड़ो एसास भोव कि तैना पापिन, तैखन तैनेईं पतरसे ते होरि प्रेरितन सेइं ज़ोवं, “हे ढूलाव अस कुन केरम?” 38 पतरसे तैन सेइं ज़ोवं, “पापन करां मनफिराथ ते तुसन मरां सारे यीशु मसीहेरे नंवे सेइं बपतिस्मो घिन्ना, त परमेशर तुसन माफ़ केरेलो ते पवित्र आत्मा तुसन इनामे मां मैलेली । 39 एल्हेरेलेइ कि ए वादो तुसन त तुशशी औलादी सेइं आए ते तैन सेभन सेइं जैना दूर-दूर रातन, ते जैन इशशो प्रभु परमेशरे एप्पू कां कुजाते ।” 40 पतरसे होरि भी बेड़ि गल्लां केरि गवाही दित्तो, ते तैन बार-बार ज़ोवं, कि अपना आप एस टैरी कौमी करां बचाथ । 41 ते तैनेईं तैसेरी गल्लां कबूल की, तैनी तैन बपतिस्मो दित्तो, तैस दिहैड़ी लगभग कोई 3000 मैन्हु तैन मां शामिल भोए । 42 एना लोक प्रेरितन करां शिक्षा हासिल केरते थिये, ते संगती रखते थिये, ते साथी रोट्टी खाते थिये, ते प्रभु भोज मनाते थिये ते प्रार्थना केरने मां मघन रहते थिये ।

???????? ?????????????? ????????? ?????????

43 प्रेरितां केरे जिरिये सेइं बड़े चमत्कार ते निशान भोते थिये, ते यरूशलेमेरे सारे लोक डेरि जे । 44 यीशु मसीह पुइ विश्वास केरनेबाले सारे अकोट्टे रहते थिये, ते सैरी चीज़न मां एक्की होरि बराबर हिस्सेदार रखते थिये । 45 ते तैना अपनि जेइदात ते माल सबाब बेच़तां एक्की होरेरी ज़रूरतरे मुताबिक रकम बेंटतां सेभी केरि ज़रूरत पूरी केरते थिये । 46 तैना रोज़ अक मन भोइतां मन्दरे मां अकोट्टे भोते थिये, ते घरन मां साथी रोट्टी खाते थिये ते प्रभु भोज मनाते थिये, ते अकोट्टे भोइतां खुशी सेइं खाते थिये । 47 तैना परमेशरेरी तारीफ़ केरते थिये, तैना सैरी केरि नज़री मां रोड़े थिये । जैन पापन करां मुक्ति मैलती थी, परमेशर तैन लोकन तैन केरि टोली मां शामिल केरतो थियो ।

3

११११११ ११११११ ११११११

1 एक्की दिहाड़े पतरस ते यूहन्ना प्रार्थना करने दीसेरे ट्लेइ बजेइ मन्दरे मांजो चलोरे थियो। 2 ते मैनेई अक जर्मनेरो टोंटो छुइतां आनोरोए थियो, ते तैस मन्दरेरे दारे पुड़ छुइते थियो, जैस दारेरु नव “रोडू” थियूं, ताके अन्तर गाने बालन करां भीख मग्गे। 3 जैखन तैनी पतरस ते यूहन्ना मन्दरे मांजो गांते लाए त तैन करां भीख मगने लगो। 4 पतरस ते यूहन्ना तैसेरे पासे खेडोइतां ज़ोने लगो, “इश्शे पासे तक।” 5 ते तैस उमीद भोइजेइ कि एन करां किछ मैलेलू, तै तैन केरे पासे तकने लगो।

6 पतरसे ज़ोव, “सोन्नु चाँदी त असन कां अथ्थी नई, पन ज़ैन मीं कां आए तैन अवं तीं देताई, तू यीशु मसीह नैसेरे नव्वे सेइं खडो उठ ते चल फिर।” 7 पतरसे ज़ेरो तैसेरो देइनो हथ टलेइतां खडो कियो, त तैसेरे पावन मां ते गुडन मां ताकत आई। 8 ते तै तैखने खडो भोव, ते चलने फिरने लगो, ते फिरी छालां मारतो ते परमेशेरी तारीफ़ केरतो तैन सेइं साथी मन्दरेरे अंगने मां चलो जेव। 9 ते सेम्भी लोकेई तै चलतो फिरतो ते परमेशेरी तारीफ़ केरतो लाव। 10 ते पिशानो ई त तैए, ज़ै मन्दरेरे रोडे दारे पुड़ बिश्तां भीख मगतो थियो, ते ज़ै चमत्कार एन लोकां केरे सामने भोव, त तैना लोक बडे हैरान राए।

१११११११ ११११ ११११११ ११११११११ १११११११

11 जैखन तै मैन्हु पतरस ते यूहन्ना ट्लेइतां खडखडो थियो, त सब लोक ज़ैना तैड़ी खडखडे थियो, बडे हैरान भोइतां सुलैमानी अंगने मां देवइतां तैन कां आए। 12 पतरसे एन हेरू त तै लोकन कां एन्चरे खडो भोव, ते ज़ोने लगो, “हे इस्राएली लोकव तुस एस गल्ली पुड़ किजो हैरान भोरेथ, ते असन एन्चरे किजो तकने लोरेथ, असेई अपने शक्ति या भक्ति सेइं ए टोंटो मैन्हु चलने फिरनेरे काबल नई बनेवरोए। 13 अब्राहम ते इसहाक ते याकूबेरे परमेशेरे ते इश्शे पूर्वजां केरे परमेशेर अपने दासे यीशु महिमा दिती, पन तुसेई तै यहूदी लीडरन कां दित्तो कि तैना तैस मारन। पिलातुसे तै हथरां छुडनेरो इरादो कियो, पन तुसेई यीशुएरो इन्कार कियो। 14 तुसेई यीशु अक एरो पवित्तर ते धर्मी मैन्हु रद कियो, ते पिलातुसे कां दरखुवास की, कि तै तुश्शे लेइ अक कातली हथरां छुडे। 15 तुसेई त ज़िन्दगी देनेबालो मारो, पन अस गवाह आम, कि परमेशेरे तै मुडदन मरां जीतो कियो। 16 तैसेरे नव्वेरी शक्ति एस टोंटे, ज़ै तुश्शे सामने ते ज़ैस तुस ज्ञानतथ शिफा दित्तोरिये ते ए मैन्हु यीशुएरे नव्वे सेइं ते यीशु पुड़ विश्वास केरने सेइं बिलकुल ठीक भोव, ते ए एप्पू तुश्शे सामने।

17 “हे मेरे दूलाव अवं ज्ञानताई कि ज़ैन किछ तुसेई ते तुश्शे लीडरेई यीशु सेइं कियूं, तैन तुसेई अनज्ञान भोइतां कियूं। किजोकि तुसन न थियो पतो कि तै मसीह आए। 18 पन परमेशेरे एना सैरी गल्लां ज़ैना तैनी अपने नेबी केरे ज़िरिये ज़ोरी थी, कि मसीह दुःख ऊठालो ते मरेलो ते तैनी तैना एन्चरे पूरी की। 19 बस्सा पापन करां मनफिराथ ते परमेशेरे पासे फिरा ते तै तुश्शे पाप माफ़ केरेलो, ते परमेशेरी तरफां तुश्शे लेइ परमेशेरे तरफां रोडे दिहाड़े एज्जेले। 20 ते तै मसीह यानी यीशु ज़ै तैनी ठहरावरो आए, तुश्शे लेइ भेजे। 21 पन ज़ांतगर तैना सैरी चीजां बहाल न केरे, ज़ैन केरे बारे मां परमेशेरे बडे पेइले अपने पवित्तर नेबी केरि ज़बानी ज़ोरूए, तांतगर यीशुएरू स्वर्गे मां रानू ज़रूरीए। 22 ज़ेन्चरे मूसा एस बारे मां ज़ोरू थियूं, प्रभु परमेशेर तुश्शे दूलान मरां तुश्शे लेइ मेरो ज़ेरो अक नबी भेजेलो, ज़ैन किछ तै तुसन सेइं ज़ोए, तुस तैसेरी गल शुनथ। 23 पन ज़ै तैस नेबेरी गल न शुनेलो, तै लोकन मरां नाश कियो गालो। 24 ते शमूएल परमेशेरी गल्लां ज़ोनेबाले करां देइतां पेइले तमाम नेबेई इन दिहाडां केरे बारे मां शुनावरू। 25 तुस नेबी केरि खानदेनी ते ज़ै करार परमेशेरे इश्शे पूर्वजन सेइं कियोरो थियो, तैस मां तुस सब शामलथ, परमेशेरे अब्राहमे सेइं ज़ोरू थियूं, कि तेरे मट्ठेरे ज़िरिये सेइं दुनियारी तमाम कौमन बरकत मैलेली। 26 परमेशेरे अपनो सेवक मुडदन मरां जीतो कियो ते पेइलो तुसन कां भेजो, ताके तुसन तै बरकत दे, कि तुसन मरां हर कोई पापेरी ज़िन्दगी शैरतां परमेशेरे पासे फिरे।”

4

१११११११११ ११११ ११११११

1 हेजू पतरस ते यूहन्ना लोकन सेइं गल्लां केरते थियो, त किछ याजक ते मन्दरेरे परहेदार ते किछ सद्की लोक तैड़ी पुजे। 2 तैना बडे सेरकोए, कि पतरस ते यूहन्ना लोकन एरी शिक्षा देते कि परमेशेरे मरे लोकन जीतो केरेलो, ज़ेन्चरे तैनी यीशु मुडदन मरां जीतो कियोरोए। 3 तैनेई तैना दुइयोवं दिहैड़ी तगर गिरफ्तार रखवे, किजोकि तै

32 विश्वास करनेवालां केरि मण्डली अक मन ते अक जान थी, कोई भी एरो न थियो जै अपनो माल अपनो समझतो भोए, बल्के होरन भी सैरी चीजन मां शामिल रखते थिये। 33 ते प्रेरित बेड़ि शेक्ति सेइं प्रभु यीशुएरे मुडदन मरां जीते भोनेरी गवाही देते थिये, ते तैन पुड़ परमेशेरो बड़ो अनुग्रह थियो। 34 तैन मरां कोई भी गरीब न थियो, किजोकि जमीना केरे त घरां केरे मालिक तैन बेचतां तैन केरि कीमत प्रेरितन कां आनते थिये। 35 ते तैना तै रकम प्रेरितन देते थिये, ते हर केन्ची तैसेरी ज़रुरतारे मुताबिक बेंटतां देते थिये। 36 यूसुफ नव्वेरो अक लेवी थियो, जै साइपरसेरो रानेबालो थियो, ते प्रेरितेई तैसेरू नवं बरनबास रखेरू थियूं, (जेसेरो मतलबे शैनतरु मट्टू)। 37 तैनी अपनू ऊडार बेचू, ते कीमत एन्तां प्रेरितन दिती।

5

???????? ? ? ?

1 हनन्याह नव्वेरो अक मैन्हु थियो, ते तैसेरी कुआन्शरू नवं सफीरा थियूं ते तैनेई अपनि जेईदातरो किछ हिस्सो बेची छड्डो। 2 ते कीमती मरां किछ पेंडसे एप्पू कां रखे, जेसेरो तैसेरी कुआन्शी भी पतो थियो, ते बाकी होरे पेंडसे एन्तां प्रेरितन दिते। 3 पन पतरसे तैस सेइं ज़ोवं, “हे हनन्याह! शैताने तेरे मने मां ए गल केन्चरे छडी, कि तू पवित्तर आत्माई सेइं झूठ ज़ोस, ते ज़मीनारे पेंडसन मरां किछ रेखवी छडस? 4 कुन बेचने करां पेइले ज़मीन तेरी न थी, पन बेचनेरां बाद कुन पेंडसो तेरो न भोव? तीं अपने मने मां किजो सोचू? तीं मैन्हु सेइं नई बल्के परमेशे सेइं झूठ ज़ोरूए।” 5 हनन्याह एन शुनते खिरकी जेव, ते तैसेरे प्राण निस्से, ते ज़ैन लोकेई एन शुनू त तैना बड़े डेरि जे। 6 तैखन किछ नौजवान आए ते तैनेई तैसेरी लाश कफने मां पलेटतां ते बेडरोवं नेइतां देबतां छडी। 7 ट्लेइ घैन्टना पत्ती तैसेरी कुआन्श आई, ते तैस एस बारे मां कोई पतो न थियो। 8 पतरसे तैस पुच्छू, “मीं ज़ो, कुन तुसेई दुइयेई ज़मीन एतरे मां बेचोरी थी?” तैसां ज़ोवं, “हाँ कुल कीमत एतरी मैल्लोरी थी।” 9 पतरसे तैस सेइं ज़ोवं, “प्रभुएरी आत्मा अज़मानेरे लेइ तुस केन्चरे सेइं राजी भोए, ते ज़ैन लोकेई तेरो मुन्श दबोरोए, तैन केरे पाव हेर दारे पुड़ आन, ते तैना तीं भी बेडरोवं धिनी गाले।” 10 तै कुआन्श तैखने तल्ले बिछड़ी, ते तैसारे भी प्राण निस्से, ते ज़ैखन नौजवान अन्तर आए त तै कुआन्श मरीं लेइतां तै भी छुइतां तैसारे मुन्शे इलाखोरां देबतां छडी। 11 सैरी यरूशलेमेरी कलीसिया ते एन गल्लां केरे शुन्ने बाले बड़े डेरि जे।

???????? ? ? ?

12 प्रेरितां केरे ज़िरिये बड़े चमत्कार ते निशान बांदे भोए, ते सारे विश्वासी अक भोइतां सुलैमानी अंगने मां जम्हां भोते थिये। 13 हालांकी होरे लोक तैन केरि बड़ी इज्जत केरते थिये, पन केन्ची हिम्मत न आई कि तैन मां शामिल भोन। 14 बड़े मडदेइं ते कुआन्शेई विश्वास कियो ते तैन लोकां केरि मेनडली मां शामिल भोए, ते परमेशर मन्ने बालां केरि तैधात बद्धती चली। 15 ज़ैन प्रेरितेई कियूं तैसेरो नितीजो ई भोव, कि लोक बिमारन खट्टन पुड़ ते पिट्टी पुड़ छुइतां सड़की मां रखते थिये, कि पतरस ज़ैखन तैस बत्तां एज्जे त तैसेरी छाव त तैन पुड़ पे। 16 यरूशलेम नगररे च़ेवरे पासना इलोवां केरे बड़े लोक बिमारन ते ज़ैन पुड़ भूतां केरो सैयो, एप्पू सेइं साथी आनते थिये, ते तैना सब बेज्जोते थिये।

???????????????? ? ? ?

17 तैखन महायाजक ते तैसेरे साथी ज़ैना सद्की केरे फिरके मरां थिये, तैन बड़ी जलन भोने लगी ते तैना प्रेरितां केरे खलाफ खड़े भोए। 18 ते तैनेई प्रेरित ट्लुवेइतां कैद मां छेडडी दिते। 19 पन प्रभुएरो राती स्वर्गदूत कैदखाने मां दार खोलतां प्रेरितन कां जेव, ते तैना बेडर केढतां तैन सेइं ज़ोने लगो। 20 “गाथ ते मन्देरेरे अंगने मां खड़े भोइतां हमेशारे ज़िन्दगरे बारे मां लोकन बिस्तार देथ।” 21 तैना एन शुन्तां झेझां मन्देरेरे अंगने मां पुजे ते ज़ेन्चरे तैन स्वर्गदूते हुक्म दित्तोरो थियो, तेन्चरे लोकन शिक्षा देने लगे, ते ज़ैखन इस्राएली महायाजक ते तैसेरे साथी तैड़ी आए, त तैनेई महासभा ते सब यहूदी केरे सारे बुज़ुर्ग कुजाए, ते तैनेई यीशुएरे प्रेरित कैदखाने मरां कुजाए। 22 ज़ैखन मन्देरेरे पेरहेदार कैदखाने मां पुजे त तैन प्रेरित तैड़ी न मैल्ले, ते वापस एइतां तैन खबर दिती। 23 “असेई कैदखानो रोड़ेचारे बंद कियोरी थियो, ते पेरहेदार भी असन दारे मां खडखडे मैल्ले, पन ज़ैखन असेई कैदखानो खोल्लो त अन्तर कोई न मैल्लो।” 24 एना गल्लां शुन्तां मन्देरेरे पहेदारां केरो प्रधान, प्रधान याजक ते सारे लोक हैरान रेइजे, ते तैन केरि फिकरी मां पे कि हुनी कुन भोनूए! 25 तैखन केन्चे एइतां ज़ोवं, “तैना मैन्हु ज़ैना

तुसेई कैदे मां छडोरे थिये, तैना मन्दरे मां खडे भोइतां शिक्षा देने लगोरेन ।” 26 तैखन मन्दरेरे पहरेदारां केरे प्रधान अपने सिपाही साथी घिन्तां जे, ते प्रेरित कुजेइतां आने पन जबरदस्ती नई, किजोकि तैना लोकन करां डरते थिये, कि एरू न भोए एना असन घोडेई बान ।

27 तैनेई प्रेरित एन्तां महासभा मां पैश किये, ते महायाजके तैन पुच्छू । 28 “असेई तुसन ठाकेरू थियूं, कि यीशुएरू नवं घिन्तां शिक्षा न देइयथ? फिरी भी हेरा, तुसेई सारे यरूशलेम नगरे मां अपनि शिक्षा फैलाई, ते तैस मैनेरो खूनेरो दोष असन पुड़ लानो चातथ ।” 29 पतरस ते होरि प्रेरितेई जुवाब दित्तो, “असन मैन्हु केरो हुक्म मन्नेरे बजाहे परमेशेरो हुक्म मन्नो जादे जरूरीए । 30 इश्शे दादे-पड़दादां केरे परमेशेरे ए यीशु मुड़दन मरां जीतो कियो, जै तुसेई करूसे पुड़ चेटतां मारो । 31 तैए परमेशेरे, प्रभु ते मुक्ति देनेवालो बनेइतां अपने देइने पासे विशालो, ताके तै इस्राएलिन मन फिराने ते पापां केरि मैफारो मौको दे । 32 असां एन गल्लां केरे गवाह आम, ते पवित्र आत्मा भी, जै परमेशेरे तैनी अपनो हुक्म मन्ने बालन दित्तोरीए ।”

33 जैखन तैनेई एन शुनू त फुकोई जे, ते तैन केरि मर्जी लगी ज़ोने कि एन मैरी छडम । 34 पन अक फरीसी मैन्हु जेसेरू नवं गमलीएल थियूं, ते जै शास्त्री भी थियो, ते जै सेभी लोकन मां इज्जतदार थियो, तैनी महासभा मां खडे भोइतां हुक्म दित्तो कि एना मैन्हु थोडे चिरे बेइर भेजा । 35 तै एन ज़ोने लगो, “हे इस्राएली लोकव तुस जैन किछ एन मैनन् सेइं केरनू चातथ तैन रोडेचारे सोचा । 36 किजोकि थोडे चिरे पेइले थियूदास इन ज़ोइतां खडो भोरो थियो, ते ज़ोतो थियो, अवं भी किछ आई, ते लगभग 400 मैन्हु तैस सेइं मिले, पन तै मारो जेव, ते तैसेरे मन्नेबाले सारे तितर-बितर भोइ जे, ते तैन केरो नामो निशान मिटी जेव । 37 तैसेरां पत्ती मैन्हु केरे गिनतरे वक्ते गलील इलाकेरो यहूदा निसोरो थियो, ते तैनी काई लोक अपने पासे खिचारे थिये, तै भी मारो जेव, ते तैसेरे जेत्तरे साथी थिये, सब तितर-बितर भोइ जे । 38 हुनी अवं तुसन एन्ने ज़ोताई कि एन मैनन् करां दूर भोथ, ते एन गाने देथ, किजोकि अगर एना चमत्कार, मैन्हु केरि तरफां भोले त एप्पू खतम भोइ गानेन । 39 पन अगर एना कम्मां परमेशेरेरी तरफां भोलां, त तुस एन मैन्हु केरू किछ न बिगैड़ी सकत, ते तुस परमेशेरेरे खलाफ लड़नेबाले भोले, तैनेई तैसेरी सल्लाह मन्नी ।”

40 ते प्रेरित अन्तर कुजेइतां तैन डंडेइं बावैहीतां तैन ज़ोवं, कि अज़ेरां बाद यीशुएरे नंवे सेइं कोई गल न केरथ, ते तैना हथरां छडे । 41 प्रेरित महासभा मरां चले जे, तैना एस गल्ली पुड़ खुशी थिये, कि असां यीशुएरे नंवे सेइं बेइज्जत भोनेरे काबल त भोए । 42 तैनेई शिक्षा देनी बंद न की, बल्के रोज मन्दरे मां गेइतां ते घर-घर गेइतां लगातार खुशखबरी शुनाते राए कि यीशु ही मसीह आए ।

6

?? ???? ???? ???? ?

1 ई गल तेइसेरीए जेइस चले केरि गिनती बधने लगोरी थी, यूनानी भाषा ज़ोनेवालो यहूदी चलेई इब्रानी भाषा ज़ोनेवाले यहूदी चेलां केरि शकैइत केरने लगे, कि हर दिहैडरे सेवाई मां विधवां केरि खबर न की गाए । 2 एन शुन्तां 12 प्रेरितेई सारे यरूशलेमेरे सारे विश्वासी लोक (चले) अकोट्टे किये, ते ज़ोवं, “इश्शे लेइ एन मुनासब नई कि अस परमेशेरेरी वचनेरू प्रचार केरनो छेडतां खाने पीनेरी सेवाई मां लगगम 3 एल्हेरेलेइ हे मेरे दूलाव, अपने लोकन मरां सत भलमानस मैन्हु चुना, जैना पवित्र आत्माई सेइं भरपूर ते अक्लमन्द भोन, ताके आस तैन एस कम्मेरी ज़िमेबारी सौफम ।” 4 पन अस त प्रार्थना केरने ते बच्चन शुनानेरी ते शिक्षा देनेरी सेवाई मां लगगोरो रानेम । 5 ए गल सारे लोकन पसंद आई, ते तैनेई अक स्तिफनुस जै विश्वास ते पवित्र आत्माई सेइं भरपूर थियो चुनो, ते होरे जैना चुने तैन केरां नव्वां इना आन, फिलिप्पुस पूरुखुरुस, नीकानोर, तीमोन, परमिनास ते नीकुलाउस जै अन्ताकिया नगरेरो रानेवालो थियो, ते यहूदी फिरके मां ओरो थियो । 6 ते तैना प्रेरितन कां हाज़र किये, ते तैन केरे लेइ तैनेई प्रार्थना की, ते तैन पुड़ हथ रखे । 7 एन्चरे सेइं परमेशेरेरू बच्चन फैलतु जेवं, ते यरूशलेम नगरे मां चेलां केरि गिनती बढ़ती जेई, ते याजकां केरि अक टोली विश्वासे मां आई ते मसीही भोइजेइ ।

???????????????? ???? ???? ?

8 स्तिफनुस अनुग्रह ते शक्ति सेइं भरपूर भोइतां लोकन चमत्कार ते निशान हिरातो थियो । 9 आज्जाद भोरे यहूदी लोकां केरू अक प्रार्थना घर थियूं, कुरेनी ते सिकन्दरिया ते किलिकियारे ते आसियारे किछ लोकन मरां किछ

स्तिफनुसे सेइं बेंस करने लगे । 10 तैना तैन गल्लां केरो जुवाब न देइ बटे, जैना पवित्र आत्मा तैस ज़ोनेरी समझ दिती । 11 तैखन तैनेई किछ लोक शिखाले, कि तुस झूठ ज़ोइयथ कि, “असेईं स्तिफनुस मूसेरे त कने परमेशेरे खलाफ तुहीन केरते शुनोरोए ।” 12 तैखन तैनेई किछ लोक, बुजुर्ग ते शास्त्री स्तिफनुसेरां खलाफ बमकाए ते तै टलेइतां महासभा मां पैश कियो । 13 तैनेई बड़े झूठे गवाह पैश किये, “ते तैनेई गवाही दिती कि ए मैन्हु पवित्र ठारारे ते मूसेरे कानूनेरे खलाफ तुहीन करने करां बाज़ न एज्जे । 14 ते असेईं एस मैन्हु करां एन भी ज़ोतू शुनू, कि यीशु नासरी इस मन्दरे डोलेलो, ते तैना रसमां ज़ैना मूसा नेबे दितोरिन बदलेलो ।” 15 तैखन लोक ज़ैना महासभा मां बिशशोरे थी, तैसेरे पासे तककू कि तैसेरू तुतर स्वर्गदूतेरे ज़ेरू लेइहोतू थियूं ।

7



1 तैखन महायाजके स्तिफनुसे सवाल पुछो, “कुन एना इलज़ाम सच्चे आन?” 2 तैनी ज़ोवं, “हे ढूलाव ते मेरे बुजुर्गाव, मेरी गल शुना, इशशो पूर्वज अब्राहमे हारान नगरे मां बसने करां पेइलो मेसोपोटामिया इलाके मां थियो, ते महिमा बाले परमेशेरे तैस दर्शन दितू 3 ते परमेशेरे तैस सेइं ज़ोवं, अपनो देश त अपने रिशतेदारन शैरतां तैस मुलखे मां गा, जै अवं तीं हरेइलो । 4 तांए तै कसिदी केरे मुलखे शैरतां हाराने मां बसोरो थियो, तैसेरे बाजेरे मरनेरां पत्ती परमेशेरे तै तैस मुलखे मां आनो जैस मां अज तुस बसोरेथ । 5 पन परमेशेरे तैस इडी किछ भी जेइदात न दिती, बल्के पाव रखने जो भी ज़मीन न दिती, पन वादो ज़रूर कियो कि ई ज़मीन अवं तीं ते तेरी औलादी कब्जे मां देलो हालांकी तेइस अब्राहमे कोई औलाद न थी । 6 परमेशेरे इन भी ज़ोवं, तेरी औलाद एक्की बखले देशे मां परदेशी भोली, तैना तैन गुलाम बनाले, ते 400 सालन तगर तैन दुख देले । 7 फिरी परमेशेरे ज़ोवं, जै कौम तैन गुलाम बनाली तैन अवं सज़ा देइलो, ते तैसेरां बाद तैना तैस मुलखे मरां निस्सतां इडी एज्जले ते मेरी आराधना केरेले । 8 ते परमेशेरे अब्राहमे सेइं करार कियो ते तैस सेइं ज़ोवं, कि निशानेरे रूपे मां सेब्भी घरानेरे नर मैन्हु केरो खतनो केर । जैखन इसहाक ज़रमो ते अठे दिहैडी केरो भोव, त अब्राहमे तैसेरो खतनो कियो, ते एन्चरे इसहाके अपने मट्ठे याकूबेरो खतनो कियो, ते याकूबेरे अपने 12 मट्ठां केरो खतनो कियो । 9 याकूबेरे मट्ठेईं जलनी सेइं अपनो ढूला यूसुफ मिस्र मुलखे जो गाने बालन जो बेचो, ते तैनेई यूसुफ मिस्रे मां नेइतां गुलाम बनाव? पन परमेशेरे यूसुफे सेइं साथी थियो । 10 परमेशेरे तै सैरी मुसीबतन करां छुटेइतां, ते तैस बड़ी अक्ल दिती, ते मिस्रेरे फ़िरौन राजेरे सामने बड़ी काबलीत दिती, ते फ़िरौन राजे, यूसुफ मिस्र मुलखेरो ते अपने महलेरो गवर्नर बनाव । 11 जैस वक्ते यूसुफ थियो त मिस्र मुलख ते कनानेरे सारे मुलखे मां काल पेव, ते बड़ी मुसीबत आई, ते इशशे दादे-पड़दादन खाने जो अन न मैल्लू । 12 जैखन याकूबे शुनू कि मिस्रे मां अन्न आए, त तैनी इशशे पूर्वज मिस्र मुलखे मां पेइली बार भेजे, तैना यूसुफ सेइं मिले ते अन आनू पन तैनेई तै न पिशानो । 13 जैखन तैना दुइयोवं फेरे मिस्र मुलखे मां अन्न आन्ने जे, त यूसुफे अपनो आप तैन पिशानाव, ते फ़िरौने भी यूसुफेरी कौमरो पतो लगो कि ए इब्रानी आए । 14 तैसेरां बाद यूसुफे अपनो बाजी याकूब ते तैसेरे 75 मैन्हु केरू टब्बर मिस्र मुलखां मांजो एजनेरो बिस्तार भेजो । 15 किछ वक्तेरां बाद याकूब मिस्र मुलखे मां जेव, ते तै त इशशे दादे-पड़दादे तैडी मेरि जे । 16 तैन केरि लाशां तैट्ठां इशशे मुलख कनाने मां वापस एन्ही, ते तैनेई याकूब, तैस ठैरी दफन कियो, जै ठार अब्राहमे चाँदी देइतां घिन्नोरी थी, ते याकूबेरां मट्ठां शेकेम नगरेरे तैस ठैरी दफन कियां, जै याकूबे हामोरेरी औलादी करां घिन्नोरी थी ।”

17 “परमेशेरे अब्राहमे सेइं अक वादो कियोरो थियो, तैस वादेरो पूरो भोनेरो मौको अव त मिस्रे मां इशशे लोकां केरि गिनती भी बड़ी बेद्धी जेई । 18 तैस मौके अक होरो राजो मिस्र देशे मां राज करने लगो, जै यूसुफे न थियो जानतो । 19 तैनी इशशो कौमी सेइं एरी चलाकी कि ते इशशे दादन-पड़दादन सेइं एरी बदसलूकी की, तैना एत्रे मजबूर किये कि तैना अपने जर्मते बच्चे बेइरोवं शारन ताके तैना मेरि गान । 20 तैन्ने दिहैइन मां मूसा पैदा भोव, तै परमेशेरेरी नज़री मां बड़ो रोड़ो थियो, ते तै टलाई महीन्न तगर अपने बाजेरे घरे मां छेपतां पलतो राव । 21 पन जैखन जादे चिरे तगर छुपेईं न बटे, तै दरियाए मां शारो त फ़िरौनेरे कुइयां तै नेव ते अपने मट्ठेरो ज़ेरो पालो । 22 मूसा नबी मिस्री केरि सैरी शिक्षारो ते तैन केरि सैरी गल्लां केरि वाकफित भोइजेइ, ते गलवाती ते कम्मे मां मजबूत थियो ।”

23 “जैखन मूसा नबी 40 सालां केरो भोव, त तैसेरे मने मां ए गल आई, कि अवं अपने इस्राएली दूलां केरो हाल पतो केरि। 24 मूसा एक्की इस्राएली मैन्हु पुड़ जुलम भोंतो लाहू त तैनी तै बचाव, ते तै जालम मिस्री मैरतां जैस पुड़ जुलम भोरो थियो बदलो धिनो। 25 तैनी सोचू, कि तैसेरे दूलां समझेले, कि परमेशरे तैसेरे जिरिये सेइं तैन मिस्री केरि गुलैमी करां तैन मुक्ति देलो, पन तैनेई न समझू। 26 मूसा होरसां दूई इस्राएली एप्पू मांमेइं लड़ते लाए, ते तैन समझानेरी कोशिश की, ते मूसा तैन जोवं, हे जवानव तुस त एप्पू मांमेइं दूला भोतथ, ते तुस किजो एक्की होरि पुड़ जुलम केरतथ? 27 पन जै मैन्हु अपने पड़ोसी पुड़ जुलम करने लोरो थियो, त तैनी मैने मूसा जो धमकेइतां जोवं, तू केनि असन पुड़ हुकूमत करनेबालो या हाकिम बनेवरोस? 28 जेन्चरे तीं तै मिस्रेरो रानेबालो हीज मारोरो थियो, तेन्चरे तू अज मीं मारने चातस? 29 ए गल शुनते मूसा तैट्ठां नशशो, ते मिद्यान मुलखे मां परदेशी भोइतां राने लगो, ते तैड़ी तैसेरां दूई मट्ठां पैदा भुआं। 30 40 साल मिद्यान मुलखे मां रानेरे बाद तैस सीनै पहाड़ेरे सुनसान ठारी मां एक्की झल्लेरी अग्गी स्वर्गदूत लाव, ते परमेशरे स्वर्गदूतेरे जिरिये तैस सेइं गल की। 31 मूसा झल्लेरी अग्गी लेइतां कि झल फुकोने नईं लोरू त तै हैरान रेइ जेव, ते जैखन तै हेरनेरे लेइ नेडे जेव त तैनी प्रभुएरी आवाज शुनी। 32 ‘अवं तेरे दादे-पड़दादां केरो यानी अब्राहम, इसहाक ते याकूबेरो परमेशर आई,’ तैखन मूसा डेरतां कम्बने लगो, इन तगर कि तैस हेरनेरी हिम्मत न भोइ। 33 तैखन प्रभुए तैस जो जोवं, अपने पांवां केरी जुट्टी खोल्ल, किजोकि जैस ठैरी तू खड़ोस तै पवित्तर ठारे। 34 मीं मिस्र मुलखे मां अपने लोकां केरि बुरी हालत हेरी, मीं तैन केरू कर लानू ते लेरां शुनोरिन, एल्हेरेलेइ अवं तैन छुटानेरे लेइ उन्ढो ओरोई, हुनी एई अवं तीं फिरी वापस मिस्र मुलखे जो भेजताई।

35 “एहे तै मूसो आए जेसरो इस्राएली लोकेईं पेइलो इन्कार कियोरो थियो, कि तू केनि असन पुड़ हुकूमत करनेबालो या हाकिम बनेवरोस, ते एहे तै मूसा परमेशरे अपने स्वर्गदूतेरे जिरिये सेइं जै तैनी बलते झैल्लोए मां लाहोरो थियो, ते छुटानेबालो बनेइतां भेजो। 36 एनी मैने मिस्र मुलखे ते लाल समुन्दरे मां 40 सालन तगर सुनसान ठैरी मां चमत्कार ते निशान हिराए। 37 एनी मूसा इस्राएली लोकन सेइं जोरू थियूं, परमेशर तुशशे दूलान मरां तुशशे लेइ अक मेरो जेरो नबी खड़ो केरेलो। 38 एहे मूसा, इशशे दादा पड़दादां केरो नबी राव जैखन तैन सुनसान ठारी मां अकोट्टे भोरोए, परमेशरे एक्की स्वर्गदूत सीनै पहाड़े पुड़ मूसे कानून दित्तो ते तैनी इशशे दादे पड़दादन तैन कानून दित्तो, मूसे जिनंदगी देनेबाले वचन मैल्ले, तैनी तैना असन तगर पुजाए। 39 पन इशशे दादे-पड़दादेईं तैसेरो हुकम न मन्नो चाव, बल्के इकरार कियो, ते तैना मिस्र मुलखेरे जो वापस गानू चाते थिये। 40 तैनेईं मूसेरे दूलाए हारूने सेइं जोवं, तू इशशे लेइ अक देबतो बना, जै असन अग्गी-अग्गी मिस्र मुलखे जो चले, किजोकि असन न जानम कि मूसा जैनी असां मिस्र मुलखे मरां केदतां आनोरेम, तैस कुन भोवं? 41 तैस वक्ते तैनेईं बछ्छेरी अक मूरत बनाई, ते तैस कां बलिदान चादू, ते अपने हथ्यां केरे बनेवरी मूरती कां बड़ी खुशी मनाने लाए। 42 एल्हेरेलेइ परमेशरे तैन करां अपनू तुतर फिराव, ते तैना दिहाड़ेरी ते चैंदनरे ते अम्बेरेरे तारां केरि ईश्वरेरे रूपे मां तैन केरि आराधना केरनेरे लेइ शारे, जेन्चरे नेबी केरि किताबी मां लिखोरूए,

हे इस्राएली लोकव,

कुन तुस 40 सालन तगर सुनसान ठैरी मां जानवरां केरू बलिदान ते होरू बलिदान मेरे लेइ केरते राए?

43 बल्के तुसेईं एप्पू सेइं साथी मोलेक देबतेरी मूरती ते रिफान देबतेरे तारे छुड़तां चलते थिये,

एना तैना मूरतिन जैन कां तुस मथ्यो टेकते थिये,

एल्हेरेलेइ अवं तुसन बाबेले करां भी दूर बसेइलो।”

44 “सुनसान ठारी मां इशशे दादन पड़दादन कां गवाहेरो तेम्बु थियो, परमेशरे तै ठहराव ते तैनी मूसा सेइं जोवं, जेन्चरे तीं लोरूए तैसेरे मुताबिक बना। 45 बड़े सालना बाद तैए तेम्बु इशशे दादे-पड़दादेईं यहोशू सेइं साथी इड़ी आनो, जैस वक्ते तैनेईं गैर कौमन पुड़ अधिकार हासिल कियो, जैना परमेशरे इशशे दादे-पड़दादां केरे सामने कडे, ते तै तेम्बु दाऊद राजेरे वक्ते तगर राव। 46 दाऊदे पुड़ परमेशरे अनुग्रह कियो, ते तैनी मिनत की, कि अवं याकूबेरे परमेशरेरे लेइ अक घर बनेइं। 47 पन तैसेरे मट्ठे सुलैमाने तैसेरेलेइ मन्दर बनाव। 48 पन परमप्रधान परमेशर हथ्यां केरे बनेवेरे मन्दरन मां न राए, जेन्चरे यशायाह नेबेरे किताबी मां लिखोरूए,

49 प्रभु जोते, स्वर्ग मेरो तखते,

ते जमीन मेरे पांवां केरि चौकीए,

तुस फिरी मेरे लेइ केरू जेरू मन्दर बनाले?
ते मेरे आराम केरनेरी ठार केरही जेरि भोली?

50 कुन मी एप्पू सैरी चीजां नई बनेवरी?

51 “हे ठीठ लोकव, तुस तैसेरी शुन्नी ते मन्नी न चाथ, तुस पवित्तर आत्माही हमेशा खलाफत केरतथ। जेन्चरे तुशशे दादे-पड़दादे केरते थिये, तुस भी तेन्चरे केरतथ। 52 नेबन मरां को तुशशे दादे-पड़दादेई नई स्तेवरो? जैनेई तैस एजनेबाले मसीहेरे बारे मां ज़ोवं जै धर्मी आए, ते जैखन मसीह अव ते तुसेई धोखे सेइ तै ट्लुवेइतां मारो। 53 तुसन स्वर्गदूतन करां मूसेरे कानून त मैल्लो, पन तैस पुड़ अमल न कियू।”

🔗🔗🔗🔗🔗🔗 🔗🔗🔗 🔗🔗🔗🔗🔗

54 जैखन तेनेई एना गल्लां शुनी त यहूदी लीडर फुकोई जे, ते स्तिफनुसे जो दंत लगे च़ापने। 55 पन तैनी पवित्तर आत्माई सेइं भेरोइतां अम्बरेरे पासे तक्कू, ते तैनी परमेशेरी महिमा ते यीशु परमेशेरे देइने पासे खड़खड़ो लाव। 56 तैनी ज़ोवं, “हेरा, अवं स्वर्ग खुल्लू लाताई, ते मैनेरे मट्ठे परमेशेरे देइने पासे खड़खड़ो लाताई।” 57 एन शुन्तां तैना ज़ोरे सेइं चिन्डां मारने लगे, ते अक भोइतां सेम्बेई तैस पुड़ हमलो कियो। 58 ते तै दीलतां यरूशलेम नगर करां बेइर नीयो ते तैस जो घोड़ेई बाने लगे ते तै मारो, तैखन तैस पुड़ दोष लाने बालेई अपने चोगे खोलतां शाऊल नव्वेरे एककी मैन्हु कां रेखतां छड़डे। 59 ते जैखन तैना स्तिफनुसे जो घोड़ेई बाने लगगोरो थिये, ते तै स्तिफनुस इन ज़ोइतां प्रार्थना केरने लगे, “हे प्रभु यीशु, मेरी आत्मा कबूल केर। 60 फिरी तैनी ज़ैधू केरे बारे बिश्तां ज़ोरे सेइं ज़ोवं, ‘हे प्रभु एन इस पापेरो दोषी न बनेइयां।’” एन ज़ोनेरां पत्ती तैनी प्राण दिच्ते।

8

🔗🔗🔗🔗🔗🔗 🔗🔗🔗 🔗🔗🔗

1 शाऊल तैसेरी मौती सेइं राज़ी थियो। तैस्से दिहाड़े यरूशलेम नगरेरे कलीसियाई पुड़ जुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-बितर भोए। 2 किछ परमेशेरे भक्त मैनेई स्तिफनुस नेइतां देबतां छड़डे, ते तैसेरे मरने पुड़ बड़ो शोग कियो। 3 पन शाऊल कलीसियाई सताने लोरो थियो, ते तै घर-घर गातो थियो, ते विश्वासी मड़दन ते कुआन्शन बेइरोवं घसीटतो थियो, ते कैद केरतां छड़तो थियो।

🔗🔗🔗🔗🔗 🔗🔗 🔗🔗🔗🔗🔗🔗🔗🔗 🔗🔗🔗🔗

4 पन ज़ैना विश्वासी तितर-बितर भोते थिये तैना खुशखबरी शुनाते च़ले। 5 ते फिलिप्पुस सामरियारे एककी नगर मां गेइतां मसीहेरो प्रचार केरने लगे। 6 ज़ैना गल्लां तैन लोकेई फिलिप्पुसेरी करां शुनी, ते ज़ैना निशान तै हिरातो थियो, तैन हेरी-हेरी, तैनेई अक भोइतां मन लाव। 7 ज़ैखन फिलपुसे हुक्म दित्तो, त बड़े लोकन मरां भूतां चिन्डां मैरतां निस्सी जेआं, ते बड़े लोक अधरंगी ते टोटो बेज्झोइ जे। 8 ते तैन केरे वजाई सेइं नगरेरे बड़े लोक खुश भोइजेइ।

🔗🔗🔗🔗 🔗🔗🔗

9 शमौन नव्वेरे एककी मैने सामरियारे नगर मां सारे लोक अपने जैदेइं सेइं हैरान कियोरे थिये, ते अपने आपे बड़ो खास मैन्हु बनातो थियो। 10 निक्के बडे सब तैसेरे पासे भोइतां ज़ोने लगे, “ए मैन्हु परमेशेरी तै शक्ति ज़ैस जो महान ज़ोतन।” 11 तैनी अपने जैदू सेइं बड़े च़िरेरां दंते सब हैरान कियोरे थिये, एल्हेरेलेइ तैना लोक तैसेरी बड़ी इज्जत केरते थिये। 12 पन ज़ैखन फिलिप्पुसे परमेशेरे राज़ेरे ते यीशु मसीहेरी खुशखबरी प्रचार की त लोकेई विश्वास कियो, ते मड़देइं कुआन्शेईं बपतिस्मो नेव। 13 तैखन शमौने भी फिलिप्पुसेरे प्रचारे पुड़ विश्वास कियो, ते बपतिस्मो नेइतां फिलिप्पुसे सेइं साथी राने लगे ते तै बड़े चमत्कार ते निशान हेरतां हैरान रेइ जेव।

🔗🔗🔗🔗🔗 🔗🔗 🔗🔗🔗 🔗🔗 🔗🔗🔗🔗🔗

14 जैखन यरूशलेम नगरे मां प्रेरितेईं शुनू कि सामरियारे लोकेई परमेशेरू बच्चन कबूल कियोरूए ते तैनेई पतरस त यहून्ना तैन कां भेजे। 15 ज़ैखन तैना तैड़ी पुजे त तैनेई तैन लोकां केरे लेइ प्रार्थना की, कि एन पुड़ पवित्तर आत्मा उतरे। 16 एल्हेरेलेइ कि तैन पुड़ पवित्तर आत्मा हेजू न थी उतरोरी, तैनेई सिर्फ प्रभु यीशु मसीहेरे नव्वे सेइं बपतिस्मो निहीयोरो थियो। 17 तैखन यहून्ना ते पतरसे तैन पुड़ हथ रेखतां प्रार्थना की, ते तैन भी पवित्तर आत्मा उतरी। 18 ज़ैखन शमौने हेरू कि प्रेरितां केरे हथ रखने सेइं पवित्तर आत्मा उतरते, त शमौने पैंडसे

एन्तां प्रेरितन कां पैश किये। 19 ते शमौन जोने लगो, “मीं भी शक्ति देथ, कि अवं भी जैस पुड़ हथ रेख्खी त तैस पुड़ पवित्र आत्मा उतरे।” 20 पतरसे तैस सेइं जोवं, “तेरे पेइंसे तीं सेइं साथी गर्क भोन, किजोकि तू पेइंसन सेइं परमेशेरू दान धिन्नु चातस। 21 एस सेवाई मां तेरो कोई भी हिस्सो नईं किजोकि तेरो मन परमेशेरू कां साफ नईं। 22 तू अपनि इस बुरैईं करां मनफिरा, ते प्रभु कां प्रार्थना केर, शैइद प्रभु तेरी इस बुरे खियाले माफ़ केरे। 23 मनफिरा अवं हेरताईं कि तू बड़े जलनी ते पापेरी गुलैमी मां आस।”

24 तैखन शमौने जुवाब दित्तो, “मेरे लेइ प्रभु कां प्रार्थना केरा, कि जैन किछ तुसेईं ज़ोरूए, तैन मीं पुड़ न एज्जे।” 25 ते पतरस ते यूहन्ना गवाही देइतां ते प्रभु यीशुएरू वचन शुनेइतां यरूशलेम नगरे मां वापस आए, ते एइते बारे सामरी लोकां केरे बड़े इल्लोव्वन मां खुशखबरी शुनाई।

?????????? ?? ?????????? ?????????????

26 फिरी एरू भोवं कि परमेशेरू एक्की स्वर्गदूते फिलिप्पुसे सेइं जोवं, “उठ ते दक्षिणेरे बत्तां गा, जै यरूशलेम नगरेरां गाजा नगरे जो गातीए। ई रेगिस्तानी बत आए।” 27 तै उठो ते चलो जेव, ते बत्ती मां तैस अक कूश मुलखेरो खोजो मैल्लो, जै कूशी केरि रानी कन्दाकारो खजानची थियो, तै आराधना केरने यरूशलेम नगरे मां ओरो थियो। 28 तै अपने रथे पुड़ चढ़तां अपने मुलखे जो वापस ओरो थियो, ते यशायाह नेबेरी किताब ज़ोरे-ज़ोरे सेइं पढ़ने लगगोरो थियो। 29 पवित्र आत्मा फिलिप्पुसे सेइं जोवं, “नेडे गेइतां रथे सेइं साथी चल।” 30 फिलिप्पुस देवइतां रथे कां नेडे पुजो, त तैस करां यशायाह नेबेरी किताब पढ़ती शुनी, ते तैस पुच्छू, “तू जैन पढ़ने लोरोस कुन तैन समझतस?” 31 तैनी जोवं, “जां तगर कोई मीं न समझाए त अवं केन्चरे सेमझी?” ते तैनी फिलिप्पुसे कां मिनत की, कि एई रथे पुड़ बिश।

32 पवित्रशास्त्रे मरां जैन तै पढ़ने लगगोरो थियो, त तैन इन थियू, “तैनेईं तै भैडारो ज़ेरो मारने जो नीयो, जेन्चरे गबडू अपनि उन्ना बरधाने बालां केरे सामने चुप राते, तेन्चरे तैनी भी अपनू आशी न खोल्लू।”

33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशेरे बारे मां न ज़ोईं सके, किजोकि धेरती पुड़ तैसेरे वंश भोने करां तैस मारतन।

34 खोजे फिलिप्पुसे पुच्छू, “अवं तीं कां मिनत केरतां, मीं सेइं जो कि ए नबी कसेरे बारे मां ज़ोते, अपने या होरि केन्चरे बारे मां ज़ोते?” 35 तैखन फिलिप्पुसे जोनू शुरू कियू, तैनी पवित्रशास्त्रे करां शुरू केरतां यीशुएरो खुशखबरी शुनाई। खोजे तैना गल्लां शुनी ते विश्वास कियो। 36 बत्तां चलते-चलते तैना एक्की तालाबे कां पुजे, तैखन खोजे जोवं, “इडी तालाब आए, हुनी मीं बपतिस्मो नेने करां कौन रोकी सकते?” 37 फिलिप्पुसे जोवं, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दित्तो, “अवं विश्वास केरताईं कि यीशु ही परमेशेरू मट्टूए।” 38 फिरी तैनी रथ रोकनेरे लेइ हुकम दित्तो, ते खोजो ते फिलिप्पुस दुइये तालाबे मां जे, ते फिलिप्पुसे तैस बपतिस्मो दित्तो। 39 जैखन तैना पैनी मरां बेइर निस्से त प्रभुएरी पवित्र आत्मा फिलिप्पुस तैट्टां नेव, ते खोजे तै फिरी न लाव, परमेशेरू तै बचाव ते तै बड़ी खुशी सेइं वापस अपने मुलखे जो जेव। 40 ते फिलिप्पुस अशदोदे मामेइं निसतो चलतो सारे इल्लोव्वन मां खुशखबरी शुनातो कैसरिया मां पुजो।

9

?????????? ?? ?????????????

(???????????. 22:6-16; 26:12-18)

1 शाऊल प्रभुएरे चलन धमकाने ते मारने मां मघन थियो, ते तै महायाजके कां जेव। 2 ते तैस करां दमिश्क नगरेरे प्रार्थना घरां केरे लेइ चिट्ठी मेग्गी, कि चाए कोई मइद भोए या कुआन्श जै यीशु पत्ती चलने बालो भोए, तैस टलेइतां यरूशलेम नगरे मां आने। 3 जैखन तै चलतो-चलतो दमिश्क नगरेरे नेडे पुजो, त अचानक अम्बेरां लौ आईं ते तैसेरे च़ेवरे पासन चमकने लगी। 4 ते शाऊल ज़मीनी पुड़ खिरको, ते तैस प्रभुएरी आवाज़ आई, “हे शाऊल, हे शाऊल तू मीं किजो स्तातस?” 5 शाऊले एन पुच्छू, “हे प्रभु, तू कौन आस?” तैनी जोवं, “अवं यीशु आईं, जैस तू सतातस। 6 हुनी उठ ते नगरे मां गा, तैडी तीं सेइं जोवं गालू, कि तीं कुन केरनूए।” 7 जैना लोक तैस

सेइं साथी थिये, तैना चुपचारे रेइजे, तैन आवाज त शुनोती थी, पन लेइहोतू किछ भी न थियूं। ⁸ तैखन शाऊल जमीनी पुड़ां खडे उठो, त तैनी अपनि एच्छी घैडी त तैस किछ भी न लगू लेइहोने, ते तै तैसेरे सैथेईं हथेरां ट्लेइतां दमिश्क नगरे मां पुजाव। ⁹ ते तैनी ट्लाईं दिहाइन तगर न लेई बटु, ते न तैनी किछ खाव ते पिव।

¹⁰ दमिश्क नगरे मां यीशुएरो अक चेलो रातो थियो, प्रभु यीशुए तैस दर्शन देइतां ज़ोवं, “हे हनन्याह!” तैनी ज़ोवं, “हाँ प्रभु ज़ो।” ¹¹ तैखन प्रभुए तैस जो ज़ोवं, “उस गेली मां गा ज़ैस जो ‘सिद्धी’ ज़ोतन, ते यहूदारे घरे गा तैडी शाऊल नव्वेरो अक मैनुए, ज़ै तरसुस नगरेरो रानेबालोए, तू तैसेरे बारे मां पुछ्णां, किजोकि हेरा तै प्रार्थना करेने लोरोए। ¹² तैनी हनन्याह नव्वेरो अक मैनुए अन्तर एइतो लाव, ते एप्पू पुड़ हथ रखतो लाहोरोए कि तै अपनि एछ्छेईं सेइं फिरी लाए।” ¹³ हनन्याहे जुवाब दित्तो, “हे प्रभु, मीं एस मैनेरे बारे मां लोकन करां बेडिं गल्लां केरती शुनोरिन, ते एन भी कि एनी तेरे लोकन सेइं यरूशलेम नगरे मां कुन-कुन बुरू कियोरूए। ¹⁴ एस प्रधान याजकन करां अधिकार मैलोरोए, कि इडी भी ज़ैना लोक तीं पुड़ विश्वास केरतन, तैन गिरफ्तार केरतां यरूशलेम नगरे जो ने।” ¹⁵ पन प्रभुए तैस सेइं ज़ोवं, “तू गा किजोकि मीं तै मैनुए चुनोरोए, कि तै गैर कौमन, राजन, ते इस्राएलेरे लोकन मेरे बारे मां प्रचार केरे, ते तै मीं चुनोरोए कि तै मेरी सेवा केरे। ¹⁶ ते अवं तैस ज़ोइलो, लोकन मेरे बारे मां ज़ोनेरे वजाईं तैस केतरे-केतरे दुःख झैलनो पेनोए।” ¹⁷ तैखन हनन्याह तैस घरे मां जेव, ज़ैडी शाऊल थियो, ते तैस पुड़ हथ रखतां ज़ोवं, “हे दूला शाऊल, प्रभु, मतलब यीशु, ज़ैस बत्तां तू ओरोस ते तीं लेइहोरो थियो, तैनी अवं भेजोरोईं, कि तू फिरी लास ते पवित्तर आत्माईं सेइं भेरोस।” ¹⁸ ते तैखन तैसेरे एछ्छन मरां ज़ेरां शेकड़ां झड़ां ते तै लहने लगो, ते खडे उठतां बपतिस्मो नीयो। ¹⁹ ते किछ रोटी खेइतां तैस हिम्मत आई, ते किछ दिहाडे तै चेलन सेइं साथी दमिश्क नगरे मां राव।

?????? ???? ????????? ???????

²⁰ तैसेरां बाद अकदम तै दमिश्क नगरेरे प्रार्थना घरन मां प्रचार करेने लगो, कि यीशु परमेशेरेरू मट्टूए। ²¹ सब शुन्ने वाले हैरान भोइतां ज़ोने लगगे, “कुन ई तैए मैनुए नई, ज़ै यरूशलेम नगरे मां ज़ैना यीशु मसीह पुड़ विश्वास केरते थिये मारतो थियो? ते इडी भी एल्हेरेलेइ ओरो थियो, कि एन लोकन ट्लेइतां प्रधान याजकां केरे हवाले केरे?” ²² पन एसेरां बाद शाऊल होरो भी शेक्ति सेइं प्रचार केरतो राव, ते एस गल्लरू सबूत देइ-देइ कि यीशु ही मसीहे, दमिश्क नगरेरे रानेबालां यहूदी केरू आशी बंद केरतो राव।

²³ ज़ैखन शाऊले दश्मके मां बड़ो वक्त बीतो त यहूदेईं मिलतां तैस मारनेरो मुशोरो कियो। ²⁴ पन शाऊले एस गल्लरो पतो लगो, तैना त तैस मारनेरे लेइ रात दिहैडी दारन पुड़ रहते थिये। ²⁵ पन राती तैसेरे चेलेईं तै टोकरे मां रख्खो, ते नगरेरे दुवारी पुड़ां रस्से सेइं टोकरी मां ओसैलतां बुन पुजाव।

???????? ???? ???? ???? ???? ???? ?

²⁶ ज़ैखन शाऊल यरूशलेम नगरे मां पुजो त तैनी चेलन सेइं मिलनेरो इंतज़ाम कियो, पन सब तैस करां डरते थी कि तै भी चेलोए। ²⁷ पन बरनबासे शाऊल एप्पू सेइं साथी प्रेरितन कां आनो ते तैन ज़ोवं, कि केन्चरे दमिश्क नगरेरे बत्तां चलते-चलते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केतरे दिलेरी सेइं दमिश्क नगरे मां यीशुएरे नव्वेरो प्रचार कियोरोए। ²⁸ प्रेरितेईं बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव। ²⁹ ते यूनानी भाषा केरनेबाले यहूदन सेइं भी गलबात केरतो थियो, दिलेर भोइतां प्रभुएरो प्रचार केरतो थियो, पन तैना तैस मारनेरी कोशिश मां रहते थी। ³⁰ एल्हेरेलेइ विश्वासी दूलाएईं तै कैसरिया नगरे मांजो नीयो, ते तैट्ठां तरसुसे नगरे जो भेजो।

³¹ त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुएरे डरे मां ते पवित्तर आत्माऱे शैन्ति मां चलती ते बडे लोकेईं यीशु मसीह पुड़ विश्वास कियो।

???????? ???? ???? ???? ???? ?

³² फिरी एरू भोवं कि पतरस सारे इलाके मां हंठतो फिरो, ते तैन पवित्तर लोकन साथी भी पुजो, ज़ैना लुद्दा नगरे मां रहते थिये। ³³ त तैस तैडी ऐनियास नव्वेरो अक मैनुए मैल्लो, तैस अधरंग थियो, ते अठे सालां केरो देंतो खट्टी पुड़ राहोरो थियो। ³⁴ पतरसे तैस जो ज़ोवं, “हे ऐनियास! यीशु मसीह तीं बज़ाते, उठ अपनू बछान खडू केर,” तैखने तै बेज्झोइतां खडो भोव। ³⁵ तैखन लुद्दा नगरेरे ते शारोनेरे राने बालेईं एन हेरतां प्रभु यीशु पुड़ विश्वास कियो।

36 याफा नगरे मां अक कुआन्श थी, जेसारू नवं तबीता थियूं (यूनानी भाषाई तैसेरू दोरकास थियूं, जेसेरो मतलब हिरनी) तै विश्वासी थी, ते रोड़ा-रोड़ां कम्मां केरती ते गरीबां केरि मद्दत केरती थी। 37 तैने दिहाइन मां जेइस पतरस लुद्दा मां थियो, तै बिमार भोइतां मेरि जेई, ते तैसारी लाश नेइतां दोपरेरे कमरे मां रखोरि थी। 38 लुद्दा याफारे नेडे थियूं, ते जैखन चलेई शुनू कि पतरस लुद्दा मां आए, त दूई मैन्हु भेजतां मिनत की, “कि असन कां एजने मां ठढ न ला।” 39 तैखन पतरस तैन सेइं साथी चलो जेव, ते जैखन तैड़ी पुजो त तै बा तैस कमरे मां नीयो, सैरी विधवां कुआन्शां लेरां देती थी, ते तैस डलखमेइं खेडि थी, ते तैना लिगड़ां जैना दोरकास सियोरां थियां हिराने लेगि। 40 पतरसे तैना सब बेइरोवं कढे, ते एप्पू जैधू केरे भारे प्रार्थना केरने लगो, फिरी तैनी लाशारे पासे तुत्तर फरेइतां ज़ोवं, “हे तबीता, उठ।” तैखन तैसां अपनि एछ्छी खोल्ली, ते पतरसे तेकतां खड़ी भोइ। 41 पतरसे हथेरां टलेइतां खड़ी की, ते विश्वासी ते विधवां कुआन्शां कुजेइतां ज़ींती ते होशी मां तैन केरे सुपुर्द की। 42 एस गल्लरी खबर सारे याफा नगरे मां फैली जेई, ते बडे लोकेई प्रभु यीशु पुड़ विश्वास कियो। 43 पतरस किछ् चिरे तगर याफा नगरे मां शमौन नव्वेरो एक्की मैनेरे कां राव, जै चमड़ेरू कम केरतो थियो।

10

????????????????????

1 कैसरिया नगरे मां अक मैन्हु थियो, तैसेरू नवं कुरनेलियुस थियूं, ते तै अक इतालियानी फौवजरो सूबेदार थियो। 2 कुरनेलियुस त तैसेरे घरे सारे लोक परमेशे करां डरने बाले थिये, कुरनेलियुस यहूदी लोकन बडू दान देतो थियो, ते परमेशे कां लगातार प्रार्थना केरतो रातो थियो। 3 एक्की दिहाडे कुरनेलियुस दीसां अक रोडे चारे दर्शन हेरू, परमेशेरो अक स्वर्गदूत तैस कां अव, ते ज़ोने लगो, “हे कुरनेलियुस।” 4 तैनी तै रोडे-चारे लाव ते डेरतां ज़ोवं, “हे मालिक कुने?” तैनी तैस सेइं ज़ोवं, “तेरी प्रार्थना ते तेरू दान यादगैरेयर लेइ परमेशे कां पुजैरू आए। 5 हुनी तू मैन्हु याफा नगरे मां भेजतां तैस मैन्हु जेसेरू नवं शमौन पतरसे अपने घरे कुजा। 6 तै शमौनेरे घरे बिशोरो थियो, जै चमड़ेरू कम केरनेबालो थियो, जेसेरू घर समुदरेरे बन्ने।” 7 जैखन स्वर्गदूत एना गल्लां केरतां चलो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव। 8 ते तैन सारो बिस्तार ज़ोइतां याफा नगरे जो भेजे, कि पतरसे कुजान।

????????????????

9 होरसां जैखन तैना भेजोरे लोक चलते-चलते नगर नेडे पुजे। तै दुपारहरां केरो वक्त थियो, तैस वक्ते पतरस बा छती पुड़ प्रार्थना केरने लावरो थियो। 10 तैस दलुख लगगी ते तै किछ् खानू चातो थियो, पन जैखन मैन्हु रोटी बनाने लगे त तैस बेहोशी जेरि भोइजेइ। 11 ते तैनी हेरू कि अम्बर खुल्लूए, ते अक चादर लाई जै चेवरे कूना टेंगोरी अम्बरेरे पासेरां उन्डी ज़मीनेरे पासे ओरी। 12 जैस मां ज़मीनेरे सारे जानवर ते पेटेरे भारे चलने बाले जन्तू ते अम्बरेरां चुड़ोलू तैस चादरी मां थियां। 13 तैखन अक आवाज़ आई, “हे पतरस, उठ ते मार ते खा।” 14 पन पतरसे जुवाब दित्तो, “नई प्रभु, कधे नई, किजोकि मीं अज तगर कोई अपवित्तर ते भिट्टी चीज नई खोरी।” 15 फिरी दुइयोवं बार तैनी आवाज़ शुनी, “जैन किछ् परमेशेरे शुद्ध कियोरूए, तू तैस जो भिट्टू न ज़ो।” 16 टलेइ बार ए आवाज़ आई, ते फिरी तै चादर अम्बरेरे पासे चली जेई।

17 पतरस दिले मां सोचने लगगोरो थियो, कि एस दर्शनेरो कुन मतलब भोइ सकते, जैन अज मीं लाव, एतरे मां कुरनेलियुसेरे भेजोरे मैन्हु शमौनेरू घर तोपते-तोपते दारे मां पुजे। 18 तैनेई हक देइतां पुच्छू, “शमौन जैस जो पतरस ज़ोतन इड़ी तुशे कां आए?” 19 हेजू पतरस दर्शनेरे बारे मां सोचने लगगोरो थियो, त पवित्तर आत्मा तैस जो ज़ोवं, “शमौन, हेर टलाई मैन्हु तीं पुच्छ्छने लगोरेन। 20 खड़ो उठ ते बुन गा, तैन सेइं साथी गाने करां न डेरां, किजोकि तैना मीं भेजोरेन।” 21 पतरस बुन अव, ते तैन मैनन् सेइं ज़ोने लगो, “जैस मैन्हु तुस तोपने लगोरेथ तै अवं आई, ते तुस किजो ओरेथ?” 22 तैनेई जुवाब दित्तो, “असां कुरनेलियुस सूबेदारे जै धर्मी ते परमेशे करां डरने बालोए, ते सारे यहूदी तैसेरी तारीफ़ केरतन, एक्के पवित्तर स्वर्गदूते तैस जो ज़ोरूए, तू शमौन पतरसे अपने घरे कुजेइतां तैसेरी गल्लां शुन।” 23 तैखन पतरसे तैना अन्तर कुजाए, ते तैन केरि खातरदारी की। होरसां पतरस तैन सेइं साथी चलो जेव, ते याफा नगरेरे काई दलान मरां किछ् तैस सेइं साथी चले जे।

????????????????????

24 एग्री दिहाड़े तैना कैसरिया नगरे मां पुजे, कुरनेलियुस अपने रिशतेदारन ते अपने दोस्तन अकोट्टे केरतां तैन बलगने लाव । 25 पतरस जैखन कुरनेलियुसेरे घरे पुजो, त कुरनेलियुसे तैसेरी बड़ी आदर खातरी सेइं इज्जत की, ते क्रोड़ी पव्वन कां रेखतां तैस कां मथ्यो टेको । 26 पन पतरसे तै खडो कियो ते ज़ोवं, “खडो भो किजोकि अवं भी त अक मैन्हु आई ।” 27 फिरी तै कुरनेलियुसे सेइं गल्लां केरतो अन्तर जेव, तैड़ी बड़े लोक अकोट्टे बिशारे लेइतां, 28 तैस सेइं ज़ोवं, “तुसन पत्तोए इश्शे यहूदी केरे लेइ गैर कौमी सेइं मिलनू जुलनु कानूनेरे खलाफे, पन परमेशेरे मीं सेइं ज़ोरूए कि अवं केन्ची मैन्हु जो अपवित्तर या भिट्टो ज़ोई । 29 एल्हेरेलेइ तुसेईं अवं कुजाव त अवं चुपचारे चलो अव । हुनी अवं तुसन पुछ्ताई कि तुसेईं अवं किजो कुजेवरोई?”

30 कुरनेलियुसे ज़ोवं, “अवं च़ेवरे दिहाड़ना पेइले अपने घरे मां इस मौके कोई टलेइ बजेइं प्रार्थना लोरो थियो करने, त अचानक अक मैन्हु चमकतां लिगड़ां लगगोरो मेरे तुत्तरे अगर खडो भोव । 31 ते ज़ोने लगो, हे कुरनेलियुस, तेरी प्रार्थना परमेशेरे शुनोरीए ते तेरू दान भी कबूल कियोरूए । 32 एल्हेरेलेइ कोन्ची याफा नगरे मां भेजतां शमौन ज़ैस जो पतरस ज़ोतन, कुजा । तै शमौनेरे कांए ज़ै चमड़ेरू कम केरनेवालो, ते समुदरेरे बन्ने रहते । (जैखन तै एज्जेलो त तै परमेशेरे बारे मां ज़ोलो) 33 तैखन मीं मैन्हु भेजे, ते तीं बडू रोडू कियूं कि तू अव । हुनी अस परमेशेरे सामनेम, ताके ज़ैन किछ्छ परमेशेरे ज़ोरू तैन शुनम ।”

???????? ?

34 तैखन पतरस ज़ोने लगो, हुनी मीं याकीन भोव, कि परमेशर केन्चेरो तरफदार नई । 35 बल्के हर कौमी मरां ज़ै परमेशेरे करां डरते ते रोड़ां कम्मां केरते परमेशर तैस कबूल केरते । 36 इस्राएली लोकां केरे लेइ परमेशेरे भेजोरे सन्देशेरे बारे मां तुसन पतो आए । परमेशेरे यीशु मसीहेरे ज़िरिये सेइं ज़ै सेब्भी केरो प्रभुए शैनतरी खुशखबरी शुनाई । 37 यहून्नेरे बपतिस्मेरो प्रचार केरने करां लेइतां गलील इलाके करां शुरू भोइतां सारे यहूदिया इलाके मां कुन-कुन भोवं, तुस भी ज़ानतथ । 38 केन्चरे प्रभु यीशु नासरी पवित्तर आत्माई सेइं ते शक्ति सेइं अभिषेक कियूं, ते तै लोकां केरू भलू केरतो राव, तैनी सब ज़ैना शैतानेरे ज़ाले मां फासोरे थिये, तैना छुटाए, किजोकि परमेशर तैस सेइं साथी थियो । 39 तैनी ज़ैन किछ्छ यहूदी केरे मुलखे मां ते यरूशलेम नगरे मां कमाव, असां तैसेरे गवाह आम, ते तैए यहूदी लीडेरेई यरूशलेमे मां करूसे पुड़ टेंगेइतां माराव । 40 परमेशेरे तैए टलेइयोवं दिहाड़े फिरी जींतो केरतां हिराव ।

???? ?

41 तै सैरी लोकेई नई बल्के गवाहई लाव, ज़ैना परमेशेरे पेइले चुनतां रखोरे थिये, यानी असां ज़ैनेई तैसेरे मुड़दन मरां जींते भोनेरां बाद तैस सेइं साथी रोट्टी खोरीए । 42 ते तैनी असन हुक्म दित्तो कि लोकन मां प्रचार केरम ते गवाही देम, कि ई तैए ज़ै परमेशेरे जींते ते फटरां केरो हाकिम भोए । 43 सारे नबी तैसेरे बारे मां गवाही देतन, कि ज़ै कोई तैस पुड़ विश्वास केरेलो त तैस तैसेरे नंवे सेइं पापां केरि माफ़ी मैले । 44 पतरस हेजू एन ज़ोतो थियो, त पवित्तर आत्मा तैन पुड़ उतरी, ज़ैना बच्चन शुन्ने लोरे थिये । 45 ते ज़ेतरे यहूदी विश्वासी पतरसे सेइं साथी ओरे थी, तैना सब हैरान भोए कि गैर कौमन पुड़ भी पवित्तर आत्मा उतरोरीए । 46 किजोकि तैनेई तैना किसमे-किसमेरी भाषां केरते, ते परमेशेरेरी तारीफ़ केरते शुनोरी थिये, तैखन पतरसे ज़ोवं । 47 “जेन्चरे परमेशेरे असन पवित्तर आत्मा दित्तोरीए तेन्चरे तैन भी दित्तोरीए, कुन कोई एन मैनन् पैनेरो बपतिस्मो नेने करां रोकी सकते?” 48 एल्हेरेलेइ पतरसे हुक्म दित्तो, कि एन लोकन यीशु मसीहेरे नंवे सेइं बपतिस्मो देथ, तैखन तैनेई पतरसे कां मिनत की, कि किछ्छ दिहाड़े असन कां हेजू बिश ।

11

???? ?

1 यहूदिया मां रानेबाले प्रेरितेई ते विश्वासी दलाएई ए खबर शुनी, कि गैर यहूदेई भी परमेशेरेरू बच्चन कबूल कियूं । 2 ते ज़ैखन पतरस वापस यरूशलेम नगरे मां अव, त यहूदी विश्वासी लोक तैस सेइं बेंस केरने लगे । 3 “तू गैर कौमां केरे घरे जेव, ते तैन सेइं साथी बिशतां रोट्टी भी खाइ ।” 4 पतरसे तैन सेइं सारो बिस्तार पत्रां देंतो ते आखरी तगर एन्चरे शुनाव, कि कुरनियुसेरे घरे कुन भोवं । 5 “अवं याफा नगर मां प्रार्थना केरने मां मघन थियो, त मीं किछ्छ बेहोशी ज़ेरि भोइजेइ, ते मीं अक दर्शन लाव, ते अक चादर ज़ेरि च़ेवरे कूना टेंगेइतां अम्बेरेरे पासेरां

उन्दी एइतां मीं तगर पुजी । 6 अवं तैस मां तकने लगो त कुन हेरताई कि, तैस मां जमीनरे सारे च्वेरे जंघेइं च़लने बाले जानवर ते पेटेरे भारे च़लने बाले जीप ते अम्बरे मां उडरने बालां चुड़ोलू थियां । 7 तैखन मींजेई अक आवाज़ आई, जै ज़ोने लगी, 'हे पतरस खड़ो उठ ते इन मार ते खा ।' 8 मीं जुवाब दित्तो, प्रभु नई, किजोकि मीं अज़ तगर कोई भी अपवित्तर या भिट्टी चीज़ नई खोरी । 9 एसेरे जुवाबे मां अम्बरेरां होरि आवाज़ आई, 'जैन किछ् परमेशरे पवित्तर बनेवरीए, तू तैस जो भिट्टू न ज़ो ।' 10 ए आवाज़ टलेइ बार आई, ते फिरी तै चादर अम्बरेरे पासे खिचोइतां च़ली जेई । 11 ठीक तैस्से मौके टलाई मैन्हु ज़ैना कैसरिया नगरे मरां कुरनुलियुसे मीं कां भेजोरे थिये, तैस घरे कां सामने खड़े भोए, जैड़ी अवं थियो । 12 तैखन पवित्तर आत्मा मीं सेइं ज़ोवं, बेधड़क च़ारे एन सेइं साथी गा, एना 6 ढ़ला भी मीं सेइं साथी आए, ते असां तैस मैनेरे घरे जे । 13 तैनी असन सेइं ज़ोवं, कि केन्च़रे सेइं तैनी अक स्वर्गदूत घरे लाव ते ज़ोने लगो, याफा मां केन्ची मैन्हु भेजतां शमौन ज़ैस जो पतरस ज़ोतन, तैस अपने घरे कुजा । 14 तै एइतां तीं अक एरो बिस्तार देलो, जेसेरे ज़ोने सेइं तेरी खानदानेरे सारे मैनन् परमेशर मुक्ति देलो । 15 ज़ैखन मीं तैड़ी गेइतां तैन सेइं गल्लां शुरू की, त पवित्तर आत्मा तैन पुड़ उतरी, ज़ेन्च़रे पेइले असन पुड़ उतरोरी थी । 16 तैखन मीं प्रभुएरू तैन वचन याद आऊं, ज़ैन तैने ज़ोवरो थियूं, कि यूहन्ना त पैनी सेइं बपतिस्मो दित्तो, पन तुसन पवित्तर आत्माई सेइं बपतिस्मो मैलेलो । 17 बस्सा अगर परमेशरे तैन भी तैए तोफो दित्तो, जै असन प्रभु यीशु मसीह पुड़ विश्वास करेने सेइं मैल्लो, त अवं कौन भोताई कि परमेशरे रोकी?" 18 ज़ैखन यहूदी विश्वासी लोकेई एन शुनू त च़ुप रेडजे, "ते परमेशरेरी तारीफ़ करेने लगो, तां त सच्च़े कि परमेशरे गैर कौमन भी पापन करां मन फिरेइतां यीशु पुड़ विश्वास करेतां हमेशारी ज़िन्दगी हासिल करेनेरो तोफो दित्तोरोए ।"

??

19 त तैना लोक ज़ैना तैस दुखेरे मारे ज़ै स्तिफनुसेरे मौतरे वक्ते शुरू भोरो थियो, तितर-बितर भोइजेइ, ते च़लते-च़लते फ़ीनीके इलाके ते साइप्रेस ते अन्ताकिया नगरे तगर पुजे, पन तैना यहूदी केरे अलावा होरन परमेशरेरू वचन न थिये शुनाते । 20 पन तैन मरां किछ् साइप्रेसेरे रानेबाले ते किछ् कुरेनेरे रानेबाले थिये, ज़ैना अन्ताकिया नगरे मां एइतां यूनानी लोकन भी प्रभु यीशु मसीहेरी खुशखबरी शुनाने लगे । 21 ते प्रभुएरी शक्ति तैन पुड़ थी, ते बड़े गैर कौमरे लोकेई तैन केरे सनदेशे पुड़ विश्वास कियो, ते प्रभु यीशु पुड़ भरोसो करेनो शुरू कियो । 22 तैखन तैन केरि खबर यरूशलेम नगरेरे कलीसियारे लोकन तगर पुजी, ते तैनेई बरनबास अन्ताकिया नगरे जो भेजो । 23 तै तैड़ी पुजतां, ते परमेशरेरो अनुग्रह हेरतां बड़ो खुशी भोव, ते तैन ए गल ज़ोई कि अपने तने मने सेइं प्रभु सेइं लिपटोरे रान । 24 बरनबास अक रोड़ो मैन्हु थियो, तै पवित्तर आत्माई ते विश्वासे सेइं भरपूर थियो, ते बड़े लोक प्रभु मां आए । 25 तैखन बरनबास अन्ताकिया नगर शैरतां शाऊले तोपने तरसुस नगरे जो च़लो जेव । 26 तैनी शाऊल तोप्तां अन्ताकिया नगरे मां आनो, तैड़ी तैना एककी साले तगर दुइये ज़न्हे कलीसियाई मां लोकन प्रभु यीशुएरी शिक्षा देते राए, ते लोक चलन जो सेब्भन करां पेइले अन्ताकिया नगरे मां मसीही ज़ोने लगे ।

27 तैन्ने दिहाइन मां किछ् विश्वासी ज़ैना नबी थिये, यरूशलेम नगरेरां अन्ताकिया नगरे मां आए । 28 तैन मरां अक नबी जेसेरू नवं अगबुस थियूं खड़े भोइतां ते पवित्तर आत्माेरे ज़ोने सेइं एन ज़ोने लगो, कि सैरी दुनियाई मां अक बड़ो काल पेनोए । ए काल क्लौदियुस हाकिमेरे वक्ते पेव । 29 तैल्हेरेलेइ च़ेलेई फैसलो कियो कि, असन मरां हर कोई अपनि-अपनि हैसयतरे मुताबिक किछ् दान देथ, ताके यहूदिया इलाके मां रानेबाले मसीही ढ़लां केरि मद्दत भोइसखे । 30 बस्सा तैनेई किछ् रकम अकोट्टी की ते बरनबास ते शाऊलेरे हथ्थे यरूशलेम नगरेरे बुजुर्गन कांजो भेजो ।

12

??

1 तैस्से वक्ते मां हेरोदेस राज़ो कलीसियारे किछ् मैनन् दुःख देनेरे लेइ तैना ट़लाने शुरू कीए । 2 ते यूहन्ना प्रेरितेरो ढ़ला याकूब तलवारी सेइं मराव । 3 ज़ैखन तैनी हेरू कि यहूदन ए गल बड़ी खुशी अई, त तैन दिहाइन मां पतरस भी ट़लाव । तैना दिहैड़ी अखमीरी रोट्टरी तिहारेरी थी । 4 ते तैस ट़लानेरां बाद हेरोदेस तै कैदखाने मां छ़ड़डो, ते तैसेरी निगरेनारे लेइ च़ेवरे टोली बनाई, हर टोली च़ेवर-च़ेवर सिपाही केरि थी, हेरोदेसेरो खियाल थियो कि फ़सह तिहारेरे बाद तै कैदे मरां केढतां लोकां केरे सामने पैश केरे । 5 कैदखाने मां पतरस बड़े दिहाइन तगर परेहे मां थियो, पन सारी कलीसिया तैसेरेलेइ परमेशरे कां प्रार्थना करेने लगोरी थी ।

6 हेरोदेसे, पतरस लोकां केरे सामने आने करां पेइले अक रात ज़ैखन पतरस दूई पहरेदारां केरे मझाटे बंधोरो झुलोरो थियो, ते सिपाही कैदखानेरे डेवढी पुड़ पैरहो देंते थिये। 7 त अचानक परमेशेरो स्वर्गदूत कैदखाने मां अव, ते सारो कैदखानो टलकड़ो भोइ जेव, स्वर्गदूते पतरसे खिचती देइतां बींझाव ते ज़ोवं, “उठ, ते लूश केर।” ते शंगलां पतरसेरे हथ्थन सेहीयेरां खुल्ली जेई। 8 स्वर्गदूते पतरसे सेइं ज़ोवं, “अपनू मज्ज बन्ध ते बूट ला।” पतरसे तैन्ने कियूं, ते फिरी ज़ोवं, “अपनो चोगो ला ते मीं पत्पती एई।” 9 पतरस स्वर्गदूत पत्पती कैदखाने मरां बेइर अव, पन तैस ए पतो न थियो, कि स्वर्गदूते ज़ैन केरने लगोरोए एन सच्चे या कोई दर्शन हेरने लगोरोइं। 10 तै दुइयोवं पेरहेदारे करां बेइर निस्तां अव, ते लोहेरे फाटके कां पुज्जो, ज़ै नगरेरे पासे खुलतो थियो, तै फाटक तैन केरे लेइ अपने आप खुल्लो, ते तैना तैट्ठां निस्तां दूर पुज्जे, स्वर्गदूत पतरसे तैड़ी पुज्जेइतां गैइब भोइ जेव। 11 तैखन पतरस होशी मां अव, ते ज़ोने लगो, “हुनी मीं पूरू याकीन भोवं, कि परमेशेरे अपनो स्वर्गदूत भेज्जतां अवं हेरोदेसेरे हथ्थे मरां छुटाव, ते यहूदी लीडेरेई ज़ैन सोचेरू थियूं, तैन बन्ने न दित्तू।”

12 ज़ैखन तै एस बारे मां सोचने लगगोरो थियो, त मरियमेरे घरे पुज्जो, ज़ै यूहन्ना ज़ैस जो मरकुस ज़ोते थिये तैसेरी अम्मा थी। तैड़ी बड़े विश्वासी लोक अकोट्टे भोइतां परार्थना केरने लगगोरो थिये। 13 पतरसे बेइरू दार गुड़कावं त अक नौकरानी ज़ेसारू नवं रूदे थियूं, तै दार खोलने आई। 14 तैसां पतरसेरी गल शुनी ते तैसां गल पिशानी ते बगैर दार खोलनेरां दौवइती खुशी भोइतां आई, ते ज़ोने लगी, पतरस बेइर दारे मां ओरोए। 15 तैना मैन्हु ज़ोने लगे, “तू कुन पागल भोरिस।” पन ज़ैखन तैसां रोड़ेचारे ज़ोवं, कि तै पतरसे, त तैना ज़ोने लगे “पतरस त नई पन पतरसेरो स्वर्गदूत भोलो।” 16 ते पतरस बेइर दार गुड़कातो राव, ते ज़ैखन तैनेई दार खोल्लू त पतरस लेइतां हैरान रेइजे। 17 पतरसे तैन जो हथ्थे सेइं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अवं केन्चरे परमेशेरे कैदखाने मरां बेइर कढो, ते फिरी ज़ोवं, “थाकूबे त तैसेरे होरि मसीह ढलान भी पतो देइयथ।” ते एप्पू केन्ची होरि जगाई जो चलो जेव।

18 ज़ैखन झेझ भोइ त सिपेहिन एप्पू मांमेइं खलबली मेचि जेई, कि पतरस कोरां जेव। 19 ज़ैखन हेरोदेसे तैस तोप्पनेरो हुक्म दित्तो त तैनी सिपेही केरू बियांन घिन्नेरां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो चलो जेव, ते किछ् चिरे तगर तैड़ी राने लाव।

??????????

20 हेरोदेस सूर ते सैदारे नगरेरे लोकन पुड़ बड़ो नाराज्ज थियो, तैखन तैना लोक मिलतां तैस कां आए, ते बलास्तुसे ज़ै राजेरो खास मैन्हु थियो, मनेइतां मेल केरनो चाव, किजोकि राज्जो एरे मुलखेरां तैन केरे मुलखे खर्चां मैलतो थियो। 21 तैखन तैनी अक दिहाड़ी टुवहलाई ते हेरोदेस राज्जो अपना राजेरां लिगड़ां लेइतां आदालतरे तखते पुड़ बिशतां लोकन सेइं ज़ोने लगे। 22 तैनेई ज़ैखन शुनू त ज़ोने लगे, “ए मैन्हु केरि आवाज्ज नई बल्के परमेशेरी आवाजे।” 23 किजोकि हेरोदेसे परमेशेरी तारीफ़ न की, तैल्हेरेलेइ तैस परमेशेरे स्वर्गदूतेरी एरी मार पेई कि तैसेरी सैरी जानी कीड़े लगगे, ते तै मेरि जेव।

24 पन परमेशेरेरू बच्चन अग्रोवं बद्धतू जेवं, ते विश्वासी लोकां केरि गिनती बद्धती जेई।

25 ज़ैखन बरनबास ते शाऊल अपनि सेवा ज़ै तैन केरे सुपुर्द कियोरी थी, तैनेई पूरी की त अन्ताकिया नगरेरां यरूशलेम नगरे जो वापस आए, ते यूहन्ना ज़ैस जो मरकुस ज़ोते थिये, एप्पू सेइं साथी आनो।

13

??????????

1 अन्ताकिया नगरेरे कलीसियाई मां काई नबी ते गुरू थिये, मतलब बरनबास, शमौन ज़ैस जो नीगर भी ज़ोतन, लूकियुस कुरेनी, ते मनाहेम ज़ै मुलखेरे च़ेवरोवं हिसे पुड़ हाकिम थियो ज़ै हेरोदेसेरो दुद्ध ढला थियो, ते शाऊल थियो। 2 ज़ैखन तैना बरत रेखतां प्रभुएरी आराधना केरने लगगोरो थिये, त पवित्तर आत्मा तैन सेइं ज़ोवं, “ज़ैस सेवारे लेइ बरनबास ते शाऊल मीं कुजोरन, तैसेरेलेइ तैन अलग केरा।” 3 तैखन तैनेई बरत रेखतां परार्थना की, ते तैन पुड़ हथ रेखतां तैना परमेशेरेरे कम्मरे लेइ भेजे।

??????????

4 शाऊल ते बरनबास पवित्तर आत्माारी तरफां भेजोरे सिलूकिया नगरे जो जे, ते तैट्ठां तैना जिहाजे पुड़ च़ेढतां साइप्रस टैपू जो च़ले। 5 ज़ैखन तैना सलमीसे मां पुज्जे, त तैड़ी तैना यहूदी केरे परार्थना घरे मां परमेशेरेरू वचन

शुनाव, ते यूहन्ना मरकुस भी तैन केरि मद्दत केरनेरे लेइ तैड़ी थियो । 6 जैखन तैनेई सारे जज़ीरे ते नगरन-नगरन मां हंटु फिरू, त तैना पाफुसे नगरे मां पुजे, त तैन केरि मुलाकात एक्की डैइनोडे यहूदी ते झूठे नेबी सेइं भोइ, जेसेरू नवं बार-यीशु थियूं । 7 तै तैट्टेरे हाकिम सिरगियुस, पौलुस सेइं साथी थियो, जे अक अक्लमन्द मैन्हु थियो, ते तैनी बरनबास ते शाऊल कुजाए ते परमेशेरे वचन शुन्नू चाऊ । 8 पन एलीमास डैइनोडो (किजोकि तैसेरे नंवेरो मतलब डैइनोडो ए) तैन केरि खलाफत केरने लगो, तैने हाकिम यीशु पुड़ विश्वास केरने करां रोकनो चाव । 9 तैखन शाऊल जेसेरू नवं पौलुस भी आए, पवित्र आत्माई सेइं भेरोइतां ध्याने सेइं एलीमास डैइनोडेरे पासे तकने लगो, ते तैस सेइं ज़ोवं, 10 “हे शैतानेरे कोआ, तू हर किसमेरी पाखंडे सेइं ते च़लैकी सेइं भेरतस, ते नेकारो दुश्मन, कुन तू परमेशेरी बत बगाइने करां बाज़ न एजस? 11 हुनी प्रभु तेरे खलाफे, तू कानो भोइगानोस, ते किछ् च़िरे तगर तू दिहाडो न लाएलो ।” तैखने तैस आंधरू लेइयोने लगू, ते तै इरां-उरां तोपने लगो, ताके कोई तैस हथेरां टलेइतां च़लाए । 12 तैखन हाकिमे एन हेरतां, ते प्रभुएरी शिक्षा शुन्तां हैरान राव, ते प्रभु यीशु पुड़ विश्वास कमाव ।

??

13 पौलुस ते तैसेरो साथी पाफुस नगरेरां ज़िहाजे मां पंफूलिया इलाकेरे पिरगा नगरे मां आए, ते यूहन्ना तैन शैरतां वापस यरूशलेम नगरे जो च़लो जेव । 14 ते तैना पिरगा नगरेरां निस्तां पिसिदिया इलाकेरे अन्ताकिया नगरे मां पुजे जै गलतिया इलाके मां आए । ते आरामेरे दिहाडे प्रार्थना घरे मां गेइतां बिश्शी जे । 15 मूसेरो कानून ते नेबी केरि किताबी मां पढनेरे बाद तैट्टेरे प्रार्थना घरेरे प्रधाने तैन ज़ोवं, “अगर मैन्हु केरि भलैइयेरे लेइ तुस भी किछ् ज़ोनू चातथ त ज़ोथ ।” 16 तैखन पौलुस खडो उठो ते हथ्ये सेइं इशारे केरो कि चुप रान ते ज़ोने लगो, “हे इस्राएली लोकव ते परमेशेरो डर मन्नेबाले गैर कौमां केरे लोकव मेरी गल शुना । 17 इन इस्राएली लोकां केरे परमेशेरे इश्शे दादे-पड़दादे चुने, जैखन तैना मिस्र मुलखे मां परदेशी भोइतां रहते थिये, तैन परमेशेरे तरक्की दिती, ते बडे शेक्ति सेइं तैट्टां कढे । 18 ते तै सुनसान ठैरी मां लगभग 40 सालन तगर तैन केरि झैल्लतो राव, तैना बार-बार हुक्म टलोइते राए । 19 कनान मुलखे मां परमेशेरे सत कौमां नाश केरतां तैन केरि ज़मीन अपने इस्राएली लोकन विरासती मां दिती । 20 एना गल्लां पूरी भोने लगभग 450 साल लगे, तैसेरां बाद परमेशेरे तैन केरे लेइ शमूएल नेबेरे वक्ते तगर हाकिम रखे । 21 जैखन हेजू शमूएल तैन केरो हाकिम थियो त तैन लोकेई राज़ो बनानेरे लेइ दरखुवास की, ते परमेशेरे बिन्यामीनेरे गोत्रे मरां कीशेरू मट्टू शाऊल राज़ो बनाव ते तैनी 40 साल यरूशलेम नगरे मां राज़ कियूं । 22 फिरी तैनी शाऊल हटेइतां दाऊद तैसेरी ठैरी तैन केरो राज़ो बनाव, जेसेरे बारे मां तैनी गवाही दिती, मीं यिशैरू मट्टू दाऊद मेरे मनेरे मुताबिक मैलोरूए, तैस पुड़ अवं खुश आई, ते तैए मेरी मर्जी पूरी केरेलो । 23 परमेशेरे अपने वादेरे मुताबिक तैसेरे वंशेरे मरां पापन करां मुक्ति देनेरे लेइ इस्राएले कां यीशु मसीह भेजो । 24 जेसेरे एजने करां पेइले यूहन्ना इस्राएलेरे सारे लोकन प्रचार कियो, कि पापन करां मनफिराथ ते बपतिस्मो नेथ ।” 25 जैखन यूहन्नारू कम पूरू भोनेबालू थियूं, त तैनी ज़ोवं, “तुस मीं कुन समझतथ? ‘अवं मसीह नई!’ बल्के हेरा, तै मेरे बाद एजनेबालोए, किजोकि अवं त एस काबल नई कि तैसेरे बूटां केरे तसमे भी खोल्ली सेखी ।”

26 “हे मेरे द्वाव, तुस जैना अब्राहमेरे औलादारे लोकव, ते परमेशेरो डर मन्नेबाले गैर कौमां केरे लोकव, इस मुक्तेरो बिस्तार तुसन कां भेजेरोए । 27 यरूशलेम नगरेरे रानेबाले लोकेई ते तैन केरे प्रधानेई यीशु मसीह न पिशानो, ते न नेबी केरि गल्लां सेमझी, जैना हर आरामेरे दिहाडे पेढतां शुनेई गैती थी । 28 हालांकी तैन मौतरी सज़ारे काबल सबूत न मैल्लू, पन फिरी भी तैनेई पिलातुस गवर्नरे कां दरखुवास की, कि ए मारो गाए । 29 ते तैनेई सब किछ् जैन तैसेरे बारे मां पवित्रशास्त्रे मां लिखेरू थियूं, पूरू कियूं, त तै करूसे पुड़ कील देइतां मारो, ते ओसैलतां एक्की कबरी मां छ़ड्डो । 30 पन परमेशेरे तै मुड़दन मरां भी ज़ींतो कियो । 31 ते जैना लोक गलील इलाके मरां तैस सेइं साथी यरूशलेम नगरे मां ओरे थिये, तैन चलन काई दिहाइन तगर यीशु लेइयोतो राव, ते हुनी तैना लोक जैनेई तै लाहोरोए गवाही देतन । 32 असां तुसन खुशखबरी शुनातम, कि जै वादो परमेशेरे इश्शे दादे-पड़दादन सेइं कियोरो थियो । 33 कि परमेशेरे यीशु मसीह मुड़दन मरां ज़ींतो केरतां तै वादो पूरू कियो, ते भजना केरि किताबी मां परमेशर मसीहेरे बारे मां ज़ोते, तू मेरू मट्टूस ते अवं तेरो बाजी भोव ।

34 एन सच्चे, कि परमेशेरे तै मुड़दन मरां भी ज़ींतो कियो, ताके तै न शडे, परमेशेरे बचने मां एन्ने बियांन कियोरूए,

कि अवं तीं पवित्त्र ते सच्चि बरकत देलो, जैन केरो वादो परमेशरे दाऊदे सेइं कियोरो थियो।

35 ते होरि भजने मां दाऊद ज़ोते,

तू अपने पवित्त्र मैन्हु शङ्गे न देलो। 36 किजोकि दाऊद त अपने वक्ते मां परमेशरेरी मर्जी पूरी करनेरां पत्ती मेरि जेव, ते अपने दादन-पडदादन सेइं साथी दफन भोव, ते तैसेरी जान शैडी जेई। 37 पन जै (यीशु मसीह) परमेशरे मुड्दन मरां जीतो कियो, त तैसेरे शङ्गेरी नौबत न आई।

38 “एल्हेरेलेइ, हे द्लाव, बुझा कि यीशुएरे जिरिये सेइं तुसन पापां केरि मैफारी खबर शुनाई गाचे। 39 तुस मूसा नेबेरे कानूने मुताबिक धर्मी न थी भोने, पन जै कोई यीशु पुड विश्वास केरे तै धर्मी भोए।

40 “एल्हेरेलेइ खबरदार राथ, कोस्कोई एरू न भोए कि नेबी केरि ए गल तुसन पुड सच्चि बीते,

41 तुस जैना होरि केरि तुहीन केरतथ, हेरा, ते हैरान भोथ, ते बरबाद भोथ,

किजोकि अवं तुशे जीते जागते एरू कम केरनेबालोई,

कि अगर कोई तुसन सेइं तैसेरे बारे मां गलबात भी केरे, त तुस कथे विश्वास न केरेले।”

42 जैखन पौलुस ते बरनबास प्रार्थना घरे मरां चले, त लोक तैन कां मिनत केरतां ज़ोने लगे, कि होरि आरामेरी दिहाडी भी एन्ने गल्लां केरे बारे मां ज़ोवं गाए। 43 जैखन लोक आराधनारे बाद बेइर निस्से, त बडे लोक पौलुस ते बरनबासे पत्ती चले, ते तैन मां किछ् यहुदी थिये, ते किछ् नव्वे यहुदी पंथ धारण कियोरे थिये, ते तैनेई तैन सेइं गलबात केरतां तैन समझाव, कि परमेशरे अनुग्रहे मां बनोरे राथ।

????????? ?????????? ????? ?????? ????? ?????? ????????????? ??????????

44 होरि आरामेरे दिहाडे लगभग सारू नगर परमेशरेरू वचन शुन्नेरे लेइ अकोट्टू भोवं। 45 जैखन यहुदी लीडरेई एत्रे हछे लोक लाए त तैन जलन भोइ, ते पौलुसेरे खलाफ गल्लां लग्गे केरने। 46 तैखन पौलुस ते बरनबासे दिलेर भोइतां तैन ज़ोवं, “जरूरी एन थियूं, कि असां पेइले तुसन परमेशरेरू बच्चन शुनाम, पन तुस त इन्कार केरने लोरेथ, ते अपनो आप हमेशारी ज़िन्दगरे काबल न समझथ, त हेरा हुनी असां गैर कौमां केरे पासे गातम। 47 किजोकि प्रभुए असन ई हुक्म दित्तोरोए,

मीं तू मीं तू गैर कौमां केरे लेइ लौ बनोरस,

ताके तुशे ज़िरिये सारे ज़मीनी पुड मुक्ति आनी गाए, ते तू ज़मीनरे हर पासे मुक्तरू दार भोस।”

48 इन शुन्तां गैर कौमां केरे लोक बडे खुशी भोए, ते परमेशरेरी तारीफ़ केरने लगे, ते जैना परमेशरे हमेशारी ज़िन्दगरे लेइ ठहरावरे थिये, तैनेई विश्वास कियो। 49 ते प्रभुएरू बच्चन सारे मुलखे मां फैली जेवं। 50 पन यहुदी लीडरेई बडे भक्त ते इज्जतदार कुआन्शां ते नगरेरे काई खास मैन्हु भडकाए, तैनेई पौलुस ते बरनबासे सितेइतां तैना तैस इलाके मरां भी केढी छडे। 51 तैखन पौलुस ते बरनबासे तैन केरे सामने अपने पावां केरि धूड टुडकतां* तैना इकुनियुम नगरे जो चले जे। 52 ते चेले इकुनियुम नगरे मां खुशी ते पवित्त्र आत्माई सेइं भरपूर भोते राए।

14

????????? ?????? ????? ?????????? ?? ??????????

1 इकुनियुम नगरे मां पौलुस ते बरनबास दुइये ज़ने प्रार्थना घरे मां जे, ते एरू भाषण केरने लगे ते बडे यहुदी लोकेई ते यूनानी लोकेई विश्वास कियो। 2 पन विश्वास न केरनेबाले यहुदेई, गैर यहुदी लोक भडकाए ते तैनेई विश्वासी मैन्हु विश्वासे करां दूर किये, ते तैन केरे खलाफ क्रोध पैदा कियो। 3 ते पौलुस ते बरनबास काई दिहाडे तैडी राए, ते प्रभुएरी भरोसे पुड दिलेरी सेइं गल्लां केरते थिये, ते प्रभु तैन केरे ज़िरिये चमत्कार ते निशान करेइतां अपने अनुग्रहरे वचने सच्चि साबत केरतो राव। 4 पन नगरेरे लोकन एप्पू मामेइं फूट भोइजेइ, किछ् लोक यहुदी केरे पासे भोए, ते किछ् प्रेरितां केरे पासे भोए। 5 यहुदी ते गैर यहुदी अपने प्रधान्न सेइं मिलतां तैन बेइज्जत केरने ते तै घोडेई बाने लगे। 6 त तैन एस गल्लरो पतो लगो, तैना तैट्टां नेश्शी जे, ते लुकाउनिया इलाकेरे नगरन लुस्त्रा ते दिरबे मां ते तैसेरे आसे-पासेरे इलाके मां चले जे। 7 ते तैडी तैना खुशखबरी शुनाने लगे।

????????????? ?????? ?? ?????????? ????? ?? ?????????? ??????????

* 13:51 13:51 धूड टुडकतां: इन हिरानेरे लेइ कि परमेशरे तैन लोकां केरो इन्कार कियोरोए।

8 लुस्तुरा नगरे मां अक मैन्हु बिशोरो थियो, जै पांवां केरो कमजोर थियो, तै जर्मनेरो टोन्टो थियो, ते तै कधी न थियो चलोरो। 9 तै पौलुसेरी गल्लां ध्याने सेइं शुन्ने लग्गोरो थियो, पौलुसे तैसेरे पासे ध्याने सेइं तक्कू त जानू, कि एसमां एत्रो विश्वासे कि ए बेज्झोइ सकते। 10 ते पौलुसे तैस मैन्हु ज़ोरे सेइं ज़ोवं, “अपने पावन पुइ खड़ो भो।” ते तै तैखने खड़ो भोव, ते चलने लगे। 11 ज़ैखन लोकेईं पौलुसेरू एन कम हेरू त लुकाउनिया भाषाई मां ज़ोरे सेइं ज़ोने लगे, “कि देबतो असन कां मैनेरो शकली मां ओरोए।” 12 ते तैन लोकेईं बरनबासेरू नवं ज्यूस रख्वू, (जैन यूनानी देबतेरू नवं थियूं), ते पौलुसेरू हिर्मेस नवं रख्वू, (जै होरि देबतां केरो बिस्तार देने बालन मरां प्रधान थियो) किजोकि तै गल्लां केरने मां जादे माहिर थियो। 13 ते ज्यूस देबतेरू मन्दर नगरेरे सामने थियूं, तैसेरो पुजारी दांत ते फूडू केरे हार एन्तां नगरेरे फाटके पुइ पुजो, किजोकि तैना लोक चाते थिये कि असां प्रेरितां केरे लेइ बलिदान केरन।

14 ज़ैखन बरनबास ते पौलुस प्रेरितेईं एन शुनू, त तैना दुखी भोए, ते तैनेईं अपना लिगड़ां छिन्दां ते मैनन मां जे ते ज़ोरे-ज़ोरे ज़ोने लगे। 15 “लोकव तुस एन कुन केरने लगेरेथ? असां भी तुशशे ज़ेरे दुःख सुख झैल्लने बाले मैन्हु आम, ते तुसन खुशखबरी शुनातम, ताके तुस एना फुजूल चीजां शैरतां जीते परमेशेरे पासे एज्जथ, ज़ैनी धरती त कने अम्बर ते समुन्दरे ते ज़ैन किछ भी एसमां आए तैनी बनोरूए। 16 तैनी बीतोरे वक्ते मां सैरी कौमन अपनि-अपनि बत्तां चलने दित्तू। 17 फिरी भी तैनी अपनो आप बेगवाह न बनाव, पन अपनि भलाई हेरानेरे लेइ तैनी अम्बेरां झड़ी दित्ती, ते फसलां केरे लेइ मौसम बनाए, ताके तुसन हछु अन भोए ते तुशशे दिल खुशी सेइं भरे।” 18 एना गल्लां ज़ोइतां तैनेईं लोक बेड़ि मुशकली सेइं रोके, कि एना इशशे लेइ बलिदान न देन।

19 तैखन किछ यहूदी अन्ताकिया नगरे ते इकुनियुम नगरे मरां आए, ते तैनेईं लोक अपने पासे केरतां पौलुसे पुइ पथराव केरने लगे, ते तै मुओरो बुझतां नगर करां बेइरोवं घसीटतां नीयो। 20 ज़ैखन चले तैड़ी पुजे ते तैनेईं पौलुस घरे मां आनो ते तै खड़ो उठो ते वापस नगर मां अव, ते होरसां बरनबासे सेइं साथी दिरबे नगरे जो चलो जेव।

??

21 पौलुस ते बरनबासे तैस नगर मां खुशखबरी शुनाई ते बड़े चले बनाए, ते तैसेरां बाद तैना लुस्तुरा ते इकुनियुम नगरे ते अन्ताकिया नगरे मां वापस आए। 22 तैना हर एक्की नगरेरे चेलां केरे मन मजबूत केरते ते ई शिक्षा देते थिये कि विश्वासे मां बनोरे राथ, ते इन ज़ोते थी, “ते असेईं बड़ो दुःख झैल्लतां परमेशेरे राज्जे मां दाखल भोनूए।” 23 ते तैनेईं हर कलीसियाई मां तैन केरे बुजुर्गां ठहराए, ते बरतां रखतां प्रार्थना की, ते तैना प्रभुएरे सुपुर्द किये, जैस पुइ तैनेईं विश्वास कियोरो थियो।

24 फिरी तैना पिसिदिया इलाके मरां निस्तां पंफूलिया इलाके मां पुजे। 25 ते पिरगा नगरे मां वचन शुनेइतां त अत्तलिया नगरे मां आए। 26 तैट्टां ज़िहाजे मां च़ेढ़तां वापस अन्ताकिया नगरे मां आए, ते तैड़ी तैनेईं तैस सेवारे लेइ ज़ै तैनेईं पूरी कियोरी थी, परमेशेरे अनुग्रहेरे सुपुर्द कियोरी थी। 27 अन्ताकिया नगरे मां पुजतां तैनेईं कलीसियारे लोक अकोट्टे किये, कि परमेशेरे असन सेइं साथी भोइतां केरहां-केरहां बडां कम्मां कियां! ते गैर कौमां केरे लेइ बत खोल्ली, कि तैना भी यीशु पुइ विश्वास केरन। 28 ते तैना चलन सेइं साथी बड़े दिहाइन तगर राए।

15

??

1 फिरी किछ लोक यहूदिया इलाके मरां आए, ते विश्वासी ढलान ए शिक्षा देने लगे, “अगर मूसेरे रसमरे मुताबिक तुशशो खतनो नईं भोरो ते तुसन मुक्ति न मैल्ली बटे।” 2 एस गल्ली पुइ पौलुस ते बरनबासेरो तैन लोकन सेइं बड़ो मतभेद ते बड़ी बेंस भोइ, ते कलीसियारे लोकेईं पौलुस ते बरनबास ते किछ होरे मैन्हु चुने कि तैना यरूशलेम नगरे मां गेइतां तैड़ी एस मसले पुइ प्रेरितन ते बुजुर्गन सेइं गलवात केरतां हल कढन। 3 तैखन कलीसियारे लोकेईं तैना खर्चो देइतां भेजे, ते ज़ैखन तैना फीनीके ते सामरियारे इलाकन मांमेइं चलोरे थिये, तैनेईं ज़ोवं, कि केन्चरे गैर कौमां केरे लोक खुशखबरी शुन्तां मसीह पुइ विश्वास कियो, ते कलीसियाई मां शामिल भोए, एन शुन्तां सारे मसीह ढला बड़े खुश किये। 4 ज़ैखन तैना यरूशलेम नगरे मां पुजे, ते तैठेरी कलीसियारे लोक ते प्रेरित ते बुजुर्ग तैन सेइं बेड़ि खुशी सेइं मिले, ते तैखन पौलुस ते बरनबासे सब किछ बिस्तार दित्तो, कि परमेशेरे तैन केरे ज़िरिये सेइं केत्रा-केत्रा कम्मां कियां। 5 पन फरीसी पंथेरे किछ लोकेईं ज़ैनेईं विश्वास कियोरो थियो, तैन मरां किछ ज़ोने

लगे, “गैर कौमन मरां विश्वास करनेवालां केरो खतनो कियोरो लोड़े, ते एन मूसा नेबेरे कानूने पुड़ अमल करनेरो हुकम दित्तरो लोड़ते।”

6 तैखन प्रेरित ते बुजुर्ग ए गलबात करनेरे लेइ अकोट्ठे भोए। 7 बड़ी बेंस भोनेरे बाद पतरसे तैन खड़े भोइतां ज़ोवं, “हे मेरे ढ्लाव, तुस ज्ञानतथ कि बड़े चिरे पेइले परमेशेरे अवं तुसन लोकन मरां चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन। 8 परमेशेरे ज़ै दिलेरो हाल ज्ञानते, तैनी तैन भी इशशी ज़ेरि पवित् आत्मा देइतां इन हिराव, कि परमेशेरे तैना अपने लोकां केरे ज़ेरे कबूल किये। 9 ते विश्वास करनेरे ज़िरिये सेइं तैन केरे मन पवित् केरतां असन मां ते तैन मां कोई फर्क न रख्खो। 10 त हुनी तुस परमेशेरी अज़मैइश किजो केरतथ? कि गैर कौमन मरां ओरे चलन (यानी विश्वासी लोकन) पुड़ एतरो बोझ किजो रखतथ, ज़ै न असेईं छुइयोए ते न इशशे दादे-पड़दादे छुइयोए। 11 एरू केरनू ठीक नई, किजोकि इशशू याकीन त इने कि प्रभु यीशु मसीहेरे अनुग्रह सेइं तैन केरे पापां केरि मुक्ति भोली, तेन्चरे इशशी मुक्ति भोली, न कि मूसेरे कानूने सेइं।”

12 तैखन सारे लोक चुपचाप बरनबास ते पौलुसेरी गल्लां शुन्ने लगगे, कि परमेशेरे केन्चरे गैर कौमन मां तैन केरे ज़िरिये केरहे-केरहे निशान ते चमत्कार किये। 13 ज़ैखन तैना चुप भोए त याकूब ज़ोने लगगे, “मेरे ढ्लाव मेरी गल शुना।” 14 शमौन पतरसे रोड़ेचारे ज़ोवं, कि परमेशेरे पेइले केन्चरे गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए।

15 नेबी केरू बच्चन भी एसेरू ज़ेरूए ज़ेन्चरे लिखोरूए कि।

16 एसेरां बाद अवं फिरी एइतां दाऊदेरू राज बनेइलो,

ज़ैन तैसेरे दुश्मनेईं नाश कियोरू थियूं।

17 ताके बाकी सारे लोक ते गैर कौमन समेत ज़ैना मीं कुजोरेन मेरे लोक भोन, ते मीं तोप्पन।

18 ए तैए प्रभु ज़ोते ज़ै दुनियारे शुरुआती करां इन गल्लां केरि खबर देतो अव।

19 “एल्हेरेलेइ मेरो खियाल ईए, गैर कौमन मरां ज़ैना लोक परमेशेरे कां एइतन, तैन अस यहूदी केरो कानून मन्नेरे लेइ मजबूर न केरम। 20 बल्के तैन चिट्ठी लिखतां एन ज़ोम कि मूरतन कां च़ैदोरी चीज़ां करां दूर रान, ते बदमैशी ते गलचैटी देइतां मारोरे जानवरां केरू मास न खान ते खून न खान। 21 किजोकि बड़े पेइले नगर-नगरे मां मूसेरे कानूनेरो प्रचार करनेवाले भोते आए, ते तैना हर आरामेरे दिहाड़े प्रार्थना घरे मां पेढी गाती थी।”

???? ???? ???? ?????????? ???? ?? ???????

22 तैखन प्रेरित ते बुजुर्ग ते सारी यरूशलेमेरे सारे कलीसिया मिलतां एन रोड़ समझू, कि असन मरां किछ मैन्हु चुने गान, मतलब यहूदा, ज़ैस जो बरसब्बास ज़ोतन ते सीलास ज़ैना ढ्लान मां खास आन, ते तैन पौलुस ते बरनबासे सेइं साथी अन्ताकिया नगरेरे कलीसियाई मां भेज़म। 23 ते तैनेईं तैन केरे हथ्थे इन लिखतां भेज़ू, “अन्ताकिया नगरे ते सीरिया ते किलिकिया इलाकां केरे रानेवाले विश्वासी ढ्लान ज़ैना गैर कौमन मरां आन, प्रेरितां ते बुजुर्ग ढ्लां केरू नमस्कार! 24 असेईं शुनेरूए, कि किछ मैन्हु बगैर अजाज़तां तुशशे इड़ी आए, ते तैनेईं अपनि गल्लेईं सेइं तुशशो दिल परेशान कियो। 25 एल्हेरेलेइ असेईं एन ठीक समझू, कि इट्टां दूईं मैन्हु अपने ढ्लारे बरनबास ते पौलुस सेइं साथी तुसन कां भेज़म। 26 एना एरे मैन्हु आन कि ज़ैन इशशे प्रभु यीशु मसीहेरे लेइ अपनि जानरी भी परवाह नई। 27 एल्हेरेलेइ असेईं यहूदा ते सीलास भेज़ोरेन, ते तैना एप्पू भी एना गल्लां शुनाले। 28 पवित् आत्मा, ते असेईं एन ठीक समझू, कि इना ज़रूरी गल्लां केरे अलावा तुसन पुड़ होरो बोझ न देम। 29 बस्सा तुस मूरतन कां च़ादोरे बलिदाने ते खून करां ते गल दुबेइतां मारोरे जानवरे करां ते बदमाशी केरने करां दूर राथ एन तुशशे लेइ रोड़ भोलू। अग्रोवं जो शुभकामना”

30 बस्सा तैना मैन्हु चलते-चलते अन्ताकिया नगरे मां पुजे, तैड़ी तैनेईं कलीसियारे लोक अकोट्ठे केरतां ए चिट्ठी तैन केरे हवाले की। 31 तैना चिट्ठी मां लिखोरी गल्लां पेढतां बड़े खुशी भोए। 32 यहूदा ते सीलास एप्पू भी नबी थिये, तैनेईं तैट्ठेरे विश्वासी ढ्लान शिक्षा दिती ते तैना विश्वासे मां पक्के बनाए। 33 किछ दिहाड़ना बाद तैट्ठेरे विश्वासी ढ्लाएईं आनन्दे सेइं ते प्रार्थना केरतां वापस भेजे, ताके अपने भेज़ने बालन कां वापस गान। 34 सीलासे अन्ताकिया नगरे मां रानेरो फैसलो कियो ते यहूदा अकैल्लो वापस यरूशलेमे जो अव। 35 ते पौलुस

ते बरनबास अन्ताकिया नगरे मां रुकी जे, तैड़ी तैना काई होरि लोकन सेइं मिलतां लोकन प्रभु यीशुएरे वचनेरी शिक्षा देंते राए ते खुशखबरी शुनाते राए ।

३६ किछ् चिरेरां बाद पौलुसे बरनबास सेइं ज़ोवं, “चल असां तैन सारे नगरन मां गाम, ज़ैडी असेईं खुशखबरी

शुनावरी थी, ते तैन विश्वासी ढलान सेइं मुलाकात केरम, ते हेरम कि तैन केरो कुन हाले ।” ३७ तैखन बरनबासे यूहन्ना ज़ैस जो मरकुस ज़ोतन, साथी नेनो चाव । ३८ पन पौलुसे ठीक न समझू, कि यूहन्ना तैन सेइं साथी गाए, किजोकि तै पंफूलिया इलाके मां कम शैरतां अलग भोरो थियो । ३९ पौलुस त बरनबासे एप्पू मांमेइं बड़ी अनबन भोइ, ते तैना अलग भोए, बरनबास ते मरकुस ज़िहाजे मां साइप्रस जो चलो जे ।

४० पन पौलुसे सीलास एप्पू साथी नीयो, ते विश्वासी ढलाएईं तैन केरे लेइ प्रार्थना की, ते तैना परमेशेरे

अनुग्रहेरे सुपर्द किये ते तैना तैट्ठां चले जे । ४१ पौलुस सीरिया ते किलिकिया इलाकन मांमेइं निस्सो चलतो ते कलीसियां केरे विश्वासी लोकन मज़बूत केरतो जेव ।

16

१ तैना फिरी दिरबे नगरे ते लुस्त्रा नगरे मां आए, तैड़ी अक चेलो तीमुथियुस नव्वेरो रातो थियो, तैसेरी अम्मा

यहूदी थी, ते तै मसीह पुड़ विश्वास केरती थी, पन तैसेरो बाजी यूनान मुलखेरो रानेबालो थियो । २ तीमुथियुस लुस्त्रा नगरे मां ते इकुनियुम नगरेरे विश्वासी ढलान मां बड़ो रोड़ो मैन्हु थियो । ३ पौलुसेरी इच्छा ई थी, कि तै तैस साथी ने, तैन यहूदी केरि वजाई ज़ैना तैड़ी रहते तैसेरो खतनो कियो, किजोकि तैना सब ज़ानते थी कि तैसेरो बाजी यूनान मुलखेरो रानेबालो थियो । ४ पौलुस ते तैसेरे साथी नगर-नगरे मांमेइं चलते जे, तैट्ठेरे विश्वासी लोकन तैना हुक्मां केरे बारे मां ज़ोते जे, ज़ैना यरूशलेम नगरे मां प्रेरितेईं ते बुजुर्गेईं मिलतां ठहरावरे थिये, ताके लोक तैन पुड़ अमल केरन । ५ बस्सा कलीसियां विश्वासे मां पेक्की भोती जेईं, ते तैन केरि कलीसियां केरि तैधात बद्धती जेईं ।

६ पौलुस ते तैसेरे साथी फ़रूगिया ते गलातिया इलाकन मांमेइं निस्तां जे, किजोकि पवित्र आत्मा तैना आसिया

इलाके मां बच्चन शुनाने करां रोक़ोरे थिये । ७ ते तैना मूसिया इलाकेरे नेड़े पुज़तां, बितूनिया इलाके मां गानू चाते थिये, पन यीशुएरे आत्मा गाने न दित्ते । ८ एल्हेरेलेइ तैना मूसिया इलाकेरे नेड़ेरां त्रोआस नगरे मांजो चले जे । ९ राती पौलुसे अक मैन्हु दर्शने मां लाव, “तै मकिदुनी इलाकेरो थियो, तै खड़ो भोइतां पौलुसे कां मिनत केरने लोरो थियो, कि पार समुन्दरेरे मकिदुनिया इलाके मां एइते इश़ी महत केर ।” १० तैसेरे इस दर्शन हेरनेरां पत्ती लूशी अस पार मकिदुनिया इलाके मां गानेरे लेइ तियार भोइ जे, किजोकि असेईं बुझू कि परमेशेरी असां तैड़ी खुशखबरी शुनानेरे लेइ कुजवरेम ।

११ असां त्रोआस नगरेरां ज़िहाजे मां जे, ते पैनैरू सफर केरतां सुमात्राके टैपू पुड़ आए, ते तैट्ठां होरसां

नियापुलिस नगरे मां आए । १२ तैट्ठां असां फिलिप्पी नगरे मां पुजे, ज़ैन मकिदुनिया इलाके मां खास नगरे, ते रोमी केरि बेसती मांए, ते अस तैस नगरे मां किछ् दिहाड़े राए । १३ आरामेरे दिहाड़े असां नगरेरे फाटके मरां निस्तां दरियाए पुड़ पुजे, किजोकि असन उमीद थी कि तैड़ी यहूदी केरि प्रार्थना केरनेरी कोई ठार भोनीए, असां तैड़ी गेइतां विश्शी जे, तैड़ी किछ् कुआन्शां थी, असां तैन सेइं गल्लां केरने लगे । १४ इश़ी गल्लां शुन्ने बैली कुआन्शन मां अक परमेशेरी भक्त लुदिया नव्वेरी थी, तै थुआतीरा नगरेरी राने बाली थी, ते बैंगनी लिगड़ां बेचने बाली थी, ते प्रभुए तैसेरो मन खोल्लो, कि तै पौलुसेरे गल्लन पुड़ ध्यान केरे । १५ ज़ैखन तैसां ते तैसारे पूरे टब्बरे बपतिस्मो नीयो त तै बिनती केरतां ज़ोने लगी, “अगर तुस लोक मीं प्रभुएरी ईमानदार दासी समझतथ, त मेरे घरे चला ते विश्शी राथ,” ते तैसारी मिनत शुन्तां असां खुशी भोए ।

१६ ज़ैखन तैसां ते तैसारे पूरे टब्बरे बपतिस्मो नीयो त तै बिनती केरतां ज़ोने लगी, “अगर तुस लोक मीं प्रभुएरी ईमानदार दासी समझतथ, त मेरे घरे चला ते विश्शी राथ,” ते तैसारी मिनत शुन्तां असां खुशी भोए ।

16 एक्की फेरे असां प्रार्थना केरनेरी ठारी जो ज़लोरे थिये त असन अक दासी मैल्ली ज़ै भूतां केरे मद्दती सेइं एजनेबाले वक्तेरे बारे मां ज़ोती थी। ते अपने मालिकां केरे लेइ बड़े पेंडसे कमाती थी। 17 तै पौलुसे पत्ती ते असन पत्ती ज़ली ते ज़ोने लगी, “ए मैन्हु परमप्रधान परमेशेरो दासे, ते एना असन पापां केरि मुक्तरी बत हिरातन।” 18 तै काई दिहाड़े एन्ने केरती राई, पन पौलुसे जिच भोव, ते मुड़तां तैस भूते जो ज़ोवं, “अवं तीं यीशु मसीहेरे नंवे सेइं हुक्म देताई निस्सी गा, ते तै तैखने तैस मरां निस्सी जेई।”

19 ज़ैखन तैसेरे मालिकेइं हेरू कि इश्शी कमैइयरी उमीद ट्लुटी जेई, त तैनेई पौलुस ते सीलास ट्लेइतां चौके मां प्रधानां केरे हवाले किये। 20 तैनेई पौलुस ते सीलास हाकिमन कां पैश किये, ते ज़ोने लगे, “एना यहूदीन ते इश्शे नगर मां बड़ी खलबली मच्चाने लगोरें। 21 ते एरे रुवाजेरी शिक्षा देतन, ज़ैन केरू केरनू ते मन्नु असन रोमे मां रानेबालान केरे इश्शे लेइ बिलकुल भी ठीक नई।” 22 एन शुन्तां सारे लोक पौलुस ते सीलासेरे खलाफ अकोट्टे भोए, ते हाकिमेई तैन केरां लिगड़ां खोलतां छिन्दां ते सोटेई बानेरो हुक्म दित्तो। 23 सिपैहीयेइं तैन खूब बेंतेइं बैही ते कैदखाने मां छड़े, ते कैदखानेरे प्रधाने हुक्म दित्तो, कि रोड़ेचारे पेरहो दित्तो गाए। 24 तै हुक्म शुन्तां तैना आंधरी कोठी मां छड़े, ते तैन केरे पावन लेकड़ी बेड़ि लेइ।

ॐॐॐॐ ॐॐ ॐॐॐॐॐॐॐ ॐॐॐॐॐॐॐ ॐॐॐॐ ॐॐॐॐॐॐ

25 एध्धी राती पौलुस ते सीलास प्रार्थना केरने मां मघन थिये, ते परमेशेरां भजना लोरे थी ज़ोने, ते होरे कैदी भी शुन्ने लोरे थिये। 26 अचानक अक भुंजल अव, ते कैदखानेरे बुनीयाद हिल्ली ते सारां दारां खुल्ली जेआं, ते सैरी कैदी केरि बेड़ि भी खुल्ली जेई। 27 कैदखानेरो प्रधान बीझो ते खड़ो उठो, ते तकने लगे, ते हेरते कि कैदखानेरां दारां खुल्ली जोरेन, त तैनी समझू कि सारे कैदी नश्शोरेन, ते तैनी अपनि तलवार खिचची कि अवं अपनो आप मैरी छेड़डी। 28 पन पौलुसे ज़ोरे सेइं ज़ोवं, “अपनो आप न मार किजोकि असां सब इड़ी आम।” 29 तैखन तै दीयो बैलतां अन्तर जेव, ते पौलुसे ते सीलासेरे पावन पुड़ पेव, 30 फिरी तैनी तैना बेइर आने ते ज़ोने लगे, “जनाब अवं कुन केरि, कि मेरी मुक्ति भोए?” 31 तैनेई ज़ोवं, “प्रभु यीशु मसीह पुड़ विश्वास केर, त तीं ते तेरे टब्बरे पापन करां मुक्ति मैल्लनीए।” 32 ते तैनेई तैस त तैसेरे टब्बरे प्रभुएरू वचन शुनाव। 33 तैखने तैने राती पौलुस ते सीलास नेइतां तैन केरे ज़खम धोए, ते तैनी तैसेरे सारे टब्बरे बपतिस्मो नीयो। 34 फिरी तैनी तैना अपने घरे ने, ते तैन खाने जो रोट्टी दित्ती, ते सारे टब्बरे परमेशेरे पुड़ विश्वास केरतां बड़े खुश थिये।

35 होरसां झेझ हाकिमेई सिपाही भेजतां बिस्तार भेजो, कि तैन मैनन् हथरां छेड़ि देथ। 36 दरोगा पौलुसे जो ज़ोवं, “हाकिमे हुक्म दित्तोरोए कि पौलुस ते सीलास कैदखाने मरां हथरां छड़ा, एल्हेरेलेइ तुस खुशी सेइं ज़ले गाथ।” 37 पन पौलुसे तैन सेइं ज़ोवं, “तैनेई अस ज़ैना रोम मुलखेरे राने बालेम, बगैर कसूरे सेब्भी केरे सामने मारे कुटे ते कैदखाने मां छड़े, ते हुनी चुपचारे हथरां छड़ने चाते? पन एन न भोइसखे, तै एप्पू एज्जे ते असन बेइर कढे।” 38 सिपैहीयेइं गेइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे। 39 तैनेई तैड़ी एइतां तैन करां माफ़ी मग्गी, ते फिरी तैना कैदखाने मरां बेइर आने ते मिनत की, कि नगर मरां ज़ले गाथ। 40 बस्सा पौलुस ते सीलास कैदखाने मरां बेइर निस्से ते लुदियारे घरे जे, ते तैड़ी विश्वासी ढलान सेइं मिले ते तैन शान्ति देइतां ज़ले जे।

17

ॐॐॐॐॐॐॐॐॐ ॐॐॐ ॐॐॐ ॐॐॐॐॐ ॐ ॐॐॐ ॐॐॐॐॐॐ

1 पौलुस ते सीलास तैसेरां बाद अम्फिपुलिस ते अपुल्लोनिया नगरन मांमेइं गेइतां थिस्सलुनीके नगरे मां आए, तैड़ी यहूदी केरू अक प्रार्थना घर थियूं। 2 पौलुस अपने रीतरे मुताबिक प्रार्थना घरे मां ट्लाई आरामेरे दिहाड़न तगर पवित्रशास्त्रेरी किताबी मरां तैन सेइं बेंस केरतो राव। 3 पौलुस तैन केरो मतलब खोल्ली-खोल्ली समझातो थियो, “कि यीशु मसीहेरो दुःख झैल्लनो ते मुड़दन मरां जींतू भोनू ज़रूरी थियूं, कि ज़ैस यीशुएरे बारे मां अवं प्रचार केरतम, तैए मसीह आए।” 4 तैन मरां किछ यहूदी ते गैर कौमां केरे लोक ज़ैनेई विश्वास कियोरो थियो, ते होरि भी बेड़ि भक्त कुआन्शां ज़ैनेई विश्वास कियोरो थियो पौलुसे ते सीलासे सेइं मिली जेई। 5 पन यहूदेई जलनी सेइं काई नगरन मां बुरे लोक अकोट्टे केरतां हंगामो केरनो शुरू कियो। तैनेई यासोनेरे घरे पुड़ हमलो कियो ताके पौलुसे ते सीलासे लोकां केरे सामने आनन। 6 पन ज़ैखन तैना न मैल्ले त यासोन त काई होरे विश्वासी ढला घसीटतां नगरेरे

तैस सेइं मिली जे, ते तैनेईं प्रभु पुड़ विश्वास कियो, तैन मरां अक दियुनुसियुस जै अरियुपगुसेरो प्रधान थियो, ते अक कुआन्श थी, तैसारू नवं दमरिस थियूं, ते तैन केरे अलावा हारे भी बड़े मैन्हू थिये।

18

????????? ???? ???? ???? ?

1 तैसेरां बाद पौलुस एथेंस नगरे मरां निस्तां कुरिन्थुस नगरे मां अव। 2 तैड़ी तैस अक यहूदी मैल्लो, तैसेरू नवं अक्विला थियूं, ते तै पुन्तुस इलाकेरो रानेबालो थियो, ते तैसेरी कुआन्शरू नवं प्रिस्किल्ला थियूं, ते दुइये साथी इतालिया इलाकेरां ओरां थियां, किजोकि क्लौदियुस हाकिमे हुकम दित्तोरो थियो, कि सारे यहूदी रोमे मरां चले गान ते पौलुस तैन कां जेव। 3 किजोकि पौलुसेरो ते अक्विलारो तेम्बु बनानेरो बुपार थियो, तांए पौलुस तैस सेइं साथी राव, तैना कम केरने लगे। 4 ते पौलुस हर आरामेरे दिहाडे तैन केरे प्रार्थना घरे मां गातो थियो, ते यहूदी लोकन ते यूनानी लोकन समझाने लगे कि, यीशु पुड़ विश्वास केरा।

5 जैखन सीलास ते तीमुथियुस मकिदुनिया इलाके मां आए, त पौलुस वचन शुनाने मां मघन थियो, ते लगातार यहूदन सेइं एन ज़ोतो थियो कि यीशु ही मसीह आए। 6 पन जैखन यहूदी खलाफत त कने तुहीन केरने लगे, त पौलुसे अपना लिगड़ां टुड़कां* ते ज़ोने लगे, “तुश्शो खून तुश्शे दोग्गे पुड़ भोए! अवं बेइलजाम आई, अज्जेरे बाद अवं गैर कौमन कां गेइलो।” 7 तैखन प्रार्थना घरे मरां निस्तां तीतुस यूस्तुस नंब्बेरे एक्की परमेशेरे भक्त मैनेरे घरे जेव, जै गैर कौमी मरां थियो, जेसेरू घर प्रार्थना घरे सेइं साथी थियूं। 8 एस प्रार्थना घरेरो प्रधान किरस्पुसे ते तैसेरे सारे टब्बेरे प्रभु पुड़ विश्वास कियो, ते बड़े कुरिन्थेसे लोकेईं शुन्तां विश्वास कियो ते बपतिस्मो नीयो। 9 एक्की राती प्रभुए पौलुसे सेइं दर्शने मां गल की, ते ज़ोवं, “डर नन्ना ते तू ज़ो ते चुप न रा, 10 किजोकि अवं तीं सेइं साथी आई, ते कोई तीं पुड़ हमलो केरतां नुकसान न पुजेईं सकेलो, किजोकि इस नगर मां बड़े लोकन जैना मीं पुड़ भरोसो रखेले।” 11 पौलुस तैड़ी डैढ साल राव, ते तैन परमेशेरी खुशखबरी शिखालतो राव।

12 जैखन गल्लियो, अखाया इलाकेरो हाकिम थियो, त यहूदेईं मिलतां पौलुसे पुड़ हमलो कमाव, ते पौलुस टलेइतां आदालतरे तखते कां नीयो, ते ज़ोने लगे। 13 “एन लोकन समझाते, कि परमेशेरी आराधना एन्बरे केरा, जै मूसेरे कानूनेरे बिलकुल बरखलाफे।” 14 पौलुस जैखन किछ ज़ोने बालो थियो, त गल्लियोए यहूदन सेइं ज़ोवं, “हे यहूदी लोकव, अगर केन्वी जुमेंरी या कोई बड़ी बुरी गल भोथी त अवं तुश्शी शुनेथो। 15 पन तुश्शो इलजाम त सिर्फ खाली गल्लां केरो ते नब्वां केरो ते तुश्शे कानूनेरे बारे मां आए, ते अवं न ज़ैनी, किजोकि अवं एन गल्लां केरो हाकिम बन्नो न चैई।” 16 ते गल्लियो हुकम दित्तो कि एन तखते करां बेइरोवं कढे। 17 तैखन तैनेईं सेब्भेईं प्रार्थना घरेरो प्रधान सोस्थिनेस इन्साफेरे तखतेरे सामने कुटो, पन गल्लियोए एन गल्लां केरि किछ भी परवाह न कमाई।

????????? ???? ???? ???? ?

18 पौलुस काई दिहाडे कुरिन्थुस नगरे मां राव, ते फिरी तै विश्वासी दलान करां चलो जेव ते किखरया मां अपनि मिनत पूरी केरनेरे लेइ अपने दोगेरी टिंड बनाई। ते बादे मां समुन्दरी ज़िहाजे मां सीरिया इलाके जो चलो जेव, ते प्रिस्किल्ला ते अक्विला भी तैस सेइं साथी थियां। 19 जैखन तैना इफिसुस नगरे मां पुजे त पौलुसे प्रिस्किल्ला ते अक्विला तैड़ी छड़ां, ते पौलुस एक्की प्रार्थना घरे मां जेव ते यहूदन सेइं बेंस केरने लगे। 20 जैखन तैन लोकेईं तैस कां मिनत की, “कि तू हेजू किछ दिहाडे असन कां बिश।” त पौलुसे तैन सेइं मन्नू, 21 पन जैखन पौलुस तैट्टां चलो त तैनी तैन सेइं वादो कियो, “अगर परमेशेरी मर्जी भोइ त अवं फिरी तुसन कां एज्जेलो।” ते फिरी पौलुस ज़िहाजे मां चेटतां इफिसुसे जो चलो जेव। 22 ते कैसरिया नगरे मां ज़िहाजे मरां ओस्सो त तैनी यरूशलेम नगरे मां गेइतां तैन केरि कलीसियारे लोकन सेइं मिलने जेव, ते फिरी तै अन्ताकिया नगरे मां अव।

????????? ???? ???? ???? ?

23 अन्ताकिया नगरे मां किछ चिर बितनेरे बाद ते तैट्टां चलो जेव, ते गलातिया ते फरूगिया इलाकां केरे सब चलन मजबूत केरतो जेव।

????????? ???? ???? ???? ?

* 18:6 18:6 लिगड़ां टुड़कां: परमेशर तैन लोकन सेइं खुश न भोव एल्हेरो ई निशाने।

24 अपुल्लोस नंवेरे अक यहूदी थियो, तैसेरू जर्म सिकन्दरिया नगरे मां भोरू थियूं, तै बड़ो ज्ञानी मैन्हु थियो, ते पवित्रशास्त्रेरे बारे मां बड़ो ज्ञानकार थियो, तै इफिसुस मां अव। 25 तैनी प्रभुएरे बत्तरी शिक्षा शिखोरी थी, ते लगातार यीशुएरे बारे मां ठीक-ठीक शुनातो ते शिखालतो थियो, पन तै सिर्फ यूहन्नारे बपतिस्मे तगर ज्ञानतो थियो। 26 तै प्रार्थना घरे मां बेधड़क चारे जोने लगो, पन पिस्कुल्ला ते अक्विला तैसेरी गल्लां शुन्तां, तैनेई तै अपने घरे नीयो, ते परमेशेरी बत्तारे बारे तैस होरू भी रोड़े चारे जोवं। 27 जैखन तैनी थापू कि पार ओस्तां अखाया इलाके जो गाए ते विश्वासी ढूलाएई तैस हिम्मत दित्ती, ते तैट्टेरे चलन जो चिट्ठी लिखी, कि एस सेइं रोड़ेचारे मिलाथ, ते तैनी तैड़ी पुजतां तैन केरि बड़ी मद्दत की, जैनेई अनुग्रहेरे वजाई सेइं विश्वास कियोरो थियो। 28 किजोकि तै बड़े जोरे शोरे सेइं यहूदन सेइं बेंस केरतां खुल्ले आम पवित्रशास्त्रे सेइं साबत केरतो थियो, कि यीशु ही मसीहे।

19

?????? ??? ???? ?????

1 जैखन अपुल्लोस कुरिन्थुस नगरे मां थियो, त पौलुस बेइए सारे इलाकन मेइं इफिसुस नगरे मां अव, तैसेरी तैड़ी होरे भी काई चलन सेइं मुलाकत भोइ। 2 तैनी तैन पुच्छू, “कुन विश्वास केरते बार तुसन पुड़ पवित्र आत्मा उतरोरी थी?” तैनेई जुवाब दित्तो, “असेईं त पवित्र आत्मारे बारे मां शुनेरू भी नई।” 3 तैखन पौलुसे जोवं, “फिरी तुसेईं कोस किसमेरो बपतिस्मो नीयो?” तैनेई जुवाब दित्तो, “यूहन्नारो।” 4 पौलुसे जोवं, “यूहन्ना त तैन लोकन बपतिस्मो दित्तो जैनेई पापन करां मनफिराथ, ते यूहन्ना इस्राएली लोकन जोवं, जै मेरे बाद एजनेबालोए, तैस पुड़ विश्वास केरा, जै मसीह आए।” 5 एन शुन्तां तैनेई प्रभु यीशु मसीहेरे नंवे सेइं बपतिस्मो नीयो। 6 ते जैखन पौलुसे तैन पुड़ हथ रखे त पवित्र आत्मा तैन पुड़ उतरी, त तैना अलग-अलग भाषा केरने लगे, ते भविष्यवाणी केरने लगे। 7 एना सब लगभग 12 मैन्हु थिये।

8 फिरी पौलुसे प्रार्थना घरे मां गेइतां टलेइ महीन्न तगर बड़े निडर भोइतां परमेशेरे राज्जरे बारे मां लोकन सेइं बेंस केरने समझाने लाव। 9 पन तैन मरां किच्छ सकत दिलेरे भोइ जे, ते तैनेई विश्वास केरनेरे बजाहे इन्कार कमाव, ते एस पंथेरे बारे मां बुरू जोने लगे, एल्हेरेलेइ पौलुस तैन करां कनारे भोइ जेव, ते चले भी कनारे किये ते तुरन्नुसेरे सुकुले मां बेंस केरतो ते तैन शिखालतो राव। 10 दूई सालन तगर एरू भोतू राव, एड़ी तगर कि आसिया इलाकेरे रानेबाले कुन यहूदी ते कुन यूनानी सेभेईं प्रभुएरू बच्चन शुनू।

11 ते परमेशर पौलुसेरे जिरिये सेइं बडां-बडां कम्मां ते चमत्कार हिरातो थियो। 12 एड़ी तगर कि पौलुस जैस रुमाले सेइं या फटके सेइं हथ लातो थियो, त तैना बिमारन पुड़ छडते थिये, त तैना बिमार बेज्जोते थिये, ते अगर तैन पुड़ भूतां केरो सैयो भोतो थियो, त तैना लोक ठीक भोते थिये। 13 पन किच्छ यहूदी मइद जैना फुक-फक केरते थी, ते एन केरने लगे कि, जैन पुड़ भूतां केरो सैयो भी भोए तैन पुड़ यीशुएरे नंवे इन जोइतां फुक फक देने लाए, “जैस यीशुएरो प्रचार पौलुस केरते, अवं तैसेरी कसम देताई।” 14 यहूदी प्रधान याजक जेसेरू नवं स्क्कवा थियूं, तैसेरां सत मट्ठां थियां, तैना एन्ने कम्मां केरतां थियां। 15 ते भूते जुवाब दित्तो ते जोवं, “अवं यीशु मसीह भी ज्ञानताई ते पौलुसे भी ज्ञानताई, पन तुस कौन आथ?” 16 तैखन तै मैन्हु जैस पुड़ भूतेरो सैयो थियो, तैन यीशुएरे नंवे सेइं फुक-फक देने बालन जो पेव, ते तैना अपने कब्जे मां केरतां एत्रे कुट्टे कि तैना ज़ख्मी भोइतां नगनगे तैट्ठां नश्शे। 17 जैखन इफिसुस नगरेरे रानेबाले यहूदन ते यूनानी लोकन एस गल्लरो पतो लगो, त तैना डेरि जे, ते प्रभु यीशु मसीहेरी बड़याई की। 18 ते जैनेई विश्वास कियोरो थियो, तैनेई एइतां अपने-अपने बुरे कम्मां केरो इकारर सेभी केरे सामने कियो। 19 ते केही लोकेई जैना जैदू केरते थिये, तैना किताबां सैरेई एन्तां सेभी केरे सामने फुकी, ते जैखन तैन किताबां केरि कीमतारो हिसाब लाव त कोई 50000 चेंदरे सिकन करां जादे थी। 20 एन्त्रेरे प्रभुएरो वचन बड़े तकड़े चारे फैलतो जेव ते भारी राव।

21 एन गल्लां केरे बाद पौलुसे फैसलो कियो, कि अवं मकिदुनिया ते अखाया इलाकां केरे विश्वासी लोकन सेइं मिलतां यरूशलेम नगरे जो गेइ, ते तै जोवं, “यरूशलेम नगर मां गेइतां रोम नगर भी मां गानू भी ज़रूरीए।” 22 एल्हेरेलेइ अपने सैथन मरां तीमुथियुस ते इरास्तुस दूई मैन्हु मकिदुनिया इलाके जो एप्पू करां पेइले भेजे, ते एप्पू भी किच्छ चिरे आसिया इलाके मां राव।

११११११ ११११ १११ ११११११

23 तैस वक्ते तैस पंथेरे बारे मां हंगामो भोव । 24 किजोकि अक चेंदरो करीगिर थियो, तैसेरू नव दिमेतिरयुस थियूं, ते अरतिमिस *देबारे मन्देरेरी मूरती बनेइतां, कारीगिरन बडू कम दुवेरु थियूं, जैस सेइं तैन केरो बडो बुपार चलोरो थियो । 25 तैनी एन कम ज्ञान्ने बाले सारे कारीगिर अकोट्टे कमाए ते ज़ोने लगो, “हे मेरे दूलाव असां इन कम केरतां बडे पेंडसे कमातम । 26 पन तुस हेरतथ ते शुन्तन कि एना दूई मैन्हु पौलुसेरे जेरे केन्चरे इफिसुस नगरे ते लगभग सारे आसिया इलाकेरे नगरन मां लोकन टपलाने लोरेन ते ज़ोतन कि ज़ै हथेरां केरि कारीगिरीए, तै ईश्वर नई । 27 डर एस गल्लरो नई, सिर्फ कि इश्शे पैशेरी बदनामी भोली, बल्के पुरानी देबी अरतिमिस, ज़ै आए तैसारू मन्दर भी घटया समझू गालू, जेसेरी पूजा सारे आसिया इलाके मां ते सारे दुनियाई मां केरतन, तैसेरी इज्जत भी खतम भोइगानिये ।”

28 ज़ैखन तैन लोकेई शुनु त तैना सरकी सेइं भेरोई जे, ते ज़ोरे-जोरे नहरे देने लगे, “इफिसी केरि देबी अरतिमिस, महान आए!” 29 हेरते-हेरते सारे नगर मां हलचल मेचि जेई, लोकेई गयुस ते अरिस्तर्खुस, मकिदुनी इलाके ज़ैना पौलुसे सेइं साथी ओरे थिये, तैना टलेइतां घसीटते तमाशो हेरनेरी ठैरी जो दौवइते ने । 30 पौलुस भी सभाई मां गानू चातो थियो पन चलेई तै रोको । 31 ते आसिया इलाकेरे हाकिमन मरां भी तैसेरे काई दोस्तेई तैस जो बिस्तार भेजतां ते मिनत केरतां ज़ोवं, कि तमाशो हेरने न गोइयां किजोकि तैडी बडो खतरोए । 32 तैडी पैन्चयती मां खलबली मचौरी थी, किजोकि किछ लोको नहरे देते थिये, ते बडे लोकन पतो न थियो कि तैना तैडी किजो अकोट्टे भोरेन । 33 तैखन तैनेई सिकन्दर, ज़ै यहूदी लोकेई खडो कियोरो थियो, भीडी मरां किछ लोकेई तै अग्रोवं कियो, ते सिकन्दर हथे सेइं इशारो केरतां लोकां केरे सामने जुवाब देनो चातो थियो । 34 पन जेरो लोकन पतो लगो कि ए यहूदी आए, त सब ज़ोरे-जोरे लगभग दूई घंटेन तगर चिन्डां मारने लगगे, “इफिसुस नगरेरे देबी अरतिमिस, महान आए ।” 35 तैखन एक्की मंत्री नगरेरे लोकन चुप करेइतां ज़ोने लगो, “कि इफिसुस नगरेरे रानेबालो कौन न ज़ाने कि इफिसुस नगर लोक अरतिमिस देबारू मन्दरे, ते एसेरे मूरतरो बडडो रखवालेन, ज़ैन अम्बेरां बिछड़ोरो थी । 36 ज़ैखन एना गल्लां केरे खलाफ केन्चे किछ न ज़ोवं त ठीक थियूं कि तुस चुप राथ ते बगैर सोच सेमझतां किछ न केरेथ । 37 तुसेई ज़ैना मैन्हु इडी आनोरेन तैनेई न मन्दरे लुटेरूए न इश्शी देबारे खलाफ तुहीन कियोरीए । 38 अगर दिमेतिरयुस ते एसेरे कारीगिरन केन्ची पुड दाओ केरनोए त आदालतरू दार खुल्लूए, ते हाकिम भी आन, ज़ैडी तुस एक्की होरि पुड दाओ केरि सकतथ । 39 पन अगर तुस होरि कोन्ची चीजरे बारे मां पुछू नू चातथ त तैसेरो फैसलो भी पंचैइती मां कियो गालो ।” 40 मीं इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफवरजी केनेरी कोशिश केरने लोरेम, ते अस एतरे लोकां केरे अकोट्टे भोनेरो कुन जुवाब देमेले । 41 एन ज़ोनेरां बाद तैनी पैन्चैयत खतम कमाई ।

20

१११११११११ १११११, १११११ ११ ११११११११ १११ ११११११

1 ज़ैखन हंगामो मुक्को त पौलुसे चले कुजाए ते तैन केरो होसलो बधव, ते तैन बिश्शा ज़ोइतां मकिदुनिया इलाके जो चलो जेव । 2 तैस सारे मुलखे मामेइं चलन होसलो देइतां यूनान इलाके मां (जैस जो अखाया इलाको भी ज़ोतन) अव । 3 तैडी तै टलाई महीने राव, ते ज़ैखन तै समुन्दरी ज़िहाजे मां सीरिया इलाकेरे पासे गानेबालो थियो, त यहूदी केरे लीडरेई तैस बत्तां मारनेरी साजिश बनाई, तैस पतो लगो त एल्हेरेलेइ तैनी एन रोडू समझू कि मकिदुनिया इलाके मामेइं जो सीरिया इलाके जो गाए । 4 बिरिया नगरेरे रानेबाले पुरूसेरू मट्टू सोपत्रूस, ते थिस्सलुनीकि मामेइं अरिस्तर्खुस ते सिकुन्दुस ते दिरबे नगरेरो गयुस, ते तीमुथियुस ते आसियारो तुखिकुस ते तरुफिमुस आसिया इलाके तगर असन सेइं साथी चले जे (लुका भी तैन सेइं साथी थियो) । 5 पन तैना अग्रोवं गेइतां तरोआस नगरे मां असन बलगते राए । 6 ते अस अखमीरी रोट्टी केरे तिहारे बाद फिलिप्पी नगरे मरां सफर केरतां पंच दिहैडी मां तरोआस नगरे मां तैन कां पुजे, ते रात दिहैडी तैडी राए ।

१११११११ १११ १११११११ ११११११११

7 हफतेरे पेइले दिहाडे असां प्रभु भोजेरे लेइ अकोट्टे भोए, ते पौलुसे होरसां तैट्टां अग्रोवं गानू थियूं, त एल्हेरेलेइ तै तैन सेइं गल्लां केरने लाव ते एध्धी राती तगर तैन शिक्षा देने लाव । 8 दोपरे ज़ैडी असां सब अकोट्टे

* 19:24 19:24 अरतिमिस: यूनानेरी देबी

बिश्शोरे थिये, त तैड़ी काई दीये बलते थिये। 9 त अक नौजवान दैरी मां बिशोरो थियो, ते तैसेरू नवं यूतुखुस थियूं, तै पौलुसेरो प्रचार ठडडी तगर शुन्तां तैस निडल आई, ते टलेइयोवं छतरां उन्ढो खिरको, ते तै मेरि जेव। 10 पौलुस बुन अव ते तै नौजवान टलेइतां तैस सेइं लिपटो ते ज़ोने लगो, “कि डरा नन्ना ए ज़ींतोए।” 11 फिरी तैनेई बा गेइतां सेब्भेई मिलतां रोट्टी खाइ, ते फिरी टलेकडोने तगर बच्चन शुनाने लगो, तैखन तै तैट्टां च़लो जेव। 12 लोकेई तै नौजवान ज़ींतो घरजो नीयो, ते तैन बड़ी खुशी भोइ।

?????? ???? ?????????????? ???

13 असां अगगर गेइतां ज़िहाजे मां सुवार भोइ जे, ते अस्सुस नगरे जो च़ले जे, ताके तैड़ी पौलुसे भी ज़िहाजे मां चादम, किजोकि पौलुसे पेइले पैदल गानेरो बिस्तार कियोरो थियो। 14 ज़ैखन तै असन अस्सुस नगरे मां मैल्लो त तै असेई ज़िहाजे मां चादो ते असां मितुलेन नगरे मां आए। 15 तैट्टां असां ज़िहाजे मां सुवार भोइ जे ते अस खियुस जज़ीरे सामने पुजे, ते अगरी दिहाडे असां सामुसे मां पुजे, ते होरसां अस मीलेतुस नगरे मां आए। 16 पौलुसे थापेरू थियूं, कि अवं इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो, किजोकि तै जल्दी मां थियो, कि अगर भोइसखे, त तै पिन्तेकुस्त तिहारेरे दिहाडे यरूशलेम नगरे मां राए।

???????? ???? ?????????????? ???????

17 ज़ैखन अस मीलेतुस नगरे मां ओस्से, त पौलुसे इफिसुस नगरेरे कलीसियारे बुजुर्गन जो बिस्तार भेजो कि तैना एज्जन। 18 ज़ैखन तैना तैस कां आए, त तैनी तैन सेइं ज़ोवं, तुस ज़ानतथ कि पेइले दिहाडेरं ज़ैखन अवं आसिया इलाके मां पुजो, अवं तेइसेरो देंतो अज़ तगर हर वक्त तुसन सेइं साथी केन्च़रां राव। 19 मतलब बडे नेरमी सेइं, ते ऐंखरू बछोड़ी-बछोड़ी, ते तैन अज़मैइश मां ज़ैना यहूदी केरि च़लैकी सेइं मीं पुड़ एई, अवं प्रभुएरी सेवा केरतो राव। 20 ते ज़ैना-ज़ैना गल्लां तुशे लेइ फैइदरी थी, तैना मीं तुसन सेइं बगैर केन्चेरे डरे तुसन सेइं जोई छेडडी, ते बल्के ज़ैन किछ भी शिखालू दिले सेइं ते घर-घर गेइतां शिखालू। 21 बल्के अवं यहूदी लोकां ते यूनानी लोकां केरे दुइयां केरे सामने गवाही देताई कि तैना परमेशेरेरे सामने पापन करां मन फिरान, ते इशे प्रभु यीशु मसीह पुड़ विश्वास केरन। 22 हेरा हुनी अवं पवित्र आत्मा गल मेन्तां यरूशलेम नगरे जो गाताई, ते मीं पतो नई कि तैड़ी मीं पुड़ केरि-केरि गुजरेली। 23 अवं सिर्फ एतूरू ज़ानताई कि पवित्र आत्मा मीं हर नगर मां एन ज़ोती राई, कि बन्धना ते मुसीबत मेरे लेइ तियारन। 24 पन मेरी जान, मेरे लेइ कोई कदर कीमत न रखे, त बस्सा अवं एन चाताई कि मेरी दौड़ पूरी भोए ते तैस सेवाई पूरी केरि, ज़ै मीं परमेशेरेरे अनुग्रहेरे खुशखबरी पुड़ गवाही देनेरे लेइ प्रभु यीशु करां मैल्ली। 25 ते हुनी अवं ज़ानताई, कि तुसेई अवं ज़ैन मां परमेशेरेरे अनुग्रहेरी खुशखबरी हर पासे शुनातो राव, त मीं फिरी न लाएले। 26 एल्हेरेलेइ अवं तुसन साफ-साफ जोई छडताई, कि ज़ैना लोक यीशु पुड़ विश्वास केरने बगैर मरेले, त अवं तैन केरे ज़िमेवार नई। 27 किजोकि अवं बगैर केन्ची डेरं तुसन शिखालतो राव, कि परमेशेरी मर्जी तुशे लेइ कुने। 28 बस्सा अपनो ते सारे विश्वासी लोकां केरो खियाल रखा, जेसेरे लेइ तुस पवित्र आत्माे तरफां चुनोरेथ, कि परमेशेरी कलीसियारी रखवाली केरा, ज़ै लोक तैनी अपने खूने सेइं घिन्नोरेन। 29 अवं ज़ानताई कि मेरे गानेरां बाद झूठे उस्ताद मारने बालां गिदां केरे जेरे तुसन मां एज्जले, ते जेन्च़रे तैना भैडडन मारतन तेन्च़रे तैना झूठे उस्ताद तुसन नुकसान पुजाले। 30 बल्के तुसन मरां भी एरे लोक खडे भोले ज़ैना सच़ टलोड मरोड केरतां छडेले, ताके चलन अपने पासे केरन। 31 एल्हेरेलेइ बींझे राथ ते याद रखा, कि अवं टलाई साल लेरां देंतो रात दिहैड़ी हर एक्की तैन खबरदार केरतो राव। 32 हुनी अवं तुसन परमेशेरे, ते तैसेरे अनुग्रहेरे वचनेरे सुपुर्द केरताई, कि ज़ै तुसन विश्वासे मां मज़बूत केरि सकते, ते तुसन तैस जागिरारो हकदार बनेइ सकते, जेसेरो वादो तैनी कियोरोए ज़ैनी तुस पवित्र कियोरेथ। 33 मीं केन्चेरे सोन्ने चेंदरू या लिगडां केरू लालच़ नई कियेरू। 34 तुस एप्पू ज़ानतथ कि मीं अपने हथेइं सेइं अपने ते अपने सैथी केरि हर अक ज़रूरत पूरी कियोरीए। 35 मीं तुसन सब किछ केरतां हिराव, कि एन्च़रे सेइं कमजोरन समैली सकतम, कि प्रभु यीशु मसीहेरी गल्लां याद रखम, “कि देनू नेने करां जादे धने।”

36 एन गल्लां केरे बाद पौलुसे ज़ैधू केरे भारे बिश्तां तैन सेब्भन सेइं साथी प्रार्थना की। 37 तैना सब गले मिलतां लेरां देने लगो, ते पौलुसे फुम्मड़ी देने लगो। 38 खास केरतां तैना इस गल्ली सेइं दुखी थी, ज़ैना तैनी ज़ोरी थी, कि तुस मीं फिरी कधी न लाएले, ते तैनेई तै ज़िहाजे तगर पजाव।

21

२२२२२२२ २२२२२२ २२२

1 जैखन असां तैन करां चले जे त समुन्दरेरे सफर शुरू कियूं, त सिधे बत्तां कोस जज़ीरे मां आए, ते होरसां अस रूदुस मां पुज्जे, ते फिरी तैट्ठां पतरा जज़ीरे मां चले जे। 2 ते अक ज़िहाज फीनीके इलाके जो गांतू मैल्लू, त असां तैस पुड़ च्चेढ़तां सफर शुरू कियूं। 3 जैखन इश्शी नज़र साइप्रस जज़ीरे पुड़ पेई, त अस तैस बांए हथ्ये ओसैलतां सीरिया इलाके जो चले जे, सूर नगरे मां ओस्से, किजोकि इश्शे ज़िहाजे तैड़ी किच्छ बोझ उसालनो थियो। 4 तैड़ी असन चले मैल्ले ते तैन कां असां सत दिहाड़े राए। तैनेई पवित्र आत्मारें ज़ोने मुताबिक पौलुसे यरूशलेम नगरे मां गानेरे लेइ ठाको। 5 सत दिहैड़ना बाद कुआन्शां मट्ठन समेत नगरेरे बेइर तगर साथी आए, ते समुन्दरेरे बन्ने पुज़तां असेई जैधू केरे भारे बिशतां प्रार्थना की। 6 फिरी असां तैन करां अलग भोए त ज़िहाजे मां च्चेढ़तां चले जे, ते तैना भी अपने-अपने घरजो चले जे।

7 जैखन असां सूर नगरे मरां सफर पूरू केरतां पतुलिमयिस मां पुज्जे, ते विश्वासी दलान जो नमस्कार केरतां तैन सेइ साथी अक दिहाड़ी राए। 8 ते होरसां असां तैट्ठां च़लतां कैसरिया नगरे मां आए, ते फिलिप्पुस खुशखबरी प्रचार केरनेबालेरे घरे जे ते तैड़ी राए, जै सत्तन मरां अक थियो। 9 तैसेरी च़ेवरे कुवैरी कुइयां थी, ते तैना भविष्यवाणी केरती थी। 10 जैखन अस तैड़ी काई दिहाड़े राए, त तैड़ी अक नबी थियो, जेसेरू नवं अगबुस थियूं, तै यहूदिया इलाकेरां ओरो थियो। 11 तैनी असन कां एइतां पौलुसेरे मजे सेइ अपने हथ पाव बंधे ते ज़ोने लगो, “पवित्र आत्मा इन ज़ोतीए कि जैस मैनेरू इन मज्ज आए, तैस यरूशलेम नगरेरे यहूदी इसेरे ज़ेरे बंधेले, ते गैर कौमां केरे लोकां केरे हवाले केरेले।” 12 जैखन असेई एना गल्लां शुनी, त असेई ते होरि लोकेई पौलुसे कां मिनत की, कि यरूशलेम नगरे मां न गेइयां। 13 पन पौलुसे जुवाब दित्तो, “तुस एन कुन केरने लोरेथ? तुस किजो लेरां देइ-देइ मेरो दिल् ट्लोड़ने लोरेथ? अवं यरूशलेम नगरे मां प्रभु यीशु मसीहरे नंव्वे सेइ सिर्फ बेंधोनेरे लेइ नई बल्के मरनेरे लेइ भी तियार आई।” 14 जैखन तैनी न मन्नू त असां चुप राए, “कि प्रभुएरी मर्ज़ी पूरी भोए।”

15 किच्छ दिहाड़ना बाद असां सफरेरी तियारी केरने लगे, ते फिरी असां यरूशलेम नगरे जो चले जे। 16 कैसरिया नगरेरे किच्छ चले असन सेइ साथी चले, ते असेई मनासोन नंव्वेरो साइप्रसेरो अक पुरानो चेलो साथी आनो कि अस तैसेरे घरे रहम।

२२२२२२२२ २२२२२२२ २२२२ २२२२२२२२

17 ते जैखन असां यरूशलेम नगरे मां पुज्जे, त इश्शे विश्वासी दला बड़े खुशी सेइ असन सेइ मिलने आए। 18 होरसां असां पौलुसे साथी नेइतां याकूबे सेइ मिलने जे, तैड़ी सब बुज्जुर्ग अकोट्टे भोरे थिये। 19 तैखन तैनी नमस्कार केरतां, जैना-जैना कम्मां परमेशरे तैसेरी सेवारे ज़िरिये सेइ गैर कौमन मां कियोरां थी, अक-अक केरतां सब ज़ोआं। 20 तैनेई इन शुन्तां परमेशेरी तारीफ़ की, ते फिरी पौलुसे सेइ ज़ोने लगो, “हे दला तू ज़ानतस, कि यहूदन मरां हज़ारेई लोकेई विश्वास कियोरोए, ते तैना सब मूसेरे कानूने पुड़ अमल केरने मां मघनन्। 21 ते तैन तेरे बारे शिखालेरू कि तू गैर कौमन मां रानेबाले सारे यहूदन ए शिक्षा देंतो ओरोस, कि मूसा नेबेरे कानूनेरे शारने, ते अपने मट्ठां केरो खतनो न केरा, ते न यहूदी केरे रीतन पुड़ न च़ला। 22 त फिरी कुन कियूं गाए? लोकेई ज़रूर शुनेले कि इड़ी ओरोस। 23 एल्हरेलेइ ज़ैन अस तीं सेइ ज़ोतम, तैन केर। इश्शे इड़ी च़ेवरे मैन्हु आन ज़ैनेई मिनत मगोरीए। 24 तू तैन एप्पू सेइ साथी ने ते तैन सेइ मिलतां अपनो आप शुद्ध केर, ते तैन केरो खर्चो भी दे, ताके तैना अपनो दोग्गोरी टिंड बनान। तैखन सेभन पतो लगनोए कि ज़ैना गल्लां तेरे खलाफ फैलेवरिन, तैन केरि कोई बुनीयाद नई, ते तू एप्पू भी सच्चे दिले सेइ मूसेरे कानूने पुड़ अमल केरतस। 25 ते ज़ैड़ी तगर तैन गैर कौमां केरो सवाले, कि ज़ैनेई विश्वास कियोरोए, तैन केरे बारे मां असेई पेइले फैसलो केरतां लिखतां भेजू, कि तैना मूरतन कां बलिदान कियेरू मास ते खूने करां ते गलचैटी देइतां मारोरे जानवरां केरे मासे करां परहेज केरन, ते बदमाशी न केरन। 26 होरसां पौलुसे तैना मैन्हु साथी ने, ते तैन सेइ साथी अपने आपे शुद्ध केरतां मन्दरे मां जेव, ते खबर दित्ती कि तैन केरे शुद्ध भोनेरे बाद च़ढतल च़ाढ़नेरे दिहाड़े केइस पूरे भोनेन।”

२२२२२२ २२२ २२२२२२ २२२२२२

27 जैखन शुद्ध भोनेरे सत दिहाड़े पूरे भोनेबाले थिये, त आसिया इलाकेरे यहूदेई पौलुस मन्दरे मां लाव त लोक भड़काए, ते तैस ट्लेइतां चिन्डां मारने लगो। 28 “हे इस्राएली लोकव इश्शी मद्दत केरा, ईए तै मैनुए, जै हर ठैरी

लोकन इशशे कानूनेरे खलाफ ते मन्देरेरे खलाफ शिक्षा देंतो रहते, ते एनी एसेरां अलावा गैर कौमां केरे लोक इशशे मन्देरे मां एन्तां तै पवित्तर ठार अपवित्तर कराते।” 29 तैनेई एन एल्हेरेलेइ ज़ोवं कि तैनेई पौलुस इफिसुस नगरेरे रानेबाले त्रुफिमस सेइं साथी लाहोरो थियो, ते समझते थिये कि पौलुसे तै ज़रूरी मन्देरे मां नीयोरो भोणोए। 30 तैखन सारे नगर मां हलचल मेञ्जि जेई, ते मैन्हु देवइतां जम्हां भोए, ते पौलुस टलेइतां मन्देरे मरां घसीटतां बेइर आनो, ते लूशी दारां बंद कियां। 31 ज़ैखन तैना तैस मारनेरी कोशिश करने लवरे थिये, त फौजी टोलरे सरदारे कां खबर पुञ्जी, कि बड़े लोकेई यरूशलेम नगरे मां खलबली मञ्जोरीए। 32 तैखन तैना सिपेहिन ते सूबेदारन एन्तां तैन कांजो दौड़ो, ते तैनेई फौजी टोलरे सरदारे ते सिपाही लेइतां पौलुस मारनो कुटनो बंद कियो। 33 फौजी टोलरे सरदारे नेड़े गेइतां पौलुस अपने कब्जे मां कियो, ते तैस दईं शांगलेइं सेइं बंधनेरो हुक्म दित्तो, ते फिरी तैनी पुच्छू, “ए मैन्हु कौने ते एनी कुन कियेरू आए?” 34 तैस भीड़ी मां किछ लोक चिन्डां मारते थिये, ते एत्री शौर मञ्जोरी थी, कि तैस पूरो पतो न लगे ते तैनी हुक्म दित्तो, कि पौलुसे किल्लै मां पुञ्जाथ। 35 ज़ैखन पौलुस सिपाहीयेइं पवइन उबरो चलेवरो थियो, त लोकां केरे वजाईं सेइं सिपाहीयेइं पौलुस उबरो छुइतां नेव। 36 सारे लोक ज़ैना पौलुसे पत्ती पेवरे थिये, तैना चिन्डां मारते थिये, “एस मार।”

37 पौलुसे सिपाही किल्लै मां पुञ्जाने बाले थिये, त तैनी फौजी टोलरे सरदारे सेइं ज़ोवं, “कुन मीं अज़ाजते कि अवं तीं सेइं किछ ज़ोई?” ते तैनी पुच्छू, “तू यूनानी भाषा ज्ञानतस?” 38 कुन तू तै मिस्र मुलखेरो रानेबालो नई, ज़ैनी किछ चिरे पेइले सरकारारी खलाफत कियोरी थी, ते 4000 मैनन् ज़ैन कां हथियार थिये तैना जंगले मां नीयोरे थिये? 39 पौलुसे ज़ोवं, “अवं त यहूदी आई, ते तरसुस नगरेरो राने बालोई, ज़ैन किलिकिया इलाकेरू मुशूर नगर, अवं तीं कां मिनत केरताईं मीं लोकन सेइं गल करने दे।” 40 ज़ैखन तैनी अज़ाजत दित्ती, त पौलुस पवइन पुड़ खड़ो भोइतां लोकन जो हथ्ये सेइं इशारो कमाव कि चुप रान। ते ज़ैखन तैनेई चुप कमाई त पौलुसे इब्रानी भाषाईं मां ज़ोनू शुरू कमाव:

22

११११११ ११११११ १११११११११ ११११११११

1 “मेरे द्वाव ते बुज़ुर्गाव, मेरी गल शुना, ज़ै अवं अपनि सफैईं मां पैश लोरोईं करेने।”

2 ज़ैखन लोकेईं तैस करां इब्रानी भाषा ज़ोती शुनी त तैना चुप रेइजे, तैखन पौलुसे ज़ोवं:

3 “अवं त यहूदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादां-पड़दादां केरे कानूने ठीक तरीके सेइं शिखोरीए, ते अवं भी परमेशेरेरे लेइ एरो मघन थियो, ज़ेरे अज़ तुस आथ। 4 मीं मइदन ते कुआन्शन बंधतां, ते कैद केरतां, ई पंथ इड़ी तगर सताए, ते तैना माराए भी। 5 एप्पू महायाजक ते सब बुज़ुर्ग एस गल्लेरे गवाह आन, कि मीं दमिश्क नगरे मां रानेबाले यहूदी द्वालां केरे लेइ चिट्ठी एन्होरी थी, ते अवं तैड़ी एस नीती सेइं जोरो थियो, ते ज़ैना तैड़ी भोन तैन सज़ा देनेरे लेइ बेन्धतां यरूशलेम नगरे जो नेही।”

११ १११११११११११ १११११ ११११

(१११११११११ 9:1-19; 26:12-18)

6 “अवं ज़ैखन सफर केरते-केरते दमिश्क नगरेरे नेड़े पुञ्जो, त तै दुपाहरां केरो मौको थियो। ते अम्बेरां अक बड़ी लौ आई ते मेरे च़ेवरे पासन बलने लगी। 7 ते अवं तल्ले बिच्छूड़ी जेव, ते मीं अक आवाज़ शुनी, ज़ै मींजो ज़ोने लोरी थी, हे शाऊल, हे शाऊल तू मीं किजो स्तातस? 8 त मीं पुच्छू, हे प्रभु तू कौन आस? त तैनी मींजो जुवाब दित्तो, अवं यीशु नासरी आई, ज़ैस तू सतातस। 9 मेरे सैथेईं लौ त लाई पन तैन कोई गल न समझी, कि तै आवाज़ मीं सेइं कुन लोरीए ज़ोने? 10 त मीं पुच्छू, हे प्रभु अवं कुन कम्मेईं, प्रभुए ज़ोवं, उठ दमिश्क नगरे मां गा तैड़ी तीं ज़ैन तेरे केरनेरे लेइ रखेरुए तैड़ी तीं सेइं ज़ोवं गालू। 11 मेरे सैथेईं अवं हथ्येरां टलेइतां दमिश्क नगर मां पुञ्जाव। किजोकि तैस बड़े महिमारे वजाईं सेइं मीं किछ न लेइयोवं।”

12 “तैड़ी अक मैन्हु हनन्याह नव्वेरो कानूनेरे मुताबिक भक्त मैन्हु अव, ते तैट्टेरे यहूदन मां बड़ो इज़जतदार थियो। 13 तै मीं कां खड़ो भोइतां ज़ोने लगे, हे द्वाला, शाऊल, अपनि एछ्छी खोल्ल, ते मेरी एछ्छी तैखने खुल्ली जेई, ते अवं तैस लहने लगे। 14 तैखन तैनी ज़ोवं, इशशे बुज़ुर्गां केरे परमेशेरे तू चुनोरोस, ताके तू तैसेरी मर्जी पूरी

केरस ते मसीह लास ते तैसेरी गल्लां शुनस । 15 किजोकि तू सैरी लोकन मां तैसेरो गवाह भोलो, ते तैन ज़ोलो कि तीं कुन लाहेरूए ते कुन शुनेरूए । 16 हुनी च़िर किजो लातस? उठ, ते बपतिस्मो ने ते तेरे पाप माफ़ भोन ।”

२२२२ २२२२ २२२२ २२२२२२२

17 “ते ज़ैखन अवं यरूशलेम नगरे मां वापस अव, ते अवं मन्दरे मां प्रार्थना केरने लोरो थियो, त मीं दर्शन लावं । 18 ते तै लाव ते एन ज़ोतू शुनू कि लूश केर, ते यरूशलेम नगरे मरां लूशी निस, किजोकि एना लोक मेरे बारे मां तेरी गवाही कबूल न केरेले । 19 मीं ज़ोवं, हे प्रभु एना लोक ज़ानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन कैद केरतो ते कुटतो थियो । 20 ते ज़ैखन तेरे गवाह स्तिफनुस मारने लोरे थिये, त अवं भी तैड़ी थियो, ते तैसेरे मारने मां खुशी थियो । ते अवं मारने बालां केरां लिगडां पहरतो थियो । 21 ते प्रभुए मीं सेइं ज़ोवं, ‘गा अवं तीं गैर कौमन कां दूर-दूर भेजेलो ।’ ”

22 सारे लोक तैसेरी गल्लां शुन्ने लोरे थिये, पन ज़ैखन तै इड़ी तगर पुज़ो त सारे लोक ज़ोरे-ज़ोरे चिन्डां मारने लगे, “ए ज़ीतो रखनेरे काबल नई!” एस मार । 23 ज़ैखन लोकां केरि शौर ते चिन्डां च़ेलती रेइ, त तैना चोगे शैरतां धूड आसमाने उडारने लगे । 24 त फौजी पलटनरे सरदारे पौलुस किल्लै मां नेनेरो हुकम दित्तो, “एस कोडेइं सेइं बाथ ते एसेरू बियांन घिन्ना ताके पतो लगे, कि लोक किजो चिन्डां मारने लोरेन ।” 25 ज़ैखन तैना कोडेइं सेइं बानेरे लेइ पौलुस रेसी सेइं बंधो, त तैनी एक्की सूबेदारे सेइं ज़ोवं ज़ै तैड़ी नेडे थियो । “कुन अक रोमी नगरेरे मैन्हु बगैर कसूरे झुसनो जेइजे?” 26 ज़ैखन तैनी सूबेदारे एन शुनू त तै फौजी पलटनरे सरदारे कां जेव, “तू कुन ज़ोतस? ए त अक रोमी मैनूए ।” 27 फौजी पलटनरे सरदारे पौलुसे कां एइतां पुच़्छू, “कुन तू रोमीस?” तैनी ज़ोवं, “हाँ ।” 28 इन शुन्तां फौजी पलटनरे सरदारे ज़ोवं, “कि मीं रोमी भोनेरी पदवी बडे पेंडसे देइतां हासिल कियोरीए ।” ते पौलुसे ज़ोवं, “पन अवं त ज़र्मनेरो रोमी ।” 29 ज़ैना लोक पौलुसेरू बियांन घिन्ने बाले थिये, तैना नेशशी जे, फौजी पलटनरे सरदारे भी इन बुझतां कि ई रोमीए, ते तैनी तै बंधो, ते डेरि जेव ।

२२२२२२२२ २२२२२२ २२२२२२

30 होरसां तै ठीक-ठीक ज़ान्नेरी इच्छा सेइं कि यहूदी तैस पुड़ किजो दोष लातन, एल्हेरेलेइ तैनी तै खोल्लो, ते प्रधान याजक ते सारी महासभा अकोट्टी केरनेरो हुकम दित्तो, ते पौलुस बुन गेइतां तैन केरे सामने खडो कियो ।

23

1 पौलुसे महासभारे लोकां केरे पासे रोडेच़ारे तेकतां ज़ोवं, “हे दूलाव अवं बेडि नेक नीती सेइं परमेशेरे हुकमां केरे मुताबिक ज़िन्दगी गुज़ारतो ओरोई ।” 2 महायाजक हनन्याह पौलुसेरी एना गल्लां शुन्तां पौलुसे कां खडे भोरे लोकन हुकम दित्तो, कि एसेरे तुत्तरे पुड़ थप्पड बाथ । 3 पौलुसे तैस सेइं ज़ोवं, “हे पाखंडी, परमेशर तीं बाए । तू इड़ी बिशारोस कि मूसेरे कानूनेरे मुताबिक मेरो इन्साफ केरस, ते कुन तू मूसेरे कानूनेरे खलाफ बानेरो हुकम देतस?” 4 ज़ैना तैड़ी खडखडे थिये, त तैना ज़ोने लगे, “कुन तू परमेशेरे महायाजकेरी तुहीन केरतस?” 5 पौलुसे तैन सेइं ज़ोवं, “दूलाव मीं पतो न थियो, कि ए महायाजक, किजोकि लिखोरूए, तू अपने लोकां केरे प्रधाने जो बुरू न ज़ो ।”

6 पौलुस ज़ानतो थियो, कि तैन मां किछ सद्की भी आन, ते किछ फरीसी लोक भी आन ते तै महासभाई मां ज़ोरे सेइं ज़ोने लगे, “हे दूलाव अवं त फरीसी लोकां केरे खानदेनी मरां आई, ते मीं पुड़ एनेई एल्हेरेलेइ मुकदमो च़लेवरोए, कि अवं उमीद रखताई कि मुड़दे फिरी ज़ीते भोले ।” 7 पौलुसेरू एन ज़ोते फरीसी ते सद्की लोकन एप्पू मांमेइं लडाई शुरू भोइजेइ, ते सेब्बन एप्पू मांमेइं खल बनो । 8 किजोकि सद्की ज़ोतन कि मुड़दे ज़ीते नई भोने, ते न स्वर्गदूतन ते न कोई आत्मा आए, पन फरीसी लोक एन दुइये गल्लन पुड़ विश्वास केरतन । 9 तैखन तैना बेस केरने लगगे, शास्त्री लोकन मरां ज़ैना फरीसी लोकन मां थिये, तैना खडे भोइतां लडाई केरतां ज़ोने लगे, “असां इस मैन्हु मां कोई कसूर न लहम, अगर केन्वी आत्मा या स्वर्गदूते एस सेइं कोई गल कियोरीए त फिरी कुन भोवं?” 10 गल एतूरी बेद्धी जेई, कि फौजी पलटनरे सरदारे बुझू, कि एरू न भोए कि पौलुसेरे टोटे-टोटे बनान, त तैनी हुकम दित्तो कि बुन गाथ ते पौलुसे ज़बरदस्ती तैट्ठां कढा ते किल्लै मांजो आनां । 11 तैस्से राती प्रभु यीशुए पौलुसे कां एइतां ज़ोवं, “हे पौलुस हिम्मत रख ज़ेन्चरे तीं यरूशलेम नगरे मां मेरी गवाही दित्तोरीए, तेन्चरे तीं रोमे मां भी गवाही देनी भोली ।”

११११११११ १११११ १११ ११११११

12 होरसां झेझां किछ् यहूदी मैनेई मिलतां फैसलो कियो, ते कसम कमाई कि जांतगर असां पौलुसे कल्ल न केरम, तांतगर किछ् न खाम ते न पीम। 13 एस साज्जिशी मां 40 मैनन् करां जादे थिये। 14 तैना प्रधान याजकन ते बुजुर्गन कां जे, ते ज़ोने लगे, “असन पुड़ लानत भोए, अगर असां पौलुसे मारनेरे बगैर किछ् खाम या पीम, असेई त तैस खतम केरनेरी कसम कमेवरीए। 15 एल्हेरेलेइ तुस सब महासभा मां मिलतां फौजी पलटनारे सरदारे कां दरखुवास देथ, कि तै पौलुसे लोकां केरे सामने आने, ताके एस मुकदमेरी सारी हकिकत फिरी पतो चले, एस करां पेइले पौलुस इड़ी पैश कियो गाए, असां तियार आम, कि तैस मारम।”

16 पन ज़ैखन पौलुसेरे बेइनारे मट्टे एस साजशरो पतो लगे, त तैनी किल्लै मां गोइतां पौलुसे पतो दित्तो, कि तैना लोक तैस मारनो चातन। 17 तैखन पौलुसे सूबेदारन मरां अक कुजाव, ते तैस सेइं ज़ोवं, “कि इस जवाने फौजी पलटनारे सरदारे कां नेथ, किजोकि ए किछ् ज़ोनेरे लेइ ओरोए।” 18 बस्सा, तैनी तै फौजी पलटनारे सरदारे कां साथी नीयो, ते ज़ोने लगे, “अवं पौलुसे ज़ै कैदी आए, तैनी अवं कुजाव, ते तैनी मीं कां दरखुवास कियोरीए, कि इस जवाने अवं तीं कां एन्ही, किजोकि ए किछ् तीं सेइं ज़ोनु चाते।” 19 फौजी पलटनारे सरदारे तैस जवानेरो हथ टलेइतां तै कनारे ज़ेरे नीयो ते तैस पुच्छने लगे, “तू मीं सेइं कुन ज़ोनु चातस?” 20 तैनी जवाने ज़ोवं, “यहूदी लीडरेई अकोट्टे भोइतां तीं कां दरखुवास देनेरो फैसलो कियोरोए। कि तू पौलुसेरी पुच्छ गन केरनेरे बहाने तैस महासभा मां आनस। 21 तू तैन केरि गल न मेन्ना, किजोकि कोई 40 मैनन् करां जादे यहूदी तैस पुड़ हमलो केरनेरी कोशिशि मां आन, तैनेई कसम कमेवरी कि जांतगर असां पौलुसे न मारम तांतगर असां किछ् खाम या पीम, त असन लानत भोए, हुनी तैना तियारन, सिर्फ तेरे वादेरो इंतज़ारे।” 22 फौजी पलटनारे सरदारे तै जवान वापस भेजो, ते तैस ज़ोवं कि गा, “एना गल्लां केरो ज़ैना तीं मीं सेइं ज़ोई, होरि केन्ची पतो न लोड़ी लगगोरो।”

१११११ ११११११११ १११ ११११११

23 तैखन तैनी दूई सूबेदार कुजाए, ते तैन सेइं ज़ोवं, “तुस 200 सिपाही ते 70 सुवार ते 200 भाले च़लानेबाले तियार रख्वा, तैनेई राती 9 बजेई कैसरिया नगरे मां गानूए। 24 ते पौलुसेरे लेइ घोड़े तियार रखा, ताके तै गवर्नर फेलिक्स कां हफाजती सेइं पुजाव गाए।” 25 ते फौजरे प्रधाने अक चिट्ठी एस तरिकेरी लिखी।

26 “श्रीमान फेलिक्स गवर्नर क्लौदियुस लूसियासे जो नमस्कार। 27 ए तै मैनुए, ज़ै यहूदेई टलातोरो थियो, ते एस तैना मारनेबाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेबालोए, त फौजी पलटन नेइतां छुटाव। 28 लिहाज़ा एन ज़ान्नेरी केरनेरे लेइ कि तैना तैस पुड़ कुन इलज़ाम लातन, मीं तै तैन केरि महासभा मां पेश कियो। 29 ते पतो लगे, कि तैन केरो इलज़ाम तैन केरे कानूनेरे मुताबिक एसेरे खलाफ कोई एरो इलज़ाम नई, कि ज़ेसेरे ज़िरिये सेइं असां तैस कैद केरम या मौतरी सज़ा देइ सखम। 30 मीं पतो लगगोरोए कि एसेरे खलाफ कोई साज्जिश भोइ राहोरीए, ते मीं ए जल्दी तीं कांजो भेजोरोए, ते मीं तैस पुड़ दाओ केरनेबालन भी ज़ोरूए, कि तैना भी तीं कां अपनो मुकदमो पैश केरन।”

31 सिपाही, फौजी पलटनारे सरदारेरे हुकमेरे मुताबिक पौलुसे एप्पू सेइं साथी नेइतां रातो रात अन्तिपतिरस नगरे मां पुजाव। 32 होरसां दीसां घोड़ सुवारन तैस सेइं साथी अग्री-अग्री गानेरो हुकम दित्तो, ते तै एप्पू किल्लै मांजो वापस च़लो जेव। 33 ज़ैखन घोड़ सुवार कैसरिया नगरे मां पुजे त तैनेई गवर्नरे कां चिट्ठी देइतां पौलुस तैस कां पैश कियो। 34 गवर्नरे चिट्ठी पेढ़तां पुच्छ, “ए कौस इलाकेरो रानेबालोए?” ज़ैखन तैस पतो लगे कि ए किलिकिया इलाकेरो रानेबालोए। 35 त तैनी ज़ोवं, कि अवं तेरो मुकदमो तैखन शुनेलो, “ज़ैखन तीं पुड़ दोष लाने बाले भी इड़ी हाज़र भोले।” तैखन तैनी हुकम दित्तो कि पौलुसे हेरोदेसेरे पहेरे मां रख्वा।

24

११११११ १११११११११११ १११११ ११११११

1 पंचे दिहैइना बाद हनन्याह महायाजके किछ् बुजुर्ग ते तिरतुल्लुस नव्वेरो वकील साथी कैसरिया नगरे मां पुजे, ते गवर्नरे कां पैश भोइतां पौलुसेरां खलाफ फरयाद कमाई। 2 ज़ैखन पौलुस पैश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बड़े खुशी सेइं रातम, ते तेरे ज़िरिये सेइं इस कौमरी केत्री बुरैई सुधैरी गैतिन। 3 एन अस हर ठैरी हर किसमे सेइं मन्तम। 4 पन हुनी अवं तेरो जादे वक्त नेनो न चैई,

अवं तेरी मिनत केरताई कि इशशी अक दूई गल शुन । 5 असेई लाहेरूए कि ई मैन्हु बडो फसाद केरनेबालोए, ई दुनियारे सारे यहूदन मां फितनाबाजे, ते नासरी कुपंथेरो प्रधान आए । 6 एनी त मन्दरे भी अशुद्ध केरनेरी कोशिश की, ते एल्हेरेलेइ असेई ए टलेइतां एस पुड़ अस अपने कानूनेरे मुताबिक मुकदमो चलानो चाते थिये । 7 पन फौजी पलटनरो सरदार लूसियास असन करां जबरदस्ती नेही जेव । 8 ते इस पुड़ दोष लाने बाले तीं कां हाज़र भोनेरो हुक्म दे । इन सेभी गल्लां केरे बारे मां अस एस पुड़ दोष लातम, तू एप्पू सन्न ज्ञान ।” 9 यहूदी लोकेई भी तैस सेइ साथी भोइतां ज़ोवं, कि एना गल्लां केन्त्रां भोइ सेकतिन ।

?????????? ?????????? ????????

10 ज़ैखन गवर्नरे पौलुसे बियांन देनेरे लेइ इशारो कियो, त पौलुसे जुवाब दित्तो, “अवं ज्ञानताई कि तू केही सालां केरो देतो इस कौमरो इन्साफ केरनेबालो आस, एल्हेरेलेइ अवं अपनि सफाई तीं कां पैश केरताई । 11 तू एप्पू पतो केरि सखत्स कि अवं 12 दिहाड़े पेडले यरूशलेम नगरेरे मन्दरे मां आराधना केरनेरे लेइ जोरो थियो । 12 मेरे मुदेइयेइ अवं मन्दरे मां केन्ची सेइ भी बेंस केरतो नई लाहोरो, ते प्रार्थना घरे मां ते नगर मां इरां उरां लड़ाई केरतो भी नई लाहोरो । 13 हुनी एना इलज़ाम ज़ैना मीं पुड़ लाने लोरेन, ते तेरे सामने साबत न केरि सखे । 14 हाँ अवं इकरार ज़रूर केरताई कि ज़ैस पंथे एना कुपंथ ज़ोतन, अवं तैसेरे मुताबिक अपने दादे-पड़दादां केरे परमेशेरी आराधना केरताई, ते ज़ैन किछ मूसेरे कानूने ते नेवी केरि किताबी मां लिखोरूए, तैन सेबन पुड़ मेरो विश्वास आए । 15 अवं परमेशेरे पुड़ तैए भरोसो रखताई, ज़ै तैना रखतन कि धर्मी लोकन ते पापी लोकन परमेशर मुड़दन मरां ज़ींते केरेलो । 16 ते एल्हेरेलेइ मेरो ज़मीर परमेशेरे कां भी ते इन्साने कां भी बेइलज़ाम राए । 17 केही सालां केरे बाद अवं अपने गरीब लोकन दान पुज़ाने, ते चढ़तल च़ाढ़ने ओरो थियो । 18 तैखन एनेई अवं मन्दरे मां लाव, त अवं शुद्ध भोनेरी रीत पूरी केरने लोरो थियो, बगैर लोक अकोट्टे केरतां ते बगैर कोन्ची हंगामे इन कम केरतो लाव । पन तैना आसिया इलाकेरे किछ यहूदी थी, ते तैन जाईज थियूं । 19 अगर मीं किछ गलत कियोरू भोथू त तैनेई इड़ी तेरे सामने मीं पुड़ दोष लोरो लोड़तो थियो, किजोकि तैनेई एप्पू लावरूए कि मीं मन्दरे मां कुन कियूं । 20 इना लोक ज़ैना इड़ी ओरेन, एना ज़ोन कि ज़ैखन अवं महासभा मां पैश भोरो थियो, त एनेई मीं मां कुन कसूर लाहोरो थियो? 21 सुवाए इस गल्लरे कि ज़ै मीं बड़े ज़ोरे सेइं आवाज़ देइतां ज़ोरी थी, कि अवं ई विश्वास केरताई परमेशेरे मुड़दन ज़ींते केरते, एल्हेरेलेइ मीं पुड़ मुकदमो चलाने लगोरंन ।”

22 फेलिक्स ज़ै इस पंथेरे बारे मां ठीक-ठीक ज्ञानतो थियो, एन ज़ोइतां मुकदमो बंद कियो, “ज़ैखन फौजी पलटनरो सरदारे लूसियास इड़ी एज्जेलो त अवं तुश्शे सामने इस मुकदमेरो फैसलो केरेलो ।” 23 तैनी सूबेदारे हुक्म दित्तो, कि पौलुसे परहे मां रख्वा, ते तैसेरे दोस्तन मरां केन्ची भी तैसेरी सेवा केरनेरे लेइ न रोकथ ।

?????????? ?? ?????????????????????? ??????? ??????????

24 केही दिहैइना बाद गवर्नर फेलिक्स अपनि कुआन्श दरुसिल्ला ज़ै यहूदी थी, तै तैस सेइं साथी कैसरिया मां अव, तैनी पौलुसे जो समाद भेजो ते यीशु मसीह पुड़ विश्वास केरनेरे बारे मां गल्लां शुनाए । 25 ज़ैखन पौलुस एन ज़ोवं, कि परमेशेरी नज़री मां कुन रोड़ूए ते अपने इच्छा कैबू केरनेरे बारे मां ते एजनेबाले परमेशेरेरे इन्साफेरे बारे मां भी ज़ोवं, त फेलिक्स डेरि जेव, ते ज़ोने लगो, “हुनी तू गा, अगर फुर्सत मैलेली त अवं तीं फिरी तीं कुजेइलो ।” 26 तैस पौलुसे करां किछ मैलनेरी उमीद थी, एल्हेरेलेइ तै तैस बार-बार कुजातो थियो, ते तैस सेइं गल्लां केरतो थियो । 27 पूरे दूई सालना बाद पुरकियुस फेस्तुस, फेलिक्सरे ठैरी गवर्नर बनो, ते फेलिक्से यहूदी खुश केरनेरे लेइ पौलुस कैदखाने मां रख्वा ।

25

?????????????? ?????

1 फेस्तुस तैस इलाके मां पुज़तां टलेइ दिहैइना बाद कैसरिया नगरेरां यरूशलेम नगरे मांजो जेव । 2 ज़ैड़ी प्रधान याजकेई ते यहूदी लीडर तैस कां एइतां पौलुसेरे खलाफ दोष लाने लगे । 3 तैना तैस कां मिनत केरने लगे, कि लूशी पौलुसे यरूशलेम नगरे मां हाज़र भोनेरो हुक्म दे, द्रासले मां तैनेई तैस बत्तां मारनेरी साज़िश कियोरी थी । 4 फेस्तुसे जुवाब दित्तो, “पौलुस कैसरिया नगरे मां कैदे, ते अवं भी तैड़ी लूशी गाने बालोई ।” 5 फिरी ज़ोवं कि

तुसन मरां किछ् खास अधिकार रखनेबाले मीं सेइं साथी चलन, “अगर सच्चे तैनी कोई गलत कम कियेरू भोए त तैस पुड़ दोष लान।”

6 ते फेस्तुस अठ दश दिहाड़े यरूशलेम नगरे मां राव, ते फिरी कैसरिया नगरे जो चलो जेव, तैड़ी तै दुइयोवं दिहाड़े आदालतरी तखते पुड़ बिशो, ते हुक्म दित्तो कि पौलुसे हाजर केरा। 7 जैखन पौलुस हाजर भोव, त यरूशलेम नगरेरे यहूदी लीडरेई तैस चुफुरतां घेरो देइतां बड़े झूठे इलजाम लाने शुरू किये। पन कोई पक्कू सबूत न मैल्लू। 8 पौलुसे अपनि सफाई देंते बार यहूदी केरे झूठे इलजामा केरे लेइ इन्कार कियो, ते ज़ोवं, “मीं त यहूदी केरे कानूनेरे खलाफ कोई कसूर नई कियोरो, ते न मन्देरेरे खलाफ ते न महाराज्जेरे खलाफ कोई कसूर कियोरोए।” 9 पन फेस्तुस एप्पू यहूदी लीडरन खुश केरनेरे लेइ पौलुसे पुच्छू, “तीं यरूशलेम नगरे जो गानू मन्जुरे, ताके अवं एस मुकदमेरो फैसलो तैड़ी केरि?” 10 पौलुसे ज़ोवं, “अवं इड़ी महाराज्जेरे इन्साफेरे तखतेरे सामने खड़ो आई, ते मेरे मुकदमेरो फैसलो इस्से ठेरी भोरो लोड़ते, जैड़ी रोमी मैनेरो इन्साफ भोरो लोड़े, तू एप्पू भी रोड़ेचारे ज्ञानतस कि मीं यहूदी केरो कोई कसूर नई कियोरो। 11 अगर अवं कुसुरवार आई त मौतरी सज़ारे काबल आई त मेरो मरनेरो इन्कार नई, पन अगर जैना झूठे इलजाम यहूदी मीं पुड़ लाने लगोरेंन ते अगर तैना झूठेन त केन्ची हक नई कि मीं तैन केरे हवाले केरे। ते अवं इड़ी महाराज्जे कां बिनती केरताई, कि मेरो इन्साफ इड़ी कियो गए।” 12 तैखन फेस्तुस सल्लाकारन करां मुशोरो केरतां जुवाब दित्तो, “तीं महाराज्जे कां बिनती कियोरीए त तू महाराज्जे कां गालो।”

???? ???? ?????????? ?????? ?????

13 किछ् दिहैङना बाद अग्रिप्पा राज़ो ते तैसेरी निकड़ी बेइन बिरनीके कैसरिया नगरे मां एइतां फेस्तुसे सेइं मुलाकात की। 14 तैन केरे बड़े दिहाड़े तैड़ी रानेरे बाद फेस्तुसे पौलुसेरे बारे मां राज्जे ज़ोवं, “अक मैन्हु आए, जै फेलिक्स कैद कियोरोए। 15 जैखन अवं यरूशलेम नगरे मां थियो, त प्रधान याजक ते यहूदी बुज़ुर्ग तैस पुड़ दोष लगे लाने, कि एस सज़ा दित्ती गए। 16 पन मीं तैन ज़ोरू थियूं, कि रोमी केरे दस्तुरेरे मुताबिक कोई मैन्हु सज़ा देनेरे लेइ हवाले न कियो गए, ज़ांतगर तैस अपने मुदेइ केरे सामने तैन इलजामा केरे बारे मां अपनि सफाई पैश केरनेरो मौको न दित्तो गए। 17 एल्हेरेलेइ जैखन यहूदी लीडर इड़ी आए, त मीं ठढ न लाई, पन होरसां इन्साफेरे तखते पुड़ बिशतां हुक्म दित्तो, कि पौलुस आदालती मां आनो गए। 18 जैखन तैसेरे मुदेइ अपनो दाओ पैश केरनेरे लेइ खड़े भोए त, तैनेई कोई एरो इलजाम तैस पुड़ न लाव, जेसेरी बारे मां अवं समझतो थियो। 19 पन अपने फिरकेरे बल्के तैन केरि लड़ाई तैन केरे अपने धमेरे केन्ची यीशु नव्वेरे मैनेरे बारे मां थी। तै मेरि जेवरोए, पन पौलुस तैस जो जीतो ज़ोते। 20 अवं बेड़ि उलझनी मां राहोरोइ कि केन्चरे एन गल्लां केरो पतो केरि, एल्हेरेलेइ मीं पौलुसे पुच्छू, कि तीं यरूशलेम नगरे मां गानू मन्जुरे, ताके एन गल्लां केरो फैसलो तैड़ी भोए? 21 पन पौलुसे बिनती कमाई कि इस मुकदमेरो फैसलो महाराज्जे कां लोड़ते भोरो, एल्हेरेलेइ मीं हुक्म दित्तो कि तै महाराज्जे कां गाने तगर इड़ी पाबंद राए।” 22 अग्रिप्पा राज्जे फेस्तुसे सेइं ज़ोवं, “अवं भी एस मैनेरी गल्लां शुननी चाताई।” तैनी जुवाब दित्तो, “तू तैसेरी गल्लां कालां शुनी सखत्स।”

23 होरसां अग्रिप्पा राज़ो ते कने बिरनीके बेड़ि शानी सेइं आए, ते फौजी पलटनरे सरदारेइं ते नगरेरे खास लोक सभा मां दाखल भोए, फेस्तुसे हुक्म दित्तो कि पौलुसे हाजर केरा। 24 फिरी फेस्तुस ज़ोवं, “हे अग्रिप्पा राज़ा ते बाकी लोकव तुस इस मैन्हु हेरतथ एसेरे खलाफ सैरी यहूदी कौमां मीं कां यरूशलेम नगरे मां भी ते इड़ी भी चिन्डां मैरतां दरखुवास कियोरी थी, कि ए मैन्हु जीतो रखनो ठीक नई। 25 पन मीं पतो लगो कि एनी कोई एरू गलत कम नई कियेरू, कि ए कल्ल कियो गए, एल्हेरेलेइ एनी इड़ी बिनती कियोरीए, त अवं ठीक समझतां कि एस रोम नगरे मां भेज्ती। 26 पन मीं तैसेरे बारे मां कोई ठीक गल न मैल्ली, कि महाराज्जे जो लिखी, एल्हेरेलेइ मीं तै तुशसे सामने ते खास केरतां अग्रिप्पा राज़ा, तेरे सामने पैश कियोरोए, ताके पुच्छू गन केरनेरे बाद अगर कोई खास गल भोए त अवं लिखी। 27 किजोकि केन्ची कैदी भेजते बार तैसेरे इलजाम अगर अवं केन्ची न शुनेई त मेरी लेइ ठीक नई।”

26

????????????? ?????????? ?????????? ?????????????? ??????????

1 अग्रिप्पा राज्जे पौलुसे जो ज़ोवं, “तीं अपने बारे मां ज़ोनेरी अज़ाजते।” तैखन पौलुस अपनो हथ्ये सेइं इशारो केरतां अपनि सफाई पैश केरने लगो।

2 “हे अग्रिप्पा राजा, अवं अपनो आप खुश किस्मत समझताई, कि तेरे सामने खडो भोइतां यहूदी लोकां केरे प्रधानां केरे इलजामा केरे खलाफ अपनि सफ़ाई पैश केरने लगगोरोइं। 3 खास केरतां तू सारे यहूदी केरि रीति रुवाजेरे बारे मां जानतस, ते एल्हेरेलेइ अवं तीं कां मिनत केरताई, कि तू सबरी सेइं मेरी गल शुन। 4 यहूदी मीं रोडेचारे जानतन कि पेइले अवं अपने लोकन मां ते यरूशलेम नगरे मां ते मेरी जवेंनरो चालचलन केरहो थियो। 5 तैना पेइले देंते मीं जानतन ते अगर चान त मेरे हके मां गवाही देइ सकतन, कि अवं अपने पंथेरे मुताबिक फरीसी भोइतां अपने धर्मेरे सच्चे पंथे सेइं जिन्दगी गुज़रतो ओरोई। 6 परमेशेरे इश्शे दादे-पड़दादन सेइं अक वादो कियोरो थियो, मीं उमीदे कि तै पूरो भोलो, तैस उमीदारी वजाई सेइं मीं पुड़ मुकदमो चलेवरोए। 7 एस वादेरे पूरे भोनेरी उमीद इश्शे 12 केरे 12 गोत्रने, एल्हेरेलेइ तैना दिले सेइं रात दिहाड़ी परमेशेरेरी सेवा केरते रातन। हे अग्रिप्पा राजा मेरी इस उमीदेरे लेइ यहूदी मीं पुड़ दोष लातन। 8 ज़ां कि परमेशेर मुड़दन फिरी ज़ींते केरते, तुस इस गल्ली पुड़ विश्वास कि न केरथ?

9 “पेइले अवं भी समझतो थियो, कि यीशु नैसरेरे नव्वेरी हर तरीके मुखालफत केरनि मेरो फरजे। 10 एल्हेरेलेइ अवं यरूशलेम नगरे मां एन्ने केरतो राव, मीं प्रधान याजकन करां अजाजत एन्तां बड़े परमेशेरेरे सेवक कैद केरतां छुडे, ते ज़ैखन तैना मारे गाते थिये, त अवं भी तैड़ी खलाफत केरतो थियो। 11 अवं प्रार्थना घरन मां गातो थियो, ते तैन केरि तुहीन केरतो थियो। ते लोकन यीशुएरे खलाफ तुहीन केरनेरे लेइ मजबूर केरतो थियो। ते मसीही लोकां केरि मुखालफत केरने सेइं मीं एतरी खुशी भोती थी, कि अवं दूर-दूर नगरन मां गेइतां तैन सतातो थियो।”

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ ⓂⓂⓂⓂ ⓂⓂⓂ
(ⓂⓂⓂⓂⓂⓂⓂ. 9:1-19; 22:6-16)

12 “एक्की बार प्रधान याजकन करां अधिकार एन्तां एस्से कम्मेरे लेइ दमिश्क नगरेरे सफर केरने लगगोरो थियो। 13 त हे राजा अवं हेजू बत्तां थियो, त मीं दुपहरां केरे मौके अम्बेरां अक लौ एंडती लाई, जै दिहाड़ेरी लौई करां भी जादे थी, ते तै इश्शे च़ेवरे पासन चमकने लगी। 14 असां सब ज़मीनी पुड़ बिछड़ी जे, ते मीं अक आवाज़ शुनी, जै मीं सेइं इब्रानी भाषाई मां एन ज़ोने लगोरी थी। कि हे शाऊल हे शाऊल तू मीं किजो स्तातस? मीं सेइं लड़ाई केरनि तेरे लेइ बेकारे।

15 “त मीं जुवाब दित्तो, हे प्रभु तू कौन आस, त प्रभुए मीं जुवाब दित्तो अवं यीशु आई जैस तू सतातस? 16 पन उठ ते अपने पवन पुड़ खडो भो, किजोकि मीं तीं एल्हेरेलेइ दर्शन दित्तोरूए, कि तीं अवं अपनो सेवक बनेइं, ते ज़ैन किछ् तीं लाहेरूए तू तैसरो गवाह बनस। 17 अवं तीं तेरे लोकन करां ते गैर कौमन करां बच्चांतो रेइलो अवं तीं तैन मां भेजताई। 18 ताके तू तैन केरि एछ्छी खोल्लस ते तैन आंधरे मरां लौई मां आनस ते कने शैताने करां छुटेइतां परमेशेरेरे पासे आनस, ताके तैना मीं पुड़ विश्वास केरन ते परमेशेर तैन केरे पाप माफ़ केरे, ते तैन लोकन मां शामिल भोन ज़ैना पवित्तर कियोरेन, तैना विरासत हासिल केरन।”

ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂ

19 ते एल्हेरेलेइ, “हे अग्रिप्पा राजा मीं एस स्वगेरि दर्शनेरो इन्कार नई कमेवरो। 20 ते पेइले मीं दमिश्क नगरेरे लोकन मां ते फिरी यरूशलेम नगरेरे ते सारे यहूदिया इलाकेरे रानेबालो ते गैर कौमन भी प्रचार केरतो कियो। कि पापन करां मनफिराथ, ते परमेशेरेरे पासे फिरा ते अपने सभावे सेइं साबत केरा कि तुसेईं पापन करां मन फिरावरोए। 21 एन्ने गल्लां केरे लेइ यहूदेई अवं मन्दरे मां टलातो ते मारनेरी कोशिश की।

22 “पन अवं परमेशेरेरी किर्पाई सेइं अज़ तगर ज़ींतोई, ते सेब्मी निक्के बड्डन कां अवं गवाही देताई, कि ज़ैना गल्लां अवं ज़ोताई कि ज़ैना नेबेई ज़ोरी थी, ते मूसा नेबे भी ज़ोरी थी। 23 कि मसीह बडो दुख भोगेलो, ते सेब्भन करां पेइलो मुड़दन मरां ज़ींतो भोइतां यहूदी कौमी त गैर कौमां केरे लोकन बच्चालो ज़ै लौअरो ज़ेरो आए।”

24 ज़ैखन पौलुस एन ज़ोने लगगोरो थियो, त फेस्तुस ज़ोरे सेइं ज़ोवं, “तू पागल भोइ जेव। जादे ज्ञाने सेइं तू पागल भोइजेवरोस।” 25 पौलुसे जुवाब दित्तो, “जनाब फेस्तुस साहब अवं पागल नई भोरो, अवं ज़ैन किछ् ज़ोने लगगोरोइं तैन सच्चे ते ज्ञाने सेइं आए। 26 राजो भी ज़ेसरेरे सामने अवं निडर भोइतां एन गल्लां जानते, ते मीं याकीने कि एन मरां कोई भी गल तैस करां छपोरी नई, किजोकि ए चमत्कार कोई एरो नई भोरो। 27 हे अग्रिप्पा राजा कुन तू नेबी केरो, अवं जानताई कि तू मनतस?” 28 अग्रिप्पा राजे पौलुसे सेइं ज़ोवं, “कुन तू थोड़ी ज़ेरि गल्लेई सेइं मीं तू मसीही बनानो चातस?” 29 पौलुसे जुवाब दित्तो, चाए थोड़ी ज़ेरि या जादे गल्लेई सेइं, “पन अवं त

परमेश्वरे का प्रार्थना करताई कि, न सिर्फ तू बल्के जेत्तरे भी अज मेरी गल्लां शुनी रावरेन सब मेरे जेरे मसीही भोन, पन इन शंगलां केरे बगैर।”

30 तैखन अग्रिप्पा राजो ते गवर्नर ते बिरनीके ते तैस सेइं साथी होरे भी खडे भोए ते चले जे। 31 ते बेइर निस्तां एक्की होरि सेइं ज़ोने लगे, “कि ए मैन्हु कोई एरू कम त नईं लोरो करने, कि एस मौतरी सज़ा दिती गाए, या कैदखाने मां रख्खो गाए। 32 अग्रिप्पा राजे फेस्तुस सेइं ज़ोवं, अगर एनी मैने महाराजे कां फरयाद न भोथी कियोरी त ए छुटी सकतो थियो।”

27

????? ???? ? ???? ???? ?

1 जैखन फिस्तुस हाकिमेरे ज़िरिये ए बिस्तार बनों कि असां लोक ज़िहाजे मां इतालिया जो गाम, त पौलुस त होरे कैदी यूलियुस नंवे औगुस्तुस फौजी पलटनरे सरदाररे एक्की सूबेदाररे सुपुर्द किये। 2 असां अदरमुत्तियुम नगरेरां एक्की समुन्दरी ज़िहाजे मां च़ेढ़तां आसिया इलाकेरे नेड़ेरे ठैरी गानेबाले थिये, त अरिस्तर्खुस नंवे थिस्सलुनीके नगरेरो अक मकिदुनी असन सेइं साथी थियो।

3 होरसां ज़ैखन ज़िहाज सैदा मां रुकी जेवं, त यूलियुसे पौलुसे पुड़ महरबानी केरतां तैस अपने दोस्तन सेइं मुलाकात केरनेरी अज़ाजत दिती, ताके तैसेरे ज़िरिये सेइं पतो लगगे। 4 तैट्टां फिरी असां ज़िहाजे मां च़ेढ़तां च़ले जे, ते साइप्रसेरे आडी मांमेइं निस्से, किजोकि हवा बड़ी ज़बरदस्त थी। 5 फिरी किलिकिया नगरे ते पंफूलिया नगरेरे नेड़े समुन्दरेरी बत्तां निस्तां अग्रोवं च़ले जे, त लूसिया इलाकेरे मूरा नगर मां ओस्से। 6 तैड़ी सूबेदाररे सिकन्दरिया नगरेरू अक ज़िहाज इतालिया इलाके जो च़लेरू मैल्लु, तैनी असां तैस मां चाढ़े।

7 असां बड़े दिहाइन तगर बल्हे-बल्हे अग्रोवं च़लते राए, ते कनिदुस नगरेरे सामने पुजे। पन तेज हवा च़लने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमोनेरे सामने निस्तां करेतेरी आडी मां निस्से। 8 ते बेड़ि मुशकली सेइं समुदरेरे बन्ने-बन्ने अग्रोवं च़लते शुभलंगरबारी नंवेरी एक्की ठैरी पुजे, ज़ैट्टां लसया नगर नेड़ू थियूं।

9 तैड़ी असन केही दिहाड़े बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाड़ी तिहारेरे बरतेरे दिहाड़ो बीतोरे थी, ते पौलुसे तैन एन ज़ोइतां खबरदारी दिती, 10 “जनाब मीं एरू लगगते कि इश्शू सफर बड़ू खतरनाक भोलू, कि न सिर्फ इश्शे माल सबाब ते ज़िहाजे बल्के इश्शी जानी भी खतराए।” 11 पन सूबेदाररे कपताने ते ज़िहाजेरे मालिकेरी गल पौलुसेरी गल करां जादे मन्नी।

12 किजोकि तै बंदरगह ठंढारो मौसम कटनेरे लेइ रोड़ी न थी, एल्हेरेलेइ इश्शो फैसलो ए थियो, कि असां केन्ची तरीके अग्रोवं निस्सम ते असन उमीद थी, कि फीनिक्स मां पुजतां हीवतड़ेरो मौसम तैड़ी गुजैरी गामेले। ए करेते अक बंदरगह थी, ज़ैसेरां दारां क्षिण-पश्चिम ते उत्तर-पश्चिम पासे खुलतां थियां।

????? ???? ???? ?

13 ज़ैखन दक्षिणी पासेरां हवा च़लने लगी, त तैनेईं सोचू कि तैन केरि मर्जी पूरी केरनेरे लेइ रोड़ो वक्ते, ते तैनेईं ज़िहाजेरू लैंगर तैट्टां खड़ू कियूं, ते समुन्दरेरे बन्ने अग्रोवं च़लते जे। 14 पन लूशी अक बड़ी तूफानी हवा च़ली ज़ैस जो यूरकुलीन ज़ोतन। 15 ज़ैखन तैने ज़िहाज अपने पलैट्टे मां कियूं, ते ज़िहाज ढलैक्कां खाने लगू, ते असेईं ज़िहाज हावारे बहावे पुड़ छड़ू। 16 तैखन कौदा नंवेरो अक निकड़ो टैपू अव, त असेईं भी रुड़ते-रुड़ते तै डुंगी ज़ै ज़िहाजेरे पत्तारां बंधोरी थी, त बेड़ि मुशकली सेइं कैबू मां की।

17 ते ज़िहाजेरे टोलरे मैनेईं तै उबरी च़ेढ़तां ज़िहाज टलुटने करां बचनेरे लेइ रेस्सेइं सेइं बंधतां छड़ू। किजोकि तैन डर थियो, कि एरू न भोए, कि ज़िहाज सुरतिसेरे रेती मां डुबी गाए, एल्हेरेलेइ तैनेईं भारी सामान ओसालू ते ज़िहाजे मां रुड़ते-रुड़ते च़ले जे। 18 ज़ैखन तूफानी हवाई सेइं ज़िहाज जादे ढलैक्कां खाने लगू, त होरसां असेईं ज़िहाजेरो माल समुन्दरे मांजो शारनो शुरू कियो, 19 टलेइयोवं दिहाड़े तैनेईं ज़िहाजेरू सामान भी समुन्दरे मांजो शैरी छड़ू। 20 त काई दिहाड़े न असेईं दिहाड़ो लाव ते न तारे ते तूफान भी मन्ना जादे ज़ोर केरने लगगोरो थियो, ते असन बचनेरी हुनी कोई उमीद न राई।

21 रोट्टी खाने काई दिहाड़े भोरे थिये, एल्हेरेलेइ पौलुसे तैन मां खडे भोइतां ज़ोवं, “ढलाव अगर तुसेईं मेरू ज़ोनू मन्नोरू भोथू, ते करेते मरां अग्रोवं न ओरे भोथे, त ईं नुकसान ते ईं तकलीफ किजो भोनी थी?”

22 “पन अवं तुसन कां मिनत केरताई कि, हिम्मत न हारा तुसन मरां कोई भी न मरेलो, चाए ज़िहाज़ डुबी किना गाए। 23 किजोकि ज़ैस परमेशेरी अवं आराधना केरताई, तैसेरो स्वर्गदूत हीज राती मीं कां ओरो थियो। 24 ते तै ज़ोने लगो, हे पौलुस डर नन्ना तू महाराजे कां ज़रूर पैश भोलो ते परमेश तेरी वजाई सेइ एन सेभी केरि जान बचालो, ज़ैना ज़िहाजे मां तीं सेइ साथी आन। 25 एल्हेरेलेइ हे जनाब तुस हिम्मत रखा कि मेरे परमेशेरे ज़ैन किछ मीं सेइ ज़ोरूए तैन्ने भोलू। 26 असां ज़रूर केन्ची टेपू पुड़ पुज़ी गामेले।”

????? ?????????

27 च़ेवधोवं राती ज़ैखन असां अदिरया समुन्दरे मां इरां उरां फिरते थिये, त ज़िहाजे बाले मैनेई अंदाजो लाव कि असां बन्नेरे नेडे पुज़ी जोरेम। 28 तैनेई पानी रेसी सेइ नापू त 37 मीटर निससू ते थोडे अगगर गेइतां नापू त 27 मीटर निससू। 29 एस डरे सेइ कि कोस्कोई शफ़डी सेइ न बज्म, ते तैनेई ज़िहाजेरे पैतरीं पासे च़ेवरे लैंग्रां समुन्दरे मां छ़डां ते झेझेरे लौअरे लेइ प्रार्थना केरने लगे।

30 ज़िहाज च़लानेबाले मुझाटेरां बेइरोवं निसनेरे लेइ डोंगी उन्दी ओसाली। पन तैना ज़िहाजेरे एग्री पासेरां लैंग्र पैनी मां छ़डनू चाते थिये। 31 तैखन पौलुसे सूबेदारे ते सिपेहिन सेइ ज़ोवं, “अगर इना लोक ज़िहाजे मां न भोले त तुश्शू लोकां केरू बचनू मुशकले।” 32 एल्हेरेलेइ सिपैहीयेइ डूगारी रेस्सी केटतां समुन्दरे मांजो शैरी दिती।

33 झेझ भोने करां पेइले पौलुसे सेबन कां मिनत कमाई, कि तुस किछ रोट्टी खाथ। तैनी ज़ोवं, “तुस च़ेवधे दिहैडी केरे देंते बचनेरे खियाले मां पेवरेथ, ते तुस रोट्टी सेइ हुरोरे भी नई। 34 अवं तुसन कां मिनत केरताई कि तुस रोट्टी खाथ, किजोकि तुश्शे लेइ रोडू एन्ने कि याकीन केरा कि तुश्शो बाल बिंगो न भोलो।” 35 ज़ैखन तैनी एन ज़ोवं, त तैनी रोट्टी ट्लाई ते सेभी केरे सामने परमेशेरेरू शुक्र केरतां टलोडी ते खाने लगो। 36 तैस करां लेइतां होरन भी हिम्मत आई, ते तैना भी रोट्टी खाने लगे। 37 असां सब मिलतां कोई 276 मैन्हु थिये, ज़ैना इस ज़िहाजे मां सुवार थिये। 38 ज़ैखन तैनेई रेजतां रोट्टी खाइ त तैनेई सारे गेहुं समुन्दरे मांजो शारने शुरू किये, ताके ज़िहाज पोल्लु भोए।

39 ज़ैखन दिहाडो निस्सो त तैनेई तै ठार न पिशानी, पन अक ठार लाई ते तै पासो साफ थियो, तैनेई बिस्तार कमाव कि अगर भोइसखे त असां ज़िहाज एस पुड़ च़ाढम। 40 बस्सा लैंगर खोलतां समुन्दरे मां छ़ैडी दित्तू, ते पत्रवारां केरि रेसी भी ढिल्ली छ़ैडी, एग्रीयों बादबांन भी बा च़ैदी छ़ड्डो, ते एप्पू बन्नेरे पासे जो च़ले। 41 पन ज़िहाज खुशकी पुड़ गेइतां रेती पुड़ टिकी जेवं, ते ज़िहाजेरो एग्रीयों पासो रेती मां डुबी जेवं ते पैत्रीयों पासो छ़ेल्लेई सेइ बजकने लगे।

42 सिपेही केरि सल्लाह थी कि कैदन मारम ताके तैन मरां कोई तारी देइतां नेशी न गान। 43 पन सूबेदारे पौलुसेरी जान बचानेरे लेइ एन न दित्तू केरने, ते हुक्म दित्तो कि ज़ै तारी जानते त तै पेइलो छ़ाल मारे, ते खुशकी पुड़ पुज़तां अपनि जान बचाए। 44 ते बाकी होरे लेकडारे तखतन पुड़ ते ज़िहाजेरी होरि चीजां केरि मद्दती सेइ अपनि जान बचाथ, ते बस्सा सब एस तरीके सेइ खुशकी पुड़ ठीक ठाक पुज़ी जे।

28

????????? ?????????? ???? ???? ???? ?

1 ज़ैखन असां ठीक ठाक बन्ने पुड़ पुजे, त असन पतो च़लो कि इस टैपू जो माल्टा ज़ोतन। 2 तैट्टेरे राने बालेई असन सेइ बडो रोडो बर्ताव कियो, झड़ी लगगोरी थी, ते ठंड भी बडी थी, तैनेई अग बाली ते इश्शी बडी आदर कमाई।

3 पौलुसे कैडू केरो अक लेग्गु बनावं, ते ज़ैखन तै तैना कैडू अगगी मां छ़डने लगो त अगारे सेके सेइ तैन कैडन मरां अक सप निस्सो, ते पौलुसेरे हथ्थे सेइ पलेटोव। 4 ज़ैखन तैन लोकेई सप पौलुसेरे हथ्थे सेइ पलेटोरो लव, त एप्पू मांमेइ ज़ोने लगे, “ए मैन्हु ज़रूर कोई खूनी आए, ए समुन्दरे मां गर्क भोने करां त बचोरोए, पन इन्साफे ए जीतो न राने न दित्तो।”

5 पन तैनी तैस सप्पे अगगी मांजो घिल देइतां ट्लट्टो, ते तैस किछ नुकसान न भोव। 6 तैना लोक बलगने लगगोरो थिये, कि एसेरी सारी जान एफरी गानीए ते ए मेरि गानोए, ते बडे च़िरे तगर बलगनेरे बाद पौलुसे किछ न भोवं, त तैना लोक सोचने लगे, “ए ज़रूर कोई देबतोए।”

7 तैस ठैरारे आसे-पासेरे टैपेरी प्रधान पुबलियुसेरी ज़मीन थी, तैनी असां अपने घरे ने ते ट्लाई दिहाड़े इशशी आदर खातर की। 8 पुबलियुसेरे बाजी भुखार ते पैचसी सेइं बड़ो बिमार भोरो थियो, ते पौलुसे तैस कां गेइतां तैसेरेलेइ प्रार्थना की, ते तैस पुड़ हथ रेखतां तै बज़ाव। 9 फिरी तैस टैपेरे बाकी बिमार लोक आए ते तैना ठीक भोइ जे। 10 तैन लोकेई इशशी बड़ी इज़्जत की, ते असां तैट्ठां अग्रोवं गानेरे लेइ तियार भोए, त तैनेई इशशी ज़ुरतररी सैरी चीज़ां ज़िहाज़े मां छैडी दिती।

?????? ?????? ????? ?????????? ??????

11 इशशू ज़िहाज़ बिगड़नेरे ट्लेइ महिना बाद असां सिकन्दरियारे एक्की ज़िहाज़े मां चले जे, ज़ैन ठंड मुकने तगर तैस टैपू मां रुकेरु थियूं, तैस मां यूनेनी केरि दूई अकोट्ठी देबतेरी मूरतां बनोरी थी। 12 पेइले असां सुरकूसा नगरे मां पुजे, ते ट्लाई दिहाड़े तैड़ी राए। 13 तैट्ठां असां चलते-चलते रेगियुम नगरे मां पुजे, ते होरसां दक्षिणी हवा चलने लगी ते असां होरसां पुतियुली नगरे मां पुजे। 14 तैड़ी असन किछु ढला भी मैल्ले, तैनेई असां कुजाए ते असां तैड़ी सत दिहाड़े राए, ते तैसरां बाद असां रोमे मां पुजे। 15 तैट्ठेरे मसीही ढलान पतो लगो, कि असां ओरम त तैना असन अगराने अप्पियुसेरे चौके ते ट्लेइ धर्मशालन तगर आए, पौलुसे तैना लेइतां परमेशेरेरु शुक्र कियूं ते तैस बड़ी हिम्मत भोइ।

16 ज़ैखन अस रोम नगरे मां पुजे ते पौलुसे अज़ाज़त मैल्ली, कि तै एक्की पैरहेदारी निगरेनी मां ज़ैड़ी चाए गेइ सकते।

???? ?????? ????? ??????????

17 ज़ैखन ट्लाई दिहाड़े बीते त पौलुसे यहूदी केरे प्रधान कुजाए, ते ज़ैखन तैना अकोट्ठे भोए त पौलुसे तैन सेइं ज़ोवं, “ढलाव मीं अपनि कौमरे ते अपने दादे-पड़दादां केरि रसमरे खलाफ कोई कम नईं कियेरु त फिर भी अवं पाबंद केरतां यरूशलेम नगरे मां रोमी सरकारारे हवाले कियो। 18 तैनेई पुच्छु गन केरनेरे बाद अवं हथरां छुडनो थियो। किजोकि मीं कोई एरू कम न थियूं कियेरु कि ज़ैस सेइं मीं मौतरी सज़ा देथे। 19 पन ज़ैखन यहूदेई मुखालफत की, त मीं महाराजे कां बिनती की। पन एल्हेरेलेइ नईं कि अवं अपनि कौमी पुड़ कोई इलज़ाम लानो चातो थियो। 20 एल्हेरेलेइ मीं एन रोडू समझू, कि तुसन सेइं मिलतां गल केरि, अवं इस्राएलेरी एक्की उमीदी ज़ै मसीह आए शांगलन सेइं बंधोरोइं।” 21 तैनेई तैस सेइं ज़ोवं, “असन यहूदन करां न कोई चिट्ठी मैल्ली ते न तैट्ठां एजनेबाले इशशे लोकेई तेरे बारे मां कोई खबर दिती, ते न तेरे खलाफ किछु ज़ोवं। 22 पन असां तेरे बारे मां ज़ाननू चातम, ए त असन पत्तोए, कि लोक सेब्मी ठैरन एस पंथेरे खलाफ गल्लां केरतन।”

23 तैखन यहूदी लोकेई पौलुसेरी गल्लां शुन्नेरे लेइ अक दिहाड़ी ठुवहलाई, ज़ैखन तै दिहाड़ी आई, त लोक पेइले लोकन करां भी जादे अकोट्ठे भोए। पौलुसे तैन परमेशेरेरे राज़ेरे बारे मां समझाव, ते साथी यीशुएरे बारे मां मूसेरे कानूने ते नेबी केरे किताबन मरां तैन रोडेचारे समझेइतां झेझां करां इलोझी तगर गल्लां शुनातो राव। 24 किछु तैसेरी गल्लां शुन्तां मघन भोइ जे ते मन्नू ते किछेई विश्वास भी कियो। 25 ज़ैखन तैना एप्पू मांमेइं अक न भोए, त पौलुसे तैन गाने करां पेइले अक गल ज़ोई, “पवित्तर आत्मारि ज़िरिये यशायाह नबी तुशशे दादे-पड़दादां केरे बारे मां ठीके ज़ोरू थियूं।”

26 एन लोकन कां गा, ते एन ज़ो कि,
 “तुस शुन्ते त राले, पन समझेले न,
 ते तकते त राले पन पिशानेले न।
 27 किजोकि एन लोकां केरे दिले मोट्टे भोररेन,
 ते एना टोव्ने भोररेन,
 ते एनेई अपनि एच्छू निकोल कियोरिन।
 किजोकि एरू न भोए,
 कि एना लहन ते कन्न सेइं शुन्न ते दिले सेइं समझन,
 ते एना मेरे पासे फिरन ते अवं एन शिफ़ा देईं।

28 “एल्हेरेलेइ अवं चाताई कि तुस ज़ानथ कि परमेशेरी मुक्ति गैर कौमन कां भी भेजोरोए ते तैना तैस शुनेले।”
 29 ज़ैखन पौलुसे एन ज़ोवं, त यहूदी एप्पू मांमेइं बैस केरते तैट्ठां चले जे।

30 पौलुस पूरे दूई सालन तगर करैइयेरे मुकाने मां राव, 31 ते जै भी तैस सेइं मिलने एइतो थियो, पौलुस तैस सेइं मिलतो थियो, ते बेधइक भोइतां परमेशेरे राज्जेरी खुशखबरी शुनातो थियो, ते प्रभु यीशु मसीहेरे बारे मां शिक्षा देंतो राव ।

रोमियो

????????

1 अवं पौलुस यीशु मसीहेरो दास आई, ते प्रेरित भोनेरे लेइ परमेशरे चुनोरोई, ते परमेशरेरी खुशखबरी प्रचार केरनेरे लेइ ठहरावरो आई। 2 जेसेरी तैने पेइले अपने नेबी केरे जिरिये पवित्रशास्त्रे मां, 3 अपने मट्टे इशे प्रभु यीशुएरे बारे मां वादो कियोरो थियो, जै जिसमेरे मुताबिक त दाऊदेरे खानदाने मरां पैदा भोव। 4 ते पवित्र आत्माएरे जिरिये सेइं मुडदन मरां जींतो भोनेरे वजाई सेइं तै शक्ति सेइं परमेशेरू मट्टू भोव। 5 जेसेरे जिरिये असन अनुग्रह ते प्रेरिताई मैल्ली; कि तैसेरे नंवे सेइं सब कौमां केरे लोक विश्वास केरतां तैसेरी मन्न। 6 जैन मरां तुस भी यीशु मसीहेरे भोनेरे लेइ कुजोरेथ।

7 अवं ई चिट्ठी तुशे सेभी केरे नंवे लिखताई, जैना तुस रोम नगरे मां रातथ, ते परमेशेरे टलारेथ, ते पवित्र भोनेरे लेइ चुनोरेथ। इशे बाजी परमेशर ते प्रभु यीशु मसीहेरे तरफां तुसन शान्ति ते अनुग्रह मैलतो राए।

????????????????

8 पेइलो अवं तुशे सेभी केरे लेइ यीशु मसीहेरे जिरिये परमेशेरू शुक्र केरताई, किजोकि तुशो विश्वास जै यीशु मसीह पुड़ आए, तैसेरी चर्चा हर पासे भोने लोरी। 9 परमेशर जेसेरी सेवा अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, तै मेरो गवाहे; कि अवं तुसन कोस तरीके सेइं लगातर प्रार्थनाई मां याद केरताई। 10 ते लगातार अपने प्रार्थनान मां बिनती केरतो राताई, कि केन्चरे हेजू भी तुसन कां एजनेरे लेइ मेरू सफर परमेशेरे तरफां कामयाब भोए। 11 किजोकि अवं तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान देई, जैस सेइं तुस विश्वासे मां मजबूत भोथ। 12 मतलब इन, कि अवं तुसन कां एइतां तुसन सेइं साथी तैस विश्वासेरे जिरिये, जै मीं मां ते तुसन मांए, तैसेरे जिरिये अस हिम्मत हासिल केरम। 13 ते दलाव ते बेइनव, अवं चाताई तुस जानथ, कि मीं तुसन कां बार-बार एजनु चाव। जेन्चरे मीं गैर कौमरे लोकन विश्वास केरनेरे लेइ बद्धनेरी मद्दत की, तेन्चरे तुशेरी भी मद्दत केरि, पन हुना तगर रुकोरो राव। 14 अवं संस्कारी लोकन ते असंस्कारी लोकन, पढोरे लोकन या अनपड़ लोकन सेभन खुशखबरी शुनेइलो। 15 ते अवं तुसन भी जैना रोम नगरे मां रातथ, खुशखबरी शुनानेरे लेइ हर वक्त तियार आई।

????????????????

16 किजोकि अवं यीशु मसीहेरी खुशखबरी प्रचार केरने करां न शरमेई, एल्हेरेलेइ परमेशर अपने शक्ति सेइं तैन लोकन मुक्ति देते, जैना खुशखबरी पुड़ विश्वास केरतन, पेइले यहूदन फिरी गैर यहूदन। 17 किजोकि खुशखबरेरे जिरिये परमेशर असन अपने नजरी मां धर्मी बनाते, जैन शुरू करां आखरी तगर विश्वासे सेइं भोते। जेन्चरे पवित्रशास्त्रे मां लिखोरूए, “जै मैन्हु विश्वासेरे जिरिये सेइं परमेशेरे सामने धर्मी बनाव गाते तैए जींतो रालो।”

????????????

18 परमेशेरो क्रोध तैन लोकन पुड़ स्वर्गेरां एइते, जैना बुरां ते दुष्टेरां कम्मां केरतन, ते जैना सच्चे अधर्मे सेइं दबेइतां रखतन। 19 किजोकि परमेशेरे बारे मां ज्ञान तैन मैन्हु केरे मन्न मां बांदूए, एल्हेरेलेइ कि परमेशेरे तैन पुड़ बांदू कियोरूए। 20 किजोकि तैसेरे आहरे गुण, मतलब तैसेरी सदारी शक्ति, ते परमेशेरो सुभाव दुनियाई बनानेरे वक्तेरे देंतो तैसेरे कम्मन सेइं हेरने मां एइते, इडी तगर कि तैन लोकन कां कोई बहानो नई। 21 हांलाकि तैनेई परमेशर त पिशानो, पन परमेशेरी तैस काबल बडयाई न की, ते न शुक्र कियूं, पन बेकार सोचने लाए, इडी तगर कि तैन केरो बेअक्ल मन आंधरो भोव (मतलब तैना गलत सोचने लगे)। 22 तैना अपने आपे अक्लमन्द सेमझतां बेवकूफ बने। 23 ते न मरने बाले परमेशेरी महिमा मरने बाले मैन्हु, ते चुडोलू ते जानवरां, ते पेटेरे भारे चलने बाले जीपां केरे मूरतन मां बदली।

24 एल्हेरेलेइ परमेशेरे तैना तैन केरे मनेरे खुवैइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरी अनादर केरन। 25 किजोकि तैनेई परमेशेरी सच्चाई बेदलतां झूठ बनाई, ते सृष्टारी पूजा ते आराधना केरि, न कि तैस बनाने बालेरी, जै हर वक्त धन ते रोडोए। आमीन।

26 एल्हेरेलेइ परमेशेरे तैना नीच खुवाइशन मां शारे, इडी तगर कि तैन केरि कुआन्शेई भी स्भाविक कम्मां बदलतां तैन केरे जैना स्भाविक आन तैन केरे खलाफ बदला। 27 तेन्चरे तैन केरे मडद भी कुआन्शन सेइं सुभाविक कम्मां शैरतां एप्पू मांमेइं गंदे कम्मन मां मसत भोए, मतलब कि मडदेइं, मडदन सेइं रिशतो रेखतां प्रभु करां ठीक बदलो नेव।

28 ते तैनेईं इन जेइज न समझू कि परमेशेरे कबूल केरन, एल्हेरेलेइ परमेशेरे भी तैना तैन केरे मनेरे हालती पुड़ शारे; कि बुरां कम्मां केरन। 29 ते तैना हर किसमेरे अधर्मे, दुष्टे, लालचे, बैरे सेइं भेरोई जे; ते कपट, ते खून केरनो, ते लड़ाई केरनि, ते धोखो देनो, ते जलनी सेइं भेरोए, ते चोगलखोर, 30 बदनाम केरनेबाले, परमेशेरे सेइं नफरत केरनेबाले, जैन केरि इज्जत केरीं लोडे तैन केरि इज्जत न केरनेबाले, घमण्डी, बडकां मारनेबाले, बुरी-बुरी गल्लां बनाने बाले, अम्मा बैपू केरो हुक्म न मन्नेबाले। 31 बेवकूफ, धोखो देनेबाले, सच्चे प्यारे करां खाली, दया न केरनेबाले भोइजेइ। 32 हालांकी तैना परमेशेरेरो ई हुक्म ज्ञातन, कि एरां जेरां कम्मां केरनेबाले मौतरे सजारे लाइकन, फिरी भी न सिर्फ एप्पू एरां कम्मां केरतन बल्के एरां कम्मां केरनेबालन सेइं भी खुश भोतन।

2

??????????

1 एल्हेरेलेइ हे दोष लाने बाला, तू कोई की न भोस; तीं कां कोई बहानो नईं, किजोकि जैस गल्लरो तू होरन पुड़ दोष लातस, तैस्से गल्ली पुड़ तू अपनो आप भी दोषी बनातस, एल्हेरेलेइ तू एप्पू भी तैन्ने कम केरतस। 2 ते अस ज्ञानतम कि, जैना एरां कम्मां केरतन परमेशर तैन केरो इन्साफे केरतां तैन सजा देते। 3 ते हे मैन्हु, तू जै बुरां-बुरां कम्मां केरनेबालन पुड़ दोष लातस, ते एप्पू भी तैन्ने कम केरतस; कुन तू समझतस, कि तू परमेशेरे सजाई करां बचेलो? 4 कुन तू परमेशेरेरी कृपा, ते बरदाश केरनू, ते सबरारू धन घटया समझतस, ते कुन इन न समझस, कि परमेशेरेरी कृपा तीं पापन करां मन फिरानो शिखालतीए? 5 पन तू जिद्दी आस ते अपने पापन करां मन फिरानेरो इन्कार केरतस, जैस दिहाड़े परमेशर अपनो क्रोध हिरालो, तैस मां परमेशेरेरो सच्चे इन्साफ बांदो भोलो, त परमेशर तेरो रोड़ेचारे इन्साफ केरेलो। 6 परमेशर हर एक्की तैसेरे कम्मां केरे मुताबिक बदलो देलो। 7 जैना लोक रोड़ां कम्मां केरतां परमेशेरेरी तरफां मैलने बैली महिमा, ते आदर, ते कधे न खतम भोने बाली जिन्दगरे तोपी मां रातन, परमेशेरे तैन हमेशारी जिन्दगी देलो। 8 पन जैना खुदगरजन, ते सच्चे न मन्नेबालेन, बल्के बुराई केरनि चातन, तैन पुड़ परमेशेरेरो क्रोध, ते कोप एज्जेलो। 9 ते मुसीबत ते दुःख हर एक्की मैन्हु पुड़ एज्जेलो जै बुराई केरते। परमेशर पेइलो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो। 10 हर अक मैन्हु जै रोड़ां कम्मां केरते तैस महिमा, आदर, ते शान्ति मैलेली, पन परमेशर इना सैरी चीजां पेइले यहूदी लोकन देलो फिरी गैर यहूदी लोकन। 11 किजोकि परमेशर केन्चेरी तरफदारी न केरे।

12 एल्हेरेलेइ कि जैन गैर कौमारे लोकेईं बगैर मूसेरो कानून मेलतां पाप कियो, परमेशर तैन बगैर मूसेरो कानूने सजा देलो, ते जैनेईं मूसेरो कानून मेलतां पाप कियो, परमेशर तैन सजा भी मूसेरे कानूनेरे मुताबिक देलो। 13 किजोकि परमेशेरे नजरी मां मूसेरो कानून शुनेने बाले धर्मी नईं, बल्के मूसेरे कानूने पुड़ चलने बाले धर्मी ठहराए गानेन। 14 फिरी जैखन होरि कौमां केरे लोक जैन कां मूसेरो कानून नईं, सुभावे सेइं किछ मूसेरे कानूनेरे गल्लन पुड़ चलतन, ते मूसेरो कानून तैन कां न भोनेरे बावजूद भी अपने लेइ एप्पू कानून आन। 15 तैना इन हिरातन कि परमेशेरेरो कानून तैन केरे दिलन मां लिखोरोए, ते तैन केरे जमीर भी इस गल्ली पुड़ गवाही देतन, किजोकि तैन केरे अपने खियाल भी तैन पुड़ दोष लातन या बेइलजाम ठहरातन। 16 एरू तेइस भोलू जेइस परमेशर जै खुशखबरी मीं शुनावरीए तैसेरे मुताबिक यीशु मसीहेरे जिरिये मैन्हु केरि छेपेरी गल्लां केरो इन्साफ केरेलो।

??????

17 तू एप्पू जो यहूदी ज्ञातस, ते मूसेरे कानूने पुड़ तेरो विश्वासे, ते तू अपने आपे पुड़ घमण्ड केरतथ, कि तू परमेशेरेरो खास मैन्हु आस। 18 ते तू परमेशेरेरी मर्जी ज्ञानतस, ते तू इन भी ज्ञानतस कि कोनां गल्लां रोड़ी आन, किजोकि तीं इना गल्लां केरू ज्ञान मूसेरे कानूने करां मैलोरिन। 19 ते तू भरोसो रखतस, कि तू कान्न परमेशेरेरी बत हिरानेबालोस, ते जैना आंधरे मां आन तैन केरे लेइ लोअरो जेरे आस। 20 ते बेअक्लन शिखालने बालोस, ते बच्चां केरो उस्तादातस, ते तीं पक्को पतो कि परमेशेरेरो कानून तीं पूरू ज्ञान ते सच्चाई शिखालते। 21 ते जैन तू

होरन शिखालतस, अपने आपे की न शिखालस? तू होरन शिक्षा देतस कि चोरी नई केरनि, कुन तू चोरी केतस? 22 तू जै जोतस, “बदमाशी नई केरनि,” कुन तू बदमाशी केरतस? तू जै मूरतन सेइं नफरत केरतस, कुन तू मन्दरन लुटतस? 23 तू जै घमण्ड केरतस कि तू परमेशेरे कानूने ज्ञानतस, एप्पू किजो कानून न मेन्तां, परमेशेरे तुहीन केरतस? 24 “किजोकि तुश्शे यहूदी लोकां केरे वजाई सेइं गैर कौमन मां परमेशेरे नव्वेरी तुहीन भोतीए,” एल्हेरेलेइ पवित्रशास्त्रे मां एरू लिखेरूए।

25 अगर तू मूसेरे कानूने पुड़ चलस, त खतनो कराने सेइं तीं फैइदो त आए, पन अगर तू मूसेरो कानून न मन्नस त तीं मां ते तैस मां, जेसेरो खतनो नई भोरो कोई फर्क नई। 26 ते अगर कोई मैन्हु जेसेरो खतनो न भोए भोरो, त तै मूसेरे कानूने पुड़ चले, त परमेशेरे लेइ तै मैन्हु ते जेसेरो खतनो भोरोए दुइये बराबर आन। 27 ते जैस मैनेरो खतनो नई भोरो, अगर तै मूसेरे कानूने पूरू केरे, त तै तीं दोषी ठहरालो। किजोकि तीं कां मूसेरो कानूने ते तेरो खतनो भी भोरोए, पन फिरी भी तू कानूने पुड़ न चलस। 28 किजोकि सच्चो यहूदी तै नई जेसेरू जर्म यहूदन मां भोरू या जेसेरो खतनो भोरोए। 29 बलके सच्चो यहूदी तैए, जेसेरो मन परमेशेरे कां सच्चोए, ते सच्चो खतनो तैए जै पवित्र आत्मां केरे जिरिये दिलेरो भोरोए, न की मूसेरो कानून मन्ने सेइं भोरोए। एरे लोकां केरि बड़याई लोक नई बल्के परमेशेर एप्पू केरते।

3

1 (किछ लोक पुछतन) यहूदी केरि कुन बड़याई, या खतनेरो कुन फैइदो? 2 हर किसमे सेइं बडू किछ। पेइलू त इन कि सारू परमेशेरू वचन तैन सोंफू। 3 अगर किछ यहूदी परमेशेरे कां ईमानदार न निस्से त कुन भोवं? कुन तैन केरे ईमानदार न राने सेइं परमेशेर तैन केरे लेइ अपने वादे पूरे केरने मां झूठो भोव? 4 नई, कधे नई! बल्के परमेशेर हमेशा सच्च जोते, ते हर अक मैन्हु झूठो भोव, जेन्चरे पवित्रशास्त्रे मां परमेशेरे बारे मां लिखेरूए, “जैस सेइं तू अपनी गल्लन मां धर्मी भोस, ते इन्साफेरे वक्ते तीं जीत मैल्ले।”

5 अगर इश्शां बुरां कम्मां परमेशेरे धार्मिकता ठहराते, त अस कुन जोम? कुन इन कि परमेशेर करोध केरते ते असन सजा देते। (इन अव इन्सानेरी रीति पुड़ जोताई)। 6 नई, कधे नई! अगर परमेशेर इश्शा यहूदी केरो इन्साफ रोडे चारे न केरेलो, त तै किजो दुनियारो इन्साफ केरेलो?

7 किछ जोतन, अगर मेरे झूठेरे वजाई सेइं परमेशेरे सच्च्याई बांदी भोतीए ते तैसेरी महिमा भोतीए, त फिरी किजो पैपी केरो जेरो मीं पुड़ हुक्म दित्तो गाते? 8 “एज्जा, अस बुराई केरम, कि इस सेइं भलाई पैदा भोए?” पन असन पुड़ दोष भी लव गाते, ते केतरे जोतन, कि एन केरू भी एने जोनू आए। पन एरे जेरेन पुड़ दोष लानो ठीक आए।

????????????????

9 त फिरी अस कुन जोम? कुन अस यहूदी होरन करां रोडेम? नई, कधी नई; किजोकि असेई यहूदी लोकन पुड़ ते गैर यहूदी लोकन पुड़ ई दोष लोरोए, कि तैना सारे पापेरे कब्जे मां आन। 10 जेन्चरे पवित्रशास्त्रे मां लिखेरूए, “कोई परमेशेरे सामने धर्मी नई, अक भी नई।

11 कोई सच्चे समझदार नई,

कोई परमेशेरे तोपने बालो नई।

12 सारे परमेशेरे करां दूर भोरन, सारे निकम्मे बनोरन,

कोई भलाई केरनेबालो नई, अक भी नई।

13 तैन केरू गल खुल्ली कबरे,

तैनेई अपने ऐशी सेइं धोखो दित्तो,

तैन केरे ओठन पुड़ सप्पां केरू जेरे।

14 ते तैन केरू भाषण लानती, ते टलिठे सेइं भेरतांए।

15 तैन केरे पव खून केरने लेइ तेजन।

16 तैना जेरां भी गातन तुबाही ते कलेश तैन पत्ती गाते।

17 तैन न ज्ञानन् शैन्ति सेइं केन्चरां जीतन।

18 तैन मां परमेशेरो डर बिलकुल भी नई।”

19 अस ज्ञानतम, कि मूसेरो कानून जैन किछु ज़ोते, तैन्ने सेइं ज़ोते, जैना तैस मन्तन, एल्हेरेलेइ कि केन्ची कां कोई बहानो न भोए, ते सारी दुनिया परमेशेरे सज़ारे लायिक भोए। 20 किजोकि मूसेरे कानूनेरे मुताबिक कम्मां केरने सेइं कोई मैन्हु परमेशेरे सामने धर्मी नई भोनो, एल्हेरेलेइ कि मूसेरे कानूने सेइं पिशान भोतीए कि अस पापी आम।

?????????? ?? ?????????????

21 पन हुनी बगैर मूसेरो कानून मन्ने सेइं तै धार्मिकता बांदी भोरीए जै परमेशेरे तरफां एइतीए, जेसेरे बारे मां मूसेरे कानूने ते नेबी केरि किबातन मां लिखोरूए। 22 मतलब परमेशेरे तै धार्मिकता जै यीशु मसीह पुड़ विश्वास केरनेबालां केरे लेइए; किजोकि तैन मां किछु भेद भाव नई। 23 एल्हेरेलेइ कि सेब्बेई पाप कियो, ते तैस महिमा करां दूर आन जै परमेशर देते। 24 पन परमेशेरे अपने अनुग्रहे सेइं अस पापां केरि सज़ाई करां यीशु मसीहेरे ज़िरिये छुटाए ते मुफ्ते मां धर्मी ठहराए। 25 परमेशेरे मसीहेरे खूनेरे वजाई सेइं अक एरो छुटकारो ठहराव, जै विश्वास केरने सेइं फैइदामंद भोते, कि जैना पाप पेइले केरे, ते जैना परमेशेरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते। 26 बल्के इस्से वक्ते तैसेरी धार्मिकता बांदी भोए; कि जैस सेइं तै एप्पू धर्मी ठहरे, ते जै यीशु पुड़ विश्वास केरे, तैसेरो धर्मी ठहराने बालो भोए।

27 ते घमण्ड केरनू कोडि राव? तैसेरी त ठारे नई। कोस कानूनेरे वजाई सेइं? कुन मूसेरो कानून मन्ने सेइं? नई, बल्के विश्वासेरे वजाई सेइं। 28 एल्हेरेलेइ अस ज्ञानतम, कि मैन्हु मूसेरो कानूनेरे मुताबिक कम्मां केरनेरे बगैर यीशु मसीह पुड़ विश्वास केरने सेइं धर्मी भोते। 29 कुन परमेशर सिर्फ यहूदी केरोए? कुन गैर कौमां केरो नई? हाँ गैर कौमां केरो भी आए। 30 किजोकि अक्के परमेशेरे, जै खतने बालन भी विश्वासे सेइं, ते जैन केरो खतनो नई भोरो तैन भी विश्वासे सेइं धर्मी ठहरालो। 31 ते कुन अस विश्वासे सेइं मूसेरे कानूने रद केरतम? नई, कधे नई; बल्के मूसेरे कानूने बनोरू रखतम।

4

????????????????? ???????

1 त अस कुन ज़ोम, कि इश्शे पूर्वज अब्राहमे कुन मैल्लू? 2 किजोकि अगर अब्राहम रोडे कम्मन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोड़ां कम्मां केरू घमण्ड परमेशेरे सामने नई। 3 पवित्रशास्त्र कुन ज़ोते, इन कि “अब्राहमे परमेशेरे वादन पुड़ विश्वास कियो, ते तै तैसेरेलेइ धार्मिकता गनो जेव।” 4 कम केरनेबालेरी मज़दूरी देनी दान नई, पन हक समझू गाते। 5 पन जै (पुन्नेरू) कम न केरे बल्के पापी मैन्हु धर्मी ठहराने बाले पुड़ विश्वास केरते, तैसेरो विश्वास तैसेरेलेइ धार्मिकता गनो गाते।

6 जैस परमेशर बगैर (पुन्नेरे) कम्मां केरे धर्मी ठहराते, तैस दाऊद भी धन ज़ोते।

7 “धने तै जेसेरे अधर्म माफ़ भोए,

ते जैन केरे पाप ढके जे।

8 धने तै मैन्हु जैस परमेशर पापी न ठहराए।”

9 ते इन धन ज़ोनू, कुन खतने बालां केरे लेइ आए, या जैन केरो खतनो नई भोरो तैन केरे लेइ भी आए? अस पवित्रशास्त्रे मरां ज़ोतम, “अब्राहमे परमेशेरे वादन पुड़ विश्वास कियो ते तै तैसेरेलेइ धार्मिकता गनो जेव।”

10 इन तैसेरो खतनो भोने करां पेइलू भोव न कि खतनो भोनेरे बाद। 11 परमेशेरे तै पेइलो कबूल कियो ते धर्मी ठहराव, जेइस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुड़ छाप भोए, किजोकि तै तैन सेब्बी केरो (आत्मिक) बाजी ठहरे जैना विश्वास त केरतन पन तैन केरो खतनो नई भोरो। तैना भी तैन केरे विश्वासेरे वजाई सेइं धर्मी भोन। 12 ते जैन केरो खतनो भोरोए तैन केरो पूर्वज भोए, जैन केरो न सिर्फ खतनो कियोरोए, पन जैन इश्शे पूर्वज अब्राहमेरो जेरो विश्वास आए, जै तैनी बगैर खतनेरी हालती मां कियोरी थियो।

????????????????? ???????

13 परमेशर अब्राहमे ते तैसेरे वंश सेइं वादो कियोरो थियो कि तैना दुनियारे बारस भोले। ई वादे एल्हेरेलेइ नई दित्तोरु कि अब्राहमे मूसेरो कानून मन्ने, बल्के तैसेरो विश्वास जै परमेशेरे पुड़ थियो तैसेरे वजाई सेइं तै धर्मी

ठहराव जेव । 14 जै वादो परमेशेरे दित्तोरो थियो कि तैना दुनियारे बारस भोले अगर मूसेरो कानून मन्ने सेइं आए, त फिरी विश्वास बेमतलब, ते वादो बेकार भोव । 15 परमेशेर तैस पुड़ क्रोध केरते जै कानूने रोड़े चारे न मन्ने, ते जैड़ी कानून नई, तैड़ी तैसेरू टलोड़नू भी नई ।

16 एल्हेरेलेइ परमेशेरे वादे विश्वासेरे जिरिये हासिल भोतन, ताके तैना वादे अनुग्रहेरे जिरिये पक्के भोन, ते सारे वादे अब्राहमेरे वंशेरे लेइ आन, न सिर्फ यहूदी केरे लेइ, जैना मूसेरू कानून मन्तन बल्के तैन सेभी केरे लेइ भी आन, जैना अब्राहमेरो जेरो विश्वास केरनेबालन, तैए इशशो सेभी केरो पूर्वजे । 17 जेन्चरे पवित्त्रशास्त्रे मां लिखोरूए, “मीं तू बेड़ि कौमां केरो पूर्वज बनेवरोस” परमेशेरे पुड़ तैने विश्वास कियो, ते जै मुड़दन जीतो केरते ते जैना चीजां वाजूद नई, तैन भी हाज़र केरते । 18 परमेशेरे वचनेरे मुताबिक कि “तेरू खानदान एरू भोलू” तैना बेड़ि कौमां केरे पूर्वज भोन । तैनी न उमीदी मां भी उमीदी रेखतां विश्वास कियो, 19 ते अब्राहम जै लगभग 100 सालेरो थियो, अपने मरे जानी, ते सारारे मरे पेटेरे हालीती पुड़ भी विश्वासे मां कमजोर न भोव । 20 ते गैर विश्वासी भोइतां परमेशेरे वादे पुड़ शक न की, पन विश्वासे मां मजबूत भोइतां परमेशेरी बड़याई की । 21 ते तैस पूरो भरोसो भोव, कि जैस गल्लरो वादो परमेशेर कियोरोए, तै तैस पूरो केरनेरी शक्ति भी रखते । 22 अब्राहमेरो विश्वास तैसेरेलेइ धार्मिकता गनो जेव । 23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव । 24 बल्के इशशे लेइ भी जैन केरे लेइ विश्वास धार्मिकता गनो जेव, मतलब इशशे लेइ जैना अस परमेशेरे पुड़ विश्वास केरतम, जैन इशशो प्रभु यीशु मसीह मुड़दन मरां जीतो कियो । 25 यीशु इशशे पापां केरे लेइ मारनेरे लेइ टलुवाव जेव, ते असन धर्मी ठहरानेरे लेइ परमेशेर जीतो भी कियो ।

5

???????? ???? ???? ???? ?

1 एल्हेरेलेइ असां विश्वासे सेइं धर्मी भोए, ते जैन किछ इशशे प्रभु यीशु मसीहे इशशे लेइ कियोरू तैसेरे जिरिये इशशो मेल मलाप परमेशेरे सेइं भोरोए । 2 ते इशशे विश्वासेरे वजाई सेइं मसीहे अस इस अनुग्रहे तगर पुजाए, जैड़ी अज अस खड़े भी आम, ते असां पूरे याकीने ते आनन्दे सेइं परमेशेरी महिमा बंटनेरे लेइ उमीदी मां रातम । 3 सिर्फ एन्ने नई, बल्के मुसीबतन मां भी अस आनन्द केरम, किजोकि अस जानतम कि मुसीबतन सेइं सबर बद्धती । 4 परमेशेर असन रोड़े समझते किजोकि केन्चरे सबर केरनि असेईं शिखोरीए, ते तै असन रोड़े समझते तांए असन उमीदे । 5 ई उमीदी असन शरमिन्दा न केरे, किजोकि पवित्त्र आत्मा जै परमेशेरे असन दित्तोरोए तैसेरे जिरिये सेइं तैसेरो प्यार इशशे दिलन मां भोरोए ।

6 किजोकि जैखन अस अपनो आप बचानेरे लेइ कमजोर थिये, त मसीह परमेशेरे ठहरावरे वक्ते पुड़ इशशे पैपी केरे लेइ मरो । 7 केन्ची धर्मी मैनेरे लेइ भी कोई मरे, इन बडू मुशकले, पन शैइद केन्ची धर्मी मैनेरे लेइ कोई अपनि जान देनेरी जुरत केरे । 8 पन परमेशेरे अपनो महान प्यार एन्चरे बांदो कियो, कि जैखन असां पापी थिये तैखन मसीह इशशे लेइ मरो । 9 ते अस तैसेरे खूने सेइं धर्मी ठहरे, त मसीहेरे जिरिये सेइं परमेशेरे हमेशारी सजाई करां जरूर बचमले । 10 किजोकि जैखन अस परमेशेरे दुश्मन थिये त तैसेरे मट्ठरे मौती सेइं इशशो मेल तैस सेइं भोव, ते फिरी मेल मलाप भोरोए त तैसेरे जिन्दगी सेइं असन पक्की मुक्ति मैलेली । 11 ते सिर्फ इन्ने नई, पन हुनी प्रभु यीशु मसीहेरे जिरिये सेइं इशशो मेल परमेशेरे सेइं भोरोए, एल्हेरेलेइ अस परमेशेरे मां आनन्द केरतम ।

???????? ???? ???? ???? ?

12 एल्हेरेलेइ जेन्चरे एककी मैनेरे जिरिये यानी आदमेरे जिरिये पाप दुनियाई मां अव, ते पापे सेइं मौत आई, ते एन्चरे मौत सेभी मैनन् मां फैली । किजोकि सेभेईं पाप केरो । 13 मूसेरो कानून देने करां पेइले पाप दुनियाई मां त थियो, पन जैड़ी कानून नई, तैड़ी पाप गनो न गाए । 14 फिरी भी आदमे करां मूसा तगर सेभी लोकेई पाप कियो ते सब लोक मरे, जैन लोकेई तैस आदमेरो जेरो पाप न कियो तैना भी मरे, आदम मसीहेरो जेरो थियो, जै मसीह एजनेबालो थियो ।

15 पन परमेशेरे वरदान आदमेरे पापेरू जेरू नई, इन सच्चे कि एककी मैन्हु यानी आदमेरे पापेरे वजाई सेइं बड़े लोक मरे । पन परमेशेरे अनुग्रह त कने तैसेरू वरदान बड़े लोकां केरे लेइ महान आए जैन एककी मैन्हु यानी यीशु मसीहेरे अनुग्रहे सेइं एइते । 16 जैन वरदान परमेशेरे असन दित्तू तैन आदमेरे पापेरू जेरू नई, किजोकि एककी मैनेरो पाप सजा घिन्तां अव । पन हालांकी असेईं भी बड़े पाप कियोरेन फिरी भी परमेशेरे असन एरू वरदान

दित्तोरूए जैन असन परमेशेरी नज़री मां धर्मी ठहराते। 17 किजोकि एक्की मैनेरे पापेरे वजाई सेइं सब लोक मरे, त जैन लोकन अनुग्रहेरू ते धार्मिकतारू बडू वरदान एक्की मैनेरे ज़िरिये मैलते, तैना लोक जीते राले ते एक्की मैन्हु यानी यीशु मसीहेरे ज़िरिये राज़ केरेले।

18 एल्हेरेलेइ जेन्चरे एक्की मैनेरो पाप सेब्भी मैनेरू केरे लेइ सज़ा आनते, तेन्चरे मसीहेरे धार्मिकतारू कम सेब्भी मैनेरू केरे लेइ धर्मी ठहराने लेइ वजा बनू, जैस सेइं ज़िन्दगी मैलतीए। 19 किजोकि जेन्चरे एक्की मैनेरे हुक्म न मन्ने सेइं बडे लोक पापी भोए, तेन्चरे एक्की मैनेरे हुक्म मन्ने सेइं बडे लोक धर्मी भोले। 20 मूसरो कानून एल्हेरेलेइ दित्तोरो थियो कि सारे लोकन पतो लगगे कि तैना केतरे पापिन। पन जेन्चरे लोकेईं ज़ेते जादे पाप किये तेन्चरे परमेशेरो अनुग्रह तैस करां भी बडो जादे भोवं, 21 कि जेन्चरे सेब्भी लोकेईं पाप किये ते मरे, तेन्चरे परमेशेरो अनुग्रह राज़ केरते ते परमेशेरे अस इशे प्रभु यीशु मसीहेरे वजाई सेइं धर्मी ठहरावरेम। मतलब असन हमेशारी ज़िन्दगी मैलेली।

6

???????? ???? ??????? ?? ????????? ???? ???????

1 त अस कुन ज़ोम? कुन अस पाप केरते रहम, कि परमेशेरो अनुग्रह बद्धतो गाए? 2 नईं, कधी नईं! अस ज़ैखन पापेरे लेइ मरे ते फिरी किजो अग्रोवं जो पापे मां ज़िन्दगी बीताम? 3 तुस ज़ानतम कि ज़ैखन असेईं सेब्भी लोकेईं यीशु मसीहे सेइं साथी अक भोनेरे लेइ बपतिस्मो नीयोरो थियो, तैखन अस तैस सेइं साथी मरे थियो। 4 ज़ैखन असेईं बपतिस्मो नीयोरो थियो तैखन अस मसीह सेइं साथी मरे ते दबे जे, ताके अस भी नर्वीं ज़िन्दगी जीम, जेन्चरे मसीह बाजी परमेशेरी महिमा सेइं मुडदन मरां जीतो कियो।

5 किजोकि अगर अस बपतिस्मेरे ज़िरिये मसीहेरी मौती मां शामिल भोरेम, त अस भी पक्के तैसेरे जेरे जीते भोमेले। 6 अस ज़ानतम कि इशेरी पुरानी इन्सानयत यीशु मसीह सेइं साथी करूसे पुड़ चाढोरीए, ताके पापेरो जिसम बेफाइदो भोए, ते अस अग्रोवं जो पापेरे गुलैमी मां न रहम। 7 ज़ैखन मैन्हु मरते त तैखन तै पापेरी शेक्ति करां आज़ाद भोते। 8 एल्हेरेलेइ अगर अस मसीह सेइं साथी मरे, ते इशेरी विश्वास ईए कि तैस सेइं साथी जीते भी भोमेले। 9 किजोकि अस एन ज़ानतम, कि मसीह मुडदन मरां जीतो भोरोए ते तै फिरी न मरेलो, ते तैस पुड़ फिरी मौतरू राज़ नईं भोनू। 10 ज़ैखन मसीह मरो त तै एक्की बार सेब्भी केरे पापेरे लेइ मरो; पन हुनी तै जीतोए, ते सिर्फ परमेशेरे लेइ जीतोए। 11 एन्चरे तुस अपने बारे मां भी सोचा कि तुस पापेरे लेइ त मरोरेथ, पन यीशु मसीहे तुसन ज़िन्दगी दित्तोरीए ते तुस परमेशेरे लेइ जीते आथ।

12 एल्हेरेलेइ तुस अपने जानी मां पापेरी इच्छान राज़ केरने न देथ, ते तुस तैन केरे मुताबिक न चला। 13 ते अपने जिसमेरे अंगन बुरे कम्मां केरे लेइ पापे न सोंफा, पन अपने आपे मुडदन मरां जीते सेमझतां परमेशेरे सोंफा। ते अपने जिसमेरे अंगन धार्मिकतारे कम्मां केरे लेइ परमेशेरे सोंफा। 14 ते तुसन पुड़ पापेरू राज़ न भोलू, किजोकि तुस मूसेरे कानूनेरे अधीन नईं बल्के अनुग्रहेरे अधीन आथ।

?????????????? ?? ???

15 त कुन भोव कि अस एल्हेरेलेइ पाप केरम, कि असां मूसेरे कानूनेरे अधीन नईं बल्के अनुग्रहेरे? नईं, कधे नईं। 16 तुस ज़ानथ, कि ज़ैखन तुस जेसेरो हुक्म मन्नेरे लेइ अपनो आप गुलामां केरे जेरे सोफतथ त तुस तैसेरे गुलाम आथ। चाए पापेरी जेसेरो अन्त मौते, चाए हुक्म मन्नेरे जेसेरो अन्त धार्मिकताए। 17 तुस त पेइले पापेरे गुलाम थिये पन हुनी तुसन जै शिक्षा मैलोरी थी तैस पूरे दिले सेइं मन्नेबाले भोए, एल्हेरेलेइ अवं परमेशेरेरू शुक्र केरताई। 18 ते हुनी परमेशेरे तुस पापेरी शेक्ति करां छुटेइतां आज़ाद किये, ते तुस परमेशेरे गुलाम बने ताके तुस ज़ैन रोडू तैन केरि बटथ। 19 अवं ई मिसाल एल्हेरेलेइ इस्तेमाल केरने लोरोईं, किजोकि तुशे लेइ इन समझनू मुश्किले। जेन्चरे तुसेईं पेइले अपनो आप गुलामेरे जेरो बुरां कम्मां केरे लेइ अधर्मे ते बुरैडारे लेइ सोंफोरे थियो, तेन्चरे हुनी तुस अपने आपे परमेशेरी सेवारे लेइ सोंफा ताके तुस पूरे तरीके सेइं तैसेरे भोथ।

20 जेइस तुस पापेरे गुलाम थिये, त तुसन परमेशेरे खुश केरनेरी कोईं ज़रूरत न थी। 21 तुसन पुरैनी ज़िन्दगी सेइं कुन फैइदो मैलो? सिर्फ तुस शरमातथ, किजोकि ज़ैन तुसेईं कियूं तैसेरो नितीजो सिर्फ मौते। 22 पन हुनी तुस पापे करां आज़ाद भोरेथ ते तुस परमेशेरेरे दास बनोरेथ। किजोकि इना गल्लां तुसन पवित्र बनैली ते तुसन

हमेशारी जिन्दगी मैलेली। 23 किजोकि पापेरी मजदूरी त मौते, पन परमेशेरू वरदान इशशे प्रभु यीशु मसीह मां हमेशारी जिन्दगी आए।

7

११११११११ ११११११११११ ११११११

1 हे दलाव ते बेइनव, कुन तुस न ज्ञानथ अवं मूसेरो कानून ज्ञान्ने बालन सेइं जोताई, कि ज्ञांतगर मैन्हु जीतो रहते, तांतगर तैस पुड़ मूसेरे कानूनेरो अधिकार भोते? 2 मिसालरे तोरे पुड़, इलावरी कुआन्श कानूनेरे मुताबिक ज्ञांतगर तैसेरो मुन्श जीतोए तांतगर तैसेरी पाबंदे। पन अगर मुन्श मेरि गाए, त तै मुन्शेरे कानूने करां छुटी जेई। 3 ते अगर मुन्श हेजू जीतो ते होरि मडदेरी भोए त तै बदमाश भोतीए, पन मुन्श मेरि गाए, त तैसेरे कानूने करां छुटी, इडी तगर कि होरि मडदेरी भोए, फिरी भी बदमाश न ठहरेली। 4 हे दलाव ते बेइनव, जैखन तुस मसीह सेइं साथी मरे, त तुस कानूनेरे लेइ मरे। हुनी तुस मसीहेरे आथ जै मुडदन मरां जीतो कियोरोए, ताके तुस परमेशेरे लेइ फलदार जिन्दगी जीथ। 5 किजोकि जेइस अस अपने सुभावेरे मुताबिक चलते थिये, त पापी सुभाव असन मां कम केरतो थियो, ते कानूने तैना पापी इच्छां उकसेइं, ते जैन किछ असेई कियूं तैसेरो फल मौत थियो। 6 पन जेसेरे बंधने मां अस थिये, तैसेरेलेइ मेरतां, हुनी कानूने करां एरे छुटोरेम, पन आत्माेरे नव्वे तरीके पुड़ सेवा केरतम, न कि लफसन सेइं।

१११११११ ११११११ ११ ११११

7 त अस कुन जोम? कुन मूसेरो कानून पापे? नई, कधी नई! बल्के बगैर मूसेरे कानूने अवं पापे न पिशैनी, अगर मूसेरो कानून न जोथो कि “लालच न केर” त अवं लालच न जैनेथो। 8 पन पापे मौको लेइतां हुकमे सेइं मीं मां हर किसमेरू लालच पैदा कियूं, किजोकि बगैर मूसेरे कानूने पाप मरो आए। 9 अवं त मूसेरे कानूने बगैर पेइलो जीतो थियो, पन जैखन हुकम अव, त पाप जीतो भोव ते अवं मरो। 10 ते तैए हुकम जै जिन्दगरे लेइ थियो, मेरे लेइ मौतरी वजा बनो। 11 किजोकि पापे मौको मेलतां हुकमे सेइं मीं धोखो दित्तो, ते तैस सेइं अवं आत्मिक तोरे पुड़ मरो।

12 एल्हेरेलेइ मूसेरो कानून पवित्र आए, ते हुकम भी पवित्र, ठीक ते रोडोए। 13 ते कुन जै चीज रोडी थी मेरे लेइ मौत बनी? नई, कधे नई! पन पापे तैस रोडी चीजी सेइं मेरे लेइ मौत पैदा केरतां अवं मारो, कि तैसेरो पाप भोनो बांदो भोए, ते हुकमे सेइं पाप बडो जादे बुझोए।

१११११११ १११११ ११११ ११११ ११११११

14 किजोकि अस ज्ञानतम कि मूसेरो कानून त आत्मिके, पन अवं जिसमानी ते पापेरो गुलाम भोनेरे लेइ बिकोरोई। 15 ते जैन अवं केरताई, तैस न जैनी, किजोकि जैन अवं चाताई, तैन न केरि, पन जैस सेइं मीं नफरते, तैन्ने केरताई। 16 ते अगर, जैन अवं न चैई तैने केरताई, त अवं मनताई, कि मूसेरो कानून रोडो आए। 17 ते एस हालती मां बुरी चीजां केरनेबालो अवं नई, बल्के पापे, जै मीं मांए। 18 किजोकि अवं ज्ञानताई, कि मीं मां मतलब मेरे जिसमे मां कोई रोडी चीज नई, रोडू केरनेरी इच्छा त मीं मां आए, पन मीं करां न केरोए। 19 किजोकि जैस रोडे कम्मेरी इच्छा अवं केरताई, तैन मीं करां न बने, पन जैस बुरैइयरी इच्छा भी न केरि तैस केरताई। 20 पन अगर अवं तैन्ने केरताई, जेसेरी इच्छा न केरि, ते तैन केरनेबालो अवं नई, बल्के पापे जै मीं मांए।

21 ते मीं ई कानून मैलते, कि जैखन रोडे कम्मेरी इच्छा केरताई, त अवं बुराई केरताई। 22 किजोकि अवं जमीरे सेइं त परमेशेरे कानूने सेइं बडो खुश भोताई। 23 पन मीं अपने जिसमेरे अंगन मां होरि जेरो कानून लेइहोते, जै मेरी अक्लरे कानूने सेइं लडते, ते मीं पापेरे गुलामरे कानूने मां छडते जै मेरे जिसमेरे अंगन मांए। 24 अवं केरो नुभाघ मैन्हु आई, मीं इस जिसमे करां जै मौतरे पासे नेते कौन छुटालो? 25 अवं परमेशेरू शुक्र केरताई जैन यीशु मसीहेरे जिरिये अवं बचाव, ते अवं अपनि अक्ली सेइं त परमेशेरे कानूनेरो इस्तेमाल केरताई, पन अपने जिसमे सेइं पापेरी कानूनेरो इस्तेमाल केरताई।

8

१११११११ ११११११११ ११११११११ ११११११११

1 एल्हेरेलेइ हुनी जैना मसीह यीशु मां आन, तैन पुड़ सज़ारो हुक्म नई। 2 किजोकि पवित्र आत्मा तुसन जिन्दगी देलो, जै यीशु मसीह करां एइती ते तै तुसन पाप ते मौती करां आज़ाद केरेलो। 3 किजोकि जैन कम कानूने इश्शे पापी सुभावेरे वजाई सेइं कमज़ोर भोइतां न केरि बटु, तैन परमेशेरे कियूं, मतलब अपने मट्ठे इश्शे पैपी केरो ज़ेरो भोनेरे लेइ, ते पापेरे बलिदानेरे लेइ भेज़ू, परमेशेरे मसीहेरे जिसमे मां पापेरी सज़ा दित्ती। 4 परमेशेरे एन एल्हेरेलेइ कियूं ताके अस अपने पापी सुभावेरे मुताबिक नई, पन पवित्र आत्माेरे मुताबिक च़लतां जै हुक्म कानून देते तैस केरि बटम। 5 किजोकि जैना लोक पापी सुभावेरे मुताबिक जिन्दगी बीतातन, तैना पापेरे बारे मां सोचतन, पन जैना लोक पवित्र आत्माेरे मुताबिक जिन्दगी बीतातन, तैना आत्मिक गल्लां केरे बारे मां सोचतन। 6 अगर इश्शो मन इश्शे पापी सुभावेरे मुताबिक च़लते त अस मरमेले, पन अगर इश्शो मन आत्माेरे मुताबिक च़लते त असन कां जिन्दगी ते शान्ति मैलेली। 7 किजोकि पापी सुभावेरे मुताबिक च़लनू परमेशेरे सेइं बैर रखनोए, किजोकि न त पापी सुभाव परमेशेरेरे कानूनेरे अधीने, ते न कानूनेरे मुताबिक च़लि बटते। 8 ते जैना पापी सुभावेरे मुताबिक च़लतन तैना परमेशेरे खुश न केरि बटन।

9 पन जैखन परमेशेरेरो आत्मा तुसन मां बस्सते, ते तुस पापी सुभावेरे मुताबिक न च़लतथ बल्के पवित्र आत्माेरे मुताबिक च़लतथ, अगर कोन्ची मां पवित्र आत्मा नई त तै मसीहेरो मैन्हु नई। 10 ते अगर मसीह तुसन मांए, त जिसम पापेरे वजाई सेइं मरेलो, पन आत्मा धार्मिकतारे वजाई सेइं जीतीए। 11 ते अगर तैसेरी आत्मा जैने यीशु मुड़दन मरां जीतो कियो तुसन मांए। ते जै मसीह तैने मुड़दन मरां जीतो कियो, तैए तुश्शे भी नाश भोनेबाले जिसमे अपनि आत्मा सेइं जीतो केरेलो, जै तुसन मांए। 12 हे ढ़लाव ते बेइनव, असेईं एन्चरे न लोडे जीयेरू जेन्चरे अस अपने पापी सुभावेरे मुताबिक जीनू चातम, पन असेईं एन्चरे जीयोरू लोडे जेन्चरे परमेशेरेरो आत्मा चाते। 13 किजोकि अगर तुस अपने पापी सुभावेरे मुताबिक जीले त तुस मरेले, पन अगर तुस पवित्र आत्माेरे मुताबिक च़लेले त तुस अपने पापी सुभावेरां कम्मां केरनां बंद केरेले ते फिरी तुस जीते राले। 14 किजोकि जेतेरे परमेशेरेरे आत्माेरे च़लाने सेइं च़लतन तैन्ना परमेशेरेरे बच्चेन। 15 किजोकि जै आत्मा तुसन मैलोरोए तुसन फिरी गुलाम बेनतां रानेरे लेइ नई, बल्के तै तुसन परमेशेरेरे बच्चे बनाते। तैसेरे ज़िरिये अस परमेशेरे जो हे अब्बा, हे बाजी जोतम। 16 पवित्र आत्मा एप्पू इश्शी आत्मा सेइं मिलतां गवाही देते, कि अस परमेशेरेरे बच्चेम। 17 किजोकि अस परमेशेरेरे बच्चेम ते असां तैना बरकतां हासिल केरमेले जैना परमेशेरे अपने लोकां केरे लेइ रेखोरिन, ते मसीहेरे लेइ भी जैन परमेशेरे रेखोरूए, तैन भी अस मसीह सेइं साथी हासिल केरमेले; किजोकि अगर अस मसीहेरे ज़ेरे दुःख झैलमेले त अस भी मसीहे साथी महिमा हासिल केरमेले।

?????????? ??????? ???? ??????? ?????? ??????? ???????

18 मीं पूरू याकीने, कि जैना दुःख अस झैल्लने लोरेम, तैस महिमारे सामने, जै परमेशेरे असन देनेबालोए, किछ भी नई। 19 किजोकि सैरी रचनारी चीज़ां बड़े बे सबरी सेइं तैस वक्तेरो इंतज़ार केरने लोरिन, कि जेइस परमेशेरे इन बांदो केरनू तैसेरे सच्चे बच्चे कौन आन। 20 किजोकि जैन किछ परमेशेरे बनाव, तैन सैरी चीजेइं अपनि कीमत गवाइ, एल्हेरेलेइ नई कि तैना अपने आप चैती थी, पन परमेशेरे एन भोने दित्तू। पन फिरी भी उमीदे। 21 कि सृष्टि एप्पू भी खुश आए कि विनाशे करां छुटकारो हासिल केरतां, परमेशेरेरे बच्चां केरे महिमारी अज़ैदी मां खुशी मनाली। 22 किजोकि अस ज़ानतम कि सारी सृष्टि मिलतां हुना तगर कर लातीए ते तकलीफ़ी मां तडफतीए, जेन्चरे दोज़ीती गल्हे बिशनेरी तकलीफ़ भोतीए। 23 सिर्फ़ तैन्ना नई पन अस भी जैन एजने बैली महिमारो पेइले फलेरो स्वाद च़खनेरे लेइ पवित्र आत्मा दित्तो, पन अस हेजू भी परमेशेरेरे वक्ते बलगने लोरेम जैखन परमेशेरे अपने बच्चे केरे रूपे मां कबूल केरेलो, ते असन जिसमेरे बुरैई करां छुटकारो देलो। 24 हुनी परमेशेरे असन मुक्ति दित्तोरीए, असन ई उमीदे। पन अगर तुस कोन्ची चीज़ी हासिल केरनेरे लेइ उमीद केरथ जै तुसन कां पेइली आए, त फिरी तै उमीद नई। किजोकि जैस चीज़ी कोई हेरने लोरोए तैसेरी उमीद कुन केरे? 25 पन जैस चीज़ी अस न लहम, अगर तैसेरी उमीद रखतम, त सबरी सेइं तैस बलगते भी रातम।

26 एन्चरे पवित्र आत्मा इश्शी महत केरते जैखन अस परमेशेरे पुड़ भरोसो रखने मां कमज़ोर भोतम, किजोकि अस न ज़ानतम, कि प्रार्थना केन्चरे केरतन; पन पवित्र आत्मा एप्पू कर लेइतां जै बयानेरे बेइरे, इश्शे लेइ बिनती केरतीए। 27 ते परमेशेरेरे जै मनां केरो ज़ान्ने बालोए ज़ानते, कि पवित्र आत्मा कुन लोरो ज़ोने। किजोकि तै पवित्र लोकां केरे लेइ परमेशेरेरे मेज़ी सेइं बिनती केरते।

28 ते अस ज्ञानतम, कि जैना लोक परमेशरे सेइं प्यार केरतन, परमेशर तैन केरे लेइ सब गल्लां केरे जिरिये भलाई पैदा केरते; मतलब तैन केरे लेइ जैना तैनी अपने मेरजारे मुताबिक चुनोरेन। 29 किजोकि तैने जैना पेइले चुने, ते पेइले ठहराए भी कि तैसेरे मटठरे रूपे मां भोन, ताके तै बडे ढलान मां जेठो भोए। 30 फिरी जैना तैने पेइले ठहराए, तैना चुने भी, ते जैना चुने, तैना धर्मी भी ठहराए, ते जैना धर्मी ठहराए तैन महिमा भी दित्तोरीए।

????????????

31 ते अस एन गल्लां केरे बारे मां कुन ज़ोम? अगर परमेशर इश्शे पासे, ते इश्शो खलाफ कौन भोइ बटते? 32 परमेशरे अपनू मटठू भी अपने लेइ न रखू, बल्के तैन इश्शे सेब्मी केरे लेइ तैसेरे दुश्मना केरे हवाले दित्तू, ते तै मसीह सेइं असन तैन सब किछ देलो जेसेरो वादो तैने असन सेइं कियोरोए। 33 अस परमेशरेरे चुनोरम, कोई असन पुइ परमेशरेरे सामने दोष न लेई बटे, किजोकि तैए जैने अस धर्मी ठहरावरेम। 34 फिरी कौने जै सज़ारो हुक्म देलो? कोई नई, यीशु मसीह तैए जै मरो, बल्के मुइदन मरां ज़ीतो भोव, ते परमेशरेरे देइने पासे, ते इश्शे लेइ बिनती भी केरते। 35 कौन असन मसीहेरे प्यारे करां अलग केरि बटते? मुसीबत या तंगी, या ज़ुलम, या काल, या नगूपन, या खतरो, या तलवार? इन मरां कोई भी चीज़ असन मसीहेरे प्यारे करां अलग न केरि बटे। 36 जेन्चरे पवित्रशास्त्रे मां लिखोरूए, “तेरे लेइ अस हर वक्त मौतरे खतरे मां रातम; अस मैरोने बैली भैड्डां केरे जेरे गने जोरेम।” 37 पन जैने असन सेइं प्यार कियोरोए, तैसेरे जिरिये असन पूरे तरीके सेइं एन सैरी बुरी गल्लां पुइ ज़ीत हासिल आए। 38 किजोकि मीं पूरू याकीने, कि न मौत, न ज़िन्दगी, न स्वर्गदूत, न हकोमतां, न जै वक्त च़लोरोए, न एजनेबालो वक्त, न शेक्ति, न उचार, 39 न डुघार ते न कोई होरि सृष्टि, असन परमेशरेरे प्यारे करां जै इश्शे प्रभु यीशु मसीह मांए अलग केरि सकेली।

9

????????????

1 अवं मसीह मां सज़ जोताई, झूठ न ज़ोई, ते मेरो ज़मीर भी पवित्र आत्माई मां गवाही देते। 2 कि मीं बड़ो दुःखे, ते मेरो दिल लगातार मेरे लोकां केरे लेइ उदास भोते। 3 किजोकि मेरे यहूदी ढ़ला ते बेइनां केरे लेइ, अवं हमेशारे लेइ श्रापित भोथो ते मसीह करां अलग भोथो अगर तैन इस वजाई सेइं तैन मुक्ति मैलती। 4 तैना इस्राएलिन; ते तैना परमेशरेरे लेपलक बच्चे भोनेरे लेइ चुनोरेन, ते परमेशरेरे अपनि महिमा तैन पुइ बांदी की। ते तैनी तैस सेइं करार कियो, ते तैन मूसेरो कानून दित्तो। ते तैनी तैन अपनि आराधना ते अपने खूबसूत वादे पूरे केरनेरे लेइ हासिल केरनेरो मौको दित्तो। 5 अब्राहम, इसहाक ते याकूब तैन केरे दादे पड़दादे थिये, ते मसीह भी जिसमेरे लिहाजे सेइं तैने मरां अव, तै परमेशरे ते सेब्बन करां बाए जै सेब्बन पुइ राज़ केरते, तैसेरी महिमा हमेशा भोती राए। आमीन।

6 पन इन नई, कि परमेशरेरू वचन टलू कि, सारे जैना इस्राएलेरे वंशन, तैना सब सच्चे इस्राएली नई। 7 ते न अब्राहमेरे वंश मां ज़र्म भोने सेइं सब परमेशरेरे बच्चे भोन। पन पवित्रशास्त्रे मां परमेशर अब्राहमे सेइं ज़ोते, “जैना इसहाकेरे वंशे मरां पैदा भोले तैन्ने तेरू वंश मन्नु गालू।” 8 मतलब जैना कुदुरती तरीके सेइं ज़र्म घिन्तन तैना परमेशरेरे बच्चे नई, पन सिर्फ वादेरे बच्चे अब्राहमेरे बच्चे गने गातन। 9 किजोकि वादेरू वचन इने, “अवं एग्री साल इस वक्ते फिरी एज्जेलो, ते सारारू अक मटठू भोनूए।” 10 ते सिर्फ एन नई, पन जेइस रिबका भी एक्की सेइं मतलब इसहाके सेइं दोज़ींती थी ते तैसेरे पेटे मां दूई बच्चे थिये। 11-12 ते हेजू तगर तैना बच्चे न थिये ज़मोरो, ते न तैनेई रोडू या बुरू कियेरू थियूं, कि परमेशरे रिबका सेइं ज़ोवं, तेरू बड्डू मटठू निकड़ेरी सेवा केरेलू। परमेशरे एन एल्हेरेलेइ ज़ोवं कि एन हिराए, कि तै अपनि मेज़ीं सेइं फैसले केरते ते इन तैन मटठां केरे रोड़ां या बुरे कम्मां केरे वजाई सेइं न थियूं। 13 जेन्चरे पवित्रशास्त्रे मां लिखोरूए, “मीं याकूबे सेइं प्यार कियो, पन एसावेरो इन्कार कियो।”

14 ते अस कुन ज़ोम, कि परमेशर बेइन्साफे कि तै ज़ैस चाते चुनते? नई, कधे नई! 15 किजोकि परमेशर मूसे सेइं ज़ोते, “अवं ज़ैस केन्ची पुइ दया केरनि चैई, तैस पुइ दया केरेलो ते ज़ैस पुइ तरस केरनो चैई तैस पुइ तरस केरेलो।” 16 एल्हेरेलेइ परमेशर तैस चुनेलो ज़ैस पुइ तै दया हिरानी चाते; तैसेरी इच्छा लोक ज़ैन चातन या केरनेरी कोशिश केरतन तैस पुइ निर्भर नई। 17 किजोकि पवित्रशास्त्रे मां परमेशरे मिसरेरे राज़े फ़िरौन* सेइं

* 9:17 9:17 फ़िरौन: फ़िरौन मैनेरू नवं नई, मिसरेरे राज़ेरे पेदवरू नवं आए।

जोवं, “मीं तू एल्हेरेलेइ राजो बनोरोस, कि तीं मां अपनि शक्ति हिरेई, ते मेरे नंवेरो प्रचार सैरी जमीनी पुड़ भोए।” 18 ते जैस पुड़ तै चाते, तैस पुड़ दया करते; ते जैस चाते ढीठ करते।

?????????? ???? ?? ???????

19 ते किछ लोक मीं सेइं ज़ोले, “अगर एन्चरे, त फिरी परमेशर केन्चरे फैसलो केरि बटते कि अस गलत आम? एल्हेरेलेइ कोई भी तैस ज़ैन तै चाते केरने करां न रोकी बटे।” 20 हे मैन्हु, तू कौन आस, जै तू परमेशरे सेइं बेस केरतस? कुन बानोरी चीज़ बनाने बाले सेइं ज़ोई बटतीए, “तीं अवं एरी किजो बनाई?” 21 कुन कुम्हारे मिच्ची पुड़ अधिकार नई, कि एक्की लुनदे मरां, अक भांड आदरारे लेइ बनाए, ते हौरू नरादराए लेइ बनाए? 22 (परमेशरे अपने बनावरो लोकन सेइं ज़ैन तै चाए तैन केरनेरो अधिकारे) ज़ैना नाश भोनेरे काबल थिये, तैन केरे खलाफ परमेशर अपनो क्रोध हिरानो ते अपनि सामर्थ बांदी केरनेरी चातो थियो, पन तैसेरे बदले मां तैनी सबर की। 23 (तैनी एन कियूं) किजोकि तै हिरानू चातो थियो (मसीहेरे मौतरे बलिदानेरे ज़िरिये) तै केतरो महान आए, जैखन तै तैन लोकन पुड़ दया करते ज़ैना तैनी अपनि महिमा मां शामिल भोने लेइ चुनोरेन। 24 मतलब असन पुड़ ज़ैना तैने न सिर्फ यहूदन मरां बल्के गैर कौमन मरां भी चुने।

25 ज़ेन्चरे तै होशे नेबेरे किताबी मां ज़ोते, “ज़ैना मेरे लोक न थी, तैन अवं अपने लोक ज़ोलो। ते ज़ैना लोक मेरे ट्लारे न थिये, तैन जो ट्लारे ज़ोइलो। 26 ते तैस्से ठैरी ज़ैडी परमेशरे ज़ोरू थियूं, तुस मेरे लोक नई, तैस्से ठैरी ज़ींतो परमेशर तैन ज़ोलो तुस मेरे बच्चे।”

27 ते यशायाह नबी इस्राएली लोकां केरे बारे मां ज़ोते, “चाए इस्राएलेरी कुटमेरी गिनती समुद्रेरे किनारे रेतरी ज़ेरि बड़ी जादे भोली फिर भी तैन मरां थोड़े बच्चेले। 28 किजोकि प्रभु जल्दी दुनियारे सेब्भी लोकां केरो सेखती सेइं इन्साफ केरेलो।” 29 ज़ेन्चरे यशायाह नेबे पेइलू भी ज़ोरू थियूं, “कि सर्वशक्तिमान परमेशरे इश्शे लेइ इश्शू वंश न बाञ्छथो, त अस सदोम ते अमोरा नगरां केरे ज़ेरे भोने थिये, ज़ैना परमेशरे पूरे तरीके सेइं बरबाद कियां।”

???????????????? ???? ??????? ?

30 ते अस कुन ज़ोम? इन कि ज़ैना गैर कौमां केरे लोक ज़ैना धार्मिकता न थी तोपते, तैनेई धार्मिकता हासिल की, मतलब तै धार्मिकता ज़ै विश्वासे सेइं आए। 31 पन इस्राएली लोक मूसेरो कानून मेन्तां परमेशरेरे करां धर्मी जुवानू चाते थिये, पन तैन न भोइ बटु। 32 किजो नई? एल्हेरेलेइ कि तैना विश्वासे सेइं नई, पन मूसेरो कानून मेन्तां धर्मी भोनेरी कोशिश करते थिये, तैनेई तैस ठोकर खानेबाले घोड़े सेइं ठोकर खाइ। 33 ज़ेन्चरे पवित्रशास्त्रे मां लिखोरूए; “तका अवं सिय्योने मां अक ठेस लानेबालो घोड़, ते ठोकर खाने बाली चट्टान रखताई; ते ज़ै तैस पुड़ विश्वास केरेलो, तै शरमिन्दा न भोलो।”

10

1 हे ढुलाव ते बेइनव मेरे मनेरी इच्छा ते इस्राएली लोकां केरे लेइ परमेशरे कां मेरी ई प्रार्थनाए, कि तैन मुक्ति मैल्ले। 2 अवं ज़ानताई कि तैना परमेशरेरे लेइ जोशे मां रहतन, पन सच्चे ज़ाने सेइं नई। 3 किजोकि तैना तैस धार्मिकताई करां अनजान राए ज़ै परमेशरे तरफां मैलतीए, ते तैनेई अपनि धार्मिकता बनानेरी कोशिश की, एल्हेरेलेइ तैनेई अपनो आप परमेशरेरी धार्मिकतारे अधीन न कियो। 4 किजोकि मसीहे तै मकसद पूरो कियोरोए ज़ेसेरे लेइ मूसेरो कानून दित्तोरो थियो, ताके ज़ै कोई मसीह पुड़ विश्वास केरे तै परमेशरेरी नज़री मां धर्मी भोए।

?????????? ???? ???? ?????????

5 किजोकि मूसे इन लिखोरूए, “जे मैन्हु तैस धार्मिकता मुताबिक चलते ज़ै कानूनेरे ज़िरिये आए, तै तैसेरे ज़िरिये सेइं ज़ींतो रालो।” 6 पन ज़ै धार्मिकता विश्वासे सेइं आए, तैसेरे बारे मां पवित्रशास्त्र इन ज़ोते, “तू अपने मने मां इन न ज़ोइयां कि स्वर्गे पुड़ कौन चढेलो?” (मतलब मसीह आन्ने) 7 या इन न ज़ोइयां “पाताले मां कौन गालो?” (मतलब मसीह मुड़दन मरां ज़ींतो केरतां बा आने) 8 पन पवित्रशास्त्र इन ज़ोते “परमेशरेरू वचन तेरे नेडे, ते तेरे ऐशी मां ते मने मां आए,” इन तैन वचने ज़ैन असन परमेशरे पुड़ विश्वास केरनेरे बारे मां ज़ोते, ज़ेसेरो अस प्रचार केरतम। 9 अगर तू अपने ज़बाना यीशुए, प्रभु ज़ेनतां मन्नस ते अपने दिल सेइं विश्वास केरस, कि परमेशरे तै मुड़दन मरां ज़ींतो कियो, त तीं परमेशर पक्की मुक्ति देलो। 10 किजोकि इश्शे विश्वासेरे ज़िरिये सेइं

अस परमेशेरी नज़री मां धर्मी भोतम, ते इशे इकरार केरने सेइं मुक्ति मैलोरीए। ¹¹ किजोकि पवित्रशास्त्र इन जोते, “जै कोई तैस पुड़ विश्वास केरे, तै शरमिन्दो न भोलो।” ¹² इन एल्हेरेलेइ आए कि यहूदन ते गैर कौमन मां कोई फर्क नई, किजोकि परमेशर सेबी केरो प्रभुए; ते जैना तैसेरू नवं घिन्तन तै तैन बरकत देते। ¹³ जेन्चरे पवित्रशास्त्र जोते, “जै कोई प्रभुएरू नवं घिन्नेलो, तैस मुक्ति मैलेली।”

¹⁴ पन प्रभु पुड़ लोकेई विश्वास न कियो त तैना तैसेरू नवं किजो घिन्तन? ते जेसेरे बारे मां तैनेई शुनोरू नई तैस पुड़ केन्चरां विश्वास केरेले? ते अगर तैसेरे बारे मां कोई प्रचार न केरे त तैना केन्चरां शुनी बटतन? ¹⁵ ते अगर कोई प्रचार केरनेरे भेजो न गाए त तैना केन्चरे शुनेई बटतन? जेन्चरे पवित्रशास्त्र जोते, “तैन केरे पव केत्तरे रोडेन, जैना खुशखबरी शुनातन!” ¹⁶ पन सेभेई तै खुशखबरी कबूल न की। यशायाह नबी जोते, “हे प्रभु कोई इशे सन्देशे पुड़ विश्वास न केरे।” ¹⁷ एल्हेरेलेइ मसीहेरे बारे मां सन्देश शुन्नेरे बगैर कोई भी तैस पुड़ विश्वास न केरि बटे। ¹⁸ पन अवं पुछ्तई, “कुन इस्राएली लोकेई न शुनू?” हाँ तैनेई जरूर शुनू, पन पवित्रशास्त्रे मां लिखोरूए “तैन केरू वचन सैरी ज़मीनी पुड़, ते तैन केरि गल्लां दुनियारे हर पासे पुजोरिन।” ¹⁹ अवं फिरी पुछ्तई, कुन इस्राएली लोकेई तैन वचन न समझू? पेइलो त प्रभुए मूसेरे जिरिये ई जुवाब देते, “अवं तैन केरे जिरिये जै कौम नई, इस्राएली लोकन जलन करालो, अवं बेवकूफ गैर कौमां केरे लोकां केरे जिरिये तुसन सरकालो।” ²⁰ फिरी यशायाह बड़े दिलेरी सेइं परमेशेरे लेइ जोते, “जैना मीं न थी तोपते, तैन अवं मैलो, ते जैना मीं पुछ्ते भी न थी, तैन पुड़ अवं बांदो भोव।” ²¹ पन इस्राएलेरे बारे मां परमेशर इन जोते, “अवं हुक्म न मन्नेबाले ते बेस केरनेबाले लोकन सैरी दिहैड़ी कुजातो राव।”

11

????????? ???? ???? ?????????? ???? ?

¹ एल्हेरेलेइ अवं पुछ्तई, कुन परमेशेरे अपने लोक शारे? नई, कधे नई! अवं भी त इस्राएली आई, अब्राहमेरे खानदाने ते बिन्यामीनेरे गोत्रे मरां आई। ² परमेशेरे अपने तैना लोक न शारोरे, जैना तैने पेइले चुने, कुन तुस न जानथ, कि पवित्रशास्त्र एलिय्याहेरे बारे मां कुन जोते, कि एलिय्याह नेबे इस्राएली लोकां केरे खलाफ परमेशेरे कां बिनती केरते? ³ तैने जोवं “हे प्रभु, तैनेई तेरे नबी मारे, ते तेरी बलिदान केरनेरी ठारां बरबाद की, ते सिर्फ अवं ए ऐकैलो बचोरोई जै तीं मन्ने बालोई, हुनी तैना मीं भी मारने चातन।” ⁴ पन परमेशेरे एलिय्याहे जुवाब दित्तो, “मीं अपने लेइ 7000 मड़द रखोरेन, जैनेई बाल देबतेरे मूरती कां मथ्यो नई टेकोरो।” ⁵ एन्चरे इस वक्ते भी थोडे जेरे लोक बजोरेन, जैना परमेशेरे अपने अनुग्रह वजाई सेइं चुनोरेन। ⁶ अगर इन परमेशेरेरे अनुग्रहे सेइं भोरूए, ते फिरी मूसेरे कानूनेरे मुताबिक कम्मन केरने सेइं नई, नई त फिरी अनुग्रह, अनुग्रह न राव।

⁷ ते फिरी नितीजो कुन भोव? कि इस्राएली जेसेरी तोपी मां आन, तै तैन न मैलो; पन चुनोरेन मैलो, ते होरे बाकी लोक सखत कियोरेन। ⁸ जेन्चरे पवित्रशास्त्रे मां लिखोरूए, “परमेशेरे अज्जेरे दिहाड़ी तगर तैन केरो मन ते दिल सुस्त कियो, ते एरी एछ्छे दिती कि ताके तैना लेई न बटन, ते एरे कन ताके तैना शुनी न बटन।”

⁹ ते राजो दाऊद जोते,
“अवं परमेशेरे कां प्रार्थना केरताई कि तै तैन केरे तिहारन मां ट्लेइ बटे ते फसाए,
ते परमेशर तैन झुकाए ते तैन सज़ा देइ बटे।

¹⁰ ते तैन केरि एछ्छन पुड़ आंधरू भोए, ताके तैना लेई न बटन,
ते परमेशर तैन, तैन केरि परेशैनी केरे वजाई सेइं दुखी केरि बटे।”

¹¹ त अवं पुछ्तई, कुन यहूदी लोक ठोकर लगनेरे वजाई सेइं हमेशारे लेइ बिछ्छे? नई, कधे नई! पन तैन केरे विश्वास न केरनेरे वजाई सेइं गैर कौमन मुक्ति मैल्ली ताके तैन जलन भोए। ¹² ते अगर तैन केरे विश्वास न केरनेरे वजाई सेइं गैर कौमरे लोकां केरू भलू भोवं, हकीक्ति मां गैर कौमां केरे लेइ बडू रोडू भोलू जेइस यहूदी लोक परमेशेरे कां वापस एज्जले।

??? ?????? ???? ??? ?????????, ?????? ??????

¹³ अवं तुसन गैर कौमरे लोकन सेइं एन जोताई। कि अवं गैर कौमरे लोकां केरो प्रेरित आई, ते अपने सेवारे बारे मां घमण्ड केरि। ¹⁴ ताके अवं कोन्ची तरीके सेइं अपने लोकन जलन करेइतां तैन मरां किछन मुक्ति दूवेई।

15 किजोकि इस्राएली लोकां केरू शारू गानू दुनियारे लोकां केरे लेइ मेल मिलापेरी वजा बनी, ते तैन केरू यीशु कबूल केरनू कि तै मसीह आए, एन एरू भोलू जेन्चरे मुडदेरू जीतू भोनू! 16 ते किजोकि पूर्वज अब्राहम ते दादे पडदादे पवित्र थिये ते तैन केरि खानदानी भी पवित्र भोली, जैखन चडतलरो पेइलो पेइडो परमेशेरे लेइ चादनेरे वजाई सेइं पवित्र भोरोए, त पूरू सन्नोरू अट्टू भी पवित्र भोरूए, ते जैखन जील पवित्र भोवं, त डाल भी पवित्ररन।

17 इस्राएली लोक जैतूनेरे बुटेरे डैलडी केरे जेरे आन ते इशे दादे पडदादे अब्राहम, इसहाक ते याकूब एस बुटेरे जीलां केरे जेरे आन, ते अगर किछ डैलडी टलोडी जेई, त तुस गैर कौमरे लोक जंगली जैतूनेरे जेरे आथ, ते तुस तैस असली जैतूने मां कलम कियोरेथ ते जीलां केरे खुराकारे हकदार भोरेथ। 18 त तीं तैन डैलडन पुड जैना टलोडी जेई ते शैरी जेई तैन पुड घमण्ड न लोडे कियेरू, ते अगर तू घमण्ड केरस त याद रख कि तू जीलन नई, पन जील तीं सुमभालते। 19 फिरी तू जोलो, “डैलडी एल्हेरेलेइ टलोडी, कि अवं कलम भोई।” 20 इन सच्चे, तैना त विश्वास न केरनेरे वजाई सेइं टलोडी जेई, पन तू विश्वासे सेइं बनोरो रातस, एल्हेरेलेइ घमण्ड न केर, पन डर केर। 21 किजोकि परमेशेरे असली डैलडन पुड दया न की, त तुसन पुड भी दया न केरेलो जैना कलम कियोरेथ। 22 एल्हेरेलेइ परमेशेरी दया ते सखती हेर! जैना पाप केरनेरे वजाई सेइं झडे तैन पुड सखती, पन तेरे लेइ दया, ते तू अपने आपे पुड तैसेरी दया बनोरी राने दे, नई त तू भी कटो गालो। 23 ते अगर यहूदी लोक फिरी विश्वास केरन, त कलम केरे गानेन किजोकि परमेशेर एन केरनेरे लेइ शेक्ति बालो आए। 24 किजोकि अगर तू तैस जैतून, जै सुभावे सेइं जंगलीए कटो जेव, ते जै असलीए तैसेरे खलाफ रोडे जैतूने मां लव जेव, ते इना असली डैलडी आन अपने जैतून मां किजो न लेई गैली।

????? ?????????????? ?????????

25 हे ढलाव ते बेइनव, अवं न चैई कि तुस गैर कौमरे लोक अपने बारे मां घमण्ड केरेथ। इस्राएली लोकन सेइं कुन भोव, अवं एस भेदेरे बारे मां तुसन सेइं जोताई, कि जांतगर गैर कौमां केरे बडे लोक मसीह कां न एजन, तांतगर किछ इस्राएली लोकां केरो दिल सखत रालो। 26 ते एन्चरे सैरी इस्राएली लोकन मुक्ति मैल्लनीए; जेन्चरे पवित्रशास्त्रे मां लिखोरूए, “छुटानेबालो सिय्योनेरां (यरूशलेम) एज्जेलो, ते अभक्ति इस्राएली लोकन करां दूर केरेलो। 27 ते तैन सेइं मेरो ई करार भोलो, कि अवं तैन केरे पाप माफ़ केरेलो।” 28 खुशखेबरारे वजाई त तैना तुशे लेइ परमेशेरे बैरिन, पन परमेशेरे चुनेरे वजाई सेइं ते तैन केरे बुजुर्गन दित्तोरे वचनेरे वजाई सेइं परमेशेर तैन सेइं हेजू भी प्यार केरते। 29 किजोकि परमेशेरे अपने वरदान्न करां ते अपने कुजाने करां कधे अपनो मन न बदले। 30 किजोकि जेन्चरे पेइले तुसेईं परमेशेरो हुकम न थियो मनोरो, पन हुना इस्राएली लोकां केरे हुकमन मन्ने सेइं तुसन पुड दया भोइ। 31 तैना हेजू भी हुकम न मन्नेबालेन कि जै दया तुसन पुड भोरीए तैन पुड भोली। 32 किजोकि सेब्भी लोकेई हुकम नई मन्नोरो एल्हेरेलेइ तैना कैदी केरे जेरे बनोरेन। पन परमेशेरे एन एल्हेरेलेइ कियूं ताके तैन सेब्भन पुड दया केरि बटे।

????????????? ?????????

33 वाह! परमेशेर सेब्भी केरे लेइ भलो आए ते ज्ञानी ते अक्लमन्दे, कोई भी तैसेरे खियालन बियांन न केरि बटे ते कोई तैसेरी बत्तां न सेमझी बटे। 34 जेन्चरे पवित्रशास्त्रे मां लिखोरूए

“कोई न ज्ञाने प्रभुएरे मने मां कुने

या तैस सलाह देनेबालो कौने?

35 या केने पेइले तैस किछ दित्तू

जेसेरो बदलो तैस दित्तो गाए?”

36 किजोकि सब किछ परमेशेरी तरफां आए। तैन्नी सब किछ बनाव, ते तैसेरे जिरिये, ते तैसेरेलेइ सब किछे। तैसेरी आदर सदा भोती राए। आमीन।

12

????????????????? ?????????? ??????????????

1 एल्हेरेलेइ हे ढलाव ते बेइनव, अवं तुसन कां परमेशेरी दया याद केरताई बिनती केरतां जोताई, कि अपनि जिन्दगी पवित्र, ते जेरू परमेशेरे पसंद एइते, बलिदान केरतां चाढा; ईए परमेशेरी आराधना केरनेरो सही तरीको

आए।² ते इस दुनियारे तरीके पुड़ न चला, पन परमेशर तुशशी सोच बदलेरे जिरिये सेइं तुशशो चालचलन भी बेदलोए, ताके तुस जानथ कि परमेशर तुसन करां कुन चाते, या जै रोड़ी ते जैन तैस पसंद एइते, ते सिद्ध आए।³ किजोकि अवं तैस परमेशरेरे अनुग्रहेरे वजाई सेइं जै मीं मैलो, तुसन मरां हर एक्की सेइं ज़ोताई, कि जेन्चरे समझोरू लोड़े, तैस करां कोई भी अपनो आप जादे न समझे, यानी कि जेतरो विश्वास परमेशरे तुसन दित्तोरुए तैसेरे मुताबिक अपने आपे समझा।⁴ किजोकि जेन्चरे इशशे एक्की जिसमे मां बड़े अंगन, ते सेभी अंगां केरू अक्कां जेरू कम नई।⁵ तेन्चरे अस जैना मसीह पुड़ विश्वास केरतम, अस भी तैसेरे जिसमेरे जेरे बने, ते अस तैसेरे अंग आम ते अस एक्की होरि सेइं जुड़ोरेम।⁶ ते जैखन कि तैस अनुग्रहेरे मुताबिक जै परमेशरे असन दित्तोरुए, असन अलग-अलग वरदाना मैलोरन। ते जैस भविष्यवैनरू वरदान मैलोरुए, तै विश्वासेरे मुताबिक भविष्यवाणी केरे।⁷ अगर सेवा केनेरू वरदान मैलेरुए, त होरि केरि सेवाई मां लगगोरु राए, अगर कोई शिखालने बालो भोए, त शिखालने मां लगगोरु राए।⁸ अगर तुशशू वरदान हिम्मत देने बालू भोए त तुसेईं हिम्मत देती लोड़े रावरी, अगर कोन्ची दान देनेरू वरदान मैलोरू भोए तैने खुल्ले दिले सेइं लोड़े दितोरू, अगर केन्ची अगवाई केनेबालोए, तै जोशे सेइं अगवाई केरे, ते जै दया केरे तै खुशी सेइं दया केरे।

⁹ तुशशो प्यार सच्चो भोए; बुरैई सेइं नफरत केरा; भलाई केने मां लगगोरु राथ।¹⁰ भाईचारेरे प्यारे सेइं एक्की होरि सेइं प्यार केरा; आदरी सेइं होरन एप्पू करां रोड़ो समझा।¹¹ मेहनत केने मां आलस न केरा; आत्मिक जोशे सेइं भेरोरे राथ; पूरे दिले सेइं प्रभुएरी सेवा केरते राथ।¹² जै उमीद तुसन आए तैस मां मघन राथ; मुसीबती मां मजबूत राथ; प्रार्थना केने मां लगातार लगगोरु राथ।¹³ परमेशरेरे लोकन जैन किछ ज़रूरी भोए, तैस मां तैन केरि मद्दत केरा; मेहमानां केरि आदर केरते राथ।

¹⁴ अपने सताने बालन बरकत देथ; बरकत देथ फिटकार न देथ।¹⁵ आनन्द केनेबालन सेइं साथी आनन्द केरा, ते लेरां देने बालन सेइं साथी लेरां देथ।¹⁶ एप्पू मांमेइं मेल मलाप रखा; घमण्ड न केरा; गरीब लोकन सेइं साथी साथ रखा; इन न समझा कि तुस बड़े अक्लमन्द आथ।¹⁷ बुरैइयरे बदले केन्ची सेइं बुराई न केरा; ध्यान देथ ते तैने केरा जैन गल्लां सेभी केरि नजरी मां रोड़िन।¹⁸ जेतरू भोइ सकते, सेभी मैनन सेइं साथी मेल मलाप रखा।¹⁹ हे ट्लारव अपनो बदलो न नेथ; पन परमेशरे तुशशे लेइ बदलो नेने देथ, किजोकि पवित्रशास्त्रे मां प्रभु ज़ोते, “बदलो नेनो मेरू कम्मे, ते अक्वे बदलो देइलो।”²⁰ पन पवित्रशास्त्र ज़ोते

“अगर तेरो दुश्मन ढलुखोरु त तैस रोट्टी खूवा;
अगर ट्लिशोरु भोए, त तैस पानी पीया;
किजोकि एरू केने सेइं तू तैस शरमिन्दो केरतस।”
²¹ बुरैई करां न हारा पन बुराई भलैई सेइं जीतां।

13

???????? ???? ???? ?

¹ हर कोई मैन्हु प्रधान अधिकारी केरे अधीन राए; किजोकि कोई अधिकार एरो नई, जै परमेशरेरे तरफां न भोए; ते जैना अधिकारी आन, तैना परमेशरे ठहरावरेन।² एल्हेरेलेइ जै कोई अधिकारी केरि खलाफत केरते, तै परमेशरेरे कानूनेरी खलाफत केरते, ते जैना लोक परमेशरेरे कानूनेरी खलाफत केरतन तैन सज़ा मैल्लनीए।³ किजोकि हेरा हाकिम तैस मैन्हु जै भलाई केरते तैस न डराए, पन तैस मैन्हु डराते जै बुरू कम केरते। अगर तुस हाकिमे करां डरनू न चाथ त भलाई केरते राथ ते तुसन हाकिमे करां शाबाश मैलेली⁴ हाकिम परमेशरेरो सेवके ते तेरू भलू केनेरे लेइ आए, पन अगर तू बुराई केरस, त तू डर, किजोकि तैस कां तलवार बेफैइदी नई, ते तै परमेशरेरो सेवके; जै बुरू कम केनेबाले पुड़ कोप आनते।⁵ एल्हेरेलेइ हाकिमेरे लेइ तुशशू समर्पण ज़रूरी आए न सिर्फ परमेशरेरे सज़ारे वजाई सेइं बल्के तुशशे अपने ज़मीरेरे वजाई सेइं।⁶ एल्हेरेलेइ धड़त भी देतथ, किजोकि हकोमत केनेबाले परमेशरेरे सेवकन, ते सदा एस्से कम्मे मां लगगोरु रातन।⁷ एल्हेरेलेइ हर केन्चेरू हक देथ, जेसेरी धड़त बनतीए तैस धड़त देथ; जेसेरी चुंगी बनतीए तैस चुंगी देथ; जेसेरी इज्जत ते आदर केरी लोड़े तैसेरी इज्जत ते आदर केरा।

?????? ???? ???? ?

⁸ एप्पू मांमेइं प्यारेरे अलावा ते केन्ची गल्ली मां कोन्ची चीजरे कर्जदार न राथ; किजोकि जै होरन सेइं प्यार केरते, तैने परमेशरेरे दित्तोरे कानूनेरे हुकम पूरे किये।⁹ किजोकि मूसेरे कानूने मां बड़े हुकम दित्तोरेन जेन्चरे कि

“बदमाशी न केर, कल्ल न केर, चोरी न केरा, लालच न केर,” ते एन केरे अलावा होरो कोई भी हुक्म भोए त तैन सैरी केरि बुनीयाद इस्से गल्ली मांए, “अपने पड़ोसी सेइं अपने बराबर प्यार केर ।” 10 प्यार पड़ोसेरी किछ भी बुराई न केरे, एल्हेरेलेइ जै प्यार केरते तै परमेशेरो दित्तोरो कानून पूरे केरते ।

11 एल्हेरेलेइ वक्त पिशैनतां इन केरा । तुशे लेइ निडली मरां बींझनेरो वक्त ओरोए, किजोकि जैस वक्ते असेई विश्वास कियोरो थियो, तैस वक्तेरे खियाले सेइं हुनी इशशी मुक्ति नेडीए । 12 इस बुरे दुनियाई मां रानेरो इशशो वक्त लगभग खतम भोरोए, जेन्चरे रात ट्लेकडोने बालीए, ते लौ भोने बाली आए ते मसीहेरो वापस एजनेरो वक्त नेडे ओरोए, एल्हेरेलेइ असां तैना कम्मां शारम जैना लोक आंधरे मां केरतन ते तैना हथियार बंधम जैना लोई मां इस्तेमाल भोतन । 13 एल्हेरेलेइ अस भी तैन लोकां केरो जेरो बर्ताव केरम, जैना लोई मां जिन्दगी जीतन न कि आंधरे मां, न कि नचने, नशो केरने, न बदमाशी केरने मां, ते लुचपने, लडैई, ते जलनी मां मसत भोम 14 बल्के जेन्चरे प्रभु यीशु मसीहे जीवं तेन्चरे तुस भी जीथ, ते जिसमेरी खुवैइशां पूरी केरनेरी कोशिश न केरा ।

14

???? ???? ???? ???? ?

1 जै विश्वासे मां कमजोरे, तैस तुस कबूल केरा, पन तैस कुन कियेरू लोडे ते कुन न लोडे कियेरू तैस पुड़ बेस केरनेरे लेइ नई । 2 किजोकि एक्की विश्वासे, कि सब किछ खानू जेइजे, पन जै विश्वासे मां कमजोरे, तै सिर्फ शागां खाते । 3 सब किछ खाने बालो तैस पुड़ दोष न लाए जै सब किछ न खाए, किजोकि परमेशेरे तैना दुइये कबूल कियोरेन । 4 तू कौन आस जै होरेरे नौकरे पुड़ दोष लातस? तैनी खरू कियू या बुरू इसेरो फैसलो तैसेरो मालिके केरेलो, बल्के तै कामयाब भोलो; किजोकि प्रभु तै इस काबल बनोरोए ।

5 एन्चरे किछ लोक एक्की दिहाड़ी होरि करां बेधतां मन्तन, ते किछ सब दिहाडे बराबर मन्तन, हर केन्ची इन याकीन कियेरू लोडे कि जैन तैना सोचतन तैन ठीके । 6 जै कोन्ची दिहाडे मन्ते, तै प्रभुए इज्जत देनेरे लेइ मन्ते । जै सब किछ खाते, तै भी प्रभुए इज्जत देनेरे लेइ खाते, किजोकि तै परमेशेरू शुकर केरते, ते जै सब किछ न खाए, प्रभुएरे लेइ न खाए ते परमेशेरू शुकर केरते । 7 किजोकि असन मरां कोई न अपने लेइ जीते, ते न कोई अपने लेइ मरते । 8 किजोकि अगर अस जीतेम त, प्रभुएरे लेइ जीतेम; ते अगर अस जीम या मरम, अस प्रभुएरेम । 9 किजोकि मसीह एल्हेरेलेइ मरो ते जीतो भी भोव, ताके मररे ते जीतां दुइयां केरो प्रभु भोए ।

10 तू अपने विश्वासी द्लाए पुड़ किजो दोष लातस? या तू फिरी किजो अपने विश्वासी द्लाए घटिया समझतस? अस सब परमेशेरे आदालतरे तखतेरे सामने खडे भोनेम । 11 जेन्चरे पवित्रशास्त्रे मां लिखोरूए, कि प्रभु ज़ोते, “अवं एप्पू तुसन सेइं वादो केरताई, हर कोई मीं कां जैधू टिकेलो, ते हर अक जिभ परमेशेरेरी इकरार केरेली ।”

12 ते असन मरां हर केन्ची अपने-अपने कम्मां केरो लेखो परमेशेरे देलो पेनोए ।

???? ???? ???? ???? ?

13 एल्हेरेलेइ अग्रोवं जो अस एक्की होरि पुड़ दोष न लाम, पन तुस एने थापा, कि कोई भी तुशे वजाई सेइं तुशो विश्वासी द्ला या बेइन पाप न केरे । 14 अवं जानताई, ते प्रभु यीशुएरे तरफां मीं पक्कू याकीन भोवं, कि कोई खानेरी चीज अपने आपे सेइं अशुद्ध नई, पन जै तैस अशुद्ध समझते, तैसेरेलेइ अशुद्ध आए । 15 अगर तेरो विश्वासी द्लाए या बेइन तेरे खाने सेइं दुःख पुजे ते तै अग्रोवं जो परमेशेरे पुड़ विश्वास केरनो शारे, त फिरी तू प्यारेरे रीति पुड़ न चलस, एरी चीजां न खा । जेसेरे लेइ मसीह मरो ते तू अपने खाने सेइं तैस नाश न केर । 16 एल्हेरेलेइ जैन कम तुशे लेइ रोडू आए ते जेइजे, तैसेरे बारे मां होरन तुहीन केरनेरो मौको न दे । 17 किजोकि परमेशेरे राज्जे मां खानू पीनू माईने न रख्के; माईने रखते धार्मिकतारी जिन्दगी जीनी ते मेल मलाप, ते आनन्द तै आए जै पवित्र आत्मा देते । 18 जै कोई इस रीति सेइं मसीहेरी सेवा केरते, तैस सेइं परमेशेरे खुश भोते, ते मैन्हु भी तैसेरे बारे मां रोडू ज़ोतन । 19 एल्हेरेलेइ असेई तैना कम्मां कियोरां लोडन जैन सेइं लोक मेल मिलापे सेइं रेइ बटन, ते एक्की होरि विश्वासे मां मजबूत केरम । 20 तुस जेरू खानू चातथ तैसेरे वजाई सेइं परमेशेरू कम न बगाडा । सब किछ शुद्ध त आए, पन तुशे खाने सेइं अगर होरो कोई मैन्हु परमेशेरे पुड़ विश्वास केरनो शारे त तैसेरेलेइ बुरू आए । 21 रोडू त इन्ने, कि तू न मास खास, ते न शराब पीस, जेसेरे वजाई सेइं तेरे द्ला या बेइन पाप

केरे। 22 तेरो इन चीजां केरे बारे मां जै विश्वासे, तै तेरे ते परमेशेरे दरमियाने मां आए, धने तैए, जै तैस गल्ली मां, जै तै ठीक समझे, अपने आपे दोषी न ठहराए। 23 पन जै शक केरतां खाते, तै सजारे काबल भोइ जेव, किजोकि तै विश्वासे सेइं न खाए, ते जैन किछ् केरस ते विश्वास केरस कि एन ठीक नई त तू पाप केरतस।

15

ॐॐॐॐ ॐॐॐॐ ॐॐॐॐॐॐ ॐॐॐॐ

1 एन्चरे अस जैना विश्वासे मां मजबूत आम, असेईं एन कियोरू लोडे कि जैना विश्वासे मां कमजोर आन तैन केरि मद्दत केरम; न कि अपनो आप खुश केरम। 2 असन मरां हर कोई अपने विश्वासी दलान ते बेइन्न खुश केरनेरे लेइ मद्दत केरे जैस सेइं तैन केरो विश्वास मजबूत भोए। 3 किजोकि मसीहे भी अपनो आप खुश न कियो, पन जेन्चरे पवित्त्रशास्त्रे मां लिखोरूए, “तेरे तुहीन केरनेबालोई मेरी भी तुहीन की।” 4 जेत्त्री गल्लां पेइली पवित्त्रशास्त्रे मां लिखोरिन, तैना इश्शे शिक्षारे लेइ लिखोरिन, कि अस सबरी ते पवित्त्रशास्त्रे करां हिम्मत हासिल केरम ताके असन उमीद भोए (परमेशर तैन्ने केरेलो जेसेरे बारे मां तैनी वादो कियोरोए)। 5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती चलते-चलते अक भोइतां ज़ीथ। 6 ते तुस सारे अकोट्टे भोइतां अक भोइतां एक्की आवाजी मां परमेशर, इश्शे प्रभु यीशु मसीहेरे बाजेरी बड़याई केरा।

ॐॐॐॐॐॐ ॐॐॐॐ ॐॐॐ ॐॐॐॐॐॐॐॐ

7 एल्हेरेलेइ, एक्की होरि कबूल केरा, जेन्चरे मसीहे तुस कबूल कियोरथ; एल्हेरेलेइ एन केरा ताके लोक परमेशेरी बड़याई केरन। 8 अवं ज़ोताई, कि जैना वादे दादन पड़दादन दित्तोरे थिये, तैना वादे पूरे केरनेरे लेइ ते इन बांदू केरनेरे लेइ कि परमेशर सच्चो, मसीह खतनो कियोर लोकां केरो (यानी यहूदी केरो) सेवक बनो। 9 ते गैर कौमां भी परमेशेरे दयारे वजाई सेइं परमेशेरी बड़याई केरन, जेन्चरे पवित्त्रशास्त्रे मां लिखोरूए,

“गैर कौमन मां अवं तेरू शुक्र केरेलो,
ते तेरे नव्वेरू भजन केरेलो।”

10 फिरी होरि ठैरी लिखोरूए,

“हे गैर कौमां केरे लोकव, परमेशेरे लोकन सेइं साथी आनन्द केरा।”

11 ते फिरी पवित्त्रशास्त्रे ज़ोते,

“हे गैर कौमां केरे लोकव, प्रभुएरी बड़याई केरा;

ते हे मुलखां-मुलखां केरे सब लोकव; तैसेरी बड़याई केरा।”

12 ते फिरी यशायाह नबी पवित्त्रशास्त्रे मां लिखोरूए;

“यिश्शेरू अक वंश निसेलू,

ते तै गैर कौमन पुड़ हकोमत केरेलो।

तैस पुड़ गैर कौमां उमीद रेखेली।”

13 अवं प्रार्थना केरताई परमेशर जै उमीदरो देनेबालोए तुसन तैस पुड़ विश्वास केरनेरे वजाई सेइं सब किसमेरे आनन्द ते शैनति सेइं भरे, कि पवित्त्र आत्मारी शेक्ति सेइं तुश्शी उमीद बद्धती गाए।

ॐॐॐॐॐॐ ॐॐॐॐ ॐॐॐॐॐॐॐ ॐॐॐ

14 हे मेरे दलाव ते बेइनव, अवं एप्पू भी तुश्शे बारे मां जानताई, कि तुस भी भलैई सेइं भरतथ, ते तुसेईं कुन कियेरू लोडे तुस रोडे चारे जानतथ ते एक्की होरि शिखेली बटतथ। 15 फिरी भी मीं जैखन कैखन याद करानेरे लेइ तुसन बडे दिलेरी सेइं लिखू, इन तैस अनुग्रहेरे वजाई सेइं भोवं, जै परमेशरे मीं दित्तोरूए। 16 कि अवं गैर कौमां केरे लेइ यीशु मसीहेरो सेवक भोइतां परमेशेरे खुशखेबारी सेवा याजकेरी जेरि केरि; जैस सेइं गैर कौमां केरे लोक परमेशेरे दानेरे रूपे मां दित्ते गाले, जैस सेइं तै खुश भोलो, जैना पवित्त्र आत्मा पवित्त्र बनोरन। 17 अवं यीशु मसीहेरे वजाई सेइं परमेशेरी सेवाई पुड़ घमण्ड केरि बटताई। 18 किजोकि तैन गल्लां केरे अलावा मीं होरि कोन्ची गल्लां केरे बारे मां ज़ोनेरी दिलेरी नई, जैना मसीहे गैर कौमन केरे लेइ वचन, ते कर्म, 19 ते निशान ते बडे-बडे कम्मां केरे शेक्ति सेइं, ते पवित्त्र आत्मारु शेक्तेरे ज़िरिये कियां, इडी तगर कि मीं यरूशलैम नगरे मरां देइतां च़ेवरे पासन इल्लुरिकुम इलाके तगर मसीहेरो खुशखेबारो पूरो-पूरो प्रचार कियो। 20 पन मेरे मनेरी उमंगे,

कि जैडी-जैडी यीशु मसीहेरी खुशखबरी प्रचार नई भोरो, तैडी खुशखबरी शुनेई; एरू न भोए होरेरे मुनीयादी पुड़ घर बनेइं। 21 पन जेन्चरे पवित्रशास्त्रे मां लिखोरूए, तेन्चरे भोए, “जैन तैसेरे बारे मां कधी नई ज़ोरू, तैना लालहे, ते जैनेई तैसेरे बारे मां नई शुनोरू तैना समझेले।”

२२ २२२२२२ २२२ २२२२२२२२ २२२२२२

22 एल्हेरेलेइ अवं तुसन कां एजनेरे लेइ बार-बार रुकोरो राव। 23 पन हुनी मीं इन इलाकन मां तैन लोकन खुशखबरी शुनेइतां अपनू कम पूरू कियूं, जैनेई मसीहेरे बारे मां न थियूं शुनोरू, ते मीं बड़े सालां केरि तुसन कां एजनेरी इच्छाए। 24 एल्हेरेलेइ जैखन अवं इसपानिया मुलखे मां गेइ त तुसन मेइं एइते गेइलो, किजोकि मीं उमीदे, कि तैस सफरे मां तुसन सेइं मिली, ते जैखन तुसन सेइं मिली त अवं खुश भोई, ते अवं चाताई तुस मेरे इसपानिया गानेरे सफरेरे लेइ मेरी मद्दत केरा। 25 पन हुनी त परमेशेरे लोकां केरि सेवा केरनेरे लेइ यरूशलेम नगरे गाताई। 26 किजोकि मकिदुनिया ते अखाया इलाकेरे केरे विश्वासी लोकन इन रोडू लग्गू, कि यरूशलेम नगरेरे परमेशेरे लोकां केरे लेइ जैना गरीब आन, किछ चन्दो केरन। 27 तैनेई एन खुशी सेइं कियूं, तैना यरूशलेम नगरेरे लोकां केरे कर्जदारन, यहूदी लोकेई गैर कौमरे लोकन परमेशेरे तरफां रोड़ी चीजां दिती, ते इन रोड़ी कि गैर कौमां केरे लोक इस दुनियारी रोड़ी चीजां यहूदन देन। 28 अवं पेइलो यरूशलेम नगरे जो चलोरोई ताके जै चन्दो अकोट्टो कियोरोए तैन देई, तैट्टां पत्ती अवं तुसन कां रोम नगरे मां एइतां इसपानिया मुलखे जो गेइलो। 29 ते अवं ज्ञानताई, कि जैखन तुसन कां एज्जेलो, त मेरे एजनेरे वजाई सेइं मसीह तुसन पूरे तरीके सेइं बरकत देलो।

30 ते हे ढलाव ते बेइनव, प्रभु यीशु मसीह पुड़ इश्शे विश्वासेरे वजाई सेइं ते पवित्र आत्मारें दित्तोरे प्यारेरे वजाई सेइं अवं तुसन कां बिनती केरताई, कि मीं सेइं साथी मेरे लेइ परमेशेरे कां लगातार प्रार्थना केरा। 31 कि अवं यहूदिया इलाकेरे गैर विश्वासी लोकन करां बन्नोरो रेई, परमेशेरे तैना लोक जैना यरूशलेम नगरे मां आन खुशी सेइं तै मद्दत कबूल केरन जै अवं तैन कां नेइलो। 32 ते अवं परमेशेरेरी मेर्जी सेइं आनन्दे कां एज्जी ते मीं तुसन साथी आराम मैल्ले। 33 अवं प्रार्थना केरताई, कि शान्ति देनेबालो परमेशर तुसन सेब्बन सेइं साथी भोए। आमीन।

16

११११ ११११११११

1 अवं तुसन सेइं फीबेरे बारे मां, जै इश्शी विश्वासी बेइने ते किखरया नगरेरे कलीसियारी सेवकाए, अवं चाताई तुस तैसेरी इज्जत केरा। 2 कि तुस जेन्चरे पवित्र लोकन सेइं कियेरू लोडे, तैस प्रभु मां कबूल केरा; ते जैस गल्ली मां तैस तुसन करां केन्चेरी मद्दतरी ज़रूरत भोए, तैसेरी मद्दत केरा; किजोकि तै भी बड़ां केरि मद्दत केरनेबाली बल्के मेरी भी मद्दत केरनेबाली भोरीए।

3 पिरस्किल्ला ते अक्विला जैना प्रभु यीशु मसीह मां मेरे मद्दगारन, नमस्कार। 4 तैनेई मेरे जान बन्नानेरे लेइ अपनि जान खतरे मां रखोरि थी। सिर्फ अवं ए नई, बल्के गैर कौमां केरि सैरी कलीसियां भी तैन केरू शुक्र केरतिन। 5 ते तैस कलीसिया भी नमस्कार जैना तैन केरे घरे मां अकोट्टी भोतीए। मेरे ट्लारे इपैनितुसे भी जै आसिया इलाकेरो मसीह पुड़ विश्वास केरनेबालो पेइलो विश्वासी ए, नमस्कार। 6 मरियम जैसां तुश्शे लेइ बड़ी मेहनत केरि, नमस्कार। 7 अन्दरुनीकुस ते यूनियासे जै मेरो कुटमेरोए, ते मीं सेइं साथी कैद भोरो थियो, ते प्रेरितन मां मुशूर, ते मीं करां पेइले मसीह मां थी, नमस्कार। 8 अम्पलियातुसे, जै प्रभु मां मेरो ट्लारोए, नमस्कार। 9 उरबानुसे, जै मसीह मां इश्शो मद्दतगार, ते मेरे ट्लारो इस्तखुसे नमस्कार। 10 अपिल्लेसे जै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बरे जो नमस्कार। 11 मेरे कुटमेरे हेरोदियोने नमस्कार। नरकिस्सुसेरे टब्बरे जैना लोक प्रभु मां आन, तैन नमस्कार। 12 त्रूफैना ते त्रूफोसा जैन कुआन्शेई प्रभु मां बड़ी मेहनत की, नमस्कार। ट्लारी मसीही बेइन पिरसिस जैसां प्रभु मां बड़ी मेहनत की नमस्कार। 13 रूफुसे जै प्रभु मां चुनोरोए, ते तैसेरी अम्मा जै मेरी अम्मारी जेरि ए, दुइयन नमस्कार। 14 असुंकिरतुस ते फिलगोन ते हिर्मास ते पत्रुबास ते हर्मास ते तैन केरे सैथी विश्वासी लोकन नमस्कार। 15 फिलुलुगुस ते यूलिया ते नेर्युस ते तैसेरी बेइन, ते उलुम्पास ते तैन केरे साथी सब परमेशेरे लोकन नमस्कार। 16 मसीहेरे प्यारे सेइं एक्की होरि जो नमस्कार केरा। तुसन भी मसीहेरे सैरी कलीसियारे तरफां नमस्कार।

????? ????????

17 हुनी हे ढ्लाव ते बेइनव, अवं तुसन कां बिनती केरताई, कि जैना लोक तैस शिक्षारे खलाफ जै तुसन मांए, खलबली बनातन, ते ठोकर खानेरी वजा भोतन, तैन करां खबरदार राथ; ते तैन करां दूर राथ। 18 किजोकि एरे लोक इशशे प्रभु यीशु मसीहेरी नई, पन अपने फैइदेरे लेइ सेवा केरतन; ते तैना रोड़ी-रोड़ी गल्लां केरतन ते चापलूसी सेइं सिधे सादे लोकन धोखो देतन। 19 तुशशे हुकम मन्नेरे बारे मां सेभी लोकन पतो चलोरोए; एल्हेरेलेइ अवं तुशशे बारे मां आनन्द केरताई; पन अवं इन चाताई, कि तुस भलाई केरनेरे लेइ अक्लमन्द बना, पन बुराई केरनेरे लेइ सादे बना। 20 शान्ति देनेबालो परमेशर शैताने जल्दी तुशशे पवन सेइं इलेन्नालो। इशशे प्रभु यीशु मसीहेरो अनुग्रह तुसन पुड़ भोतो राए।

21 तीमुथियुस जै मीं सेइं साथी कम केरते, ते लूकियुस ते यासोन ते सोसिपत्रूस मेरे कुटुमबी केरे तरफां तुसन नमस्कार। 22 मेरे चिट्ठी लिखने बाले तिरतियुसेरू प्रभु मां तुसन नमस्कार। 23 गयुस भी तुसन नमस्कार जोते जेसेरे घरे मां अवं राताई, तैड़ी कलीसियारे लोक अकोट्टे भोतन। इरास्तुस जै नगरेरो भण्डारीए, ते ढ्ला क्वारतुसेरू तुसन नमस्कार। 24 अवं प्रार्थना केरताई, इशशे प्रभु यीशु मसीहेरो अनुग्रह तुसन पुड़ भोतो राए। आमीन।

????? ????????

25 हुनी तुसन जै खुशखबरी मीं प्रचार की, मतलब यीशु मसीहेरे प्रचारेरे मुताबिक विश्वासे मां मजबूत केरि बटते, तैस भेदेरे प्रकाशेरे मुताबिक जै बड़े पेइलो देंतो छप्पोरो राव। 26 पन हुनी बांदो भोइतां सनातन परमेशेरे हुकमे सेइं नेवी केरे किताबां केरे जिरिये सेभी कौमन जोवरोए, कि तैना विश्वासेरे जिरिये सेइं हुकम मन्नेबाले भोइ गान। 27 तैस्से एक्की बड़े अक्लमन्द परमेशेरेरी यीशु मसीहेरे जिरिये सदा महिमा भोती राए। आमीन।

1 कुरिन्थियों

????????

1 अवं पौलुस ई चिट्ठी लिखने लोरोई । अवं, यीशु मसीहेरो प्रेरित भोनेरे लेइ परमेशेरे मेर्जी सेइं कुजावरोई । मेरो विश्वासी साथी सोस्थिनेस भी मीं सेइं साथी आए (जै मेरी मद्दत करने लोरोए) । 2 तुस जैना कुरिन्थुस नगरेरे कलीसियारे विश्वासी आथ, परमेशेरे तुस यीशु मसीह मां अपने लोकां केरे रूपे मां अलग कियोरेथ, ते कने पवित्र भोनेरे लेइ कुजोरेथ । तैन सेम्भी केरां नंवे जैना हर टैरी इश्शे त कने अपने प्रभु यीशुएरे नंवे सेइं प्रार्थना केरतन ।

3 इश्शे बाजी परमेश, ते प्रभु यीशु मसीहेरे तरफां तुसन अनुग्रह ते शान्ति मैलती राए ।

????? ???? ?????????

4 अवं तुश्शे बारे मां अपने परमेशेरू हर वक्त शुक्र केरताई, एल्हेरेलेइ कि परमेशेरो ई अनुग्रह तुसन पुइ यीशु मसीह मां भोव । 5 किजोकि तुसेईं हर लिहाजे सेइं बेड़ि बरकतां हासिल कियोरिन, किजोकि तुस मसीह सेइं साथी अक आथ । एल्हेरेलेइ तैने तुसन अपनू वचन ज़ोनेरी ते समझनेरी खास काबलीत दित्तोरीए । 6 एन्चरे परमेशेरे तुश्शे लेइ पक्कू कियूं, कि मसीहेरे बारे मां सन्देश सच्चे । 7 हुनी तुसन कां सारां आत्मिक वरदानां आन, किजोकि तुस इश्शो प्रभु यीशु मसीह बांदो भोनेरे बड़े इतजारे मां आथ । 8 परमेशर तुसन आखरी तगर विश्वासे मां मज़बूत भी केरेलो, कि तुस इश्शे प्रभु यीशु मसीहेरे वापस एजनेरे दिहाड़े बेइलजाम भोथ । 9 परमेशर एन्चरे केरेलो, किजोकि ज़ैन किछ तै ज़ोते, तैस केरनेरे मां तै वफादारे । ते तैन्ने तुस अपने मट्ठे इश्शे प्रभु यीशु मसीहेरे संगती मां कुजावरेथ ।

?????????? ???? ?????

10 हे ढूलाव ते बेइनव, अवं इश्शो प्रभु यीशु मसीहेरे अधिकारे सेइं इन केरनेरी विनती केरताई, कि सब एक्की होरि सेइं राजामंद भोथ; ते तुसन मां फिरके न भोन, पन अक मन भोथ, ते अक्के खियाल रखवा । 11 किजोकि हे मेरे ढूलाव ते बेइनव, खलोएरे टब्बेरे लोकेईं मीं तुश्शे बारे मां ज़ोवरूए, कि तुसन मां लड़ाई लोरिन भोने । 12 मेरू ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसेरो,” कोई “कैफारो,” कोई “मसीहेरो ज़ोते ।” 13 ज़ैन तुस केरतथ तैन ठीक नई, कुन मसीह बेनटोव? कुन पौलुस क़रूसे पुइ चाढो जेव? या तुसन पौलुसेरे नंवे पुइ बपतिस्मो मैलो? 14 अवं परमेशेरू शुक्र केरताई, कि किरस्पुस ते गयुसेरू अलावा, मीं तुसन मरां केन्ची बपतिस्मो नई दित्तोरो । 15 कि एरू न भोए, कोई ज़ोए, कि तुसन मेरे चले बन्नेरे लेइ बपतिस्मो मैलो । 16 हाँ मीं याद आऊं, मीं स्तिफनासेरे टब्बेरे भी बपतिस्मो दित्तो; एन केरे अलावा, अवं न ज़ैनी कि मीं होरि केन्ची बपतिस्मो दित्तो । 17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेजोरोई, ज़ैखन अवं लोकन परमेशेरो सन्देश शुनाताई त अवं मैन्हु केरे चलाक खियालां केरो इस्तेमाल न केरि, एरू न भोए कि मसीहेरू क़रूस बेफैइदू भोए ।

????? ?????????????? ??????? ?? ??????? ??

18 किजोकि क़रूसेरी कथा नाश भोने भालां केरे लेइ बेवकूफीए, पन असन मुक्ति मैलने बालां केरे लेइ परमेशेरी शक्ति आए । 19 किजोकि पवित्रशास्त्रे मां परमेशर ज़ोते, “अवं इन हिरेइलो दुनियारे लोकां केरे खियालन कि तैना सोचतन कि तैना ज्ञानी आन, हकीकति मां तैना बेकार खियाल आन ।

अवं साबत केरेलो कि तैना अक्लमन्द नई ।”

20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारो लोकां केरे बारे मां कुन ज़ोम ज़ैना ज़ोने मां चलाकन? परमेशेरे तैना सारे बेवकूफ बनाए ते तैन केरि अक्ल बेफैइदी बकवास साबत की 21 किजोकि ज़ैखन परमेशेरे ज्ञानेरे मुताबिक दुनियां ज्ञान सेइं परमेशर न ज़ानो, त परमेशेरे इन रोडू लगू, इस प्रचारेरे बेवकूफेरे मुताबिक विश्वास केरनेबालन मुक्ति दे । 22 यहूदी त निशान चातन, ते गैर कौमां ज्ञानेरे तोपी मां आन । 23 पन अस त तैस क़रूसे पुइ चाढोरे मसीहेरो प्रचार केरतम ज़ै यहूदी केरे लेइ ठोकरारी वजाए, ते गैर कौमां केरे लेइ बेवकूफीए । 24 पन ज़ैना परमेशेरे (अपने लोक भोनेरे

लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेशेरी शक्ति, ते परमेशेरू ज्ञाने। ²⁵ किजोकि परमेशेरी बेवकूफी मैन्हु केरे ज्ञाने करां जादे ज्ञान बालीए; ते परमेशेरी कमजोरी मैन्हु केरे शेक्ति करां जादे ज़ोरे बालीए।

²⁶ हे ढ्लाव ते बेइनव, इस बारे मां सोचा ज़ेइस परमेशेरे तुस कुजाए तुस केरे थिये, कि न जिसमेरे मुताबिक बड़े ज्ञानी, ते न बेड़ि शेक्तिबाले, ते न इज्जतदार घरेरे कुजाए। ²⁷ ज्ञाने बालन शरमिन्दा केरनेरे लेइ परमेशेरे तैना चुने ज़ैना दुनियारे नज़री मां बेवकूफन। ते ताकतवरन शरमिन्दा केरनेरे लेइ परमेशेरे तैना चुने ज़ैना दुनियारे नज़री मां कमजोरन। ²⁸ परमेशेरे तैना चुने ज़ैना दुनियारी नज़री मां नीच ते घटिया आन, बल्के ज़ैना अथ्थी भी नई तैना भी चुने, कि तैन ज़ैना आन, बेकार केरन। ²⁹ परमेशेरे एन केरू ताके कोई प्राणी परमेशेरेरे सामने घमण्ड न केरि सके। ³⁰ पन परमेशेरे तुस यीशु मसीह सेइं अक कियोरेथ, ते मसीहेरे ज़िरिये तैने अपनू ज्ञान दित्तोरूए। परमेशेर अपने नज़री मां असन धर्मी भी बनाते। मसीहेरे ज़िरिये अस पवित्तर किये जे, ते तै असन इश्शे पापन करां आज़ाद केरते। ³¹ ताके ज़ेन्चरे पवित्तरशास्त्रे मां लिखोरए, तेन्चरे भोए, “कि ज़ै घमण्ड केरे तै तैस पुड़ घमण्ड केरे ज़ैन प्रभुए कियोरूए।”

2

?????? ???? ?????????? ?????????? ??????????

¹ हे ढ्लाव ते बेइनव, ज़ैखन मीं तुसन परमेशेरेरे बारे मां सन्देश शुनव, त मीं बेड़ि गल्लां इस्तेमाल न की, कि अवं अपने आपे ज्ञानी हिरेईं। ² किजोकि मीं इन थापेरू थियूं, कि तुसन मां यीशु मसीह, बल्के क़रूसे पुड़ चाढ़ोरे मसीहेरे अलावा होरि कोई गल न केरि। ³ ते कमजोरी ते डरे सेइं तुसन सेइं साथी, ते बड़ो थरकतो तुसन सेइं साथी राव। ⁴ ते मेरे शिक्षाई, ते मेरे प्रचारे मां ज्ञानेरी लालचानेरी बैली गल्लां न थी; पन पवित्तर आत्मा शेक्ति सेइं इन हिराव कि ज़ै सन्देश मीं शुनव तै सन्न थियो। ⁵ एल्हेरेलेइ की तुश्शो विश्वास मैन्हु केरे ज्ञाने सेइं नई, पन परमेशेरेरे शेक्ति पुड़ निर्भर भोए।

????????????? ????????

⁶ फिरी भी अवं आत्मिक सिद्ध लोकन ज्ञानेरो सन्देश शुनाताई, पन इस दुनियारे लोकां केरो नई, ते इस दुनियारे हाकिमां केरू नई ज़ैना नाश भोनेन। ⁷ पन अस परमेशेरेरू तैन छुपोरू ज्ञान भेदेरे रीति पुड़ ज़ोतम, ज़ैन परमेशेरे दुनिया बनाने करां पेइलू इश्शे महिमारे लेइ ठहराव। ⁸ परमेशेरेरो ई मकसद इस दुनियारे हाकिमन मरां केन्चे भी न समझो, किजोकि अगर समझते भोथे, त महिमा बालो प्रभु क़रूसे पुड़ न चाढ़ेथे। ⁹ पन ज़ेन्चरे पवित्तरशास्त्रेरे मां लिखोरूए,

“कि ज़ैन न एछ्छेईं लाव,

न कन्नेईं शुनू,

ते ज़ैना गल्लां मैन्हु केरे दिले मां न एईं,

तैना सब परमेशेरे तैन केरे लेइ तियार की, ज़ैना तैस सेइं प्यार केरतन।”

¹⁰ पन परमेशेरे पवित्तर आत्मा ज़िरिये सेइं असन पुड़ बांदू कियूं; किजोकि पवित्तर आत्मा सब गल्लां, बल्के परमेशेरेरी डुगी गल्लां ज्ञानते। ¹¹ मैनन् मरां कौन केसेरी गल्लां ज्ञानते, सिर्फ मैनेरी आत्मा ज़ै तैस मांए, तेन्चरे परमेशेरेरी गल्लां भी कोई न ज्ञाने, सिर्फ परमेशेरेरो आत्मा। ¹² पन असन दुनियारी आत्मा नई, पन तै आत्मा मैलोरोए, ज़ै परमेशेरेरे तरफांए, कि आस तैन गल्लन समझम, ज़ैना परमेशेरे असन दित्तोरिन। ¹³ एल्हेरेलेइ अस मैन्हु केरे ज्ञानेरी शिखेलोरी गल्लन मरां नई, पन पवित्तर आत्मा शिखेलोरी गल्लन मरां आत्मिक गल्लां आत्मिक ज्ञाने सेइं समझातम। ¹⁴ पन जिसमानी मैन्हु परमेशेरेरे आत्मा सन्नचाई कबूल न केरे, किजोकि तैसेरेलेइ तै बेवकूफीए, ते न तै तैन समझी सके, किजोकि तैना सिर्फ पवित्तर आत्मा ज़िरिये समझी गैतिन। ¹⁵ पन ज़ैन लोकन पवित्तर आत्मा मैलोरो तैना, तैन सैरी गल्लन परखतन ज़ैना पवित्तर आत्मा शिखालते। पन ज़ैन लोकन पवित्तर आत्मा नई मैलोरो तैना, तैन न सेझी बटन ज़ैन पवित्तर आत्मा मैलोरोए। ¹⁶ इन सन्न आए, किजोकि पवित्तरशास्त्र ज़ोते,

“कोई न ज्ञाने प्रभुएरे मने मां कुने।”

पन पवित्तर आत्मा असन विश्वासी लोकन मसीहेरो मने दित्तोरूए।

3

???????? ???? ???????

1 हे दूलाव ते बेइनव, जैखन अवं तुसन कां थियो त तुसन सेइं एन्चरे सब गल्लां न केरि बटो, जेन्चरे आत्मिक लोकन सेइं; पन जेन्चरे तैन सेइं जैना मसीह मां बच्चेन। 2 मीं तुसन परमेशरे वचने मरां सिर्फ बुनियादी गल्लां केरि शिक्षा दिती ते डुग्घी सच्चाई नई। किजोकि तैस वक्ते तुस तै शिक्षा हासिल केरनेरे ते समझनेरे काबल न थिये, बल्के हेजू भी हासिल केरनेरे काबल नई। 3 किजोकि हेजू तगर भी गैर विश्वासी केरे जेरे आथ। एल्हेरेलेइ कि जैखन तुसन मां बैर, ते लड़ाइयन, त कुन तुस गैर विश्वासी केरे जेरे न भोए? तुस एरे लोकां केरि जेरि जिन्दगी जीने लोरेथ, जैन केरो रिश्तो प्रभु सेइं न भोए। 4 एल्हेरेलेइ अक ज़ोते, “अवं पौलुसेरोई,” ते होरो ज़ोते, “अवं अपुल्लोसेरो आई,” त कुन तुस एरे लोकां केरि जेरि जिन्दगी जीने बाले न भोए, जैन केरो रिश्तो प्रभु सेइं न भोए!

5 अपुल्लोस कौने? ते पौलुस कौने? सिर्फ सेवक, जैन केरे जिरिये तुसेईं प्रभु पुड़ विश्वास कियो, असन मरां हर केन्चे कम कियू जेन्चरे परमेशरे केरनेरे लेइ दित्तू। 6 अगर अवं तुशशी तुलना ऊडारे सेइं केरि त मीं बीज बेवं, अपुल्लोसे सग्गू, पन परमेशरे बडावं। 7 एल्हेरेलेइ न त लानेबालो किछे, ते न सग्गने बालो किछे, पन परमेशर जै बडाने बालोए। 8 लानेबालो ते सग्गने बालो दुइये अक्कन; पन हर मैन्हु अपने-अपने मज्दूरारो फल मैलनोए। 9 किजोकि अस परमेशरे सेइं साथी कम केरनेबाले आम, तुस एरे ऊडारां केरे जेरे आथ जैन केरो तलक परमेशरे सेइं आए, ते इसेरे आलाव तुशशी तुलना एरे घरे सेइं केरताई जैन परमेशरे बनावरूए। 10 परमेशरे जैन कम मीं केरनेरे लेइ दितोरू थियू, मीं तैन अक्लमन्दी सेइं कियू; अवं माहिर मिसरेरो जेरो आई, मीं तुशशे नगरे मां खुशखबरी प्रचार की ते शुरु मां तुसन यीशु पुड़ विश्वास केरनेरे लेइ मद्दत की, तैटटां बाद जैस कम्मेरी शुरुआत मीं कियोरी थी, होरे मसीही सेवा केरनेबाले तैस बुनियादी पुड़ लगातार कम केरते राए। पन असन मरां हर एक्की कम केरनेबाले ध्याने सेइं सोचोरू लोडे, कि असेईं परमेशरू कम केन्चरे लोडे कियोरू। 11 किजोकि यीशु मसीह सच्ची बुनियाद आए, ते होरो कोई होरि बुनियाद न बनेइ सके, तैन इन आए, कोई तुसन मुक्ति हासिल केरनेरे लेइ नव्वीं शिक्षा न शिखेली बटे, मीं तुसन सेइं पेइलू ज़ोवरू कि परमेशर असन यीशु मसीहेरे जिरिये मुक्ति देते। 12 ते अगर कोई इस मुनीयादी पुड़ सोन्नू चाँदी या कीमती घोड़ या कैडु या घास फूसरो रद्दो रखते। 13 जैखन मसीह फिरी वापस एज्जेलो, त अग हर एक्केरे कम्मे परखेली, ते अग हर मैनेरे कम्मेरी कीमत हिराली। 14 जेसेरू कम तैस अग्गी सेइं न फुकोलू, तैस मज्दूरी मैलनीए। 15 ते अगर केन्चेरू कम फुकोलू, त तैस नुकसान भोलो; पन तै एप्पू बच्चनोए पन फुकोते-फुकोते।

16 कुन तुस न ज्ञानथ, कि तुस परमेशररू मन्दरथ, ते परमेशरेरो आत्मा तुसन मां रहते? 17 अगर कोई तुसन नुकसान पुजाए, त परमेशर तैस नाश केरेलो; किजोकि परमेशररू मन्दर पवित्रे, ते तैन तुस आथ।

18 कोई अपने आपे धोखो न दे, अगर तुसन मरां कोई इस दुनियारे लोकन मां अपनो आप अक्लमन्द समझे, त तैस दुनियारी नज़री मां बेवकूफ बनोरू लोडे; ताके परमेशरेरे नज़री मां सच्चे ज्ञानी बने। 19 किजोकि इस दुनियारी अक्ल परमेशरे कां बेवकूफीए, जेन्चरे पवित्त्रशास्त्रे मां लिखोरूए; “परमेशर जैन्न तैन केरे च़लैकी मां फसाते।”

20 ते फिरी पवित्त्रशास्त्र इन भी ज़ोते, “प्रभु जैनी केरे खियालन ज्ञानते कि बेफैइदेन।” 21 एल्हेरेलेइ कोई मैनन् पुड़ घमण्ड न केरे, किजोकि किछ परमेशरे तुशशू भलेरे लेइ दितोरूए। 22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन जीनू, कुन मरनू, कुन ई वक्त, कुन एजनेबालो वक्त, सब किछ तुशशूए। 23 ते तुस मसीहेरेथ, ते मसीह परमेशरेरोए।

4

???????????? ???? ???????

1 मैन्हु असन मसीहेरे सेवक, ते परमेशरेरे भेदां केरे भण्डारी समझन। 2 जेन्चरे कि जैस मैन्हु तैसेरे मालिके जैन कम दित्तोरे भोए, तैन तैन कम केरने मां वफादार लोडे रावरू, जेसेरो तैस हुक्म दित्तो जेवरोए। 3 पन मेरे खियाले मां ई गल निकड़ीए, कि तुस या मैनन् मरां कोई फैसलो केरनेबालो मीं परखे, बल्के अवं अपने आपे न परखी। 4 किजोकि मेरो ज़मीर मीं कोन्ची गल्ली मां दोषी न ठहराए, पन इस सेइं अवं बेइलज़ाम न ठहरी, किजोकि मेरो परखने बालो प्रभुए। 5 ते ज्ञातगर प्रभु वापस न एज्जे, पेइली केन्चेरो इन्साफ न केरा, तैए लोकां केरे सारे खियाल

साफ तरीके ज़ोलो, ज़ैन केरे बारे मां होरो कोई तैन न जाने, ते तैन केरे दिलां केरे इरादे बांदे केरेलो। तैखन परमेशेरी तरफां हर केन्चेरी तारीफ़ भोनीए।⁶ हे द्लाव ते बेइनव, मीं इन गल्लन मां तुशशे लेइ अपनि ते अपुल्लोसेरी बेंस, मिसालारे रीति पुड कियोरीए, एल्हेरेलेइ कि तुस इशशे ज़िरिये सेइं शिखा, कि ज़ैन पवित्रशास्त्रे मां लिखोरे करां अग्रोवं न बधा, ते एक्केरे पासे ते होरेरे खलाफ घमण्ड न केरथ।⁷ केन्चे तू होरन करां रोड़ो नई बनोरो। सब किछ् तीं परमेशेरे तरफां दिचू जोरूए, अगर तीं सब किछ् परमेशेरे दितोरू त तुसन घमण्ड केरनेरो अधिकार नई।

⁸ तुस त रज़ोरेथ; तुस दौलतमन्द भोइजेइ, तुसेईं इशशे बगैर राज़ कियूं; पन रोड़ू भोथू कि तुस राज़ केरेथे ते अस भी तुसन सेइं साथी भोथे! ⁹ मेरी समझी मां परमेशेरे अस प्रेरित लोक सेभना पत्ती तैन लोकां केरे ज़ेरे ठहरावरेम, ज़ैन केरे मौतरो हुकम भोइ जेवरोए; किजोकि अस दुनियारे ते स्वर्गदूतां, ते मैन्हु केरे लेइ अक तमाशो बनोरेम! ¹⁰ लोक असन बेवकूफ समझतन किजोकि अस मसीहेरे बारे मां प्रचार केरतम, पन तुस गेतली सेइं सोचतथ कि तुस अक्लमन्द मसीही आथ! बड़े लोक समझतन कि असन कां कोई अधिकार नई। पन तुस घमण्डे सेइं ज़ोतथ कि तुसन कां परमेशेरे तरफां शक्ति आए, तैना इशशी आदर न केरन पन तुशशी आदर केरतन। ¹¹ अस इस वक्ते तगर नियन्ने-टलिशोरे, ते छिनदोरे लिगड़न मां आम, ते धक्के खातम, ते असन कां घर नई; ¹² ते अपने हथेइं सेइं कम केरतां मेहनत केरतम। लोक बुरू ज़ोतन, अस तैन बरकत देतम; तैना सतातन, अस झैल्लतम। ¹³ तैना बदनाम केरतन, अस नेरमी सेइं गल केरतम, इड़ी तगर कि, अज़ तगर लोक हेजू भी इशशी इज्जत न केरन, तैना ज़ोतन कि इशशी कोई कीमत नई।

¹⁴ मेरी इना गल्लां लिखनेरो मकसद ई नई कि तुसन छिथेईं, पन अवं तुसन सुधारने चाताई, किजोकि तुस मेरे बच्चां केरे ज़ेरे आथ ज़ैन सेइं अवं प्यार केरताई। ¹⁵ किजोकि अगर मसीह मां तुशशे शिखालनेबाले दश हज़ार भी भोथे, फिरी भी तुशशे बड़े बाजी नई, एल्हेरेलेइ कि मसीह यीशु मां खुशखेबरी सेइं अवं तुशशो बाजी केरो ज़ेरो भोव। ¹⁶ एल्हेरेलेइ अवं तुसन कां मिनत केरताई, कि मेरी ज़ेरि चाल चला। ¹⁷ एल्हेरेलेइ मीं तीमुथियुसे ज़ैन प्रभु मां मेरू टलारू, ते वफादार मट्टूए, तुसन कां भेजोरूए, ते तै तुसन यीशु मसीह मां मेरू चालचलन याद करालो, ज़ेन्चरे कि अवं हर एक्की ठैरी हर कलीसिया मां शिक्षा देताई। ¹⁸ तुसन मरां बड़े लोक सोचतन कि अवं तुसन कां नई एजनो, एल्हेरेलेइ तैना घमण्ड केरतन। ¹⁹ पन प्रभु चाए त मीं तुसन कां जल्दी एजनूए, ते न सिर्फ तैन घमण्ड केरनेबालां केरि गल्लां नई, पन तैन केरि शेक्ति भी ज़ेनेलो। ²⁰ किजोकि परमेशेरेरू राज़ गल्लां केरू नई, पन शेक्ति मांए। ²¹ अगर हेजू भी तुसेईं बुरी बत नई शारोरी, अवं तुस सेखती सेइं झिड़क देइलो। पन अगर तुसेईं बुरी बत शारी त अवं तुसन सेइं नेरमी त कने प्यारे सेइं बर्ताव केरेलो।

5

¹ इड़ी तगर शुन्ने मां ओरूए, कि तुसन मां बदमाशी भोचे, मतलब एरी बदमाशी ज़ेरि गैर विश्वासी लोकन मां भी न भोए, कि अक मैन्हु अपने बेबानी-अम्मा रखते। ² तुसेईं त दुःख कियोरो लोड़तो थियो ते उदास भोरू लोड़तू थियूं, ते ज़ैनी मैने एरू कियूं तै कढोरो लोड़तो थियो, पन इसेरे बदले तुस घमण्ड केरतथ। ³ चाए अवं तुस सेइं साथी नई, पन मेरे विचार तुसन सेइं साथी आन, चाए अवं तैड़ी नई, फिरी भी मने मां इन आए, कि एरू कम केरनेबालेरे बारे मां फैसलो केरने लोरोई। ⁴ इन तैन आए ज़ैन केरनेरी ज़रूरत आए। हकीकति मां इशशे प्रभु यीशु मसीहेरो अधिकार तुसन कां आए, इन पिशैनतां विश्वासी केरे रूपां अकोट्टे भोथ। इन एरू आए कि अवं भी अपने मने मां तैड़ी आई। ते फिरी प्रभु यीशु मसीहेरे ज़िरिये। ⁵ तैस मैन्हु ज़ैने पापी बर्ताव कियोरो, तैस अपने टोली मरां कढा ते तैस मैन्हु शैतानेरे अधिकारे मां वापस देथ, इस उमीदी सेइं कि तै अपने पापन करां मन फिरालो। किजोकि अगर तै पापन करां मन फिरालो त तैस प्रभु यीशु मसीहेरे इन्साफेरे दिहाड़े मुक्ति मैलेली।

⁶ घमण्ड केरनू बंद केरा, कि तुस न ज़ानथ, कि थोड़ू ज़ेरू खमीर पूरे सन्नोरे अट्टे खमीर केरते। ⁷ परानू खमीर केढतां, अपनो आप साफ केरा, कि नंवू सनोरू अट्टू बना; ताके तुस अखमीरे राथ, किजोकि इशशो भी फ़सह ज़ै मसीहे, तै बलिदान भोरोए। ⁸ ते एज्जा अस तिहारे मां आनन्द मनाम, न पुराने खमीरे सेइं न बुरेई, ते दुष्टरे खमीरे सेइं, पन सिधीयैई, ते सचैइयरे बगैर खमीरेरे रोट्टी सेइं।

⁹ मीं अपने पेइले चिट्ठी मां लिखोरूए, कि बदमाशी केरनेबालां केरि संगती न केरथ। ¹⁰ इन नई, कि तुस बिलकुल इस दुनियारे बदमाशी केरनेबाले, या लालच केरनेबाले, या धोखो केरनेबालन, या मूरती पुजने बालां केरि संगती न केरा; किजोकि एन्चरे तुसेईं इस दुनियाई मरां निसनू पेथू। ¹¹ मेरू ज़ोनू त इन्ने, कि अगर कोई

अपने आपे विश्वासी ज़ोते, ते बदमाशी करनेबालो, या लालची, या मूरती पुजने बालो, या गैई देनेबालो, या पीने बालो, या धोखो करनेबालो भोए, त तैस सेइं साथ न रेखतथ, बल्के एरे मैन्हु सेइं साथी रोट्टी भी न खेइयथ । 12 ई मेरी ज़िमेबारी नई, कि ज़ैना लोक विश्वासी नई तैन केरि निन्दा केरि । पन हकीकति मां तुसेईं तैन लोकन सज़ा दित्तरी लोड़े ज़ैना तुश्शे कलीसियारे हिस्सो आन । 13 पन ज़ैना विश्वासी नई तैन केरो इन्साफ परमेशर केरते पन पवित्रशास्त्र ज़ोते, बुरू कम करनेबाले मैन्हु अपने टोली मां एजने न देथ ।

6

????? ?????????? ????????

1 अगर तुसन मरां केन्चरी होरि विश्वासी सेइं लड़ाई भोए, त तुसेईं फैसलेरे लेइ अधर्मी हाकिमन कां न लोड़े ज़ोवरू; तुसेईं अपने कलीसियारे विश्वासी लोकन ज़ोवरू लोड़े कि तैना तुश्शे मुकदमेरो फैसलो केरन कि कौन सही ते कौन गलते । 2 कुन तुस न ज़ानतथ, कि परमेशरेरे लोकेईं दुनियारे लोकां केरो इन्साफ केरेनोए? ते अगर तुसेईं दुनियारे लोकां केरो इन्साफ केरनोए, ते कुन तुस निकड़े करां निकड़े लड़ैइयरो फैसलो केरनेरी काबल नई? 3 तुस ज़ानतथ कि एजनेबाले वक्ते मां असेईं तैन स्वर्गदूतां केरो इन्साफ केरनोए ज़ैना स्वर्गे मरां शारोरे थिये, त पक्को तुस रोज़ेरी आम गल्लां केरो फैसलो केरि बटतथ । 4 अगर एरी गल्लां भोन, त तुसेईं तैन केरो फैसलो केरनेरे लेइ तैन कां न लोड़े जेवरी ज़ैन केरि आदर कलीसियारे लोकन मां न की गाए । 5 अवं तुसन छिथानेरे लेइ इन ज़ोताई, कि सच्चे तुसन मां अक भी अक्लमन्द न मैल्लो, ज़ै विश्वासी लोकां केरो फैसलो केरे । 6 बल्के विश्वासी लोकन एप्पू मांमेइं मुकदमे भोतन, ते तैना भी गैर विश्वासी लोकां केरे सामने ।

7 पन सच्चे तुसन मां बड़ो दोष त ईए, एप्पू मांमेइं मुकदमे केरतथ, बल्के बेइन्साफ किजो न झैल्लतथ? अपनो नुकसान किजो न झैल्लतथ? 8 बल्के बेइन्साफ केरतथ, ते नुकसान पुज़ातथ, ते तै भी विश्वासी लोकन । 9 कुन तुस न ज़ानतथ, कि बेइन्साफ लोक, परमेशरेरे राज़ेरे बारिस नई भोने? धोखो न खाथ, न वेश्यागामी, न मूरती केरि पूजा केरनेबाले, न आयाश, न लुच्चे, न तैना ज़ैना मड़द मड़दन सेइं जिसमानी रिशतो रखतन । 10 न चोर, न लालची, न पीने बाले, न गैई देनेबाले, न अंधेर केरनेबाले परमेशरेरे राज़ेरे बारिस भोनेन । 11 तुसन मरां पेइले किछ एरे थिये, पन प्रभु यीशु मसीहेरे नंवे ते इश्शे परमेशरेरी आत्माई सेइं तुश्शे पाप धोए जे, ते तुस पवित्र भोए ते धर्मी ठहराए ।

????? ?????????????? ?????????? ?????

12 तुसन मरां किछ ज़ोई बटतन, कि सब चीज़ां मेरे लेइ जेइज़ त आन, पन सब चीज़ां फैइदेरी नई, सब चीज़ां मेरे लेइ जेइज़ त आन, पन अवं कोन्ची भी चीज़रो गुलाम बेनेलो । 13 तुसन मरां किछ ज़ोई बटतन, खानू पेटेरे लेइए, ते पेट खानेरे लेइ, एन सच्चे, पन परमेशर रोट्टी भी ते पेटे भी नाश केरेलो, पन जिसम बदमाशी केरनेरे लेइ नई, बल्के प्रभुएरे लेइए; ते प्रभु जिसमेरे लेइए । 14 ते परमेशरे, प्रभु यीशु अपने शेक्ति सेइं ज़ीतो केरो, ते तै असन भी ज़ीतो केरेलो । 15 कुन तुस न ज़ानतथ, कि तुश्शी जाना मसीहेरे अंगन? ते कुन अवं मसीहेरे अंगन वेश्यारे अंगन सेइं शामिल केरि? नई, कधी नई । 16 कुन तुस न ज़ानतथ, कि ज़ै कोई वेश्याए सेइं न जेइज़ रिशतो रखते, तै तैस सेइं अक जान भोते? किजोकि पवित्रशास्त्र ज़ोते, “कि तैना दुइये अक जान भोलां ।” 17 ते ज़ै प्रभुएरी संगती मां रहते, तै तैस सेइं साथी अक आत्मा भोते । 18 बदमाशी केरने करां दूर राथ, जेत्ते होरे पाप मैन्हु केरते, तैना जानरे बेइरन, पन बदमाशी केरनेबालो अपने जानरे खलाफ पाप केरते । 19 कुन तुस न ज़ानतथ, कि तुश्शी जान पवित्र आत्मारू मन्दरे; ज़ै तुसन मां आए, ते तुसन परमेशरेरी तरफां मैलोरोए? ते तुस अपने नई पन तुस परमेशरेरे आथ; 20 किजोकि प्रभुए अपनि जानरी कीमत देइतां तुस घिनोरेथ, एल्हेरेलेइ अपने जानरे ज़िरिये सेइं परमेशरेरी आदर केरा ।

7

????????? ?????? ??? ?????

1 हुनी अवं तुश्शे तैन सवालां केरो जुवाब देताई, ज़ैना तुसेईं अपने चिट्ठी मां पुच्छे, तुसेईं पुच्छू, इन रोडू आए कि लोक इला न बनान? 2 हाँ इन ज़रूरी आए कि बदमाशी केरनेरे डरे सेइं हर मड़देरी कुआन्श, ते हर

कुआन्शरो मुन्श भोए। 3 मुन्श अपने कुआन्शरू हक पूरू केरे; ते तेन्त्रेरे कुआन्श भी अपने मुन्शेरू। 4 कुआन्शी अपने जिसमे पुड़ अधिकार नई, पन तैसेरे मनशेरो अधिकारे; तेन्त्रेरे मुन्शे भी अपने जिसमे पुड़ अधिकार नई, पन कुआन्शी। 5 तुस एक्की होरि करां अलग न भोथ; पन सिर्फ थोड़े चिरेरे लेइ बिस्तारे सेइं कि प्रार्थनारे लेइ फुर्सत मैल्ले, ते फिरी अकोट्टे भोथ, कि एरू न भोए, शैतान तुसन परखे। 6 पन जैन अवं इन ज़ोने लोरोई ई सुझावे, न कि हुक्म। 7 अवं इन चाताई, कि ज़ेरो अवं अडलाव आई, तेरेहे सब मैन्हु भोन; पन परमेशेरे किछन इला केरनू वरदान दित्तोरूए, ते किछन अकैल्लू रानेरू वरदान दितोरू।

8 मेरी सल्लाह अइलां ते विधवां केरे ई आए, कि तैना अडलाए रान, जेन्त्रेरे अवं आई। 9 पन अगर तैना अपनो आप कैबू न केरि बटन, त इला बनान, किजोकि इला बनानो इच्छान मां मसत राने करां रोड़ोए।

10 जैन केरो इला भोरोए, तैन केरे लेइ अवं नई, बल्के प्रभु हुक्म देते, कि कुआन्श अपने मुन्शे करां अलग न भोए। 11 (अगर अलग भोइ गाए, त होरो इला न बनाए; या अपने मुन्शे सेइं फिरी मेल मिलाप केरे) ते मुन्श अपने कुआन्शी न शारे।

12 होरन सेइं प्रभु नई, पन अवं ज़ोताई, अगर केन्ची विश्वासी ढूलाएरी कुआन्श विश्वासी न भोए, ते तै कुआन्श तैस साथी राने सेइं खुश भोए, त तै तैस न शारे। 13 ते जैस कुआन्शरो मुन्श विश्वासी न भोए, ते तै मैन्हु तैस साथी राने सेइं खुश भोए; तै मुन्शे न शारे। 14 किजोकि एरो मुन्श जै विश्वासी न भोए, परमेशर तैस सेइं एरो बर्ताव केरते जेन्त्रेरे अपने लोकन सेइं, किजोकि तैसेरी कुआन्श मसीही आए, ते एरी कुआन्श जै विश्वासी न भोए, परमेशर तैस सेइं एरो बर्ताव केरते जेन्त्रेरे अपने लोकन सेइं, किजोकि तैसेरो मुन्श मसीही आए। अगर एरू न भोथू कि विश्वास न केरनेबालो मुन्श या कुआन्श परमेशेरे लोक न भोथे, तैखन तुशे बच्चे भी परमेशेरे न भोथे। पन हुनी तुशे बच्चे भी परमेशेरे भोइ जे। 15 पन जै मड़द ते कुआन्श विश्वासी न भोए, अगर तैना अलग भोन, त अलग भोने देथ, एस हालती मां कोई विश्वासी ढूलाए या बेइन बन्धने मां नई। पन परमेशेरे अस कुजोरेम कि सुखे सेइं जीम। 16 हे कुआन्शव तुस इस गल्ली याद रखा कि तुशे मुन्श तुशे वजाई सेइं मुक्ति हासिल केरि बटन, ते हे मुन्शव तुस याद रखा कि तुशे वजाई सेइं तुशे कुआन्शां मुक्ति हासिल केरि बेटन।

~~~~~

17 जैन किछ अवं ज़ोने लोरोई तैसेरो नचोड़ ई आए: हर मैन्हु तैस हालती मां रावरो लोड़े जै प्रभुए तैस दित्तोरीए जेइस तैनी परमेशेरे कुजानू शुनू। अवं इन सेभी कलीसियान मां एन्त्रेरे ठहराताई। 18 अगर कोई मैन्हु जै खतनो कियोरे कुजोरो; त तै प्रभु यीशु पुड़ विश्वास केरते, तैस अपनो आप बगैर खतने बालो हिरानेरी ज़रूरत नई; ते अगर कोई मैन्हु जेसेरो खतनो नई भोरो, ते तै प्रभु यीशु पुड़ विश्वास केरते, तैस खतनो कराने ज़रूरत नई। 19 न खतनो किछ चीजे, ते न खतनो न करानो, बल्के परमेशेरे हुक्म मन्ने बड़े ज़रूरिन। 20 हर अक जैस हालती मां कुजावरोए, तेन्त्रेरे राए। 21 तू गुलाम थियो जेइस परमेशेरे कुजावरो थियो, फिरी भी परेशान न भोथ; पन अगर तू आज़ाद भोइ सकतस, त भो। 22 किजोकि जैना गुलामेरे हालती मां कुजोरेन, तैना प्रभु मां आज़ादन, तेन्त्रेरे जैना प्रभु मां आज़ाद कुजोरेन, तैना मसीहेरे गुलामन। 23 परमेशेरे तुस बड़ी कीमत देइतां घिनोरेथ, मैन्हु केरे गुलाम न बना, पन परमेशेरे गुलाम बना। 24 हे ढूलाव ते बेइनव, जै जैस हालती मां परमेशेरे कुजवरोए, तै तैस्से हालती मां परमेशेरे सेइं साथी राए।

~~~~~

25 कुवैरी केरे लेइ मीं प्रभु करां कोई हुक्म नई मैल्लेरो, पन प्रभुए दयाई सेइं मीं अक्ल दित्तोरीए, जैस पुड़ भरोसो कियो गाते, ते अवं ई सलाह देताई। 26 किजोकि इन दिहाड़न मां विश्वासी लोकां केरे लेइ बुरू गल्लां भोने लोरिन, एल्हेरेलेइ मीं लगते कि इन तुशे लेइ रोड़ूए, अवं ई सलाह देताई कि जैना ज़ेरे आन तैना एन्त्रेरे रान। 27 अगर तेरी कुआन्शे, त तू तैस करां अलग भोनेरी कोशिश न केर, ते अगर तेरी कुआन्श नई त तू कुआन्शी न तोप। 28 पन अगर तू इला भी केरस, त पाप नई; ते अगर कुवारी इलाई गाए त कोई पाप नई; पन एरे लोकन इस दुनियाई मां बड़ी परेशैनी भोली, ते अवं बचाने चाताई। 29 हे ढूलाव ते बेइनव, अवं इन ज़ोताई, इशशो इस दुनियाई मां जादे वक्त नई रावरो, एल्हेरेलेइ जादे फिकर न केरा कि तुशे कुआन्शां आन या नई, पन प्रभुएरी सेवारे बारे मां सोचते राथ। 30 ते तैना जैना लेरां देतन या जैना खुश आन, या जैना अपनि बनानेरे लेइ चीजन घिनतन, इन सेभी गल्लां केरे बारे मां जादे लोड़े सोचोरू (किजोकि इना सब गल्लां प्रभुएरी सेवा केरनि बिसरैली)। 31 तैना

जैना दुनियारी चीजां इस्तेमाल केरतन, तैनेई तैन सेइ लगाव न लोड़े रखोरो, किजोकि जेन्चरे अस ज्ञानतम ई दुनिया जल्दी खतम भोनेबालीए।

32 मेरी इच्छा ई आए कि तुस दुनियारे जिन्दगरी खुवाइशन करां आज्ञाद राथ, अइलाव मैन्हु प्रभुएरी सेवा केन्चरे केरनि ई फिक्र केरते कि प्रभुए खुश केरे। 33 पन इलावरो मैन्हु दुनियारी गल्लां केरि फिक्री मां रहते, कि केन्चरे अपने कुआन्शी खुश रखे। 34 तैने दूई चीजां केरे बारे मां सोचोरू लोड़े, अपनि कुआन्श खुश केरनेरे बारे मां ते प्रभु खुश केरनेरे बारे मां। इलावरी ते अइलाई मां भी फर्के, अइलाई प्रभुएरी फिक्री मां रहतीए, कि केन्चरे अपनि आत्मा, ते जिसम दुइये पवित्र रखे, पन इलावरी दुनियारे फिक्री मां रहतीए, कि अपने मुन्शे खुश रखे। 35 ई गल तुश्शे फैइदेरे लेइ ज़ोताई, न कि तुसन फसानेरे लेइ, बल्के एल्हेरेलेइ जेन्चरे लोड़े तेन्चरे कियूं गाए, ताके तुस अक मन भोइतां प्रभुएरी सेवाई मां लोगोरे राथ।

36 ते अगर कोई इन समझे कि, अवं एपनी तैस कुवैरारू हक लोरोई मारने जेसेरी जवानी लोरी ढलने, त जेन्चरे चाए तै केरे, इस मां पाप नई, तै तैसेरो इला भोने दे। 37 पन अगर जैने बाजी अपने मने मां पक्को फैसलो कियोरोए, कोन्ची होरेरे दबावेरे अलावा तै केरते, त तैस कां तै अधिकारे जैन तै केरनू चाते। ते अगर तै फैसलो केरते कि तैसेरी कुई जेरि आए तेरही रखे, तै परमेशेरी नज़री मां रोडू कम केरेलो। 38 जै अपनि कुवैरारो इला कराते, तै रोडू केरते, ते जै न कराए तै भी रोडू केरते।

39 जांतगर कोन्ची कुआन्शरो मुन्श ज़ीतो रहते, तांतगर तैस सेइ साथी रावरू लोड़े, पन जेइस तैसेरो मुन्श मेरि गाए, जैस सेइ चाए इला केरि बटतीए, सिर्फ विश्वासी लोकन मां। 40 पन अगर तै फिरी दुबारां इला न केरे, त मेरे खियाले मां बड़ी धने ते अवं समझताई, कि परमेशेरो आत्मा मीं च़लाने लोरीए।

8

????? ???? ???????????

1 तुसेई अपने चिट्ठी मां मूरतन कां च़ाढ़ोरी चीजां केरे बारे मां पुछोरू थियूं, इस बारे मां अस ज्ञानतम, पन ज्ञान असन अपने बारे मां घमण्डी बनाते, पन प्यार सेइ होरि केरि तरक्की भोतीए। 2 अगर कोई समझे, कि अवं किछ ज्ञानताई, ते जेरू ज्ञानेरू लोड़े तेरू हेजू तगर न ज्ञाने। 3 पन अगर कोई परमेशे सेइ प्यार केरते, ते तैस परमेशर पिशानते।

4 एल्हेरेलेइ अवं खानेरे बारे मां जुवाब देनो चाताई, अस मूरती केरे सामने बलिदान कियोरी चीजां केरे खानेरे बारे मां ज्ञानतम, कि अस ज्ञानतम कि मूरती सच्चो परमेशर नई, सिर्फ एक्के सच्चो परमेशेरे। 5-6 पन फिरी भी अम्बरे ते धेरतली पुड़ लोक बड़े देबते ते प्रभु ज़ोतन, पन इश्शे लेइ अक्के परमेशर, तै इश्शो बाजी आए। तैने सैरी चीजां बनेइ, अस तैसेरे ज़िरिये जीते रातम। एन्चरे असन कां अक्के प्रभुए ते तै प्रभु यीशु मसीहे। तैसेरे ज़िरिये सब किछ बनवं जेवं, अस तैसेरेलेइ जीतेम।

7 पन सेम्भी विश्वासी लोकन इसेरू ज्ञान नई; पन किछ लोक हेजू तगर मूरतन असली भोनेरी सोचनेरी आदते, एल्हेरेलेइ जैखन लोक मूरतन कां च़ाढ़तन, त तैना असली देबतन पूजा केरे रूपे मां सोचतन ते तैन केरो ज़मीर कमज़ोर भोइतां अशुद्ध भोइ गाते। 8 पन खानू असन परमेशेरे कां न पुजाए, अगर अस न खाम, त असन किछ नुकसान नई, ते अगर खाम त कोई फैइदो भी नई। 9 पन हुशार राथ, एरू न भोए, कि तुश्शी ई आज्ञादी कमज़ोर विश्वासे बालां केरे लेइ पाप केरनेरे लेइ वजा बने। 10 किजोकि अगर तीं ज़ैनी मन्दरे मां मूरतन कां च़ाढ़ोरू खातो लाए, ते तै विश्वासे मां कमज़ोर मैन्हु भोए, ते कुन तैसेरे ज़मीरे मां मूरती केरे सामने च़ेढ़ोरी चीजां केरे खानेरी दिलेरी न भोली। 11 एस रीति सेइ तेरे ज्ञानेरे वजाई सेइ तै विश्वासे मां कमज़ोर ढ़ला जेसेरे लेइ मसीह मरो तै मसीह पुड़ विश्वास केरनो न शारे। 12 एन्चरे तुस अपने विश्वासी लोकन ठोकर पुजेइतां न सिर्फ तैन केरे पापी भोए, बल्के मसीहेरे भी पापी भोले। 13 इस वजाई सेइ अगर खानू कोन्ची विश्वास केरनेबालेरे लेइ ठोकर भोए, ते अवं कोन्ची तरीके सेइ कधी मास न खेइलो, एरू न भोए कि मेरू खानू कोन्ची विश्वास केरनेबालेरे लेइ ठोकरारी वजा बने।

9

?????????????? ???? ???? ???? ??

1 अवं ज़ैन केरनू चाताई तैन केरनेरे लेइ आजाद आई। अवं अक प्रेरित आई, मीं प्रभु यीशु लावरोए ज़ै इशशो प्रभुए, ज़ैन कम मीं प्रभुएरे लेइ कियूं तुस तैसेरो नतीजोथ। 2 अगर होरे लोक इस गल्ली न मनन् कि अवं प्रभु यीशुएरो प्रेरित आई, त द्लाव तुसेई त लोडे मन्नोरू। किजोकि मीं ए तुसन कां खुशखबरी आनोरी थी। तुशशो प्रभु विश्वास इस गल्ली साफ करते कि अवं हकीकति मां तैसेरो प्रेरित आई।

3 ज़ैना लोक मेरे प्रेरित भोनेरे अधिकारे पुड़ सवाल पुच्छतन, तैन केरे लेइ मेरो ईए फैसलो आए। 4 कुन असन खाने पीनेरू हक नई? 5 कुन असन अधिकार नई, कि कोन्ची मसीही कुआन्शी सेइ इला बनाम, ज़ेन्चरे होरे प्रेरित, ते प्रभुएरे द्ला ते कैफा (यानी पतरस) केरतन? 6 या सिर्फ मीं ते बरनबासे जिन्दगी जीनेरे लेइ कम कियोरू लोडे? 7 को ज़ेरो फौजी अपनू खेइतां जंग करते? या कौन बाग लेइतां तैसेरो फल न खाए? कौन भैड्डां रेखतां तैन केरू दुद्ध न पीए?

8 अवं इना गल्लां मैन्हु केरि रीति पुड़ नई लोरो ज़ोने, मूसेरो कानून भी इन्ने ज़ोते। 9 एल्हेरेलेइ मूसेरो कानून ज़ोते, तैस मां इन लिखोरूए, “तुस खल्ले मां चलते बार दांतेरू आशी न बेंदथ।” कुन परमेशर दांतां केरि फिकर करते? नई। 10 या खास केरतां इशशे बारे मां लिखोरू, हाँ इशशे लेइ लिखोरूए, किजोकि ठीके कि जोट्लने बालो उमीदी सेइ जोट्ले, उपाने बालो उमीदी सेइ उपाए। 11 असेई तुसन परमेशेरो सन्देश शुनोवरोए। ज़ेन्चरे लोक बीज बतन तेन्चरे असेई तुसन मां परमेशेरे वचनेरू बीज बेव। एल्हेरेलेइ तुशशो फरजे कि इशशे रोज़ेरो खर्चो असन देथ। 12 ज़ां कि तुसेई होरि लोकां केरि मदत की, ज़ैनेई तुसन प्रचार कियो, त मेरू त कने बरनबासेरू जादे हके। किजोकि अस तुशशे पेइले प्रेरित आम, फिर भी असेई अपने ज़रूरतरे चीज़ां केरे लेइ ज़बरदस्ती न की, तैसेरे बदले अपने मेर्जी सेइ सब किछ झैल्लू कि मसीहेरे खुशखबरी पुड़ विश्वास केरनेरे लेइ केन्चरे लेइ रुकावट बनम।

13 कुन तुस न ज़ानथ कि ज़ै पवित् चिज़ां केरि सेवा करते; तै मन्दरे मरां खाते; ते ज़ै बलिदान केरनेरे ठारारी सेवा करते; तै बलिदान केरनेरे ठारी सेइ शामिल भोते। 14 एन्चरे प्रभुए ठहराव, कि ज़ैना लोक खुशखबरी शुनान, तैन केरि जिन्दगरो गुज़ारो भी तैन लोकन करां लोडे भोरो ज़ैना लोक खुशखबरी शुन्तन।

15 पन मीं इन अधिकारन मरां कोई भी इस्तेमाल न कियो। ते मीं एना गल्लां एल्हेरेलेइ नई लिखोरी, कि मेरे लेइ एरू कियूं गाए। बिलकुल नई! किजोकि इस करां त मेरू मरनू रोडूए; कि कोई मेरू घमण्ड बेफैइडू ठहराए। 16 ते अगर अवं खुशखबरी शुनेई, त मेरू किछ घमण्ड नई, किजोकि इन त मेरे लेइ ज़रूरीए, ते अगर अवं खुशखबरी न शुनेई, त मीं पुड़ अफ़सोस। 17 किजोकि अगर अवं इन कम अपने मेर्जी सेइ केरताई, त मीं इनाम मैलेलू। पन अगर इन मेरी मेर्जी सेइ नई, पन अगर परमेशेरे ई जिमेदारी दित्तोरीए, त अवं कोन्ची इनामेरी उमीद न रेख्वी बेटि। 18 ते फिरी मेरू कुन इनामे? कि खुशखबरी शुनाने मां मसीहेरी खुशखबरी मुफ्त बेंटी; इडी तगर कि ज़ैन खुशखबरी मां मेरू हक्के, तैसेरो पूरो इस्तेमाल केरि।

19 किजोकि सेबन करां आजाद भोने पुड़ भी मीं अपनो आप सेबनी केरो गुलाम बनाव; कि जादे करां जादे लोकन खिचतां ऐनीं। 20 अवं यहूदी केरे लेइ यहूदी बनो ताके यहूदन खिचतां मसीह मां ऐनीं, ज़ैना लोक यहूदी केरे कानूनेरे अधीन तैन केरे लेइ कानूनेरे अधीन न भोने पुड़ भी अधीन भोव, कि तैन ज़ैना कानूनेरे अधीन तैन खिचतां मसीह मां ऐनीं। 21 ज़ैना कानूनेरे अधीन नई तैन केरे लेइ अवं (पन अवं ज़ानताई कि अवं परमेशेरे कानूने करां हीन नई, किजोकि अवं मसीहेरे कानूनेरे अधीन आई) तेरो बनो, कि तैन खिचतां मसीह कां ऐनीं। 22 अवं विश्वासे मां कमज़ोरां केरे लेइ कमज़ोर बनो, ताके कमज़ोरन खिचतां मसीह मां ऐनीं, अवं सेबनी मैन्हु केरे लेइ सब किछ बनो, कि कोन्ची न कोन्ची तरीके सेइ लोकन मुक्ति मैल्ली। 23 ते अवं सब किछ मसीहेरे खुशखबरे लेइ केरताई, कि अवं होरन सेइ साथी तैन बरकतां केरो हिसेदार भोई।

????? ???? ?

24 कुन तुस न ज़ानथ, कि दौड़ी मां त सब दौड़तन, पन इनाम अक्के नेते, तुस तेरहु दौड़ा, कि जीतथ। 25 ते हर अक पलवान हर किसमेरो परेज रखते, तै त अक शुकने बाले ताजेरे लेइ इन सब किछ करते, पन अस त तैस ताजेरे लेइ केरतम ज़ैन कधी नई शुकनू। 26 एल्हेरेलेइ अवं एन्चरे दौड़ताई, पन बगैर मकसदे नई, अवं भी एन्चरे मुकन सेइ लड़ताई, पन तैसेरो ज़ेरो नई ज़ै हवाई मां लड़ते। 27 पन अवं अपने जानरी खुवैइशन मारताई, ते कैबू मां केरताई; एरू न भोए कि होरन प्रचार केरि, ते मीं इनाम न मैलेले।

10

??

1 हे द्लाव ते बेइनव, अवं तुसन याद करानू चाताई, इश्शे दादे-पड़दादन सेइं बड़े पेइले सुनसान ठैरी मां कुन भोवं, परमेशेरे तैन केरे अग्री-अग्री बिदलार भेजतां तैन सेब्भन बत हिराई, ते तैना सब लाल समुन्दरेरे पैनी मांमेइं एन्चरे पार किये जेन्चरे शुक्कोरी ज़मीनी मांमेइं। 2 ते तैन सेब्भेईं बिदलारी मां, ते समुन्दरे मां मूसेरो बपतिस्मो नेव। 3 ते तैन सेब्भेईं तै रोट्टी खाइ, जै परमेशेरे तैन स्वर्गेरां दित्ती। 4 तैन सेब्भेईं अक्के पानी पिव जैन परमेशेरे तैन दित्तू, किजोकि तैना आत्मिक चट्टानी मरां पीते थिये, जै तैन सेइं साथी-साथी ज़लती थी; ते तै चट्टान मसीह थियो। 5 पन परमेशेरे तैन मरां बड़न सेइं खुश न भोव, एल्हेरेलेइ तैना रेगिस्ताने मां मेरि जे।

6 इना गल्लां इश्शे लेइ खबरदारी भोइ, कि जेन्चरे तैनेईं लालच कियूं, तेन्चरे अस बुरी चीजां केरू लालच न केरम। 7 ते न मूरती केरि पूजा केरनेबाले बनम; जेन्चरे तैना किछ बनोरे थिये, जेन्चरे पवित्रशास्त्रे मां लिखोरूए, “लोक तिहारे मां खाने पीने बिश्शे, ते फिरी बुरू केरनेरे लेइ उठे।” 8 ते न असां बदमाशी केरम; जेन्चरे तैन मरां किछेईं की, कि एक्की दिहाड़ी मां 23000 मरे। 9 ते न अस प्रभु यीशु मसीह अज़माम; जेन्चरे तैन मरां किछेईं अज़माव, ते तैना सपन सेइं मेरि जे। 10 ते न तुस कुड़कड़थ, जेन्चरे तैन मरां किछेईं कुड़कड़व, ते परमेशेरे तरफां भेजोरे स्वर्गदूते तैना मारे। 11 पन इना सब गल्लां, जैना तैन पुड़ बीती, तैना खबरदारी ज़ेरि थी, ते तैना इश्शी लेइ हदैइयत भी आन, जैना अस दुनियारे आखरी वक्ते मां रातम लिखी जेई। 12 एल्हेरेलेइ जै विश्वासी समझते, “कि अवं विश्वासे मां मज़बूताई,” तै खबरदार राए; कि तैस्से पापे मां फिरी न बिछड़े। 13 तुसन पुड़ एरी अज़मैइश नई ओरी, जै मैन्हू केरे झल्लनेरे बेइरे, परमेशेरे वाफदार, तै तुसन शेक्ति करां जादे अज़मैइशी मां गाने न देलो, बल्के अज़मैइशी सेइं साथी तैस मरां कढेलो भी; कि तुस झेल्ली भी बटथ।

??

14 एल्हेरेलेइ, हे मेरे द्लाराव, मूरती पूजने करां बेचते राथ। 15 अवं समझदार बुझतां, तुसन सेइं ज़ोताई, जैन अवं ज़ोताई, तुस तैसेरे बारे मां सोचा कि सही आए या नई। 16 जैखन अस यीशु मसीहेरे मौती याद केरनेरे लेइ अकोट्टे भोतम, त अस दाछारो रस कटोरे सेइं पीतम, जेसेरे बारे मां असेईं परमेशेरेरू शुकर कियोरूए, ते अस ट्लोडोरी रोट्टी भी खातम, ई तैन बरकतन मां शामिल भोनेरो निशाने, जैना मसीहेरे जानी ते खूने करां एइतिन? 17 एल्हेरेलेइ, कि अक्के रोट्टीए जै मसीहे, चाए अस बड़ेम, अस अक जान भोतम किजोकि अस तैए अक्के रोट्टी खातम। 18 इस्राएलेरे लोकां केरे बारे मां सोचा, जैखन सारे लोक परमेशेरेरे लेइ चादोरी रोट्टी खातन, तैना परमेशेरेरे आराधनारे हिस्सेदार भोतन, तेन्चरे जैना लोक मूरतन कां बलिदान कियोरी चीज़न खातन तैना मूरती केरि पूजाई मां हिस्सेदार भोतन। 19 फिरी अवं कुन ज़ोताई? कि मूरती बलिदान किछे, या मूरती किछे? 20 नई, बल्के इन, कि तैना जैन बलिदान केरतन, तैना परमेशेरेरे लेइ नई, पन भूतां केरे लेइ केरतन, ते अवं न चैई कि तुस भूतन सेइं साथी शामिल भोथ। 21 तुस प्रभुएरे कटोरे, ते भूतां केरे कटोरे दुइयन मरां न पी बटथ! तुस प्रभुएरे मेजे ते भूतां केरे मेजे मां शामिल न भोइ बटथ। 22 कुन अस प्रभु सरकातम? कुन अस तैस करां जादे शेक्ति बालेम?

??

23 तुस ज़ोतथ, अस किछ भी केरनेरे लेइ आज़ाद आम, हाँ, पन सब किछ इश्शे लेइ रोड़ू नई। अस किछ भी केरनेरे लेइ आज़ाद आम, पन सब किछ इश्शे विश्वासे जै परमेशेरे पुड़े मज़बूत न केरे। 24 कोई अपने भलेरे बारे मां न सोचे बल्के होरि केरे भलेरे लेइ सोचे। 25 जैन किछ किसेईं केरे दुकान्न पुड़ बिकते, तैन खाथ, ते इन न पुच्छा कि मास कोट्टां आनोरू ते अपनो ज़मीरे शुद्ध रखा। 26 तुस तैन खाथ किजोकि पवित्रशास्त्र ज़ोते, “धरती ते सैरी चीजां प्रभुएरी आन।” 27 ते अगर गैर विश्वासी लोकन मरां तुसन कोई धाम ज़ोए, त तुस गानू चातथ, त जैन किछ तुश्शे सामने रखू गाए तैन खाथ, ते किछ न पुच्छा, कि कोट्टां आनोरूए। 28 पन अगर कोई तुसन सेइं ज़ोए, “इना त मूरतन कां बलिदान कियोरू,” त तुस तैस न खाथ, तुश्शे ज़मीरेरे वजाई सेइं नई बल्के जेने तुसन सेइं ज़ोवं तैसेरे ज़मीरेरे वजाई सेइं। 29 मेरो मतलब, तेरो ज़मीर नई, बल्के तैस होरेरो। भला, मेरी आज़ादी होरि मैनेरे ज़िरिये किजो परखी गाए? 30 अगर अवं शुकर केरतां खाताई, त जैस पुड़ अवं शुकर केरताई, तैसेरे वजाई सेइं मेरी बदनामी किजो भोतीए?

31 आखरी मां अवं इन जोताई, तुस चाए खाथ, चाए पीथ, या चाए जैन किछ केरा परमेशेरी महिमारे लेइ केरा। 32-33 अवं जैन किछ केरताई, हर केन्ची खुश केरनेरी कोशिश केरताई, अपने भलेरे बारे मां न सोची बल्के होरि केरे भलेरे बारे मां सोचताई, ताके सेबन मुक्ति मैल्ले। एन्चरे तुस भी जीथ ताके तुश्शे वजाई सेइं न यहूदन, न गैर यहूदन न परमेशेरे कलीसियाई परेशानी भोए।

11

1 जेन्चरे अवं मसीहेरी जेरि चाल चलताई तुस भी मेरी जेरि चाल चला।

[\[?\]\[?\]\[?\]\[?\]\[?\] \[?\]\[?\] \[?\]\[?\] \[?\]\[?\]\[?\]](#)

2 हे ढलाव ते बेइनव, अवं तुश्शी तारीफ़ केरताई, किजोकि तुस मीं हर वक्त याद केरते रातथ; ते जै शिक्षां मीं तुसन दिती तैन केरे मुताबिक चलतथ। 3 ते अवं चाताई, कि तुस इन ज्ञानथ, हर एक्के मड़देरी क्रोड़ी मसीहे, ते कुआन्शरी क्रोड़ी मड़दे, ते मसीहेरी क्रोड़ी परमेशेरे। 4 जै मड़द क्रोड़ी ढेकतां प्रार्थना या भविष्यवाणी केरते, तै अपने क्रोड़री अनादर केरते, किजोकि तैन घमण्डेरे बराबरे। 5 पन जै कुआन्श बगैर दोग ढेकतां प्रार्थना या भविष्यवाणी केरतीए, तै अपने क्रोड़री अनादर केरती, किजोकि तैन टिनडी भोनेरे बराबरे। 6 अगर कुआन्श ओड़नी न ओड़े, त दोग भी कटे; अगर कुआन्शरे लेइ दोग कट्टानो शरमरी गल्ले, त ओड़नी ओड़े। 7 हाँ मड़दे अपनो दोग ढकनो जेइज नई, किजोकि तै परमेशेरे रूप ते शोभाए; पन कुआन्श मड़देरी शोभाए! 8 किजोकि मड़द कुआन्शी मरां नई, बल्के कुआन्श मड़दे मरां निसोरिए। 9 ते मड़द कुआन्शरे लेइ नई पन कुआन्श मड़देरे लेइ बनेवरीए। 10 एल्हेरेलेइ स्वर्गदूतां केरे वजाई सेइं कुआन्शरे लेइ इन ठीके कि अपने दोग ढक्के, ताके इस सेइं बांदू भोए कि तै मड़देरे अधीने। 11 फिरी भी प्रभु पुड़ विश्वास केरनेबालन मां कुआन्श मड़दे करां अलग नई, ते न मड़द कुआन्शरी करां अलगे। 12 किजोकि जेन्चरे पेइली कुआन्श मड़दे मरांए, पन हुनी मड़दन कुआन्श जर्म देतीए। सब चीजां परमेशेरे करां आन। 13 तुस एप्पू फैसलो केरा, कुन कुआन्शी खुले आम आराधनाई मां बगैर दोग ढेकतां परमेशेरे कां प्रार्थना केरनि शोभतीए? 14 कुन तुस भी न ज्ञानथ, कि अगर मड़द लमो दोग रखे त तैसेरेलेइ शरमे। 15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे ढकनेरे लेइ दितीरेन। 16 पन अगर कोई मीं सेइं राजी न भोए, त इन समझे न इश्शी न इश्शे परमेशेरी कलीसियां केरि एरी रीतए।

[\[?\]\[?\]\[?\]\[?\] \[?\]\[?\]\[?\]\[?\] \[?\]\[?\] \[?\]\[?\]](#)

[\[?\]\[?\]\[?\]\[?\] 26:26-29; \[?\]\[?\]\[?\]\[?\] 14:22-25; \[?\]\[?\]\[?\] 22:14-20\)](#)

17 इस बारे मां अवं तुसन इन जोताई, अवं तुश्शी तारीफ़ न केरि, एल्हेरेलेइ कि तुश्शे अकोट्टे भोने सेइं भलाई नई, बल्के नुकसान भोते। 18 किजोकि पेइलू त अवं इन शुनताई, कि जैखन तुस कलीसिया मां आराधनारे लेइ अकोट्टे भोतथ, त तुसन मां अन-बन भोतीए ते अवं किछ हदी तगर याकीन केरताई। 19 पन, बिलकुल तुसन मां बटवारो भोरो लोड़े, ताके तुसन जैन कां परमेशेरी मन्जूरीए पिशाने गाथ। 20 ते जैखन तुस इश्शे प्रभु यीशुएरी मौती याद केरनेरे लेइ एक्की ठैरी अकोट्टे भोतथ, त तुश्शे बर्तावे सेइं इन न लगगे कि प्रभु भोज खानेरे लेइ अकोट्टे भोरेथ। 21 किजोकि खानेरे वक्ते हर कोई अपना ड्लाछड़ो होरन करां पेइलो खाते, ते किछ त नियन्नो रहतन, ते किछ मतवालो भोइ गाते। 22 कुन खाने पीनेरे लेइ तुसन घर नई या परमेशेरी कलीसियाई घटिया समझतथ, कि जैन कां नई तैन छितातथ अवं तुसन कुन जोई? कुन इस गल्ली मां तुश्शी तारीफ़ केरि? अवं तारीफ़ न केरि।

23 जै शिक्षा मीं प्रभु करां पुजी तै शिक्षा मीं तुसन दिती, कि प्रभु यीशुए जैस राती तै टलुवाव जेव तैने रोट्टी नी। 24 ते शुकर केरतां टलोड़ी, ते जोवं; “कि ई रोट्टी मेरे जानी हिराती, जै तुश्शे मुक्तेरे लेइ बलिदान की गातीए, मेरी यादी मां इन्ने केरा।” 25 ते एन्चरे जैखन तैनेई रोट्टी खाइ, यीशुए दाछारो कटोरो भी नेव, ते जोवं; “ई कटोरो मेरे खूने मां नंव्वो करारे, जैखन भी पीथ, मेरे यादी मां इन्ने केरा।” 26 किजोकि जैखन ई रोट्टी खाथ, ते इस कटोरे मरां पीथ, त प्रभुएरे मौती जांतगर तै न एज्जे, इस बारे मां जोते राथ।

27 एल्हेरेलेइ जै कोई प्रभुएरे रोट्टी नाजाइज तरीके सेइं खाए, या प्रभुएरे कटोरे मरां पीये, तै प्रभुएरे जानरो ते खूनेरे खलाफ पापी भोलो। 28 एल्हेरेलेइ मैन्हु अपने बर्तावे परखे ते एन्चरे इस रोट्टी मरां खाए, ते इस कटोरे मरां पीये। 29 किजोकि जै इस रोट्टी खाते ते कटोरे मरां पीते बार इन न पिशाने कि तैसेरो रिश्तो प्रभुएरी जानी सेइं केरोए, तै इस खाने पीने सेइं एप्पू पुड़ आफत आनते। 30 एल्हेरेलेइ तुसन मरां बड़े कमजोर ते रोगी आन, ते

बड़े मेरि भी जे । 31 एल्हेरेलेइ अगर अस पेइले अपनो आप परखम त परमेशर असन सजा न देलो । 32 पन प्रभु असन सजा देइतां शिखालते एल्हेरेलेइ कि अस दुनियाई सेइं साथी दोषी न भोम । 33 ते हे मेरे ढलाव ते बेइनव, जैखन तुस प्रभुएरी रोट्टी खानेरे लेइ अकोट्टे भोतथ, एक्की होरि बलगा । 34 अगर कोई नियन्नो भोए त अपने घरे मां खाए, जैस सेइं तुस अकोट्टे भोथ, रोड़े चारे बर्ताव केरा, जैस सेइं प्रभु तुसन सजा न दे, ते होरि गल्लां अवं एइतां ठीक केरेलो ।

12

?????? ???? ????

1 हे मेरे ढलाव ते बेइनव, हुनी तुश्शे तैस सवालेरे बारे मां जै तुसेईं पवित्र आत्मा रे वरदानां केरे बारे मां पुच्छो, अवं चाताई तुस रोड़े चारे समझा । 2 तुस जानतथ, कि तुस विश्वास केरने करां पेइले तुसन जेन्चरे जीते थिये तुसन पुड़ भूतां केरो अस्सर भोतो थियो, कि तुस मूरती केरि पूजा केरथ, जैना जींती न भोन । 3 एल्हेरेलेइ अवं चाताई तुस जानतथ, कि जै कोई परमेशरेरे आत्मा रे जुवाने सेइं ज्योते, तै न ज्योए, कि यीशु लानतीए, सिर्फ एक्केलो पवित्र आत्मा आए, जै इस काबल बनाते, कि कोई भी इन ज्योई सकते कि “यीशु प्रभुए ।”

4 वरदाना त बड़े किसमां केरन, पन इना सब परमेशरेरो आत्मा देते । 5 अस बड़े किसमां केरू कम परमेशरेरे लेइ केरतम, पन अस तैस्से एक्की प्रभुएरी सेवा केरतम । 6 परमेशर इश्शे जिन्दगी मां अलग-अलग किसमे सेइं कम केरते, पन तैए परमेशर जै असन सेबन तैसेरेलेइ कम केरनेरी काबलीत देते । 7 असन सेबन अक एरी काबलीत दित्तोरीए, जैस सेइं पवित्र आत्मा रे हजूरी साबत भोती, ताके अस अपने सैथी विश्वासी लोकां केरि महत केरम । 8 किजोकि परमेशरेरे आत्मा रे जिरिये एक्की मैन्हु समझदैरारो सन्देश शुनानेरी काबलीत दित्तोरीए, ते होरि मैन्हु तैस्से आत्मा रे जिरिये सेइं ज्ञानेरो सन्देश शुनानेरी काबलीत दित्तोरीए । 9 तैए आत्मा एक्की मैन्हु मसीह पुड़ मजबूती सेइं विश्वास केरनेरी काबलीत देते, ते तैए होरि मैन्हु, बिमार लोकन बझानेरी काबलीत देते । 10 आत्मा एक्की मैन्हु चमत्कारेरां कम्मां केरनेरी शक्ति देते, ते होरि परमेशरेरो सन्देश शुनानेरू वरदान, ते कोन्ची आत्मां केरि परख, ते कोन्ची मैन्हु बड़े किसमां केरि भाषां ज्योनेरी काबलीत दित्ती, जैना तैने नई पेढोरी, ते होरि मैन्हु तैन भाषां केरो मतलब समझानेरी काबलीत दित्ती, जैना तैनेई नई पेढोरी । 11 सब वरदानां तैस्से एक्की पवित्र आत्मारू कम्मे । तैए जेन्चरे चाते सेबनी विश्वासी लोकन वरदान देते ।

???? ? ? ? ? ? ? ? ?

12 किजोकि जेन्चरे इश्शे जिसम त अक्के ते तैसेरे अंग बडेन, ते तैस एक्की जिसमेरे अंग हच्छे भोने सेइं भी सब मिलतां अक्के जिसमे, तेन्चरे मसीह भी आए, ते तैना भी जैना तैस पुड़ विश्वास केरतन । 13 किजोकि असेईं सेबेईं कुन यहूदी, कुन गैर कौमां, कुन गुलाम, कुन आजाद अक्के आत्मा रे जिरिये अक जिसम भोनेरे लेइ बपतिस्मो नेवरोए, ते असन सेबन अक्के आत्मा मैल्ली ।

14 इश्शे जिसमे मां अक्के अंग नई, बल्के बडेन । 15 अगर पव ज्योए अवं हथ नई, एल्हेरेलेइ अवं जिसमेरो अंग नई । त कुन तैसेरे ज्योने सेइं तै जिसमेरो अंग न राए? 16 ते अगर कन्न ज्योए; “अवं अच्छ नई, एल्हेरेलेइ अवं जिसमेरो अंग नई,” त कुन तैसेरू एरू ज्योने सेइं तै जिसमेरो न राए? 17 अगर सारो जिसम अच्छे भोथी त शुन्नू कोट्टां भोथू? ते अगर सारो जिसम कन्न भोथो त शीघनू कोट्टां भोथू? 18 पन सच्चे परमेशरे इश्शे जिसमे मां अंग अपने मेर्जी सेइं अक-अक केरतां इश्शे जिसमे मां अपने-अपने ठैरी रखोरेन । 19 अगर तैना सभे अक्के अंग भोथे, त फिरी जिसम न भोथो । 20 एल्हेरेलेइ, जिसमेरे बड़े अंग भोने सेइं अक जिसम बनते । 21 अच्छ हथ्ये सेइं न ज्योई सके, “मीं तेरी जरूरत नई,” ते न करोड़ी पवन सेइं ज्योई बटतीए, “मीं तेरी जरूरत नई ।” 22 पन जिसमेरे अंग जैना होरन करां कमजोर लेइहोतन, बड़े जरूरिन । 23 ते जिसमेरे जैन अंगन अस आदरारे काबल न समझम तैन केरि अस जादे आदर देतम; ते इश्शे अशोबते अंग होरे भी रोड़े भोतन । 24 फिरी इश्शे शोबते अंगन एसेरी जरूरत नई, पन परमेशरे जिसम बनोवरोए, कि जैस अंगे घटी थी तैस होरि भी जादे आदर भोए । 25 परमेशरे एन कियूं ताके जिसमेरे अंगन मां अन-बन न भोए, पन तैना एक्की होरेरी देख-भाल केरन । 26 एल्हेरेलेइ अगर जिसमेरे एक्की अंगे दुःख मैलते, त सारी जान ते सब अंग तैस सेइं साथी दुखी भोतन; ते अगर एक्की अंगेरी बडयाई भोतीए; त तैस साथी सब अंग आनन्द केरतन ।

27 एन्चरे तुस सब मिलतां मसीहेरो जिसमथ, ते तैसेरे जिसमेरे अंगथ। 28 मसीहेरी जानी मां यानी कलीसियाई मां, परमेशेरे असन अलग-अलग कम करने जो दित्तोरुए, पेइले प्रेरित, दुइयोवं नबी, ट्लेइयोवं शिक्षा देनेबाले, फिरी तैना, जैन चमत्कार केरनेरो अधिकार दित्तोरुए। फिरी तैनी तैना जैन बझानेरो अधिकार दित्तोरुए, ते तैना जैन होरि केरि महत्त केरनेरी काबलीत दित्तोरुए, जैना प्रधान्न, तैना जैन पवित्र आत्मारें तरफां अलग-अलग किसमां केरि भाषां ज़ोनेरी काबलीत मैली। 29 हर कोई प्रेरित नई। हर कोई नबी नई। हर कोई शिक्षा देनेबालो नई। हर कोई चमत्कार केरनेबालो नई। 30 कुन सेबन बझानेरु वरदान मैलेरु। हर कोई अलग-अलग भाषां केरनेबालो नई। हर कोई भाषां केरो मतलब समझानेबालो नई। 31 सेबन कां तरजमो केरनेरी काबलीत नई, रोडू त इन आए पवित्र आत्मां करां वरदानां हासिल केरनेरी बेडि इच्छाई मां राथ। पन सच्चें रोडू कुने, तैन अवं हुनी ज़ोताई।

13

????? ?????????? ?????? ??

1 अगर अवं मैन्हु, ते स्वर्गदूतां केरि भाषां केरि, ते प्यार न रेख्वी, त अवं ठन-ठन केरनेबाली पितल, ते झन-झन केरनेबाली झाझाई। 2 ते अगर अवं भविष्यवाणी केरि सेखी, ते सब भेद जैनी ते, मीं इड़ी तगर पूरो विश्वास भोए, कि पहाड़न घासेई, पन प्यार न रेख्वी, त अवं किछ भी नई। 3 ते अगर अवं अपनि सारी जेइदाद कंगालन देई, या अपनो जिसम फुकनेरे लेइ देई, ते प्यार न रेख्वी, त इन मेरे कोन्ची कम्मेरु नई। 4 जैना लोक होरन सेइं प्यार केरतन तैना सबर ते दयाई सेइं कम केरतन, तैना जलन न केरन, तैना अपनि बडीयाई न केरन, ते न घमण्ड केरन। 5 तैना होरन बेइज्जत न केरन, तैना खुदगरज न भोन, जल्दी क्रोध न केरन ते जैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ जैना पाप केरतन तैना, तैन बडे आसान तरीके सेइं माफ़ केरतन। 6 तैना खुश न भोन जैखन लोक बुरु केरतन, पन तैना तैखन खुश भोतन जैखन लोक तैन केरतन जैन ठीक ते सच्चू। 7 तैना सब गल्लां झैल्लतन, प्यार विश्वास कधी न गुवाए, ते असन परमेशेरे पुइ भरोसो केरनेरे काबल बनाते, मुशकलन ते तकलीफन मां सबर रखते।

8 भविष्यवैनी ते गैर भाषां ते खास ज्ञान बेकार भोलू। पन प्यार हमेशेरे लेइ रालो! 9-10 किजोकि इशू ज्ञान ते इशू भविष्यवाणी केरनेरी काबलीत अध्धीए, पन जैखन सिद्ध एज्जेलो, त जैन अधूरुए तैसेरी जरूरत नई। 11 इन मैनेरे बेडोनेरु जेरु आए। जैखन अवं बच्चो थियो, त बच्चां केरो जेरो ज़ोतो ते सोचतो ते समझतो थियो। पन जैखन अस बड्डे भोतम, त बच्चां केरि गल्लां शारतम। 12 एन्चरे असन सेइं भी आए जैना अस विश्वास केरतम, किजोकि अस तैस मैनेरे जेरे आम जै खराब शीशे मां शकल हेरते, (किजोकि अस सब किछ रोडे चारे न ज्ञानम) सिर्फ एजनेबाले वक्ते मां, अस सब किछ समझमेले, एल्हेरेलेइ असेई परमेशेरे आमने सामने हेरनोए। हुना मेरु ज्ञान पूरु नई। पन तैस एजनेबाले वक्ते मां (जैखन तै दिहाड़ी एज्जेली) रोडेचारे जैनेलो, परमेशेरे भी मीं ज्ञानेलो। 13 लिहाजा, हुनी, टलाई किसमां केरि चीजन जैना असेई जरूरी केरनिन, परमेशेरे पुइ विश्वास, परमेशेरे वादन पुइ उमीद, ते परमेशेरे ते होरन सेइं प्यार। पन इन टलाई गल्लन मां जै महाने, तै ई आए: परमेशेरे ते होरन सेइं प्यार केरन।

14

????????????????? ?? ???? ?????

1 एक्की होरि सेइं प्यार केरनेरी कोशिश केरा। ते आत्मिक वरदानां केरि बडी इच्छा रखा, खास केरतां इन, कि भविष्यवाणी केरा। 2 किजोकि, जै गैर भाषाई मां गल्लां केरते; तै मैनन् सेइं नई, बल्के परमेशेरे सेइं गल्लां केरते; एल्हेरेलेइ कि तैसेरी कोई न समझे; किजोकि तै भेदेरी गल्लां पवित्र आत्मारें शक्ति सेइं ज़ोते। 3 पन जै परमेशेरे तरफां सन्देश शुनाते, तै विश्वासी लोकन, विश्वासे मां मज़बूत भोनेरे लेइ महत्त केरते, ते होरि विश्वासी लोकां केरि हिम्मत बढ़ाते ते तस्सली देते। 4 जै गैर भाषाई मां ज़ोते, तै अपने विश्वासे मज़बूत केरते। पन जै भविष्यवाणी केरते, तै कलीसियारे विश्वासी लोकां केरे विश्वासे मज़बूत केरते। 5 अवं चाताई, कि तुस गैर भाषाई मां गल्लां केरा, पन जादे इन चाताई कि भविष्यवाणी केरा: किजोकि अगर गैर भाषा ज़ोनेबालो कलीसियारे विश्वासी लोकां केरे विश्वासे मां मज़बूत भोनेरे लेइ तरजमो न केरे त भविष्यवाणी केरनेबालो तैस करां जादे खास कम केरि रावरोए।

6 एल्हरेलेइ हे ढ्लाव ते बेइनव, अगर अवं तुसन कां एडतां गैर भाषाई मां गल्लां केरि त तुसन मीं करां कुन फैइदो भोलो। पन अगर अवं प्रकाश या खास ज्ञान, या परमेशेरो सन्देश शुनेई या शिक्षा देई त इस सेइं तुशुशी महत भोली। 7 एन्चरे, अगर तुस बाजो बजाथ जेन्चरे बेइशोई या सारंगी, अगर तैन रोडे चारे न बजाव गाए त जैन बजाव लावरू गाने त तैन केन्चरे पिशानेले बेइशोई या सारंगी मां कुन लावरू बजने। 8 जंगी मां अगर नइशिनोरी आवाज साफ न भोए, त फौजी जंगरे लेइ तियार न भोइ सकन। 9 एन्चरे, जैखन तुस तैना गल्लां केरथ जैना होरि लोकन समझ न एजन, त जैन किछ जोंव गाते तैसेरी कोई कीमत नई। 10 दुनियाई मां बेइ भाषा आन, त हर भाषारो मतलबे। 11 पन अगर अस तैस भाषाई न समझम जै होरे ज़ोने लोरेन, त एन एरू भोलू, कि जेन्चरे तैना इशु लेइ परदेशी भोले ते अस तैन केरे लेइ परदेशी भोले। 12 एन्चरे तुस भी जैखन पवित्र आत्मारो वरदानां केरे लेइ बड़ी इच्छा रखतथ, त तैन वरदानां केरि इच्छा रखा जैन सेइं कलीसियारे विश्वासी लोक विश्वासे मां मजबूत भोन।

13 एल्हरेलेइ जै गैर भाषा केरते, तै प्रार्थना केरे, कि जैन किछ तैने जोंव, तैसेरो मतलब समझेनेरे काबल भी भोइ सके। 14 किजोकि अगर अवं गैर भाषाई मां प्रार्थना केरने लोरोई, त मेरी आत्मा प्रार्थना केरतीए, पन मेरी सोचरे लेइ फैइदो नई, किजोकि इन मीं समझ न एज्जे। 15 त फिरी मीं कुन कियोरू लोडे? एरो भी वक्त भोते जैखन मीं अपने आत्माई सेइं प्रार्थना कियोरी लोडे, एरो वक्त भी भोते जैखन मीं अपने अक्ली सेइं भी प्रार्थना कियोरी लोडे। किछ वक्ते मीं अपने आत्माई सेइं गीतां ज़ोवरां लोडे, ते होरि वक्ते मीं अक्ली सेइं भी गीत ज़ोवरां लोडन। 16 मन्ना कि जैखन किछ आम मैन्हु तुशुशे आराधनाई मां एजन, जैखन तुस अपने आत्माई सेइं परमेशेरी बडयाई केरथ। अगर तैना तुशुशी न समझे, त तुशुशे परमेशेरू शुक्र केरनेरे बाद तैना केन्चरे बुझेले कि किताली, “आमीन” ज़ोनु, किजोकि तैना न समझे तुस कुन लोरेथ ज़ोने। 17 तुशुशु परमेशेरू शुक्र केरनू रोडूए, पन इन होरि केरे विश्वासे मजबूत केरनेरे लेइ महत न केरेलू। 18 अवं अपने परमेशेरू शुक्र केरताई, कि अवं तुसन सेभन करां जादे गैर भाषां केरताई। 19 पन कलीसियाई मां गैर भाषा केरने मां दश हजार गल्लां केरे ज़ोनेरे केरतां इन मीं होरू भी रोडू लगते, कि होरन शिखालनेरे लेइ अक्ली सेइं पंचे गल्लां ज़ोई।

20 हे ढ्लाव ते बेइनव, तुस इना गल्लां समझने मां बच्चे न बना, पन बुरैई केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना। 21 कानूने मां प्रभु ज़ोते; “अवं बखलां केरे ज़िरिये ज़ोइलो, जैना गैर भाषां केरेले, पन फिरी भी तैना मेरी न शुनेले।”

22 एल्हरेलेइ असन मरां किछ गैर भाषा केरन जै पवित्र आत्मारो तरफां आए, इशुशे शब्द तैन लोकां केरे लेइ प्रभुएरे शक्तिरो निशाने, जैना प्रभु पुड़ विश्वास न केरन। 23 ते अगर कलीसिया एक्की ठैरी अकोट्ठी भोए, ते सब गैर भाषा केरन, त आम लोक जैना ई भाषा न समझन या गैर विश्वासी लोक अन्तर एजन त कुन तैना इन न सोचले कि तुस पागल आथ। 24 ते अगर सब भविष्यवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते जैन तैनेई जोंव तैसेरे वजाई सेइं अपनि बत बदलेले। 25 ते परमेशेरे सन्देशे सेइं तैन एसास भोलो कि तैनेई बुरू कियोरू तैन केरे मनेरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले। ते तैना मथ्यो टेकतां परमेशेरी आराधना केरेले, ते मनेले कि परमेशर तुसन मां आए।

???? ???? ?????????

26 हे ढ्लाव ते बेइनव कुन कियोरू लोडूए? जैखन तुस आराधना केरने लेइ अकोट्ठे भोतथ, त किछ भजन ज़ोन, किछ उपदेश देन, ते किछ जैन प्रकाशन परमेशेरे तरफां आए तैस देन, ते किछ गैर भाषाई मां गल्लां केरन ते किछ तैसेरो तरजमो केरन, तुस इन सब एल्हरेलेइ केरा कि कलीसियारे लोकन विश्वासे मां मजबूत भोनेरे लेइ महत भोए। 27 अगर कोई गैर भाषाई मां ज़ोने लोरोए, त दूई या ट्लाई जने बैरी-बैरी सेइं ज़ोन, ते इन जरूरी कि अक मैन्हु तैस भाषारो मतलब ज़ोए। 28 पन अगर तरजमो केरनेबालो न भोए, ते गैर भाषा ज़ोने बालो कलीसियाई मां चुप राए, ते चुपचारे अपने मने सेइं परमेशेरे सेइं गल्लां केरे। 29 नेबन मरां दूई या ट्लाई ज़ोन, इन जरूरी आए कि हर कोई शुने, ते सोचन ते परखन कि जैन किछ जोंव लोरू गाने सही आए या नई। 30 पन अगर कोई जै तैडी सभाई मां बिशोरोए, तैस परमेशेरे तरफां सन्देश मैल्ले, त जै ज़ोने लोरोए तै चुप भोए, ते तैस ज़ोने दे। 31 किजोकि तुस सब अक-अक भविष्यवाणी केरि बटतथ, पन अक-अक भोइतां ताके सब शिखन,

ते हिम्मत बढ़े। ³² जै नबी परमेशेरो सन्देश शुनाते, तै अपने आपे वशे मां रखते। तै इस काबले कि अपने मेर्जी सेईं जोई बटते ते चुप रेइ बटते। ³³ किजोकि परमेशर गडबड करनेवालो नई, पन शान्ति देनेवालोए; ई तै कानूने जैस परमेशेरे सैरी कलीसियारे लोक मन्तन। ³⁴ कुआन्शां कलीसियारे सभाई मां चुप रान, किजोकि तैन गल्लां केरनेरो हुक्म नई, जेन्चरे कानूने मां लिखोरू भी आए। ³⁵ ते अगर तैना किछ सवाल पुच्छने चान, त सभाई मां न पुच्छन पन घरे अपने-अपने मुन्शन पुच्छन, किजोकि कलीसिया मां कुआन्शां केरि जादे गल्लां केरनि ठीक नई। ³⁶ एरू किजो आए तुसन मरां किछ लोक पेइले जोरे नियमन किजो न मन्नु चान? कुन तुस सोचतथ कि तुस पेइले लोक आथ जैनेई परमेशेरू वचन दित्तू? या सिर्फ तुसन दित्तू? ³⁷ अगर कोई मैन्हु अपनो आप नबी समझे, या इन समझे कि मीं पवित्र आत्मारें तरफां वरदान मैलोरूए, त इन समझे, कि जैना गल्लां अवं तुसन लिखताई, तैना प्रभुएरे हुक्मन। ³⁸ पन अगर कोई इन गल्लन न मन्ने, त तैन पुड़ विश्वास न केर।

³⁹ एल्हेरेलेइ हे दलाव ते बेइनव, भविष्यवाणी केरनेरी बड़ी इच्छा रखा, ते गैर भाषाई केरनेरे लेइ न टाका। ⁴⁰ पन तैन सब किछ जैन तुस कलीसियाई मां केरतथ तरीके सेईं कियूं गाए।

15

???????? ???? ???? ?

¹ हे दलाव ते बेइनव, अवं तुसन तैए खुशखबरी याद कराताई जै मीं तुसन शुनावरी थी, ते जैस सन्देशे पुड़ तुसेईं विश्वास कियोरो थियो, ते जैस पुड़ तुस तुसेईं लगातार भरोसो रखोरूए। ² अगर तुस तैस खुशखबरी पुड़ लगातार विश्वास केरते राले, जै मीं प्रचार की, त परमेशर तुसन बचालो। नई त तुशो विश्वास केरनो बेफैदो भोव।

³ एल्हेरेलेइ मीं तुसन खास सन्देश दित्तो, जै मीं प्रभु यीशु मसीह करां मैल्लो। तै सन्देश ई आए, कि पवित्रशास्त्रेरे मुताबिक यीशु मसीह इशो पापां केरे लेइ मरो ⁴ ते दबो जेव, ते पवित्रशास्त्रेरे मुताबिक टलेइयोवं दिहाड़े मुड़दन मरां जीतो भोव। ⁵ ते कैफा (यानी पतरस) ते 12 चलन लेइहोव। ⁶ फिरी 500 करां जादे चलन एक्की साथी लेइहोव, जैन मरां हेजू बड़े जीतन ते किछ मेरि जोरेन। ⁷ फिरी याकूबे लेइहोव फिरी सेभी प्रेरितन लेइहोव। ⁸ ते आखरी मां तैनी अपनो आप मीं पुड़ भी पुड़ बांदो कियो, अवं जै तैस बच्चेरे जेरो आईं जै ठीक वक्ते पुड़ नई जर्मोरू। ⁹ किजोकि अवं प्रेरितन मरां सेभना निकोडोई, बल्के प्रेरित ज़वानेरे काबल भी नई, किजोकि अवं परमेशेरे कलीसियारे विश्वासी लोकन सतातो थियो। ¹⁰ पन परमेशेरे अनुग्रहे सेईं अवं प्रेरित आईं। ते तैसेरो अनुग्रहेरो अस्सर ई भोव कि, मीं तैन होरि प्रेरितन करां बेद्धतां मेहनत भी की, ते ई मेहनत मीं अपने तरफां न की, बल्के परमेशेरे मेरी मदत की, कि अवं इन केरि। ¹¹ ते चाए अवं भोइ, चाए होरे प्रेरित भोन, अस तैस मसीहेरे बारे मां सन्देश प्रचार केरतम, ते इस्से पुड़ तुसेईं भी विश्वास कियो।

???????? ???? ???? ?

¹² एल्हेरेलेइ हुनी अवं पुछताई, जैखन मसीहेरो ई प्रचार कियो गाते, कि तै मुड़दन मरां जीतो भोव, ते तुसन मरां किछ किजो जीतन, कि मुड़दां केरू जीतू भोनू अथी नई? ¹³ अगर मुड़दां केरू जीतू भोनू अथी नई, ते फिरी मसीह भी नई जीतो भोरो। ¹⁴ ते अगर मसीह भी मुड़दन मरां जीतो नई भोरो, त फिरी इशो सन्देश प्रचार केरनो भी बे फैदोए; ते तुशो मसीह पुड़ विश्वास केरनो भी बे फैदोए। ¹⁵ अगर मुड़दे जीते न भोन, त असेईं इन जोइतां परमेशेरे बारे मां झूठ जोवं, कि परमेशेरे मसीह जीतो कियो जैन तैनी हकीकति मां नई कियोरू। ¹⁶ अवं दुबारां फिरी जोताई, अगर कोई मुड़दन मरां जीतो न भोए, ते फिरी मसीह भी मुड़न मरां जीतो नई भोरो। ¹⁷ ते अगर मसीह मुड़दन मरां जीतो नई भोरो, त तुशो मसीह पुड़ विश्वास भी बे फैदोए, ते तुस हेजू तगर अपने पापन मां जीने लोरेथ। ¹⁸ बल्के जैना मसीह पुड़ विश्वास केरनेवाले मरेन, तैना भी नाश भोए। ¹⁹ अगर अस सिर्फ इस जिन्दगी मां मसीह करां उमीद रखतम ते फिरी अस सेभी मैनन् करां नुभागम।

²⁰ पन सत्र त इन आए कि परमेशेरे मसीह मुड़दन मरां इन साबत केरनेरे लेइ जीतो कियोरो, ते जैना मरेन, तैन मां पेइलो फल भोए। ²¹ किजोकि जैन पेइले मैने यानी आदमे कियूं, तैसेरे वजाई सेईं सब मैन्हु मरे, एन्चरे जैना विश्वासी लोक एजनेवाले वक्ते मां मुड़दन मरां जीते किये गाले, तैन भी एक्की मैनेरे केरनेरे वजाई सेईं आए, ते तै मैन्हु मसीह आए। ²² एल्हेरेलेइ एक्की मैनेरे पापेरे यानी आदमेरे वजाई सेईं सब मैन्हु मरतन, तेन्चरे एक्की मैनेरे केरनेरे सेईं यानी यीशु मसीहे वजाई सेईं सारे फिरी मुड़दे जीते किये गाले। ²³ पन हर कोई ठीक तरीके

सेइं ज़िन्दगरे लेइ वापस एज्जेलो, पन मसीह मुडदन मरां जीतो भोनेबालो पेइलोए, फिरी ज़ैन लोकां केरो रिशतो तैस सेइं साथी आए, तैना भी जीते भोले। 24 एसेरां पत्ती, मसीह सैरी दुष्ट शेक्ति नाश केरेलो ज़ैना परमेशेरी खलाफत केरतिन। ते दुनियारो खातमों भोलो। तैखन मसीह, अपने बाजी परमेशर अपनू राज़, राज़ केरनेरे लेइ पूरे तरीके सेइं देलो। 25 मसीहे तेइस तगर राजेरू जेरू राज़ केरनू जरूरीए, जांतगर परमेशर तैसेरे सारे दुश्मन्न तैसेरे अधीन न केरे। 26 सेब्बना आखरी ज़ै दुश्मन खतम कियो गालो तै मौते। 27 ज़ैखन पवित्तरशास्त्र ज़ोते परमेशेरे सब किछ तैसेरे अधीन मां केरेलो त इस मां परमेशर नई, किजोकि सब किछ मसीहेरे अधीन केरनेबालो परमेशेरे। 28 ते सब किछ परमेशेरे मट्टेरे अधिकारे मां केरनेरे बाद, तैखन तै अपनो आप रोडे चारे परमेशेरे अधिकारे मां केरेलो, ज़ैने तैस अधिकार दित्तो। सिर्फ परमेशर अकैल्लो प्रभुए तैए हर एक्की मां, ते हर गल्ली मां कम केरते।

29 हुनी तुस इस बारे मां सोचा, तुसन मां किछ एरे आन ज़ैना मरे लोकां केरे लेइ बपतिस्मो नेतन, ते कोई तैन बपतिस्मो देते, अगर जेन्चरे किछ लोक ज़ोतन, विश्वासी लोक मुडदन मरां जीते नई भोने, त फिरी एन केरनेरी कोई कीमत नई ते फिरी एन केरनेरी वजा नई। 30 ते इश्शे लेइ, अगर मुडदे जीते किये गान त अपनो आप खतरे मां रखनो बेवकूफी आए। 31 हे ढलाव ते बेइनव, इन पक्कू आए कि तुश्शे बारे मां घमण्ड केरताई, किजोकि तुस इश्शे प्रभु यीशु मसीह मां आथ, इन भी पक्कू आए कि अवं रोज़ मौतरे खतरे मां राताई। 32 मीं इफिसुस नगरे मां बेडि तैन केरे वजाई सेइं मुशकलां झैल्ली ज़ैना मेरी खलाफत केरते थिये, तैना जंगली जानवरां केरे ज़ेरे थिये। लोकां केरे खियाले सेइं मीं तैन मुशकलन सेइं कुन हासिल कियूं? किछ भी नई। एल्हेरेलेइ इन साफे कि मुडदे दुबारां जीते न किये गान, त इन रोडूए ज़ैन लोक ज़ोने लोरेन, “एज्जा, खाम पीम, किजोकि असेईं कालां मरनू आए ते इन सब खतम भोनू।” 33 ज़ैना एरी गल्लां ज़ोतन तैन केरे वजाई सेइं बेवकूफ न बना, “बुरी संगती रोडे चाल-चलने बगाडतीए।” 34 तुस अपने सोचरे रोडी बत्तां वापस एज्जा ते पाप केरनो शारा। किजोकि तुसन मां किछ एरे आन ज़ैन केरो रिशतो परमेशेरे सेइं साथी नई। अवं तुसन छिथानेरे लेइ इन ज़ोताई।

????? ?????? ??????

35 पन किछ पुछतन, “कि मुडदे केन्चरे जीते भोतन, ते केरहे जिसमे मां एडतन?” 36 हे बे समझाव, बीजे पुड ध्यान देथ, ज़ैखन बीज बेवं गाते, त पोदो बन्ने करां पेइलू तैस मरनू पते। 37 ते ज़ैन तू बेतस, चाए इन गेहुं भोन या होरू किछ। इन ज़ै भोनेबालो पोदोए एन तैसेरू जेरू नई। 38 तैस बेनेरे पत्ती परमेशर तैस एपनी मेरजरे मुताबिक बडाते जांतगर गेहुं केरि या होरि आन्नेरे डाल बांदे न भोन। 39 इस दुनियाई मां हर जीती चीजां अलग-अलग आन इन सेब्बी केरो जिसम अक्कां ज़ेरे नई। मैन्हु केरो जिसम केरो जिसम जानवरां केरो ज़ेरो नई। चलोडू केरो जिसम, मेछली केरो जिसम करां अलगे। 40 जेन्चरे इस धेरतली पुड बडे किसमां केरे जिसम भोतन तेन्चरे अम्बरे मां भी दिहाडो चाँदनी, ते तारे आन, पन अम्बरेरी चीजां केरि शोभा होरि ज़ेरीए ते धेरतरे चीजां केरि शोभा होरि ज़ेरि आए। 41 ते दिहाडेरी शोभा होरीए, चेंदनरी शोभा होरीए, ते तारां केरि शोभा होरीए, किजोकि तारे-तारेरी शोभाई मां फर्के।

42 मुडदां केरू जीतू भोनू भी एरू आए। ज़ै जिसम नाश भोनेरे हालती मां दबो गाते, पन ज़ैखन जीतो कियो गालो त कधी नाश न भोलो। 43 ज़ैखन अस मरतम (इश्शो जिसम) बदसूरत ते कमजोर भोतन। पन ज़ैखन तै दुबारां जीतो भोतो त तै बडे खूबसूत ते मज़बूत भोते। 44 जेन्चरे इश्शे जिसमे मास ते खूने सेइं आन, एरे जिसम आन ज़ैन परमेशेरो आत्मा ज़िन्दगी देते। ते इश्शे जिसम ज़ै मासे त कने खूनेरोए तैस जिसमे मां बेदलोलो, ज़ै परमेशेरो आत्माते तरफां दित्तो गाते। 45 पवित्तरशास्त्रे मां इन भी लिखोरूए, “कि पेइलो मैन्हु, मतलब आदम, जीतो प्राणी बनो,” त आखरी आदम, यानी मसीह, हमेशारी ज़िन्दगी देनेबालो बनो। 46 मासे ते खूने सेइं साथी पेइले जिसम वजूदे मां आए फिरी तैना जिसम ज़ैना परमेशेरो आत्मा देते। 47 पेइलो मैन्हु ज़मीनरो मतलब मित्ती सेइं बनोरो थियो, तेन्चरे दुइयोवं मैन्हु यानी मसीह, स्वर्गेरां ओरो थियो। 48 लोक ज़ैना इस धेरतरेन तैना धेरतरे पेइले मैन्हु आदमेरे ज़ेरेन। पन ज़ैना लोक स्वर्गेरिन तैना स्वर्गेरि मैन्हु यानी मसीहेरे ज़ेरे आन। 49 ते जेन्चरे असेईं तैसेरू रूप ज़ै मितारो थियूं धारण कियूं, तेन्चरे तैस ज़ै स्वर्गेरोए तैसेरू रूप धारण केरेमेले।

50 हे ढलाव ते बेइनव, इश्शे जिसम इस धेरती पुड मास ते खूने सेइं बनोरो भोते, अस एरे ज़ेरे जिसमे सेइं साथी स्वर्गे मां परमेशेरे राज़े मां रानेरे काबल न भोले। अस स्वर्गे मां अपने मरने बाले जिसमे सेइं साथी नरेइ बटमेले, ज़ै मरते, किजोकि तैडी कोई मौत नई। 51 शुना, अवं तुसन सेइं भेदेरी गल ज़ोताई, अस सब नई मरने, पन ज़ैखन

आखरी नइशिंगेरी आवाज भोली, त अस सब एक्की पले मां बेदलोनेम, ⁵²ते इन एक्की पले मां, जेन्चरे कोई चिप केरते, जैखन आखरी नइशिंगो बजाव गालो त जैना मरे थिये तैना जीते भोनेन ताके हमेशारे लेइ जीते रान, ते अस जैना जीतेम, इशशे जिसम बेदलोनेन। ⁵³किजोकि इशशो जिसम ऐसैनी सेइं मरते ते शइते, ते ई तैस जिसमे मां बेदलोई गालो जै कधे न मरे ते न शड़े। ⁵⁴जैखन इन भोलू, तैखन पवित्रशास्त्रे मां लिखोरू परमेशेरू तैन वचन पूरू भोलू, जैन ज़ोते, “मौत रोड़े च़ारे हाराई गाली ते तैसरू कोई वजूद न रालू।” ⁵⁵एन्चरे जैन पवित्रशास्त्रे मां लिखोरू तैन पूरू भोलू,

“हे मौत तेरी जीत कोड़ि राई?

हे मौत तेरो डस कोड़ि राव?”

⁵⁶मौती तकलीफ़ देनेरी शक्ति पापे करां मैलतीए, ते पापे कानूने करां शक्ति मैलतीए। ⁵⁷पन परमेशेरू शुक्र भोए, जै इशशे प्रभु यीशु मसीहेरे ज़िरिये पापे ते मौत पुड़ जीत देते। ⁵⁸हे मेरे टलारे ढ़लाव ते बेइनव, विश्वासे मां मज़बूत राथ ते गलत शिक्षाई सेइं न टेपलोथ, ते हमेशा प्रभुएरू कम जोशे सेइं केरा, किजोकि तुस इन ज़ानतथ, कि जैन किछ तुसेईं प्रभुएरे लेइ कियूं तैन बेफ़ैइदू नईं।

16

?????????? ??????? ?????? ???????

¹हुनी तुशशे तैस चन्देरे सवालेरे बारे मां जै यरूशलेम नगरेरे परमेशेरूरे लोकां केरे लेइ कियो गाते, तुसेईं भी तेन्चरे कियोरू लोड़े जेन्चरे मीं गलातियारे कलीसियान हुक्म दित्तो। ²हफतेरे पेइले दिहाड़े तुसन मरां हर कोई अपने आमदनेरे मुताबिक किछ एप्पू कां रखा, कि मेरे एजने पुड़ चन्दो अकोटो न केरनो पे। ³जैखन अवं तैड़ी भोई, अवं किछ लोकन भेज़ेलो जैन तुस चुनेले कि एना भरोसेरे काबलन, चन्दो घिन्तां यरूशलेम नगरे जो गान। अवं तैन कां चिट्ठी भी भेज़ेलो ताके विश्वासी लोक तैन केरे बारे मां ज़ानन्। ⁴ते अगर मेरू भी गानू ज़रूरीए, त तैना मीं सेइं साथी गाले।

????????????? ?????????? ??????? ?????? ??????????????????

⁵ते मकिदुनिया गानेरे बाद अवं तुसन कां एज्जी रावरोई, किजोकि मीं मकिदुनिया मेइं गानेरो बिस्तार बनरोए। ⁶भोइ सकते, अवं तुसन सेइं साथी किछ चिरे रुकेलो, शैइद पूरे हिवतडो, फिरी तुस जेरां मीं गानू भोलू, तेरहां मीं भेज़ां। ⁷अगर ई परमेशेरूरी मर्जी भोली, ते मीं उमीदे अवं बादे मां जादे चिरेरे लेइ तुसन कां एज्जेलो, न कि इस वक्ते थोड़े चिरेरे लेइ। ⁸पन अवं पेन्तिकुसत तिहारे तगर इफिसुस नगरे मां रानोई। ⁹किजोकि मीं बड़ो रोड़ो मौको मैलोरे जैस सेइं अवं तैन कम केरि सकताई जेसेरो अस्सर बड़ोए, चाए बड़े लोक मेरी खलाफत केरनेबाले आन।

¹⁰अगर तीमुथियुस एज्जे, त तैस कबूल केरा, तैसेरी रोड़े च़ारे आदर केरा, किजोकि तै मेरो ज़ेरो प्रभुएरू कम केरते। ¹¹एल्हेरेलेइ कोई तैस घटिया न समझे, पन तैन केरे सफरेरे लेइ जै ज़रूरते तैन खुशी सेइं देथ। ताके मीं कां एज्जन, किजोकि अवं तैस लोरोई बलगने, कि तै विश्वासी ढ़लान सेइं साथी एज्जे। ¹²ते विश्वासी साथी अपुल्लोसे सेइं मीं बड़ी बिनती की, कि तुसन कां होरि विश्वासी मैनन् सेइं साथी गाए जैना तुसन सेइं मिलने ओरेन। पन तैनी इस वक्ते गानू न चाव, पन जैखन ठीक वक्त भोलो, तैखन एज्जेलो।

?????? ??????? ?? ?????????????

¹³खबरदार राथ, विश्वासे मां मज़बूत भोथ, हिम्मत रखा, मज़बूत भोथ। ¹⁴जैन किछ केरतथ तैन प्यारे सेइं केरा।

¹⁵हे ढ़लाव ते बेइनव, तुस स्तिफनासेरे टब्बरे ज़ानतथ, कि तैना अखाया इलाकेरे, पेइले मसीह पुड़ विश्वास केरनेबालेन, ते परमेशेरूरे लोकां केरि महत केरनेरे लेइ जैन किछ केरि बटते थिये तैनेईं तैन कियूं। ¹⁶अवं तुसन कां बिनती केरताई कि एरे लोकां केरे अधीन राथ, बल्के तैन केरे भी जैना इस कम्मे मां मेहनत केरतन ते महत केरनेबालन। ¹⁷ते अस स्तिफनास ते फूरतूनातुस ते अखइकुसेरे एजने सेइं खुश आई, किजोकि जेइस तुस इडी न थिये, तैनेईं मेरी ज़रूरतां पूरी केरनेरे लेइ मेरी महत की। ¹⁸जेन्चरे तुसेईं अवं खुश कियो, तेन्चरे तैनेईं भी अवं खुश कियो, एल्हेरेलेइ एरे लोकां केरि तारीफ़ केरा।

19 आसिया इलाकेरे कलीसियां केरे सारे विश्वासी लोकां केरे तरफां तुसन नमस्कार; अक्विला ते तैसेरी कुआन्श प्रस्कारे तरफां ते तैन केरे घरे कलीसियाई भी तुसन प्रभु मां हछु-हछु नमस्कार। 20 इट्टेरे विश्वासी लोक तुसन नमस्कार ज़ोतन, मसीहेरे प्यारे सेइं एक्की होरि जो नमस्कार केरा।

21 अवं पौलुस अपने हथ्थे सेइं नमस्कार लिखताई। 22 अगर कोई प्रभु सेइं प्यार न रखे तै लानती भोए, हे इश्शे प्रभु एई! 23 प्रभु यीशुएरो अनुग्रह तुसन पुड़ भोतो राए। 24 अवं तुसन सेब्बन सेइं प्यार केरताई जैन केरो रिश्तो यीशु मसीह सेइं साथीए। आमीन।

2 कुरिन्थियों

????????

1 अवं पौलुस परमेशेरे मेर्जी सेइं यीशु मसीहेरो प्रेरिताई, मेरे त कने ढला तीमुथियुसेरे तरफां ई चिट्ठी परमेशेरेरी तैस कलीसियारे नंवे, जै कुरिन्थुस मांए, ते सारे अखाया इलाकेरे सब पवित्र लोकां केरे नंवे, 2 इशशे बाजी परमेशेर ते प्रभु यीशु मसीहेरे तरफां तुसन अनुग्रह ते शान्ति मैलती राए ।

???????????????? ????????? ?????????

3 परमेशेरू शुक्र भोए जै इशशे प्रभु यीशु मसीहेरो बाजी, जै दया केरनेबालो बाजीए, ते जै असन हमेशा तसल्ली देनेबालो परमेशेरे । 4 तै इशशे सेब्भी मुसीबतन मां असन तसल्ली देते; ताके अस तैस तसेल्लरे वजाई सेइं जै परमेशेर असन देते, तैन भी तसल्ली देइ बटम, जैना कोन्ची वजाई सेइं मुसीबतन मां आन ।

5 किजोकि जेन्चरे मसीहे दुःख झैलोरेन तेन्चरे अस भी दुःख झैल्लतम, एल्हेरेलेइ असन तसल्ली भी मसीहेरे जिरिये जादे भोतीए । 6 अगर अस दुःख झैल्लतम, ते ई तुशशे तसल्लरे ते तुशशे मुक्तरे लेइए ते अगर असन तसल्ली मैलतीए, ते ई तुशशे तसल्लरे लेइ आए; जेसेरे अस्सरे सेइं तुस सबरी सेइं तैना दुखन झल्लतथ, जैना अस भी झल्लतम । 7 ते इशशी उमीद तुशशे बारे मां पक्कीए; किजोकि अस जानतम, कि जेरे दुःखन तुसेईं असन सेइं साथी झैल्ले, तेरी तसल्ली तुसन भी असन सेइं साथी मैलेली, जै असन परमेशेर देलो ।

8 हे ढलाव ते बेइनव, अस न चाम कि तुस इशशे तैस दुखे करां अनजान राथ, जै आसिया इलाके मां असन पुड़ अव, कि एरो भारी बोझ असन पुड़ ओरोए थियो, जै इशशे लेइ छूनो मुशकिल थियो, इड़ी तगर कि असन अग्रोवं जो जीनेरी कोई उमीद न थी । 9 बल्के असेईं अपने मने मां समझोरू थियूं, कि अस मारे गानेम ते अस अपनो भरोसो न रखम, बल्के परमेशेरे पुड़ भरोसो रखम जै मुड़दन जीते केरते । 10 तैने अस एत्रे बडे मौतरे खतरे करां बचाए, ते बचालो; ते तैस करां इशशी ई उमीदे, कि तै अग्रोवं भी बचातो रालो ।

11 तुस भी मिलतां प्रार्थनाई सेइं इशशी मद्दत केरेले, कि जैना बरकतां असन बड़ां लोकां केरे जिरिये मैली, किजोकि परमेशेरे अनुग्रहे सेइं इशशी हाफजतरे लेइ बेड़ि प्रार्थनां शुन्नी, तैल्हेरेलेइ बडे लोक इशशू भोतू परमेशेरू शुक्र केरन ।

???????????????? ????????????? ????????? ?????????????????????

12 किजोकि अस अपने इस जमीरे गुवैही पुड़ घमण्ड केरतम, कि दुनियाई मां, खास केरतां तुसन मां इशशो चालचलन परमेशेरे लायिक ते पवित्रतैई ते सचैई सेइं थियो । जै दुनियारे ज्ञाने सेइं नई, बल्के परमेशेरेरे अनुग्रह सेइं साथी थियो । 13 अस हमेशा तुसन इन लिखतम ताके तुस पढथ ते समझथ, ते मीं उमीदे, कि आखरी तगर समझते भी राले । 14 जेन्चरे तुसन मरां केतरेई मन्नोरू भी आए, कि अस तुशशे धुमण्डेरी वजाम; तेन्चरे तुस भी प्रभु यीशुएरे वापस एजनेरे दिहाडे इशशे लेइ घमण्डेरी वजा भोले ।

???????? ?????????????

15 ते इस भरोसे सेइं, अवं चातो थियो कि पेइलो तुसन कां एज्जी; कि तुसन दुगानी बरकत मैल्ले । 16 ते तुसन मेइं निस्तां मकिदुनिया इलाके जो गेईं ते फिरी मकिदुनयारां तुसन कां एज्जी, ते तुस मेरी सफेरी जेरूतरे मुताबिक मद्दत केरतां यहूदिया इलाकेरे पासे किछ दूर पुजाथ ।

17 एल्हेरेलेइ मीं जैने ई इच्छा कियोरी थी कुन मीं चंचलता हिराई? या जैन केरनू चाताई कुन दुनियारे लोकां केरे जेरू केरनू चाताई, कि अवं गल्ली मां हाँ, हाँ भी केरि; नई, नई भी केरि? 18 जेन्चरे परमेशेर वफादारे, तेन्चरे कि इशशे तैस वचने मां जै तुसन सेइं ज़ोवं, “हाँ” ते “नई” दुइये न मैल्ले ।

19 किजोकि परमेशेरू मट्टू यीशु मसीह जेसेरो इशशे जिरिये मतलब मेरे ते सिलवानुस ते तीमुथियुसेरे जिरिये तुसन मां प्रचार भोव; तैस मां “हाँ” ते “नई” दुइये न थी; पन तैस मां “हाँ” ए “हाँ” भोइ । 20 किजोकि परमेशेरेरे जेत्रे वादेन, मसीह मां हांए सेइं आन, एल्हेरेलेइ मसीहेरे जिरिये आमीन भी भोइ, कि इशशे जिरिये परमेशेरेरी महिमा भोए ।

21 ते जै असन तुसन सेइं साथी मसीह मां मजबूत करेते, ते जैने इशू अभिषेक कियोरूए, तैए परमेशरे। 22 जैने असन पुड़ छाप भी की, ते जेन्चरे कोन्ची चीजरे लेइ साईं देतन तेन्चरे तैनी पेइली आत्मा इशू मने मां दिती।

23 परमेशर मेरे इस सचैइयरो गवाहे कि अवं कुरिन्थुस नगरे मां दुबारां एल्हेरेलेइ नई ओरोए कि अवं तुसन दुःख देनो चातो थियो। 24 इन नई, कि अस विश्वासेरे बारे मां तुसन पुड़ राज़ केरनू चातम; पन तुशशे आनन्दे मां तुशशी महत्त करेनेबाले आम, किजोकि तुस विश्वासे सेइं मजबूत रातथ।

2

1 मीं अपने मने मां इन थापेरू थियूं, कि फिरी तुसन कां एइतां तुसन दुख न देई। 2 किजोकि अगर अवं तुसन दुखी केरि, त मीं आनन्द देनेबालो कौन भोलो, सिर्फ तैए जै मीं दुखी कियोरूए?

3 ते मीं ई गल तुसन एल्हेरेलेइ लिखी, कि एरू न भोए, कि मेरे एजने पुड़ जैन सेइं आनन्द मैल्लेरो लोइतो थियो, अवं तैन करां दुखी भोई; किजोकि मीं तुसन सेबन पुड़ इस गल्लरो भरोसोए, कि जै मेरो आनन्दे, तैए तुशशो सैरी केरो भी आए। 4 मीं बडे दुःख, ते मनेरे कष्टे सेइं, बडे ऐंखरन सेइं तुसन चिट्ठी लिखोरी थी, एल्हेरेलेइ नई, कि तुस दुखी भोथ, पन एल्हेरेलेइ कि तुस तैस बडे प्यारे जानथ, जै मीं तुसन सेइं आए।

????? ????????? ????????

5 ते अगर केन्चे दुखी कियोरूई, त अवं नई बल्के (तैस सेइं बडी सखती न केरि) किछ-किछ तुस सब दुखी कियोरूथ। 6 एरे मैनेरे लेइ ई सजा जै विश्वासी दलान मरां बडेई दिती, सुद्धी आए। 7 एल्हेरेलेइ इस करां इन रोडूए कि तैसेरो पाप माफ़ केरा; ते तैस तसल्ली देथ, एरू न भोए कि एरो मैन्हु उदैसी मां डुबे।

8 एल्हेरेलेइ अवं तुसन कां बिनती केरताई, कि तैस अपने प्यारेरू सबूत देथ। 9 किजोकि मीं एल्हेरेलेइ भी लिखोरू थियूं, कि तुसन पेरखी, कि तुस मेरे सब गल्लां मन्नेरे लेइ तियार आथ या नई। 10 जैस तुस माफ़ केरतथ तैस अवं भी माफ़ केरताई, किजोकि मीं भी जैन किछ माफ़ कियोरूए, अगर कियेरू भोए, त तुशशे वजाई सेइं मसीहेरे ठैरी भोइतां कियोरूए। 11 कि शैतानेरो असन पुड़ दावो न चले, किजोकि अस तैसेरी चालन करां अनजान नई।

????????? ???? ?????????????? ??????????

12 ते जैखन अवं मसीहेरी खुशखबरी शुनाने त्रोआस नगरे मां अव, ते प्रभुए मेरे लेइ अक बत खोल्ली। 13 त मेरे मने मां चैन न भोइ, एल्हेरेलेइ कि मेरे विश्वासी दला तीतुसे तुशशे एट्टां कोई खबर घिन्तां न अव; ते अवं त्रोआसेरे विश्वासी लोकन करां अलग भोइतां अवं वापस मकिदुनिया इलाके मां अव।

?????? ???? ??????? ?? ?????

14 परमेशेरू शुकर भोए, जै मसीह मां सदा असन जीतारे जशने मां चलाते, ते अपने ज्ञानेरे खुशबू इशू जिरिये हर ठैरी फैलाते। 15 किजोकि अस परमेशरे कां मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम।

16 केत्रा केरे लेइ त मनेरे मुशक, ते केत्रन जो ज़िन्दगरे लेइ ज़िन्दगरी खुशबू, ते इन गल्लां केरे काबल कौने? 17 किजोकि अस तैन केरे जेरे नई, जैना परमेशेरू वचन पेइंसां केरे लेइ प्रचार केरतन, पन अस मनेरी सचैई सेइं, ते परमेशेरे तरफां परमेशर हाज़र समझतां मसीह मां ज़ोतम।

3

????????? ??????

1 कुन अस दुबारा फिरी अपनि बड़याई करेने लगम? या असेईं केत्रा केरि जेरि सुपारशारी चिट्ठी तुसन कां ऐनिन या तुसन करां नेनिन? 2 तुस एप्पू इशू लेइ चिट्ठी केरे जेरेथ, जैना इशू लेइ सुपारश केरतिन, जैना इशू दिले पुड़ लिखोरिथ, तैन हर कोई पेढी सकते ते जैना रोड़ां कम्मां असेईं कियोरन, तैन लोक पिशैनी सकतन। 3 इन बांदूए, कि तुस मसीहेरे चिट्ठी केरे जेरेथ, जैना असेईं सेवकां केरि जेरि लिखी; ते जैना शैही सेइं नई, पन ज़ीते परमेशेरी आत्माई सेइं घोड़ां केरे तेखती पुड़ नई, बल्के दिलेरे मासेरे तेखती पुड़ लिखोरिन।

4 अस मसीहेरे जिरिये परमेशरे पुड़ एरू याकीन रखतम। 5 इन नई, कि अस अपने आपे सेइं इस काबलम, कि एप्पू कोन्ची गल्लरे बारे मां सोची बटम; पन इशू काबलीत परमेशरे तरफां आए। 6 जैनी अस नव्वे करारेरे सेवक भोनेरे

काबल भी किये, मूसेरे कानूनेरे सेवक नई बल्के पवित्र आत्मा सेइं; किजोकि मूसेरो कानून न मन्नेरो नितीजो मौत भोते, पन पवित्र आत्मा हमेशारी ज़िन्दगी देते।

7 ज़ैखन मूसेरो कानून ज़ेसेरे ज़िरिये मौत एइती ज़ेसेरे लफस घोड़ां केरे तेखतिन पुड़ घेड़तां लिखोरे थिये, इड़ी तगर महिमा बाले भोए, कि इस्राएली लोक मूसेरे तुतरेरां तेकि न थी बटते, पन तै जादे वक्ते तगर न राव, 8 ते आत्मारो करार होरो भी महिमा बालो किना भोलो?

9 किजोकि दोषी ठहराने बालो करार महिमा बालो थियो, ते धर्मी बाने बालो करार होरो भी महिमा बालो किना भोए! 10 ते ज़ै पुरानो महिमा बालो करार थियो, तै नव्वें करारे करां महिमा बालो न भोव। 11 किजोकि मूसेरू कानूने ज़ेसेरी महिमा थोड़े वक्तेरे लेइ थी, महिमा बालो थियो, त तै नव्वों करार ज़ै कायम रालो, होरू भी महिमा बालू किजो न भोलो!

12 एल्हेरेलेइ एरी उमीद रेखतां अस दिलेरी सेइं ज़ोतम। 13 अस मूसेरे ज़ेरे नई, ज़ैने अपने तुतरे पुड़ पड़दो रखोरो थियो ताके इस्राएली लोक तैस घटने बैली महिमारो अन्त न लहन।

14 पन तैन केरे मन सखत भोए, किजोकि अज़ तगर पुरानो नियम पढ़ते बार तैन केरे मन्न पुड़ तैए पड़दो रहते; पन पड़दो सिर्फ तै मसीह पुड़ विश्वास केरने सेइं उठते। 15 ते अज़ तगर ज़ैखन भी मूसेरो कानून पढ़ो गाते, ते तैन केरे मन्न पुड़ सदा पड़दो रहते ते तैन रोड़े चारे समझ न एज्जे। 16 पन ज़ैखन भी तैना प्रभु यीशु पुड़ विश्वास केरेले, तैखन तै पड़दो दूर भोलो।

17 प्रभु त आत्मा आए, ते ज़ैड़ी भी प्रभुएरो आत्माए तैड़ी कानूने करां आज़ादी आए। 18 पन ज़ैखन इश्शे सेब्बी केरे बगैर पड़दे तुतरन सेइं प्रभुएरू प्रकाश बांदू भोते, ज़ेन्चरे शीशे मां, ते प्रभुएरे ज़िरिये ज़ै आत्माए, अस प्रभुएरे महिमा बाले रूपे मां थोड़े-थोड़े बदलते रातम।

4

?????? ???? ???? ??

1 एल्हेरेलेइ अगर असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम। 2 पन असेईं शरमरां छुपोरां कम्मां शारोरन, ते न च़लैकी सेइं च़लते, ते न परमेशेरे वचन मां मलावट केरम। पन परमेशर इश्शो गवाहे कि अस सच़ ज़ोतम, ते हर कोई गवाही देते कि इन सच़े।

3 पन अगर इश्शे खुशखबरी पुड़ पड़दोए, त ई नाश भोने बालां केरे लेइए। 4 ते तैन विश्वास न केरनेबालां केरे लेइ, ज़ैन केरे अक्ल इस दुनियारे ईश्वर शैताने कानी कियोरीए, ताके मसीह ज़ै परमेशेरेरू रूपे, तैसेरी महिमा खुशखेबरी लौ तैन पुड़ न चमके।

5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाई सेइं तुश्शे सेवकम। 6 एल्हेरेलेइ कि परमेशर तै आए ज़ैनी ज़ोवं, “कि आंधरे मरां लौ चमके,” ते परमेशेरे इश्शे दिलन मां लोअरी ज़ेरि समझ दिती, कि अस परमेशेरी महिमा पिशानम ज़ै यीशु मसीह मां लेइहोई।

7 पन अस मितारे भांडां केरे ज़ेरेम ज़ैन मां धन रखेए, कि ई हछ्छी शक्ति इश्शे तरफां नई, बल्के परमेशेरे तरफां भोए। 8 अस च़ेवरे पासना दुःख त झल्लतम, पन मुशकली मां न पेम; घबरातम, पन न उमीद न भोम। 9 सताए त गातम, पन शारे न गाम, बछ्छोड़े त गातम पन नाश न भोम। 10 अस यीशु मसीहेरी मौत अपनि जानी मां हर वक्त च़लातम; कि ज़ैन किछ़ अस केरतम तैसेरे ज़िरिये लोक यीशुएरी ज़िन्दगी हेरेले।

11 किजोकि इश्शे जीते सांसेइं, सदा यीशुएरे वजाई सेइं असन मौतरे खतरो भोतो थियो, कि यीशुएरी ज़िन्दगी भी इश्शे नाश भोनेबाले जानी मां बांदी भोए। 12 अस त मौतरे खतरे मां जीतम पन इसेरो नितीजो तुश्शे लेइ हमेशारी ज़िन्दगीए।

13 ते एल्हेरेलेइ कि असन मां तैए विश्वासेरी आत्माए, “जेसेरे बारे मां पवित्रशास्त्रे मां लिखेरूए, कि मीं विश्वास कियो, एल्हेरेलेइ मीं ज़ोवं” एल्हेरेलेइ अस भी विश्वास केरतम ते ज़ोतम। 14 किजोकि अस ज़ानतम, ज़ैन प्रभु यीशु मुड़दन मरां जीतो कियो, तैए असन भी यीशु मसीह मां हिसेदार समझतां जीते केरेलो, ते तुसन सेइं साथी अपने सामने हाज़र केरेलो। 15 किजोकि सारे दुःख ज़ैना असन पुड़ आन, तुश्शे लेइ आन, ताके परमेशेरो अनुग्रह जादे करां जादे लोकन मसीह कां आने, ते बड़े लोक परमेशेरेरू शुक्र केरेले।

16 एल्हेरेलेइ अस दिलेरी न शारम; अगर इशशी बेइरीं इन्सानयत नाश भी भोए, त फिरी भी इशशी एनत्तीं इन्सानयत रोज़ नर्वीं भोती रहतीए। 17 किजोकि इशशो एक्की पलेरो थोड़ो ज़ेरो दुःख बड़ी ते हमेशारी महिमा पैदा केरते, ज़ेसेरी तुलना केन्ची सेइं न केरोए। 18 ते अस त लेवरी चीज़न नईं पन अलैई चीज़न लाते रातम, किजोकि लेवरी चीज़ां थोड़े दिहाड़ां केरे लेइ आन, पन अलैई चीज़ां हमेशारे लेई आन।

5

????? ?????????? ??

1 किजोकि अस ज्ञानतम, कि ज़ैखन इशशो जिसम ज़ै धेरतली पुड़े ते तेम्बेरो ज़ेरो आए मेरतां नाश भोलो, त असन परमेशेरी तरफां स्वर्गे मां अक भवन मैलनोए, ज़ै हथ्यां केरो बनावरो नईं बल्के हमेशारोए। 2 इस मां अस बड़ कर लातम, ते बड़ी इच्छा केरतम; कि असन एरो जिसम मैले ज़ै स्वर्गेरे घरेरो ज़ेरो भोए। 3 कि ज़ैखन असन स्वर्गेरो जिसम मैल्ले त अस नग्गे न लेइहोम।

4 ते अस इस तेम्बेरे ज़ेरे घरे मां रेइतां बोझे सेइं देबोइतां कर लाते रातम; किजोकि अस दुनियारो जिसम शारनो न चाम, बल्के इन चातम कि परमेशर असन स्वर्गेरो जिसम दे, ताके ज़ै मरने बालो जिसमे तै न मरे बल्के हमेशारे ज़िन्दगी मां बेदलोए। 5 ते ज़ैनी अस इस नव्वें जिसमेरे लेइ तियार कियोरेम ज़ै असन मैलनोए, तै परमेशरे, ज़ैने असन ज़ेन्चरे साईं देतन तेन्चरे पवित्तर आत्मा भी दित्तोरोए।

6 असन सदा पूरू याकीने ते इन ज्ञानतम; कि ज्ञांतगर अस जिसमे मां रातम, तांतगर अस प्रभु करां अलग आम ज़ै स्वर्गे मां आए। 7 किजोकि अस शकल हेरतां नईं, पन विश्वासे सेइं जीतम। 8 एल्हेरेलेइ अस हिम्मत केरते रातम, ते जिसमे करां अलग भोइतां ज़ैखन अस मरमेले त प्रभु सेइं साथी रानू जादे रोड़ू समझतम।

9 एल्हेरेलेइ इशशे मनेरी उमंग ईए, कि चाए अस स्वर्गे मां तैस सेइं साथी रहम, चाए अलग इड़ी धेरती पुड़ रहम पन अस तैस पसंद एइते रहम। 10 किजोकि ज़रूरीए, कि इशशो सेब्भी केरो हाल मसीहेरे आदालतरे तखतरे सामने खुल्ले, कि हर कोन्ची मैन्हु अपने रोड़ां बुरां कम्मां केरो बदलो मैल्ले ज़ैना तैने जिसमे सेइं कियोरेन।

????? ??? ???? ?????? ??????????

11 अस प्रभुएरो डर मेन्तां लोकन कां बिनती केरतम कि सच्चे पुड़ विश्वास केरन, ते परमेशर रोड़े च़ारे ज्ञानते; ते मेरी उमीद ईए, कि तुस भी अपने दिले मां असन रोड़े च़ारे ज्ञानथ। 12 अस फिरी भी अपनी बड़याईं तुशशे सामने न केरम, बल्के अस अपने बारे मां तुसन घमण्ड केरनेरो मौको देतम, कि तुस तैन जुवाब देइ बटतथ, ज़ैना मने पुड़ नईं, बल्के दिखवटी गल्लन पुड़ घमण्ड केरतन।

13 अगर कोई ज़ोते कि अस पागलम, त परमेशेरे लेइ अहम; ते अगर कोई ज़ोते कि अस रोड़े अहम त तुशशे लेइ आम। 14 किजोकि मसीहेरो प्यार असन मजबूर केरते; एल्हेरेलेइ कि असन याकीने कि ज़ैखन अक मैन्हु सेब्भी केरे लेइ मरो जेव त सब मेरि जे। 15 ते मसीह एन्चरे सेब्भी केरे लेइ मरो, कि ज़ैना जीते आन, तैना अग्रोवं जो अपने लेइ न ज़ीन पन तैसेरेलेइ ज़ै तैन केरे लेइ मरो ते फिरी ज़ीतो भोव।

16 एल्हेरेलेइ अजेरां पत्ती अस कोन्ची दुनियारे मुताबिक न समझाम, ते अगर असेईं भी मसीह दुनियारे मुताबिक ज्ञानोरो थियो त फिरी भी अज़ेरे पत्ती फिरी एरू न ज्ञानम। 17 ते अगर कोई मसीह मां आए त तै नर्वीं स्रष्टि आए, पुरैनी गल्लां बीती जेई; हेरा, तैना सब नेर्वीं भोइजेइ। 18 ते सब गल्लां परमेशेरी तरफन, ज़ैने मसीह भेजतां फिरी इशशो मेल मलाप एप्पू सेइं कराव, ते लोक तैस सेइं मेल मिलाप केरन ई सेवा परमेशरे असन सौफोरीए। 19 मतलब परमेशरे मसीह मां भोइतां एप्पू सेइं साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नईं लोरो, ते परमेशरे मेल मलापेरो बिस्तार असन सौफोरोए।

20 अस मसीहेरे राजदूत अहम; मन्ना कि परमेशर इशशे ज़िरिये बिनती केरते कि तुस तैसेरो सन्देश कबूल केरथ, अस मसीहेरे तरफां बिनती केरतम, कि परमेशरे सेइं साथी मेल मिलाप केरा। 21 मसीह पापे करां अनजान थियो, तैए परमेशरे इशशे लेइ पापी ठहराव, कि अस परमेशेरी नज़री मां धर्मी बनम किजोकि मसीहे इशशी पापां केरि सज़ा भुगतोरीए।

6

1 अस ज़ैना परमेशरे सेइं साथी कम केरनेबाले आम ई भी बिनती केरतम, कि परमेशेरो अनुग्रह ज़ै तुसन पुड़ भोरोए, ज़ैया न भोने देथ। 2 किजोकि परमेशर पवित्तरशास्त्रे मां ज़ोते,

“कबूल करनेरे वक्ते मीं तेरी शुनी,
ते मुक्तरे दिहाड़े मीं तेरी मद्दत की,”
हेरा, हुना तै कबूल करनेरो वक्ते, हरा, हुना तै मुक्तरी दिहाड़ीए।

³अस परमेशरे सेइं साथी कम करनेबाले केन्ची भी गल्ली मां कोई भी मौको न देम, कि इशशी सेवाई पुड़ कोई दोष लाए। ⁴पन हर गल्ली सेइं परमेशरेरे सेवकां केरे जेरे अपने रोड़े गुन्न बांदे केरतम, बड़े सबरी सेइं, दुःख सेइं, शारे गाने मां, मुशकलन सेइं। ⁵कोड़े खाने सेइं, कैद भोने सेइं, हैल्लन सेइं मेहनती सेइं, बीझे बिशने सेइं, बरत रखने सेइं। ⁶पवित्रतैई सेइं, ज्ञाने सेइं, सबरी सेइं, दयाई सेइं, पवित्र आत्मा सेइं। ⁷सच्चे प्यारे सेइं, सच्चे वचने सेइं, परमेशरेरे शेक्ति सेइं; अस धार्मिकतारे हथियारन इस्तेमाल केरतम, देइने हथ्थे सेइं हमलो करनेरे लेइ ते खिशड़े हथ्थे सेइं अपना आप बचानेरे लेइ।

⁸ते ज़ैखन लोक इशशी इज्जत केरतन या असन बेइज्जत केरतन, ज़ैखन लोक ज़ोतन अस रोडेम या बुरे मैनूम, अस ईमानदारम फिरी भी लोक झूठ ज़ोतम। ⁹अनज़ाना केरे ज़ेरेम; फिरी भी मुशूरम, मरने बालां केरे ज़ेरेम पन हेरा ज़ीतेम, मार खाने बालां केरे ज़ेरेम, पन जानी सेइं न मैरोम। ¹⁰दुःख करनेबालां केरे ज़ेरेम, पन सदा आनन्द केरतम, कंगालम, पन बड़े लोकन आत्मिक धनी केरतम; एरेम कि असन कां किछ भी नई फिरी भी सब किछ रखतम।

¹¹हे कुरिन्थिस नगरेरे विश्वास लोकव, असेईं तुसन सेइं खुलतां गल्लां कमेई, अस तुसन सेइं पूरे दिले सेइं प्यार केरतम। ¹²इशसे मने मां तुशसे लेइ बड़ी ठारे, पन तुशसे मन्न मां नई। ¹³पन अवं बच्चे सेमझतां तुसन सेइं ज़ोताई, कि तुस भी तैसेरे बदले असन सेइं प्यार केरा।

???? ???? ???? ???? ???? ???? ???? ?

¹⁴गैर विश्वासी लोकां केरे संगती मां न गाथ, किजोकि धार्मिकता ते अधर्मेरो कुन मेल जोल? या लौ ते आंधरेरो कुन साथ? ¹⁵ते मसीहे शैताने सेइं कुन लगाव? या विश्वास करनेबालेरो विश्वास न करनेबाले सेइं कुन तालमेल? ¹⁶ते परमेशरे मन्दरेरे मां मूरती केरे लेइ कोई ठार नई, किजोकि अस त ज़ीते परमेशरेरां मन्दर अहम; जेन्चरे परमेशरे पवित्रशास्तरे ज़ोवं,
“अवं तैन लोकन साथी रेइलो ते तैन मां चलैलो फिरैलो;
ते अवं तैन केरो परमेशर भोनोई,
ते तैना मेरे लोक भोले।”

¹⁷एल्हरेलेइ प्रभु पवित्रशास्तरेरे ज़िरिये ज़ोते,
“विश्वास न करनेबालन मरां निस्सा
ते अलग राथ;
ते अशुद्ध चीज़न करां दूर राथ;
ते अवं तुसन कबूल केरेलो।

¹⁸ते तुशशो बाजी भोइलो,
ते तुस मेरां मट्ठां ते कुइयां भोलां,
इन सर्वशक्तिमान प्रभु परमेशेरै वचने।”

7

¹किजोकि हे ट्लाराव परमेशरे वादो कियोरो कि तै असन अपने बच्चां केरे रूपे मां कबूल केरेलो, त एज्जा, अस अपने आपे ते जिसमेरी ते आत्कारी सब गंदगी शुद्ध केरम, ते परमेशरेरो डर मेन्तां ते इज्जत केरतां, ते परमेशरेरी बत्तां चलनेरे लेइ पूरे तरीके सेइं पवित्र ज़िन्दगी ज़ीम।

???????? ???? ?

²असन अपने दिल मां ठार देथ, असेईं केन्ची सेइं बेइन्साफी नई कियोरीए, न केन्चेरू किछ बिगाड़ेरूए, ते न कोई ठगगोरोए। ³अवं तुसन दोषी बनानेरे लेइ इन नई लगगोरो ज़ोने, किजोकि मीं इन पेइलू ज़ोरूए, कि तुस इशसे मने मां बसोरेथ कि अस तुसन साथी मरने ज़ीनेरे लेइ तियारम। ⁴अवं तुसन सेइं बड़े दिलेरी सेइं ज़ोने लोरोई, मीं तुसन पुड़ बडू घमण्डे, अवं तसल्ली सेइं भेरोई जोरोई; अपने सारे दुखन मां अवं आनन्दे सेइं भरपूर राताई।

⁵किजोकि ज़ैखन अस त्रअस शैरतां मकिदुनिया इलाके मां आए, तैखन भी इशसे जानी चैन न भोइ, पन अस चेवरे पासना दुःख झल्लते राए, बेइर लडैई थी, अन्तर बेड़ि-बेड़ि गल्लां थी। ⁶फिरी भी उदासन तसल्ली देनेबाले

परमेश्वरे तीतुसेरे एजने सेइं असन तसल्ली दिती। 7 ते न सिर्फ तैसेरे एजने सेइं पन तैसेरी तैस तसल्ली सेइं, जै तैस तुसन करां मैलती थी; ते तैनी तुशशी इच्छा ते तुशशे दुःख ते मीं सेइं मिलनेरे जोशेरी खबर असन शुनाई, जैस सेइं होरो भी आनन्द भोव। 8 किजोकि अगर मीं अपनी चिट्ठी सेइं तुस दुखी किये, पन तैस करां पसतेईं न, जेन्चरे पेइलो पसतातो थियो, किजोकि अवं हेरताई तैस चिट्ठी सेइं तुसन दुःख त भोव पन तै थोड़े चिरेरे लेइ थियो। 9 हुनी अवं खुशी आई पन एल्हेरेलेइ नई कि तुसन दुःख पुजो, बल्के एल्हेरेलेइ कि तैस्से दुखेरे वजाई तुसेईं पापन करां मन फिराव। किजोकि तुशशो दुःख परमेश्वरेरे मेर्जी सेइं थियो, कि इशशे पासेरां तुसन कोई नुकसान न पुजे। 10 किजोकि परमेश्वरेरे भेक्तरों दुःख एरी पसतावो पैदा करते जैस सेइं मुक्ति मैलतीए, फिरी तैस सेइं पसतानू न पे, पन दुनियारो दुःख हमेशारी मौत पैदा करते। 11 ते हेरा, इस्से गल्ली सेइं तुसन परमेश्वरेरे भेक्तरों दुःख भोव, कि तुसन केतरो जोश, उजर, सरक, डर, इच्छा, मघन भोनू, ते सजा देनेरो खियाल पैदा भोव? तुसेईं सेभी तरीके सेइं इन सिद्ध कियूं, कि तुस इस गल्ली मां बेकसूर आथ। 12 फिरी मीं जैन तुसन जो सेखती सेइं लिखोरू थियूं, तैन न तैसेरे वजाई सेइं लिखू, जैने बेइन्साफी की, ते न तैसेरे वजाई सेइं जैस सेइं बेइन्साफी भोइ, पन एल्हेरेलेइ कि तुशशी सरगरमी जै इशशे लेइए, तै परमेश्वरेरे सामने तुसन पुड़ बांदी भोए। 13 एल्हेरेलेइ असन हिम्मत मैल्ली;

ते इशशी इस हिम्मती सेइं साथी तीतुसेरे आनन्द सेइं होरो भी आनन्द भोव किजोकि तैसेरो मन तुशशे वजाई सेइं हरो भरोए। 14 किजोकि अगर मीं तैसेरे सामने तुशशे बारे मां किछ घमण्ड हिराव, त छिथोव न, पन जेन्चरे असेईं तुसन सेइं सब गल्लां सन्न-सन्न जोरी थी, तेन्चरे इशशू घमण्ड हिरानू तीतुसेरे सामने भी सन्न निस्सू। 15 ते जैखन तैस तुशशो सेभी केरू हुक्मन मन्नेबाले भोनू याद एइते; किजोकि तुसेईं थरकते-थरकते तैस सेइं मुलाकात की; तैसेरो प्यार तुशशे पासेरां होरो भी बद्धतो गाते। 16 अवं खुश भोताई, किजोकि तुसन करां मीं हर गल्ली मां भरोसो भोते।

8

?????? ???? ???? ???? ???? ???? ?

1 हुनी मेरे द्लाव बेइनव, अस तुसन परमेश्वरेरे अनुग्रहेरी खबर देतम, जैन मकिदुनिया इलाकेरे कलीसियारे लोकन पुड़ भोरोए। 2 कि जैखन बेइं मुसीबतां केरे जिरिये परखे जे, त तैना बड़े खुशी भोए, चाए तैना बड़े गरीब थिये फिरी भी होरि विश्वासी लोकां केरि मद्दत केरनेरे लेइ खुल्ले दिले सेइं पेइंसो दित्तो। 3 ते तैन केरे बारे मां मेरी ई गवाहीए, कि तैनेईं अपने काबलीतरे मुताबिक बल्के अपने काबलीती करां भी जादे मने सेइं दित्तू। 4 ते इस दाने मां ते पवित्र लोकां जैना यहूदिया इलाके मां आन तैन केरे सेवाई मां मद्दत केरनेरे बारे मां असन सेइं बार-बार बड़ी बिनती की। 5 ते जेन्चरे असेईं उमीद न थी कियोरी, कि तैनेईं पेइलो अपनो आप प्रभुएरी सेवा केरनेरे लेइ समर्पण कियो, फिरी परमेश्वरेरी मेर्जी सेइं असन पत्ती चलनेरे लेइ अपनो आप समर्पण कियो। 6 एल्हेरेलेइ असेईं तीतुस समझव, कि जेन्चरे तैने पेइलू शुरू कियोरू थियूं, तेन्चरे इस दानेरे कम्मे पूरू भी केरे। 7 जेन्चरे हर गल्ली मां मतलब विश्वासे, वचन प्रचार केरनेरे काबलीत, ज्ञाने ते सेभी किसमेरे कोशिश मां, ते तैस प्यारे मां, जै तुस असन सेइं केरतथ, बद्धते गातथ, तेन्चरे विश्वासी लोकन दान देनेरे कम्मे मां बद्धते राथ। 8 अवं हुक्मेरे तरीके पुड़ नई, पन होरि केरे हिम्मतरे लेइ ते तुशशे प्यार ते सचैई परखनेरे लेइ ज़ोताई। 9 तुस इशशे प्रभु यीशु मसीहेरे अनुग्रह ज्ञानतथ, कि तै धनी भोइतां भी तुशशे लेइ गरीब बनो ताके तैसेरे गरीब भोने सेइं तुस धनी भोथ। 10 ते इस गल्ली मां मेरो खियाल ईए, किजोकि तुशशे लेइ रोडूए; जै एक्की साले करां न सिर्फ इस कम्मे केरने मां, बल्के इस गल्लरे चाने मां भी पेइले भोरे थी। 11 एल्हेरेलेइ हुनी इन कम पूरू केरा; जेन्चरे तुस इच्छा केरने तियार थिये, तेन्चरे अपने-अपने हैसियतरे मुताबिक पूरू भी केरा। 12 किजोकि अगर मनेरी तियारी भोए त दान तैसेरे मुताबिक कबूल भी भोते जैन तैस कां आए न कि तैसेरे मुताबिक जैन तैस कां अथी नई। 13 अवं इन न चैई होरि केरि जिन्दगी आसान बनानेरे लेइ तुस अपने जिन्दगी मुशकिल बनाथ। 14 पन बराबर भोनेरे खियालन सेइं इस वक्ते तुशशू जादे तैन केरि घाटे मां कम्मे एज्जे, ताके तैन केरू जादे तुशशे घाटे मां कम्मे एज्जे, कि बराबरी भोए। 15 जेन्चरे पवित्रशास्त्रे मां लिखोरूए,

“जैनी बड़ अकोट्टू कियूं तैसेरू जादे न निससू,
ते जैने थोड़ अकोट्टू कियूं तैसेरू घट न निस्सू।”

१६ १७ १८ १९ २० २१ २२ २३ २४ २५ २६ २७ २८ २९ ३०

16 परमेश्वरेशुक्र भोए, जैने तुशसे लेइ जै सोच मेरे मने मां आए तैए जोश तीतुसेरे मने मां छुड़ोरोए । 17 कि जैखन असेई तैस तुसन कां एजनेरे लेइ मिनत की त तैनी इशुगी गल मन्नी बल्के अपने मेर्जी सेइं ते बडे जोशे सेइं तुसन कां अव । 18 ते अस तैस सेइं साथी अक होरो विश्वासी ढूला भेजने लोरेम, जेसेरू नवं खुशखबरी शुनानेरे बारे मां कलीसियारे लोकन मां फैलोरूए । 19 ते एतूरू नई, पन तै कलीसियां केरे लोकेई ठहरावरो भी आए, कि इस दानेरे कम्मेरे लेइ असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा भोए, ते इन हिरानेरे लेइ कि अस यरूशलेमेरे विश्वासी लोकां केरि मद्दत चातम । 20 अस इस गल्ली मां हुशार रातम, ते तीतुसे सेइं साथी विश्वासी लोक भेजने सेइं इस दान देनेबाले कम्मेरे बारे मां जै सेवा अस केरतम, ताके कोई असन पुड़ दोष न लेइ सखे । 21 किजोकि जैना गल्लां सिर्फ प्रभुएरे नज़र मां रोड़ी नई बल्के मैन्हु केरे नज़री मां रोड़ी आन, अस तैन केरि फिकर केरतम । 22 ते अस तैन सेइं साथी अक होरो विश्वासी ढूला भी भेज्जी राओरेम, जै असेई बार-बार परखो ते बेड़ि गल्लन मां जोशे बालो निस्सो; पन हुनी तुसन पुड़ तैस बड़ो भरोसोए एल्हेरेलेइ तै दिले सेइं जोशे बालोए । 23 अगर कोई तीतुसेरे बारे मां पुछे, त तै मेरो साथीए, ते तुशसे लेइ मेरो मद्दतगार, ते अगर इशुगे विश्वासी ढूलां केरे बारे मां कोई पुछे, त तैना कलीसियां केरो भेजोरोए ते तैन केरि जिन्दगी सेइं मसीहेरी महिमा भोतीए । 24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन सबूत देथ कि इशु तैन घमण्ड जैन तुशसे बारे मांए सच्चे ।

9

१ २ ३ ४ ५ ६ ७ ८ ९ १० ११ १२ १३ १४ १५ १६ १७ १८ १९ २० २१ २२ २३ २४ २५ २६ २७ २८ २९ ३०

1 हुनी तैस सेवारे बारे मां जै यरूशलेमेरे विश्वासी लोकन जो दान देनेरे बारे मां की गातीए, मीं तुसन जो लिखनू ज़रूरीए नई । 2 किजोकि अवं तुशसे मनेरे तियैरारे बारे मां ज्ञानताई, जेसेरे वजाई सेइं अवं तुशसे बारे मां मकिदुनिया इलाकेरे विश्वासी लोकां केरे सामने घमण्ड हिराताई, कि तुस अखाया इलाकेरे लोक एक्की साले करां तियार भोरेथ, ते तुशसे जोशे होरन भी जोश बनेवरोए । 3 पन मीं तीतुस ते दूई होरे ढूला तुसन कां एल्हेरेलेइ भेजे, कि असेई जैन घमण्ड तुशसे बारे मां हिराव, तैन इस गल्ली मां बेफैइदे न भोए; पन जेन्चरे मीं ज़ोवं; तेन्चरे तुस यरूशलेम नगरेरे विश्वासी लोकां केरे लेइ दान देने जो तियार राथ । 4 एरू न भोए, कि अगर किछ मकिदुनिया इलाकेरे विश्वासी लोक मीं सेइं साथी एज्जन, ते तुशशू दान तियार न भोए, त अस तुसन पुड़ भरोसेरे केरनेरे वजाई छिथोम, पन तुस असन करां भी जादे छिथोले । 5 एल्हेरेलेइ मीं विश्वासी ढूलान सेइं ई बिनती केरनि ज़रूरी समझी, कि तैना पेइले तुसन कां गान, ते तुशसे खुल्ले दिले सेइं दान देनेरे बारे मां, जेसेरे बारे मां पेइलो वादो कियोरो थियो, तियार केरतां रखा, कि इन दबावे सेइं नई बल्के इच्छाई सेइं भोए ।

१ २ ३ ४ ५ ६ ७ ८ ९ १० ११ १२ १३ १४ १५ १६ १७ १८ १९ २० २१ २२ २३ २४ २५ २६ २७ २८ २९ ३०

6 पन गल त ईए, कि जै थोडू बेते तै कटेलो भी थोडू; ते जै हछु बेते तै हछु कटेलो । 7 हर अक मैन्हु जेन्चरे मने मां थापेरू भोते तेन्चरे दान दे, न कुड़-कुड़ केरतां, ते न दबावे सेइं, किजोकि परमेश्वर खुशी सेइं देने बालन पुड़ खुश भोते ।

8 परमेश्वर जैन किछ तुसन ज़रूरते तैसेरो अनुग्रह देइ बटते, जैस सेइं हर गल्ली मां ते हर वक्त, सब किछ, जेसेरी तुसन ज़रूरत भोए, तुसन कां राए, ते हर एक्की रोड़े कम्मेरे लेइ तुसन कां बड़ किछ भोए । 9 जेन्चरे पवित्रशास्त्रे मां लिखोरूए,

“परमेश्वर जैन ज़रूरते तैन हच्छु देते,
जैन तै केरते तैन ठीके ते तैन हमेशा रालू ।”

10 आखरी, जै बेनेबालो बीज, ते खानेरे लेइ रोटी देते, तै तुसन बीज देलो, ते तैस सेइं फलवन्त केरेलो, ते तुशसे धार्मिकतारो फल बधालो । 11 तुसन हर गल्ली मां बरकत मैलेली जैस सेइं तुस जादे दान देनेरे काबल बनेले, ते जैखन अस तुशसे हछे दाने तैन कां नेमेले जैन ज़रूरते त तैना लोक परमेश्वरेशुक्र केरेले । 12 किजोकि सेवारे पूरे केरने सेइं, न सिर्फ परमेश्वरेरे लोकां केरो घाटो पूरो भोते, पन लोकां केरे तरफां परमेश्वरेशुक्र बड़ शुक्र भोते । 13 किजोकि होरि लोकन दान देनेरी मद्दतरी सेवारू सबूत कबूल केरतां तैना परमेश्वरेरी महिमा बांदी केरतन, कि तुस मसीहेरी खुशखबरी मेन्तां तैसेरे अधीन रातथ, ते गरीब विश्वासी लोकां केरि, ते सेभी केरि मद्दत केरने मां

हच्छु देनू बांदू केरतथ । 14 ते तैना तुशशे लेइ परमेशरे कां प्रार्थना केरेले; तैना तुसन सेइं प्यार केरतन, किजोकि परमेशरे तुसन पुड़ अनुग्रह कियोरोए । 15 परमेशरे तैसेरे तैस दानेरे लेइ जैन समझी करां बेइर शुक्र भोए ।

10

??????????

1 अवं तैए पौलुस जै तुशशे सामने दीन आई, पन तुसन करां दूर भोताई सेखती सेइं ज़ोताई । अवं तुसन मसीहेरी नम्रता ते नरमी याद करेइतां तुसन कां मिनत केरताई । 2 अवं ई बिनती केरताई, कि तुशशे सामने नझक भोइतां दिलेर न भोनू पे; जेन्चरे अवं केत्रन पुड़ जैना असन दुनियारे लोकां केरे जेरे चलने बाले समझतन, बहदरी हिरानेरी खियाल केरताई । 3 किजोकि अगर अस दुनियाई मां ज़ीतम, पन फिरी भी अपने दुश्मन्न सेइं दुनियारे मुताबिक न लड़म । 4 किजोकि इशशी लड़ईरे हथियार मैन्हु केरे नई, पन गड़ बछोड़नेरे लेइ परमेशेरी शक्ति । 5 ते अस खियालन, ते हर एक्की उच्ची गल्ली, जैना परमेशेरी पिशानरे खलाफ उट्टतन, खतम केरतम; ते हर एक्की खियाले कब्जे मां केरतम, ते मसीहेरो हुक्म मन्ने बालो बनातम । 6 ते तियार रातम कि जैखन तुस पूरे तरीके सेइं अपनो आप मसीहेरो हुक्म मन्नेबाले बनातथ, त अस मसीहेरे हुक्म न मन्ने बालन सज़ा देनेरे लेइ तियार रामेले ।

7 तुस बेइरयूं रूप हेरतथ, अगर केन्वी एप्पू पुड़ ई भरोसे, कि अवं मसीहेरोई, तै इन भी ज़ाने, कि ज़ेरो तै मसीहेरोए, तेन्चरे अस भी मसीहेरेम आम । 8 किजोकि अगर अवं तैस अधिकारेरे बारे मां होरू भी घमण्ड हिरेई, जै प्रभुए तुशशे विश्वास नाश केनेरे लेइ नई बल्के विश्वासे बद्धानेरे लेइ असन दित्तोरोए, त शर्मिन्दे न भोलो । 9 इन अवं एल्हेरेलेइ ज़ोताई, कि चिट्ठी केरे ज़िरिये तुसन डराने बालो न भोई । 10 किजोकि किछु लोक ज़ोतन, “कि तैसेरी चिट्ठी त ज़रूरिन ते अस्सर केरने बैलिन; पन जैखन हेरतन, त तै कमज़ोर मैन्हु आए, ते तैसेरां भाषाना बेकारन ।” 11 ते जै एरू ज़ोते, तै ई समझ रखते, जेन्चरे ठीक इशशे चिट्ठन मां इशशो वचन आए, तेन्चरे तुशशे सामने इशशां कम्मां भी भोलां । 12 किजोकि असन ई दिलेरी नई कि अपनो आप तैन सेइं साथी गनम, या तैन सेइं अपनो आप मिलाम, जैना अपनि तारीफ़ केरतन, ते अपनो आप एक्की होरि सेइं तुलोइतां बेवकूफ बन्तन ।

13 अस परमेशेरे दित्तोरे कम्मे करां बेइर घमण्ड कधी न केरमेले, पन तैस्से हदी तगर जै परमेशेरे इशशे लेइ बनोरीए, ते तैस मां तुस भी ओरेथ ते तैसेरे मुताबिक घमण्ड भी केरेले । 14 किजोकि अस एपनी हदी करां बेइर अपनो आप बधानो न चाम, जेन्चरे कि तुसन तगर न पुजनेरी हालती मां भोते, बल्के अस पेइले थिये जैना कुरिन्थुस नगरे मां मसीहेरी खुशखबरी शुनाते तुसन तगर पुज़ी जोरेम । 15 ते अस हदी करां जादे होरि केरे मेहनती पुड़ घमण्ड न केरम; बल्के असन उमीदे, जेन्चरे-जेन्चरे तुशशो विश्वास बधेलो तेन्चरे-तेन्चरे अस एपनी हदारे मुताबिक तुशशे वजाई सेइं होरां भी बड़ां जादे कम्मां केनेरे काबल भोले । 16 कि अस तुशशे हदन करां सारे दूर-दूर इलाकन मां भी खुशखबरी शुनाम, इन नई कि अस होरि केरे हदां केरे अन्तर बनोरे कम्मन पुड़ घमण्ड केरम । 17 पन जेन्चरे पवित्रशास्त्र ज़ोते, जै घमण्ड केरे तै प्रभु पुड़ केरे । 18 किजोकि जै अपनि बड़याई केरते, तै नई, पन जेसेरी बड़याई प्रभु केरते, तैए परमेशेरी नज़री मां रोड़ोए ।

11

??????

1 तुस होरन कबूल केरतथ जैना अपनि बड़याई केरतन, ते एल्हेरेलेइ अवं उमीद केरतां, अगर अवं थोड़ी ज़ेरि बेवकूफी केरि त तुस झैल्ले । 2 किजोकि अवं तुसन सेइं प्यार केरताई ते तुशशो खियाल रखताई ठीक तेन्चरे, जेन्चरे परमेशर केरते, मीं वादो कियोरोए तुसन मसीह जो देनेरे लेइ, जेन्चरे लोक पूरे तरीके सेइं समर्पितन । 3 पन अवं डरताई कि जेन्चरे शैताने सप्पेरे रूपे मां एइतां अपनि चलैकी सेइं पेइली कुआन्श, हव्वा भटकवरी थी, तेन्चरे तुशशो मन तैसेरे सिधयैई ते पवित्रतैई सेइं जै मसीहे कबूल केरते भोरी लोड़े भ्रष्ट न की गाए । 4 जैखन भी कोई तुसन कां एइते ते तुसन तैस यीशुएरी जैस यीशुएरो असेई नई कियोरो एइतां, कोन्वी होरि यीशुएरो प्रचार केरते, जेसेरो प्रचार असेई नई कियोरो: या जै आत्मा तुसन मैल्लोरी तैस करां अलग किसमेरी आत्मा तुसन मैल्ले; या जैस खुशखबरी पुड़ तुसेई विश्वास कियूं तैस करां अलग किसमेरे खुशखबरी तुसन शुनाए, त तुस तैन शिक्षान कबूल केरने मां गलतथ । 5 अवं समझताई, कि अवं कोन्वी गल्ली मां, जैना इस तरीके सेइं बर्ताव केरतन, कि तैना

जिसमे मरां बेइर, अवं न जैनी सिर्फ परमेशर जानते। 3-4 अवं फिरी ज़ोताई, कि ई मैन्हु स्वर्गे तगर अकदम नेव जेव (फिरी, अवं न जैनी कि इन जिसमे मां भोवं या अक दर्शन थियूं, सिर्फ परमेशरे जानते), तैड़ी तैनी तैना गल्लां शुनी जैना लफसन मां न ज़ोइयोन, एरी गल्लां जैना मैन्हु ओठन सेइं न ज़ोई बटन। 5 एरे मैन्हु पुड़ त अवं घमण्ड केरेलो, पन अपने कमज़ोरी केरे अलावा, अपने बारे मां घमण्ड न केरि। 6 किजोकि अगर अवं घमण्ड केरनू चैई भी त बेवकूफ न बेई, किजोकि अवं सन्न ज़ोइलो; पन अपने आपे एस किसमेरे घमण्डे करां रोकताई, एरू न भोए, कि जेन्चरे कोई मीं लाते, या मीं शुन्ते, मीं तैस करां भी बेद्धतां न समझे। 7 पन जैना अद्धबूद गल्लां परमेशरे मीं हेरेवरिन तैन केरे वजाई सेइं अवं बड़ो जादे घमण्डी न भोइ गेइ। एल्हेरेलेइ तैनी मीं अक बड़ो मुशकिल मसलो तुसन सेइं बर्ताव केरनेरे लेइ दित्तोरोए (मेरी जानी मां अक कंटो)। शैतानेरे एक्की दूते मीं मड्डनेरो इरादो कियोरोए ते अवं घमण्ड केरने करां रोकोरोई। 8 इसेरे बारे मां मीं प्रभु कां टलाई बार बिनती की, कि मीं करां दूर भोइ गाए। 9 ते तैने मीं सेइं ज़ोवं, “मेरो अनुग्रह तेरे लेइ सुधोए; किजोकि मेरी शक्ति कमज़ोरी मां सिद्ध भोतीए।” एल्हेरेलेइ अवं अपनी कमज़ोरी पुड़ घमण्ड केरेलो, कि मसीहेरी सामर्थ मीं पुड़ एंडती राए। 10 इस वजाई सेइं अवं मसीहेरे लेइ कमज़ोरन मां, ते बेइजतन मां, गरीबी मां, सताए गाने मां, ते मुशकलन मां खुश आईं; किजोकि ज़ैखन अवं कमज़ोर भोताई, तैखन अवं मसीहेरी शेक्ति सेइं ज़ोरे बालो भोताई।

????????????????????

11 अवं बेवकूफ त बनो, पन अवं एरू केरनेरे लेइ तुसेईं अवं मजबूर कियो, तुसेईं त मेरी बड़याई कियोरी लोडती थी, किजोकि अगर अवं किछ भी नई, फिरी भी होरे प्रेरित जैना महान आन अवं तैन केरो ज़ेरो रोड़ो आईं। 12 मीं रोडे प्रेरितेरी पिशान भी तुशशे दरमयान हर किसमेरे सबर साथी ते निशान ते बडां-बडां कम्मां, ते सामर्थेरां कम्मां हिरां। 13 अक गल थी जै मीं तुसन सेइं न की, जै मीं होरि कलीसियान सेइं की, यानी अवं पेइंसां केरे बारे मां तुशशे लेइ बोझ न बनो। कुन इन तुसन घटिया बनाते, एरू केरने सेइं मीं तुशशे खलाफ गलत कियोरू ई तुशशी सोच गलते।

14 हेरा, अवं टलेइयोवं बार एजनेरे लेइ तियाराई, ते अवं तुसन करां कोई पेइंसां केरि मांग न रेखेलो। किजोकि अवं तुशशी जेइदाद नई, बल्के तुसन चाताई, किजोकि बच्चेइं अम्मा बाजी केरे लेइ धन अकोट्टू न लोडे कियोरू, पन अम्मा बाजेई बच्चां केरे लेइ कियोरू लोडे। 15 अवं तुशशी लेइ बड़ी खुशी सेइं खर्च केरेलो, बल्के अवं अपनू सब किछ तुसन देइलो, अवं तुसन सेइं बड़ो प्यार केरताई पन एरू लगते कि तुस मीं सेइं घट प्यार केरतथ। 16 तुसन मरां किछ मन्तन कि मीं तुसन पुड़ भार नई छुडोरो, पन किछ होरे सोचतन कि अवं चलाक आईं ते मीं तुसन पूरे तरीके सेइं धोखो दित्तोरोए, जैन कि झूठ आए। 17 मीं अपने लेइ तुसन करां पेइंसे नेनेरे लेइ तीतुस या होरो कोई इस्तेमाल नई कियोरो। 18 मीं तीतुस समझेइतां तैस साथी तै दला भेजो, त कुन तीतुसे धोखे सेइं किछ नेव? कुन अस एक्की मकसदे सेइं न चले? कुन इशशां कम्मां अक्कां ज़ेरां नई।

19 हे टलाराव, तुस हेजू तगर इन समझतथ कि अस तुशशे सामने अपनो बचाव लोरेम केरने, अस त परमेशरे हाज़र सेमझतां मसीह मां ज़ोतम, ते सब गल्लां एल्हेरेलेइ ज़ोतम कि तुसन विश्वासे मां मजबूत केरने लोरेम। 20 किजोकि मीं डरे, कि एरू न भोए, कि अवं एज्जी ते जेन्चरे अवं चाताई, तेन्चरे तुस न भोथ; ते मीं भी जेन्चरे तुस मीं चातथ तेरे लाथ, कि तुसन मां लडैई, गर्म सुभाव, सरक, खलाफत, जलन, चोगली, अभिमान ते फसाद भोन। 21 कि एरू न भोए कि ज़ैखन अवं तुसन कां दुबारां एज्जी, त मेरो परमेशर मीं छिथाए। ते मीं दुःख केरनो पे, किजोकि तुसन मरां बडेई अपने पुराने पाप नई शारोरे। ते तैस गंदे कम्मे, ते बदमाशी, ते लुचपने सेइं, जै तैनेई कियो, मन न फिराव।

13

??????

1-2 पवित्रशास्त्रे मां इन लिखोरूए कि, “हर अक गल दूई या टलेइ गवाहां केरे गवाही केरे ज़िरिये सेइं पक्की की गाली।” मीं तैन लोकन हदैइयत दित्तोरोए जैना पाप केरते थिये, ज़ैखन अवं दुइयोवं बार ओरो थियो। हुनी अवं फिरी तैन ते होरि सेब्भी लोकन हदैइयत देताई कि ठीक तेन्चरे जेन्चरे मीं पेइलू भी कियोरूए इस चिट्ठी मां खबरदार केरताई। हुनी अवं टलेइयोवं बार एजनेबालो आईं, ते अगर तैना हेजू भी पाप केरनो बंद नई कियोरो, तैन मरां कोई भी सज़ाई करां न बचेलो। 3 अवं ज़ोताई कि तुस इना गल्लां केरू सबूत चातथ, कि मसीह मेरे

जिरिये गल्लां केरते, पन ज़ैखन मसीह तुसन सेइं बर्ताव केरते त तै कमज़ोर नई; पन तुसन मां सामर्थ आए।⁴ तै कमज़ोरारे वजाई सेइं करूसे पुड़ चाढ़ो त जेव, फिरी भी परमेशेरे शेक्ति सेइं जींते। अस भी कमज़ोरम, ठीक तेन्चरां, ज़ेन्चरे मसीह थियो; पन ज़ैखन अस तुसन सेइं बर्ताव केरमेले अस भी तैस सेइं साथी जींते भोमेले ते असन सेइं साथी परमेशेरी शक्ति भोली।

⁵अपनो आप परखा, कि तुशुओ विश्वास सच्चो आए कि नई; एप्पू परखा, कुन तुसन अपने बारे मां ई पतो नई, कि यीशु मसीह तुसन मां आए, नई त तुस निकम्मे भोए।⁶ पन मेरी उमीदे, कि तुस बुझेले, कि अस निकम्मे नई निसोरे।⁷ चाए अगर तुसन इन लेइहोते कि अस सच्चे प्रेरित नई, अस तुशुओ लेइ परमेशेरे कां प्रार्थना केरने लोरेम, कि गलती केरनेरे बगैर सिर्फ रोडू केरा।⁸ किजोकि अस सच्चेरे खलाफ किछ न केरि बटम, पन सच्चेरे लेइ केरि बटतम।⁹ ज़ैखन अस कमज़ोरम, ते तुस ताकतबरथ, अस खुशी रातम, ते ई प्रार्थना भी केरतम, कि तुस विश्वासे मां सिद्ध भोते राथ।¹⁰ एल्हेरेलेइ अवं तुशुओ पिठी पतर इना गल्लां लिखताई, कि मौजूद भोइतां मीं तैस अधिकारेरे मुताबिक जै प्रभुए बिगाड़नेरे लेइ नई पन बनानेरी लेइ मीं दित्तोरोए, सेखती सेइं किछ न केरनू पे।

????????

¹¹हे द्वाव ते बेइनव, खुश राथ, सिद्ध बनते राथ; एक्की होरि हिम्मत देथ; ते मेल मिलापे सेइं राथ, ते प्यार केरनेबालो ते शान्ति देनेबालो परमेशर तुसन साथी भोलो।¹² मसीहेरे प्यारे सेइं एक्की होरि जो नमस्कार केरा।¹³ सब पवित्त्र लोक तुसन जो नमस्कार ज़ोतन।¹⁴ प्रभु यीशु मसीहेरो अनुग्रह ते परमेशेरो प्यार ते पवित्त्र आत्मारी सन्गाती तुसन सेबन साथी भोए।

गलातियों

१११११११

1 अवं पौलुस ई चिट्ठी तुसन लिखताई, अवं अक प्रेरिताई, अवं न मैन्हु केरे तरफां, ते न केन्ची मैनेरे ज़रिये प्रेरित भोनेरे लेइ चुनोरोई, बल्के यीशु मसीह ते बाजी परमेशेरे ज़रिये, जैनी यीशु मुडदन मरां जींतो कियो।

2 ते सारे ढलां केरे तरफां, जैना मीं सेई साथिन; गलातिया इलाकेरे कलीसियां केरे लेइ ई चिट्ठी लिखताई।

3 बाजी परमेशर, ते इशशे प्रभु यीशु मसीहेरे तरफां तुसन अनुग्रह ते शान्ति मैलती राए। 4 इशशे परमेशर ते बाजी केरि मेर्जी सेई यीशु मसीहे अपनो आप इशशे पापां केरे लेइ बलिदान कियो, ताके असन इस मौजूद बुरे दुनियाई करां छुटकारो दे। 5 तैसेरी महिमा हमेशा भोती राए। आमीन।

१११ ११११ १११११११ १११

6 अवं हैरान भोताई, कि परमेशर तुस मसीहेरे अनुग्रहे मां जीनेरे लेइ कुजाए; ते तुस तैस करां एतरे जल्दी फिरतां होरि किसमेरी खुशखबरी मन्ने लाए। 7 पन सिर्फ एक्के सच्ची खुशखबरी आए, गल ईए, कि किछ लोक एरेन, जैना तुसन धोखो देतन, ते मसीहेरी खुशखबरी बगाड़ने चातन। 8 पन अगर असन मरां कोई या कोई स्वर्गदूत भी तुसन कोई तैस खुशखबरारे अलावा जै असेई तुसन शुनोरी, शुनाए त लानती भोए। 9 जेन्चरे असेई पेइलू जोवरूए, तेन्चरे अवं हुना फिरी जोताई, कि तैस खुशखबरारे अलावा जै तुसेई कबूल कियोरोए, अगर कोई होरो खुशखबरी शुनाए, त लानती भोए।

10 हुनी कुन अवं मैन्हु केरि मन्जूरी हासिल केरनेरी कोशिश केरताई या परमेशेरी? कुन अवं लोकन खुश केरनेरी कोशिश केरने लोरोई? बिलकुल भी नई, अगर हेजू तगर लोकन खुश केरतो राताई, त मसीहेरो दास न भोथो।

१११११ १११११११११ १११११११ १११

11 हे ढलाव ते बेइनव, अवं तुसन जोताई, कि जै खुशखबरी मीं तुसन शुनाई, ई मैन्हु केरि बनोरी नई। 12 किजोकि तै मीं न केन्ची मैन्हु करां मैलोरी, ते न मीं कोन्ची उस्तादे करां शिखोरी, बल्के यीशु मसीहे मीं पुड़ बांकी की। 13 तुसेई शुनोरूए यहूदी धर्मे मां पेइलो जै मेरो चालचलन थियो तै केरो थियो, कि अवं परमेशेरी कलीसियाई बडी सतातो थियो, ते नाश केरनेरी कोशिश केरतो थियो। 14 ते अवं अपने धर्मे मां तैस वक्ते बड़े मेरे उमरारे यहूदन करां अग्रोवं थियो। ते अपने बुजुर्गां केरे रीतन मां जोशे मां थियो। 15 पन परमेशेरी जैखन इच्छा भोइ, तैनी अवं मेरे ज़रमने करां पेइलो चुनो ते अपने अनुग्रह सेइ कुजाव, 16 कि मीं मां अपने मट्टू बांदू केरे कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्ची करां सलाह नी। 17 ते न यरूशलेम नगरे मां तैन कां जेव जैना मीं करां पेइले प्रेरितन, पन अरब मुखे जो चलो जेव, ते फिरी किछ चिरेरां बाद तैटठां दमिशक नगरे जो वापस अव।

18 फिरी ट्लाई सालना पत्ती अवं कैफा (यानी पतरस प्रेरिते) सेइ मिलने यरूशलेम नगरे जो जेव, ते 15 दिहाड़े तैडी राव। 19 पन प्रेरितन मरां प्रभुएरे ढला याकूबेरे अलावा होरि कोन्ची सेइ न मिलो। 20 जैना गल्लां अवं तुसन लिखताई, हेरा परमेशरे हाज़र सेमझतां जोताई, कि तैना झूठी नई। 21 यरूशलेम नगर शारनेरां पत्ती, अवं सीरिया ते किलिकियारे मुखे मां जेव। 22 पन यहूदिया इलाकेरे कलीसियां केरे लोक जैना मसीह मां थिये, जैना मीं सेइ कधे न थिये मिलोरे। 23 पन इन्ने शुन्ते रहते थिये, कि जै असन पेइलो सतातो थियो, तैए तैस्से विश्वासेरी खुशखबरी शुनाते, जैस पेइलो नाश केरतो थियो। 24 ते जैन परमेशरे मेरे ज़िन्दगी मां कियूं तैहरेलेइ तैना परमेशेरी बडीयाई केरते रहते थिये।

2

११११ १११११११११ ११११ १११११११ ११११११ १११११११

1 च़ेवधे सालना पत्ती अवं बरनबासे सेइ साथी यरूशलेम नगरे जो जेव, ते तीतुस भी मीं एप्पू सेइ साथी नीयो।

2 अवं एल्हेरेलेइ तैडी जेव किजोकि परमेशरे मीं गानेरे लेइ जोरू थियूं, जैखन अवं तैडी थियो, अवं अकैल्ले मां कलीसियारे खास बुजुर्गन सेइ मिलो ते तैन खुशखबरी समझाई, जै अवं गैर कौमन मां प्रचार केरतो ओरो थियो,

ताके एरू न भोए, कि जैन किछ अवं केरतो ओरोई ते जैन करने लोरोई बेफैइदू भोए।³ मेरो साथी तीतुस, जै यूनानीए, जेसेरो खतनो कधी न भोरो। पन जैना यरूशलेम नगर कलीसियारे खास बुजुर्ग थिये तैनेई तै खतनो करानेरे लेइ मजबूर न कियो, बल्के तैनेई तै कबूल कियो।⁴ ते ई गल तैन केरे लेइ परेशानी बनी, ई इन तैन झूठे ढलां* केरे वजाई सेइं भोवं, जैना छेपतां इश्शे टोली मां ओरे थी, कि तैस ऐजैदरी जै मसीह यीशु मां असन मैलोरीए, भेद नेइतां फिरी असन यहूदी केरे कानूनेरे गुलाम बनान।⁵ पन असेई एक्की पलेरे भी तैन केरि शुने करां इन्कार कियो, ताके जै सन्देश असेई तुश्शे लेइ आनो तै सच्चि खुशखबरी बनोरी राए।⁶ तैन यरूशलेम नगरेरे कलीसियारे खास लीडरेई मेरी शिक्षाई मां किछ न जोडू, इस सेइं मीं किछ फर्क न पे, कि तैना केरहे बुजुर्ग आन, किजोकि परमेशर बेइरोवं रूप हेरतां फैसलो न केरे।⁷ पन इसेरे उलट जैखन तैन बुजुर्गेई हेरू, कि जेन्चरे परमेशरे यहूदी लोकां केरे लेइ खुशखबरारू कम पतरसे सोंफू, तेन्चरे परमेशरे गैर कौमां केरे लोकन खुशखबरी शुनानेरू कम मीं सोंफू।⁸ जैने परमेशरे पतरस यहूदी केरो प्रेरित भोनेरे लेइ चुनो, तैन्ने अवं भी गैर कौमां केरो प्रेरित भोनेरे लेइ चुनो।⁹ जैना मैन्हु कलीसियारे खम्मबे समझे गाते थिये (यानी खास लीडर) मतलब याकूब, कैफा (यानी पतरस) ते यहून्ना तैनेई अनुग्रहेरू तैन वरदान पिशानू जैन मीं मैलोरू थियूं। तैनेई अवं ते बरनबास साथी सेमझतां ते असन सेइं हथ मिलेइतां राजी भोए। कि अस गैर कौमन मां खुशखबरी प्रचार केरम, ते तैना यहूदीन मां।¹⁰ तैनेई असन कां बिनती की, कि अस यरूशलेमेरे गरीब विश्वासी लोकां केरि मद्दत केरम, जैन केरनेरी अवं बड़ी इच्छा केरतो थियो।

????????? ?????? ?????????? ??????

¹¹ पन जैखन कैफा (पतरस) अन्ताकिया नगरे मां अव, त मीं सेब्भी विश्वासी लोकां केरे सामने तैसेरी खलाफ की ते झाड़ दिती, किजोकि जैन तैनी कियोरू थियूं तैन गलत थियूं।¹² एल्हेरेलेइ कि याकूबेरे पासेरां किछ मैन्हु केरे एजनेरे पेइले तै गैर कौमां केरे लोकन साथी खातो थियो, पन जैखन तैना आए, त खतनो कियोरे लोकां केरे डरे सेइं तैन करां हटो ते अलग भोने लव।¹³ ते तैस साथी बाकी यहूदी विश्वासी लोकेई भी पाखंड कियूं, इड़ी तगर कि बरनबास भी तैन केरे संगती मां शामिल भोव।¹⁴ पन जैखन मीं तैन केरो बर्ताव हेरू, कि तैना खुशखबरारे सच्चरेरे खलाफ चलतन, त मीं सेब्भी केरे सामने कैफा (पतरस) सेइं जोवं, “कि जैखन तू यहूदी भोइतां गैर कौमन केरि जेरि चाल चलतस, न कि यहूदी केरि जेरि, त तू गैर कौमन यहूदी केरे रसमन पुड़ चलनेरे लेइ किजो जोतस?”

????????????? ?????? ?????????? ??????????

¹⁵ अस जैना जर्मनेरे यहूदिम, ते पैपी गैर कौमां केरे जेरे नई।¹⁶ फिरी भी इन सेमझतां कि मैन्हु मूसेरे कानूनेरे कम्मन सेइं नई, पन सिर्फ यीशु मसीह पुड़ विश्वास केरने सेइं धर्मी भोते, असेई एप्पू भी मसीह यीशु पुड़ विश्वास कियो, कि अस मूसेरे कानूनेरे कम्मन सेइं नई पन यीशु मसीह पुड़ विश्वास केरने सेइं धर्मी भोए, किजोकि मूसेरे कानूनेरे कम्मन सेइं कोई धर्मी न भोलो।¹⁷ किछ यहूदी सोचतन कि असेई पाप कियो, किजोकि असेई धर्मी भोनेरे लेइ कानून मन्नेरे बदले सिर्फ मसीह पुड़ विश्वास कियोरो, त कुन मसीहे अस पापी बनाए, नई, कधी नई।¹⁸ किजोकि जैन किछ मीं बछोडू, अगर तैस फिरी बनेइं, त अपनो आप पापी बनाताई।¹⁹ अवं त कानूने सेइं कानूनेरे लेइ मेरि जेव, कि परमेशरेरे लेइ जीई।²⁰ अवं मसीह सेइं साथी कूरुसे पुड़ चढोरोई, ते हुनी जीतो न राव, पन मसीह मीं मां जीतोए, ते अवं जिसमे मां हुनी जीतोई, त सिर्फ तैस विश्वासे सेइं जीतोई, जै परमेशरेरे मट्ठे पुड़े, जैने मीं सेइं प्यार कियो, ते मेरे लेइ अपनि जान दिती।²¹ अवं इस गल्लरो इन्कार न केरि कि परमेशर अपने अनुग्रहे सेइं बचाते, किजोकि अगर कानून मन्ने सेइं लोक धर्मी भोथे, त मसीहे मरनेरी कोई जरूरत न थी।

3

????????????? ?????? ????????????????

¹ हे बेसमझ गलातियारे लोकव, केने तुस टरे लाए? तुश्शे त मना तुश्शे सामने यीशु मसीह कूरुसे पुड़ चढो! ² अवं तुसन सिर्फ ई सवाल पुछनो चाताई, कि तुसेई पवित्र आत्मा कुन कानून मन्ने सेइं हासिल कियो? बिलकुल भी नई, तुसेई खुशखबरी शुनी ते तैस पुड़ विश्वास कियूं ते पवित्र आत्मा हासिल की। ³ कुन तुस एरे बेसमझथ,

* 2:4 2:4 झूठे ढलां: इना तैना यहूदी विश्वासी लोक थिये, जैना जोते थिये मुक्ति हासिल केरनेरे लेइ मूसेरो कानून भी मन्नोरू लोडे, किजोकि झूठे ढला तैना विश्वास न थिये केरते, कि जैन यीशुए कूरुसे पुड़ कियूं, सिर्फ तैस्से सेइं असन मुक्ति मैलतीए।

कि पवित्र आत्मा रे रीति पुड शुरु केरतथ ते जिसमे रे रीति पुड खतम केरेले? 4 कुन तुसेई सब दुःख बेफैडदो झैल्ले? अवं उमीद केरताई बेफैडदो नई। 5 एल्हेरेलेइ जै तुसन पवित्र आत्मारू दान बडू जादे देते ते चमत्कार केरते, कुन तै कानून मन्नेरे वजाई सेइं एन केरते या तुसेई खुशखबरी शुनी ते तैस पुड विश्वास कियो?

6 हुनी अब्राहमेरे बारे मां सोचा “अब्राहमे परमेशेरे पुड विश्वास कियो ते तै तैसेरेलेइ धार्मिकता गनो जेव।” 7 एल्हेरेलेइ तुसन एन ज्ञान्नेरी ज़रूरते कि जैना अब्राहमेरो जेरो परमेशेरे पुड विश्वास केरनेबालेन तैन्ना हकीकति मां तैसेरी बच्चेन। 8 पवित्रशास्त्रे मां बडू पेइलू इन लिखोरूए, कि परमेशेरे गैर कौमन विश्वासे सेइं धर्मी बनालो, पेइले अब्राहमे ई खुशखबरी शुनाई, “कि तेरे ज़िरिये सेभी कौमन बरकत मैलेली।” 9 ते जैना अब्राहमेरो जेरो परमेशेरे पुड विश्वास केरतन, परमेशेरे तैन सेभन बरकत देते जैना मसीह पुड विश्वास केरतन जेन्चरे तैनी अब्राहमे बरकत दिती।

10 एल्हेरेलेइ जैना लोक सोचतन कि तैना मूसेरो कानून मेन्तां धर्मी बनाए गाले, तैन पुड परमेशेरेरी लानते, किजोकि मूसेरे कानूने मां लिखोरूए, “कि जै कोई कानूने मां लिखोरे सब कानूनेरे मुताबिक न चले, तैस पुड परमेशेरेरी लानते।” 11 ई गल साफे, कि मूसेरे कानून सेइं परमेशेरे कां कोई मैन्हु धर्मी न भोए, “किजोकि जै मैन्हु परमेशेरे पुड विश्वास केरते, परमेशेरे तैस धर्मी ठहराते ते तैस हमेशारी ज़िन्दगी मैलतीए।” 12 पन मूसेरे कानूनेरो विश्वासे सेइं कोई वासतो नई; पन “जै तैन मन्नेलो, तै तैन मन्ने सेइं जीतो रालो।” 13 मसीहे जै इशे लेइ लानती बनो, तैने अस कीमत देइतां कानूनेरे लानती करां छुटाए किजोकि पवित्रशास्त्रे मां लिखोरूए, “जै कोई कूरूसे पुड टंगो गालो तै लानतीए।” 14 मसीहे एन एल्हेरेलेइ कियूं, कि गैर कौमां तैसेरे ज़िरिये तैना सैरी बरकतां हासिल केरन, जैन केरो वादो परमेशेरे अब्राहम सेइं कियोरो थियो, ते मसीह पुड विश्वास केरने सेइं अस पवित्र आत्मा हासिल केरम, जेसेरो वादो तैने कियोरोए।

????? ?? ?????

15 हे द्वाव ते बेइनव, अवं आम ज़िन्दगरी मिसाल देने लोरोई, जैखन दूई मैन्हु केरो करार जै पक्को भोते, त न कोई तैस टालते ते न तैस मां किछु बद्धाते। 16 ते सारे वादे परमेशेरे अब्राहमे ते तैसेरे खानदाने दिते; पवित्रशास्त्र इन न ज़ोए, “कि वंशां,” कि बड़ां केरे बारे मां ज़ोवं, पन एक्की मैनेरे बारे मां ज़ोवं “कि तेरू वंश इने, ते तै मसीहे।” 17 मेरे ज़ोनेरो मतलब ई आए, परमेशेरे अब्राहमे सेइं करार केरनेरां बाद 430 सालन पत्ती मूसे कानून दिती (ताके तैस करारे पक्को केरे), पन अस न ज़ोई बटन कि परमेशेरेरो करार टलुटो, तैए करार पक्कोए, तैए तैस पूरो केरेलो। 18 किजोकि परमेशेरे असन अपनि बरकत एल्हेरेलेइ न दे कि अस मूसेरे कानूनेरे मुताबिक चलतम, पन तै एल्हेरेलेइ देते कि तैनी वादो कियोरोए, परमेशेरे अपने अनुग्रहे सेइं अब्राहमे बरकत दिती, किजोकि तैनी पेइलो वादो कियोरो थियो।

19 तैखन, फिरी कानूनेरो कुन मकसद थियो? तैन त पापां केरे वजाई सेइं बादे मां दिती, ताके तैसेरे वंश मसीहेरे एजने तगर राए, जैस सेइं वादो कियोरो थियो, परमेशेरे स्वर्गदूतां केरे ज़िरिये मूसे कानून दिती, जै परमेशेरे ते लोकां केरे बिचवाई केरनेबालो थियो। 20 परमेशेरे एप्पू अब्राहमे सेइं वादो कियो। एल्हेरेलेइ हुनी बिचवाई केरनेबालेरी कोई ज़रूरत नई।

????? ?????? ?????

21 कुन कानून परमेशेरेरे वादां केरे खलाफे? नई, कधी नई! किजोकि अगर एरो कानून दिती गाथो जै हमेशारी ज़िन्दगी देइ बटेथो, त सच्चे धार्मिकता कानून मन्ने सेइं भोथी। 22 पन पवित्रशास्त्रे ज़ोते दुनियारे सब लोक पापेरे अधीन आन, ताके तै वादो जेसेरी बुनीयाद यीशु मसीह पुड विश्वास केरनोए, तैस पुड विश्वास केरनेबालां केरे लेइ पूरो भोए। 23 पन इस करां पेइले कि लोक मसीह पुड विश्वास केरन, मसीहेरे एजने करां पेइले अस यहूदी कैदे मां थिये कानून इशरी रखवाली केरतो थियो। ते तैस विश्वासे एजने तगर जै बांदो भोनेबालो थियो, अस तैसेरे बन्धने मां रहम। 24 एल्हेरेलेइ कानून मसीह तगर पुजानेरे लेइ असन बत हिरानेबालो ते स्मभालने बालो भोव, कि अस यीशु मसीह पुड विश्वासे केरने सेइं परमेशेरेरे सामने धर्मी भोम। 25 पन जैखन मसीह अव ते असेई विश्वास कियूं, त असन ज़रूरत न पेई, कि कानून बत हिराए ते मद्दत केरे। 26 किजोकि तुस सब विश्वास केरने सेइं जै मसीह यीशु पुडे, परमेशेरेरे बच्चेथ। 27 ते तुसन मरां जेत्रेई मसीह मां अक भोनेरे लेइ बपतिस्मो नीयो, तुसेई मसीहेरी नव्वीं ज़िन्दगी तेन्चरे लाई जेन्चरे लिगड़ां लातन। 28 हुनी मसीह मां कोई फर्क नई, चाए कोई

यहूदीए या गैर यहूदीए, गुलामे या आज़ाद। कोई फर्क नई मड़दे या कुआन्शे, अस यीशु मसीह मां सब बराबर आम। 29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशेरे वादेरे मुताबिक बरकतां केरे वारस भी आथ।

4

1 अवं मिसाल देइतां ज़ोताई, कि वारस ज़ांतगर बच्चोए, अगर तै सेभी चीज़ां केरो मालिके, फिरी भी तैस त कने गुलामे मां कोई फर्क नई। 2 पन बाजी केरे ठहरावरे वक्ते तगर सुमालने बालां ते भैन्डैरी केरे हेरगेशी मां रहते। 3 तेन्चरे अस भी ज़ैखन बच्चां केरे जेरे थिये, त दुनियारे रीति रूवाज़ां ते कानूनेरे गुलाम थिये। 4 पन ज़ैखन ठीक वक्त अव, त परमेशेरे अपनू मट्टू दुनिया मां भेजू, ज़ैस एककी कुआन्शां ज़र्म दित्तू, तैन यहूदन मां ज़र्म ते तैनी कानून मन्नो। 5 ताके तैन छुटाए ज़ैना मूसेरे कानूनेरे अधीन्न थिये, ते असन तैसेरे बच्चे भोनेरो अधिकार मैल्ले। 6 ते तुस ज़ैना बच्चेथ, एल्हेरेलेइ परमेशेरे मट्टेरी आत्मा इश्शे दिले मां भेजोरीए, ज़ै आत्मा, “हे बैपू, हे बाजी,” ज़ोती। 7 एल्हेरेलेइ हुनी तू गुलाम नई, पन परमेशेरो बच्चोस, ते ज़ैखन परमेशेरो बच्चोस, त तीं तैन सब मैलेलू जेसेरो वादो परमेशेरे अपने बच्चन देनेरो वादो कियोरोए।

???????????? ????? ???? ????????????? ??????

8 ज़ैखन तुस परमेशर न थिये जानते, त तुसन तैन केरे गुलाम थिये, ज़ैना हकीकति मां ईश्वर अथ्थी नई। 9 पन हुनी तुश्शो रिश्तो परमेशर सेइं आए, ते तुसेईं तै ज़ानो बल्के परमेशेरे अस कबूल किये, ते तैन कमज़ोर ते निक्केमी पेइली गल्लां केरे पासे किजो गातथ, कुन तुस तैन केरे दुबारा गुलाम भोने चातथ? 10 मीं शुनेरूए कि तुस गैर कौमां केरे विश्वासी, यहूदी केरे दिहाइन ते महीन्न ते खास वक्ते ते सालां केरे तिहारन मन्तथ, इन सोचतां कि परमेशर खुश भोते। 11 अवं तुश्शू एन केरनेरे वजाई सेइं परेशान आई, कि एरू न भोए, कि ज़ै मेहनत मीं तुश्शे लेइ कियोरीए तै बेफैइदी भोए।

12 हे द्वाव ते बेइनव, अवं तुसन कां बिनती केरताई, तुस अपने आपे यहूदी केरे कानूने करां आज़ाद केरा, किजोकि मीं अपनो आप आज़ाद कियोरोए जेन्चरे तुस गैर कौमरे लोक पेइले आज़ाद थिये, तुस पेइले मेरे सामने बड़े रोड़े थी। 13 तुसन याद भोलू, ज़ैखन अवं पेइली बार खुशखबरी शुनाने तुसन कां अव त अवं विमार थियो। 14 ते मेरी जिसमानी हालत ज़ै तुश्शे आजमैइशरी वजा थी, तुसेईं अवं घटिया न समझो ते तुसेईं दूर न कदो बल्के एन्चरे कबूल कियो जेन्चरे परमेशेरो दूत या यीशु मसीह एप्पू। 15 ते तुश्शी तै खुशी मनानी कोरां जेई? अवं सच्चे ज़ोई बटताई, तुस मेरे लेइ सब किछ बलिदान केरनेरे लेइ तियार थिये, इडी तगर कि अपनि एछ्छी भी। 16 ते कुन तुसन सेइं सन्न ज़ोनेरे वजाई सेइं अवं तुश्शो बैरी भोरोई। 17 तैना झूठे उस्ताद तुसन दोस्त बनानो त चातन, पन रोड़ी नीती सेइं नई; बल्के तुसन अलग केरने चातन, कि तुस तैन केरे चले बना। 18 जोशे मां भोनू रोडूए, कि रोड़ी गल्लन मां हर वक्त दोस्त बनानेरी कोशिश की गाए, सिर्फ तैस वक्ते नई ज़ैखन अवं तुसन सेइं साथी राताई। 19 हे मेरे बच्चव, ज़ांतगर तुसन मां मसीहेरू रूप न बने, तांतगर अवं तुश्शे लेइ ज़र्म देने बैली कुआन्शे जेरे तकलीफी मां राताई। 20 अवं त चाताई कि हुनी तुसन कां एइतां मिट्टी ज़बाना गल केरि, किजोकि मेरी समझी मां न एज्जे कि अवं तुसन सेइं कुन केरि।

?????? ?? ????????????? ??????

21 तुस ज़ैना मूसेरे कानूनेरे अधीन भोने चातथ, मीं ज़ोतथ, कुन कानूनेरी गल्लां शुन्नेरे लेइ तियार नई? 22 तैस मां इन लिखोरूए, कि अब्राहमेरां दूई मट्टां थियां; अक गुलाम कुआन्शरू, ते अक ज़ै आज़ाद थी तैसेरू। 23 पन ज़ैन गुलाम कुआन्शरू भोव, तैन आम बच्चां केरू जेरू ज़र्म, ते ज़ैन आज़ाद कुआन्शरू भोव, तैन परमेशेरे वादेरे मुताबिक ज़र्म। 24 इना दूई कुआन्शां परमेशेरे दूई करारां केरे रूपे मां कम केरतिन। पेइली कुआन्श हाजिरा सीनै पहाड़े हिराती ज़ैडी लोकन कानून मैल्लो, ज़ैन तैन गुलाम बनातू थियू। 25 हाजिरा मना अरबेरू सीनै पहाड़ेरी ज़ेरि आए, ज़ेसेरी तुलना मौजूद यरूशलेम सेइं केरोतीए, किजोकि तैन अज़ अपने बच्चन यानी अपने लोकन समेत गुलैमी मांए। 26 पन बेयू यरूशलेम अब्राहमेरे कुआन्श सारारू ज़ेरूए, ते तैसेरे बच्चे गुलाम नई। इन यरूशलेम इश्शे लेइ इश्शे अम्मरू ज़ेरू आए ज़ैसां विश्वास कियो। 27 किजोकि पवित्रशास्त्र ज़ोते, “हे बाँझ, तीं ज़ैसां कधे बच्चे नई ज़ावरे, खुश भो,

तीं जैस बच्चो ज्ञानेरी तकलीफ नई भोरी; आवाज उच्ची केर ते जयजयकार केर,
किजोकि शैरोरारी औलाद सुहागनी करां भी जादे।”

28 हे ढलाव ते बेइनव, तुस अब्राहमेरे मट्ठे इसहाकेरे जेरे आथ, जैन परमेशेरे वादेरे मुताबिक जर्मू, अस भी परमेशेरे वादेरे मुताबिक तैसेरे बच्चे बने। 29 ते जेन्चरे तैस वक्ते जै बच्चो आम बच्चां केरो जेरो जर्मोरो थियो, तैस सतातो थियो जै परमेशेरे आत्मारो मुताबिक जर्मोरो थियो, तेन्चरे अज भी अस तैन करां सताव झैल्लतम जैना कानून मेन्तां परमेशेरे सामने धर्मी भोनू चातन। 30 पन पवित्रशास्त्र कुन ज़ोते? “गुलाम कुआन्शी ते तैसेरे मट्ठे कढ, किजोकि गुलाम कुआन्शरू मट्ठू आजादेरे मट्ठे साथी वारस न भोलू।” 31 एल्हेरेलेइ हे ढलाव ते बेइनव, अस गुलाम कुआन्शरे बच्चे नई, जै कानूने, बल्के आजाद कुआन्शरां बच्चेम, जै विश्वासे।

5

????? ?????????? ???

1 मसीहे अस आजाद कियोरेम हुनी असन गुलामेरू जेरू यहूदी केरू कानून मन्नेरी जरूरत नई, अपने एस ऐजैदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न देथ।

2 हेरा, अवं पौलुस तुसन सेइं ज़ोताई, अगर परमेशेरे सामने धर्मी भोनेरे लेइ खतनो कराले, फिरी जैन मसीहे कियोरू तैसेरो तुसन कोई फैइदो न भोलो। 3 फिरी भी अवं हर एक्की सेइं ज़ोताई जै इस उमीदी सेइं खतनो कराते कि परमेशेरे सामने धर्मी भोए, तैस कानूनेरो हर हुक्म मन्नो पेनोए। 4 तुस जैना कानून मेन्तां धर्मी भोने चातथ, तुसेईं अपनो आप मसीह करां अलग कियो ते परमेशेरो अनुग्रह कबूल केरने करां इन्कार कियो। 5 अवं इन ज़ोई बटताई, किजोकि असन पवित्र आत्मारो तरफां पूरो भरोसो कि परमेशर असन धर्मी कबूल केरेलो किजोकि अस मसीह पुड़ विश्वास केरतम। 6 ते मसीह यीशु मां न खतनो, न बगैर खतनो किछ् कम्मेरोए, पन सिर्फ विश्वास जै प्यारे सेइं अस्सर केरते। 7 तुस त रोड़ी दौड़ लोरे थिये दौड़ने, तुस केनि रोके, कि सच्चे न मन्नथ। 8 एरी शिखर तुसन परमेशेरे नई दित्तोरी जैने तुस अपने बच्चे भोनेरे लेइ कुजोरेथ। 9 झूठी शिक्षा थोड़े जेरे खमीरेरी जेरि जैन सारे सोन्नोरे अट्टे खमीर केरते। 10 अवं प्रभु पुड़ भरोसो रखताई, कि तुसन झूठी शिक्षा पुड़ विश्वास केरने करां दूर रखे; पन जै तुसन परेशान केरते, तै कोई कि न भोए परमेशर तैस सज़ा देलो। 11 पन हे ढलाव ते बेइनव, अगर अवं लोकन प्रचार केरतो भोथो कि खतनो केरनो जरूरीए, त स्ताव न गाथो। अगर अवं ई प्रचार न केरतो राथो कि मुक्ति सिर्फ मसीहेरे करूसे सेइं, त फिरी केन्ची ठोकर न लगेथी। 12 रोडू भोथू कि जैना तुसन टपलातन, तैना अपनो अंग कटेथे!

13 हे ढलाव ते बेइनव, तुस आजाद भोनेरे लेइ कुजोरेथ पन एरू न भोए, कि ई आजादी जिसमानी कम्मां केरे लेइ मौको बने, बल्के प्यारे सेइं एक्की होरेरे सेवक बना। 14 किजोकि सारो कानून इस्से एक्की गल्ली मां पूरो भोइ गाते, “कि तू अपने पड़ोसी सेइं अपनो जेरो प्यार केर।” 15 पन अगर तुस एक्की होरि सेइं लटते ते तंग केरते राथ, त खबरदार राथ, एक्की होरेरी बरबादी केरेले।

????????? ?????????????? ?????????????? ???????

16 पन अवं ज़ोताई, पवित्र आत्मारो च़लाने सेइं च़लेले, त तुस जिसमेरी खुवैइशां कधी पूरी न केरेले। 17 किजोकि जिसम पवित्र आत्मारो खलाफे, ते पवित्र आत्मा जिसमेरे खलाफ खुवैइश केरते, ते इना एक्की होरेरे दुश्मन आन; एल्हेरेलेइ जैन तुस केरनू चातथ तैन न केरि बटथ। 18 ते अगर तुस पवित्र आत्मारो च़लाने सेइं च़लतथ त कानूनेरे अधीन न राए। 19 जिसमेरां कम्मां बांदन, मतलब बदमाशी, गंदा कम्मां, चपलूसी। 20 मूरती केरि पूजा, टूनो, बैर, लड़ाई, जलन, सरक, खलाफत, फसाद, विधर्म। 21 नफरत, नशो केरनो, नाज़, ते इन केरे जेरां होरां भी कम्मां आन, जैन केरे बारे मां अवं तुसन पेइलू ज़ोताई, जेन्चरे पेइलू भी ज़ोवरूए, कि एरां कम्मां केरनेबाले परमेशेरे राज़ेरे वारस नई भोने। 22 पन पवित्र आत्मारो फल प्यार, आनन्द, शान्ति, सबर, ते दया, भलाई, विश्वास, 23 नमरता, ते बरदाश केरनू; एरां कम्मां केरे खलाफ कोई कानून नई। 24 ते जैना मसीह यीशु मां आन, तैनेई जिसम तैसेरे खुवैइशन सेइं साथी करूसे पुड़ चाढ़ोरोए। 25 अगर पवित्र आत्मां असन नच्चीं जिन्दगी दित्तोरीए, त पवित्र आत्मारो मुताबिक च़लम भी। 26 अस घमण्ड न केरम, अस एक्की होरि न सरकाम, ते एक्की होरि सेइं न जलन केरम।

6

११११११ १११११११ ११११११ १११११

1 हे ढलाव ते बेइनव, अगर तुसन पतो चले कि केन्चे कोई पाप कियोरोए, त तुस जैना पवित् आत्मा रे चलाने सेइं चलतथ, तैस बडे नेरमी सेइं वापस धार्मिकतारे बत्तां वापस एजनेरी लेइ मद्दत केरा, ते अपनो भी खियाल रखा, कि तुस भी तैस्से अज़मैइशी मां न पेथ। 2 तुस एक्की होरेरी मुशकलन मां मद्दत केरा, ते एन्चरे मसीहेरो कानून पूरो केरा। 3 अगर कोई अपने आपे खास मैन्हु समझे ते तै सच्चे न भोए, त तै अपने आपे धोखो देते। 4 पन हर कोई अपने कम्मे परखे, ते तैखन तैस होरि केरे बारे मां नई पन अपने बारे मां घमण्ड केरनेरो मौको भोलो। 5 किजोकि हर कोई मैन्हु अपनो भार छूलो।

6 जैन वचनेरी शिक्षा मैलतीए, तैना सब रोड़ी चीज़न मां शिखालनेबाले शामिल रखन। 7 धोखो न खाथ, परमेशर ठाठन मां न उड़ाव गाए, किजोकि मैन्हु जैन किछ बेते, तैन्ने कटेलो। 8 किजोकि जै अपने जिसमेरे लेइ बेते, तै जिसमे सेइं विनाशेरी फसल कटेलो; ते जै आत्मा रे लेइ बेते, तै आत्मा सेइं हमेशारी जिन्दगरी फसल कटेलो। 9 अस रोड़ां कम्मां केरने मां हिम्मत न हारम, किजोकि अगर अस हार न मनमेले त परमेशर अपने वक्ते पुड़ असन इनाम देलो। 10 एल्हेरेलेइ जैड़ी तगर मौको मल्ले सेबन सेइं भलाई केरा; खास केरतां मसीही लोकन सेइं।

१११११ १११११११ ११ ११११११११

11 हेरा, मीं केतरे बडे-बडे लफसन मां तुसन अपने हथ्थे सेइं लिखोरूए। 12 जेतरे लोक यहूदन खुश केरने चातन तैना तुसन खतनो कराने लेइ ज़ोतन। तैना एन केरतन कि लोक प्रचार केरनेरे लेइ तैन न स्तान कि परमेशर लोकन सिर्फ एल्हेरेलेइ बचाते कि तैना विश्वास केरतन कि मसीह कुरूसे पुड़ मरोए। 13 किजोकि खतनो करानेबाले एप्पू भी सेभी कानूने पुड़ न चलन, पन तैना चातन तुस खतनो कराथ, ताके तैना होरि यहूदी केरे सामने घमण्ड केरनेरे काबल भोन, कि तुसेईं तैन केरे वजाई सेइं खतनो कियोरोए। 14 पन मेरे लेइ इने, अगर अवं घमण्ड केरि त सिर्फ इश्शे प्रभु यीशु मसीह पुड़ जै इश्शे लेइ कुरूसे पुड़ मरो। किजोकि तैसेरे मरने सेइं अवं हुनी दुनियारे चीज़ां केरि इच्छां केरो गुलाम न राव, ते तैन मीं पुड़ राज केरनेरी कोई शक्ति नई। 15 किजोकि न खतनो, ते न खतनो न भोनो जरूरीए, पन जरूरी इने, कि परमेशरे तुस पवित् आत्मा रे कम्मेरे जिरिये अक नव्वों इन्सान बनोरथ। 16 परमेशर तैन सेबन अपनि शान्ति देलो ते तैन बरकत देलो जैना इस नियमें मन्तन, तैना परमेशरेरे लोक आन।

17 अग्रोवं जो कोई मीं दुख न दे, किजोकि मेरे जानी पुड़ जैना दाग आन तैना हिरातन कि अवं यीशु मसीहेरो दास आई।

18 हे ढलाव ते बेइनव, इश्शे प्रभु यीशु मसीहेरो अनुग्रह तुसन पुड़ भोए। आमीन।

इफिसियों

1 अवं पौलुस परमेशेरी मेर्जी सेइं यीशु मसीहेरो प्रेरित आई। अवं तुसन जैना परमेशेरे लोक आथ ते इफिसुस नगरे मां रातथ ई चिट्ठी लिखने लोरोई।

2 इशशे बाजी परमेशर ते प्रभु यीशु मसीह करां तुसन अनुग्रह ते शान्ति मैलती राए।

???? ???? ????????? ?????

3 इशशे प्रभु यीशु मसीहेरे परमेशर ते कने बाजी केरि बडयाई भोए, इशशो रिशतो मसीह सेइं भोनेरे वजाई सेइं तैने असन हर लिहाजे सेइं तैना आत्मिक बरकतां दितोरिन, जैना बरकतां स्वर्गेरां एइतिन। 4 जेन्चरे तैने अस दुनिया बनानेरे पेइली मसीह मां चुने, कि अस तैसेरी नजरी मां प्यारे मां पवित्र ते बेइलजाम भोम। 5 किजोकि परमेशेरे असन सेइं प्यार कियो, तैनी बडे पेइले ई फैसलो कियोरो थियो कि तै असन यीशु मसीहेरे जिरिये अपने बच्चां केरे रूपे मां गोद ने, किजोकि तै इन केरनू चातो थियो। 6 अस परमेशेरे अनुग्रहेरे लेइ तैसेरी बडयाई केरतम, जै तैने असन मुफते मां दितो, किजोकि इशशो रिशतो तैसेरे टलारे मट्ठे सेइं आए। 7 परमेशेरे बडे अनुग्रहेरे मुताबिक मसीहेरे खूने बगाने सेइं असन छुटकारो मैल्लो, मतलब इशशे पाप माफ़ भोए। 8 जै तैनी सारे ज्ञान ते समझ सेइं साथी असन पुड बडो जादे कियो। 9 कि तैने अपन मेरजरो भेद, अपने रोडे इरादेरे मुताबिक असन पुड बांदो कियो, जै तैने पूरो केरनो थापोरो थियो। 10 परमेशेरे ठहरावरे वक्ते पुड तै स्वर्ग ते धेरतरी चीजन साथी आनेलो ते मसीह तैस पुड राज़ करालो।

11 मसीह सेइं इशशो रिशतो भोनेरे वजाई सेइं परमेशेरे अस चुने, तैन हासिल केरनेरे लेइ जेसेरो वादे तैने असन देनेरे लेइ कियोरो थियो। इन बिलकुल तेन्चरे भोव जेन्चरे तैनी बडे पेइलू पूरू केरनू थापेरू थियू ते इच्छा कियोरी थी। 12 अस यहूदी पेइले लोक आम जैनेई मसीह पुड उमीद रखोरि थी, ते अस चुने जे, ताके परमेशेरे महिमारी स्तुति केरि बटम। 13 ते तुस भी मसीह सेइं शामिल भोए जैखन तुसेईं सच्चू वचन शुनू, जै खुशखेबरां तुशशे लेइ मुक्ति आनी, जैखन तुसेईं विश्वास कियो परमेशेरे तुसन पुड अपन छाप लाई, ई छाप पवित्र आत्मा आए, जै तैनी असन दितो, जेसेरो वादो तैनी कियोरो थियो। 14 पवित्र आत्मा भी छुटकारेरे सैयरो जेरो आए, जै पक्कू केरते कि परमेशेरे असन तै विरासत देलो जेसेरो तैनी वादो कियोरोए, ते तैनी अस अपने लोकां केरे रूपे मां धिनोरेम, ताके तैसेरे महिमारी बडयाई भोए।

???????????? ???? ?????????

15 एल्हेरेलेइ, जेइसेरू मीं शुनेरूए कि तुस प्रभु यीशु पुड विश्वास केरतथ ते परमेशेरे सेब्भी लोकन सेइं प्यार केरतथ, 16 तुशशे लेइ परमेशेरेरू शुकर केरनू न शैरी, ते अपने प्रार्थनान मां तुसन याद केरताई। 17 अवं प्रार्थना केरताई कि परमेशर, इशशे प्रभु यीशु मसीहेरे महिमा बाले बाजी, तुसन पवित्र आत्मा दे, तै तुसन अकलमन्द बनालो ते परमेशेरे तुसन पुड बांदो केरेलो, ताके तुस तैस पिशैनी बटथ। 18 अवं ई भी प्रार्थना केरताई कि तै तुशशे मने खोलेलो, कि तुस बुझथ कि इशशे कुजानेरी कुन उमीद आए, ते केत्री महान ते महिमा बैली बरकतां केरे लेइ परमेशेरे अपने लोकन जो वादो कियोरोए। 19 ते तैसेरी शक्ति इशशे लेइ जैना अस विश्वास केरतम, केत्री महाने, तैसेरी शेक्तेरे कम्मेरे मुताबिक, 20 जैन तैनी मसीहेरे बारे मां कियू, कि तैस मुडदन मरां जीते केरतां स्वर्गे मां अपने देइने पासे विशालो। 21 तैडी तै हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एक्के अधिकारी करां तै महान आए, जैना न सिर्फ इस जहानी मां, पन एजनेबाले जहानी मां भी आए। 22 ते परमेशेरे सब किछ मसीहेरे अधिकारे मां कियू, तैनी सेब्भी चीजन पुड अधिकारी बनेइतां कलीसिया दितो। 23 कलीसिया मसीहेरी जान आए, ते तैसेरी भरपूरी जै सेब्भन मां सब किछ पूरू केरतीए।

2

???? ???? ????????? ?????

1 बीतोरि वक्ते मां परमेशेरे तरफां तुसन कां नर्वीं जिन्दगी न थी; तुस अपने पाप ते बुरे कम्मां केरे वजाई मरोरे लोकां केरे जेरे थिये। 2 तैस वक्ते तुस दुनियारे रीति पुड चलते थिये, ते तुस अम्बेरेरे दुष्ट आत्मा केरे अधिकारी

मुताबिक चलते थी, जेसेरी आत्मा हेजू भी परमेशेरे हुकम न मन्नेबाले लोकां केरे मन्न मां कम केरती। 3 एन मां अस भी सब पेइले अपने जिसमेरे खुवैइशन मां दिहाड़े कटते थी, ते जिसम, ते मनेरी मर्जी पूरी केरते थी, ते होरि लोकां केरे जेरे स्भावे सेइं बुरे थिये ते परमेशेरे सज़ारे अधीन थिये। 4 पन परमेशर जै बड़ो दया केरनेबालोए; अपने तैस बड़े प्यारे सेइं, जैस सेइं तैने असन सेइं प्यार कियो। 5 जैखन अस पापां केरे वजाई सेइं मरे लोकां केरे जेरे थिये, तैनी असन ज़िन्दगी दिती जैखन तैनी मसीह मुड़दन मरां जीतो कियो, परमेशेरे अनुग्रहे सेइं तुसन मुक्ति मैलोरीए। 6 किजोकि तैनी अस मसीह सेइं साथी मुड़दन मरां जीते किये, ते स्वर्गेरे टैरन मां तैस सेइं साथी विशाले। 7 परमेशेरे एन कियूं कि एजनेबाले वक्ते मां दुनियारे लोकन हिराए कि तैसेरो अनुग्रह केतरो महान आए। ई अनुग्रह इश्शे लेइ हिराव, तैने इश्शे लेइ एन कियूं जैना अस यीशु मसीह मां आम। 8 किजोकि विश्वासेरे ज़िरिये परमेशेरे अनुग्रहे सेइं तुसन मुक्ति मैलोरीए, ते तुसेईं अपनो आपे एप्पू नई बचावरो बल्के परमेशेरे दाने सेइं तुस बचोरेथ। 9 ते भले कम्मन सेइं नई, एरू न भोए कि कोई घमण्ड केरे। 10 किजोकि अस परमेशेरे बनोरेम; ते मसीह यीशु मां तैन भले कम्मां केरे लेइ पैदा कियोरेम, जैना परमेशेरे पेइले इश्शे केरनेरे लेइ तियार करां।

???? ???? ? ? ?

11 एल्हेरेलेइ याद केरा, कि तुस जैना ज़रमनेरे गैर कौमरेथ, ते खतनो कियो लोक तुसन जो बगैर खतने बाले ज़ोतन। 12 तुस लोक तैस वक्ते मसीह न थिये ज़ानते, ते तुस परमेशेरे चुनोरे इस्राएली लोक न थिये, ते तुस तैन रोड़ी चीज़न मां हिस्सेदार न थिये ज़ैन केरो वादो परमेशेरे यहूदी लोकन सेइं कियोरो थियो, ते न उमीद ते दुनियाई मां परमेशेरे करां दूर थिये। 13 पन अक वक्त थियो कि तुस परमेशेरे करां दूर थिये, पन हुनी यीशु मसीह मां तैसेरे खून सेइं नेड़े आनोरेथ। 14 किजोकि मसीहे इश्शो मेले कराव, तैन्ने यहूदी ते गैर यहूदी दुइये अक केरे, ते अलग केरनेबाली दिवार जै मझाटे थी, डोली। 15 मसीहेरे करूसेरे मौतरी वजाई सेइं, तैनी कानूनेरे सारे नियम पूरे तरीके सेइं खतम किये। मसीहेरो एरो केरनेरो मकसद ई थियो कि दूई टोली केरि अक नव्वीं टोली बनाए, जै तैस सेइं जुड़ोरी भोए। 16 मसीहेरे करूसेरी मौतरे ज़िरिये, तैनी दूई टोली अक की, ते परमेशेरे सेइं तैन केरो मेल कराव, एन्चरे यहूदी ते गैर यहूदी केरि दुश्मनी खतम की। 17 ते मसीहे एइतां तुस गैर कौमरे लोक जैना परमेशेरे करां दूर थिये, ते यहूदी जैना तैसेरे नेड़े थिये, दुइयन मेल मिलापेरी खुशखबरी शुनाई। 18 किजोकि मसीहेरे बदौलम अस सारे एककी पवित्त्र आत्माके ज़िरिये बाजी परमेशेरे कां एज्जी बटतम। 19 एल्हेरेलेइ तुस गैर कौमां केरे लोक परदेशी ते मुसाफर न राए, पन परमेशेरे लोकां केरू झुण्ड, ते परमेशेरे घरानेरे भोए। 20 तुस इमारतरे जेरेथ जेसेरी बुनियाद प्रेरित ते नेबी आन ते यीशु मसीह एप्पू तैसेरे कूनेरो घोड़े। 21 जैस मां सारी इमारत साथी मिलतां प्रभु मां अक मन्दर बनती गातीए। 22 तुस गैर कौमरे विश्वासी लोक भी परमेशेरे होरि लोकन सेइं साथी शामिल किये जे, किजोकि तुस मसीह सेइं साथी अक भोरेथ। ताके तुस अक घर बनथ जैड़ी परमेशेरो आत्मा रहते।

3

???? ???? ???? ???? ?

1 किजोकि परमेशेरे तुश्शे गैर कौमां केरे लेइ इन कियोरू, अवं पौलुस तुश्शे लेइ प्रार्थना केरताई, अवं कैदे मां आई, किजोकि अवं तुश्शे लेइ यीशु मसीहेरी सेवा केरताई। 2 पक्कू तुसेईं शुनेरूए, परमेशेरे अपने अनुग्रहेरे ज़िरिये तुसन खुशखबरी शुन्नेरी लेइ मीं ज़िमेवारी दितीरीए। 3 परमेशेरो छप्पोरो मकसद बड़ो पेइलो छपोतो थियो, हालांकी तैनी मीं पुड़ बांदो कियो, किछ गल्लां आन जैना अवं तुसन चिट्ठेरे ज़िरिये समझानो चाताई। 4 जैस सेइं तुस पेढतां बुझी बटतथ, कि अवं मसीहेरो तै भेद कोड़ि तगर समझताई। 5 बीतोरे वक्ते मां परमेशेरे ई भेद लोकन पुड़ बांदो नई कियोरो, पन हुनी पवित्त्र आत्माके ज़िरिये अपने पवित्त्र प्रेरितन ते नेबन पुड़ बांदो कियो। 6 परमेशेरो मकसद ई आए, खुशखेबारे ज़िरिये यीशु मसीहे सेइं तैन केरो रिशतो भोनेरे वजाई सेइं गैर कौमां केरे लोक तैस्से विरासती मां हिसेदार भोले, ते तैना तैस्से जानरे अंग आन, जेसेरो वादो परमेशेरे यहूदन सेइं कियोरो।

7 परमेशेरे अनुग्रह ते बेड़ि शेक्ति सेइं मीं तै खुशखेबारी प्रचार केरनेरो लेइ सेवा केरनेरो खास अधिकार दितीरोए। 8 चाए अवं परमेशेरे सेब्नी लोकन मरां निकड़े करां निकोड़ोई। परमेशेरे मीं पुड़ अनुग्रह कियो, कि अवं गैर कौमन खुशखबरी शुनेई बेटि कि मसीह हमेशारी बरकतां केरो देनेबालोए। 9 अवं इस भेदेरे मकसदेरे बारे ज़ोनेरे लेई चुनोरोई, जै परमेशर हर चीज़ बनानेबालोए तैनी शुरू करां छप्पोरो रखोरो थियो। 10 ताके हुनी कलीसियारे

जिरिये सेइं, परमेशेरू बडू ज्ञान, अम्बरेरे तैन प्रधान्न ते अधिकैरन पुड़ बांदू कियूंगाए । 11 परमेशेरु दुनिया बनानेरे पेइलो इन्ने थापेरू थियू, जैन तैने इशशे प्रभु यीशु मसीह मां पूरू कियू । 12 किजोकि मसीह पुड़ इशशो विश्वासे, तैसेरे वजाई सेइं अस परमेशेरी मौजूदगी मां हिम्मत ते भरोसे सेइं साथी एज्जी बटतम । 13 एल्हेरेलेइ अवं बिनती केरताई कि जैना दुःख तुशशे लेइ मीं पुड़ लोरेन एजने, तैन केरे वजाई सेइं दिलेरी न शैरी, किजोकि इन सब तुशशे फैइदेरे लेइ आए ।

???????? ???? ?

14 एल्हेरेलेइ अवं तैस बाजी परमेशेरे कां जैधू केरे भारे प्रार्थना केरताई, 15 तैए आए जै स्वर्ग ते धेरती पुड़ रानेबाले विश्वासी लोकां केरो बाजी । 16 कि तै अपने महिमारे धनेरे मुताबिक तुसन इन दान दे, कि तुस तैसेरी आत्माई सेइं अपनो एनतरीयो मैन्हु मां शक्ति हासिल केरतां मजबूत भोते गाथ । 17 ते विश्वासे सेइं मसीह तुशशे दिले मां राए, कि तुस प्यारे मां जील छेडतां ते मुनीयाद छेडतां, 18 सब पवित् लोकरन सेइं रोडेचारे समझनेरी शक्ति हासिल केरा; कि तैसेरी चौड़ाई, ते लमबाई, ते ऊंचाई, ते डुघार केतरोए । 19 ते अवं प्रार्थना केरताई कि तुस मसीहेरे तैस प्यारे सेमझी बटतथ जै समझी करां बेइरे, कि तुस परमेशेरी भरपूरी सेइं भेरोते गाथ । 20 हुनी जै एरो शेक्ति बालोए, जै इशशी बिनती ते समझी करां बडू जादे कम केरि बटते, ते तैस शेक्तेरे मुताबिक असन मां कम केरते, 21 कलीसिया मां, ते मसीह यीशु मां, तैसेरी महिमा पीड़ी करां पीड़ी तगर हमेशा भोती राए । आमीन ।

4

???????? ???? ???? ?

1 अवं जै प्रभुएरी सेवा केरनेरे वजाई सेइं कैदे मां आई, तुसन कां बिनती केरताई, कि जेन्चरे परमेशेरे तुस अपने लोक भोनेरे लेइ कुजेवरेथ, तैसेरे मुताबिक जिन्दगी भी जीथ । 2 मतलब सैरी दीनतां ते नम्रता सेइं साथी, ते सबर केरतां प्यारे सेइं एक्की होरेरी झल्लां । 3 इस कम्मे मां अपनि पूरी कोशिश केरा ताके तुस मेल मिलापे सेइं राथ, किजोकि पवित् आत्माए जिरिये तुस अक कियोरेथ । 4 अस सारे विश्वासी एक्की जानरे अंगां केरे जेरे आम, ते असन सेबन अक्के पवित् आत्माए मैलोरोए; ते तुसन अक्के उमीद दिती, जैखन तुस परमेशेरे लोक भोनेरे लेइ चुने जे । 5 अक्के प्रभुए जै यीशु मसीहे, जैस पुड़ अस सब विश्वास केरतम, ते असेईं सेबन अक्के बपतिस्मो मैल्लो । 6 ते अक्के परमेशेरे, जै सेबनी केरो बाजीए, तैए सेबन पुड़ राज केरते ते इशशे दरमियान कम केरते, ते असन सेबन मांए रहते । 7 पन मसीहे असन मरां हर एक्की तैसेरू कम केरनेरे लेइ अलग-अलग किसमेरी काबलीत दित्तोरीए ।

8 एल्हेरेलेइ पवित्शास्त्र जोते,

“जैखन तै उच्चे पुड़ चाढो,
ते तैने बडे कैदी एप्पू सेइं साथी ने,
ते तैने लोकन बेडि बरकतां दिती ।”

9 (तैसेरे उच्चे चढनेरो साफ मतलबे ई आए, कि मसीह धेरतरे बुनीयें ठारन मां ओरो थियो । 10 एल्हेरेलेइ मसीह बुन ओरो थियो, तैए आए जै सैरी अम्बरे करां भी उबरो जेव, मसीहे एन एल्हेरेलेइ कियू ताके सब किछ तैसेरे हज्जरी सेइं भरपूर भोए) 11 ते तै मसीहे जैने (कलीसियाई) जिमेबारी दिती, तैने किछ प्रेरित किछ नबी, किछ खुशखबरी शुनाने बाले, किछ रखवाले ते किछ उस्ताद चुने । 12 मसीहे अपने लोकन इना जिमेदारी एल्हेरेलेइ दित्तोरिन, कि कलीसिया जै मसीहेरी जाने तरक्की केरे । 13 जैखन कि अस सब विश्वास, ते परमेशेरे मट्टेरी पिशानी मां अक भोम, ते जांतगर अक सिद्ध मैन्हु न भोम ते मसीहेरे कदेरे अनदाजे तगर न पुजाम । 14 ताके अस अग्रोवं जो बच्चां केरे जेरे न रहम, जैना मैन्हु केरि ठगनेरी गल्लां ते च्लैकी सेइं तैन केरे कोशिशो सेइं खियालां केरि ते शिक्षारी हर एक्की बयाने सेइं उछड़ाए, ते इरां उरां घुमाए गाते भोन । 15 बल्के प्यारे सेइं सत्र जोइतां, सेबनी गल्लन मां मसीहेरे जेरे सिद्ध भोथ जै कलीसियारी क्रोडी । 16 जैस सेइं सारी जान सेबनी जोडां केरि मही सेइं साथी मिलतां, ते साथी जुडतां तैस अस्सेरे मुताबिक जै सेबनी हिसन सेइं भोइतां, अपने आपे बद्धाते, कि तै प्यारे मां तरक्की केरतो राए ।

???? ???? ???? ?

17 एल्हेरेलेइ अवं इन ज़ोताई, ते प्रभु मां खबरदार केरताई कि जेन्चरे गैर विश्वासी लोकां केरे लोक अपने मनरे बेकार खियालन पुड़ चलतन, तुस अजेरे बाद तैन केरे जेरे न चला। 18 किजोकि तैना बेसमझ भोरेन, ते तै अज्ञानतारी वजाई सेइं ते सखत मनरे वजाई सेइं तैना तैस ज़िन्दगी करां दूर आन जै परमेशर देते। 19 ते तैना बेशर्म भोइतां, एशे मां लेगि जे, कि सेभी किसमेरां गन्दां कम्मां शोके सेइं केरन। 20 पन तुसन मसीहेरी एरी शिक्षा नई मैल्लोरी। 21 बल्के मीं पूरू याकीने कि जैखन तुसेईं यीशुएरे बारे मां अपने उस्तादन करां शुनू, त तुसेईं तैन करां सच्च्ची शिक्षा शिख्खी। 22 कि तुस पेइले चाल चलनेरे पुरानी इन्सानयती जै टपलाने बैली इच्छां केरे मुताबिक भ्रष्ट भोइ गातीए, खोल्ला। 23 इसेरे बदले पवित्त्र आत्मा तुशशे खियालन ते नज़िरियो बदले। 24 परमेशरे तुसन नव्वों स्वभाव दित्तोरोए, जै तैसेरे स्वभावेरे जेरो आए। त तुस नव्वें स्वभावेरे जेरे जीथ। सच्च्चे तुस धर्मी ते पवित्त्र भोथ।

25 एल्हेरेलेइ झूठ ज़ोनू शैरतां हर कोई अपने पड़ोसी सेइं सच्च ज़ोए, किजोकि अस एप्पू मामेइं एक्की जानेरे अंग आम। 26 अगर तुस क्रोधे मां भोथ खबरदार राथ, कि पाप न केरथ, दिहाड़ो डुबने तगर तुशशो क्रोध मुक्की गाए। 27 ते शैताने मौको न देथ कि तै तुशशी अज़मैइश केरे। 28 चोरी केरनेबालो फिरी चोरी न केरे; बल्के इमानदेरी सेइं अपने हथ्थन सेइं मेहनत केरे; एल्हेरेलेइ जैस ज़रूरत भोए तैस देनेरे लेइ तैस कां किछ्छ भोए। 29 कोई गन्दी गल तुशशे ज़बाना न निस्से, पन ज़रूरतरे मुताबिक तैन्ने ज़ोथ, ज़ैन होरि केरे लेइ विश्वासे मां मज़बूती सेइं बद्धनेरी वजा भोए। तैखन ज़ैन तुसेईं ज़ोवं तैन लोकां केरे लेइ रोड़ भोलू ज़ैना तुशशी शुन्तन। 30 ते ज़ैन किछ्छ तुस केरथ तैसेरे वजाई सेइं परमेशेरे पवित्त्र आत्मा दुखी न केरा, जैस सेइं तुसन पुड़ छुटकारेरे दिहाड़े लेइ छाप दित्तोरीए। 31 सेभी किसमेरी ट्लइठार ते प्रकोप, ते क्रोध, सखत गल, ते तुहीन ते सारो बैर-भाव सेइं तुस दूर कियोरेथ। 32 ते एक्की होरि पुड़ दया केरा, ते माफ़ केरनेबाले भोथ, ते जेन्चरे परमेशेरे मसीह मां तुशशे पाप माफ़ किये, तेन्चरे तुस भी एक्की होरेरे पाप माफ़ केरा।

5

?????? ???? ?????

1 एल्हेरेलेइ तुस परमेशेरे बच्चेथ ज़ैन सेइं तै प्यार केरते, तैसेरे जेरे बन्नेरी कोशिश केरा। 2 होरि केरे लेइ प्यारे सेइं भेरतां ज़िन्दगी जीथ, जेन्चरे मसीहे भी तुसन सेइं प्यार कियो; ते इशशे लेइ अपनी आप रोड़ी मुशकरे लेइ परमेशेरे कां च़ेढ़तां बलिदान केरो।

3 ते जेरू परमेशेरे लोकां केरे लेइ ज़रूरीए, तेन्चरे तुसन मां भी बदमाशी, ते कोन्ची किसमेरू बुरू कम न भोए, या लालच़ेरे बारे मां गल भी न भोए। 4 ते न बे शरमी, न बेंसरी गल्लां, न मेवजेरी गल्लां, किजोकि इना गल्लां शोभन्न न, बल्के तुसेईं परमेशेरू शुक्र कियोरू लोड़े। 5 किजोकि तुस इन ज़ानतथ, कि कोन्ची बदमाश, या भिट्टो मैन्हु, या लालच़ी मैनेरो जै मूरती पूजा केरनेबालोए, मसीह ते परमेशेरे राज़े मां तैसेरो कोई हिस्सो नई। 6 कोई तुसन ई सल्लाह देइतां धोखो न दे, कि परमेशेरे हकीकति मां तैन सज़ा न देलो ज़ैना एरे पाप केरतन। 7 एल्हेरेलेइ तैन केरू साथ न रखा। 8 किजोकि तुस त पेइले आंधरू थी, पन हुनी प्रभु यीशु मां लोआथ, ते लोअरे बच्चां केरे जेरे च़ला। 9 (किजोकि लोअरो फल सेभी किसमेरी भलाई, ते धार्मिकता, ते सच्च्चे)। 10 ते इन तोप्पां कि प्रभु कुन रोड़ लगते। 11 ते आंधेरां ते बेकार कम्मन मां शामिल न भोथ, बल्के लोकन इन हिराथ कि इना कम्मां बुरन। 12 किजोकि गैर विश्वासी लोकां केरां छपोरां कम्मां केरि गल केरनि भी शर्मारी गल आए। 13 जैखन लौ कोन्ची चीज़ी पुड़ चमकती त हर कोई लेई बटते कि इन केरू, किजोकि जैखन लौ किछ्छ हिराती, त तै चीज़ एप्पू लौ भोइ गातीए। 14 एल्हेरेलेइ एन्चरे ज़ोवं गाते,

“हे झुलने बाला उठ

ते मुड़दन मरां जीतो भो,

ते मसीहेरी लौ तीं पुड़ चमकेली।”

15 एल्हेरेलेइ रोड़े च़ारे हेरा, कि केरि ज़िन्दगी जीने लोरेथ। बेअक्लां केरि ज़ेरि नई पन अक्लमन्दा केरि ज़ेरि ज़िन्दगी जीथ। 16 ते मौको कीमती समझा, किजोकि दिहाड़े बुरेन। 17 एल्हेरेलेइ बेअक्ल न बना, पन ध्याने सेइं समझा, कि प्रभुएरी तुशशे लेइ कुन मर्जी? 18 ते शराब पीने मां मतवाले न भोथ, किजोकि एस सेइं बदचलनी भोतीए, पन पवित्त्र आत्मा सेइं भेरोते राथ। 19 ते एप्पू मामेइं परमेशेरां भजन ते स्तुति केरते ते आत्मिक गीत

जोथ, ते अपने-अपने मने मां प्रभुएरे लेइ गीत जोथ ते किरतन करते राथ । 20 ते सदा सेभी गल्लां केरे लेइ प्रभु यीशु मसीहेरे नंवे सेइ बाजी परमेशेरू शुक्र करते राथ । 21 ते मसीहेरे डरे सेइ एक्की होरेरे अधीन राथ ।

?????? ?? ?????????

22 हे कुआन्शव, अपने-अपने मुन्शां केरे अधीन राथ, जेन्चरे प्रभुएरे । 23 किजोकि मुन्श त कुआन्शरी क्रोडी जेन्चरे मसीह कलीसियारी क्रोडी, ते मसीह कलीसियारो मुक्ति देनेबालोए जै तैसेरी जाने । 24 जेन्चरे कलीसिया मसीहेरे अधीने, तेन्चरे कुआन्शां भी हर गल्ली मां अपने-अपने मुन्शेरे अधीन रान ।

25 हे मुन्शव, अपने-अपने कुआन्शन सेइ प्यार केरा, जेन्चरे मसीहे भी कलीसिया सेइ प्यार केरतां अपनो आप तैसेरेलेइ दित्तो । 26 ताके तैस वचनेरे जिरिये पैनेरे निहाने सेइ शुद्ध केरतां पवित्तर बनाए । 27 ते तैस अक एरी महिमा बाली कलीसिया बनेइतां एप्पू कां खड़ी केरे, जैस मां न कोई दाग, न धबो, न कोई एरी चीज भोए, बल्के पवित्तर ते बेइलजाम भोए । 28 एन्चरे मुन्श अपने कुआन्शी सेइ अपने जानी बराबर प्यार केरे । जै अपने कुआन्शी सेइ प्यार करते, तै एप्पू सेइ प्यार करते । 29 किजोकि कोन्चे कधी अपने जानी सेइ बैर नई रखोरो, बल्के तैसेरी हेरगेश कियोरीए, जेन्चरे मसीहे भी कलीसियाई सेइ करते । 30 एल्हेरेलेइ अस मसीहेरे जानरे अंगां केरे जेरे आम ।

31 जेन्चरे पवित्तरशास्त्र जोते “एल्हेरेलेइ मडद अम्मा बाजी शैरतां अपने कुआन्शी सेइ मिलोरो रालो ।” 32 ई भेद त बडोए; पन अवं मसीह ते कलीसियारे बारे मां जोताई । 33 पन तुसन मरां हर कोई अपने कुआन्शी सेइ एप्पू बराबर प्यार केरे, ते कुआन्श भी अपने मुन्शेरो इज्जत केरे ।

6

?????? ?????? ?? ???????

1-3 पवित्तरशास्त्र जोते, “अपने अम्मा ते बाजी केरि आदर केरा, तैखन तुशू भलू भोलू ते दुनियाई मां तुशू लम्मी उमर भोली ।” ई पेइलो हुक्मे जैस सेइ परमेशेरे वादो कियोरोए, त बच्चव इन तुशू लेइ रोडू आए, तुस जैना प्रभु यीशु पुड़ विश्वास केरतथ, अपने अम्मा बाजी केरू जोनू मन्ना । 4 ते हे बच्चन बालव, अपने बच्चन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा ।

?????? ?? ???????

5 हे गुलामाव, जेने लोक दुनियारे मुताबिक तुशू मालिकन, अपने मनेरे सचैई सेइ डरते, ते थरकते, ते जेन्चरे मसीहेरो तेन्चरे तैन केरो भी हुक्म मन्ना । 6 ते मैन्हु खुश केरेने बालां केरि जेरे हिरानेरे लेइ सेवा न केरा, पन मसीहेरे दासां केरे जेरे मने सेइ परमेशेरी मेर्जी पुड़ चला । 7 ते तै सेवा मैन्हु केरि नई, पन प्रभुएरी जैनतां केरा । 8 किजोकि तुस जानतथ, कि जै कोई जेरू रोडू कम केरेलो, चाए गुलाम भोए, चाए आज्ञाद; तैस प्रभु करां तेरहु इनाम मैलेलू । 9 एन्चरे हे मालिकव, तुस भी धेमकी शैरतां अपने नौकरन सेइ रोडो बर्ताव केरा, किजोकि तुस जानतथ, कि तैन केरो ते तुशू दुइयां केरो मालिक स्वर्गे मांए, ते तै केन्चेरी तरफदारी न केरे ।

???????? ?????? ?? ?????????

10 आखरी मां तुस प्रभुएरी शक्ति बाले शक्ति मां मजबूत बना । 11 परमेशेरे सारे हथियार बन्धा; ताके तुस शैतानेरे सारे मन्सूबां केरो मुकाबलो केरि बटतथ । 12 किजोकि इशू ई लडाई, खूने या मांसे सेइ यानी मैन्हु केरे खलाफ नई, बल्के प्रधान सेइ, ते अधिकैरन सेइ, ते इस दुनियारे आंधेरे हाकिमन सेइ ए, ते तैस दुष्टेरे आत्मिक फौजन सेइ ए जैना आसमाने मां आन । 13 एल्हेरेलेइ परमेशेरे सारे हथियार बन्धा, ताके तुस जेइस बुरे दिहाइन एजन त तुस सामनो केरि बटतथ, ते सब किछ पूरू केरतां मजबूत राथ । 14 परमेशेरे सच्च्चाई पटकेरी जेरि अपने कमरी सेइ बन्धा, ते धार्मिकतारी झिलम लेइतां, 15 ते पवन्न मां मेलेरे खुशखबरी शुनानेरे तियैरारे बूट लाथ । 16 ते तैन सेबन सेइ साथी विश्वासेरी ढाल घिन्तां मजबूत भोथ जैस सेइ तुस तैस शैतानेरे सब जलते तीर हिशेई बटथ । 17 ते मुक्त्रो टोप, ते आत्कारी तलवार जैन परमेशेरू वचने, नेथ । 18 ते हर वक्त ते हर किसमे सेइ जै पवित्तर आत्मा चलाने सेइ प्रार्थना ते बिनती करते राथ, ते बीझे राथ, कि सब परमेशेरे लोकां केरे लेइ लगातार बिनती केरा । 19 ते मेरे लेइ भी, कि मीं वचन शुनानेरे वक्त हिम्मत भोए, कि अवं दिलेरी सेइ खुशखबरारो भेद जोई बेटि । 20 एल्हेरेलेइ अवं शंगलन सेइ बन्धोरो राजदूतेरो जेरो सेवा करनेबालोई । प्रार्थना केरा कि जेन्चरे मीं शुनावरू लोडे, तेन्चरे अवं दिलेरी सेइ खुशखबरी शुनेई बेटि ।

???? ?????

²¹ तुस भी, अवं ज़ोई बटताई ते कुन केरने लोरोई, इस सेइं बुझा। तुखिकुस ज़ै तुसन सब किछ् ज़ोलो। तै इश्शो ट्लारो साथीए, ते प्रभु मां वफादार सेवके। ²² तै मीं तुसन कां एल्हेरेलेइ भेजोरोए, कि तुस इश्शी हालती ज़ानथ, ते तै तुश्शे मन्न मां हिम्मत दे।

²³ अवं प्रार्थना केरताई कि इश्शो बाजी परमेशरे ते प्रभु यीशु मसीह तुसन विश्वासी लोकन शान्ति दे, ते तैना तुसन एक्की होरि सेइं प्यारे मां ते मसीह पुड़ विश्वासे मां बनोरे रानेरे वजा भोन। ²⁴ ज़ैना इश्शे प्रभु यीशु मसीह सेइं सच्चो प्यार केरतन, तैन सेब्बन पुड़ अनुग्रह भोतो राए।

फिलिपियों

1 अवं पौलुस, त कने तीमुथियुस, यीशु मसीहेरे दास आम। इश्शे तरफां सेम्भी पवित्तर लोकां केरां नंवां, जैना मसीह यीशु मां भोइतां फिलिप्पी नगरे मां रातन, रखवालन ते सेवकन समेत, 2 इश्शे बाजी परमेशर ते प्रभु यीशु मसीहे केरां तुसन अनुग्रह ते शान्ति मैलती राए।

??

3 अवं जैखन-जैखन तुसन याद केरताई, तैखन-तैखन अपने परमेशेरू शुक्र केरताई। 4 ते जैखन भी तुश्शे सेम्भी केरे लेइ बिनती केरताई, ते हमेशा आनन्दे सेइं प्रार्थना केरताई। 5 किजोकि तुस पेइले दिहाड़े केरां अज तगर यीशु मसीहेरी खुशखबरी फैलाने मां मीं सेइं साथी शामिल रावरेथ। 6 ते मीं इस गल्लरो भरोसोए, कि परमेशेरु तुसन मां रोडे कम्मेरी शुरुआत कियोरीए, तैए तैस कम्मे यीशु मसीहेरे वापस एजनेरे दिहाड़े तगर पूरू केरेलो। 7 इन जेइजे, कि अवं तुसन सेम्भी केरे लेइ एरू सोची, किजोकि तुस मेरे मने मां बस्सोरेथ, ते मेरे कैदे मां खुशखबरारे लेइ जुवाब ते सबूत देने मां तुस सब मीं सेइं साथी अनुग्रहे मां मीं साथिथ, 8 इस मां परमेशर मेरो गवाहे, कि अवं यीशु मसीहेरो जेरो प्यार केरतां तुश्शे सेम्भी केरू लालच केरताई। 9 ते अवं ई प्रार्थना केरताई, कि तुश्शो प्यार ज्ञान ते सेम्भी किसमेरो जमीर सेइं होरे भी बद्धते गाथ। 10 इडी तगर तुस रोडी केरां रोडी गल्लां ट्लाएरी बुझा, ते मसीहेरे दिहाड़े तगर सच्चे बनोरे राथ; ते ठोकर न खाथ। 11 ते तैस धार्मिकतारे फले सेइं जै यीशु मसीहेरे जिरिये भोते, भेरोते गाथ जैस सेइं परमेशेरु महिमा ते बडयाई भोती राए।

??

12 हे ढलाव ते बेइनव, अवं सच्च ज़ोताई, कि तुस इन ज्ञाना, कि मीं पुड़ जै बीतोरीए, तैस सेइं खुशखबरारी बडोतरी भी भोइ। 13 इडी तगर कि महाराजेरी सारी फौज ते बाकी सारे लोकन मां इन बांदू भोव कि अवं मसीहेरे लेइ कैद मां आई। 14 ते प्रभु यीशु मां जैना ढला आन, तैन मरां बडे मेरे कैद भोनेरे वजाई सेइं आन, तैना हिम्मत केरतां परमेशेरु वचन बेधड़क भोइतां ते दिलेरी सेइं शुनानेरी कोशिश केरतन।

15 किछ लोक त जलन ते लडैई सेइं मसीहेरो प्रचार केरतन ते किछ लोक सच्चे दिले सेइं। 16 किछ त इन सेमझतां कि अवं खुशखबरारे लेइ जुवाब देनेरे लेइ ठेरावरोई प्यारे सेइं प्रचार केरताई। 17 पन तैना होरे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बधान। 18 त कुन भोव? सिर्फ इन, कि हर बत्तां चाए बुरे खियाले सेइं, चाए सच्चे सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो।

??

19 किजोकि अवं ज्ञानताई, कि तुश्शी प्रार्थनाई सेइं, ते यीशु मसीहेरी आत्मारे दाने सेइं इसेरो नितीजो मेरी मुक्ति भोली। 20 अवं त दिले सेइं इन चाताई, ते ई उमीद रखताई, कि अवं कोन्ची गल्ली मां न छिथोई, बल्के जेन्चरे मेरी बडी दिलेरी सेइं मसीहेरी बडयाई मेरे जिसमे सेइं भोती राई, तेन्चरे हुना भी भोए चाए अवं जीतो रेइ या मेरी। 21 किजोकि मेरे लेइ जीतू रानू मसीहे, ते मरनू फैइदोए। 22 पन अगर जिसमे मां जीतू रानू मेरे कम्मेरे लेइ फैइदेमंदे त अवं न जैनी, कि केस चुनी। 23 किजोकि मीं दुइयां केरे मझाटे चुने मां मुशकिल भोने लोरीए। अवं मरनू चाताई ताके स्वर्गे मां मसीह साथी रेइ बेटि, किजोकि इन बडू जरूरीए। 24 पन तुश्शी महत केरनेरे लेइ मेरू जीतू रानू बडू जरूरीए। 25 एल्हेरेलेइ कि मीं इलहेरो भरोसोए ते अवं ज्ञानताई कि अवं जीतो रानोई, बल्के तुसन सेम्भन सेइं साथी रानोई जैस सेइं अवं तुश्शी महत केरि, कि विश्वासे मां मजबूत भोथ, ते इस मां खुश राथ। 26 जैखन अवं तुसन कां दुबारां एज्जी, तुसन कां जादे वजा भोली यीशु मसीह पुड़ घमण्ड केरनेरी एल्हेरेलेइ जैन किछ तै मेरे जिरिये केरने लोरोए। 27 सिर्फ एतूरू केरा कि तुश्शो चालचलन मसीहेरे खुशखबरारे काबल भोए। चाए अवं तुसन एइतां हेरी, चाए न एज्जी, तुश्शे बारे मां इन शुनी, कि तुस अक मन भोइतां बनोरे रातथ, ते अकोट्टे भोइतां खुशखबरारे विश्वासेरे लेइ मेहनत केरते रातथ। 28 ते कोन्ची गल्ली मां खलाफत केरनेवालन केरां न डराथ। ई तैन केरे लेइ बरबाद भोनेरो साफ निशाने, पन तुश्शे लेइ मुक्तरु, ते इन परमेशेरु तरफां आए। 29 किजोकि मसीहेरे

वजाई सेइं तुसन पुड़ ई अनुग्रह भोव कि न सिर्फ तैस पुड़ विश्वास केरा पन तैसेरेलेइ दुःख भी झैल्लां। 30 ते तुसन तेन्चरे मुसीबत केरनीए, जेन्चरे तुसेईं मीं करां केरते लोरीए, ते हुना भी शुन्तन, कि अवं तेन्चरे केरताईं।

2

???????? ?

1 अगर मसीह मां किछ तसल्ली ते प्यारे सेइं हिम्मत ते आत्मारी मौजूदगी, ते किछ दर्द ते दयाए। 2 ते मेरो ई आनन्द पूरो केरा कि अक्के मन राथ ते अक्के प्यार, ते अक्के खियाल, ते अक्के सोच रखा। 3 खुदगरज या झूठी बड़यैयरे लेइ किछ न केरा पन नर्म भोइतां एक्की होरि एप्पू करां रोडो समझा। 4 तुसन मरां हर कोई सिर्फ अपने भलैइयरे लेइ न सोचे, बल्के होरि केरि भलैइयरे लेइ भी सोचे। 5 जेन्चरे यीशु मसीहेरो सुभाव थियो तेन्चरे तुशो भी भोए।

6 जैन परमेशेरे बराबर भोइतां भी परमेशेरे बराबर भोने अपने कब्जे मां रखनेरी चीज न समझू। 7 बल्के अपना आप खाली केरो, ते गुलामेरू रूप धारण केरू, ते मैन्हु केरे जेरो बनो। 8 ते मैनेरे रूपे मां बांदो केरतां दीन केरो, ते इडी तगर हुकम मन्ने बालो राव, कि मौत, हाँ, करूसरे मौत भी झैल्ली। 9 एल्हेरेलेइ परमेशेरे तै बड़ो महान भी केरो, ते तैस तैन नवं दिचू जैन सेब्भी नंवन करां बड़ूए। 10 कि स्वर्गे मां ते धेरती पुड़ ते धेरतलरे बुने; तैना सब यीशुएरे नंवे पुड़ जैधूए टेकन। 11 ते बाजी परमेशेरेरी महिमारे लेइ हर अक जिभ मन्ने कि यीशु मसीह प्रभुए।

???????? ?

12 ते हे मेरे ट्लारव, जेन्चरे तुस सदा हुकम मन्ते ओरेथ, तेन्चरे हुना भी न सिर्फ मीं सेइं साथी रेइतां पन खास केरतां जैखन अवं दूर भोताईं फिरी भी डरते राथ ते थरकते अपने मुक्तरू कम पूरू केरते गाथ। 13 किजोकि परमेशेरे जै तुसन मां कम केरते, ते तुसन इच्छा ते शक्ति तैन केरनेरे लेइ देते, जैस सेइं तै खुश भोते। 14 त सब कम्मां बगैर शकैइतां ते बगैर बेंसी सेइं केरा। 15 ताके तुस बेइलजाम ते शरीफ भोइतां टारे ते ठीठ लोकन मां परमेशेरे बेइलजाम बच्चे बना, जैन मां तुस जिन्दगरो वचन घिन्तां दुनियाई मां बलते दीयां केरे जेरे लेइहोते रातथ, 16 कि मसीहेरे वापस एजनेरे दिहाड़े घमण्ड केरनेरी वजा भोए, कि न मेरी दौड़-धूप ते न मेरी मेहनत बेकार भोए। 17 अगर मीं तुशे विश्वासेरे बलिदाने या सेवारे लेइ अपना खून भी बगानो पे, त फिरी भी अवं खुश आईं, ते तुसन सेब्भी साथी खुश आईं। 18 तेन्चरे तुस भी खुश भोथ, ते मीं साथी आनन्द केरा।

???????? ?

19 मीं प्रभु यीशु मां उमीदे, कि अवं तीमुथियुसे तुसन कां जल्दी भेजेलो, ताके तुशो हाल शुन्तां मीं शान्ति मैल्ले। 20 किजोकि मीं कां एरे जेरे सुभावेरो कोई नई, जै साफ दिले सेइं तुशो फिकर केरे। 21 किजोकि सब अपने फैइदो तोपतन, न कि यीशु मसीहे। 22 पन तुसेईं तै परखो ते पिशानो भी, कि जेन्चरे मट्टू बाजी साथी केरते, तेन्चरे तैनी मीं सेइं साथी खुशखबरी फैलाने मां मीं सेइं साथी मेहनत केरि। 23 ते मीं उमीदे, कि जैखन मीं पतो चलेलो कि मेरी कुन हालत भोली, तैखन अवं तैस लूशी भेजेलो। 24 ते मीं प्रभु मां भरोसोए, कि अवं एप्पू भी जल्दी एज्जेलो।

25 पन मीं इपफरुदीतुस जै मेरो ढलाए, ते मद्दतगार, ते साथी योधो ते तुशो दूते, ते जरूरी गल्लन मां मेरी सेवा टेल केरनेबालोए, तुसन कां भेजनो जरूरी समझो। 26 किजोकि तैसेरो मन तुसन सेब्भन मां लगगोरो थियो। एल्हेरेलेइ बे चैन रातो थियो किजोकि तुसेईं तैसेरे बिमैरारो हाल शुनोरो थियो। 27 ते तै सच्चे बिमार त भोरो थियो, इडी तगर कि मरने पुड़ थियो, परमेशेरे तैस पुड़ दया की; ते सिर्फ तैस्से पुड़ नई, पन मीं पुड़ भी, कि मीं दुःखे पुड़ दुख न भोए। 28 एल्हेरेलेइ अवं तैस भेजनेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे। 29 एल्हेरेलेइ तुस प्रभु मां बड़े आनन्दे सेइं तैस सेइं मुलाकात केरा, ते एरे जेरे लोकां केरि आदर केरा। 30 किजोकि तैए मसीहेरे कम्मेरे लेइ अपनि जान खतरे मां छेइतां मौतरे नेडो पुजोरो थियो, ताके जै घाटो तुशे तरफां मेरी सेवा मां भोव, तैस तै पूरो केरे।

3

???????? ?

जैना-जैना गल्लां तरीफेरी, तैन पुड़ धयान केरा।⁹ जैना गल्लां तुसेई मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना तैखन परमेशर जै शान्ति देनेबालोए तुसन साथी भोलो।

?????? ???? ?

¹⁰ अवं प्रभु मां बड़ो खुश आई कि हुनी एतरे दिहाइन पत्ती तुसन मेरे बारे मां फिरी खियाल भोव; याकीन्न तुशे शुरुआती मां इस एरो खियाल थियो, पन तुसन मौको न मैल्लो। ¹¹ इन नई कि अवं अपनि कम्मेरे वजाई सेइं ज़ोताई; किजोकि मीं इन्ने शिखोरूए कि जैस हालती मां आई, तैस्से मां राज़ी भोई। ¹² अवं निकडू भोनू भी जानताई ते बड़ू भोनू भी जानताई, ते मीं हर एक्की गल्ली ते सेब्भी हालतन मां रज़नू, दलुखुनू ते बधनू घटनू शिखोरूए। ¹³ जै मीं ताकत देते तैस मां अवं सब किछ् केरि बटताई।

¹⁴ फिरी भी तुसेई रोडू कियूं, कि मेरे दुखे मां मीं साथी भोए। ¹⁵ ते हे फिलिप्पियों, तुस एप्पू भी जानतथ, कि खुशखबरी प्रचारेरे शुरुआती मां जैखन अवं मकिदुनिया अग्रोवं जेव, तैखन मीं तुस शारे ते कोन्ची होरि मेनडलारे लोकेई लेने देनेरे बारे मां मद्दत न की। ¹⁶ एन्चरे जैखन अवं थिस्सलुनीके नगरे मां थियो; तैखन भी तुसेई मेरी घटी पूरी केरनेरे लेइ एक्की बार नई बल्के कई बार किछ् भेजेरू थियूं। ¹⁷ इन नई कि अवं दान चाताई पन अवं एरो फल चाताई, जै तुशे फैइदेरे लेइ बड़तो गाए। ¹⁸ मीं कां सब किछ्, बल्के बड़ जादे, जैन तुसेई इपफरुदीतुसेरे हथ्थे भेजोरू थियूं, तैन मेलतां रज़ोरोई, तैन त खुशबू ते कबूल केरनेरे काबल बलिदाने, जैन परमेशरे पसंदे। ¹⁹ ते मेरो परमेशर भी अपने तैस धनेरे मुताबिक जैन महिमा सेइं यीशु मसीह मांए, तुशे हर अक ज़रूरत पूरी केरेलो। ²⁰ इशो परमेशर ते बाजी एरी महिमा हमेशा भोती राए। आमीन।

???? ?

²¹ हर अक पवित्तर मैन्हु जै यीशु मसीह मांए तैस जो नमस्कार ज़ोथ। जै दला मीं साथीए तुसन नमस्कार ज़ोते। ²² सब पवित्तर लोकन, खास केरतां जैना महाराजरे घरानेरेन तुसन नमस्कार ज़ोतन। ²³ इशे प्रभु यीशु मसीहेरो अनुग्रह तुशे आत्माई सेइं साथी राए।

कुलुस्सियों

??????

1 अवं पौलुस ई चिट्ठी लिखने लोरोई, अवं परमेशेरी मेर्जी सेइं मसीह यीशुएरो प्रेरित आई, ते विश्वासी ढला तीमुथियुस भी मीं साथी आए। 2 मसीह मां तैन पवित्र ते विश्वासी ढलां केरे नंवे जैना कुल्लुसे नगरे मां रातन।

इशे बाजी परमेशेरे तुसन अनुग्रह ते शान्ति देतो राए।

??????????

3 अस जैखन तुशे लेइ प्रार्थना केरतम त अपने प्रभु यीशु मसीहेरे बाजी, परमेशेरे शुक्र केरतम। 4 किजोकि असेईं शुनोरूए, कि मसीह यीशु पुड़ तुशो विश्वासे, ते तुस सेभी पवित्र लोकन सेइं तुस प्यार केरतथ। 5 तैस उमीद कियोरी चीजारे वजाई सेइं जै तुशे लेइ स्वर्गे मां रखोरीए, जेसेरे बारे मां तुसेईं तैस खुशखेबारे सच्चे वचने सेइं शुनोरूए, जै तुसन कां पुजोरोए। 6 ते जेन्चरे दुनियाई मां भी फल आनते, ते बद्धतो गाते; मतलब जैस दिहैड़ी करां देंतू तुसेईं तै शुनू, ते सच्चेईं सेइं परमेशेरो अनुग्रह पिशानो, तुसन मां भी एरू केरि बटते। 7 तैसेरी शिक्षा तुसेईं इशे ट्लारे महतगार इपफरास करां हासिल की, जै इशे लेइ मसीहेरो वफादार सेवके। 8 तैने तुशे प्यारेरे बारे जोवं जै होरि लोकां केरे लेइ आए, जै पवित्र आत्मा मांए तुसन दित्तोरोए।

9 एल्हेरेलेइ जैस दिहैड़ी करां इन शुनू, त असेईं हमेशा तुशे लेइ प्रार्थना की, कि परमेशेरी आत्मा तुसन अक्ल ते मसझ दे जैस सेइं तुस तैसेरी मर्जी पूरे तरीके सेइं सेमझी बटले। 10 ताके तुस तेरही जिन्दगी जीथ जेरि प्रभुएरे लोकन जीयोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई केरते राथ, ते परमेशेरी पिशानी मां बद्धते गाथ। 11 अवं प्रार्थना केरताई कि परमेशर अपनि महिमारे शेक्तेरे इस्तेमाल केरनेरे जिरिये तुसन मजबूत केरे, ताके तुस आनन्दे ते सबरी सेइं दुख झैल्ली बटतथ। 12 बाजी परमेशेरे शुक्र केरते राथ, जैने अस इस काबल बनाए कि स्वर्गे राज्जे मां तैसेरे अपने लोकन सेइं साथी विरासती मां हिसेदार भोम। 13 किजोकि तैने अस शैतानेरे राज्जे मरां छुटेइतां अपने ट्लारे मट्ठेरे राज्जे मां आने 14 परमेशेरे अपने मट्ठेरे बलिदाने सेइं असन पापां केरि माफ़ी दित्ती (यानी शैतानेरे राज्जे करां आज्ञाद किये)।

????? ???? ? ? ? ? ? ? ? ? ? ?

15 परमेशेरे त कोई न लेई बटे, पन जैखन तैसेरू मट्ठू मैन्हु बनू त तैनी परमेशर लोकन पुड़ बांदो कियो, जैन किछ परमेशेरे बनाव तैस पुड़ तैस कां सेभना जादे अधिकार आए। 16 किजोकि ई तै (मसीह) थियो जैने सब किछ बनानेरे वक्ते परमेशेरे सेइं कम कियूं, चाए अम्बरे पुड़ भोन या धेरती पुड़ भोन, लेवरी भोन या आलेई, कुन तखत भोन, या रियासतां, कुन हकौमतां भोन या अधिकार, सैरी चीजां तैस्से सेइं ते तैसेरेलेइ बनेइ। 17 ते मसीह सेभी चीजां बनाने करां पेइलो थियो, ते सब चीजां तैस मां बनोरी रैतिन। 18 तैए कलीसियारो प्रधाने जै तैसेरी जाने; तैए पेइलोए ते मुडदन मरां जींतो भोने बालन मरां पेइलोए कि सेभी गल्लन मां तैए प्रधान भोए। 19 किजोकि बाजी परमेशर इस्से मां खुश भोते कि मसीह मां तैसेरे सारे सुभाव वास केरतन। 20 परमेशेरे फैसलो कियो कि अपने मट्ठे भेजे, जैने अपनो खून बगाव ते कूरूसे पुड़ अपनि जान दित्ती। परमेशेरे सेभी चीजन सेइं मेल मलाप केरनेरे लेइ एन कियूं। एन्चरे तैनी मसीहेरे जिरिये सेइं सेभी चीजां केरो मेल मिलाप एप्पू साथी कियो, चाए तैना धेरतरी भोन, चाए स्वर्गेरी भोन।

21 ते तुस जैना पेइले परमेशेरे करां दूर थिये, ते बुरे कम्मां सेइं मने सेइं बैरी थी। 22 फिरी भी परमेशर अपने मट्ठे यीशुएरे मैन्हु बन्ने सेइं ते कूरूसे पुड़ मौतरे जियरीए तुशो मेल कराव, ताके तुसन एप्पू कां पवित्र ते बे दाग ते बेइलजाम हजारे केरे। 23 पन तुस मसीह पुड़ विश्वास केरनेरे मां बुनीयादरे जेरे मजबूत राथ, ते तैस खुशखेबारे उमीद पुड़ जै तुसेईं शुनोरी एन शारथ, जेसेरो प्रचार अम्बरे करां बुन सैरी सर्ष्टि मां कियो जेव; ते जैस मां अवं पौलुस सेवक बनो।

????????????

24 हुनी अवं तैन दुखन सेइं खुश आईं, जैना तुशुशे लेइ झैल्लताई, ते मसीहेरी दुखां केरि घटी तैसेरे जानारे लेइ, मतलब कलीसियारे लेइ, अपने जिसमे मां पूरी करताई। 25 जेसेरो अवं परमेशेरे इंतजामेरे मुताबिक सेवक बनो, जै तुशुशे लेइ मीं सोंफो, ताके अवं परमेशेरे वचन पूरो-पूरो प्रचार केरि। 26 मतलब तैस भेदे जै जमाना ते पीड़न करां छप्पोरो थियो, पन हुनी तैसेरे तैन पवित्र लोकन पुड़ बांदो भोरोए। 27 जैन पुड़ परमेशेरे बांदो केरनो चाव, कि तैन ज्ञान भोए होरि कौमन मां तैस भेदेरी महिमारी कीमत कुने ते तै ईए, कि मसीह जै महिमारी उमीदे तुसन मां रहते। 28 जेसेरो प्रचार केरतां अस हर एक्की मैन्हु ज़ोतम ते सारे ज्ञाने सेइं हर एक्की मैन्हु शिखालतम, कि अस हर एक्की मैन्हु मसीह कां सिद्ध केरतां पेश केरम। 29 ते एल्हेरेलेइ अवं तैसेरी शेक्तेरे मुताबिक जै मीं मां शेक्ति सेइं साथी अस्सर केरतीए तन मन लेइतां मेहनत भी केरतम।

2

1 अवं चाताई कि तुस ज्ञानथ, कि तुशुशे ते तैन केरे जैना लौदीकिया नगरे मां आन, ते तैन सेब्भी केरे लेइ जैनेई अवं नई लोरोई कि अवं केन्चरे मेहनत केरताई। 2 ताके तैन केरे मन्न मां शान्ति भोए ते तैना प्यारे सेइं एप्पू मामेइं बनोरे रान, ते तैस पूरी समझरू धन हासिल केरन, बाजी परमेशेरे भेदे मतलब मसीह पिशानन्। 3 जैस मां समझरे ते ज्ञानेरे सारे भण्डार छपोरेन। 4 इन अवं एल्हेरेलेइ ज़ोताई, कि कोई मैन्हु तुसन लालच देने बैली चीज़ी सेइं धोखो न दे। 5 किजोकि अवं अगर जिसमेरे लिहाजे सेइं दूराई, फिरी भी आत्मिक लिहाजे सेइं नेड़ो आईं, ते तुशुशे रीति सेइं तुशुशी हालती ते तुशुशे विश्वासे जै मसीह यीशु मां मज़बूती हेरतां खुश भोव।

???? ???? ?????????? ????????

6 ते जेन्चरे तुसेईं मसीह यीशु अपनो प्रभु कबूल कियोरोए, तेन्चरे तैस मां चलते भी राथ। 7 ते तैस मां जील छडते राथ ते बद्धते राथ; ते जेन्चरे तुस शिखालोरेथ तेन्चरे विश्वासे मां मज़बूत भोते गाथ, ते खूब शुक्र केरते राथ।

8 खबरदार राथ कि तुसन कोई तैसेरे ज्ञाने ते धोखे सेइं शिकार न केरे, जैन मैन्हु केरू रुवाजेरू ते दुनियारी पेइली शिक्षारे मुताबिके पन मसीहेरे नई। 9 किजोकि तैस मां ईश्वरत्वेरी सारी भरपूरी जानी मां एइतां वास केरती। 10 ते तुस तैस मां भेरोरेथ जै सैरी हकोमती ते अधिकारेरी करोड़ी। 11 तैस्से मां तुशुशो एरो खतनो भोरोए, जै हाथेरो नई, मतलब मसीहेरोए खतनो, जैस सेइं तुशुशी पुरानी इन्सानयत अलग की गातीए। 12 ते तैस्से सेइं साथी बपतिस्मे मां दबे जे, ते तैस्से मां परमेशेरी शेक्ति पुड़ विश्वास केरतां, जैने ते मुड़दन मरां जीतो कियो, तुस भी तैस सेइं साथी जीते कियो। 13 ते तैने तुस भी, जैना अपने पापन, ते अपने जिसमेरे खतनेरे हालती मां फटरे थी, तैस सेइं साथी जीते भी केरे, ते इशुशे सब पाप माफ़ केरे। 14 ते विधि केरो तै लेख जै इशुशे नंवे पुड़ ते इशुशे खलाफ थियो मटाव; ते तैस करूसे पुड़ कील देइतां दूर केरो। 15 ते तैने प्रधानन ते अधिकैरन हारेइतां तैन केरो खुल्लो मुखुल्लो तमाशो बनावं ते करूसे सेइं जयजयकार भी केरू।

16 एल्हेरेलेइ खानू पीनू या तिहार या नव्वीं चाँदनी, या आरामेरे दिहाड़ां केरे बारे मां तुशुशो कोई फैसलो न केरो। 17 किजोकि सब एजने बैली गल्लां केरि छावे, पन असली चीज़ां मसीहेरिन। 18 कोई मैन्हु दीनता ते स्वर्गदूतां केरि पूजा पसंद केरतां तुशुशी दौड़े इनामे करां दूर न रखे। एरो मैन्हु लेवहरी गल्लां मां लगगोरो रहते ते एपनी जिसमानी समझी पुड़ बेफैदो फुलते। 19 ते तैस करोड़ी टलेइतां न रखन जै मसीह आए ते जैस सेइं सारो जिसम जोड़न ते पठां केरे हफाज़ती सेइं ते एक्की सेइं साथी जुड़तां, परमेशेरे तरफां बद्धतो गाते।

???? ???? ????? ???? ? ? ?

20 जैखन कि तुस मसीह सेइं साथी दुनियारे पेइली शिक्षाई सेइं मरोरेथ, त फिरी तैन केरे जेरे जैना दुनियाई मां जिन्दगी बीतातन मैन्हु केरे हुक्म ते शिक्षा सेइं, 21 ते एरी शिक्षा मां किजो रातथ कि इस सेइं नई हुरनु, एन नई खानू, ते तैस सेइं हथ नई लानो? 22 (किजोकि इना सब चीज़ां कम्मे मां आनते-आनते नाश भोइ गैली)। 23 इन गल्लन मां एपनी मेर्ज़री मुताबिक अपनि बनेवरी भेक्ति सेइं, ते दीनता, ते जिसमानी कोशिश सेइं ज्ञानेरू कम त आए, पन जिसमानी खुवैइशन रोकने मां इन सेइं किछ भी फेइदो न भोए।

3

1 ते ज़ैखन तुस मसीह सेइं साथी ज़ींतो किये, त स्वर्गेरे चीजां केरे तोपी मां राथ, ज़ैडी मसीह मौजूदे ते परमेशेरे देइने पासे बिशोरोए। 2 धेरतरे नई पन स्वर्गेरे चीजन पुड़ ध्यान लाथ। 3 किजोकि तुस त मरे, ते तुशशी ज़िन्दगी मसीह सेइं साथी परमेशेरे मां छुपोरूए। 4 ज़ैखन मसीह ज़ै इशशी ज़िन्दगीए, बांदो भोलो, तैखन तुस भी तैस सेइं साथी महिमा साथी बांदे किये गाले।

?????? ?? ??????? ???????

5 एल्हेरेलेइ अपने तैन अंगन मैरी देथ, ज़ैना धेरती पुड़ आन, मतलब बदमाशी, गन्दगी, बुरे खियाल, बुरी खुवैइश ते लालचे ज़ैन मूरती पूजने बराबरे। 6 इन केरे वजाई सेइं परमेशेरो क्रोध हुक्म न मन्ने बालन पुड़ एइते। 7 ते तुस भी, ज़ैखन इन बुरैइन मां ज़िन्दगी बीताते थी, त इन केरे मुताबिक च़लते भी थी। 8 पन हुनी तुस भी इन सेबन मतलब क्रोध, सरक, बैर, तुहीन, गैई देनी इना सब गल्लां शारा। 9 एक्की होरि सेइं झूठ न ज़ोथ किजोकि तुसेईं पुरानी इन्सानयत तैसेरे कम्मन समेत खोलोरीए। 10 ते नव्वीं इन्सानयत लोरीए ज़ै अपने बनाने बालेरे रूपेरे मुताबिक ज्ञान हासिल केरनेरे लेइ नव्वी बनातीए। 11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आज़ाद, सिर्फ मसीह सब किछ ते सेबन मांए।

12 एल्हेरेलेइ परमेशेरे चुनोरां केरे ज़ेरे ज़ैना पवितर ते ट्लारेन, बडी, ते ढला, ते दीनता, ते नमूरता, ते बरदाशत धारण केरा। 13 ते अगर केन्वी, केन्वी पुड़ दोष लानेरी वजा भोए, त एक्की होरेरी झैल्ला, ते एक्की होरेरे पाप माफ़ केरा, जेन्चरे प्रभुए तुशशे पाप माफ़ केरे, तेन्चरे तुस भी केरा। 14 इन सेबन करां बा प्यारे ज़ै सेबन सिद्धतारो पटकोए बंधा। 15 ते मसीहेरी शान्ति जेसेरे लेइ तुस अक जान भोनेरे लेइ कुजेवरे भी आथ, तुशशे दिलन मां राज़ केरे, ते तुस शुक्र केरते राथ। 16 मसीहेरे वचन अपने दिलन मां रोड़ेचारे बसने देथ; ते सारे ज्ञाने सेइं एक्की होरि शिखाला, ते नसीहत देथ, ते अपने-अपने मन्न मां अनुग्रहे साथी परमेशेरे लेइ भजन ते स्तुति ते आत्मिक गीत ज़ोते राथ। 17 ते वचन या कम ज़ैन किछ भी केरा सब प्रभु यीशुएरे नव्वे सेइं, ते तैसेरे ज़िरिये बाजी परमेशेरे शुक्र केरा।

?????? ?????????? ?????????? ??? ?????

18 हे कुआन्शव, जेन्चरे प्रभु मां जेइजे, तेन्चरे अपने-अपने मुन्शां केरे अधीन राथ। 19 हे मुन्शाव, एपनी-एपनी कुआन्शन सेइं प्यार रखा, ते तैन सेइं सखत बर्ताव न केरा। 20 हे बच्चाव, सेबनी गल्लन मां अपने-अपने अम्मा बाजी केरो हुक्म मन्ना, किजोकि प्रभु इस सेइं खुश भोते। 21 हे बच्चन बालव, अपने बच्चन तंग न केरा, एरू न भोए कि तैन केरि हिम्मत न टलुटे। 22 हे सेवकाव, ज़ैना जिसमेरे मुताबिक तुशशे मालिकन, सेबनी गल्लन मां अपने मालिकां केरो हुक्म मन्ना, मैनन् खुश केरनेरे बालां केरे ज़ेरे हिरानेरे लेइ नई, पन सच्चे मने सेइं ते परमेशेरे डरे सेइं। 23 ते ज़ैन किछ तुस केरतथ, तैन मने सेइं केरा, इन समझतां कि मैन्हु केरे लेइ नई पन प्रभुएरे लेइ केरतथ। 24 किजोकि तुस ज्ञानतथ कि तुसन एसेरे बदले प्रभु करां बदले मां मीरास मैल्लनीए, तुस प्रभु यीशु मसीहेरी सेवा केरतथ। 25 किजोकि ज़ै बुराई केरते, तैस एपनी बुरैइयो फल मैलनोए; तैडी केन्चरी तरफदारी नई।

4

1 हे मालिकव, अपने-अपने गुलामन सेइं साथी इन्साफ ते ठीक-ठीक बर्ताव केरा, इन समझतां कि स्वर्गे मां तुशशो भी अक मालिके।

??? ?????????? ??? ????????

2 प्रार्थना मां लगगोरो राथ, ते शुक्र सेइं साथी हुशार राथ। 3 साथी इशशे लेइ भी प्रार्थना केरते राथ, कि परमेशर इशशे लेइ शुनानेरे लेइ एरी बत खोल्ले, कि अस मसीहेरे तैस भेदेरे बारे मां ज़ोई बटम जेसेरे लेइ अवं कैदे मां आई। 4 ते तैस बांदो केरि, जेन्चरे मीं कियो लोड़े। 5 वक्त कीमती सेमझतां बेइरन साथी सैमझदैरी सेइं बर्ताव केरा। 6 तुशशो वचन सदा अनुग्रहे सेइं ते एरो लूनो भोए, कि तुसन हर एक्की मैन्हु रोड़ेचारे जुवाब देनो एज्जे।

????? ??????????

7 ट्लारे ढला ते वफादार सेवक, तुखिकुसे ज़ै प्रभु मां मेरो मद्दतगार, तै मेरी सेबनी गल्लन मां तुसन ज़ोलो। 8 तै मीं एल्हेरेलेइ तुसन कां भेजो, कि तुसन इशशी हालतरो पतो भोए ते तै तुशशे दिलन शान्ति दे। 9 ते तैस सेइं साथी उनेसिमुस भी भेजो ज़ै वफादार ते ट्लारो ढलाए ते तुसन मरांए, ते तुसन इडी तगर सैरी गल्लां

जोले । 10 अरिस्तर्खुस जै मीं सेइं साथी कैदीए, ते मरकुस जै बरनबासेरो ढूलाए लगते । (जेसेरे बारे मां तुसन हुकम मैल्लोरो थियो कि अगर तै तुसन कां एज्जे, त तैस सेइं रोडेचारे बर्ताव केरथ) 11 ते यीशु जै जो यूस्तुस ज़ोतन, तै तुसन नमस्कार ज़ोते । खतनो केरें लोकन मां सिर्फ ईए परमेशेरे राज्जे लेइ महतगार ते मेरे शैनतरी वजा राए । 12 इपफ्रास जै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुश्शे लेइ प्रार्थना केरते, ताके तुस सिद्ध भोइतां पूरे विश्वासे सेइं साथी परमेशेरे मेर्जी पुड़ मज़बूत राथ । 13 अवं तैसेरो गवाह आई, कि तै तुश्शे लेइ ते लौदीकिया ते हियरापुलिस बालां केरे लेइ बड़ी कोशिश केरतो रहते । 14 ट्लारे तबीब लूका ते देमासेरू तुसन नमस्कार । 15 लौदीकिया नगरेरे ढूलान ते नुमफास ते तैन केरे घरेरे कलीसियान जो नमस्कार ज़ोथ । 16 ते ज़ैखन ई चिट्ठी तुश्शे इड़ी पढ़ी गाए, त एरू केरनू कि लौदीकियारे कलीसिया मां भी पढ़ी गाए, ते तै चिट्ठी जै लौदीकियारां एज्जे तैस तुस भी पेड़थ । 17 फिरी अरखिप्पुसे सेइं ज़ोइयथ कि जै सेवा प्रभु मां तीं सोंफी, तैस बड़े हुशैरी सेइं पूरी केरथ ।

18 अवं पौलुस अपने हथ्यन सेइं नमस्कार लिखताई । मेरी शंगलन याद रखा; तुसन पुड़ अनुग्रह भोतो राए । आमीन ।

1 थिस्सलुनीकियों

????????

1 अवं पौलुस ई चिट्ठी लिखताई। सिलवानुस ते तीमुथियुस भी मीं सेइं साथी आन, थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, तैन अनुग्रह ते शान्ति मैलती राए।

???????????????????? ?????????? ?????????? ?????????? ?????????????????

2 अस अपने प्रार्थनान मां तुसन याद केरतम, ते सदा तुशशी सेब्मी केरे लेइ परमेशेरू शुक्र केरतम। 3 ते अपने बाजी परमेशेररे सामने तुशशां कम्मां, जैना तुस विश्वासेरे वजाई सेइं केरतथ, ते बड़ी मेहनतरां कम्मां जैन सेइं पतो चलते तुस होरन सेइं प्यार केरतथ, ते इशशे प्रभु यीशु मसीहेरे वापस एजनेरे उमीदरे लेइ मुसीबतन मां सबर केरतथ, अस लगातार याद केरतम। 4 ते हे दलाव, ते परमेशेररे टलारे लोकव, अस ज्ञानतम, कि तुस परमेशेररे अपने लोक भोनेरे लेइ चुनोरेथ। 5 किजोकि यीशु मसीहेरे बारे मां खुशखबरी तुसन कां न सिर्फ लफसन मां पुजी बल्के पवित्र आत्मार शक्ति सेइं, ते बड़े याकीने सेइं साथी पुजी, जेन्चरे तुस ज्ञानतथ, कि अस तुशशे लेइ तुसन मां केरहे बनोरे थिये। 6 ते तुस बड़े दुखे मां पवित्र आत्मार आनन्दे सेइं साथी वचने मेन्तां इशशे ते प्रभुएरी चाल चलने लाए। 7 इड़ी तगर कि मकिदुनिया ते अखाया इलाकां केरे सेब्मी विश्वासी लोकां केरे लेइ तुस अक नमूनो बने। 8 किजोकि तुशशे इट्ठां न सिर्फ मकिदुनिया ते अखाया इलाकन मां प्रभुएरू वचन शुनावं, पन तुशशे विश्वासेरी जै परमेशेर पुड़, हर ठेरी जैड़ी अस जे चर्चा फेलोरीए, कि असन तुशशे बारे मां जोनेरी जरूरत नई। 9 किजोकि तैना एप्पू होरन जोतन कि जैखन अस तुसन कां आए त कुन भोवं। तुस मूरतन करां दूर भोइतां परमेशेररे पासे फिरे, ताके जीते ते सच्चे परमेशेररी सेवा केरथ, 10 ते तैसेरू मट्टू स्वर्गों वापस एजने बलगते राथ, जैन तैने मुडदन मरां जीतो कियूं, मतलब यीशुए, जै असन एजनेबाले परमेशेररे प्रकोपे करां बचाते।

2

???????????????????? ????????????????????? ??

1 हे दलाव, तुस एप्पू ज्ञानतथ कि इशशू तुसन कां एजनू बैफैइदू न भोवं। 2 बल्के तुस एप्पू ज्ञानतथ, कि असेईं पेइले फिलिप्पी नगर मां दुख झल्लने ते मुसीबत झल्लने पुड़ भी इशशे परमेशेर असन दिलेरी दिती, कि अस परमेशेररो खुशखबरी बड़ी खलाफत भोते भी तुसन शुनाम। 3 किजोकि इशशी शिक्षा न टपलाने सेइं ते न धोखे सेइं, ते न बुरे मकसदे सेइं आए। 4 पन जेन्चरे परमेशेर अस इस काबल बनेइतां असन खुशखबरी सोफी, अस तेन्चरे बियांन केरतम, ते मैनन नई, बल्के परमेशेर खुश केरनेरे लेइ शिक्षा देतम, जै इशशे मन्न परखते। 5 तुस ज्ञानतथ, कि असेईं कधी चपलूसारी गल्लां नई कियोरी, ते न लालचरे लेइ बहानो केरते थी, परमेशर इस गल्लरो गवाहे। 6 ते असन मसीहेरे प्रेरित भोनेरे वजाई सेइं तुसन करां मद्दत नेनेरो अधिकार थियो। फिर भी अस मैनन करां आदर न थिये चाते, ते न तुसन करां, न होरि कोन्ची करां। 7 पन जेन्चरे अम्मा अपने मट्ठां केरि हेरगेश केरतीए, तेन्चरे असेईं भी तुसन मां रेइतां नरमी हिराई। 8 ते तेन्चरे अस तुशशू लालच केरते, न सिर्फ परमेशेररी खुशखबरी, पन अपने-अपने प्राण भी तुसन देनेरे लेइ तियार थिये, एल्हेरेलेइ तुस इशशे बड़े टलारे भोइ जोरे थिये।

9 किजोकि, हे दलाव, तुस इशशी मेहनत ते कष्टे याद रखतथ, कि असेईं एल्हेरेलेइ रात दिहैड़ी कारोबार केरतां तुसन मां परमेशेररी खुशखबरी प्रचार की, कि तुसन मरां कोन्ची पुड़ भार न भोए। 10 तुस एप्पू गवाह आथ, ते परमेशर भी गवाहे, कि तुसन जैना विश्वास केरतथ, अस केरी पवित्रता, ते धार्मिकता ते बेइलजामे सेइं राए। 11 तुसन पतोए, कि जेन्चरे बाजी अपने बच्चन सेइं बर्ताव केरते, तेन्चरे अस भी तुसन मरां हर केन्ची शिक्षा देते, ते दिलासो देते, ते समझते थिये। 12 कि तुस एरी जिन्दगी जीथ जैस सेइं परमेशर खुश भोए, जै तुसन अपने राज्जे ते महिमा मां कुजाते।

13 अस भी परमेशेररू शुक्र लगातार केरतम, कि जैखन इशशे जिरिये परमेशेररी खुशखबरी तुसन कां पुजी जै असेईं प्रचार की, त तुसेईं तै मैन्हु केरि नई, बल्के परमेशेररू वचन समझतां (ते सच्चे इन परमेशेररू वचन आए) कबूल की, ते तै वचन तुसन मां जैना मसीह पुड़ विश्वास केरतथ कम केरते। 14 एल्हेरेलेइ तुस, हे दलाव,

परमेशरेरी तैन कलीसियां केरि जेरि चाल चलने लाए, जैना यहूदिया मां यीशु मसीह मां आन, किजोकि तुसन भी अपने लोकन करां एरो दुःख मैल्लो, जेन्चरे तैन यहूदन करां मैल्लोरो थियो। ¹⁵ जैनेई प्रभु यीशु ते नबी भी मारे, ते अस सताए, ते परमेशर तैन सेइं खुश नई, ते तैना सेभी मैन्हु केरि खलाफत केरतन। ¹⁶ ते तैना गैर कौमन सेइं तैन केरे मुक्तरे लेइ गल्लां केरने लेइ असन रोकतन। तैना पापे पुड़ पाप केरतन ज्ञातगर परमेशर तैन सजा न दे, ते हुनी परमेशरे तैन पक्को सजा देनेबालोए।

???????? ???? ????????? ???? ???????

¹⁷ हे ढलाव, जैखन अस थोड़े चिरेरे लेइ मने मां नई बल्के बांदे मां तुसन करां अलग भारे थी, ते असेईं बड़े लालचे सेइं तुसन हेरनेरी बड़ी जादे कोशिश की। ¹⁸ एल्हेरेलेइ (मतलब मीं पौलुसे) एककी बार नई बल्के बार-बार तुसन कां एजनू चाव, पन शैतान अस तुसन कां एजनेरे लेइ रोके। ¹⁹ भला इशरी उमीद, या आनन्द, या बड़ीयैयरू ताज कौन आए? इन तुस भोले जैखन प्रभु यीशु वापस एज्जेलो ²⁰ इशरी बड़याई ते आनन्द तुस आथ।

3

???????????????? ???? ?????

¹ एल्हेरेलेइ जैखन असेईं जादे न बेलगी बटु त असेईं इन ठहराव कि अस एथेंस नगरे मां अकैल्ले रेइ गाम। ² ते असेईं तीमुथियुस जै मसीहेरे खुशखबरी मां इशरो ढलाए, ते परमेशरेरो सेवके, एल्हेरेलेइ तुसन कां भेजो, कि तै तुसन विश्वासे मां मजबूत केरे ते तुशरी हिम्मत बधाए। ³ कि कोई इन दुखां केरे वजाई सेइं न घबराए, किजोकि तुस एप्पू रोड़े चारे ज्ञानतथ परमेशरे फैसलो कियोरोए, कि अस सताए गानेम। ⁴ किजोकि पेइले भी, जैखन अस तुसन कां थिये, त तुसन सेइं ज्ञोते थी, कि अस सताए गानेम, ते तुस ज्ञानतथ एरू भोव भी। ⁵ एल्हेरेलेइ जैखन मीं करां होरू न बेलगोव, त तुशरो विश्वासेरो हाल ज्ञान्नेरे लेइ तीमुथियुस भेजो, किजोकि अवं डरो थियो कि एरू न भोए, कि अजमाने बाले (शैताने) तुस अजमाए त न, कि इशरी मेहनत बेकार त न भोइ।

???????????????????? ???? ????????? ???? ?????????

⁶ पन तीमुथियुसे जै तुसन करां इशरो इड़ी अव, ते तुशरो विश्वासेरे ते प्यारेरे बारे मां खुशखबरी शुनाई। ते ई गल भी शुनाई, कि तुस सदा प्यारे सेइं असन याद केरतथ, ते असन हेरनेरी इच्छा रखतथ, जेन्चरे अस भी तुसन हेरनेरी इच्छा रखतम। ⁷ एल्हेरेलेइ हे ढलाव, अपनि सारी तंगी, ते मुसीबतन मां तुशरो विश्वासे सेइं असन शान्ति मैल्ली। ⁸ तुशरो प्रभु पुड़ मजबूत विश्वासे इशरो लेइ अक नव्वे ज़िन्दगरे साँसेरो ज़ेरोए। ⁹ ते ज़ेरो आनन्द असन तुशरो वजाई सेइं अपने परमेशरेरे सामने, तैसेरे बदले मां अस कोस तरीके सेइं परमेशरेरू शुक्र केरम! ¹⁰ अस रात दिहाड़ी बड़ी प्रार्थना केरते रातम, कि तुसन सेइं दुबारां मिलम, ते तुशरी मद्दत केरम कि तुस होरि जादे मजबूती सेइं प्रभु यीशु पुड़ विश्वास केरथ।

¹¹ ते अस प्रार्थना केरतम कि इशरो बाजी परमेशर ते इशरो प्रभु यीशु, बत खोल्ले कि अस तुसन कां एज्जी बटम। ¹² ते प्रभु एरू केरे, कि जेन्चरे अस तुसन सेइं प्यार केरतम; तेन्चरे तुशरो प्यार एप्पू मांमेइं, ते सेभी मैनन् सेइं बधे, ते तरक्की केरतो राए। ¹³ ताके तै तुशरो मन्न मजबूत केरे, कि जैखन इशरो प्रभु यीशु अपने सब पवित्र लोकन सेइं साथी एज्जे, त तै इशरो बाजी परमेशरेरे सामने तुशरो मन्न पवित्रता मां बेइलजाम ठहरालो।

4

???????????? ? ???? ????????? ???? ?????

¹ आखर, हे ढलाव अस तुसन कां बिनती केरतम, ते तुसन प्रभु यीशु मां समझातम, कि जेन्चरे तुसेईं इशरो ज़ेरो चाल चलन रख्खो, ते परमेशर खुश केरनो शिखोरोए, ते जेन्चरे तुस चलतथ भी, तेन्चरे तुस अग्रोव बद्धते राथ। ² किजोकि तुस ज्ञानतथ, कि इना हृदायतां असन प्रभु यीशु करां मैलोरिन। ³ परमेशर चाते, कि तुस पवित्र बना, मतलब बदमाशी केरने करां बचोरे राथ। ⁴ ते तुसन मरां हर केन्चे ज्ञानेरू लोडे कि केन्चरां अपने कुआन्शी सेइं पवित्रता ते आदरी सेइं ज़िन्दगी जीयोरी लोडे। ⁵ ते इन कम खुवैइशी सेइं नई, ते न गैर कौमां केरे ज़ेरे, जैना परमेशरे न पिशानन्। ⁶ कि इस गल्ली मां कोई अपने विश्वासी ढलाए न ठगे, ते न तैस पुड़ हकोमत चलाए; किजोकि प्रभु इन सब गल्लां केरि सजा देलो, जेन्चरे कि असेईं पेइलू तुसन सेइं ज़ोरू थियूं, ते खबरदारी भी दित्तोरी थी। ⁷ किजोकि परमेशरे अस अशुद्ध ज़िन्दगी जीनेरे लेइ नई, पन पवित्र ज़िन्दगी जीनेरे लेइ कुजवरम।

8 एल्हेरेलेइ जै कोई इना हदायतां केरो इन्कार केरते, तै मैन्हु केरो नई, पन परमेशेरो इन्कार केरते, जै अपनो पवित्र आत्मा तुसन देते।

????? ? ? ? ?

9 पन विश्वासी भाईचारेरे प्यारेरे बारे मां तुसन किछ लिखनेरी जरूरत नई, एप्पू मांमेइं प्यार रखनो तुसेईं परमेशे करां एप्पू शिखोरोए। 10 ते सारे मकिदुनिया इलाकेरे सेब्भी ढलान सेइं साथी एरू केरतथ भी, पन हे ढलाव, अस तुसन कां छन्दे केरतम कि होरे भी बद्धते गाथ। 11 ते जेन्चरे असेईं तुसन हुक्म दित्तो, तेन्चरे तुस होरन सेइं लडाई न केरा, ते अपनू कम केरा त कने अपने लेइ कमाई केरा। 12 ते एन्चरां तैना भी तुशशी आदर केरेले जैना विश्वासी नई, ते तुसन कोन्वी चीजारो घाटो न भोलो।

????????? ? ? ? ? ? ? ?

13 हे ढलाव, अस न चातम, कि तुस तैन केरे बारे मां अनजान राथ जैना विश्वासी मरैन अनजान राथ, एरू न भोए, कि तुस होरि केरे जेरे शोग केरथ, जैन मरनेरां पत्ती उमीद नई। 14 किजोकि अगर अस विश्वास केरतम, कि यीशु मरो, ते जींतो भोव, त तेन्चरे परमेशर तैन भी जैना यीशु पुड़ विश्वास केरतां मरे, परमेशर तैन भी यीशु सेइं साथी वापस आनेलो। 15 किजोकि अस प्रभु यीशुएरे वचनेरे मुताबिक तुसन सेइं इन ज़ोतम, कि अस जैना जीतेम, ते प्रभुएरे वापस एजने तगर बंचोरे रामेले, त जैना विश्वासी मरोरेन पेइले तैस सेइं मिलमेले, फिरी अस मिलमेले। 16 किजोकि प्रभु यीशु एप्पू स्वर्गेरां एज्जेलो; ते ज़ोरे सेइं हुक्म देलो, तैस वक्ते प्रधान दूतेरी आवाज़ शुनोली, ते परमेशेरी महिमारो नइशिनगो बजो गालो, ते जैना मसीह पुड़ विश्वास केरनेबाले मां मरैन, तैना पेइले जीते भोनेन। 17 तैखन अस जैना जीते बचोरे रहमेले, ते तैन सेइं साथी बिदलारी पुड़ नियो गानेम, कि अम्बरे मां प्रभु सेइं मिलमेले, ते तेइसेरां बाद अस सदा प्रभु सेइं साथी रानेम। 18 एल्हेरेलेइ इन्ने गल्लन सेइं एक्की होरि तस्सली देते राथ।

5

????? ? ? ? ? ? ? ? ? ? ? ? ? ? ? ? ? ?

1 हे ढलाव ते बेइनव, इसेरी जरूरत नई, कि वक्तन ते कालां केरे बारे जेइस प्रभु यीशु वापस एज्जेलो तुसन किछ लिखू गाए। 2 किजोकि तुस एप्पू रोडे चारे ज्ञानतथ, ते जेन्चरे चोर राती एइते, तेन्चरे प्रभुएरू दुबारां एजनू भोलू। 3 जैखन लोक ज़ोले, “कि शान्तिए, ते कोई डर नई,” त तैन पुड़ अकदम विनाश एजनोए, जेन्चरे दोजींती पुड़ तकलीफ; ते तैना तैस मुसीबती करां न बच्चेले। 4 पन हे ढलाव ते बेइनव, तुस त (आत्मिक) आंधरे मां नई, कि तै दिहाड़ी पुसन पुड़ चोरेरी जेरि एज्जे। 5 किजोकि तुस सब लोअरे बच्चे आथ, ते दीसारे बच्चे आथ, अस न रातेरम, न आंधारेरेम। 6 एल्हेरेलेइ अस होरि केरे जेरे झुलोरे न रहम, पन बींझे रहम ते हुशार रहम। 7 किजोकि जैना झुलोरे रातन, तैना राती झूलतन, ते जैना नशे मां रातन, तैना राती नशे मां भोतन। 8 पन अस त दीसेरेम, विश्वास ते प्यार लेइतां कि इशशी हिफाजत भोए जेन्चरे झिलम सिपाहेरी हिफाजत केरतीए, ते मुक्तेरे उमीद लेइतां जेन्चरे सिपाही टोप लाते, खबरदार रहम। 9 किजोकि परमेशेरे अस सजारे ते क्रोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहेरे जिरिये सेइं मुक्ति हासिल केरम। 10 यीशु मसीह इशशे लेइ एल्हेरेलेइ मरो, कि अस चाए बींझे भोम, या झुलोरे भोम, सब मिलतां तैस सेइं साथी जींम। 11 एल्हेरेलेइ एक्की होरि हिम्मत देथ, ते एक्की होरेरी तरक्की भोनेरी जिरियो बना, लगातार, तुस एरू केरतथ भी।

????????????? ? ? ? ? ? ? ? ?

12 ते ढलाव, अस तुसन सेइं विनती केरतम, कि जैना तुशशे लेइ बड़ी मेहनत केरतन, ते प्रभु मां तुशशी अगवाई केरनेबाले आम, ते जैना तुसन सलाह देतन, तैन केरि आदर केरा। 13 ते जैना कम्मां तैनेईं तुशशे लेइ कियां तैन केरे वजाई सेइं तैन केरि आदर ते तैन सेइं बड़ो प्यार केरा, ते एप्पू मांमेइं मेल मालपे सेइं राथ। 14 हे ढलाव ते बेइनव, अस तुसन कां मिनत केरतम, कि जैना आलसी आन, तैन खबरदार केरा, जैन केरि हिम्मत घटे तैन हिम्मत देथ, तैन केरि मदत केरा जैना (आत्मिकता) मां कमजोरन, सेब्भी केरे लेइ बरदाशत केरनू हिराथ। 15 इस गल्लारू ध्यान रख्खा, कि कोई कोन्वी सेइं बुरीयीयैरे बदले बुराई न केरे, पन सदा भलाई केरनेरे लेइ तियार राथ, एप्पू मांमेइं ते सेब्भन सेइं भी भलाई केरनेरी कोशिश केरा। 16 सदा खुश राथ। 17 लगातार प्रार्थना केरते राथ। 18 हर हाले मां शुक्र केरा, किजोकि तुशशे लेइ मसीह यीशु मां परमेशेरी ईए मर्जीए। 19 पवित्र आत्माके कम्मन जैना

लोकां केरे ज़िन्दगी मां भोतन तैन न रोका । ²⁰ भविष्यवैनी केरो इन्कार न केरा । ²¹ सब गल्लां परखा, जैना रोड़ी भोन तैन अपनाथ । ²² सेब्भी किसमेरी बुरैई करां बचोरे राथ ।

????????

²³ शान्ति देनेबालो परमेशरे एप्पू तुसन पूरे तरीके सेइं पवित्र केरे; ते तुश्शी आत्मा ते प्राण ते जिसम इश्शे प्रभु यीशु मसीहेरे दुबारां एजने तगर पूरे, ते बेइलजाम ते सुरक्षित रान । ²⁴ तुश्शो कुजाने बालो वफादारे, तै एरू केरेलो ।

²⁵ हे ढूलाव, इश्शे लेइ प्रार्थना केरा ।

²⁶ सेब्भी विश्वासी ढूलान मसीहेरे प्यारे सेइं नमस्कार केरा ।

²⁷ अवं तुसन प्रभुएरी कसम देताई, कि ई चिट्ठी सेब्भी विश्वासी ढूलान पेढतां शुनाई गाए ।

²⁸ इश्शे प्रभु यीशु मसीहेरो अनुग्रह तुसन पुड़ भोतो राए ।

2 थिस्सलुनीकियों

??????

1 अवं पौलुस ई चिट्ठी लिखने लोरोई । सिलवानुस ते तीमुथियुस भी मीं सेइ साथी आन । थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, 2 अस प्रार्थना केरतम कि इशशे बाजी परमेशर ते प्रभु यीशु मसीह तुसन अनुग्रह ते शान्ति दे ।

?????????? ???? ?

3 हे ढलाव ते बेइनव, तुशशे बारे मां असेई हर वक्त परमेशेरू शुक्र कियेरू लोडे, ते इन इशशे लेइ ठीक भी आए । एल्हेरेलेइ कि तुशशो यीशु मसीह पुड़ विश्वास बड़ो बद्धतो गाते, त कने तुशशो एक्की होरि सेइ प्यार केरनो भी बड़ो बद्धने लोरोए । 4 ई वजा आए, कि अस एप्पू परमेशेरू कलीसियान मां, तुशशे बारे मां घमण्ड केरतम, चाए तुसन पुड़ मुसीबत या दुःख भी एज्जन, फिरी भी तुस सबरी सेइ झैलतथ, ते तुस यीशु मसीह पुड़ विश्वास केरते रातथ । 5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशेरू राज्जेरे काबल भोथ, जेसेरे लेइ तुस दुःख भी झैलतथ । 6 परमेशर हमेशा ठीक तरीके सेइ इन्साफे केरते, कि जैना तुसन दुःख देतन, तैन बदले मां दुःख दे । 7 तुस जैना दुःख झैलतथ, परमेशर तुसन आराम देलो ते असन भी । इन तेइस भोलू जेइस प्रभु यीशु अपने शेक्तिबाले स्वर्गादूतन सेइ साथी बेलति अगारे लप्पी सेइ साथी स्वर्गेरां एज्जेलो । 8 ते जैना लोक परमेशर न पिशानन् त कने इशशे प्रभु यीशुएरे खुशखेबरी न मन्न, तैन तै सजा देलो । 9 तैना प्रभुए करां हमेशारे लेइ अलग भोले, ते तैसेरे महान शेक्तेरे हिस्सेदार न भोले । तै तैन हमेशारी सजा देइतां नाश केरेलो । 10 इना गल्लां तेइस भोली जेइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक तैस पुड़ विश्वास केरतन तैना हैरान भोले । तुस भी तैन्ने लोकन मरां भोले, किजोकि जै सन्देश असेई तैसेरे बारे मां तुसन शुनव तुसेई तैस पुड़ विश्वास कियो । 11 एल्हेरेलेइ अस लगातार तुशशे लेइ प्रार्थना भी केरतम, कि परमेशर तुसन इस काबल बनाए, जेरि जिन्दगी जीनेरे लेइ तुस कुजवरे तेन्नेरे तुस जीथ । ते तै तुसन अपने शेक्ति सेइ इस काबल बनालो कि तुस जैना रोडू केरथ ते जैन तुस केरन् चाथ, ते जैन कम तुस अपने विश्वासे सेइ केरतथ पूरू केरथ । 12 एन्नेरे इशशे प्रभु यीशु मसीहेरे नन्वेरी तुशशे जिरिये बडीयाई भोली । ते तैसेरे जिरिये तुसन आदर मैलेली । इन सब किछ इशशे परमेशर त कने प्रभु यीशु मसीहेरे अनुग्रहे सेइ भोलू ।

2

???????? ???? ???? ???? ?

1 हे ढलाव ते बेइनव, असन कां प्रभु यीशु मसीहेरे वापस एजनेरे बारे मां जौनेरे लेइ किछ आए । तै वक्त एज्जेलो जेइस अस तैस सेइ साथी मिलमेले । 2 इन सोचतां तुस परेशान न भोथ या तुशशो दिल न घबराए कि प्रभुएरी दिहाडी पेइली ओरिए । किछ जोई बटतन कि इन भविष्यवाणी मां या सन्देशे मां या चिट्ठी मां तैन कां ओरू थियूं । 3 लोक जैना इस बारे मां झूठी गल्लां जौतन तैन पुड़ विश्वास न केरा । किजोकि यीशु मसीहेरे वापस एजनेरे पेइले, तै वक्त एज्जेलो जेइस बड़े लोक परमेशेरूरे खलाफ भोले, ते फिरी अधर्मी मैन्हु बांदो भोलो । तै, तै आए जै नाश भोनेरे लेइ ठहरावरोए । 4 तै अधर्मी मैन्हु परमेशेरूरे खलाफत केरेलो, ते तैन सब किछ जैन लोक देबते सेमझतां आराधना केरतन, तै इन जौलो ई अवं इन सेबन करां महान आई । इडी तगर कि तै परमेशेरूरे मन्दरे मां बिशतां अपनो आपे जो परमेशर जौलो । 5 इन न बिसरा, कि मीं बड़े बार इन गल्लां केरे बारे मां जौरूए, जैखन अवं तुसन सेइ साथी थियो । 6 हुन्ना तै अधर्मी मैन्हु बांदो नई भोरो किजोकि कोई आए जैन तै रोकोरोए, कि तै अपने वक्ते पुड़ बांदो भोए । 7 किजोकि अधर्मी चीजां केरि शक्ति इस दुनियाई मां पेइली छेपतां कम केरने लोरीए, पन अक आए जै तैस रोकते । ते तै तैस रोकतो रालो जां तगर तै दूर न कियो गाए । 8 तैट्टां बाद तै दुष्ट मैन्हु एज्जेलो, पन बादे मां जैखन प्रभु यीशु एज्जेलो, त तैस दुष्ट मैन्हु अपने ऐशेरु फुकी सेइ ते एजनेरी महिमाई सेइ मारेलो । 9 तै दुष्ट मैन्हु, शैतानेरे शेक्ति सेइ एज्जेलो । तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि तै परमेशर जै एन केरते । 10 ते तै हर किसमेरां बुरां कम्मां केरेलो, ते तैन धोखो

देलो जैना परमेशरे नाश केरनेन। किजोकि तैनेई तैस सच्चे पुड़ विश्वास केरने करां इन्कार कियो, जैस सेइं तैन मुक्ति मैल्लेथी। ¹¹ एल्हेरेलेइ परमेशर तैन मां अक धोखो देनेबाली आत्मा भेजेलो जै तैन सच्चे करां दूर केरेली, ताके तैना झूठे पुड़ विश्वास केरन जैन तै दुष्ट मैन्हु तैन सेइं ज़ोलो। ¹² परमेशर तैन सेब्भी लोकन सज़ा देलो जैनेई यीशु मसीहेरे सच्चे सन्देशे पुड़ विश्वास न कियो, पन पाप केरने सेइं खुश भोए।

????? ?????? ??????

¹³ हे दूलाव ते बेइनव, असेईं तुशे लेइ परमेशेरू शुक्र कियोरू लोडे। किजोकि परमेशर तुसन सेइं प्यार केरते, तैने तुस दुनिया बनाने करां पेइले चुने, कि पवित्तर आत्मार पवित्तर बनाते, ते यीशु मसीहेरे बारे मां जै सच्चो सन्देशे तैस पुड़ विश्वास केरतां परमेशर तुसन मुक्ति दे। ¹⁴ जै खुशखबरी असेईं प्रचार की परमेशरे तै इस्तेमाल की, कि तुसन बचानेरे लेइ कुजाए, तुस इशे प्रभु यीशु मसीहेरी महिमाई मां शामिल भोथ। ¹⁵ एल्हेरेलेइ, दूलाव ते बेइनव, जै शिक्षा असेईं तुसन दिती, जैखन असेईं तुसन सेइं गल्लां की त कने चिट्ठी केरे ज़िरिये, तैस पुड़ तुस लगातार विश्वास केरते राथ। ¹⁶ अस प्रार्थना केरतम इशो प्रभु यीशु मसीह एप्पू, ते इशो बाजी परमेशर जैने असन सेइं प्यार कियो, ते जैने अपने अनुग्रहे सेइं असन हमेशारो होसलो ते पक्की उमीद दिती, ¹⁷ तैना तुसन होसलो देन, ते तुसन मज़बूत केरन ताके तुस लगातार भलाई केरथ ते जैन ज़ोथ तैन रोडू भोए।

3

????????????? ?????????????? ?????? ??????

¹ आखरी मां हे दूलाव ते बेइनव, इशे लेइ प्रार्थना केरते राथ, कि अस प्रभु यीशुएरू वचन होरि भी बड़े टैरन शुनेई बटम, ते जैना शुन्न त तैना तेन्चरे मनन जेन्चरे तुसेईं मन्नू। ² ते ई भी प्रार्थना केरा कि परमेशर असन बुरे ते दुष्ट लोकां केरे ज़िरिये नुकसान पुज़ाने करां बचेइतां रखे, किजोकि बड़े लोक जैनेई प्रभु यीशुएरी खुशखबरी शुनी, ते तैनेई इस पुड़ विश्वास न कियो।

³ पन तुस प्रभु पुड़ पूरो भरोसो केरि बटतथ, तैए तुसन मज़बूत केरेलो, ते दुष्टे करां यानी शैताने करां बचालो, ताके तै तुसन कोई नुकसान न पुजेई बटे। ⁴ ते असन प्रभु मां तुसन पुड़ भरोसोए, कि जैन किछ असेईं तुसन केरनेरे लेइ ज़ोरूए, तुस तेन्चरे केरते ओरेथ ते एजनेबाले वक्ते मां केरते राले। ⁵ अस प्रार्थना केरतम, कि प्रभु यीशु मसीह तुसन इन समझनेरे काबल बनाए कि परमेशर तुस सेइं केतरो प्यार केरते, ते बरदाश केरा जेन्चरे मसीहे बरदाश कियूं।

?? ?????????? ?????? ?????

⁶ हे दूलाव ते बेइनव, अस प्रभु यीशु मसीहेरे दित्तोरे अधिकार सेइं तुसन ई हुकम देतम, कि तुसन मरां हर कोई एरे दूलान ते बेइनन सेइं साथ न रखे, जैना आलसी आन त कने जै शिक्षा असेईं तुसन दिती तैस न मन्नू। ⁷ किजोकि तुस एप्पू रोडे चारे ज्ञानतथ, कि तुसेईं तेन्चरे ज़िन्दगी ज़ीयोरी लोडे जेन्चरे असेईं ज़ी, जैखन अस तुसन सेइं साथी थिये, अस आलसी न थिये पन कम केरते थिये। ⁸ असेईं कोन्चेरी रोट्टी मुफ्त न खाइ, पन अस मेहनत ते कष्टे सेइं रात दिहैडी कारोबार केरते थिये, कि अस अपने ज़रूरतां केरे लेइ तुसन पुड़ निर्भर न भोम। ⁹ असेईं बड़ी मेहनत की, एल्हेरेलेइ नई कि असन अधिकार नई, कि तुसन हुकम देम कि तुस इशो ज़रूरतां पूरी केरा। पन एल्हेरेलेइ कि असेईं अपनो आप तुशे लेइ मिसाल बनाई ताके तुस इशे ज़ेरि ज़िन्दगी ज़ीथ। ¹⁰ जैखन अस तुसन सेइं साथी थिये तैखन असेईं तुसन हुकम दित्तोरो थियो, कि अगर कोई कम केरने करां इन्कार केरे त तैस रोट्टी भी न देथ। ¹¹ इशे शुन्ने मां ओरू आए कि तुसन मां बड़े लोक एरे आन जैना आलसी ज़िन्दगी ज़ीतन। तैना एप्पू कम न केरन, पन होरि केरे कम्मन मां दखल देतन। ¹² एरे लोकन अस प्रभु यीशु मसीहेरे दित्तोरे अधिकारे सेइं हुकम देतम ते समझातम, कि चुपचाप कम केरतां अपनि ज़िन्दगी ज़ीनेरे लेइ कमाई केरन। ¹³ ते तुस, दूलाव ते बेइनव, भलाई केरने मां हिम्मत न हारा।

¹⁴ अगर कोई इशो इस चिट्ठेरे सन्देशे न मन्ने, त सेब्भी केरे सामने तैसेरी पिशान केरा, ते तैस सेइं साथ न रखे, ताके तै छिथोए; ¹⁵ फिरी भी तैस सेइं दुश्मनेरो ज़ेरो बर्ताव न केरा, पन तैस सेइं विश्वासी सैथेरो ज़ेरो बर्ताव केरतां तैस खबरदार केरा, कि जेरू तैने कियूं तैन न केरे।

????? ??????????

16 हुनी अवं प्रार्थना केरताई प्रभु जै शान्ति देनेबालोए, तुसन हर वक्त हर किसमे सेइं शान्ति देतो राए, ते प्रभु लगातार तुसन सेब्बन सेइं साथी भोए।

17 अवं पौलुस अपने हथ्थे सेइं नमस्कार लिखताई, इन मेरू सबूते, अवं चिट्ठी केरे आखरी मां एन्चरे लिखताई, ताके हर एक्की पतो चले कि ई चिट्ठी मेरे तरफां आए। 18 इश्शे प्रभु यीशु मसीहेरो अनुग्रह तुसन सेब्बन पुड़ भोतो राए।

2

?????????? ?????

1 हुनी अवं सेब्बन करां बेद्धतां इन ज़ोताई, कि बिनती, ते प्रार्थनां, ते दरखुवासां, सेब्बी मैन्हु केरे लेइ की गान । 2 राजां ते सेब्बी उच्चे पदे बालां केरा लेइ प्रार्थना केरा, ताके तैना असन सुखे ते बगैर खतरे सेइं ज़ीने देन ते अस परमेशेरी आराधना केरि बटतम ते होरि लोकन सेइं रोड़ो बर्ताव केरि बटम । 3 इन इशे मुक्ति देनेबाले परमेशे रोड़ू लग्गते ते पसंद एइते । 4 तै इन चाते, कि सेब्बी मैन्हु मुक्ति मैल्ले; ते तैना सच्चेरे ज्ञाने ज्ञानन । 5 किजोकि सिर्फ अक्के परमेशेरे, ते अक मैन्हु आए जै परमेशेरे ते लोकां केरो बिचवाई कराने बालो, ते तै मैन्हु यीशु मसीह आए । 6 सेब्बी लोकन पाप ते मौतरी शेक्ति करां छुटकारो देनेरे लेइ मसीहे अपनो आप बलिदान कियो । तैसेरे मौतरे ज़िरिये परमेशेरे ठीक वक्ते पुइ सबूत दिचू कि तै सेब्बी लोकन बचानो चाते । 7 ई वजा आए, परमेशेरे अवं खुशखबरी प्रचार केरनेबालो ते परेरित भोनेरे लेइ चुनो । तैने अवं गैर कौमन विश्वासेरो सच्चेरो सन्देश शिखालनेरे लेइ चुनो । अवं झूठ नई लोरो ज़ोने बलके सच्चे ज़ोने लोरोई ।

8 अवं चाताई, कि हर ठैरी सभान मां मइद परमेशेरे लेइ समर्पित हथ खडे केरतां बगैर सरकां ते बगैर बेसी सेइं प्रार्थना केरन । 9 तेन्चरे मसीही कुआन्शां भी इज्जतदार लिगड़ां लेइतां, ते अपनो आप रोड़ेचारे सजेइतां, न कि अलग-अलग किसमे सेइं दोग बनाने, ते सोन्ने, ते मोती, ते कीमती लिगड़न सेइं । 10 बलके इसेरे बदले तैनेई होरि केरे लेइ रोड़ां कम्मां केरतां अपनो आप खूबसूत लोड़े बनावरो, किजोकि परमेशेरी भक्ति केरनेबैली कुआन्शन इन शोभा देते । 11 ज़ैखन होरे लोक विश्वासी लोकन शिखालन त सेब्बी कुआन्शेई चुपचाप ते आदरी सेइं शुन्तां शिखोरू लोड़े । 12 अवं अज़ाज़त न देई कि कुआन्शां मइदन शिखालन ते तैन पुइ अधिकार रखन । ज़ैखन तुस आराधना केरनेरे लेइ अकोट्टे भोथ त कुआन्शेई चुप लोड़े रावरू । 13 अवं इन एल्हेरेलेइ ज़ोताई किजोकि परमेशेरे पेइलो आदम बनाव, तैसेरे पत्ती हव्वा बनाई । 14 होरि वजा ई आए कि कुआन्शां सप्पे करां धोखो खाव न कि आदमे, एन्चरां हव्वा परमेशेरो हुक्म टलोड़ो । 15 फिरी भी कुआन्श बच्चे ज़रमने सेइं परमेशेरे करां मुक्ति हासिल केरेली, अगर मसीह पुइ लगातार विश्वास केरती राए, ते होरि लोकन सेइं प्यार केरती राए, ते शुद्ध त कने रोड़े तरीके सेइं बर्ताव केरे ।

3

?????????? ?????

1 ई गल सच्चे, कि जै कलीसियाई मां अगवो भोनो चाते, त तै आदरारे पदेरी इच्छा रखते । 2 ते इन ज़रूरीए कि अगवो बेइलजाम भोए, ते तैसेरी अक कुआन्शा लोड़े, ते तै अपने आपे पुइ कैबू केरनेबालो, समझदारी सेइं जीनेबालो भोए, इज्जतदार भोए, ते ट्लाहना केरि आदर केरनेरे लेइ तियार रानेबालो भोए, ते होरि लोकन परमेशेरो सन्देश रोड़े चारे शिखालनेरे काबल भोए । 3 तै शराबी या मार-पीट केरनेबालो न लोड़े, बल्के दया केरनेबालो लोड़े, ते लड़ाई न केरनेबालो लोड़े ते पेइंसां केरे लालची न भोए । 4 तै अपने घरेरो रोड़े चारे चलानेबालो ते बन्दो बसत केरनेबालो लोड़े, ते तैनी अपने बच्चन शिखालोरू लोड़े कि तैना हर गल्ली मां इज्जती सेइं तैसेरी मनन । 5 ज़ैखन अगर कोई अपने घरेरो बन्दो बसत केरनो न ज्ञानतो भोए, त तै परमेशेरी कलीसियारी हेरगेश केन्चरे केरेलो? 6 तै नंव्वो विश्वासी न लोड़े, एरू न भोए अभिमान केरे ते तैस शैतानेरी ज़ेरि तैस सज़ा मैल्ले । 7 ते ज़ैना लोक विश्वासी नई तैनेई भी तैसेरे बारे मां इन ज़ोरू लोड़े कि ए रोड़ो मैन्हु आए । ताके एरू न भोए कि तै घटिया भोए ते शैतानेरे ज़ाले मां फंसे ।

?????????? ?????

8 तेन्चरे सेवक भी तेरहे लोड़न ज़ैन केरि लोक आदर केरन । ईमानदार लोड़न, ते पीने बाले न भोन, ते एरे मैन्हु न भोन ज़ैना पेइंसां केरे लेइ किछु भी केरि बटतन । 9 पन तैन केरे ज़मीर साफ लोड़न ते ज़ै शिक्षा परमेशेरे बांदी कियोरीए, तैस पुइ लगातार विश्वास केरनेबाले लोड़न । 10 ज़ैखन कलीसियारे सेवक चुने गान त पेइलू तैन केरू चालचलन परखू गाए, कि तैन मां रोड़े गुण आन, ते केन्ची तैन मां कोई गलती न लेइहोए, त फिरी सेवकेरू कम केरन । 11 एन्चरे कलीसियाई मां सेवा केरनेबालां केरि कुआन्शां भी आदरारे काबल भोन, होरन बदनाम केरनेबैली न लोड़न, पन शांत सुभावे बैली, ते सेब्बी गल्लन मां ईमानदार भोन । 12 कलीसियारो सेवक अपने कुआन्शेरे लेइ वफादार लोड़े, ते बच्चां ते अपने घरेरे सारे लोकां केरो रोड़ो चारे हेरगेश केरनेबालो लोड़े । 13 किजोकि ज़ैना

सेवकेरू कम रोडे चारे केरतन, तैना लोकां केरि नजरी मां इज्जतदार भोतन । ते तैना अपने तैस विश्वासेरे बारे मां जै यीशु मसीहे पुडे बडे दिलेरी सेइं ज़ोतन ।

११११ ११११

14 अवं तीं कां जल्दी एजनेरी उमीद रखने पुड़ भी इना गल्लां एल्हेरेलेइ लिखताई । 15 अगर मीं एजने मां चिर लगे, त तू ज्ञानस, कि लोकेईं परमेशेरे टब्बेरे होरि लोकन सेइं केन्चरे बर्ताव कियोरो लोडे । इन टब्बर तैना लोकन सेइं बनोरू, जैना यीशु पुड़ विश्वास केरतन ते जीते परमेशेरे कलीसियारेन । इना विश्वासी सच्च्ची शिक्षाई मज्जबूती सेइं मन्तन ते सम्भालतन जेन्चरे बुनीयाद ते खम्मबे इमारती सम्भालतन ते मज्जबूत केरते ।

16 ते इस मां शक नईं, अस पूरे याकीन सेइं ज़ोईं बटतम, जैना शिक्षां परमेशेरे बैदी की एना बिलकुल सच्च्ची आन, मतलब, मसीह मैनेरे रूपे मां बांदो भोव, पवित्तर आत्मा तै हर कम्मे मां धर्मी ठहराव, स्वर्गदूतेईं तै लाव, लोकेईं तैसेरे बारे मां कौमन मां प्रचार कियो, सारे दुनियाईं मरां लोकेईं तैस पुड़ विश्वास कियो, परमेशेरे तै उबरे स्वर्गे जो नीयो ।

4

११११ १११११११ १११११११११

1 पन पवित्तर आत्मा साफ ज़ोते, कि आखरी वक्ते मां किछ् लोक मसीही शिक्षाई पुड़ विश्वास केरनो बन्द केरेले । तैना दुष्ट आत्मान कबूल केरेले, तैना तैन बुरी बत्ती च़लैली, त कने तैना लोक दुष्ट आत्मां केरि झूठी शिक्षाई पुड़ विश्वास केरेले । 2 इन तैना झूठे पाखंडी लोक आन, जैना इन झूठी शिक्षान शिखालतन, तैन केरो ज़मीर ज़ै रोडे ते बुरे मां फैसलो केरते मरो आए ते जेन्चरे तात्ते लोहे सेइं तै फुकोरोए । 3 एरे लोक इन शिखालतन कि इला नईं बनानो ते खानेरी किछ् चीज़ां न लोड़न खेवरी, पन परमेशेरे इन खानेरी चीज़ां विश्वासी लोकां केरे खानेरे लेइ बनोरिन जैना सच्च्ची शिक्षा ज्ञानतन कि प्रार्थना केरतां खावरू लोडे । 4 किजोकि परमेशेरेरी बनेवरी हर चीज़ रोड़ीए । अस परमेशेरेरू शुक्र केरतां सब किछ् खेइ बटतम । 5 किजोकि परमेशेरेरे वचने, ते प्रार्थनाई सेइं शुद्ध भोते ।

११११ ११११११११ ११११ ११११

6 अगर तू दलान ते बेइनन लगातार इन्ना गल्लां याद करातो रालो, जैन केरि हृदायत मीं तीं दित्तोरीए त कने विश्वासेरे सन्देशे ते तैस रोड़ी शिक्षाई सेइं जैस मां तू मज्जबूत बनावरोस जै तू मन्तो ओरोस । त तू यीशु मसीहेरो रोड़ो सेवक भोलो । 7 पन बनेवरी कहैनी ते बेकार कहैनी केरे वजाई सेइं वक्त बरबाद न केर जैन सेइं परमेशेरेरी आदर न भोए । पन तू लगातर परमेशेरेरी आदर केरनेबाली ज़िन्दगी ज़िनी शिखाल । 8 किजोकि जिसमानी वर्जिशी सेइं जानी फैइदो भोते, पन भेक्तेरे लेइ तियारी बड़ी रोड़ीए किजोकि इस वक्तेरी ते एजनेबाले वक्तेरी ज़िन्दगरो फैइदो इस्से मां आए जेसेरो वादो परमेशेरे कियोरोए । 9 ते ईं गल सच्च, ते हर तरीके सेइं मन्नेरे काबल । 10 किजोकि अस मेहनत ते कोशिश एल्हेरेलेइ केरतम, किजोकि इश्टी उमीद तैस जीते परमेशेरे पुडे । जै सेब्मी लोकां केरो, ते खास केरतां विश्वास केरनेबालन मुक्ति देनेबालोए ।

11 विश्वासी लोकन इना गल्लां शिखाल ते तैन ईं हुक्म दे कि तैना इन मनन । 12 तू एन्चरे बर्ताव केर कि कोई भी तेरी अनादर न केरे किजोकि तू जवान आस । पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइं बर्ताव केरने मां, ते होरन सेइं प्यार केरने मां, ते यीशु मसीह पुड़ विश्वास केरने मां, ते बेइलजाम ज़िन्दगी ज़िने मां ताके लोक भी एन्चरां केरन । 13 ज़ांतगर अवं न एज्जी, तांतगर ज़ैखन विश्वासी लोक अकोट्टे भोतन ज़ोरे सेइं पढ़ने मां, ते तैन केरो होसलो बद्धा ते पवित्तरशास्तेरेरो मतलब शिखाल । 14 इस गल्ली याद रख ज़ैखन बुजुर्गां केरे एक्की टोलां तीं पुड़ हथ रखोरे थिये, परमेशेरे तैन अक सन्देश दित्तो कि तैस वरदानेरे बारे मां ज़ोन जै तैने तीं दित्तोरी । तैस वरदानेरे नज़र अनदाज न केर । 15 तैन गल्लन सोचतो रा, ते तैन मां अपनू ध्यान लेइतां रख, एन्चरे हर कोई हेरी बटेलो कि तू विश्वासे मां बद्धने लोरोस । 16 इस गल्लरू ध्यान रख

कि तू केन्चरे ज़ीतस ते केन्चरे शिखालतस । इसेरो नितीजो ई भोलो कि परमेशरे इन्साफे मां तेरे ज़िरिये तीं ते तेरे शुन्नेबालन बचालो ।

5

?????????? ?????? ????? ??? ???????????

1 बुढे मैन्हु न झिड़क पन तैस एन्चरे आदरी सेइं सल्लाह दे ज़ेन्चरे अपने बाजी, एप्पू करां निकड़े मैन्हु एन्चरे सल्लाह दे ज़ेन्चरे अपने निकड़े ढलाए । 2 बुढी कुआन्शन सेइं एन्चरे बर्ताव केर ज़ेन्चरे अम्मा सेइं, ते जवान कुआन्शन सेइं एन्चरे बर्ताव केर ज़ेन्चरे अपने बेइनी सेइं । इन साफ दिले सेइं केर ।

3 तैन विधवां केरि आदर केरा, ज़ैन केरो कोई हेरगेश केरनेबालो नईं तैन केरू ध्यान रख्खा । 4 ते अगर कोन्ची विधवारां मट्टां या पोटलड़ां या धियोड़ां भोन, ते तैन पेइलू अपने घरेरे लोकां केरू ध्यान रखतां परमेशेरी भक्ति केरनि शिखोरी लोड़े । ते तैना एन केरतां अपने अम्मा-बाजी ते दादा देदी केरू हक देन, किजोकि इन परमेशेरे पसंद एइते । 5 ज़ै विधवा आए ते तैसेरो ध्यान रखनेबालो कोई नईं, तै परमेशेरे पुड़ उमीद रखतीए, ते रात दिहैड़ी बिनती ते प्रार्थनाईं मां परमेशेरे करां मद्दत मगतीए । 6 पन ज़ैना विधवां अपनो सारो वक्त एशे मां बितैतिन तैना जिसमानी रूपे सेइं त ज़ीतिन पन आत्मिक रूपे सेइं मेरीन । 7 इन गल्लां केरो भी हुक्म दे कि तैना बेइलजाम रान । 8 पन अगर कोई अपने रिशतेदारां केरि ते खास केरतां अपने घरानेरू ध्यान न रख्खे, ते तै विश्वासे करां मुकरोरोए, ते ज़ै विश्वास न केरे तैस करां बुरो बनोरोए ।

9 तैस्से विधवारू नवं लिखू गाए, ज़ै शठ सालन करां घट न भोए, ते अपने मुन्शे सेइं वफादार रावरी भोए । 10 ते होरे लोक तैसेरे बारे मां ज़ानते भोन कि तैसां हमेशा रोड़ां कम्मां कियोरन । ज़ेन्चरे कि, तैसां बच्चे रोड़े चारे पाले, ते तैना विश्वासी लोक अपने घरे मां आने, ज़ैना सफरे मां थिये, ज़ेन्चरे होरि लोकां केरि सेवा कियोरी भोए, ते तैन लोकां केरि मद्दत कियोरी भोए ज़ैना मुसीबती मां थिये, ते ज़ैसां हर किसमेरां रोड़ां कम्मां कियोरां भोन । 11 पन जवान विधवां केरां नब्वां न लिख, किजोकि ज़ैखन तैन केरि जिसमानी इच्छा तैस वादे करां शेक्ति बाली भोती, ज़ै तैनेईं विधवा रेइतां मसीहेरी सेवा केरनेरे लेइ कियोरोए, त तैना इला बनानो चैतिन । 12 दुबारां इला केरतां तैना दोषी भोतिन, किजोकि तैनेईं अपनो पेइलो वादो बरकरार नईं रखोरो । 13 एन्चरे तैना घरे-घरे फिरतां आलसी भोनू शिखतिन, ते सिर्फ आलसी नईं, पन होरि केरे खलाफ गल्लां केरतिन, ते होरि केरे कम्मन मां दखल देतिन, ते तैना गल्लां ज़ोतिन ज़ैना न लोड़न ज़ोरी । 14 एल्हेरेलेइ अवं इन चाताईं, कि जवान विधवां इला बनान; ते तैन बच्चे भोन ते घरबार सुमालन, ते दुश्मन्न बदनाम केरनेरो मौको न देन । 15 किजोकि किछ जवान विधवां कुआन्शेईं परमेशेरे करां दूर भोइतां शैताने पत्ती चलनू शुरू कियोरू । 16 अगर कोन्ची विश्वास केरनेबालेरी टब्बरे मां विधवां भोन, त तैए तैन केरि मद्दत केरे न तैन केरि ज़िमेवारी कलीसियाई पुड़ भोए । तैखन कलीसिया तैस विधवारी मद्दत केरि बटते ज़ेसेरो कोई न भोए ।

17 ज़ै बुजुर्ग रोड़े चारे कम केरते तै आदर हासिल केरनेरे ते बराबर तनखाएरे काबले, खास केरतां तैना ज़ैना परमेशेरे वचन शुनाने, ते शिखालने मां बड़ी मेहनत केरतन । 18 किजोकि पवित्रशास्त्र मां इन लिखोरूए, “कि तू जोटलोरे दांतेरू आशी न बेन्धाँ,” किजोकि, “मज़दूर अपने मज़दूरारो हकदारै ।” 19 कोई दोष कोन्ची बुजुर्ग लव गाए, त ज़ांतगर दूईं या जादे लोक न ज़ोन कि असेईं ए पाप केरतो लावरोए, तांतगर न शुन । 20 ज़ैना लोक पाप केरतन तैन सेब्भी विश्वासी लोकां केरे सामने झिड़क, ताके होरे विश्वासी लोक भी डरन । 21 परमेशर ते मसीह यीशु, ते चुनोरे स्वर्गदूत हाज़र सेमझतां अवं तीं हादयत देताईं, ध्यान राए कि तू केन्चेरो इन्साफ जल्दी न केरस, ते कोन्चेरी तरफदारी न केर । 22 कलीसियारो बुजुर्ग चुनेरे बारे मां जल्दी कधे नईं केरनि । ते होरि केरे पापन मां शामिल न भो, अपनो आप पवित्र बनोरो रख ।

23 अग्रोवं जो पानी न पी, पन अपने पेटेरे ते अपने बार-बार बिमार भोनेरे लेइ थोड़ो-थोड़ो दाछारो रस भी कम्मे मां आन ।

24 अवं ज़ोताईं कि जल्दी बुजुर्ग नईं चुन्ने, किजोकि किछ लोक खुले आम पाप केरतन, इन्साफे करां पेइले भी तैना विश्वासी लोकां केरे सामने दोषी आन । हांलाकि होरि लोकां केरे पाप बांदे न भोन पन बांदे मां पिशाने गातन । 25 एन्चरे ज़ैखन लोक रोड़ां कम्मां केरतन, त तैन होरि विश्वासी केरे ज़िरिये हेरू गाते । अगर तैना तैन एक्की बारे साफ चारे लेईं बटन, आखर तैना तैन पिशानेले ।

6

1 जैना विश्वासी लोक गुलाम आन, तैनेई हर तरीके सेइं अपने मालिकां केरि आदर कियोरी लोड़े ताके होरे लोक परमेशेरी ते इश्शे शिक्षारी तुहीन न केरन। 2 ते जैना मालिक विश्वासी भोन, त तैन केरू मसीह पुड़ विश्वास केरनेरे वजाई सेइं तैन केरि बराबर इज्जत की गाए, बल्के तैन केरे लेइ होरू भी जादे कम कियोरू लोड़े। किजोकि इस सेइं फैइदो नेनेबाले विश्वासी आन ते तैना गुलाम तैन सेइं प्यार केरतन, इन गल्लां केरि शिक्षा दे ते इन होसलो दे कि तैना इन सब केरन।

किछ लोक इश्शे शिक्षारी खलाफत केरि बटतन, पन इना यीशु मसीहेरी रोड़ी शिक्षां आन। इना शिक्षां भेक्तरी जिन्दगी बद्धेतिन। 4 जै कोई अलग शिखालते तै अभिमानी ते तै किछ न समझे। एरे जेरे मैनु गैर जरूरी मुदां ते लफसां केरो मतलब जान्नेरे लेइ होरन सेइं बेंस ते तर्क केरतन। जैन केरो नितीजो जलन, ते लड़ाई ते तुहीनरी गल्लां, ते बुरी-बुरी शक, 5 ते मैनु मां बेफैइदी लडैई पैदा भोतिन, ते जैन केरे मन बुरे शक्की सेइं भेरोरेन, ते तैना लगातार होरन सेइं बेंस केरतन, ते तैना सेझी न बटथ कि सच्च कुने, तैना समझतन परमेशेरे बारे मां शिक्षा देनी कमाई केरनेरो जिरियोए। 6 पन इश्शे इन लेइ इन रोड़ कि अस तैन केरम जैस सेइं परमेशर खुश भोए ते जैन परमेशर असन देते तैस सेइं अस राजी भोम। 7 ते न असेई दुनियाई मां किछ आनोरू, ते न किछ नेही बटम। 8 ते अगर असन कां किछ खाने पीने ते लाने जो भोए, ते इस्से मां खुश रहम। 9 पन जै धनी भोनो चाए, तैना इन सब पाप केरतां बड़े आसान तरीके सेइं धोखो खातन, जेन्चरे जानवर जाले मां फसतन तेन्चरे तैना फसतन। तैना इन केरनू चातन जैन तैन केरे लेइ बेवकूफी ते खतरोए, ते एरी इच्छां तैन बरबाद ते नाश केरनेरे पासे नेतिन। 10 किजोकि पेइसां केरू लालच सेभी किसमेरे बुरैइअरू वजाए, किछ लोकेई बले-बले मसीह पुड़ विश्वास केरनो शारो किजोकि तैना धनी भोनू चाते थिये, ते तैनेई तैस मैनेरो जेरो बड़े तरीकन सेइं दुःख झैल्लो जै अपने आपे कोन्ची हथियारे सेइं जखमी केरते।

पन हे तीमुथियुस, तू परमेशेरो मैनुस, तीं इन गल्लां न लोड़न कियोरी, सिर्फ जैन ठीके तैन केरनेरे लेइ हर किसमे सेइं कोशिश केर। एरी जिन्दगी जी जैस सेइं परमेशेरी आदर भोती, मसीह पुड़ भरोसो केर, होरि लोकन सेइं प्यार केर, मुश्किल वक्ते मां हिम्मत रख, ते होरि लोकन सेइं नेरमी सेइं बताव केर। 12 जेन्चरे अक रोड़ो सिपाई जंगी मां लडैई मां हार न मन्ने, तेन्चरे तू भी परमेशेरे पुड़ भरोसो रखने मां ते तैसेरी गल मन्ने मां हार न मन्ने। ते तैस हमेशारी जिन्दगी मजबूती सेइं ठेमतां रख, जेसेरे लेइ तू परमेशेरे कुजावरोस, ते जेसेरे बारे मां तीं बड़े लोकां केरे सामने दिलेरी सेइं जोरू थियूं कि तू मसीह पुड़ विश्वास केरतस। 13 अवं तीं परमेशेरे सामने जै सेभन जिन्दगी देते, ते मसीह यीशुएरे सामने जोताई, जैने पुन्तियुस पिलातुसेरे सामने रोड़ी गवाही दित्ती, ई हुक्म देताई। 14 जैन किछ परमेशेरे तीं केरनेरे लेइ हुक्म दित्तोरो तैन सब किछ पूरू केर, ताके यीशु मसीह जांतगर वापस न एज्जे तीं पुड़ कोई दोष न लेई बटे तू कुन गलत केरने लोरोस। 15 सिर्फ परमेशर तै राजोए जै बड़यैयरे काबले, तै महान राजो ते महान प्रभुए, तैए मसीहे सही वक्ते पुड़ बांदो केरेलो। 16 सिर्फ तैए हमेशा जींतो रहते, ते तै तैस महिमा बैली लोई मां रहते जैस कां कोई न एज्जी बटे। तैसेरी आदर ते शक्ति हमेशा राली। आमीन।

17 इस दुनियारे दौलतमंदन हुक्म दे, कि तैना घमण्डी न भोन ते चंचल धने पुड़ उमीद न रखन, पन परमेशेरे पुड़ जै इश्शे सुखेरे लेइ बड़ हच्छू देते। 18 ते तैन जो कि तैना अपने पेइसे रोड़े कम्मां केरे लेइ इस्तेमाल केरन ते भलाई केरने मां दौलतमंद बन्नन ते हमेशा तियार रान होरन खुल्ले दिले सेइं देनेरे लेइ जो। 19 एन्चरे केरने सेइं तैना अपना रोड़ां कम्मां खजानेरे जेरे जमा केरेले, जैना तैन केरे लेइ एजनेबाले वक्ते स्वर्गे मां मजबूत मुनीयादरां जेरां भोलां। ते तैना तै सच्चरी जिन्दगी हासिल केरेले जै हमेशेरे लेइ आए। 20 हे तीमुथियुस इस गल्ली पुड़ ध्यान दे कि जैन परमेशेरे तीं केरनेरे लेइ दित्तोरूए तैन्ने केर। दुष्ट ते बेकार गल्लन करां ते तैन शिक्षान करां बेंचता रा, जैना परमेशेरी सच्चरी शिक्षां केरि खलाफत केरतन, तैस तैना ज्ञान जोतन पन तैन गलते। 21 किछ लोकेई इन झूठ ज्ञान कबूल कियोरूए, एन्चरे केरनेरे सेइं तैनेई मसीहेरे सच्चरी शिक्षान पुड़ विश्वास केरनो शारो। परमेशेरो अनुग्रह तुसन सेभन पुड़ भोतो राए।

2 तीमुथियुस

????????

1 अवं पौलुस ई चिट्ठी लिखने लोरोई । परमेशेरे अवं यीशु मसीहेरो प्रेरित भोनेरे लेइ चुनो, ताके अवं इस सन्देशेरो प्रचार केरि कि परमेशेरे यीशु मसीह पुड़ विश्वास केरनेरे जिरिये वादो कियो कि हमेशारी जिनंदगी देलो । 2 अवं ई चिट्ठी तीमुथियुसे लिखने लोरोई, जैन मेरे मट्ठेरू जेरूए, हे तीमुथियुस अवं प्रार्थना केरताई बाजी परमेशर ते इशे प्रभु यीशु मसीह तीं अनुग्रह ते दया ते शान्ति देतो राए ।

?????? ?? ?????????

3 जैस परमेशेरी सेवा अवं अपने दादे पड़दादां केरे रीति पुड़ शुद्ध जमीरे सेइं केरताई, तैसेरू शुक्र भोए, कि अवं अपनी प्रार्थनान मां तीं रात दिहैड़ी याद रखताई । 4 मीं यादे जैखन अस अलग भोने लोरे थिये तैखन तू केन्चरे लेरां देने लोरो थियो, ते तीं सेइं मिलनेरी बड़ी इच्छा रखताई कि जैखन मिली त अवं आनन्दे सेइं भरी गेइ । 5 ते अवं तेरे अम्मा यूनीके ते तेरी नानी लोइसेरो तै सच्चे विश्वास याद केरताई । तेरो विश्वास भी तेरहो आए, ते मीं याकीने तीं मां भी आए । 6 एल्हेरेलेइ अवं तीं याद कराताई, कि तू परमेशेरे तैस वरदाने जैन मेरे हथ रखने सेइं तीं मैल्लोरू थियूं चमका । 7 किजोकि परमेशर अस डरपोक नई बनावरे बल्के तैसेरो आत्मा इशे दिलन मजबूत केरते, ते मद्दत केरते कि अस होरि लोकन सेइं प्यार केरम ते ताके आपे कैबू मां रखम ।

8 एल्हेरेलेइ होरि लोकन प्रभु यीशुएरे बारे मां जोने करां शरमा ते एल्हेरेलेइ शरमा कि अवं प्रभुएरी सेवा केरनेरे लेइ कैदे मां आई । बल्के तू परमेशेरे तैस शेक्ति इस्तेमाल केर ते मीं सेइं साथी खुशखेबरारे लेइ दुःख झलने मां शामिल भो । 9 परमेशेरे असन मुक्ति दित्ती, ते अस पवित्र जिनंदगी जीनेरे लेइ कुजाए, तैने अस एल्हेरेलेइ नई कुजवरे कि असेईं रोड़ां कम्मां कियां, किजोकि दुनिया बनाने करां पेइलो परमेशेरो ई मकसद थियो कि तै यीशु मसीह इशे लेइ इस दुनिया मां भेजतां असन पुड़ अनुग्रह हिराए । 10 पन हुनी इशे मुक्ति देनेबाले यीशु मसीह ओरोए ते तैनी अपनो अनुग्रह हिरावरोए । तैने मौतरी शक्ति नाश की, तैने असन खुशखेबरारे जिरिये हमेशारे जिनंदगी बत हिराई । 11 इस खुशखेबरारे लेइ परमेशेरे अवं प्रचारक ते प्रेरित ते शिक्षा देनेबालो चुनो । 12 एल्हेरेलेइ अवं कैदखाने मां दुःख भी झैल्लने लोरोई, पन शरमेई न, किजोकि अवं मसीहे ज्ञानताई जैस पुड़ मीं विश्वास कियोरोए, ते मीं याकीने, कि जैन मसीहे दितोरू जांतगर तै वापस न एज्जे तांतगर तै तैसेरी रखवाली केरि बटते । 13 जैना रोड़ी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरोस । 14 ते तैस सच्चेरी रखवाली केर, जैन पवित्र आत्मारें जिरिये सेइं तीं सोंफेरू, जै असन मां रहते ।

15 तू ज्ञानतस, कि आसिया इलाकेरे बड़े विश्वासी लोक जैनेई अवं शारोरोई, जैन मां फूगिलुस ते हिरमुगिनेसे भी अवं शारो । 16 उनेसिफूरूसेरे घराने पुड़ प्रभु दया केरे, किजोकि तै बड़े बार मीं कां अव ते मीं होसलो दित्तो, ते मीं सेइं कैदखाने मां एजनेरे लेइ न शरमाव । 17 पन जैखन तै रोम नगरे मां अव, त बड़े कोशिश सेइं तोप्तां मीं सेइं मुलाकात केरि । 18 प्रभु इन्साफेरे दिहाड़े अपनि महान दया उनेसिफूरूसे पुड़ हिराए । तू एप्पू रोडे चारे ज्ञानतस कि इफिसुस नगरे मां तैनी मेरी केतरी मद्दत की ।

2

????? ?????????? ?????????????? ??????????

1 एल्हेरेलेइ हे मेरे मट्ठां तीमुथियुस, तू अपने आपे मजबूत केर इन जैनतां कि परमेशेरे तीं अनुग्रह दित्तोरो, जै सिर्फ यीशु मसीह सेइं अक भोइतां मैलते । 2 तीं बड़े लोकां केरे सामने जै मसीहेरे सन्देशी शिक्षा मीं करां शुनोरिन । एल्हेरेलेइ अवं चाताई कि तैए सन्देश तू होरि विश्वासी लोकन शिखाल, जैना वफादार भोन ते होरन शिखालनेरे काबल भोन । 3 बिलकुल तेन्चरे जेन्चरे अक सिपाही जंगरे मैदाने मुश्किल हालातन मां सबरी सेइं झैल्लते, तेन्चरे तू भी मुश्किल हालातन मां सबरी सेइं दुःख झैल्ल जेन्चरे अस यीशु मसीहेरे लेइ झैल्लतम । 4 अक सिपाही जैखन फौजी मां नौकरी केरते त तै होरि किसमेरू कम न केरे, किजोकि तै अपने भरती केरनेबाले खुश केरनू चाते । 5 फिरी

घरन मां गेइतां बेवकूफ कुआन्शन अपने वशे मां केरतन, जैन केरे मन पापे सेइं देबोइतां हर किसमेरी खुवैइशन मां आन । 7 ते हमेशा नव्वीं-नव्वीं गल्लां त शिखती रैतिन, पन तैना मसीहेरी सच्च्ची शिक्षाई कधे न सेमझी बटन । 8 इना झूठे उस्ताद मसीहेरे सच्च्चे सन्देशेरे खलाफत केरतन जेन्चरे यन्नेस ते यम्ब्रेसे मूसेरी खलाफत कियोरी थी । तैन केरे मन बुरेन ते तैन केरो मसीह पुड़ विश्वास सच्च्चो नई । 9 तैन केरि कामयाबी सिर्फ थोडे वक्तेरीए, किजोकि जेन्चरे लोकेई यन्नेस ते यम्ब्रेस पिशानोरे थिये कि तैना बेवकूफन । तेन्चरे हर कोई इन भी पिशानेलो कि इना भी बेवकूफन ।

????? ?????????????? ???? ?????????? ?????

10 पन हे तीमुथियुस तू एप्पू रोडे चारें ज्ञान कि अवं शिखालताई, ते अवं केन्चरे जीताई, ते मेरो कुन मकसदे, ते अवं कुन विश्वास केरताई । तू ज्ञानतस अवं सबर केरतो ओरोई ते सेभी किसमेरे लोकन सेइं प्यार केरतो ओरोई, मीं मुसीबतां झैल्ली ते लोकेई अवं स्तव कि मीं बड़ो दुःख भोए, 11 तू तैन भयानक गल्लां केरे बारे मां ज्ञानतस जैना लोकेई मीं सेइं अन्ताकिया ते इकुनियुम ते लुस्तुरा नगरन मां की, ते मीं तैड़ी केरो स्तव झैल्लो । पन प्रभुए अवं तैन सेभन मरां छुटव । 12 जै कोई तैन केरनू चाते जैस सेइं परमेशेरे खुश भोते ते यीशु मसीह पुड़ विश्वास केरते तै स्तव गानोए । 13 पन दुष्ट लोक ते तैना धोखो देनेबाले होरि भी बुरी चीजां केरेले । तैना लोकन धोखो देले ते एप्पू भी होरन करां धोखो खाले । 14 पन जैन तीं असन करां शिखोरूए तैस पुड़ लगातार विश्वास केर, ते तीं पूरू याकीन किजोकि तू असन ज्ञानतस ते असन पुड़ भरोसो केरि बटतस जैनेई तीं इना सैरी गल्लां शिखेली । 15 ते बचपनेरो तू पवित्रशास्त्रेरो ज्ञान्ने बालोस, जैन तेरी इन समझनेरे लेइ महत केरते, कि जैखन तू यीशु मसीह पुड़ विश्वास केरतस परमेशेरे तीं मुक्ति देते । 16 सारू पवित्रशास्त्र परमेशेरे अगवैई सेइं लिखोरू, ते इन लोकन शिखालने लेइ महतगारे, तैन ज्ञानेरे लेइ कि जैन तैनेई कियूं तैन गलते, तैन केरि गेलती सुधारनेरे लेइ, ते तैन केरनेरे लेइ शिखालनेरे लेइ जैन सही आए । 17 ताके परमेशेरेरो मैन्हु हर किसमेरां रोड़ां कम्मां केरनेरे लेइ तियार भोए ।

4

1 जैखन मसीह यीशु राजेरो जेरो राज करेने एज्जेलो त तै जीते ते जैना मरेन, लोकां केरो इन्साफ केरेलो, अवं तीं परमेशेरे ते मसीहे गवाहे रेखतां हुक्म देताई । 2 कि तू परमेशेरे वचन प्रचार केर, वक्त बे वक्ते तियार रा, तू लोकन जैना बुरां कम्मां तैनेई कियां हिरा, तैन केरे पापां केरे लेइ तैन झिडक पन तैन होसलो भी दे ते तैन सबरी सेइं शिखाल । 3 किजोकि एरो वक्त एजनोए, कि लोक रोड़ी शिक्षा न शुन्नी चाले, पन तैना अपने मेर्जी पुड़ चलनू चाले ते तैना अपने लेइ बड़े उस्ताद तोप्पेले जैना तैन सेइं तैन ज्ञान जैन तैना शुन्नु चातन । 4 तैना तैन करां शुन्नु न चाले जैना परमेशेरे सच्च्चू वचन शुनातन पन तैना झूठी कहैनी शुन्नी चाले (जैना मैन्हु केरि बनेवरिन) । 5 पन तू अपनो आप कैबू मां रख चाए किछ भी की न भोए, इस मां तीं जैना भी दुःख भी झैल्लने पेन त झल, खुशखबरी शुनानेरे लेइ बड़ी प्रचार केर, ते जैन कम परमेशेरे तीं केरनेरे लेइ दितोरू तैन पूरे केर ।

6 अवं इना हुक्म तीं देताई किजोकि मेरी जिन्दगी ते परमेशेरे लेइ कम खतम भोवरूए किजोकि अवं ज्ञानताई अवं जल्दी मरेलो । 7 मीं जंगी मां रोड़ो सिपेहेरे जेरे जै लड़ाई केरने मां कधी हार न मन्ने, तू भी मसीहेरे लेइ बड़ी मेहनत केरनि कधे हिम्मत न हार, मीं तैन कम पूरू कियूं जैन मसीह यीशुए मीं केरनेरे लेइ दितोरू थियूं, मीं वफादैरी सेइं खुशखबरी प्रचार की । 8 हुनी, प्रभुएरे मेरे लेइ स्वर्गे मां इनाम रखेरू किजोकि मीं तैस खुश केरनेबाली जिन्दगी जीयोरीए । प्रभु जै धर्मी इन्साफ केरनेबालोए मीं इन इनाम तेइस देलो जेइस तै वापस इन्साफ केरनेरे लेइ एज्जेलो । पन इन इनाम सिर्फ मेरे लेइ नई, पन तैन सेभी केरे लेइ भी आए, जैना तैसेरे एजनेरी बड़ी इच्छा रखतने ।

???? ???? ?????

9 मीं कां जल्दी एजनेरी कोशिश केर । 10 किजोकि देमासे इस दुनियारी चीजन सेइं प्यार केरतां अवं शारो, ते तै थिस्सलुनीके नगरे जो चलो जेव, ते क्रेसकेंस गलातिया इलाके जो जेव ते तीतुस दलमतिया इलाके जो चलो जेव । 11 सिर्फ लूका मीं सेइं साथीए, जैखन तू एजस त मरकुसे भी एप्पू सेइं साथी एना, किजोकि तै इड़ी मेरे महत केरनेरे काबले । 12 तुखिकुस मीं इफिसुस नगरे जो भेजोरोए । 13 जैखन तू एजस त तै चोगो एना जै मीं तुरोआस नगरे मां मरकुसेरे घरे रखोरुए । ते मेरे चर्मपत्र भी एना, खास केरतां तै जै छैल्ली केरे खेडू सेइं बनोरुए । 14 सिकन्दर ताम्बेरू कम केरनेबाले मीं बड़े बारे दुःख दितोरुए, प्रभु तैस तैसेरे बुरे कम्मां केरे मुताबिक बदलो देलो । 15 तू भी

तैस करां खबरदार रा, किजोकि तैने इशे शिखारी बड़ी खलाफत की जै मसीहेरे बारे मां आए। 16 जैखन पेइले बार अवं आदालती मां अपनो आप बचाव केरनेरे लेइ जोरो थियो त कोई भी मीं सेइं साथी न थियो। पन तैना सारे मीं शैरतां चले जे, परमेशर इन तैन केरे खलाफ न गने। अवं प्रार्थना केरताई परमेशर तैन हछु माफ़ केरे। 17 पन प्रभु मेरो मदतगार राव, तैने मीं हिम्मत दिती, ते अवं यीशु मसीहेरी खुशखबरी शुनानेरे काबल भोव कि सारे गैर कौमां केरे लोक शुन्न, ते तैने अवं मौती करां एन्चरे बचाव जेन्चरे शेरे करां। 18 ते प्रभु मीं हर एक्की बुरे हमले करां बचालो ते अपने स्वर्गेरे राज्जे मां हफ़ाजती सेइं पुजालो, सारे महिमा हमेशा-हमेशा परमेशेरी भोती राए।
आमीन।

???? ????22??

19 मेरू नमस्कार पिरस्का ते तैसेरे घरे बाले अक्वला ते कने उनेसिफुरुसेरे घराने दे। 20 इरास्तुस कुरिन्थुस नगरे मां रावरोए, ते त्रुफिमुस मीं मीलेतुस नगरे मां बिमार शारोरोए। 21 हीवतड़ेरे पेइले एजनेरी कोशिश केर, ते यूबूलुस ते पूदेंस ते लीनुस ते क्लौदिया, ते इठेरे सारे विश्वासी लोकेईं नमस्कार भेजेरू आए।

22 अवं प्रार्थना केरताई प्रभु तीं सेइं साथी भोए, ते तैसेरो अनुग्रह तुसन सेबन पुड़ भोतो राए।

तीतुस

११११११११

1 अवं पौलुस ई चिट्ठी लिखने लोरोई । अवं परमेशेरो दास ते यीशु मसीहेरो परेरित आई । अवं परमेशेरे चुनोरे लोकां केरे विश्वासे मजबूत केरनेरे लेइ ते तैन केरि मद्दत केरनेरे लेइ चुनोरोई, कि तैना यीशु मसीहेरी सच्च्ची शिक्षा ज्ञानन ताके तैना एरी ज्जिन्दगी ज्जिन ज्जैस सेइं परमेशर खुश भोए । 2 तैसेरो नितीजो ई भोए कि तैना परमेशेरे सेइं हमेशा रानेरी उमीद रखन, परमेशर ज्जै कद्धे झूठ न ज्जोए, तैने दुनिया बनाने करां पेइलो वादो कियोरो थियो, कि तैसेरे लोक हमेशारे लेइ ज्जियेले । 3 ते हुनी परमेशेरे ठीक वक्ते पुड़ ई खुशखबरी असन पुड़ बांदी की ज्जै अस सेबन प्रचार केरतम । इश्शे मुक्ति देनेबाले परमेशेरे ई ज्जिमेवारी मीं दित्तोरीए ते तैसेरेलेइ इन कम केरनेरे लेइ मीं हुक्म दित्तोरीए ।

4 अवं ई चिट्ठी तीतुसे जो लिखने लोरोई । तू मेरे मट्टे जेरू आस, किजोकि ज्जेन्चरे अवं विश्वास केरताई तेन्चरे तू भी विश्वास केरतस । अवं परार्थना केरताई इश्शो बाजी परमेशर ते इश्शो मुक्ति देनेबालो प्रभु यीशु मसीह तीं अनुग्रह त कने शान्ति देतो राए ।

१११११११ १११११ ११११ ११११११११११ १११

5 मीं तू एल्हेरेलेइ करेते टैपू मां शारोरो थियो, ताके तू तैड़ी इश्शू कम पूरू केरस, ते होरि नगरन मां बुजुर्ग चुन ज्जेन्चरे तीं केरनेरो हुक्म दित्तोरो थियो । 6 लीडर बेइलज्जाम लोडे ते अपने कुआन्शी सेइं वफादार लोडे, ज्जैन केरे बच्चे विश्वासी भोन ते बुरो बर्ताव केरनेबाले न भोन ते तैना अपने अम्मा बाजी केरो हुक्म मन्नेबाले भोन । 7 किजोकि रखवालो परमेशेरो भण्डारी भोने वजाई सेइं बेइलज्जाम लोडे, न अपनि चलानेबालो, न सेरकलो, न शराबी, न लडाको, ते न पेइंसां केरो लालच्ची लोडे । 8 पन मेहमानां केरि आदर केरनेबालो, होरि केरि भलाई केरनेबालो, अपने आपे पुड़ कैबू केरनेबालो, धरमात्मा, पवित्तर ते अपने इच्छान कैबू केरनेबालो लोडे । 9 ते तै यीशु मसीहेरे तैस सन्देशे पुड़ ज्जै भरोसेरे काबले मजबूती सेइं विश्वास केरनेबालो लोडे, ज्जै असेई तैस शिखालोरोए । ताके तै होरन सही शिक्षाई मन्नेरे लेइ होसलो देइ बटे ते ज्जैना गलत भोन तैन सुधैरी बटे ।

10 अवं इन एल्हेरेलेइ ज्जोताई, किजोकि बडे लोक सही शिक्षारी खलाफ केरेले, ज्जैना बेकार गल्लां शिखालतन ते होरन धोखो देतन । इन खास केरतां किछ् यहुदी केरे लेइ सच्च आए ज्जैना विश्वासी बनोरेन (इना तैना लोकन ज्जैना चातन कि सारे मसीही लोक यहुदी केरे कानूने मनन, खास केरतां खतनेरे कानूने) । 11 एन लोकन शिखालनेरी अज्जाजत न दे, किजोकि ज्जैखन तैना इन गल्लन शिखालतन, ज्जैना तैनेई शिखैलोरी लोडन, त तै सारे टब्बरां केरे विश्वासे बरबाद केरतन । तैना इन एल्हेरेलेइ केरतन कि पेइंसो कमेई बटन । 12 अक मैन्हु करेत टैपेरो आए ज्जैस जो तैना अक्लमन्द ज्जोतन तैने ज्जोरूए, “करेतेरे लोक हमेशा झूठे, जंगली जानवरां केरो ज्जेरो बर्ताव केरनेबाले, तैना आलसी ते हमेशा अढंगू खानेबाले भोतन ।” 13 इन गल्लां करेतेरे लोकां केरे बारे मां सच्च्ची आन । एल्हेरेलेइ तैन खबरदार केर, कि तैना यीशु मसीहेरी शिक्षाई पुड़ विश्वास केरन । 14 ते यहुदी केरि बनोवरी कहैनी ते ज्जैना लोक सच्च्चे करां दूर भोरेन तैन केरे हुक्म शुन्ने बंद केरा । 15 ज्जैन लोकां केरे मने मां पापी खियाल नई तैन केरे लेइ रीतरे मुताबिक सब किछ् शुद्धे । पन तैन लोकां केरे लेइ ज्जैना बुरेन ते यीशु मसीह पुड़ विश्वास न केरन तैन केरे लेइ किछ् भी शुद्ध नई ज्जैन तैना केरतन । 16 तैना झूठे उस्ताद ज्जोतन कि अस परमेशेरे ज्ञानतम, पन तैन केरां कम्मां साफ तरीके सेइं हिरातन कि तैना तैस न ज्ञानन, किजोकि परमेशर तैन सेइं नफरत केरते ते तैना हुक्म न मन्नेबालेन, ते किछ् भी रोडू केरनेरे काबल नई ।

2

११११११११ ११११ १११११ ११११११११

1 पन हे तीतुस तू विश्वासी लोकन तैन शिखाल ज्जैन यीशु मसीहेरे बारे मां सही शिक्षारे मुताबिक ठीके । 2 बुड्डे मड्डन शिखाल कि अपने आपे पुड़ कैबू केरनेबाले बनन, ते तैनेई एरो बर्ताव केरन कि लोक तैन केरि आदर केरन, ते समझदैरी सेइं बर्ताव केरनेबाले भोन । ते तैना परमेशेरे पुड़ मजबूती सेइं विश्वास केरनेबाले बनन, होरन सेइं प्यार

केरनेबाले ते सबर केरनेबाले बनन । ³ एन्चरे बुडडी कुआन्शन शिखाल कि एरी ज़िन्दगी ज़ीन ज़ैस सेइं परमेशेरी आदर भोए । तैना होरन पुड दोष लाने बैली, ते पीने बैली नई, पन ते तैन ज़ो कि तैन होरन तैन शिखालन ज़ैन रोडूए । ⁴ ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बच्चन सेइं केन्चरे प्यार केरन । ⁵ ते तैना अपने आपे कैबू केरनेबैली, अपने मुन्शां केरे लेइ वफादार, ते घरेरो कारोबार केरनेबैली, भलाई केरनेबैली ते अपने-अपने मुन्शां केरे अधीन राने बैली भोन, ताके परमेशेरे वचनेरी तुहीन न भोए ।

⁶ एन्चरे जवान मडदन भी अक्लमन्द भोइतां ज़ीनेरे लेइ समझा । ⁷ हर गल्ली मां तू हमेशा अपनो आप अक मिसाल बना, ताके तैन भी एन्चरे केरन । ज़ैखन तू परमेशेरे बारे मां शिखालस त रोडे मकसदे सेइं शिखाल । एन्चरे लोक तेरी आदर केरेले । ⁸ ते ज़ैन सच्चे तैन शिखाल ते ज़ेसेरी आलोचना न भोए, ताके तेरे दुश्मन छिथोन, किजोकि फिरी कोई बुराई नई भोनी ज़ेसेरी तैना खलाफ केरि बटन ।

⁹ ज़ैना विश्वासी गुलाम आन तैन शिखाल कि हमेशा अपने मालिकां केरि गल मनन । तैन ज़ो कि तैन केरन ज़ैस सेइं तैन केरे मालिक खुश भोन ते कम्मेरे बारे मां शिकायत न केरन । ¹⁰ च़ोरी न केरन, पन इन साबत केरन कि तैना हमेशा ईमानदारन, ताके लोक तैन केरे रोडे बर्तावे हेरन ते ज़ैन तैना केरतन तैन लोकां केरे लेइ, इश्शे मुक्ति देनेबाले परमेशेरो सन्देश शुन्नेरी वजा भोली ।

¹¹ किजोकि परमेशेरे सेभी लोकन मुक्ति देनेरे लेइ अक बत देइतां अपनो अनुग्रह हिराव । ¹² परमेशर अपने अनुग्रहेरे ज़िरिये असन शिखालते, परमेशर असन शिखालते कि अस तेरहो बर्ताव न केरम ज़ैस सेइं तै खुश भोए । जेन्चरे गैर विश्वासी चीज़ां केरू लालच केरतन तुस एरू न केरा, तुस ज़ांतगर इस दुनियाई मां आथ, अक्लमन्द ते धर्मी लोकां केरो ज़ेरो ते एरो ज़ेरो बर्ताव केरा ज़ैस सेइं परमेशर खुश भोते । ¹³ अस तैस अनोखी दिहैडरी उमीदी मां रातम, कि ज़ेइस इश्शो महान परमेशर ते मुक्ति देनेबाले यीशु मसीह महिमाई सेइं साथी वापस एज्जेलो । ¹⁴ एने यीशु मसीहे अपनो आप इश्शे लेइ बलिदान कियो ताके असन पापेरे शेक्ति करां छुटकारो दे, ताके अस शुद्ध भोम ते तैसेरे अपने लोक बनम ज़ैना रोडां केरतन ।

¹⁵ इना गल्लां शिखाल ते अपनो पूरो अधिकार इस्तेमाल केर, ते अपने शुन्नेबालन होसलो दे ते झिडक दे । कोई तीं घटया न समझे ।

3

??????

¹ विश्वासी लोकन याद करा, कि हाकिमां ते अधिकैरी केरे अधीन रान, ते तैन केरो हुकम मन्न, ते हमेशा रोडो केरनेरे लेइ तियार रान । ² कोन्ची बदनाम न केरन, लडाके न भोन, पन नर्म सुभावेरे भोन, ते सेभी मैनन् सेइं साथी बेडि नेरमी सेइं रान । ³ किजोकि अस भी पेइले बेअकल ते हुकम न मन्नेबाले थिये ते लोकेई असन धोखो दित्तोरो थियो । बडे खुवैइशां ते एशेरे केरनेरे गुलाम थिये, इश्शी ज़िन्दगी दुष्टे ते जलनी सेइं भेरोरी थी ते एककी होरि सेइं नफरत केरते थिये । ⁴ पन फिर भी इश्शे मुक्ति देनेबाले परमेशेरे असन लोकन पुड दया ते प्यार हिराव । ⁵ तैन अस इश्शे पापां केरि सज़ाई करां बच्चाए एल्हेरेलेइ नई कि असेईं रोडां कम्मां कियोरां थियां, पन तैसेरे दयारे वजाई सेइं । तैन इश्शे पाप धोइतां असन नव्वू जर्म दित्तू ते पवित्त्र आत्मा देनेरे ज़िरिये असन नव्वीं ज़िन्दगी दित्ती । ⁶ परमेशर पवित्त्र असन मुफते मां दित्तो कि इश्शे ज़िन्दगी मां शेक्ति सेइं कम केरे, किजोकि यीशु मसीह इश्शो मुक्ति देनेबालो बन्नेरे लेइ इश्शे पापां केरे लेइ मरो । ⁷ परमेशेरे इन कियूं ताके तै अपने अनुग्रहे सेइं अपने नज़री मां धर्मी बनाए, ताके अस तैसेरे बच्चे बनम ते पूरे तरीके सेइं हमेशा तैस सेइं साथी रानेरे उमीदी सेइं केरम ।

⁸ ई गल सच्चे, अवं चाताई कि तू इन शिक्षान पुड ज़ोर दे ताके सब ज़ैना परमेशेरे पुड भरोसो रखतन तै अपनो आप रोडू केरनेरे लेइ सॉफेले, इना शिक्षां सेभी केरे लेइ रोडी ते फैइदामंद आन । ⁹ पन बेवकूफी बेंस ते पूर्वजां केरे नव्वीं केरे बारे मां, ते लडाई ते तैन ते मूसेरे कानूनेरे बारे मां लडाई करां दूर रा, किजोकि तैन सब बेकार ते बेफैइदू आए । ¹⁰ ज़ैना लोक कलीसियाई मां फिरके बनानेरी वजा बनतन, कम से कम दूई बार तैन खबरदार केर कि तैना एन न केरन, तैट्टां बाद अपनो वक्त तैन पत्ती बर्बाद न केर । ¹¹ तुस ज़रूर ज़ैनी बटतथ एरो ज़ेरो मैन्हु ज़ैनी बुज़झतां गलत बत्तां च़लते, ते तैन अपना बुरां कम्मां इन साबत केरतन कि तैना पापिन ।

????

12 अवं अरतिमास या तुखिकुसे तुसन कां भेजनेरे लेइ बिस्तार बनाने लोरोई, जैखन तैन मरां अक तीं कां पुजते त निकुपुलिस नगरे मां मीं सेइं मिलनेरी पूरी कोशिश केर, किजोकि मीं तैड़ीए हिवतड़ो कटनो थापोरोए। 13 जैखन जेनास शास्त्री ते अपुल्लोस तैट्ठां गानेरे लेइ तियार भोन त जेतू भोइ बटे तैन केरि मद्दत केर, ताके तैन कोन्ची भी चीजरी घटी न भोए। 14 सिर्फ इन नई, बल्के तू विश्वासी लोकन शिक्षा देतो रा, कि तैना रोड़ां कम्मां केरन ताके तैन लोकां केरि मद्दत केरन जैन जरूरत आए। इस सेइं तैन केरि मद्दत भोली कि तैना एक्की मकसदे सेइं जिन्दगी जीन।

15 सारे विश्वासी लोक जैना मीं सेइं साथी आन तींजो नमस्कार जेतन। इश्शे विश्वासी सैथी लोकन जैना असन सेइं प्यार केरतन तैन नमस्कार। अवं प्रार्थना केरताई प्रभु तुसन सेबन पुड़ अनुग्रह केरतो राए।

फिलेमोन

???????

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहेरे बारे मां प्रचार करताई। हे फिलेमोन तीं इश्शे दूला तीमुथियुस ते मेरे तरफां नमस्कार। तू इश्शो टूलारो दोस्तस आस ते जेन्चरे अस मसीहेरे लेइ कम केरतम तेन्चरे तू भी केरतस। 2 अवं इश्शी विश्वासी बेइन अफफिया ते इश्शे सैथी अरखिप्पुस जै सिपेहेरे जेरो प्रभुएरी सेवा करते, ते तैन कलीसियारे लोक जैना तेरे घरे मां अकोट्टे भोतन, तैन भी लिखने लोरोई, 3 अवं प्रार्थना करताई, इश्शे बाजी परमेशर ते प्रभु यीशु मसीह तुसन पुड़ अनुग्रह केरे ते तुसन शान्ति दे।

?????????? ???? ? ? ? ? ? ? ? ?

4 अवं जैखन भी तेरे लेइ प्रार्थना करताई, तेरे लेइ अवं परमेशेरू शुक्र करताई। 5 किजोकि मीं प्रभु यीशु मां तेरे विश्वासेरे बारे मां ते परमेशेरें लोकां केरे लेइ तेरे प्यारे बारे मां शुनू। 6 अवं प्रार्थना करताई तेरी संगती जै विश्वासी लोकन सेइं साथीए, तुश्शे तैन रोड़ि चीजां केरे ज्ञान्नेरे जिरिये जैना परमेशेरे दित्तोरिन बद्धती गाए। इन मसीहेरे महिमारे लेइ भोतू राए। 7 किजोकि हे दूला, अवं तेरे प्यारे सेइं जै तू मीं केरतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारेरे जिरिये होरि परमेशेरें लोकन भी होसलो मैल्लो।

?????? ???? ? ? ? ? ? ? ? ?

8-9 अवं तीं किछ् करेनेरे लेइ पुच्छताई जैन तीं कियोरू लोड़े। अवं मसीहेरो दित्तोरे अधिकारे इस्तेमाल केरतां इन करेनेरे लेइ हुक्म देइ बटतो थियो, पन अवं न केरेलो। इसेरे बदले मां, अवं बल्हे चारे ज़ोताई कि तू इन केर, किजोकि अस एक्की होरि सेइं ते परमेशेरें लोकन सेइं प्यार केरतम। अवं पौलुस हुनी सियाने मैनेरे रूपे मां तीं पुच्छतई, अवं लोकेई कैदे मां बंद कियोरुई किजोकि अवं यीशु मसीहेरी सेवा करताई। 10 अवं उनेसिमुसेरे लेइ मिनत केरताई जैन मेरे लेइ मट्टेरू जेरूए। तैन मसीह मां मेरू मट्टू इडी कैदखाने मां बनू। 11 तै बीतोरे वक्ते मां तेरे लेइ केन्ची कम्मरो न थियो, पन हुनी तेरे त कने मेरे दुइयां केरे बड़े कम्मरोए। 12 अवं उनेसिमुसे तीं कां वापस भेजने लोरोई, तैस सेइं अवं पूरे दिले सेइं प्यार करताई। 13 अवं जांतगर खुशखबरी प्रचार केरनेरे वजाई कैदखाने मां आई तांतगर तैस अपनि मद्दत केरनेरे लेइ इडी एप्पू सेइं साथी रखनो चातो थियो। ताके तै तेरे ठैरी मेरी मद्दत केरे, किजोकि अवं ज्ञानताई तू मेरी मद्दत केरनि चातस। 14 पन मीं तेरी मेर्जी बगैर किछ् भी केरनू न चाव, अवं चाताई तू ई मेरी मद्दत केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई।

15 शैइद परमेशेरे उनेसिमुस एल्हेरेलेइ तीं करां नश्शने दित्तो, ताके तै मसीह पुड़ विश्वास केरे, ते तैसेरो नितीजो ई भोए कि तै हमेशा तीं सेइं साथी राए। 16 पन हुनी तै तेरो गुलाम नई, बल्के गुलामे करां भी बेद्धतां आए। तै हुनी तेरो टूलारो विश्वासी दूला आए। अवं तैस सेइं बड़ो प्यार करताई, पन तीं तैस अपने गुलामेरे रूपे मां होरो भी प्यार कियोरु लोड़े किजोकि तै मसीह मां अक दूलाए। 17 अगर तू मीं शामिल समझतस, त जैखन उनेसिमुस वापस तीं कां एज्जे त तैस एन्चरे कबूल केर जेन्चरे मीं। 18 ते अगर तैने किछ् तेरो नुकसान कियोरुए, या तेरे किछ् पेइसां केरो कर्जो भोए त अवं तैसेरे बदले देइलो। 19 अवं पौलुस अपने हथ्यन सेइं लिखताई, कि अवं तीं एप्पू वापस देइलो, तू इन पेइलू ज्ञानतस, अगर मीं तेरी मद्दत न भोथी कियोरी त तीं अपने आपे सेइं न भोथू मैलोरू, मेरो कर्जो जै तीं पुड़े तै तेरी अपनि ज़िन्दगी आए। 20 हे मेरे टूलारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर।

21 मीं ई चिट्ठी लिखोरीए, किजोकि मीं याकीन कि जैन केरनेरे लेइ ज़ोरू तैन तू केरेलो। हकीकति मां अवं ज्ञानताई तू तैस करां भी बडू जादे केरेलो, जैन केरनेरे लेइ मीं ज़ोरूए। 22 ते अक होरि गल, तू अपने घरे मां मेरे लेइ अक कमरो तियार केर। किजोकि मीं उमीदे परमेशर तुश्शे प्रार्थनां केरो जुवाब देलो ते तीं कां फिरी एजने देलो।

???? ???? ? ? ? ? ? ? ? ?

23 इपफरास, जै यीशु मसीहेरी खुशखबरी प्रचार केरनेरे वजाई सेइं मीं साथी कैदीए तै तीं नमस्कार ज़ोते । 24ते मरकुस ते अरिस्तर्खुस ते देमास ते लूका ज़ैना प्रभुएरू कम मीं सेइं साथी केरतन तींजो नमस्कार ज़ोतन ।

25 इशशे प्रभु यीशु मसीहेरो अनुग्रह तुसन पुइं भोतो राए । आमीन ।

इब्रानियों

1 परमेश्वरे बड़े पेइले इश्वरे दादे पड़दादन सेइं बड़े बारे ते अलग-अलग किसमे सेइं नेबी केरे जिरिये गल्लां की ।
 2 पन इन आखरी दिहाइन मां परमेश्वरे असन सेइं अपने मट्ठेरे जिरिये गल्लां की, जैन तैनी सैरी चीजां केरू बारस ठहराव ते तैसेरे जिरिये परमेश्वरे सारी स्रष्टि बनाई ।³ मट्ठू परमेश्वरेरी महिमारू प्रकाश आए, ते तैन हर किसमे सेइं परमेश्वरेरू जेरू आए, तैन्ने सैरी चीजन अपने शेक्तेरे वचनेरे जिरिये सेइं संभालते, तैन्ने लोकन पापन करां शुद्ध केरतां स्वर्गे मां परमेश्वरेरे महिमा मां देइने पासे बिशू ।⁴ एन केरने सेइं परमेश्वरे मट्ठू, स्वर्गदूतन करां महान कियूं, ते जैन नवं तैस दित्तू जेवं तैन स्वर्गदूतन करां महान आए ।

???????????? ???? ???? ???? ???? ???? ??

5 किजोकि परमेश्वरे स्वर्गदूतन मरां कोन्ची सेइं कधे नईं ज़ोरू,
 “तू मेरू मट्ठू आस;
 अज्ज अवं इन बांदू केरताईं तू मेरू मट्ठू आस”
 ते फिरी परमेश्वरे केन्ची स्वर्गदूते सेइं इन नईं ज़ोरू,
 “अवं तैसेरो बाजी भोइलो,
 ते तैन मेरू मट्ठू भोलू”

6 ते फिरी परमेश्वरे अपने पेइले मट्ठे दुनियाईं मां भेजने करां पेइलू, इन ज़ोवं, “परमेश्वरेरे सब स्वर्गदूत तैस कां मथ्यो टेकन ।”⁷ परमेश्वर स्वर्गदूतां केरे बारे मां इन ज़ोते,

“ तै अपने स्वर्गदूतन हवारे ज़ेरे बनाते,
 ते अपने सेवकन अगारे लपारे ज़ेरे बनाते ।’

8 पन परमेश्वरे अपने मट्ठेरे बारे मां ज़ोते,
 हे परमेश्वर तेरू राज सदा रालू,
 ते तू इन्साफे सेइं राज केरेलो ।

9 जैन रोडूए तैस केरने सेइं तू प्यार केरतस ते जैन गलते तैन केरने सेइं नफरत केरतस;

एल्हेरेलेइ तेरे परमेश्वरे तू चुनारोस
 ते तेरे सैथन करां जादे तीं आदर ते आनन्द दित्तोरोए ।’

10 ते पवित्रशास्त्र इन भी ज़ोते, हे प्रभु, तीं शुरू मां दुनियारी रचना की,
 ते जैन किछ अम्बरे मां आए तैन तीं बनावं ।

11 तैन सब किछ खतम भोइ गानूए; पन तू हमेशा रालो;
 ते तैन सब किछ लिगड़ां केरू जेरू पुरानू भोइ गालू ।

12 ते तू तैन चादरारू ज़ेरो बनालो,
 ते तैन लिगड़ां केरू जेरू बेदलोई गालू;

पन तू कधे न बेदलोस;
 ते तेरी जिन्दगी कधी खतम न भोली ।

13 ते परमेश्वरे स्वर्गदूतन मरां केस सेइं किताली ज़ोवं,
 ‘तू मेरे देइने पासे आदरारे ठैरी बिश,’
 ते अवं तेरे दुश्मन तेरे अधीन केरेलो ।”

14 तैना सब स्वर्गदूत सिर्फ परमेश्वरेरे सेवक आन; परमेश्वरे तैना तैन लोकां केरि हिफाजत केरनेरे लेइ भेजोरेन जैन मुक्ति मैलोरीए ।

2

1 एल्हेरेलेइ, जैना गल्लां असेईं शुनोरिन, तैन पुड़ असेईं होरो भी मन लेइतां ध्यान कियेरू लोडे, कोस्कोई एरू न भोए, कि असां टेपलोइतां तैन करां दूर चले गाम ।² किजोकि जैन वचन परमेश्वरे स्वर्गदूतां केरे जिरिये ज़ोरू थियूं, तैन सच्चू साबत भोवं, ते हर एक्की पाप केरनेबाले ते हुकम न मन्नेबाले सजा मैल्ली ।³ त असन भी सजा

मैलेली, अगर अस एतरी महान मुक्ति करां बे खबर राए त। जेसेरे बारे मां पेइले प्रभुए एप्पू जोरूए, ते जैन चलेई एन प्रभु करां शुनोरू थियूं तैन केरे जिरिये असन याकीन भोवं कि एन सत्र आए। 4 परमेशरे भी निशान ते चमत्कार ते बड्डां-बड्डां कम्मां केरे जिरिये ते अपने मेरजरे मुताबिक लोकन पवित्र आत्मारें जिरिये वरदान देइतां इन साबत कियूं।

????? ?????? ?????????

5 परमेशरे एजने बैली दुनिया जेसेरे बारे मां अस जोने लोरेम, स्वर्गदूत केरे अधीन मां न की पन प्रभु यीशुएरे अधीन की। 6 बल्के पवित्रशास्त्रे मां कोस्कोई केन्चे परमेशरे सेइं एन जोरूए,

“मैन्हू कुन चीजे, जेसेरे बारे मां तू सोचतस?

या इन्सान कौने, कि तू तैसेरी फिकर केरतस?

7 तीं तै शेक्ति मां किछ् वक्तेरे लेइ स्वर्गदूतन करां थोड़ो जेरो घट कियो,

ते तीं तैस राजेरी जेरि महिमा ते आदर दित्तोरीए, ते तैस अपने हथ्यां केरे कम्मन पुड़ अधिकार दित्तो।

8 तीं तैस सेभी चीजन पुड़ अधिकार दित्तोरोए,”

जेखन सब किछ् तैसेरे अधिकारे मां कियूं,

ते किछ् भी बाकी न रखवू, जैन तैसेरे अधीन न भोए। पन असां हुन्ना तगर सैरी चीजां तैसेरे अधिकारे मां न लहम। 9 पन असां यीशु लहतम, जै स्वर्गदूतन करां किछ् वक्तेरे लेइ निकड़ो कियोरो थियो, ताके तै परमेशरेरे अनुग्रहे सेइं सेभी केरे लेइ अपनि जान दे। किजोकि यीशुए दुख बरदाश कियो ते मरो, ते हुनी अस ज्ञानतम कि

तैस महिमा ते आदर दित्तोरीए। 10 परमेशरे सब किछ् बनाव, ते तै सब किछ् अपने लेइ सुमैलतां रखते। परमेशरे ठीक कियूं जैन तैनी दुखेरे जिरिये यीशु सिद्ध कियो, ताके तै बडे लोकन महिमा मां पुजाए। किजोकि यीशु ही आए

जै असन मुक्तेरे पासे नेते। 11 किजोकि पवित्र केरनेबालेरो ते पवित्र भोने बालां केरो बाजी अक्के, एल्हेरेलेइ यीशु तैन जो ढला बेइन जोने करां न शरमाए। 12 पन मसीह परमेशरे सेइं जोते,

“अवं अपने लोकन इन जोएलो कि तीं मेरे लेइ इन कियोरूए

ते तैन केरे सभाई मां तेरे नव्वेरू गीत जोइलो।”

13 ते फिरी तै जोते,

“अवं तैस पुड़ भरोसो रेखेलो।”

ते फिरी तै जोते,

“अवं तैन लोकन सेइं साथी भोनोई, जैना परमेशरे मीं दित्तोरेन।”

14 किजोकि जेन्चरे परमेशरेरे बच्चे, मैन्हू आन, तेन्चरे यीशु भी तैन केरो जेरो मैन्हू बनो। परमेशरे एन एल्हेरेलेइ कियूं ताके तैसेरे मौतरे जिरिये शैताने बरबाद केरे जैस कां मौतरो अधिकार थियो। 15 ते एन्चरे तैनी तैना आज्ञाद किये जैना मौतरे डरे सेइं सैरी उमरी गुलामेरे जेरे जीते थिये। 16 किजोकि प्रभु यीशु स्वर्गदूतां केरि नई बल्के

अब्राहमेरे वंशेरी मद्दत केरते। 17 एल्हेरेलेइ यीशु मसीहे हर गल्ली मां मैन्हू केरो जेरो बन्नू जरूरी थियूं, ताके सेभी केरे पापां केरे बलिदानेरे लेइ परमेशरेरे सामने दया केरनेबालो ते ईमानदार महायाजक बने। 18 किजोकि

यीशुएरी अजमैइश कीजेई ते तैनी एप्पू दुःख झैल्लोरोए, एल्हेरेलेइ तै तैन लोकां केरि मद्दत केरि बटते, जैना आजमैइशरो सामनो केरतन।

3

????? ?????? ?????? ?????? ??

1 एल्हेरेलेइ हे विश्वासी ढलाव ते बेइनव, तुस परमेशरे स्वर्गे मां तैस सेइं शामिल भोनेरे लेइ कुजोरेथ। एल्हेरेलेइ प्रभु यीशुएरे बारे मां ध्यान देथ जै इश्रे लेइ परमेशरेरो बिस्तार आन्ने बालो दूत ते महायाजक आए जेसेरो अस इकरार केरतम। 2 यीशु परमेशरेरे लेइ वफादार थियो, जैनी तै ठहरावरो थियो, जेन्चरे मूसा भी परमेशरेरे लोकां केरि सेवाई मां वफादार थियो। 3 किजोकि घर बनानेबालो घरे करां जादे इज्जतरे काबल समझो गाते, तेन्चरे यीशु भी मूसा करां जादे इज्जतरे काबल समझो जेव। 4 किजोकि हर घरेरो कोई न कोई बनानेबालो जरूर भोते, पन

जैनी सब किछ् बनाव तै परमेशरे। 5 मूसा त परमेशरेरो सेवक भोने सेइं परमेशरेरे घरेरे लोकन मां वफादार राव। ताके तैना गल्लां केरि बटे, जैना परमेशर एजनेबाले वक्ते मां जोनेबालो थियो। 6 पन मसीह मट्टू भोनेरे वजाई

सेइं परमेशेरे लोकां केरू मुखतियारे, ते असां तैसेरे लोकम, शर्त एने कि असां तैस दिलेरी ते उमीदी मजबूत रखम, जैस पुइ असां भरोसो केरतम।

????????????????

7 बस्सा पवित्र आत्मा ज़ोते,

“अगर अज़ तुस परमेशेरी आवाज़ शुनथ।

8 त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ,

जैखन तैनेई परमेशेरे खलाफ खलाफत की,

ते ज़ेन्चरे तैस दिहाड़े तुशे दादे पड़दादेई ज़ेइस तैना सुनसान ठैरी मां थिये, तैनेई परमेशेरी अज़मैइश की।

9 तैड़ी तुशे दादे-पड़दादे 40 सालन तगर मेरां महान कम्मां हेरनेरे बाद भी,

अवं चनोती देइतां अज़माव।

10 एल्हेरेलेइ अवं तैस वक्तेरे लोकन पुइ करोधे भोव,

ते मीं ज़ोवं, तैना हमेशा मेरो इन्कार केरतन,

ते ज़ैन केरनेरो मीं हुक्म दित्तोरोए तैन केरने करां इन्कार केरतन।

11 एल्हेरेलेइ मीं एपनी सरकी मां कसम खाइ,

कि तैना तैस ठैरी कधे दाखल न भोले ज़ैड़ी अवं तैन आराम देथो।”

12 हे द्लाव ते बेइनव खबरदार राथ, तुसन मरां केन्चेरो दिल एत्रो बुरो ते बेईमान न भोए, कि ज़ै तैस ज़ीते परमेशे करां दूर केरे। 13 पन ज़ांतगर तै दिहाड़ी ज़ैस जो अज़ ज़ोतन, रोज़ एक्की होरि हिम्मत देते राथ, एरू न भोए कि तुसन मरां कोई पापेरे धोखे मां एइतां परमेशेरे लेइ सखत दिल न भोइ गाए। 14 किजोकि अगर असां अपने पेइले विश्वासे पुइ अपने मौती तगर लगातार मजबूत रातम, त अस अकोट्टू कम केरने मां मसीह सेइं साथी ज़ुइतम।

15 ज़ेन्चरे पवित्रशास्त्रे मां लिखोरूए,

“अगर अज़ तुस तैसेरी आवाज़ शुनथ त तुस

अपने दिले सखत न केरा, त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ,

जैखन तैनेई परमेशेरे खलाफ खलाफत की।”

16 तैना लोक कौन थिये, ज़ैनेई परमेशेरी आवाज़ शुन्तां भी तैसेरे खलाफ खलाफत की? तैना सब लोक तैना थिये ज़ैना मूसेरे ज़िरिये मिस्र मुलखे मरां निसोरे थिये। 17 तैना कौन लोक थिये, ज़ैन सेइं परमेशे 40 सालन तगर करोधे राव? तैना लोक तैना थिये, ज़ैनेई पाप कियो ते मेरतां तैन केरि लाशां सुनसान ठैरी मां रेइ जेई। 18 ज़ैखन परमेशे करोधे मां कसम खाइ, कि तैना तैस ठैरी कधे दाखल न भोले ज़ैड़ी अवं तैन आराम देथो, हकीकत मां तै तैन केरे बारे मां ज़ोतो थियो ज़ैनेई हुक्म न थियो मन्नोरो। 19 बस्सा, असन हुनी पतो लगो, कि तैना विश्वास न केरनेरी वजाई सेइं तैड़ी दाखल न भोइ सके।

4

????????????????

1 एल्हेरेलेइ ज़ैखन परमेशेरो ए वादोए कि असां तैस आरामे मां दाखल भोइ सकतम, ते असेई खबरदार राहेरू लोइते, ताके कोस्कोई एरू न भोए, कि तुसन मरां कोई तैस मां दाखल भोने करां एरो रेइ गाए। 2 किजोकि ज़ेन्चरे असेई यीशु मसीहेरी खुशखबरी शुनी, तेन्चरे इसराएली लोकेई भी आरामेरे ठैरी दाखल भोनेरी खुशखबरी शुनोरी थी। पन तैनेई तैस पुइ विश्वास न कियो, एल्हेरेलेइ तै सन्देश तैन केरे लेइ बेफैइदो भोव। 3 पन असेई ज़ैनेई विश्वास कियो, परमेशेरे तैस वादो कियोरे आरामे मां दाखल भोतम, ज़ेन्चरे परमेशे ज़ोरू थियूं,

“मीं अपने करोधे मां कसम खाइ,

कि तैना तैस ठैरी कधे दाखल न भोले ज़ैड़ी अवं तैन आराम देथो।”

परमेशे एन एल्हेरेलेइ नई ज़ोरू, किजोकि हेजू तगर आरामेरी ठार तियार न थी, पन तै ठार दुनिया बनानेरे वक्ते

करां तै तियार आए। 4 किजोकि परमेशे सत्तोवं दिहैइरे बारे मां पवित्रशास्त्रे मां एन्चरे ज़ोरू आए,

“परमेशे अपना सब कम्मां खतम केरतां सत्तोवं दिहाड़े आराम कियो।” 5 ते अस भी इन पढतम कि तैनी बादे मां ज़ोवं,

“एना मेरे आरामेरे ठैरी कधी दाखल न भोले ।”

6 तैना इस्राएलेरे लोक जैनेई पेइली ई खुशखबरी त शुनी, पन आरामेरे ठैरी दाखल भोने मां कामयाब न भोए, किजोकि तैनेई परमेशेरे हुक्म न मन्ने । पन हुन्ना भी किछ् लोकां केरे लेइ आरामेरे ठैरी दाखल भोनेरे लेइ मौको आए । 7 एल्हेरेलेइ परमेशेरे कोई होरो वक्ते अपने आरामेरे ठैरी मां दाखल भोनेरे लेइ ठहरावरो, तै वक्त अज्र आए, इश्शे दादे पड़दादेई खलाफ केरनेरे बड़े सालना बाद परमेशेरे दाऊदरे ज़िरिये ज़ोवं, ज़ेन्चरे तैने ज़ोवं “अगर अज्र तुस तैसेरी आवाज़ शुनथ, त अपनो दिल सखत न केरा ।”

8 अगर यहोशूए तैना लोक आरामे मां दाखल करावरे भोथे त बादे मां परमेशेरे होरि दिहैडेरे बारे मां गल न थी केरनि । 9 एल्हेरेलेइ परमेशेरे लोकां केरे लेइ एरी ठार तियार आए ज़ैडी तैना पूरे तरीके सेइ आराम केरि बटतन । तैना तेन्चरे आराम केरेले ज़ेन्चरे परमेशेरे सत्तोवं दिहाड़े आराम कियोरो थियो । 10 किजोकि ज़ै कोई परमेशेरे आरामे मां दाखल भोते त तै परमेशेरे ज़ेरो अपने कम्मन पूरे केरतां आराम केरते । 11 एल्हेरेलेइ एज्जा अस भी तैस आरामेरी ठैरी मां दाखल भोनेरी कोशिश केरम, ताके कोई भी मैन्हु इस्राएली लोकां केरे ज़ेरो हुक्म न मेन्तां तैस आरामेरी ठैरी दाखल भोने करां रेइ न गाए । 12 किजोकि परमेशेरे वचन ज़ींतू ते शेक्ति बालू आए, ते हर दूई धारण बैली तलवारी करां भी जादे तिख्खू आए । ते तैन प्राण ते आत्माई गहराई तगर च़ीरते, ज़ेन्चरे तिख्खी तलवार जोड़न ते हेडी केरे अन्तरीयो मासे वारां पार च़िरतां निसतीए ते दिलेरे खियाल ते मैनेरो इरादो भी ज़ानते । 13 दुनियारी कोई भी चीज़ परमेशेरेरी नज़री करां छुप्पौरी नई, बल्के तैसेरे सामने सब चीज़ां खुल्ली ते बेदिन, ते असेई तैस, ज़ैन किछ् भी अपने पूरे ज़िन्दगी मां कियोरू तैसेरो हिसाब देनो पेनोए ।



14 बस्सा, एज्जा अस अपने विश्वासे पुड़ मजबूत रहम । किजोकि इश्शो अक महान महायाजके, ज़ै स्वर्गे मां जोरोए, यानी परमेशेरेरू मट्टू यीशु । 15 किजोकि इश्शो महायाजक इश्शी सैरी कमज़ोरी समझते । किजोकि शैताने तै सेब्भी गल्लन मां इश्शो ज़ेरो अज़माव, पन तैनी कोई पाप न कियो । 16 एल्हेरेलेइ एज्जा असां दिलेरी सेइ, अनुग्रह देनेबाले परमेशेरेरे तखतेरे सामने चलम, ताके तै असन पुड़ अनुग्रह ते दया केरे ते ज़रूरतेरू मौके तै इश्शे मद्दत केरे ।

5

1 परमेशेरे हर महायाजक इस्राएली लोकन मरां चुनो, ते परमेशेरे महायाजक, लोकां केरि तरफां अपनि सेवा केराने लेइ ठहराए, ताके तैना लोकां केरे मैफरे लेइ च़ढतल ते पापां केरू बलिदान च़ाढ़न । 2 किजोकि अक याजक एप्पू बेइ गल्लन मां कमज़ोरे, एल्हेरेलेइ तै बेसमझ, ते टेपलोरे लोकन नेरमी सेइ बर्ताव केरि बटते । 3 किजोकि तै एप्पू कमज़ोरे, एल्हेरेलेइ तैस न सिर्फ लोकां केरे पापां केरे लेइ, बल्के अपने पापां केरे लेइ भी बलिदान च़ाढ़नेरि ज़रूरत भोतीए । 4 कोई मैन्हु अपने लेइ महायाजकेरी पदवी अपने आपे सेइ हासिल न केरि सखे, जांतगर तै हारूनेरो ज़ेरो परमेशेरेरी तरफां कुजाव न गाए ।

5 तेन्चरे मसीहे भी महायाजक बेनतां अपनि आदर न की, बल्के परमेशेरे तैस आदर दिती ज़ैखन तैने ज़ोवं, “तू मेरू मट्टू आस, अज्र अवं इन बांदू केरताई तू मेरू मट्टू आस ।”

6 एल्हेरेलेइ परमेशेर फिरी एक्की होरि ठैरी ज़ोते, “तू मेलिकिसिदकेरो *ज़ेरो हमेशारे लेइ याजक आस ।”

7 यीशुए एक्की मैनेरी ज़ेरि ज़िन्दगी गुज़ारनेरे दिहाड़न मां फुकैरी-फुकैरी ते लेरां देइ-देइ परमेशेरे कां प्रार्थना ते बिनती की, ज़ै तैस मौती करां बचेइ सकतो थियो, ते परमेशेरेरे लेइ तैसेरे भेक्तेरे वजाई सेइ परमेशेरे तैसेरी फरयाद शुनी । 8 ते परमेशेरेरू मट्टू भोइतां भी तैनी दुख झैल्लतां हुक्म मन्नो शिखो । 9 ज़ैखन तैनी तैन सब कियूं ज़ैन तैनी कियेरू लोड़तू थियूं, त तै तैन केरे लेइ हमेशारे लेइ मुक्तेरो ज़िरयो बनो, ज़ैना तैसेरे हुक्म मन्तन । 10 ते तैस परमेशेरेरी तरफां मेलिकिसिदकेरी ज़ेरि महायाजकेरी पदवी मैल्ली ।

* 5:6 5:6 मेलिकिसिदक: मेलिकिसिदक अब्राहमेरे वक्ते महायाजक ते हकोमत केनेबालो थियो

????????? ???? ???? ???? ???? ???? ???? ?

11 असन कां इस बारे मां ज़ोनेरे लेइ बडू किछ् आए, पन तुसन समझानू मुश्किले, किजोकि तुस समझाने मां सुसतथ । 12 द्रासले मां अज़ तगर तुस गुरू बनोरे लोडते थिये, किजोकि तुसन विश्वास कियोरे बडू च़िर भोरूए । पन हुन्ना त ज़रूरत इस गल्लरीए कि कोई मैन्हु तुसन परमेशेरे वचनेरी शुरुआतरी गल्लां दुबारां शिखाले । तुस तैन बच्चां केरे ज़ेरेथ ज़ैन हेजू दुद्ध पीतन ते शुरी रोट्टी न खेइ बटन । 13 ज़ै दुद्ध पीते, तै हेजू बच्चो भोते, किजोकि तैस नई पतो सही कुने ते गलत कुने । 14 पन शुरी रोट्टी तैन केरे लेइ भोचे ज़ैना विश्वासे मां बड्डेन, ते अपने तजरवे सेइ इस काबल भोरेन, कि रोडे ते बुरे मां फ़रक सेमझी सखन ।

6

1 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार दोरहानेरे बगैर अस सिधतारे पासे च़लते रहम । ते मौतारे पासे नेनेबाले कम्मन करां मन फिराम ते परमेशेरे पुड़ विश्वास केरनो, 2 बपतिस्मे ते हथ रखनेरी शिक्षारे बारे मां, ते मुडदां केरे ज़ीते भोनेरे बारे, ते हमेशारे इन्साफेरे बारे मां दुबारा गल न केरम । 3 एज्जा अस परिपक्व विश्वासी बनम! अगर परमेशर अज़ाज़त दे त असां इन केरमेले । 4 ज़ैना लोक अपने विश्वास शारतन तैन फिरी मनफिरानेरे पासे केन्चरे आने गान? तैनी एक्की बारे परमेशेरी सच्च़ाई पिशानोरी थी, ते तैन स्वर्गोरां वरदाना मैलोरां थियां ते तैनेई होरेन सेइ साथी पवित्त्र आत्मा हासिल कियोरो थियो । 5 तैनेई मैसूस कियोरू थियूं कि परमेशेरू वचन रोडू आए, ते तैनेई एज्जेबाले ज़मानेरी शक्ति मैसूस कियोरी थी । 6 ते हुनी तैनेई अपनो विश्वासे शारोरो! एल्हेरेलेइ तैन मनफिरानेरे पासे आनू मुश्किले, किजोकि तैना एप्पू परमेशेरे मट्टे फिरी क़रूसे पुड़ च़ाढ़ने लोरेन! ते लोकां केरे सामने तैसेरी बेइज़ी केरने लोरेन । 7 ज़ैन लोकन रोडी शिक्षा मैलोरीए तैना तैस ज़मीनेरे ज़ेरे आन ज़ैस पुड़ झैड़ी लगगती रातीए । अगर ज़मीन रोडीए त ज़िमदाररे लेइ रोडी फसल देचे, ते तैस परमेशेरी तरफां बरकत मैलचे । 8 होरे लोक तैस ज़मीनेरे ज़ेरे आन ज़ैस मां कटे ते झैल्लां लगतन ते तै कोन्ची कम्मेरी नई । ते परमेशर तैस ज़मीनी फिटकार देनेबालोए ते आखरी मां तैस अग्गी मां बरबाद केरेलो ।

9 हे मेरे ट़लारे ट़लाव ते बेइनव, हालांकी असां एरी गल्लां ज़ोतम फिर भी अस विश्वास केरतम कि एन तुश्शे लेइ नई । इश्शो भरोसोए कि तुस रोडी गल्लां केरे लेइ आथ ज़ैना मुक्तररे ज़िरिये एइतिन । 10 किजोकि परमेशर बेइनसाफ नई कि ज़ै तुश्शू कम ते प्यार बिसरी गाए, ज़ै तुसेई तैसेरे लोकां केरि सेवा केरनेरे ज़िरिये तैसेरेलेइ हिरावरोए । ते परमेशर याद केरेलो कि तुस हेजू भी तैन केरि मद्धत केरने लोरेथ । 11 इश्शी इच्छा ई आए कि तुस ज़ांतगर ज़ीतेथ रोडो बर्ताव केरते राथ, इन पक्कू केरनेरे लेइ कि तुश्शी उमीद सच्च़ भोली । 12 तैखन तुस आलसी न बनेले । पन तुस तैन केरे ज़ेरे च़लेले ज़ैना अपने विश्वास ते सबरारे वजाई सेइ परमेशेरे वादां केरे बारस भोले ।

????????? ???? ???? ?

13 ज़ैखन परमेशर अब्राहमे सेइ वादो कियोरो थियो त कसम केरनेरे लेई तैस करां बड्डो कोई न थियो, एल्हेरेलेइ तैनी अपनि ही कसम कमाइतां ज़ोवं, 14 “अवं तीं सच्च़े बरकत देइलो, ते तेरू वंश बेशुमार बेधेइलो ।” 15 एल्हेरेलेइ अब्राहम तैन वादन हासिल केरनेरे लेइ सबरी सेइ इंतज़ार केरतो राव । 16 मैन्हु त एप्पू करां बडां केरे नव्वेरी कसम केरतन ते एन्चरे तैन हर मसलेरो हल कसम केरतां खतम भोते । 17 एल्हेरेलेइ परमेशेरे भी कसम खाइ, एन केरने सेइ तैनी तैन लोकन ज़ैन सेइ वादो कियोरो थियो, इन हिरानू चाऊ कि ज़ै वादो तैनी कियोरोए तै पूरो केरेलो । 18 त इडी दूई गल्लां आन तैसेरो वादो ते तैसेरी कसम, ज़ैना कधे न बेदलोने ते तैन केरे बारे मां परमेशर कधे झूठ न ज़ोए । एल्हेरेलेइ अस ज़ैना तैसेरे सहारे मां ओरेम त ज़ै उमीद असन दित्तोरीए, तैस मां अस बनोरे रहम, ते अस बडे जादे जोशे मां आम । 19 इश्शी उमीद प्राणा केरे लेइ पक्की आए तै टेली न बटे ते ई असन परमेशेरे करां भटकने न दे, बल्के ई असन परमेशेरे मन्दरे मां महा पवित्त्र ठैरी पुज़ातीए । 20 ज़ैडी यीशु इश्शे लेइ मेलिकिसिदक महायाजकेरो ज़ेरो हमेशारो महायाजक बेनतां इश्शे लेइ बत हिराने बालेरो ज़ेरो दाखल भोव ।

7

????????? ???? ???? ?

1 ई मेलिकिसिदक शालेमेरो राज़ो ते परमप्रधान परमेशेरो याजक थियो, ज़ैखन अब्राहम राज़न मैरतां वापस ओरो थियो, त मेलिकिसिदके तैस सेइ मिलतां तैसेरी बडी आदर की ते तैस बरकत दिती । 2 अब्राहमे तैस तैन सेब्भी चीज़ां केरो दशोवं हिस्सो दित्तो ज़ैना तैनी कब़ो केरतां ऐनोरी थी । मेलिकिसिदकेरो नव्वेरो मतलब धार्मिकतारो

राजो आए, ते शालेमेरो मतलब शैन्तरो राजो। 3 तैसेरो न कोई बाजी, न अम्मा, न तैसेरू कोई वंश, न तैसेरी ज़रमनेरे बारे मां न तैसेरे मरनेरे बारे मां लिखोरूए। तै परमेशेरे मट्टेरो ज़ेरोए तै हमेशेरे लेइ याजक बनोरो रहते।

4 पन हुनी इस पुड़ ध्यान देथ मेलिकिसिदक केतरो महान थियो। जैस पूर्वज अब्राहमे कब्जो कियोरी चीजां केरो दशोवं हिस्सो दित्तो। 5 मूसेरे कानूनेरे मुताबिक जैना लेवेरे खानदाने मरां थिये यानी जैना याजक ठहराए गातन, तैन हुक्म दित्तो जोरोए कि तैना इस्राएली लोकन यानी अपने लोकन करां दशोवं हिस्सो नेन, हालांकी तैना भी अब्राहमेरी वंशे मरां आन। 6 पन मेलिकिसिदके जै लेवी केरे वंशे मरां न थियो फिरी भी अब्राहमे करां दशोवं हिस्सो नीयो, ते तैस बरकत दित्ती जैस सेइं परमेशेरे वादो कियो थियो। 7 अस पक्कू ज्ञानतम कि जै बरकत देते तै बरकत मैलने बाले करां महान आए। 8 ते याजक जैना दशोवं हिस्सो नेतन तैना तैन मैन्हु आन जैना मरतन, पन मेलिकिसिदक एन करां भी महान आए, किजोकि पवित्रशास्त्र ज़ोते कि तै ज़ींतो आए। 9 बल्के अस ज़ोई सकतम कि लेवी भी जै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दित्तो। 10 एल्हेरेलेइ कि जैस मौके मेलिकिसिदके लेवेरे पूर्वज अब्राहमे सेइं मुलाकत की, तैस मौके लेवी ज़रमोरो भी न थियो।

???????????????????? ???? ???? ???? ?????

11 इना लेवी याजकेरे आधारे पुड़ कानून इस्राएली लोकन दित्तोरो थियो, अगर लेवी ते याजकेरू कम ठीक थियूं, त अलग किसमेरे याजकेरू बांदू भोनू ज़रूरी न थियूं, जै मेलिकिसिदकेरो ज़ेरो आए। पन हारूनेरो ज़ेरो नई। 12 किजोकि जैखन याजकेरी पदवी बेदलोतीए त कानूनेरू बेदलोनु भी ज़रूरीए। 13 असां इना सैरी गल्लां मसीहेरे बारे मां ज़ोने लोरेम जै होरि गोत्रेरे मरां आए, ते तैस गोत्रे मरां केन्चे बलिदान केरनेरे ठैरी याजकेरी सेवा नई कियोरी। 14 किजोकि इन अस ज्ञानतम, कि इश्शो प्रभु यहूदारे गोत्रेरे मरां थियो। ते मूसा एस गोत्रेरे मरां याजकेरे पेदवरे बारे मां कोई गल नई कियोरी। 15 मेलिकिसिदकेरो ज़ेरो अक होरो भी याजक एजने सेइं इन होरू भी साफ भोते। 16 किजोकि यीशु कानूनेरे हुक्मेरे मुताबिक याजक लोडतो थियो, पन तै नाश न भोनेबैली जिन्दगरे शेक्तेरे ज़िरिये महायाजक बनो। 17 किजोकि तैसेरे बारे मां परमेशर पवित्रशास्त्रे मां ई गवाही देते, “कि तू मेलिकिसिदकेरे ज़ेरो हमेशेरे लेइ याजक आस।”

18 एन्चरे मूसेरो कानून कमज़ोर ते बेफल भोनेरे वजाई सेइं हुनी कम न केरि बटे। 19 (किजोकि मूसेरे कानूने कोई गल्ल्ती सिद्ध न केरि बटी) पन हुनी असन कां अक रोड़ी उमीदे जेसेरे ज़िरिये सेइं असां परमेशेरेरे सामने एज्जी बटतम। 20 ते परमेशेरे भी तैस वक्ते कसम खाइ जैखन तैनी यीशु महायाजक बनाव। 21 किजोकि होरे याजक त बगैर कसमा याजक बनाव, पन जैखन यीशु, परमेशेरेरी तरफां याजक बनाव त तैनी ज़ोवं, “अवं, प्रभु कसम खाताई, कि तू हमेशा याजक रालो ते अवं अपने मने कधी न बेदलेलो।”

22 एल्हेरेलेइ यीशु ज़मानत देते कि पुरानो करार नव्वे करारे करां रोडो भोलो। 23 ते अक फर्के, किजोकि पेइले बड़े याजक बेनतां आए, पन तैना सब मरे ते तैनेई लगातार याजकेरू कम न केरि बट्टु। 24 पन यीशु आखरी तगर रानेबालो याजके ते एल्हेरेलेइ तैसेरी ठैरी होरो कोई याजक न रखो गाए। 25 एल्हेरेलेइ जैना लोक यीशुएरे ज़िरिये सेइं परमेशेरे कां एइतन, यीशु तैन पूरी-पूरी मुक्ति देइ बटते, किजोकि तै तैन केरे लेइ बिनती केरनेरे लेइ हमेशा ज़ींतोए।

26 एल्हेरेलेइ असन एरे ज़ेरो महायाजक ज़रूरी थी, जै इश्शे ज़रूरतन पूरी केरे, जै पवित्र, निष्कपट ते शुद्ध, ते पैपन करां अलग भोए ते जै परमेशेरे स्वर्गे जो नेवरो भोए। 27 ते होरि महायाजक केरू ज़ेरू यीशु ज़रूरी नई, कि पेइले अपने पापां केरे लेइ ते फिरी अपने लोकां केरे पापां केरे लेइ रोज़ बलिदानां चाढ़े, किजोकि यीशुएरे सेब्भी लोकां केरे पापां केरे लेइ एककी बार अपना आप बलिदान केरतां एरू बलिदान चाढ़ू जैन हमेशेरे लेइ आए। 28 किजोकि मूसेरो कानून त तैन मैनन् महायाजक भोनेरे लेइ ठहराते जैना सिद्ध नई, पन मूसेरे कानूनेरे बाद परमेशेरे कसम खेइतां अपनू मट्टू ठहराव ते तैसेरू मट्टू हमेशेरे लेइ सिद्ध महायाजक बनोरोए।

1 जैना गल्लां हुन्ना अस ज़ोने लोरेम तैन मरां सेभना बड्डी गल ई आए कि इशशे एरो महायाजक, जै स्वर्गे मां परमेशेरे महिमा बाले तखतेरे देइने पासे बिशोरोए। 2 ते जै तैस महा पवित्तर ठैरी ते तैस सच्चरे तेम्बु मां सेवा करते, जै केन्चे मैने नई बल्के परमेशेरे खडो कियोरोए। 3 किजोकि हर महायाजक पापां केरे मैफरे लेइ चढतल ते बलिदान चाढनेरे लेइ ठहराव गाते, एल्हेरेलेइ ज़रूरी आए, कि इशशे महायाजके (यीशु) कां भी किछ् चाढनेरे लेइ भोए। 4 ते अगर यीशु दुनियाई मां भोथो त कधे कोई याजक न थियो भोनो, किजोकि इडी मूसेरे कानूनेरे मुताबिक चढतल चाढनेरे लेइ याजक आन। 5 इना याजक जैना कम केरतन, तैना सिर्फ स्वर्गेरे चीजां केरि नकल ते सैयोए, पन जैना चीजां स्वर्गे मां आन। एल्हेरेलेइ जैखन मूसा तेम्बु बनानेरी तियेरी मां थियो, त परमेशेरे तैस हदैइयत दिती, “हेर जै नमूनो मीं तीं पहाडे पुड़ हिरावरो थियो तैसेरे हिसाबे सेइं तू सैरी चीजां बना।” 6 पन हुनी जै महायाजकेरी सेवा यीशु दितीरी तै पुराने याजकेरे सेवाई करां बडी बड्डीए, किजोकि तै जैना गल्लां केरि बिचवाई करते तैना पुराने करारे करां भी उच्ची आन, ते वादन पुड़ तैसेरी बुनियादे। 7 किजोकि अगर पेइले करारे मां कोई खांमी न भोथी त होरो करार केनेरी कोई ज़रूरत न थी भोनी। 8 पन परमेशर लोकन पुड़ दोष लेइतां ज़ोते,

“तक्का प्रभु ज़ोते कि तै दिहाड़ी एज्जी राहोरीए,
इस्राएलेरे लोक ते यहूदारे लोकन सेइं साथी नंवो करार केरेलो।

9 ए तैस करारेरो ज़ेरो न भोलो जै मीं तैन केरे दादे पड़दादन सेइं तैस दिहाड़े कियोरो थियो।

जैखन मीं मिसरे मरां तैन कढनेरे लेइ तैन केरो हथ ठमोरो थियो,
किजोकि प्रभु ज़ोते कि तैना मेरे तैस करारेरे मुताबिक वफादार न राए,
एल्हेरेलेइ मीं भी तैन केरे पासे कोई ध्यान न दित्तू।

10 प्रभु ज़ोते कि जै करार अवं इस्राएलेरे लोकन सेइं तैस मौके केरेलो तै ईए,

कि अवं अपने कानून तैन केरे मन्न मां छुडेलो,
ते तैन केरे दिलन मां लिखेलो,
ते अवं तैन केरो परमेशर भोलो ते तैना मेरे लोक भोले।

11 ते केन्ची ए ज़रूरत न भोली कि अपने पुड़ोसन,
या अपने रिशतेदारन ए शिक्षा दे कि प्रभु पिशाना,
किजोकि निकड़े करां बडडे तगर सब मीं पिशानेले।

12 एल्हेरेलेइ अवं तैन केरे अधर्म माफ़ केरेलो,
ते तैन केरे पापन फिरी कधे याद न केरेलो।”

13 जैखन परमेशेरे नंवो करारे कमाव त पेइलो करारे पुरानो बनाव, ते जै चीज पुरानी ते कमजोर भोती तै जल्दी खतम भोतीए।

9

1 पेइले करारेरे मुताबिक भी परमेशेरी आराधना केनेरे नियम थिये; ते आराधना केनेरे लेइ मैन्हु केरि बनोरी अक ठार थी। 2 यानी अक तेम्बु बनोरो थियो, ते तैसेरे दई हिस्से थिये, पेइले हिस्से मां अक दीवट (दीयो), मेज़ ते चैदोरी रोट्टी रेखोरी भोती थी, तैस हिस्से जो पवित्तर ठार ज़ोते थिये। 3 ते होरि हिस्से मां पड़दे पतोरां तै ठार थी, तैस हिस्से जो परमपवित्तर ठार ज़ोते थिये। 4 एसमां सोन्नेरी तै बलिदान केनेरी ठार थी जैस पुड़ खुशबूदार चीजां बालते थिये, ते च़ेवरे पासन सोन्ने सेइं पलेटोरो करारेरो सुदुख थियो। ते तैस सुदुखे मां मन्ने सेइं भेरतां अक सोन्नेरू भांड थियू, ते कने हारूनेरी तै सोटी थी जैस पुड़ पट्लां लगगोरां थियां ते दई घोड़ां केरि सलेटां थी, जैन पुड़ दश हुक्म लिखोरे थिये। 5 एस सुदुखेरे बेइंये पासे महिमा बाले करूब* बनोरे थिये, जैना परमेशेरी मौजूदगी हिराते थिये। तैना अपने-अपने फंगन सेइं तैस ठैरी सैयो केरि रावरे थिये, जैडी पाप माफ़ कियोरे थिये। पन हुनी इन गल्लन रोड़े च़ारे ज़ोनेरो वक्त नई। 6 एना सब चीजां एस तरीके सेइं तियार केनेरे बाद, याजक तेम्बेरे तैस पेइले हिस्से मां रोज़ गाते, ताके सेवारू कम पूरू केरन। 7 पन परमपवित्तर ठैरी मां सिर्फ महायाजक साले मां सिर्फ एककी बार गाते। ते तै भी खून घिन्तां ताके अपनि ते अपने लोकां केरे पापां केरे लेइ बलिदान चाढे, जैना तैनेई अनजाने मां किये। 8 एस नियम सेइं पवित्तर आत्मा इन हिराते, कि ज़ांतगर पेइलो तेम्बु आए, तांतगर परमपवित्तर

* 9:5 9:5 करूब सोन्नेरे फंगन बाले प्राणी

ठैरी गानेरी बत बंदे।⁹ ते इन सब किछ इस वक्तेरे लेइ अक मसाले, एस सेइं एन बांदू भोते कि जै चढतल ते बलिदान याजक परमेशेरे जो चाढते थिये, तैस सेइं आराधना करनेवालां केरो जमीर रोडेचारे शुद्ध न भोए।¹⁰ तैन केरो तलक सिर्फ खाने पीनेरे चीज ते अलग-अलग शुद्ध भोनेरे रसमन सेइं भोतो थियो। इन सिर्फ जिसमानी रसमां आन, इन तैखन तगर लागू भोतन जांतगर परमेशेरे नव्वों नियाम न बनाए।

???????? ???? ???? ???? ??

¹¹ पन जैखन मसीह इश्शो महायाजक बेनतां अव, त तै रोड़ी चीजां घिन्तां अव जैना हुन्ना मौजूद आन। तै स्वर्गे मांजो परमेशेरे हजुरी मां जेव। ते तै हजुरी एक्की महान ते सिद्ध तेम्बेरो जेरि आए, जै मैन्हु केरे हथ्यां केरे जिरिये सेइं नई बनोरो ते न दुनियारो।¹² जैखन मसीह तैस तेम्बु मामेइं भोइतां पवित्तर ठैरी दाखल भोव, त तैनी थावां ते बछड़ां केरो खून नई, बल्के अपनो खूनेरे जिरिये एक्की फेरे पवित्तर ठैरी दाखल भोव ते असन इश्शे पापन करां हमेशेरे लेइ छुटकारो दित्तो।¹³ किजोकि जैखन थावां ते दांतां केरो खून ते बेछड़ी केरि मांजन अपवित्तर लोकन पुड़ छक्के गाने सेइं तैना लोक जिसमानी तरीके पवित्तर मन्ने गाते थिये,¹⁴ त मसीहे सनातन आत्मारे जिरिये सेइं अपनो आप परमेशेरे कां बगैर पापेरू बलिदान केरतां चाढू, ते तैसेरो खून असन इश्शे जमीरेरे तैन कम्मन करां होरो भी जादे पवित्तर केरेलो, जैन केरो तलक मौती सेइं ए, ताके अस ज़ीते परमेशेरी आराधना केरम।

¹⁵ एहे वजा आए कि परमेशेरे अपने ते दुनिया मझाटे मसीह बिचवाई बनेइतां तैसेरे जिरिये सेइं अक नंब्बो करार बनावरोए, ताके जैना परमेशेरे कुजोरेन तैना हमेशारी बरकत हासिल केरन जेसेरे लेइ परमेशेरे तैना कुजोरेन। किजोकि पेइले दित्तोरे करारेरे अधीन कियोरे पापन करां तैन आज्ञाद केरनेरे बदले मां मसीह मरोए।¹⁶ किजोकि वसीयतरे सिल्ले मां वसीयत देनेबालेरी मौत साबत भोनी जरूरीए।¹⁷ एल्हेरेलेइ वसीयत देनेबालेरे ज़ीते दम्में तगर वसीयत कम्मैरी न भोए, पन तैसेरे मरनेरे बाद तै वसीयत पक्की भोतीए।¹⁸ एहे वजा आए कि पेइलो करार भी खूनेरे बगैर नई कियोरो।¹⁹ एन्चरां जैखन मूसा सैरी लोकन कानूनेरो अक-अक हुक्म शुनाव, त तैनी थावां ते बछड़ां केरो खून पैनी मां मिलाव, ते फिरी लाल उन्ना ते जूफा सेइं एन्तां कानूनेरी किताबी ते सैरी लोकन पुड़ छिड़को।²⁰ ते ज़ोवं कि, “ए तैस करारेरो खून जेसेरो हुक्म परमेशेरे तुश्शे लेइ दित्तोरोए।”²¹ एन्चरे तैनी तेम्बु पुड़ ते आराधना केरनेरी सैरी चीजन पुड़ खून छिड़को।²² किजोकि मूसे कानूनेरे मुताबिक लगभग सैरी चीजां खूने सेइं पवित्तर की गेइचन, ते जांतगर खून न बगाव गाए, तांतगर पाप भी माफ़ न भोन।

???????? ???? ???? ???? ???? ???? ???? ??

²³ त फिरी ए जरूरते कि तैना चीजां जैना स्वर्गेरी नकल आन, तैना जानवरां केरे बलिदाने सेइं शुद्ध की गान। पन स्वर्गेरी चीजन इन करां भी जादे रोडे बलिदाने सेइं शुद्ध भोनेरी जरूरते।²⁴ किजोकि मसीह मैन्हु केरे बनेवरे घरे मां जैन सच्चे पवित्तर ठारारी नकले, दाखल नई भोरो, बल्के स्वर्गे मां दाखल भोव जैड़ी तै इश्शे लेइ परमेशेरे कां हाज़रे।²⁵ यहूदी केरो महायाजक पवित्तर घरे मां हर साल होरि केरो यानी जानवरां केरो खून नेइतां गाते, पन मसीह अपने आपे बार-बार बलिदान केरनेरे लेइ न गाए।²⁶ वरना दुनियारे शुरू करां लेइतां हुन्ना तगर तैस बार-बार दुख झैलनो पेथो; पन हुनी जुगेरे आखरी मां तै बांदो भोवं, ताके अपने बलिदाने सेइं पाप दूर केरे।²⁷ ते जेन्चरे सेइं मैनेरू मरनू ते एक्की बार इन्साफेरू भोनू पक्कुए।²⁸ तेन्चरे सेइं मसीहे भी बडे लोकां केरे पाप सैल्तां गानेरे लेइ एक्की बार बलिदान भोव, ते दुबारां पापां केरू बलिदान देनेरे लेइ नई, बल्के तैन मुक्ति देनेरे लेइ एज्जेलो, जैना तैसेरे इंतजारे मां आन।

10

???????? ???? ???? ??

¹ मूसेरो कानून एजने बैली रोड़ी चीजां केरो सिर्फ अक सैयोए, न कि असली रूपे। एल्हेरेलेइ एक्की किसमेरां बलिदानां जैना हर साल चाढां गातन, तैना परमेशेरे कां एजने बालन कधे भी सिद्ध न केरि सखन।² अगर केरि सखेथां, त कुन तैन केरू चाढनू बंद न भोथू? एल्हेरेलेइ अगर आराधना केरनेबाले एक्की बारे हमेशेरे लेइ पवित्तर भोइ गाथे, त तैन केरो जमीर तैन पापी न बनाथो।³ पन तैना बलिदानां तैन लोकन हर साल याद करातन कि तैना पापिन।⁴ किजोकि मुमकिन नई, कि दांतां केरो ते थावां केरो खून पापे दूर केरि सके।

⁵ एल्हेरेलेइ जैखन मसीह दुनियाई मां ओरो थियो, त तैनी परमेशेरे सेइं ज़ोरू थियूं,

“तीं बलिदान ते चढतल न चाई,
बल्के तीं मेरे लेइ अक जान तियार की।

6 तू न भस्म भोनेबाले बलिदाने सेइं, ते न पापेरे बलिदाने सेइं खुश भोव।”

7 तैखन मसीहे ज़ोवं, “हे परमेश्वर, हेर, अवं तेरी इच्छा पूरी केरनेरे लेइ ओरोई, जेन्चरे मेरे बारे मां पवित्रशास्त्रे मां लिखोरूए।”

8 पेइले त तै ज़ोते, न तीं कोई बलिदान ते न कोई चढतल चाई, ते न भस्म भोनेबालू बलिदान ते न पापेरू बलिदान चाव, ते न तैन सेइं तू खुशी भोव, हालांकी एना बलिदानां मूसेरे कानूनेरे मुताबिक दितां गातन। 9 फिरी तै एन ज़ोते, “हेर, अवं तेरी मर्जी पूरी केरनेरे लेइ ओरोई,” एन्चरे तै पेइले सारे बलिदान्न हटाते ताके तैन केरे ठैरी मसीहेरे बलिदाने रखवे। 10 परमेश्वरेरी मर्जी ई थी, कि यीशु मसीहेरे जिसम एक्की बार बलिदान भोने सेइं अस हमेशारे लेइ पवित्र भोम।

11 पेइले करारेरे मुताबिक हर याजक बलिदान केरनेरे ठैरी खड़े भोइतां रोज़ सेवा केरतन, ते एक्की किसमेरां बलिदानां बार-बार चढतन, ज़ैना पापे कधी भी दूर न केरि सखन। 12 पन मसीह ज़ै इश्शो महायाजके, इश्शो पापां केरे लेइ एक्की बार बलिदान भोइतां परमेश्वरेरे देइने पासे गेइतां बिश्शी जेव। 13 तैड़ी तै तैस वक्तोरो इंतज़ार केरने लोरोए, कि परमेश्वर तैसेरे दुश्मन पूरे तरीके सेइं हाराए। 14 तैनी एक्की बलिदाने सेइं ज़ैना लोक पवित्र कियोरेन, तैना हमेशारे लेइ सिद्ध कियोरेन।

15 पवित्र आत्मा भी एस गल्लरी गवाही देते। पेइलू त एन ज़ोते कि

16 “प्रभु ज़ोते, कि ज़ै करार अवं
तैन दिहैइना बाद अपने लोकन सेइं केरेलो तै ईए,
अवं अपने कानून तैन केरे मन्न मां छुडेलो
ते तैन केरे दिलन मां लिखेलो।”

17 ते फिरी एन भी ज़ोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।”

18 बस्सा, ज़ैखन तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नईं।

?????????? ?????? ?????

19 एल्हेरेलेइ द्लाव ते बेइनव, असन यीशुएरे खूनेरे ज़िरिये सेइं मन्देरेरे परमपवित्र ठारी मां दाखल भोनेरी दिलेरी भोरीए। 20 यीशुए इश्शे लेइ अक नर्वीं ते ज़िन्दगी देनेबाली बत खोलरोरीए, ज़ै तैनी पड़दे मां यानी अपने जिसमे मां मौतरे ज़िरिये इश्शे लेइ बनाई। 21 ते एल्हेरेलेइ इश्शो एत्रो महान याजक ज़ै परमेश्वरेरे घेरो मुखतियारे। 22 त एज्जा अस सच्चे दिले सेइं ते पूरे विश्वासे सेइं, ते एरो ज़मीर ज़ै खूनेरे तेप्पेइं सेइं पापेरे एसासे करां पवित्र कियोरे, ते एरो जिसम नेइतां ज़ै साफ पैनी सेइं धोवरोए, परमेश्वरे कां नेम। 23 ते अस एपनी उमीदरो इकरार रोडेचारे टलेइतां रखम, किजोकि ज़ैनी असन सेइं वादो कियोरोए तै सच्चोए। 24 ते असेईं इस गल्लारू ध्यान लोडे रखोरू कि अस केन्चरे प्यार ते रोइं कम्मां केरे लेइ एक्की होरेरी हिम्मत बधाम। 25 ते एक्की ठैरी अकोट्टू भोनू न शारम, जेन्चरे होरे लोक केरतन बल्के अस एक्की होरि हिम्मत देथ, तुस ज़ैस हिसाबे सेइं परमेश्वरे दुबारे एजनेरी दिहैड़ी नेइंते लातथ तैस्से हिसाबे सेइं जादे एन गल्लन पुड़ चलते भी राथ।

26 किजोकि अगर अस सच्च पिशानेरां बाद, ज़ैनी बुझतां पाप केरम त पापां केरे लेइ कोई बलिदान बाकी नईं रावरू। 27 हाँ, परमेश्वरेरे इन्साफ ते भयानक अग ज़ै परमेश्वरेरे दुश्मन्न भस्म केरेली तै बाकी आए। 28 ज़ैखन मूसेरे कानून न मन्नेबाले, दूई या टलाई मैन्हु केरे गवाही देने सेइं तैस मैन्हु बगैर दया केरतां मौतरी सज़ा दिती गातीए। 29 त तै मैन्हु केतरी सज़ारो लैईक भोलो, ज़ैनी परमेश्वरेरे मट्टू पावन हैठ दलेन्चू, ते करारेरो खून ज़ैस सेइं तै पवित्र ठहरावरो थियो, तै अपवित्र समझो। ते पवित्र आत्मारी बेइजती की, जेसेरे ज़िरिये असन अनुग्रह मैलते। 30 किजोकि अस जानतम, तैनी ज़ोरू थियूं, “बदलो घिन्नो मेरू कम्मे, अवं एप्पू बदलो देइलो।” ते फिरी तैनी एन भी ज़ोवं, “प्रभु अपने लोकां केरि इन्साफ केरेलो।” 31 ज़ीते परमेश्वरेरे हथ्यन मां गानू बड़ी खतरनाक गल्ले।

32 पन तैना पेइले दिहाड़े याद केरा, ज़ैखन तुसन मसीह पिशानेरी लौ मैल्ली, ते तैसेरे बाद तुसेईं बेइं मुशकलातां केरो दैटतां मुकाबलोइ कियो। 33 यानी कधे त तुस लोकां केरे तुहीन केरने सेइं ते मुसीबती सेइं तुस तमाशो बने, ते कधी तुसेईं होरे मुसीबत बरदाशत केरते लाए ते तुसेईं तैन केरू साथ दित्तू। 34 किजोकि तुसेईं कैदन सेइं हमदरदी

की, ते अपनो माल भी लुट्टानो खुशी सेइं कबूल कियो। किजोकि तुस जानते थिये कि अक बड़ी बड़ी खास मलकियत तुसन कां आए जै हमेशारे लेईं आए। ³⁵ एल्हेरेलेइ तुस हिम्मत न हरा, किजोकि तैसेरो फल बड़ो बड़ोए। ³⁶ तुसेईं बेड़ि सबरी सेइं कम कियेरू लोडते, ताके तुस परमेशेरी मर्जी पूरी केरतां तै चीज हासिल केरि सखथ जेसेरो तैनी वादो कियोरोए। ³⁷ किजोकि जेन्चरे पवित्रशास्त्रे मां लिखेरू आए,

“हुनी थोडु चिर बाकी आए,

कि एजनेबालो एज्जेलो ते चिर न लाएलो।

³⁸ पन मेरे धर्मी लोक मीं पुड़ विश्वासे रखने सेइं जीते राले,

अगर तैना मीं पुड़ विश्वास केरने करां पत्रोवं हटन त मेरो दिल तैन पुड़ खुश न भोलो।”

³⁹ पन अस हटने बाले नईं, कि परमेशेरे पुड़ विश्वास केरने करां पत्रोवं हटम ते नाश भोम, बल्के अस विश्वास केरनेबाले आम, ताके इश्शे प्राण बचाए गान।

11

????????????????

¹ हुनी विश्वास उमीद कियोरी चीजां केरू याकीन, ते अलैई चीजां केरू सबूते। ² इश्शे दादे पड़दादन भी एरो विश्वास थियो। एल्हेरेलेइ परमेशर तैन पुड़ खुश भोव। ³ विश्वासे सेइं असन पतो लगते कि दुनियारी हर चीज परमेशेरे वचने सेइं बनोरीए। एल्हेरेलेइ जैन किछु अस लहतम, तैन लेइहोने बैली चीजन सेइं नईं बनोरोए।

⁴ विश्वासे सेइं आदमेरे मट्टे हाबिले अपने बड़डे दला कैने केरां रोडू बलिदान परमेशेरे लेइ च़ादू। जेसेरी वजाई सेइं परमेशेरे तैसेरू बलिदान कबूल कियू, ते तैसेरे बारे मां गवाही दिती, कि हाबिल धर्मी मैन्हु आए। हालांकी हाबिल मेरि जोरोए, फिरी भी अस तैसेरे विश्वासेरे जिरिये परमेशेरे पुड़ भरोसो केरनो शिखतम। ⁵ विश्वासे सेइं हनोक नव्वेरो मैन्हु मौती करां पेइलो जीतो स्वर्गे जो नीयो, ते तैसेरो पतो न च़लो, किजोकि परमेशेरे तै स्वर्गे जो नीयोरो थियो, तैसेरे उबरे गाने करां पेइले तैसेरे हके मां गवाही दिती थी, कि तैनी परमेशर खुश कियो। ⁶ किजोकि विश्वासेरे बगैर परमेशर खुश केरनो नामुमकिने, बस्सा रोडू एने कि परमेशेरे कां एजने बालन विश्वास कियोरो लोडे कि परमेशर आए, परमेशर तैन जैना तैस सच़्चैई सेइं तोपतन फल देते। ⁷ विश्वासे सेइं नूहे तैन गल्लां केरे बारे मां जैना एजनेबाले वक्ते मां भोनी बैली थी, परमेशेरे तरफां हुकम मैलतां परमेशेरे प्यारे सेइं तैस पुड़ अमल कियू, ते अक किशती बनाई जैस मां तैसेरू सारू टब्बर बचू, एन केरने सेइं तैनी सारी दुनिया मुर्जम बनाई ते एप्पू तैस धार्मिकतारो बारस बनो जै विश्वासे सेइं हासिल भोचे।

⁸ विश्वासे सेइं जैखन परमेशेरे अब्राहम, जैस जगाई गाने जो परमेशेरे तै कुजोरो थियो, त तै हुकम मेन्तां तैस जगाई च़लो जेव, जै जगाई बादे मां परमेशर तैस विरासतरो ज़ेरो देनेबालो थियो। हालांकी तै एन भी न थियो जानतो कि अवं कोरां च़लोरोई, फिरी भी च़लो जेव। ⁹ विश्वासेरे जिरिये सेइं तै परमेशेरे कियोरे वादेरे मुताबिक तैस मुलखे मां परदेशी केरो ज़ेरो तेम्बन मां गेइतां बस्सो। ते तैस सेइं साथी तैसेरू मट्टू इसहाक ते तैसेरू पोद्लडू याकूब भी राए, तैन भी परमेशेरे करां तैए वादो मैलो ते तैना भी तेम्बन राए। ¹⁰ किजोकि अब्राहम तैस नगरेरे इंतज़ारे मां थियो (जैन स्वर्गे मांए) जेसेरी मुनीयाद सदारे लेइ आए, जेसेरो तियार केरनेबालो ते बनानेबालो परमेशेरे। ¹¹ विश्वासे सेइं सारा दोजींती भोनेरी ताकत हासिल की, हालांकी तै उमरारे हिसाबे सेइं बच्चो जानेरे काबल न थी राहोरी, सारा एन याकीन थियू कि वादो केरनेबालो परमेशर अपनो वादो पूरो केरेलो। ¹² जेइस अब्राहम बड़ो बुडडो थियो ते बच्चे पैदा केरनेरे काबल न थियो, अम्बरेरे तारां केरे ते समुदरेरी रेतारे बराबर एतूरू हच्छु वंश पैदा भोव।

¹³ एन सेब्मी लोकेई परमेशेरे पुड़ भरोसो कियो ते मेरि जे, ते तैन तै कोई चीज न मैल्ली जेसेरो वादो परमेशेरे कियोरो थियो, तैनेईं समझू कि परमेशर एन एजनेबाले वक्ते मां केरेलो, ते तैना इन भी समझते थिये, कि तैना ज़मीनी पुड़ परदेशी ते मुसाफर आन। ¹⁴ जैना एरी गल्लां ज़ोतन तैन सेइं एन साबत भोते, कि तैना अज़ तगर अपने मुलखेरी तलाशी मां आन। ¹⁵ अगर तैना तैस मुलखेरो खियाल रखते भोथे जैस मरां तैना ओरे थिये, त तैना वापस गेइ बटते थिये। ¹⁶ पन असलीती मां तैना एक्की रोडे स्वर्गेरे मुलखेरे उमीदी मां थिये, एल्हेरेलेइ परमेशर तैन केरो परमेशर जुवाने सेइं खुश भोव, एल्हेरेलेइ तैनी तैन केरे लेइ अक नगर तियार कियोरोए।

17 विश्वासे सेइं अब्राहमे अपने इम्तिहानेरे मौके अपने मट्ठे इसहाकेरू बलिदान देने करां न टलो, जैन तैस परमेशेरे वादे कबूल करने बढ मैलोरो थियूं, तैस्से अकैल्ले मट्ठे बलिदान करने जो तियार भोइ जेव। 18 हालांकी परमेशेरे तैस सेइं ज़ोरू थियूं, “कि इसहाकेरे वंशे सेइं तेरे वंशेरू नवं रालू।” 19 किजोकि अब्राहमे याकीन थियूं, कि परमेशेरे कां मुड़दन जीते करनेरी शक्ति आए, एल्हेरेलेइ लेइ ज़ेन्चरे परमेशेरे इसहाक मुड़दन मरां फिरी वापस आनो। 20 विश्वासे सेइं इसहाके अपने दुइये मट्ठन याकूबे ते एसावे आशिर्वाद दित्तो, कि एजनेबाले वक्ते मां तैना वादे पूरे भोले। 21 विश्वासे सेइं याकूबे मरते वक्ते यूसुफेरे दुइये मट्ठन बरकत दित्ती ते अपने सोटरे सहारे सेइं परमेशेरेरी आराधना की। 22 विश्वासे सेइं यूसुफे मरते बार पूरे याकीन सेइं ज़ोरू थियूं, इस्राएली लोक मिस्र मुलख शारेले। ते तैन हुक्म दित्तोरो थियो कि जेइस तैना मिस्र मुलखे मरां निलेले त तैना तैसेरी हेइडी साथी नेन।

23 विश्वासे सेइं मूसेरे हाज बव्वेई तैसेरे जरमनेरां पत्ती ट्लाई महीन्न तगर छुपेइतां रख्वो, किजोकि तैनेई हेरू कि तै बच्चो खासे, ते तैना राजेरो हुक्म टलोइने करां न डरे। 24 विश्वासे सेइं मूसा बड्डे भोइतां फिरौनेरे कुइयरू मट्ठू* बन्ने करां इन्कार कमाव। 25 पापेरे थोड़े दिहाड़े आनन्देरी ज़िन्दगी गुज़ारनेरे बजाहे तैनी परमेशेरे लोकन सेइं साथी मिलतां दुख झैलनो चुनो। 26 तैनी मसीहेरे लेइ दुख झैलनो मिस्रेरे खज़ानन करां जादे दौलत समझी, किजोकि तै ज्ञानतो थियो कि तैस स्वर्गे मां इनाम मैलनूए। 27 विश्वासे सेइं तैनी राजेरे सरकरो डर न कियो, बल्के मिस्र मुलख छैडी दित्तो, एल्हेरेलेइ तैनी समझोरू थियूं जेन्चरे तैनी न लेइहोने बाले परमेशेरे लाहू। 28 विश्वासे सेइं मूसे इस्राएली लोकन हुक्म दित्तो कि तैना फ़सह तिहारेरी दिहाड़ी बनानी ते गबडेरो खून दारन छिड़कन, ताके मौतरो स्वर्गदूत ज़ै परमेशेरेरी तरफां भेजोरोए इस्राएलेरे पेइले मट्ठन न मैरी बटे। 29 विश्वासे सेइं इस्राएली लोक लाल समुन्द्रे मांमैइं एन्चरे लंघे जेन्चरे शुक्कोरी ज़मीनी पुड़मेइं पार निस्से, पन ज़ैखन मिस्रेइं तैट्टां पार लंघनेरी कोशिश की ते तैना डुबतां मेरि जे। 30 किजोकि इस्राएली लोकेई परमेशेरे पुड़ विश्वास कियो, ते सत दिहैइन तगर यरीहो नगरेरे चक्कर लाए (जेन्चरे परमेशेरे ज़ोरू थियूं) ते दिवार डुल्ली। 31 विश्वासे सेइं राहाब वेश्या परमेशेरे हुक्म न मन्ने बालन साथी नाश न भोइ; एल्हेरेलेइ कि तैसां इस्राएली जासूस शैन्ति सेइं अपने घरे मां आने ज़ैना छेपतां यरूहो नगरे हेरने ओरे थिये।

32 हुनी होरू किछ ज़ोनेरी ज़रूरत नई। हुनी मीं कां वक्त नई कि एरे ज़ेरे लोकां केरे बारे मां ज़ोई, जेन्चरे गिदोन, बाराक, शिमशोन, यिफतह, दाऊद, ते शमूएल ते होरे नबी। 33 तैनेई विश्वासे सेइं राजज़ां जीतां, ते धार्मिकतारां कम्मां कियां ते वादो कियोरी चीज़ां हासिल की, ते शेरेई तैना न खाए। 34 अग्गां तैना न फुके, ते तलवारी सेइं तैना न मारे जे, ज़ैखन तैना कमज़ोर थिये तैखन तैन ताकतबर बनाए, ते जंगी मां भी बहादर निस्से, ते तैनेई दुश्मना केरि फौज निशानी।

35 विश्वासे सेइं किछ कुआन्शन अपने मुओरे लोक जीतो मैल्ले, किछ मार खांते-खांते मेरि जे। ते तैनेई अपने विश्वास शारनो न चाव, तैसेरे बदले मां तैनेई कैद रानू मन्ज़ूर कियूं, एल्हेरेलेइ तैना मरनेरां बाद फिरी जीते भोन, ते तैन रोड़ी ज़िन्दगी मैल्ले। 36 किछ लोकां केरो मज़ाक बनाव जेव, किछ लोकन कोड़े बाए, ते किछ शंगलन सेइं बंधे ते कैदखाने मां छुडे। 37 ते किछन घोड़ेई बेई; ते आरे सेइं च़िरे, ते तलवारी सेइं मारे जे। तैना गरीब थिये, तैन दुःख दित्तो जेव ते तैन सेइं बुरो बर्ताव कियो जेव। तैना भैड्डां छैल्ली केरि खाड़ी लेइतां इरां उरां नशशते थिये। 38 तैना जंगलन ते पहाइन ते कुढन मां ते धेरतरे खडन मांमैइं हंठते थिये।

39 इन बुरू संसार तैन विश्वासी लोकां केरे काबल न थियूं, तैन सेब्मी केरे विश्वासेरे वजाई सेइं परमेशेरे तैन पुड़ खुश भोव, पन तैन, तैन मैल्लू ज़ेसेरो वादो परमेशेरे कियोरो थियो। 40 किजोकि परमेशेरे कां न सिर्फ तैन केरे लेइ बल्के इशे लेइ रोड़ी योजनाए। परमेशेरे तैन शुद्ध बनानो चाते, पन सिर्फ असन सेइं साथी।

12

???? ???? ?????? ??????

1 एल्हेरेलेइ ज़ैखन गवाहां केरे एत्रो बड्डो घाने असां घेरोरेम, त अस भी सैरी रकावटां ते तैस पापे दूर केरम ज़ै असन उलझाते, ते तैस दौड़ी ज़ै असेई दौवइनीए बल्हे सेइं दौवइम। 2 एज्जा अस विश्वासे मां पवित्तर केरनेबाले

* 11:24 11:24 फिरौनेरे कुइयरू मट्ठू: किजोकि फिरौन राजेरे कुइयां मूसो पालोरो थियो तांए तैस जो फिरौनेरे कुइयरू मट्ठू ज़ोते थिये।

यीशु पुड़ नजर रखम, जैनी तैस खुशारे लेइ जै तैसेरी नजरी मां थियो, बेइजतरी परवाह न की, बल्के कुरूसेरो दुख झैल्लो ते परमेशरेरे तखतेरे देइने पासे गेइतां बिशुओ।

3 तुस एस गल्ली पुड़ खियाल केरा, कि अपने खलाफत केरनेबाले जैनी पैपी केरि तरफां केतरो दुख झैलो, ताके बेदिल भोइतां हिम्मत न हैरी। 4 तुसेई पापे सेइ लड़ते-लड़ते हेजू तगर एत्रो मुकाबलो नई कियोरो कि तुसेई अपनो खून बगावरो भोए। 5 ते तुसेई तैन समझानू बिसरी छड़इ, कि जैस मां तुसन जो मट्ठां ज़ोवं, “कि हे मेरे बच्चव परमेशरेरे हुक्मे एरे न समझा।

ते जैखन प्रभु तीं झिड़के त शारनेरे जेरे मैसूस न केर।

6 किजोकि जैस सेइ परमेशर प्यार केरते तैस झिड़ते भी, ते जैस तै अपनू मट्ठू बनाते तैस सोटेई भी बाते।”

7 ए हदैइत तुशुओ समझनेरे लेइए, एस बल्हे सेइ बरदाशत केरा, परमेशर तुसन अपना मट्ठां सेमझतां बर्ताव केरते, किजोकि तैन कौन जेरू मट्ठूए जैस तैसेरो बाजी समझाए नन्ना? 8 पन अगर तुसन सुधारे न गाथ जैस शामिल त तुस न गैर औलाद भोनेथ न की अपना मट्ठां। 9 एसेरे अलावा जैखन इशुओ जिसमानी बाजी सुधारते रहते थिये ते अस तैन केरि इज्जत केरते राए, त कुन आत्मां केरो बाजी यानी परमेशेरी जादे इज्जत न केरम ताके जीते राम। 10 इशुओ जिसमानी बाजी त थोड़े दिहाड़ां केरे लेइ अपनी समझरे मुताबिक असन सुधारते रहते थिये, पन परमेशर इशुओ फैइदेरे लेइ असन सुधारते ताके असां तैसेरी पवित्रतैई मां शामिल भोम। 11 एसमां शक नई कि जैखन केन्ची हदैइत की गाचे त तै खुशी नई, बल्के बडू बुरू बुझते, पन जैखन तै बले-बले पक्को भोइ गाते त तैस बादे मां धर्मी बेनतां चेंनरो फल मैलते।

?????? ? ? ? ? ? ? ? ?

12 बस्सा अपनी कमजोर पैखड़न ते कमजोर जैन्धु मजबूत केरा। 13 ते अपने पावन सिधी बत्तां चलाथ ताके टोंटे टेपलोए न ते तैना बेझोन।

14 सेबन सेइ मेल मिलापे सेइ राथ, ते तै पवित्रताई हासिल केरनेरी हर वक्त कोशिश केरा जेसेरे बगैर कोई प्रभु न लेई सके। 15 खबरदार एरू न भोए कि कोई मैन्हु परमेशेरे अनुग्रह करां रेइ गाए, एरू न भोए कि कोई ट्लिटू ज़ील लगगे ते तुसन परेशान केरे ते होरे लोक भी भिटे भोइ गान। 16 ते न कोई मैन्हु तुसन मां बदमाशी केरनेबालो भोए, या एसावेरो जेरो अधर्मी न बने, जैनी एक्की बार रोटी खानेरे लेइ अपने बड्डे भोनेरू हक बेचतां छड़इ। 17 किजोकि तुस जानतथ कि बादे मां जैखन तैनी तै बरकत हासिल केरनेरी कोशिश की, त तैस न मैल्ली, तैस अपनि नियत बदलनेरो मौको न मैलो हालांकी तै लेरां देइ-देइ तैस तोपनेरी कोशिश केरतो राव।

18 तुस तैस पहाड़े कां नेड़े नई ओरे, जैस सेइ तुस हुरी सकते थिए, तैन पहाड़ अग्गी सेइ फुकोतू थियूं ते अंधगुबारी ते बड्डे तूफान थियो। 19 तैड़ी नइशिंगेरी शोर ते जोने शुनाने बालेरी एरी आवाज़ शुनोती थी, कि जैखन लोकेई तै आवाज़ शुनी त मिनत केरने लगे, कि असन सेइ होरि गल्लां न केर। 20 एल्हेरेलेइ कि तैनेई तै हुक्म बरदाशत न केरि बटो, “अगर कोई जानवर भी एस पहाड़े सेइ हुरेलो त तै घोड़ेई बैइतां मारो गालो।” 21 तै नज़ारो एत्रो खतरनाक थियो कि मूसे ज़ोवं, “अवं डरने ते थरकने लोरोई।”

22 बल्के तुस सिय्योनेरे पहाड़े ते जीते परमेशेरे नगर यानी स्वर्गेरि यरूशलेमे मां लखेइं स्वर्गदूतन कां खुशी मनाने ओरेथ। 23 ते तुस परमेशेरी पेइले बच्चां केरि सभाई मां ते कलीसियाई मां ओरेथ, एना तैना लोकन जैन केरां नच्चां स्वर्गे मां लिखोरेन, तुस इन्साफ केरनेबाले परमेशेरे कां ओरेथ, ते धेरमी केरि आत्मन कां ओरेथ, यानी तैन कां जैना सिद्ध कियोरेन। 24 तुस नच्चे करारे बिचवाई केरनेबाले यीशु ते तैसेरे छिड़कोरे खूने कां ओरेथ, जै हाबिलेरे खूने करां रोड़ी गल्लां ज़ोते।

25 खबरदार राथ, तुस परमेशर जै तुसन सेइ गल्लां केरते तैसेरो इन्कार न केरथ, किजोकि जैनेई ज़मीनी पुड़ हदैइत केरनेबालेरो इन्कार कियो त तैना न बच्चे, त अगर अस स्वर्गे हदैइत केरनेबालेरो इन्कार केरमेले त केन्चरे बच्चमेले? 26 तैखन तैसेरी आवाज़ी सेइ धरती हिली जेई पन तैनी ई वादो कियोरोए कि, “एक्की फेरे फिरी अवं सिर्फ ज़मीन नई बल्के अम्बरे भी हिलेइलो।” 27 तैसेरू “एक्की फेरे फिरी” जोने सेइ साफ पतो लगते की पैदा कियोरी चीज़ां जैना हिलचन तैना खतम भोनिन ताके जैना हिलन नन्ना तैना रैनिन। 28 जैड़ी असन तैन राज़ मैलने लोरूए जैन हिलनेरू नई त एज्जा अस तैसेरू शुक्र केरम ते हिम्मत केरम कि, अस परमेशेरी आराधना परमेशेरे डरे सेइ केरि बटम जैस सेइ तै खुश भोए। 29 किजोकि इशुओ परमेशर भस्म केरनेबैली अगारो जेरोए।

याकूब

११११११११

1 अवं याकूब, जै परमेशर ते प्रभु यीशु मसीहेरे दास आई। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताई।

११११११११ ११ ११११११११११

2 हे मेरे ढलाव ते बेइनव, जैखन तुसन पुड़ अलग-अलग किसमां केरि अजमैइशां एज्जन, त एस खुशारी गल समझा, 3 किजोकि तुस ज्ञानतथ, तुशे विश्वासेरे परखे गाने सेइं इन साबत भोते, कि तुस हेजू तगर भी परमेशरे पुड़ भरोसो रखतथ, ते तुस मुशकलन सबरी सेइं झल्लेले। 4 पन मुशकलन मां सबर केरनि शिख्वा, कि तुस आत्मिकता मां मजबूत ते सिद्ध भोते गाथ, ते तुसन मां कोन्ची रोड़ी गल्लरी घटी न भोए।

5 पन अगर तुसन मरां कोन्ची अक्लारी घटी भोए, त तै परमेशरे करां मग्गे, जै बगैर दोष लेइतां सेब्बन खुशी सेइं देते, त मगने बाले दिती गाली। 6 पन विश्वासे सेइं मग्गे, ते शक न केरे। किजोकि शक केरनेबालो समुन्द्रेरी छेल्ली केरो जेरोए, जैना हवाई सेइं चेलतिन ते उछड़तिन। 7 एरो मैन्हु इन न समझे, कि मीं प्रभु करां किछ मैलेलू। 8 ई मैन्हु दूमन्नोए ते एपनी सैरी गल्लन मां चंचल आए।

११११११ ११ ११११११

9 गरीब विश्वासी ढला खुश भोए, किजोकि परमेशरे तैसेरी आदर कियोरीए। 10 ते धनी विश्वासी अपने घटिया हालती पुड़ खुश भोए, किजोकि घासेरे फूड़ोवेंरो जेरो मिटी गातो। 11 दिहाड़ो निसते बड़ी धुप पेतीए, ते घासे शुकाते, ते तैसेरू फूड़ोव झैड़ी गाते, ते तैसेरी शोभा गाती रहतीए; तेन्चरे दौलतमन्द ढला भी अपने कम्मन मां मेरी गानेन।

११११ ११ ११११११

12 धने तै मैन्हु, जै अजमैइशी मां मजबूत रहते; किजोकि तै अपनो विश्वास साबत केरतां जिन्दगरू तैन इनाम हासिल केरेलो, जेसेरो वादो प्रभुए तैन सेइं कियोरोए, जैना तैस सेइं प्यार केरतन। 13 जैखन कोन्चेरी अजमैइश भोए, त तै इन न ज़ोए, कि मेरी अजमैइश परमेशरेरी तरफां भोतीए। न बुरी गल्लन सेइं परमेशरेरी अजमैइश भोइ बटतीए, ते न तै बुरी गल्लन सेइं केन्चेरी अजमैइश केरते। 14 पन हर कोई अपने खुवैइशन मां खिचोइतां, ते फेसतां अजमैइशी मां गाते। 15 ते फिरी बुरू केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सज़ा मैलतीए। 16 हे मेरे टलारे ढलाव ते बेइनव, धोखो न खाथ। 17 किजोकि हर रोड़ वरदान, ते हर रोड़ दान इशे बाजी परमेशरेरे तरफां आए, जैनी सैरी लोआं (यानी दिहाड़ी चाँदनी, तारे) बनेइं। परमेशर हमेशा अक्कां जेरो आए, तै छावरो जेरो न बेदलो। 18 तैने अपने मेर्जी सेइं असन सच्चेरे वचने जिरिये सेइं नव्वीं जिन्दगी दिती, ताके अस तैसेरी सचनआई मरां फसलारे जेरे पेइले फल भोम।

१११११११ ११ ११ ११११११

19 मेरे टलारे ढलाव ते बेइनव, ई गल तुस ज्ञानतथ, एल्हेरेलेइ हर कोई मैन्हु शुन्नेरे लेइ हुशार ते ज़ोने मां पत्रोवं भोए, ते सरकी मां ढिल्लो भोए। 20 किजोकि जैखन मैन्हु सरकी मां भोए त तै धार्मिकतारू कम न केरि बटे जैस सेइं परमेशर खुश भोए। 21 एल्हेरेलेइ सारी गंदगी ते दुष्ट दूर केरतां, तैन परमेशरेरू वचन नेरमी सेइं कबूल केरे, जैन दिले मां छड़डू जेव, जैन तुशे प्राणन मुक्ति देइ बटते। 22 पन परमेशरेरे वचने पुड़ चलनेबाला बना, ते सिर्फ शुन्ने बाले नई, जैना अपने आपे धोखो देतन। 23 किजोकि जै परमेशरेरू वचन शुन्ने बालो भोए, ते तैस पुड़ चलने बालो न भोए, त तै तैस मैनेरो जेरोए, जै अपनू तुतर शीशे मां हेरते। 24 ते तै अपनो आप हेरतां चलो गाते, ते तैखने बिसरते कि अवं केरो थियो। 25 पन जै मैन्हु कानूने ध्यान सेइं पढ़ते, जै पूरे तरीके सेइं असन आज्ञादी देते, सिर्फ शुने न पन तेन्चरे कम केरते, तै अपने कम्मे मां बरकत हासिल केरेलो। 26 अगर कोई अपनो आप भक्त समझे, ते अपनि जिभी कैबू मां न रखे, तै अपने आपे धोखो देते, ते तैसेरी भक्ति बेफैइदी आए। 27 इशे बाजी परमेशरेरे नेडे शुद्ध ते रोड़ी भक्ति ई आए, कि बे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावेरे अस्सरे करां दूर रखम।

2

?????????? ???? ?????

1 हे मेरे ढ्लाव ते बेइनव, इशशो महिमा बालो प्रभु यीशु मसीहेरो विश्वास तुसन मां तरफदैरी सेइं न भोए ।
 2 अगर अक मैन्हु सोन्नेरे छल्ले ते रोड़ां लिगड़ां लेइतां तुशशे झुण्डे मां एज्जे ते अक गरीब भी मेलां लिगड़ां लेइतां एज्जे । 3 ते तुस तैस रोड़े लिगड़न बालेरू तुतर हेरतां ज़ोथ, “तू इड़ी रोड़ी ठैरी बिश,” ते तैस गरीबे सेइं ज़ोथ, “कि तू इड़ी खड़ो रा, या इड़ी तल्ले बिश ।” 4 त कुन तुसेईं भेद भाव न कियो, ते बुरे खियाले सेइं इन्साफ करनेबाले न भोए? 5 हे मेरे ट्लारे ढ्लाव ते बेइनव शुना, कुन परमेशरे दुनियारे गरीब न चुने, कि विश्वासे मां धनी भोन, ते तैस राज्जेरे बारस भोन, ज़ेसेरो वादो तैने तैन सेइं कियोरोए ज़ैना तैस सेइं प्यार केरतन । 6 पन तुसेईं तैस गरीबेरी बेइज्जती की, कुन धनी लोक तुसन पुड़ ज़ुलम न केरन? ते कुन तैना तुसन आदालतन मां घसीटी-घसीटी न नेन? 7 कुन तैना तैस रोड़े नंवेरी तुहीन न केरन ज़ेसेरे तुसन ज़ो ज़ोतन? 8 फिरी भी तुस पवित्रशास्त्रेरे इस वचनेरे मुताबिक, कि “तू अपने पड़ोसी सेइं अपनो ज़ेरो प्यार केर,” सच्चे तैस राज-कानून पूरो केरतथ, त रोड़ू केरतथ । 9 पन अगर तुस तरफदारी केरतथ, त पाप केरतथ; ते मूसेरो कानून तुसन पापी ठहराते । 10 किजोकि अगर कोई मूसेरे सारे कानूने पुड़ चलते, ते एक्की गल्ली पुड़ न चेलि बटो त तै सेभी गल्लन मां दोषी भोते । 11 एल्हेरेलेइ कि ज़ैने इन ज़ोवं, कि “तू बदमाशी न केरां,” तैने इन भी ज़ोवं, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसेरे कानूने पुड़ चलने बालो न भोव । 12 तुशशी गल्लां ते बर्ताव तैन लोकां केरे ज़ेरो भोए, ज़ैन केरो इन्साफ आज़ादी देनेबाले कानूनेरे मुताबिक भोलो । 13 किजोकि ज़ैने दया न की तैसेरो इन्साफ बगैर दयाई सेइं भोलो । दया इन्साफे करां भारी भोतीए ।

?????????? ?? ??

14 हे मेरे ढ्लाव ते बेइनव, अगर कोई ज़ोए कि मीं यीशु मसीह पुड़ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटते? 15 अगर कोई विश्वासी ढ्ला या बेइन भोए ज़ैन लिगड़ा केरि ज़रूरत भोए, ते तैन रोज़ खाने जो न भोए । 16 ते तुसन मरां कोई तैन सेइं ज़ोए, “खुशी सेइं गाथ परमेशर तुसन बरकत दे,” तुस गर्म राथ, ते रज़्जा; पन ज़ैना चीज़ां जानेरे लेइ ज़रूरिन तैना तैन न दे, त कुन फैइदो? 17 तेन्चरे विश्वास भी, अगर रोड़े कम्मन सेइं न भोए, त अपने सुभावे मां मरौए ।

18 बल्के कोई ज़ोई बटते कि, “तीं विश्वासे, ते अवं रोड़ां कम्मां केरताई ।” पन अवं ज़ोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोड़े कम्मन सेइं तीं हिरालो । 19 तीं विश्वासे कि अक्के परमेशरे, तू रोड़ू केरतस, भूतां भी विश्वास केरतन, ते थरकतन । 20 पन हे निकम्मे मैन्हु तू इन न ज़ानस, कि रोड़े कम्मन बगैर विश्वास मरौए । 21 ज़ैखन इशशे पूर्वज अब्राहमे अपनू मट्टू इसहाक बलिदान केरनेरे ठैरी पुड़ च़ाढू, त कुन तै कम्मन सेइं धर्मी न भोव? 22 तीं हेरू कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव । 23 ते पवित्रशास्त्रेरो ई वचन पूरो भोव, “कि अब्राहमे परमेशरे पुड़ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव । 24 ते तुसेईं हेरू कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते । 25 तेन्चरे राहाब वेश्यां भी ज़ैखन तैसां बिस्तार देनेबाले लोक अपने घरे मां रखे, ते होरि बत्तां वापस भेजे, त कुन कम्मन सेइं धर्मी न भोइ? 26 ते ज़ेन्चरे जान आत्मा बगैर मरीं आए, तेन्चरे विश्वास भी रोड़े कम्मन बगैर मरौए ।

3

???? ???? ???? ?????

1 हे मेरे ढ्लाव ते बेइनव, तुसन मरां बड़े परमेशरेरे वचनेरे उस्ताद न भोन, किजोकि तुसन पतोए, कि इशशो उस्तादां केरो इन्साफ जादे सेखती सेइं भोलो । 2 अस बड़े बार गेलती केरतम, ज़ै ज़ोने मां गलती न केरे, तैए सिद्ध मैनुए, ते सारे जानी कैबू केरते । 3 ज़ैखन अस अपने कैबू मां केरनेरे लेइ घोड़ां केरे ऐशी मां लगाम लातम, त अस तैन केरि सारी जानी भी फेरी सखम । 4 हेरा, पैनेरां ज़िहाज़ां भी, अगर बडां भोतन, ते तेज़ हवाई सेइं च़लां गातन, फिरी भी एक्की निकड़ी पतवारी सेइं च़लानेबालो अपने मेर्जी सेइं फिराते । 5 तेन्चरे ज़िभ भी, अगर अक निकड़ो अंगे, ते बेड़ि-बेड़ि घमण्डेरी गल्लां केरती, तक्का, थोड़ी ज़ेरि अगगी सेइं केतरे बड़े-बड़े जंगले मां अग लाई गातीए । 6 ज़िभ भी अक अगारी ज़ेरीए, ज़िभ इशशे जानी मां अक बुरो हिस्सो आए, ते सैरी जानी पुड़ कलंक लातीए,

ते जिन्दगरी दुनियाई मां अग लातीए, ते नरकेरी अग्गी सेइं बलती रहतीए। ⁷ हर किसमां केरे जंगली जानवर, चुडोलू, ते पेटेरे भारे बाले जीप जन्तू ते दरियारे जानवर त इन्सानेरे हथ्ये एज्जी बटतन ते ओरे भी आन। ⁸ पन जिभी मैनु मरां कोई भी कैबू मां न केरि सके, तै अक एरी बलाए जै कथे रुके न, तै सप्पेरे जेहरेरे जेरीए नुकसान देने बालीए। ⁹ इस्से जिभी सेइं अस प्रभु ते बाजी परमेशेरी तारीफ़ केरतम, ते इस्से सेइं मैन्हु, जै परमेशेरे रूपे मां बनोरोए श्राप देतम। ¹⁰ एक्की ऐशी सेइं शुक्र ते श्राप निसतन। हे मेरे ढलाव ते बेइनव एरू न लोडे भोरू। ¹¹ कुन एक्की नागे मरां मिट्टू ते लूनू पानी निस्सी बटते? ¹² हे मेरे ढलाव ते बेइनव, कुन फेगेरो बुटे पुड़ जैतून, या दाछी पुड़ फैगू लेगि बटतन? तेन्चरे लूनो नाग भी मिट्टू पानी न निस्सी बटे।

??????????

¹³ तुसन मरां ज्ञानी ते समझदार कौने? जै एरो भोए तै अपने कम्पन रोडे चाल चलने सेइं तैस नम्रता सेइं साथी बांदो केरे जै ज्ञाने सेइं पैदा भोतीए। ¹⁴ पन अगर तुस अपने-अपने मने मां सखत जलन, ते खुदगरजी रखतथ, त बेड़ि-बेड़ि गल्लां न केरथ ते सच्चरे खलाफ झूठ न जोइयथ। ¹⁵ इन ज्ञान तैन नई, जैन स्वर्गेरां ओरूए बल्के दुनियारू, ते जिसमानी, ते शैतानीए। ¹⁶ एल्हेरेलेइ कि जैड़ी जलन, ते खुदगरजी भोतीए, तैड़ी फसाद ते हर बुरू कम भोते। ¹⁷ पन जैन ज्ञान स्वर्गेरां एइते तैन पेइलू त पवित्तर भोते, फिरी मिलनसार, हलीम ते शिखालने बालू, ते दया ते रोडे कम्पन सेइं ते बगैर तरफदारी ते पाखंडे बगैर भोते। ¹⁸ ते मिलाप केराने बालां केरे लेइ धार्मिकतरो फल मेल मलापे सेइं साथी बेव गाते।

4

??????????

¹ तुसन मां लड़ाई ते झगडे कोट्टां एइतन? कुन तैन खुवैइशन सेइं नई जैना तुशे अंगन मां लेइतन? ² तुस खुवैइश रखतथ, पन तुसन मैल्ले न, एल्हेरेलेइ तुस खून ते जलन केरतथ, ते किछ हासिल न केरि बटथ तुस झगडतथ ते लडतथ; तुसन एल्हेरेलेइ न मैल्ले, कि तुस मगथ न। ³ तुस मगतथ ते मैल्ले न, किजोकि बुरी इच्छा सेइं मगतथ, ताके अपने एशे मां खर्च केरथ। ⁴ हे बेईमान लोकव, कुन तुस न ज्ञानथ, कि दुनियारी चीजन सेइं दोस्ती रखनी परमेशेरे सेइं बैर केरनोए, जै कोई दुनियारो दोस्त भोनो चाते, तै अपनो आप परमेशेरो दुश्मन बनाते। ⁵ कुन तुस इन समझतथ, कि पवित्तरशास्त्र बेफैइदू जोते कि, “जै आत्मा तैने असन मां छडी, कुन तै एरी इच्छा केरती, जेसेरो फल जलन भोए?” ⁶ पन जै अनुग्रह परमेशर देते तै बड़ो मजबूते, एल्हेरेलेइ पवित्तरशास्त्रे मां इन लिखोरूए, “कि परमेशर अभिमान केरनेबालां केरो मुकाबलो केरते, पन दीनन् पुड़ अनुग्रह केरते।” ⁷ एल्हेरेलेइ परमेशेरे अधीन भोथ, ते जैन शैतान तुसन करां करानू चाते तैन न केरा, त तै तुसन करां दूर नशेलो। ⁸ परमेशेरे नेडे एज्जा, त तै तुशे नेडे एज्जेलो, हे पापी लोकव, अपने जिन्दगी करां पाप दूर केरा, ते हे दुमन्ने बाले लोकव अपने मन्न पवित्तर केरा। ⁹ अपने पापां केरे वजाई सेइं दुखी भोथ, ते शोग केरा, ते लेरां देथ, तुशशी हासी शोगे मां, ते तुशशी खुशी उदैसी मां बेदलोए। ¹⁰ प्रभुएरे सामने नम्र बना, त तै तुसन इज्जत देइतां उच्चे केरेलो।

??????????

¹¹ हे ढलाव ते बेइनव, एक्की होरेरी तुहीन न केरा, जै अपने ढलाएरी तुहीन केरते, या अपने ढलाए पुड़ दोष लाते, तै मूसेरे कानूनेरी भी तुहीन केरते, ते मूसेरे कानूने पुड़ दोष लाते, ते अगर तू कानूने पुड़ दोष लातस, त तू कानूने पुड़ चलने बालो न भोव, पन तैसेरो हाकिम भोव। ¹² मूसेरो कानून देनेबालो ते हाकिम त अक्के, तै परमेशर आए, जैस कां बचाने ते नाश केरनेरी शक्ति आए, तू कौन आस, जै अपने पड़ोसी पुड़ दोष लातस?

??????????

¹³ तुस जैना इन जोतथ, “कि अज या कालां अस कोन्वी होरि नगर मां गेइतां अक साल बीतामेले, ते बुपार केरतां फैइदो उठामेले।” ¹⁴ ते इन न ज्ञानथ कि कालां कुन भोलू, शुना, तुशशी जिन्दगी आए कुन? तुस त भाखेरे जेरेथ, जै थोडे चिरे लेइहोते, ते फिरी गैइब भोते। ¹⁵ एल्हेरेलेइ तुसेईं इन जोरू लोडे, “अगर प्रभु चाए, त अस जीते रहमेले, ते इन या तैन कम भी केरमेले।” ¹⁶ पन हुनी तुस अपने अभिमाने पुड़ घमण्ड केरतथ, एरू सब घमण्ड बुरू भोते। ¹⁷ एल्हेरेलेइ जै कोई भलाई केरनि ज्ञानते ते न केरे, तैसेरेलेइ ई पापे।

5

?????????? ??????????

1 हे दौलतमंदव विश्वासी लोकव, शुना, तुस अपने एजनेबाले दुखेरे लेइ ज़ोरे-ज़ोरे लेरां देथ । 2 तुश्शू धन नाश भोवं ते तुश्शे लिगडन खर लगगे । 3 तुश्शे सोन्ने चैंदी मोरचो लगगे, ज़ेइस परमेशरे तुश्शो इन्साफ केरेलो त ई मोरचो तुश्शे खलाफ गवाहेरो ज़ेरो भोलो, ते अगगारो ज़ेरो तुश्शू मास फुकेलो, तुसेई आखरी युगे मां धन अकोट्टू कियूं । 4 तक्का, ज़ैन मज़दूरेई तुश्शां ऊडारां कट्टां, तैन केरि तै मज़दूरी ज़ै तुसेई तैन न दिती, चिन्डां मारने लोरीए, ते फसल कटने बालां केरि फरयाद फौजरे परमेशरे शुनोरीए । 5 तुस धेरती पुड़ एश केरने मां लगगोरो राए, तुसेई सिर्फ अपने सुखेरे लेइ ज़िन्दगी ज़ी, एल्हेरेलेइ तुसेई अपनो आप तैस दिहाडेरे लेइ तियार कियोरोए ज़ेइस परमेशर तुश्शो इन्साफ केरेलो । 6 तुसेई धर्मी दोषी बनेइतां मारो, तै तुश्शे सामनो न केरे ।

????? ???? ???? ?????????

7 ते हे ढलाव ते बेइनव, प्रभुएरे एजने तगर सबरी सेइ बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैडी भोने तगर सबरी सेइ बलगते । 8 तुस भी तेन्चरे सबरी सेइ बलगा, ते अपने दिले मज़बूत केरा, किजोकि प्रभुएरू एजनु नेडूए । 9 हे ढलाव ते बेइनव, एक्की होरि पुड़ दोष न लाथ ताके तुसन पुड़ भी दोष न लाव गाए, हेरा, हाकिम नेडे ते एजनेरे लेइ तियारे । 10 हे ढलाव ते बेइनव, ज़ैन नेबेई प्रभुएरे नव्वे सेइ गल्लां की, तैन सबर केरनेरो अक नमूनो समझा । 11 हेरा, अस बलगने बालन जो धन ज़ोतम, तुसेई अय्यूबेरे सबरारे बारे मां शुनोरूए, ते प्रभु करां तैसेरो ज़ै प्रतिफल भोव तैने भी बुझू, ज़ैस सेइ प्रभुएरी बड़ी महरबानी ते दया बांदी भोतीए

12 पन हे मेरे ढलाव ते बेइनव, सेभन करां बडडी गल ईए, कि कसम न खाथ, न स्वर्गेरी न धेरतरी, न होरि कोन्ची चीज़री, पन तुश्शी गल हांएरी हाँ, ते न एरी नां भोए, फिरि परमेशर तुसन सज़ा न देलो ।

????????????????? ?????????

13 अगर तुसन मां कोई दुखी भोए त तै प्रार्थना केरे, अगर खुश भोए, त परमेशरेरां भजना ज़ोए । 14 अगर तुसन मां कोई रोगी भोए, त कलीसियारे बुजुर्गन कुजाए, ते तैना प्रभुएरे नव्वे सेइ तैस पुड़ तेल मेलतां तैसेरेलेइ प्रार्थना केरन । 15 ते विश्वासेरी प्रार्थनाई सेइ रोगी बचेलो ते प्रभु तैस बज्जालो, ते अगर तैने पाप कियोरे भोले त परमेशर तैस माफ़ केरेलो । 16 एल्हेरेलेइ तुस एक्की होरेरे सामने अपने-अपने पाप मन्ना, ते एक्की होरेरे लेइ प्रार्थना केरा, ज़ैस सेइ तुस बेज्जोथ, धर्मी मैनेरे प्रार्थनारे अस्सरे सेइ बडू किछ भोइ बटते । 17 एलिय्याह भी इश्शो ज़ेरो दुःख सुख झैल्लने बालो मैन्हु थियो, तैने दिले सेइ प्रार्थना की, कि झैडी न भोए, ते सडे ट्लाई साल झैडी न भोइ । 18 फिरि तैने प्रार्थना की, त अम्बरेरां झैडी भोइ, ते धेरती पुड़ फसल भोइ ।

19 हे मेरे ढलाव ते बेइनव, अगर कोई विश्वासी परमेशरेरी सच्ची शिक्षा मन्नी शारे, ते कोई तैस मनफिरानेरे लेइ महत केरे, 20 त तै इन बुझे, कि ज़ै कोई कोन्ची भटकोरे पैपी मनफिरानेरे लेइ महत केरे, त तै एक्की प्राणे (मैन्हु) मौती करां बचालो, ते परमेशर तैसेरे बडे पाप भी माफ़ केरेलो ।

1 पतरस

???????? ???? ?

1 अवं पतरस यीशु मसीहेरो प्रेरित आई, अवं ई चिट्ठी परमेशेरे चुनोरे लोकां केरे लेइ लिखने लोरोई, जैना परदेशी केरे जेरे पुन्तुस, गलातिया, कप्पदूकिया, आसिया ते बितूनिया इलाकां केरे अलग-अलग नगरन मां तितर-बितर भोइतां रातन । 2 बाजी परमेशेरे बडो पेइलो ई फैसलो कियोरो थियो कि तुस तैसेरे लोक भोथ त कने तै तुसन पवित् आत्माे कम्मरे जिरिये पवित् बनाए । तैने एन एल्हेरेलेइ कियूं ताके तुस यीशु मसीहेरी मन्थ ते तैसेरे खूनेरे जिरिये सेइ शुद्ध भोथ । अवं प्रार्थना केरताई कि परमेशर तुसन अनुग्रह ते शान्ति जादे करां जादे दे ।

?? ???? ?

3 इशे प्रभु यीशु मसीहेरे बाजी ते परमेशेरू शुकर भोए, परमेशेरे असन पुड़ महान दया केरतां असन नव्वीं जिन्दगी दिती । किजोकि परमेशेरे यीशु मसीह मुइदन मरां जींते कियो त कने तैने अस पूरी उमीदी सेइ जीनेरे काबल बनोरेम, मतलब असन तैन चीजां हासिल केनेरी पूरी उमीदे, जैन केरो देनेरो वादो परमेशेरे असन सेइ कियोरोए । 4 अस तैस विरासती हासिल केनेरो इंतजार केने लोरेम जै परमेशेरे इशे लेइ तियार कियोरीए । कोई भी तैन चीजन कधी बरबाद न केरि बटे । किछ भी तैस खराब केरि बटे । तैना चीजां कधी भी पुरैनी न भोली ते तैन केरि खूबसूरती कधे न घटेली । परमेशेरे इना चीजां तुशे लेइ स्वर्गे मां रेखोरिन । 5 परमेशर तुसन अपने महान शेक्तेरे जिरिये सेइ सम्भाले, किजोकि तुस यीशु पुड़ विश्वास केरतथ । तै तुसन यीशु मसीहेरे वापस एजने तगर सम्भलतां रखेलो । तेइस तुस जानेले कि परमेशेरे तुस पापे करां ते मौती करां पूरे तरीके सेइ बचावरेथ । 6 तुसेई इन सेभी चीजां केरे बारे मां खुश भोरू लोडे, चाए हुना किछ वक्तेरे लेइ अलग-अलग किसमेरी मुसीबतां तुसन दुखी केरतिन । 7 इन मुसीबतां केरो मकसद ई आए कि इन बांदू भोए कि तुस सच्चे परमेशेरे पुड़ विश्वास केरतथ । तुशो यीशु मसीह पुड़ विश्वास केरनो सोन्ने करां भी जादे कीमतीए । जेन्चरे नाश भोनेबालू सोन्नु अग्गी सेइ परखू ते शुद्ध कियूं गाते, तेन्चरे अगर तुशो विश्वास अगारे जेरे अजमैइशन सेइ परखनेरे बाद भी मजबूत रहते त जेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो । 8 तुसेई यीशु मसीह कधे नई लवरो, पन फिरी भी तुस तैस सेइ प्यार केरतथ । तुस हुना तैस न लाथ पन तुस तैस पुड़ विश्वास केरतथ । एसेरो नितीजो ई आए, कि तुस बडे खुश आथ । तुस एतरे खुश आथ कि लफजन मां बियांन न केरोए । 9 तुस एल्हेरेलेइ खुश आथ किजोकि परमेशर तुशे प्राण पापेरे सजाई करां बचाने लोरोए । इन यीशु मसीह मां तुशे विश्वासेरू इनामे ।

10 ई मुक्ति किछ एरी थी जेसेरे बारे मां नबी बडू ज्ञाननू चाते थिये । तैनेई ज़ोवं केन्चरे परमेशर तुसन पुड़ अनुग्रह केरतां बचालो जेसेरे काबल तुस न थिये, तैनेई बडी जांच पड़ताल की, कि तैन जुवाब मैल्ले । 11 मसीहेरो आत्मा तैन मां थियो ते तैन सेइ ज़ोने लोरो थियो कि मसीहे केन्चरे दुःख झैल्लेलो ते तैटठां बाद तैस महान आदर दिती गाली । एल्हेरेलेइ तैना इन खोज केरतां तोपने लगे कि सच्चे मसीह कौन भोलो ते इन केइस भोलू । 12 पन परमेशेरे इन अपने गल्लां ज़ोनेबालन सेइ ज़ोवं, कि तैन केरो सन्देश तैन केरे अपने आपेरे लेइ नई, पन तुशे लेइ आए । तै सन्देश यीशु मसीहेरे बारे मां खुशखबरी आए, जै तुसेई इस वक्त शुनी । परमेशेरे स्वर्गेरां पवित् आत्मा भेजो कि लोकां केरि मद्दत केरे कि तैना तुसन खुशखबरी शुनान । इन सब एतरू हैरान केनेबालू ए कि स्वर्गदूत भी इन हेरनेरी बडी इच्छा रखतन ।

???????? ???? ?

13 एल्हेरेलेइ अपने मने तियार केरा ते अपने आपे कैबू मां रखवा । तैस मुक्तेरी उमीद रखवा जै तुसन अनुग्रहे सेइ तेइस मैलनी जेइस यीशु मसीह दुबारा इस दुनियाई मां एजनोए । 14 परमेशेरे मन्ना किजोकि तुस तैसेरे बच्चेथ । बुरां कम्मां न केरा जैना तुस बुरी इच्छाई सेइ केरते थिये जेइस तुस परमेशेरे सच्चाई न थिये ज्ञानते । 15 पन हुनी तुस जैन किछ केरतथ तैस मां पवित् भोथ, जेन्चरे परमेशर पवित् जेने तुस अपने बच्चे भोनेरे लेइ चुनोरेथ । 16 किजोकि पवित्शास्त्रे मां परमेशेरे ज़ोवरू ए “पवित् बना, किजोकि अवं पवित् आई ।” 17 जैखन तुस प्रार्थना केरतथ तुस परमेशेरे जो बाजी ज़ोतथ । पन याद रखवा तै तरफदारी न केरे । एल्हेरेलेइ जैखन तुस इस

दुनियाई मां परदेशी केरे जेरे रातथ त तुसेई तैसेरी बड़ी इज्जत कियोरी लोडे । 18 किजोकि तुस ज्ञानतथ, बीतोरे वक्ते मां तुस बेकार तरीके सेइं जीते थिये जेन्चरे तुशशे दादे-पडदादे जीते थिये । पन हुनी तुस बेकार जिन्दगी करां छुटावरेथ, तुस नाश भोनेबाले सोन्ने चेंदी सेइं नईं घिन्नोरे, 19 पन मसीहेरे कीमती खूने सेइं घिन्नोरेथ, मसीह जै शुद्ध ते सिद्ध गबडेरो जेरोए । 20 दुनिया बनाने करां पेइले परमेशरे इन ठहरावरू थियूं कि यीशु मसीह मुक्ति देनेबालो भोलो । पन तै इन आखरी दिहाइन मां इस दुनियाई मां अव ताके तुशशी महत केरे । 21 यीशु मसीहे जैन कियूं तैसेरे वजाई सेइं तुस हुनी परमेशरे पुड़ विश्वास केरतथ, तैए आए जैने यीशु मसीह मुड़दन मरां जींतो कियो ते तैस आदर दिती ताके तुशशो विश्वास ते उमीद परमेशरे पुड़ भोए ।

22 किजोकि तुस सन्न मन्नेरे जिरिये शुद्ध कियोरेथ, ते हुनी तुसेईं विश्वासी सैथन सेइं इमानदेरी सेइं प्यार कियोरो लोडे । तुसेईं एक्की होरि सेइं गहराई ते पूरे दिले सेइं प्यार कियोरो लोडे । 23 किजोकि तुसन परमेशरेरी तरफां नव्वीं जिन्दगी मैलोरी । तुसेईं ई जिन्दगी एरी चीजी सेइं नईं हासिल कियोरी जै नाश भोली । पन तैस सेइं जैन हमेशा रालू । मतलब परमेशरेरे जीते ते हमेशा रानेबाले वचने सेइं मैलोरीए । 24 किजोकि पवित्रशास्त्र ज़ोते “सारे लोक घासेरे जेरे आन ते तैन केरि शोभा जंगली फूडोंवेरी जेरीए । घास शुक्की गालो ते फूडोंव झेड़ी गालू । 25 पन प्रभुएरू वचन सदा बनोरू रालू, ते वचन मसीहेरे बारे मां खुशखबरी जैन तुसन शुनव जेवं ।”

2

?????? ???? ?? ??????? ???? ?

1 एल्हेरेलेइ सब किसमेरो बुरो सलूख केरनो शारा । होरन धोखो न देथ, पाखंड न केरा । ते होरन सेइं जलन न केरा । होरि केरे बारे मां बुरी गल्लां न जीथ । 2 जेन्चरे नव्वे जमोरि बच्चे अपने अम्मारे खालिस दुद्धेरी इच्छा रखतन, तेन्चरे तुस भी परमेशेरू वचन शिखनेरे लेइ इच्छा रखवा जैस सेइं तुस आत्मिक तरीके सेइं मजबूत बनेले । फिरी आखरी मां परमेशर तुसन दुनियारी बुरी चीजन करां पूरे तरीके सेइं बचालो । 3 जेन्चरे पवित्रशास्त्र ज़ोते, “तुसेईं तजरबे सेइं ज्ञानेरूए कि प्रभु भलो आए ।”

4-5 तुस प्रभु यीशु कां ओरेथ । तै खास घोड़ेरे जेरोए जै घरेरे बुनियादी मां लोरोए, पन तै जींतो घोड़े । बड़े लोकेई तै रद कियो, पन परमेशरे तै चुनो ते बड़ो कीमती मन्नो । जेन्चरे लोक घोड़न सेइं घर बनातन, तेन्चरे परमेशर तुसन एक्की एरे झुण्डे मां शामिल भोनेरी वजा बनाने लोरोए, जैस मां परमेशरेरो आत्मा रहते, ताके तुस जैन यीशु मसीहे इशशे लेइ कियोरूए तैसेरे वजाई सेइं याजक बना, जैना बलिदाना चाढतन, तुस भी तैन केरां जेरां रोड़ां कम्मां केरथ जैन सेइं परमेशर खुश भोते । 6 एल्हेरेलेइ जेन्चरे परमेशर पवित्रशास्त्रे मां ज़ोते, “तक्का, अवं अक मैन्हु सिय्योन नगरे मां रखने लोरोईं ।

जै कूनेरो खास ते चुनोरो घोड़े,

तै अक कीमती घोड़ेरो जेरो जै मुनीयादी मां रखवोरोए ।

ते जै तैस पुड़ विश्वास केरेलो तै कोन्ची भी तरीके सेइं शरमिनदो न भोलो ।”

7 तुस जैना यीशु मसीह पुड़ विश्वास केरतथ ई घोड़ तुशशे लेइ बड़ो कीमतीए । पन पवित्रशास्त्र तैन लोकां केरे बारे मां ज़ोते जैना विश्वास न केरन, “जै घोड़ राज मिस्त्रेईं इस्तेमाल केरनो न चाव, तैए घरेरे मुनीयादरो खास घोड़ भोव,”

8 ते पवित्रशास्त्र फिरी ज़ोते,

“ई घोड़ लोकां केरे बिछड़नेरी वजा भोलो ।

ई अक चट्टाने जै तैन बिछोड़ेली ।”

तैना एन्चरे बिछड़तन किजोकि तैना परमेशरेरे सन्देश मन्ने करां इन्कार केरतन । तैन सेइं इन भोनेरे लेइ परमेशर इन थापेरू थियूं । 9 पन तुस तैन केरे जेरे नईं किजोकि तुस परमेशरेरे चुनोरे लोक आथ, परमेशर जै राजोए, तुस तैसेरे याजक आथ, तुस एरे लोक आथ जैनेईं अपनो आप परमेशरे सोंफोरोए, ते परमेशरेरे अपने लोक आथ । तैन तुस आंधरे मरां बड़े लोईं मां कुजावरेथ, ताके तुस परमेशरेरे महान कम्मां केरे बारे मां एलान केरथ । 10 तुशशे बारे मां होशे नेबे जैन ज़ोरू तैन सच्चरे,

“तुस पेइले परमेशरेरे लोक न थिये पन हुनी तुस परमेशरेरे लोक आथ ।

तुस पुड़ पेइले परमेशेरी दयाई न थिये ज्ञानते पन हुनी ज्ञानतथ,
किजोकि तैने तुसन पुड़ अपनि दया हिरावरीए।”

????? ?????????

11 हे ट्लाराव, तुस इस दुनियाई मां परदेशी ते मुसाफरां केरे जेरे जीने लोरेथ, अवं तुसन खबरदार केरताई, कि तुस जिसमेरी सैरी पापी खुवैइशन करां दूर राथ, किजोकि तैना हमेशा तुशे आत्मा रे खलाफ लेइतिन। 12 जैना लोक परमेशेरे पुड़ विश्वास न केरन तैना तुशे च़ेवरे पासन रहतन, तैना ज़ोले तुस गलत केरने लोरेथ। तुस एरी रोड़ी जिन्दगी जीथ कि लोक तुशशां रोड़ां कम्मां हेरतां तैस दिहाड़े ज़ेइस यीशु मसीह दुबारा एज्जानो परमेशेरी बडयाई केरेले।

????? ?????????

13 प्रभुएरे इज्जतरे खातर, मैन्हु केरे ठहरावरे हर एककी अधिकारेरे अधीन राथ, किजोकि ई प्रभुएरी इच्छा आए, हकोमत केरनेबालेरे अधीन एल्हेरेलेइ राथ किजोकि तै बड़ो खास अधिकारी आए। 14 ते हाकिमेरे भी अधीन भोथ, किजोकि राजो तैस बुरां कम्मां केरनेबालन सज़ा देने लेइ ते रोड़ां कम्मां केरनेबालां केरि तारीफ़ केरनेरे लेइ इस्तेमाल केरते। 15 किजोकि परमेशेरी मर्जी ईए, कि तुस रोड़ां कम्मां केरतां तैना बेवकूफ लोकन जैना परमेशेरे न ज्ञानन, तुशे खलाफ दोष लाने करां रोकथ। 16 हुनी तुस पापेरे गुलाम नई किजोकि तुस इशे प्रभु यीशु मसीहेरे ज़िरिये आज़ाद कियोरेथ। पन अपनि ई आज़ादी बुरे कम्मां केरे लेइ इस्तेमाल न केरा, पन तुस भला कम्मां केरे ज़िरिये इन हिराथ कि तुस सच़्चे परमेशेरे दास आथ। 17 सेभी केरि आदर केरा, अपने विश्वासी साथी लोकन सेइं प्यार केरा, परमेशेरे करां डरा, हकोमत केरनेबालेरी इज्जत केरा।

????? ?????????

18 हे घरन मां कम केरनेबाले सेवकव, तुस जैना विश्वासी आथ अपने मालिकां केरे हुक्म मन्ना ते हमेशा तैन केरि आदर केरा। इन न सिर्फ़ दया केरनेबालन सेइं केरा, बल्के जैना दया न केरन तैन सेइं भी। 19 किजोकि अगर अस बगैर गलती केरतां दुःख झैल्लतम त अस ज्ञानतम कि परमेशेरे सब किछु ज्ञानते ते परमेशर असन सेइं खुश भोते। 20 किजोकि अगर तुसेईं पाप केरतां मार खाइ त तुशशी कोई बडयाई नई कि तुसेईं सज़ाई मां सबर की। पन अगर भलाई केरतां दुःख झैलतथ ते सबर केरतथ त इस सेइं परमेशर खुश भोते। 21 परमेशेरे तुसन कुजानेरी अक वजा ई भी आए कि तुस तैसेरेलेइ दुःख झैल्ला, मसीह भी तुशे लेइ दुःख झैल्लतां तुसन अक मिसाल दिती। तुसेईं भी तेन्च़ेरे कियोरू लोडे ज़ेन्च़ेरे मसीहे कियूं। 22 पवित्रशास्त्र ज़ोते, तैने कधी पाप नई कियोरो। तैने कधी झूठ नई ज़ोवरू। 23 ज़ैखन लोकेई यीशु बेइज्जत कियो, त तैने तैसेरे बदले मां तैना बेइज्जत न कियो। ज़ैखन लोकेई तैस दुःख दित्तो त तैने बदले मां तैन दुख न दित्तो, बल्के तैने परमेशेरे पुड़ भरोसो कियो कि तै तैसेरी मद्दत केरे। तै ज्ञानतो थियो कि परमेशर हमेशा धार्मिकताई सेइं लोकां केरो इन्साफ़ केरते। 24 ज़ैखन मसीह मरो, त तैसेरे जानी पुड़ इशे पापां केरे लेइ तैस क़रुसे पुड़ सज़ा दिती। तैने एन कियूं कि अस पाप केरनो बंद केरम ते धार्मिकतारी जिन्दगी जीनी शुरू केरम। तैसेरे ज़खम ज़ैना तैनी झैल्ले तैन केरे वजाई सेइं अस बेज्जोए। 25 तुस पेइले टेपलोरी भैडडां केरे ज़ेरे थिये, पन हुनी तुस मसीह कां वापस ओरेथ ज़ै तुशे प्राणा केरो पुहाल ते रखवालोए।

3

????? ?? ???? ?

1-2 हे कुआन्शव, तुस भी अपने मुन्शां केरे अधीन राथ। एल्हेरेलेइ अगर इन मां कोई एरो भोए ज़ै परमेशेरे वचने न मनतो भोए, तुशे जीनेरे तरीके सेइं तुशे बगैर ज़ोने तैन केरे विश्वास केरनेरी वजा भोली। तैना तुशे रोड़े ते पवित्र बर्ताव हेरतां मसीह पुड़ विश्वास केरेले। 3 ते तुशशी सज़ावट दिखावेरी न भोए, मतलब अलग-अलग किसमे दोग बनानो, ते सोन्नेरे गेहने, या किसमां-किसमां केरां लिगड़ां लाना। 4 बल्के तुस अपने गुना केरे ज़िरिये अपनो आप खूबसूरत बनाथ ज़ै तुसन करां दूर न गाए, मतलब नेरमी ते शांत स्भावे सेइं ज़ै परमेशेरे लेइ बड़ो कीमती आए। 5 ते पेइले ज़ुमाने मां पवित्र कुआन्शां भी, ज़ैना परमेशेरे पुड़ उमीद रेखती थी, तैना अपनो आप इस तरीके सेइं सज़ैती ते अपने-अपने मुन्शां केरे अधीन रैती थी। 6 ज़ेन्च़ेरे सारा अब्राहमेरे अधीन रहती थी ते तैस ज़ो मालिक ज़ोती थी, ते तुस भी अगर भलाई केरथ, ते केन्ची किसमेरे फ़िक्रन सेइं न डरथ त सारारे कुइयां केरि ज़ेरि भोली।

7 तेन्चरे हे मुन्शव, तुस भी समझदारी सेइं कुआन्शन सेइं जिन्दगी बीताथ ते इन याद रख्वा कि तैना तुसन करां कमजोरन, एल्हेरे तुसेईं तैन केरि आदर कियोरी लोडे, किजोकि तुस दुइये तैस वरदानेरे हिसेदार आथ जैन परमेशर तुसन अनुग्रहे सेइं दितोरू आए, तै हमेशारी जिन्दगी आए। एरू केरा ताके जैखन तुस प्रार्थना केरथ त परमेशर तुशशी प्रार्थना शुने।

ॐॐॐॐ ॐॐॐॐॐॐ ॐॐॐॐ ॐॐॐॐ ॐॐॐॐ

8 आखरी मां अवं तुसन इन जोताई, तुसेईं सैभेईं अक मन भोवरू लोडे ते एक्की होरि सेइं हमदेरदी केरा ते एक्की होरि सेइं दला बेइनां केरो जेरो प्यार केरा, ते एक्की होरि पुड़ दया केरा, एक्की होरेरे लेइ नर्म बना। 9 बुरैडारे बदले बुराई न केरा, गैईं केरे बदले गैईं न देथ, पन इसेरे बदले बरकत देथ, किजोकि परमेशरे तुस होरन बरकतां देनेरे लेइ कुजावरेथ। अगर तुस इन केरतथ, त परमेशर तुसन भी बरकतां देलो 10 किजोकि पवित्रशास्त्र जोते, “अगर कोई मैन्हु जिन्दगरो आनन्द नेनो चाते, ते रोडे दिहाडे हेरने चाते त तैनी ध्यान लोडे दितोरू कि बुरी गल्लां न जोए। ते तैनी होरन धोखो न लोडे दितोरो। 11 ते बुरू केरनू बंद कियोरी लोडे बल्के तैनी रोडू कियोरू लोडे। होरन सेइं मेल मिलापे सेइं जीनेरे लेइ मेहनत कियोरी लोडे। 12 किजोकि प्रभु तैन लोकां केरू ध्यान रखते जैना तैन्ने केरतन जैन सही आए, ते तै हमेशा तैन केरि प्रार्थना शुन्नेरे लेइ तियार रहते। पन परमेशर तैन केरे खलाफ कम केरते जैना बुरू केरतन।”

13 अगर तुस हमेशा भलू केरनेरी कोशिश केरथ, त फिरी कोई भी तुसन हकीकति मां नुकसान न पुजेई बटे। 14 अगर अस धार्मिकतारे स्भावेरे वजाई सेइं दुःख झैल्लम, त अस सच्चे धन भोले, पन अगर कोई असन डराते त तैस करां डरू न लोडे ते न घबरावरू लोडे। 15 पन इसेरे बदले, तुसेईं मसीहेरी आराधना अपने जिन्दगरे प्रभुएरे रूपे मां कियोरी लोडे। ते जै कोई तुसन तुशशे उमीदरे बारे मां किछ पुच्छे जैस मां सारे विश्वासी शामिल आन, त तैस जुवाब देनेरे लेइ हमेशा तियार राथ, पन नेरमी ते आदरी सेइं। 16 हमेशा तैन्ने केरा जैन सही भोए। तैखन अगर लोक तुशशे लेइ बुरू जोले त तैना मसीह सेइं तुशशो रिशतो भोनेरे वजाई सेइं तुशशो रोडो बर्ताव हेरेले त तैना छिथोले। 17 किजोकि इन रोडू आए अगर इशशां रोडं कम्मां केरे वजाई सेइं अस दुःख झैल्लम, अगर इशशे लेइ परमेशरेरी इच्छा ई आए। इन इशशे बुरां कम्मां केरे वजाई सेइं दुःख झैल्लने करां बडू रोडूए। 18 अवं इन जोताई, मसीहे भी इशशे पापां केरे लेइ दुःख झैल्लो ते मरो। ते एक्की बारे मरो ते तैस दुबारा मरनेरी जरूरत नई। तै अक धर्मी मैन्हु थियो जै पापी लोकां केरे लेइ मरो ताके तै असन परमेशरे कां आने। तैनेईं तैसेरो जिसम मारो पन तै पवित्र आत्मारे शेक्तेरे जिरिये जीतो कियो 19 तैट्ठां बाद तैसेरी आत्मा तैन आत्मान खुशखबरी शुनाने जेई, जैना परमेशरे तैस ठैरी कैद कियोरिन जैडी मरे लोकां केरि आत्मा रैती थी। 20 इन तैन मैन्हु केरि आत्मा आन जैनेईं बडे पेडले परमेशरेरो हुक्म न थियो मन्नोरो। जैखन नूह किशती बनाने लोरो थियो, त परमेशरे बडे सबरी सेइं बलगू कि तैना पापन करां मन फिरान। पन सिर्फ अठ तैस भयानक तूफाने करां बचे। 21 पुराने वक्ते मां तैन केरि मुक्ति हुना इशशे लेइ जैखन अस बपतिस्मो नेतम मिसाले। जैस पैनी मां अस बपतिस्मो नेतम तैन इशशे जानरो मैल दूर न केरे, पन ई अक निशान आए कि असेईं परमेशरे करां माफ्री मगोरीए ताके इशशो मन असन परेशान न केरे। असन माफ्री मैल्ली बटतीए किजोकि यीशु मसीह मेरतां जीतो भोवरोए, 22 ते तै स्वर्गे जो जोवरो। तैडी हुनी तै परमेशरेरे देइने पासे खास ठैरी, तैडी तै सारे स्वर्गदूतन ते अधिकैरन ते शेक्तेन पुड़ राज केरने लोरोए।

4

ॐॐॐॐॐॐ ॐॐॐॐॐॐ

1 एल्हेरेलेइ जैखन मसीहे जिसमे मां भोइतां दुःख झैल्लो, त जेन्चरे तैसेरो स्भाव थियो तेन्चरे तुस भी दुःख झैल्लनेरे लेइ तियार भोथ। किजोकि अगर तुस मसीहेरे लेइ दुःख झैल्लनो चातथ त तुसेईं पाप न केरनेरो फैसलो कियो। 2 नितीजो ई भोलो, कि तै मैन्हु बाकी अपनि जिन्दगी मैन्हु केरे पापी खुवैइशां केरे मुताबिक इस दुनियाई मां न जीयोले पन तै तैन्ने केरेलो जैन परमेशर तैस करां करानो चाते। 3 किजोकि बीतोरे वक्ते मां तुस गैर विश्वासी लोकां केरे जेरे आनन्द केरने मां वक्त बर्बाद केरते थिये, ते तुस अपनि जिन्दगी एश केरने मां, बुरी खुवैइशन मां, ते तैन केरे तिहारन मां, शराब पीने मां ते नाचे मां, ते तैन केरि मूरती केरि पूजाई मां जैन सेइं परमेशर नफरत केरते बीताते थिये। 4 एल्हेरेलेइ तुशशे पुराने दोस्त हैरान भोतन, जैखन तुस तैन केरे बुरी गल्लन मां जैना तैन केरतन

शामिल न भोथ, तांए तैना तुशशे बारे बुरू-भलू ज़ोतन। ⁵ पन एक्की दिहाड़े तैनेई ज़रूर परमेशेरे सामने इन्साफेरे लेइ खडू भोनू पेनूए। ते परमेशर तैन मरां हर एक्की ज़ैन तैनेई इस धेतली पुड़ कियोरू तैसेरे बारे मां पुछेलो। परमेशर ज़ीते ते मुड़दां केरो इन्साफ केरेलो। ⁶ ईए वजा आए कि मुड़दन भी मसीहेरे बारे मां खुशखबरी शुनाई। तैन केरे जिसम भी एन्चरे मरे ज़ेन्चरे सारे मैन्हु मरतन। पन हुनी तैना आत्माई मां परमेशेरे सेइं साथी हमेशा ज़ीइले।

?????????? ???? ???? ???? ???? ??

⁷ सेब्भी गल्लां केरो अन्त जल्दी भोने बालोए, एल्हेरेलेइ साफ तरीके सेइं सोचा ते अपने आपे पुड़ कैबू केरा ताके तुस प्रार्थना केरी सकतथ। ⁸ सेब्भन करां रोड़ी गल ईए, कि एक्की होरि सेइं ईमादैरी सेइं प्यार केरा, किजोकि अगर तुस लोकन सेइं प्यार केरेले त तुस तैन केरि गेलती भी माफ़ केनेरे लेइ तियार भोले। ⁹ ज़ैखन लोक तुशशे घरन मां एजन त बगैर कोन्वी शिकायतां तैन केरू स्वागत केरा। ¹⁰ हर एक्की परमेशेरे करां वरदान मैलोरूए ते तैनी तैन वरदान होरि केरि मद्दत केनेरे लेइ इस्तेमाल कियोरू लोडे। तैनेई तैना काई किसमां करां वरदानां इस्तेमाल कियोरां लोडन ज़ैना परमेशेरे अपने अनुग्रहे सेइं दितोरन। ¹¹ अगर तुसन कां प्रचार केनेरू वरदाने त तुसेईं परमेशेरू वचन प्रचार कियोरू लोडे। अगर तुसन कां होरि लोकां केरि मद्दत केनेरू वरदाने त तैस शेक्ति सेइं केरा ज़ै परमेशेरे तुसन दितोरीए। फिरी सब किछ् ज़ैन तुस केरेले तैस सेइं यीशु मसीहेरे ज़िरिये परमेशेरी महिमा भोली। सारी महिमा ते शक्ति हमेशा-हमेशा तैसेरीए। आमीन।

?????????? ???? ???? ???? ???? ??

¹² ट्लारव, ज़ैना दुःख तुस झैल्लने लोरिथ तैन केरे बारे मां हैरान न भोथ किजोकि तुस मसीहेरे आथ। पन इना चीज़ां इन हिरानेरे लेइ भोनेरे लोरिन कि तुस सञ्चरे परमेशेरे पुड़ विश्वास केरतथ की नई। एल्हेरेलेइ इन न सोचा कि तुसन सेइं नव्वीं गल भोने लोरीए। ¹³ पन इसेरे बारे मां खुश भोथ, कि ज़ैना दुःख मसीहे मैल्ले तुस भी तैन मां शामिल भोए। एल्हेरेलेइ ज़ैखन मसीह दुबारा एज्जेलो त सेब्भी लोकन पुड़ अपनि महिमा बांदी केरेलो, त तुस बडे खुश भोले। ¹⁴ फिरी अगर मसीहेरे नव्वेरे लेइ तुशशी तुहीन भोतीए, त तुस धन आथ। किजोकि परमेशेरे महिमा बालो आत्मा तुसन मां रहते। ¹⁵ तुसन मरां कोई मैन्हु खूनी ते चोर, या कुकर्मी भोने, या होरि केरे कम्मन मां दखल देनेरे वजाई सेइं दुख न झैल्ले। ¹⁶ पन अगर मसीही भोने सेइं दुःख झैल्लथ त शरमाए न, पन इस गल्लेरे लेइ परमेशेरी बडीयाई केरे किजोकि तुस विश्वासी आथ। ¹⁷ किजोकि इन्साफेरो वक्त ओरोए, ते तै इशशो विश्वासी लोकां केरो इन्साफ पेइलो केरेलो, तैन डरानेबैली गल्लां केरे बारे मां सोचा ज़ैना तैन सेइं भोनिन, ज़ैना खुशखबरी पुड़ विश्वास न केरन ज़ै परमेशेरे तरफां एइतीए। ¹⁸ ज़ेन्चरे पवित्रशास्त्र ज़ोते, “अगर धर्मी मैनेरे लेइ मुक्ति हासिल केरनि बड़ी मुशकलीए, त बुरे ते पापी मैन्हु पक्के नाश भोनेन!”

¹⁹ एल्हेरेलेइ ज़ैना परमेशेरी मेरज़रे मुताबिक दुःख झैल्लतन, तैनेई तैस पुड़ लगातार भरोसो कियोरो लोडे ज़ैने तैना बनाए। परमेशर हमेशा तैन केरते ज़ैन केनेरो वादो तैनी कियोरोए ते तै लगातार तैन केरेलो ज़ैन रोडूए।

5

?????????? ???? ???? ???? ???? ??

¹ अवं साथी बुजुर्गन सेइं इन ज़ोनू चाताई किजोकि अवं तुशशो ज़ेरो आई। मीं एप्पू तैना दुःख हेरोरेन ज़ैना मसीहे बडे पेइले झैल्ले। ज़ैखन तै दुबारां एज्जेलो, त अवं तैसेरे महिमा मां शामिल भोनोई। अवं तुशशो साथी बुजुर्ग भोने सेइं तुसन कां ई बिनती केरताई, ² ज़ेन्चरे पुहाल अपनि भैडडां हेरतन, तुस भी तेन्चरे हर एक्केरी हेरगेश केरा, ज़ैना परमेशेरे तुशशे रखवैली मां रखोरेन। इन अपने मेज़ीं सेइं केरा किजोकि परमेशर इन चाते। तुस इन एल्हेरेलेइ न केरा कि तुसन पुड़ दबाव बनाव गाते। ते इन कम एल्हेरेलेइ न केरा कि तुस कमाई केरनि चाथ, पन इस इच्छाई सेइं केरा कि तुस परमेशेरी ते लोकां केरि सेवा केरनि चातथ। ³ ते ज़ैना लोक तुसन सोंफे तैन पुड़ हकोमत न केरा, बल्के तैन केरे लेइ रोड़ी मिसालां बना। ⁴ ते ज़ैखन यीशु मसीह ज़ै इशशो प्रधान पुहालेरो ज़ेरोए, वापस एज्जेलो त तै तुसन तैन इनाम देलो ज़ेसेरी शोभा कधे खतम न भोली। ⁵ तेन्चरे हे जवान लोकव, तुस भी बुजुर्गां केरे अधीन राथ, तुस सारे एक्की होरेरी मद्दत बडे नर्म स्भावे सेइं केरा। किजोकि कोई पवित्रशास्त्रे मां पेढी बटते “परमेशर घमण्ड केनेबालां केरि खलाफ केरते, पन तै तैन केरे लेइ रोड़ो आए ज़ैना दीन आन।” ⁶ एल्हेरेलेइ अपनो आप परमेशेरे कां दीन बनाथ तै तुशशी हफ़ाज़त केनेरे लेइ शेक्ति बालोए, ज़ैस सेइं तै तुसन

ठीक वक्ते पुड़ आदर दे । 7 परमेशरे अपने परेशैनी ते फिकरां केरे बारे मां ज़ोथ, किजोकि तैस तुशू ध्यान आए । 8 खबरदार राथ, ते बीझे राथ, किजोकि तुशु दुश्मन शैतान तुसन पुड़ हमलो केरनेरे लेइ तियारे, कि तुस परमेशरे मन्नू शारा । तै गर्जनेबाले शेरे ज़ेरो तोपने लोरो कि केस मारे ते खाए । 9 तुस विश्वासे मां मज़बूत भोइतां तैसेरो मुकाबलो केरा, तैन विश्वासी लोकन याद रख्खा ज़ैना दुनियारे अलग-अलग टैरन मां आन, तैना भी तुशु ज़ेरो दुःख झैल्लने लोरेन । 10 हुनी परमेशर ज़ै सारे अनुग्रहे सेइं भेरतां, तैने अस हमेशारी महिमा मां शामिल भोनेरे लेइ चुनोरेम किजोकि इशु रिशुतो यीशु मसीह सेइं आए । थोडे वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, तै तुशु दिलन मज़बूत केरेलो ताके तुस मज़बूती सेइं तैस पुड़ विश्वास केरथ । 11 तै शेक्ति सेइं हमेशा राज़ केरेलो । आमीन ।

🔗🔗🔗 🔗🔗🔗🔗🔗

12 मीं सिलवानुसेरे महती सेइं ई निकड़ी ज़ेरि चिट्ठी लिखी ते तुसन जो भेज़ी, अवं तैस ज़ानताई तै मसीह मां वफादार ढ़ला आए, मेरे लिखनेरो मकसद ई आए कि तुशु होसलो बधेईं ते याकीन दूवेईं कि ज़ै तजरबो तुस केरने लोरोरेथ तै सच्च़े परमेशरेरे अनुग्रहेरो अक हिस्सो ए, इस अनुग्रहे मां मज़बूती सेइं बनोरे राथ । 13 बाबेल नगरेरे विश्वासी ज़ैना परमेशरे चुनोरेन ठीक तेन्च़ेरे ज़ेन्च़ेरे तुस चुनोरेथ, तैना तुसन जो नमस्कार ज़ोतन । मरकुस ज़ै मेरे मट्टेरो ज़ेरोए तुसन जो नमस्कार ज़ोते । 14 मसीहेरे प्यारे सेइं एक्की होरि जो नमस्कार केरा । अवं प्रार्थना केरताई परमेशर तुसन सेब्बन ज़ैन केरो रिशुतो मसीह सेइं साथी शान्ति दे ।

2 पतरस

???????? ???? ?

1 अवं शमौन पतरस, यीशु मसीहेरो दास ते प्रेरित आई, अवं तुशशे सेम्भी केरे लेइ लिखने लोरोई, तुस भी तैस कीमती विश्वासे मां शामिल जै अस केरतम, ई विश्वास असन यीशु मसीह, इशशे परमेशर ते मुक्ति देनेबाले जिरिये दित्तो जेव, जै असन धर्मी बनाते।

2 अवं प्रार्थना केरताई जेन्चरे तुस परमेशेरे ते प्रभु यीशुएरे ज्ञाने मां बद्धते गाथ, परमेशेरे तुसन अनुग्रह ते शान्ति जादे करां जादे दे।

???????? ???? ???? ???? ???? ???? ?

3 परमेशर अपने शक्ति सेई असन तैन सब दितोरू जैन असन परमेशेरे खुश केरनेरी जिनंदगी जीनेरे लेइ लोइते। इन भोइ बटते किजोकि अस परमेशेरे ज्ञानतम कि तैन अस अपने महिमा ते अपने रोडे गुना केरे मुताबिक तैसेरे लोक भोनेरे लेइ कुजोरेम। 4 इन सेम्भी केरे जिरिये परमेशेरे असन महान ते कीमती वरदानां दितोरन जैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेची बटतम, जैना लोकन नाश केरतन, ते अस परमेशेरे स्भावे मां शामिल भोइ बटतम। 5 एल्हेरेलेइ तुसेई न सिर्फ यीशु पुइ विश्वास कियोरो लोडे, बल्के होरि केरे लेइ भलाई केरनेरे लेइ सखत मेहनत भी कियोरी लोडे, तुसेई न सिर्फ तैन कियोरू लोडे जैन रोडू भोए, बल्के तुसेई एरे लोक बनोरू लोडे जैना ज्ञातन समझदैरी सेइ केन्चरे बर्ताव केरतन, 6 तुसेई सिर्फ इन न लोडे जानोरू कि समझदैरी सेइ केन्चरे बर्ताव केरतन, पन तुसेई अपनो आप कैबू भी कियोरो लोडे, तुसेई न सिर्फ अपनो आप कैबू मां लोडे कियोरो, बल्के मुसीबत मां सबर भी कियोरी लोडे, तुसेई न सिर्फ मुसीबत मां सबर कियोरी लोडे बल्के तुसेई एरी जिनंदगी भी जीयोरी लोडे जैस सेइ परमेशर खुश भोए। 7 तुसेई न सिर्फ एरी जिनंदगी जीयोरी लोडे जैस सेइ परमेशर खुश भोए, बल्के तुसेई एककी होरि विश्वासी लोकन सेइ अपने टब्बेरे लोकां केरो जेरो प्यार भी कियोरो लोडे, तुसेई एककी होरि सेइ न सिर्फ अपने टब्बेरे लोकां केरो जेरो प्यार कियोरो लोडे बल्के तुसेई सैरी लोकन सेइ प्यार कियोरो लोडे। 8 अगर तुस एन्चरे जीले त तुस इशशे प्रभु यीशु मसीह जानेले ते तुस इस्तेमाल भोनेबाले ते फलदार भोले। 9 पन अगर कोन्ची मां इना गुण न भोन त तै एरे मैनेरो जेरोए जै कानोए, ते तैन बिसोरूए कि परमेशेरे तै तैसेरे पुराने पापन करां साफ कियोरोए। 10 एल्हेरेलेइ हे ढलाव ते बेइनव, एन्चरे कम केरनेरे लेइ होरि जादे मेहनत केरा, जैस सेइ तुस अपनो आप साबत केरा कि परमेशेरे तुस हकीकति मां तैस पत्ती चलनेरे लेइ चुनोरेथ ते तैसेरे लोक भोनेरे लेइ चुनोरेथ। अगर तुस इना गुणा केरे मुताबिक केरेले त तुस कधी मसीह पुइ भरोसो केरनो न शारेले। 11 ते परमेशर भी तुसन तैस राज्जे मां बडे जोशे सेइ कबूल केरेलो जैडी यीशु मसीहे, जै इशशो प्रभु ते इशशो मुक्ति देनेबालोए, तै राज्जेरो जेरो हमेशा राज्जेरेलो।

???????? ???? ?

12 चाए तुस इना सैरी गल्लां ज्ञानतथ, ते सच्चि शिक्षा तैस मां तुस मजबूती सेइ बनोरे रातथ, जै लोकेई तुसन शिखालोरी, अवं तैन केरे बारे मां लगातार याद किरैइलो। 13 अवं ज्ञानताई जांतगर अवं जीतोई, तैन केरे बारे मां लगातार तुसन जोनू सही आए, ताके तुस तैन न बिसरथ। 14 किजोकि अवं ज्ञानताई, अवं जल्दी मरनोई, किजोकि इशशे प्रभु यीशु मसीहे मीं एल्हेरे बारे मां साफ जोवरूए। 15 एल्हेरेलेइ अवं इना गल्लां केरे बारे मां जोनेरी बडी कोशिश केरताई, ताके तुस मेरे मरनेरां पत्ती इना सैरी गल्लां याद केरि बटथ।

???????? ???? ???? ?

16 जैखन असेई प्रेरितेई तुसन अपने प्रभु यीशु मसीहेरी शक्ति ते एजनेरी खबर शुनावरी थी, त असेई च्लैकी सेइ बनेवरी कहैनी न जोई बल्के असेई मसीहेरी तैस महिमारे बारे मां जोवं जै असेई अपने एछ्छेई सेइ लाई। 17-18 जैखन अस तैस सेइ साथी पवित्र पहाडे पुइ थिये जैखन बाजी परमेशेरे तैस आदर ते महिमा दित्ती। तैस वक्ते परमेशेरे करां तैस महान महिमाई मरां आवाज आई, “इन मेरू ट्लारू मट्टूए जैस सेइ अवं खुश आई।” असेई एप्पू ई आवाज स्वर्गेरां शुनी। 19 अस नेबी केरू वचन भी ज्ञानतम, जैन तैनेई मसीहेरे बारे मां जोवं तैन बिलकुल सच्चे, तैना इस बारे मां पक्कू केरतन जैन असेई तुसन तैसेरे वापस एजनेरे बारे मां शिखालू। तुसेई तैना गल्लां ध्याने सेइ शुनोरी लोइन, जेन्चरे दीयो आंधरे मां बलते ते लोकन सही बत्तां गानेरे लेइ मद्दत केरते, इन

वचन तुशशी इन ज्ञान्नेरे लेइ मदत केरेलू कि सन्न कुने। तुसेई तैन वचन रोडे चारे शुनोरे लोइन ज्ञांतगर इशशो प्रभु यीशु मसीह वापस न एज्जे। तैसेरू एजनू एरू भोलू जेन्चरे नंवे दिहैडरी लौ भोली, ते तै झेझेरे तारेरो जेरो भोलो। तैस वक्त तैसेरी लौ तुशशे दिलन मां चमकेली त कने तुसन पुड़ परमेशेरे बांदी केरेली।²⁰ पन इन ज़रूरी कि तुस नेबी केरू वचन जैन तुस पवित्रशास्त्रे मां पढतथ, तैन वचन तैन केरे अपने खियाल नई।²¹ किजोकि कोई भी भविष्यवाणी मैन्हु केरे मेर्जी सेइ न भोइ, पन भक्त लोक पवित्र आत्मा अगवैई सेइ परमेशेरे तरफां सन्देश ज़ोते थिये।

2

???? ???? ?

1 ते जेन्चरे बडे पेइले इस्राएली लोकन मां झूठे नबी थिये, तेन्चरे तुसन मां भी झूठे उस्ताद भोले। तैना बल्हे चारे तुसन मां एज्जले ते परमेशेरे बारे मां नाश केरनेबालू झूठ ज़ोले। इडी तगर तैना मसीहेरो इन्कार केरेले कि तै प्रभु नई जैने तैना पापन करां आज़ाद किये। एन्चरे केरने सेइ तैना एप्पू पुड़ विनाश आनेले।² परमेशेरे बडे लोक तैन इन झूठे उस्तादां केरे बुरे कम्मां केरि नकल केरेले, ते तैन बुरां कम्मां केरे वजाई सेइ सच्चे बतारे खलाफ बुरी गल्लां ज़ोले।³ इना उस्ताद बडे लालची भोले ते तैना तुसन बनेवरी कहैनी शुनेइतां तुसन धोखो देले, ताके तुसन करां पेइसो हासिल केरन। परमेशेरे बडे पेइले ई फैसलो कियोरो कि तैन सज़ा दे ते तै इन केरनेरे लेइ तियार भी आए, तैसेरे एज्जेने मां किछ भी चिर नई, ते तैन केरो विनाश बलगतोए। तै पक्को तैन नाश केरेलो।⁴ तुस ज्ञानतथ बडे पेइले किछ स्वर्गदूतेई परमेशेरो हुक्म न मन्नो, जैन तैनेई कियू तैसेरेलेइ परमेशेरे तैन सज़ा दिती। तैने तैना नरके मां छड्डे, ते तैस दिहैडी तगर आंधरे मां कैद किये ज्ञांतगर तै तैन केरो इन्साफ न केरे ते तैन सज़ा न दे।⁵ तुस इन भी ज्ञानतथ जैना लोक बडे पेइले इस दुनियाई मां जीते थिये तैनेई परमेशेरो डर न मन्नो, परमेशेरे तैन केरां बुरां कम्मां नज़रानदाज़ न कियां। बल्के तैनी पानी भेजतां तैन सज़ा दिती जैस मां सारी धरती छप्पी ते तैना सारे नाश भोए। पन तैने तैन मरां नूहे समेत अठ लोक बचाए, जैने धार्मिकतारो प्रचार कियो।⁶ परमेशेरे सदोम ते अमोरा नगरन सज़ा दिती, तैना भस्म भोइतां मांजन बना, एन केरतां परमेशेरे लोक खबरदार किये, कि जैना तैसेरे हुक्म न मनन तैन सेइ भी एरू भोलू।⁷ पन सदोम ते अमोरा नगरन नाश केरने करां पेइले तैने धर्मी लूत नगरे करां बेइर कढो ते बचाव। लूत तैन लोकन सेइ खुश न थियो किजोकि तैना कोई भी कानून न थिये मन्ते ते बेशर्म कम्मां केरते थिये।⁸ (लूत धर्मी मैन्हु थियो, पन तै रोज़ तैन बुरे लोकन मां रातो थियो, एल्हेरेलेइ जैन बुरी गल्लां तै शुनतो थियो ते हेरतो थियो तैन सेइ तैसेरो रोडो दिल बडो दुखी भोतो थियो)।⁹ इन सैरी गल्लां जैना परमेशेरे कियोरिन इन हिरैतिन कि प्रभु परमेशर अपने धर्मी लोकन तैन केरे मुसीबतरे वक्त तैन सम्भालेलो, ते इन्साफेरे दिहाडे तगर बुरे लोकन सज़ा देतो रालो।¹⁰ परमेशर तैन झूठे उस्तादन पक्की सज़ा देलो, जैना इना गल्लां अपने गलत ते बुरी खवैइशन सेइ केरतन, ते तैना परमेशेरे अधिकारे जै तैन पुड़े घटया समझतन, ते तैना ढीठ ते घमण्डी आन। तैना स्वर्गेरे प्राणेरी केरे बारे मां बुरू ज़ोने करां न डरन।¹¹ स्वर्गदूतां केरे बारे मां सोचा, तैना तैन झूठे उस्तादन करां बडे शेक्ति बालेन। तैना ज़ैखन इन झूठे उस्तादन पुड़ परमेशेरेरी हज़ूरी मां दोष लातन, त गलत ज़बान इस्तेमाल न केरतन।¹² पन इना झूठे उस्ताद जंगली जानवरां केरे ज़ेरन, इना जानवर न ज्ञानन केन्चरे सोचोरू लोडे तैन केरो मकसद सिर्फ टलानू ते मारनू भोते। इन लोक भी जैन तैन केरे मने मां एइते तैन केरतन, ते जैन गल्लन न समझन तैन केरे बारे मां बुरू ज़ोतन, तैना पक्के नाश भोनेन।¹³ तैन नाश भोनू तैन केरे कियोरे नुकसानेरो इनामे। तैन भर दूपार्न एश केरनो रोडो लगते, तैना तुसन मां कलंक ते दाग आन। इडी तगर कि तैना तुसन सेइ धामन मां खातन-पीतन फिरी भी धोखो देने मां खुश भोतन।¹⁴ तैना जैस कुआन्शी भी लातन तैस सेइ बदमाशी केरनि चातन। तैना पाप केरने लेइ मौके तोपने कधी न शारन। तैना तैन लोकन धोखो देतन जैना मसीह पुड़ मज़बूती सेइ विश्वास न केरन ते तैन पापे मां नेतन। तैन केरि जादे करां जादे बुरी इच्छां केरे वजाई सेइ परमेशर तैन सज़ा देलो।¹⁵ तैनेई सही केरनू बंद कियोरूए, ते तैनेई तेन्चरे बुरां कम्मां केरनां शुरु कियां जेन्चरे बडे पेइले बओरेरे मट्टे बिलामे कियोरां थियां। तैनेई बुरी चीज़ां केरतां पेइसे कमाने पसंद किये।¹⁶ परमेशेरे तै तैसेरे बुरैडारे लेइ डांटो जै तैनी कियोरी थी, तैसेरे गेधां मैन्हु केरि भाषाई मां गल की ते नबी गलत केरने करां रोको।

17 इन झूठे उस्ताद शुक्कोरे खूआं केरे जेरे बेकार आन, ते तैना बेफैइदी बिदलारे जेरे आन, जैस झड़ी भोने करां पेइले हवा दूर उडारती। परमेशरे तैन केरे लेइ एरी ठार तियार कियोरी जै बिलकुल आंधरीए। 18 जैखन तैना लोकन शिखालतन त तैना बेकार ते घमण्डी लफज इस्तेमाल केरतन, तैना लोकन ज़ोतन कि तैना बेइज्जत चीजां केरि बटतन जैना तैन केरे जिसम केरने चातन, तैना लोकन धोखो देइतां पाप करातन जैना इस किसमेरी बुरी ज़िन्दगी करां बचोरेन। 19 तैना तैन लोकन सेइ ई वादो केरतन अगर तैना तैन केरि मनन, त तैना जैन चातन तैन केरि बटतन, किजोकि तैन केरो कोई मालिक नई। पन इन सच्चे, तैन एप्पू भी अपने बुरे रूवाजां केरे गुलामन, किजोकि जै कोई चीज केरनेरो आदी त तै तैस केरनेरो गुलाम बनते। 20 जैखन लोकेई यीशु मसीह तैन केरो प्रभु ते मुक्ति देनेबालोए पिशानो, त तैना दुनियारे बुरैई करां छुटोरे थिये। पन तैना फिरी तैन बुरी चीजां केरने मां शामिल भोए ते तैना बुरी चीजां तैन कैबू केरतन, ते तैन केरि आखरी हालत पेइली हालती करां भी बुरी भोइ। 21 ज़ोनेरो मतलब ई आए, किजोकि जैन लोकेई मसीहे पुड़ विश्वास केरनो शारो, परमेशर तैन, तैन लोकन करां जादे सजा देलो, जैनेई कधे विश्वास नई कियोरो, तैन लोकां केरे लेइ रोडू भोथू कि तैना कधी न ज़ानेथे कि धार्मिकतारी ज़िन्दगी केन्चरे ज़ीतन। हुनी तैना ज़ानतन कि सही कुन आए, पन तैना परमेशरे हुक्मन न मनन जैना असेई प्रेरितेई शिखालोरेन। 22 जैन तैनेई कियूं तैन केरे लेइ इना दूई कहावत ठीक आन, “तैना कुत्रां केरे जेरे आन जैना उलटी केरतां फिरी खातन, ते तैना निहावरे सूरं केरे जेरे आन जैना फिरी चिकरी मां गातन।”

3

????????? ?????????? ??????????

1 हे ट्लारव, अवं दुइयोवं चिट्ठी लिखने लोरोई, अवं दुइये चिट्ठन मां तुसन किछ गल्लां याद करेइतां होसलो देनेरी कोशिश केरने लोरोई। जैना तुसेई पेइली शिखोरिन ताके तुस सही तरीके सेइ सोचथ। 2 अवं इन एल्हेरेलेइ लोरोई केरने, कि अवं तुसन तैना गल्लां याद करैनी चाताई जैना बड़े पेइले नेबेई ज़ोरिन ते इश्शे प्रभु ते मुक्ति देनेबाले यीशु मसीहेरी शिक्षा आन। जैना प्रेरित तुसन कां आए तैनेई तुसन शिखैलोरिन। 3 सेभन करां खास गल ई आए, कि तुस ज़ानथ, कि आखरी दिहाइन मां मसीहेरे वापस एजने करां पेइले, लोक तुश्शो मजाक बनाने कि तुस विश्वास केरतथ कि मसीह दुबारा वापस एजनोए, तैना आदी भोनेरे वजाई सेइ एना बुरी चीजां केरेले जैन सेइ तैना खुश भोतन। 4 तैना ज़ोले, “तैसेरो एजनेरो वादो सच्च नई, तै बिलकुल भी नई एजनो! किजोकि जैना शुरुआती मां इश्शे मसीही बुजुर्ग थिये तैना सब मरे, पन किछ भी बेदलोवं। सब किछ तेरहु आए, जेन्चरे दुनिया बनानेरे वक्ते करां थियूं।” 5 तैना एन एल्हेरेलेइ ज़ोतन किजोकि तैना इन बिस्सरनू चातन, कि बड़े पेइले अम्बर ते धरती परमेशरे हुक्मे सेइ बनाव जेव। तैन्ने धरती पैनी मरां कढी ते पैनी करां अलग की। 6 फिरी तैनी पैनेरो इस्तेमाल कियो कि पुरानी दुनिया बड़े तूफाने सेइ नाश केरे। 7 पन परमेशरे अम्बर ते धरती तैस्से हुक्मेरे ज़िरिये रखोरेन, ताके तैन अग्गी सेइ नाश केरे। तै तैन तैस दिहैड़ी तगर रखेलो जेइस तै तैन लोकां केरो इन्साफ केरेलो ते नाश केरेलो जैना तैसेरी आदर न केरन।

8 हे ट्लारव, जैना गल्लां अवं हुन्ना ज़ोने लोरोई तैन नज़रानदाज़ न केरा, कि प्रभुएरी नज़री मां अक दिहाड़ी हज़ार सालन बराबरे ते हज़ार साल एक्की दिहैडरे बराबर आन (तैना तैसेरेलेइ अक्कां जेरे आन)। 9 किछ लोक सोचतन कि प्रभु अपनो वापस एजनेरो वादे पूरे केरने मां चिर लोरो लाने। पन परमेशर एन्चरे चिर नई लाने लोरो, बल्के इसेरे बदले तै तुसन सेइ सब् लोरो केरने। किजोकि तै न चाए कोई भी नाश भोए। पन तै चाते कि हर कोई अपनो मन बदले त कने गलत केरनू शारे ते तैस कां एज्जे। 10 पन मसीह पक्को वापस एज्जेलो, तै अचानक एज्जेलो जेन्चरे चोर अचानक एइते। तैस वक्त अम्बर मां गर्जनेरी जेरि शोर भोली, ते अम्बर गायब भोइ गालू। सब किछ जैन अम्बरे मां आए, दिहाड़ो, चाँदनी, तारे सब अग्गी सेइ बिलकुल नाश भोलू, तैस दिहाड़े परमेशर इन्साफ केरनेरे लेइ तैन सब किछ बांदू केरेलो जैन लोकेई इस दुनियाई मां कियोरूए। 11 एल्हेरेलेइ कि परमेशर इना सैरी चीजां पेक्की नाश केरेलो जेन्चरे मीं ज़ोवं, एल्हेरेलेइ तुसेई पवित्र ज़िन्दगी ज़ीयोरी लोडे ते अपनो आप परमेशरे सॉफोरो लोडे। 12 जेन्चरे तुस तैस दिहैड़ी बलगने लोरेथ जेइस परमेशर दुनियारो इन्साफ केरने एज्जेलो, ते बड़ी कोशिश केरा कि तै दिहाड़ी जल्दी एजनेरे लेइ। तैस दिहाड़े परमेशर अम्बरे अग्गी सेइ फुकेलो ते नाश केरेलो त कने अम्बरेरी सैरी चीजां अगारे गेरमी सेइ गेलेली। 13 पन अस विश्वासी नंवे अम्बरे ते नंवे धरती बलगने लोरेम जेसेरो वादो परमेशरे कियोरो, जैड़ी लोक परमेशरेरे इच्छाई सेइ ज़ीयेले।

११११११ ११ ११११११ १११

14 एल्हेरेलेइ, हे ट्लारव, जेन्चरे तुस तैस दिहैडी बलगने लोरेथ जेइस परमेशर इस दुनियारो इन्साफ केरेलो, त तुस पूरी कोशिश केरा कि तुस शैन्ति सेइं परमेशरेरे नजरी मां शुद्ध ते बेइलजाम भोथ। 15 ते इश्शे प्रभुएरे सबरारे बारे मां सोचा तैने तुसन मौको दित्तो, कि तुस एजनेबाले इन्साफे करां बच्चथ। इन इश्शे ट्लारे विश्वासी सैथे पौलुसे भी तुश्शे लेइ तैस समझारे मुताबिक अपने चिट्ठी मां लिखोरू जै परमेशरे तैस दित्तोरीए। 16 तैने अपने सैरी चिट्ठन मां जैना तैने विश्वासी लोकन जो लिखी, इना सैरी गल्लां तुसन लिखी। पन किछ तैसेरी लिखोरी गल्लां समझनी मुश्किल आन। तैन लोकां केरे लेइ जैनेई रोडे चारे नई पढ़ोरू जैन इस बारे मां पक्को पतो नई कि तैना कुन विश्वास केरतन, तैना गलत तरीके सेइं इन मुश्किल गल्लां केरे मतलब कढतन, जेन्चरे तैना पवित्रशास्त्रेरी किछ गल्लां केरो गलत तरीके मतलब समझातन। एन्चरे केरने सेइं तैना अपनो आप इस काबल बनातन कि परमेशर तैन नाश केरे। 17 एल्हेरेलेइ, हे ट्लारव तुस पेइले ज्ञानतथ कि इना गल्लां भोनिन, एल्हेरेलेइ तुस हुशार राथ ताके जैना लोक कानूने न मनन तैना तुसन झूठ जोइतां धोखो न देन, ते तुस सेच्चि गल्लन विश्वास केरनो शारथ। 18 पन तुस इश्शे प्रभु ते मुक्ति देनेबाले यीशु मसीहेरे अनुग्रह ते ज्ञाने मां बद्धते गाथ। तैसेरी महिमा हुन्ना भी भोए, ते हमेशा भोती राए। आमीन।

1 यूहन्ना

११११११११ ११११

1 अस तैस एक्की वचनेरे (मैनेरे) बारे मां लिखने लोरेम जै ज़िन्दगरो वचन आए, जै शुरू करां थियो, जै असेई शुनो, ते जै अपनि एच्छेई सेइं लाव, बल्के जै असेई ध्याने सेइं लाव, ते तैस सेइं अपने हथ लाए। 2 (ई ज़िन्दगी बांदी भोइ, ते असेई लाई, ते अस तैसेरी गवाही देतम, ते तुसन तैस हमेशारी ज़िन्दगरी खबर शुनातम, जै बाजी सेइं साथी थी, ते असन पुड़ बांदी भोइ)। 3 जैन किछ असेई यीशुएरे बारे हेरू ते शुनू तैसेरी खबर तुसन भी देतम, एल्हेरेलेइ कि तुस भी असन सेइं साथी शामिलथ, ते इशशी ई शामिलीत बाजी सेइं साथी, ते तैसेरे मट्ठे यीशु मसीह सेइं साथीए। 4 ते इना गल्लां अस एल्हेरेलेइ लिखतम, कि इशशी खुशी पूरी भोए।

११११ ११११ ११११११

5 जै खबर असेई प्रभु यीशु करां शुनी, ते तुसन शुनातम, तै ईए; कि परमेशर लोअरो जेरो शुद्धे, ते तैस मां किछ भी आंधेरू (बुराई) नई। 6 अगर अस ज़ोम, कि तैस सेइं साथी इशशी शामिलीते, ते फिरी आंधरे मां चलतम, त अस झूटेम, ते सच्चे पुड़ न चलम। 7 पन अगर जेन्चरे परमेशर लोई मांए, तेन्चरे अस भी लोई मां ज़ीम, त एक्की होरि सेइं शामिल रातम ते तैसेरे मट्ठे यीशु मसीहेरो खून असन सेभी पापन करां शुद्ध करते। 8 अगर अस ज़ोम, कि असन मां कोई पाप नई, त अपने आपे धोखो देतम, ते असन मां सच्चे नई। 9 अगर अस अपने पाप मन्तम, त तै इशशे पाप माफ़ करने, ते असन सेभी अधर्मे करां शुद्ध करने मां वफादार ते धर्मीए। 10 अगर अस ज़ोम कि असेई पाप नई कियोरो, त परमेशरे झूठो ठहरातम, ते तैसेरू वचन असेई कधी कबूल नई कियोरू।

2

१११११ १११११ १११११११ ११११११११११ १११

1 हे मेरे ट्लारे बच्चव, अवं इना गल्लां तुसन एल्हेरेलेइ लिखताई, कि तुस पाप न केरा, ते अगर कोई पाप केरे, त बाजी परमेशरे कां इशशो अक महतगारे, मतलब धर्मी यीशु मसीह। 2 तै इशशे पापां केरो छुटकारेरे लेइ बलिदान भोव, ते सिर्फ इशशे लेइ नई, बल्के सैरी दुनियारे पापां केरे लेइ भी। 3 अगर अस तैसेरे हुक्मन मन्म, त इस सेइं अस समझे गाले कि अस तैस ज्ञानतम। 4 जै कोई इन ज़ोते, “कि अवं तैस ज्ञानताई,” ते तैसेरे हुक्मन न मन्ने, तै झूठोए, ते तैस मां सच्च नई। 5 पन जै कोई तैसेरे वचने पुड़ चलते, त तैस मां सच्चे परमेशरेरो प्यार सिद्ध भोरोए, असन इस सेइं पतो चलते, कि अस तैस मां आम। 6 जै कोई इन ज़ोते, कि अवं तैस मां बनोरो राताई, त तैनी तेन्चरे ज़ीयोरू लोडे जेन्चरे यीशु मसीहे ज़ीयोरूए।

११११११११ ११११११११

7 ट्लारव, अवं तुसन कोई नंवो हुक्म न लिखी, पन तैए पुरानो हुक्म जै पेइलो तुसन मैल्लो; ई पुरानो हुक्म तैन वचने, जैखन तुसेई मसीह पुड़ विश्वास कियू। 8 फिरी भी अवं तुशशे लेइ नंवो हुक्म लिखताई, किजोकि एन सच्च आए, जैन मसीह मां ते तुसन मां भी लेइहोवं, किजोकि अन्धकार मिटतो गाते ते सच्चेरी लौ हुनी चमकने लोरीए। 9 जै इन ज़ोते, कि अवं लोई मां आई ते विश्वासी द्लाए सेइं बैर रखते, तै हेजू तगर आंधरे मां आए। 10 जै कोई अपने द्लाए सेइं प्यार करते, तै लोई मांए, तैसेरेलेइ पाप केनेरे लेइ कोई वजा नई। 11 पन जै कोई अपने द्लाए सेइं बैर रखते, तै आंधरे मांए, ते तै आंधरे मां चलते; ते न ज़ाने, कि कोरां गाते, किजोकि आंधरे तैसेरी एच्छी कैनी केररिन।

12 हे बच्चाव अवं तुसन एल्हेरेलेइ लिखताई, कि यीशु मसीहेरे नंवे सेइं तुशशे पाप माफ़ भोए। 13 हे बुजुर्गव अवं तुसन एल्हेरेलेइ लिखताई, कि जै शुरू करां आए तुस तैस ज्ञानथ, हे जवानव, अवं तुसन एल्हेरेलेइ लिखताई कि तुसेई तैस शैताने पुड़ ज़ींत हासिल केरीए, हे बच्चाव अवं तुसन एल्हेरेलेइ लिखताई कि तुसेई बाजी परमेशर पिशानो। 14 हे बाजव, अवं तुसन एल्हेरेलेइ लिखताई, कि जै पेइलोए तुसेई पिशानो, हे जवानव, अवं तुसन एल्हेरेलेइ लिखताई, कि तुस मज़बूतथ, ते परमेशेरू वचन तुसन मां बनोरू रहते, ते तुस शैताने करां ज़ींतोरेथ।

१११११११११ १११११ १११११११ १ ११११११

15 तुस न दुनियाई सेइं ते न दुनियारी चीज़न सेइं प्यार केरा, अगर कोई दुनियाई सेइं प्यार करते, त तैस मां बाजी परमेशेरो प्यार नई। 16 किजोकि जैन किछ दुनियाई मां आए, मतलब जिसमेरी खुवैइश, ते एच्छी केरि खुवैइश ते ज़िन्दगरू घमण्ड, तैन बाजी परमेशेरे तरफां नई पन दुनियारे तरफां। 17 दुनिया ते तैसेरी खुवैइश दुइये मिटती गैतिन, पन जै परमेशेरे मेर्जी पुड़ चलते, तै सदा बनोरो रालो।

???????? ???? ???? ?????

18 हे बच्चव, ई आखरी वक्ते कि मसीह वापस एजनाए, ते जेन्चरे तुसेईं शुनोरूए, कि मसीहेरी खलाफत केरनेबालो एजनेबालोए, तैसेरे मुताबिक हुना भी बड़े मसीहेरी खलाफत केरनेबाले उठोरेन, इस सेइं अस ज्ञानतम, कि ई आखरी वक्ते कि मसीह वापस एजनाए। 19 तैना मसीहेरी खलाफत केरनेबाले लोक निस्से त असने मरां, पन तैना असन मरां न थिये, किजोकि अगर असन मरां भोथे, त असन सेइं साथी राथे, पन निस्से एल्हेरेलेइ कि इन बांदू भोए कि तैना सब असन मरां नई। 20 पन मसीहेरे ज़िरिये तुसन पवित् आत्मा दित्तोरोए, तैसेरे वजाई सेइं तुस सब सच्च ज्ञानतथ। 21 मीं तुसन एल्हेरेलेइ नई लिखोरू, कि तुस सच्चे न ज्ञानतथ, पन एल्हेरेलेइ, कि तैस ज्ञानतथ, ते एल्हेरेलेइ कोई झूठ, सच्चेरे पासेरां नई। 22 झूठो कौने? सिर्फ तै, जै यीशुएरू मसीह भोनेरो इन्कार केरते, ते मसीहेरी खलाफत केरनेबालो तैए आए, जै बाजी परमेशेरी ते कने मट्टेरो यानी यीशुएरो इन्कार केरते। 23 जै मट्टेरो इन्कार केरते तैस कां बाजी परमेशर भी नई, जै मट्टे मन्ते, तैस कां बाजी परमेशर भी आए। 24 जैखन तुसेईं यीशु मसीह पुड़ विश्वास कियूं, तुसेईं जै सच्ची शिक्षा शुरु करां शुनोरोए, तैए तुसन मां बनोरी राए, त तुस भी मट्टे मां, ते बाजी परमेशेरे मां बनोरे राले। 25 ते जेसेरो वादो परमेशेरे कियोरोए, तै हमेशारी ज़िन्दगीए।

26 मीं इना गल्लां तुसन तैन करां खबरदार रानेरे लेइ लिखी, जैना लोक तुसन झूठी शिक्षारे ज़िरिये टपलातन। 27 ते तुशू तैन अभिषेक, जैन तैसेरे तरफां केरूए, तुसन मां बनोरू रहते; ते तुसन एल्हेरी ज़रूरत नई, कि कोई तुसन शिखाले। बल्के जेन्चरे तैन अभिषेक जैन तैसेरे तरफां कियोरूए, तुसन सब गल्लां शिखालते, ते इन सच्चे, ते झूठ नई, ते जेन्चरे तैने तुसन शिखालोरूए, तेन्चरे तुस तैस मां बनोरे रातथ।

???????? ???? ?

28 हे बच्चव, तैस मां बनोरे राथ, कि जैखन इन बांदू भोए, त असन दिलेरी भोए ते अस तैसेरे एजने पुड़ तैसेरे सामने शरमिनदे न भोम। 29 अगर तुस ज्ञानतथ, कि मसीह धर्मीए, त इन भी ज्ञानतथ, कि जैना धार्मिकतारां कम्मां केरतन, तैना परमेशेरे बच्चेन।

3

1 हेरा बाजे परमेशेरे असन सेइं केरो प्यार कियो, कि असन जो परमेशेरे बच्चे ज़ोन, ते अस अहम भी, एल्हेरेलेइ दुनियारे लोकेई अस न पिशाने कि अस परमेशेरे बच्चेम, किजोकि तैनेई बाजी परमेशर भी न पिशानो। 2 हे ट्लारव, हुनी अस परमेशेरे बच्चेम, ते हेजू तगर इन बांदू नई भोरू, कि अस केरे भोनेम! इन ज्ञानतम, कि जैखन यीशु मसीह बांदो भोलो त अस भी तैसेरे ज़ेरे भोमेले, किजोकि तैस तेरहे लहमेले ज़ेरो तै आए। 3 ते जै कोई भी मसीह पुड़ ई उमीद रखते, तै अपनो आप तेरहो पवित् केरते, ज़ेरो मसीह पवित् आए।

4 जै लगातार पाप केरतो रहते, तै मूसेरे कानूनेरो इन्कार केरते, ते पाप त कानूनेरो इन्कार केरनो। 5 ते तुस ज्ञानतथ, कि यीशु मसीह एल्हेरेलेइ अव, कि पापन दूर केरे, ते तैस मां पाप नई। 6 जै तैस मां बनोरो रहते, तै लगातार पाप न केरे, जै लगातार पाप केरते, तै न समझे कि मसीह कौन आए, ते न तैसेरो तैस सेइं रिशतोए। 7 ट्लारे बच्चव, केन्चरे धोखे मां न एजाथ, जै धार्मिकारां कम्मां केरते, तैए मसीहेरो ज़ेरो धर्मीए। 8 जै कोई लगातार पाप केरते, तै शैतानेरे तरफांए, किजोकि शैतान शुरुआती करां पाप केरतो ओरोए, परमेशेरू मट्टू एल्हेरेलेइ अव, कि शैतानेरे कम्मन खतम केरे। 9 जैना परमेशेरे बच्चेन तैना लगातार पाप न केरन, किजोकि परमेशेरो सुभाव तैन मां बनोरू रहते, ते तैना पाप केरि न सकन, किजोकि तैना परमेशेरे बच्चेन। 10 इस्से सेइं परमेशेरे बच्चे, ते शैतानेरे बच्चे पिशैनोतन, जैना धार्मिकता कम्मां न केरन, तैना परमेशेरे सेइं नई, ते न तै जै अपने दूलाए सेइं प्यार न केरे।

???? ???? ???? ???? ?

11 जै खबर तुसेई पेइली शुनी, तै ईए, कि अस एक्की होरि सेइं प्यार रखम। 12 ते आदमेरे मट्टेरे कैनेरे जेरे न बनम, जै तैस शेताने सेइं थियो, ते जैने अपनो ढला मारो, ते तै कोस वजाई सेइं मारो! एल्हेरेलेइ कि तैसेरां कम्मां बुरां थियां, ते तैसेरे ढलाएरां कम्मां रोड़ां थियां।

13 हे ढलाव, अगर दुनियारे लोक तुसन सेइं बैर करते त हैरान न भोथ। 14 अस ज्ञानतम, कि अस मौती करां पार भोइतां ज़िन्दगी मां पुजोरेम, किजोकि अस ढलान सेइं प्यार रखतम। जै प्यार न रखे, तै मौतरे हालती मांए। 15 जै अपने ढलाए सेइं बैर करते, तै खूनी आए, ते तुस ज्ञानतथ, कि कोन्ची खूनी मां हमेशारी ज़िन्दगी न राए। 16 असेईं प्यार इस्से सेइं जानो, कि यीशु मसीह इश्शे लेइ अपने प्राण दित्ते, एल्हेरेलेइ इश्शो भी ढलां केरे लेइ प्राण देने फर्जे। 17 पन जैस कां दुनियारी जेइदाद भोए, त तै अपने ढलाए जैस जरूरत भोए, तैस हेरतां तैस पुड़ तरस खानो न चाए, त तैस मां परमेशेरो प्यार केन्चरे बनोरो रेइ बटते? 18 हे ट्लारे बच्चव, अस सिर्फ वचन ते जुबानी सेइं नई, पन कम्मन ते सच्चे सेइं भी प्यार केरम।

????????????????

19 जैखन अस होरन सेइं प्यार केरमेले एस्से सेइं अस ज्ञानमेले, कि अस सच्चेरेम, ते जैस गल्ली मां इश्शो जमीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले। 20 किजोकि परमेशर इश्शे मने करां बड़ोए, ते सब किछ ज्ञानते। 21 हे ट्लारव, अगर इश्शो मन असन दोष न दे, त असन परमेशेरे सामने दिलेरी भोतीए। 22 ते जैन किछ अस मगतम, तैन असन तैस करां मैलते, किजोकि अस तैसेरे हुक्म मन्तम, ते जैन तैस पसंदे तैन केरतम। 23 ते तैसेरो हुक्म ईए कि अस तैसेरे मट्टे यीशु मसीहेरे नव्वे पुड़ विश्वास केरम ते जेन्चरे तैने असन हुक्म दित्तो तैसेरे मुताबिक एक्की होरि सेइं प्यार केरम। 24 ते जैना परमेशेरो हुक्म मन्तन, तैना परमेशेरे मां, ते परमेशर तैन मां बनोरो रहते, ते इस्से सेइं, मतलब तैस पवित्र आत्मा सेइं जै तैने असन दित्तोरोए, अस ज्ञानतम, कि तै असन मां बनोरो रहते।

4

????????

1 हे ट्लारव, हर एक्की मैनेरू याकीन न केरा जै दावो करते कि परमेशेरी आत्मा तैस मां आए, बल्के आत्मां अजमाथ कि तै परमेशेरी तरफांए कि नई; किजोकि बड़े झूठे नबी दुनियाई मां निसोरेन। 2 परमेशेरी आत्मा तुस इस रीति सेइं पिशैनी बटतथ, कि जै आत्मा इन मन्ने, कि यीशु मसीह जिसमे मां ओरोए तै परमेशेरे तरफांए। 3 ते जै आत्मा यीशु न मन्ने, तै परमेशेरे तरफां नई, ते तैए मसीहेरी खलाफत केरनेबाली आत्माए, जेसेरे बारे मां तुसेईं शुनोरू, कि तै एजने बालीए, ते अज भी दुनियाई मां आए। 4 हे ट्लारे बच्चव, तुस परमेशेरे लोक आथ, ते तुसेईं तैन झूठन पुड़ ज़ीत हासिल कियोरीए, किजोकि पवित्र आत्माारी शक्ति जै तुसन मांए तै शैतानेरे शेक्ति करां बड़ो, जै दुनियाई पुड़ राज करते। 5 तैना झूठे नबी दुनियारेन, एल्हेरेलेइ तैना दुनियारी गल्लां ज़ोतन, ते दुनियारे लोक तैन केरि शुन्तन। 6 अस परमेशेरेम, जै परमेशेरे ज्ञानते, तै इश्शी शुन्ते, जै परमेशेरे न जाने तै इश्शी न शुने, एल्हेरेलेइ अस तैस आत्माई जै सच ज़ोतीए ते जै आत्मा झूठ ज़ोतीए पिशानतम।

????????????????

7 हे ट्लारव, अस एक्की होरि सेइं प्यार केरम; किजोकि प्यार परमेशेरे करां आए, जै कोई प्यार केरते, तै परमेशेरो बच्चोए, ते परमेशेरे ज्ञानते। 8 जै होरन सेइं प्यार न केरे, तै परमेशेरे न जाने, किजोकि परमेशर प्यारे। 9 जै प्यार परमेशेरे असन सेइं केरते, तै इस सेइं बांदो भोव, कि परमेशेरे अपनू अकेल्लू मट्टू दुनियाई मां भेजू, कि तैस पुड़ विश्वास केरने सेइं असन हमेशारी ज़िन्दगी मैल्ले। 10 प्यार इस सेइं नई कि असेईं परमेशेरे सेइं प्यार कियो, पन इस मां आए, कि तैने असन सेइं प्यार केरो, ते इश्शे पापां केरे छुटकारेरे लेइ अपनू मट्टू भेजू। 11 हे ट्लारव, जैखन परमेशेरे असन सेइं एरो प्यार कियो, त असेईं भी एक्की होरि सेइं प्यार कियोरो लोडे। 12 परमेशर कधी केन्चे नई लवरो; अगर अस एप्पू मांमेइं प्यार रखम, त परमेशर असन मां बनो रहते; ते तैसेरो प्यार असन मां सिद्ध भोरोए।

13 इस सेइं अस ज्ञानतम, कि अस परमेशेरे मां बनो रातम, ते परमेशर असन मां, किजोकि तैने असन अपने आत्माई मरां दित्ती। 14 ते असेईं हेरू भी, ते गवाही भी देतम, कि बाजी परमेशेरे, मट्टू दुनियाई मां मुक्ति देनेबालो केरतां भेजोरोए। 15 जै इन मन्ते, कि यीशु परमेशेरेरू मट्टूए, परमेशर तैस मां बनोरो रहते, ते तै परमेशेरे मांए। 16 ते जै प्यार परमेशर असन सेइं केरते, तै असेईं जानो, ते असन तैस पुड़ विश्वासे, परमेशर प्यारे, जै प्यारे मां

2 यूहन्ना

११११११११

1 अवं यूहन्ना कलीसियारो बुजुर्ग, तैस बेइन ते तैसेरे बच्चन जैना परमेशरे चुनोरेन ई चिट्ठी लिखने लोरोई । जैन सेइं अवं सच्चो प्यार केरताई । सिर्फ अवं नईं पन तैना सारे जैना सच्चे ज्ञानतन तुसन सेइं प्यार केरतन । 2 अस तुसन सेइं प्यार केरतम किजोकि अस सच्ची शिक्षाई पुड़ विश्वास केरतम, ते अस तैस शिक्षाई हमेशारे लेइ मन्ते राले । 3 बाजी परमेशर ते तैसेरे मट्ठू यीशु मसीह असन अनुग्रह, दया, शान्ति देन । इना सब इशशे लेइ आए अस जैना सच्चे मन्तम ते एक्की होरि सेइं प्यारे केरतम ।

१११ ११ ११११११

4 अवं बड़ो खुश भोव, जैखन मीं तेरे किछ बच्चां केरे बारे मां शुनू कि तैना परमेशरेरे बत्तां चलने लोरेन, तैना तैन्ने केरने लोरेन जैन इशशे बाजी परमेशरे असन केरनेरे लेइ ज़ोरूए । 5 हुनी हे बेइन, अवं तीं कां मिनत केरताई, असेईं एक्की होरि सेइं प्यार कियोरो लोडे, ई अक नव्वो हुकम नईं पन अक आदेशे जै अस तैस वक्ते करां ज्ञानतम, जेइसेरू असेईं यीशु मसीह पत्ती चलनू शुरू कियोरूए । 6 सच्चो प्यार ई आए जैखन अस परमेशरेरे हुकम मन्तम । जेइसेरू तुसेईं यीशु मसीह पत्ती चलनू शुरू कियोरू तेइसेरू तुसेईं शुनेरू कि परमेशरे हुकम दित्तोरो, कि हमेशा एक्की होरि सेइं प्यार कियो लोडे । 7 अवं इन एल्हेरेलेइ ज़ोताई, किजोकि बड़े लोक जैना होरि लोकन झूठी शिक्षारे ज़िरिये धोखो देतन । तैना दुनियारे अलग-अलग टैरन मां जोरेन । तैना ज़ोतन यीशु मसीह मैनेरे रूपे मां नईं ओरो, अगर कोई मैन्हु एन्चरे ज़ोते, त तै मसीहेरो खलाफत केरनेबालोए जै हमेशा लोकन धोखो देते । 8 एल्हेरेलेइ तू अपने बारे मां खबरदार रा कि तैना लोक तीं धोखो न देन । जै मेहनत परमेशरेरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो जैना देनेरो वादो परमेशरे तुसन सेइं कियोरोए । 9 अगर कोई मैन्हु मसीहेरी शिक्षाई पुड़ लगातार न चले पन तैस मां होरू किछ ज़ोडते त तैसेरो रिशतो परमेशरे सेइं साथी नईं, तैस कां परमेशर नईं । पन अगर कोई मसीहेरी शिक्षाई मां बनोरो रहते, तैसेरो रिशतो बाजी परमेशर ते तैसेरे मट्ठे यीशु मसीह सेइं भी आए । 10 अगर कोई तुशशे सभाई कां एज्जे, ते मसीहेरे बारे मां ईए शिक्षा न दे, त तैस न अपने घरे मां एज्जे देथ, ते न तैस नमस्कार केरतां होसलो न देथ । 11 किजोकि जै कोई एरे मैन्हु जो नमस्कार केरते, तै तैसेरे बुरे कम्मन मां शामिल भोते ।

११११ ११११११११

12 बेइं गल्लां आन जैना अवं तुसन सेइं ज़ोनी चाताई, पन अवं तैना एन्चरे चिट्ठी मां लिखनी न चैई । पन मीं उमीदे कि अवं तुसन कां एज्जेलो ते अस आमने-सामने भोइतां गल्लां केरमेले, तैखन अस पूरे तरीके सेइं खुश भोले । 13 तेरी चुनोरी बेइनारे बच्चे इड़ी जैना परमेशरेरे चुनोरेन नमस्कार ज़ोतन ।

3 यूहन्ना

??????????

1 अवं यूहन्ना कलीसियारो बुजुर्ग आई, हे ट्लारे गयुसे अवं तींजो ई चिट्ठी लिखने लोरोई। अवं सच्चे तीं सेइं प्यार केरताई। 2 मेरे ट्लारे दोस्त, मेरी परार्थना ई आए, कि जेन्चरे तू आत्मिक तरक्की केरि रवरोस, तेन्चरे तू सेम्भी गल्लन मां तरक्की केरतो रास, ते तेरी जान भी राजी राए। 3 किजोकि किछ विश्वासी लोकेई मीं सेइं एइतां ज़ोवं, कि तू केन्चरे सच्चेरे मुताबिक ज़ीने लोरोस त अवं बड़ो खुश भोव। 4 ज़ैखन भी अवं शुनताई कि तैना, ज़ैना मेरे बच्चां केरे ज़ेरे आन तैना सच्चेरे मुताबिक ज़ीतन, तैखन अवं बड़ो खुश भोताई।

??????????

5 हे ट्लारा, तीं इश्शे विश्वासी सैथी केरि मद्दत केरनेरे लेइ वफादैरी सेइं बड़ू किछ कियोरूए, इड़ी तगर ज़ैन तू जानस भी न तैन केरि भी मद्दत केरतस। 6 इन मरां किछ लोकेई इट्ठेरी कलीसियारे विश्वासी लोकन सेइं ज़ोवं, कि तुस अपने मसीही लोकन सेइं केतरो जादे प्यार केरतथ। हुनी अवं तीं ज़ोताई ज़ैना इना लोक तीं करां गान त तीं तैन केरि मद्दत केरती रावरी लोडे किजोकि एस सेइं परमेशर खुश भोते। 7 किजोकि इना लोक मसीहेरू वचन प्रचार केरनेरे लेइ सफर केरतन, ते गैर विश्वासी लोकन करां किछ मद्दत न नेन। 8 एल्हेरेलेइ असेई तैन केरि आदर-खातर कियोरी लोडे, ताके अस भी तैन सेइं साथी सच्च प्रचार केरनेरे कम्मे मां शामिल भोम।

??????????????

9 मीं तुश्शे नगरेरे कलीसियारे लोकन पेइले चिट्ठी लिखोरी थी, पन दियुत्रिफेस मेरे हृदायतन कबूल केरने करां इन्कार केरते, किजोकि तै हमेशा अपनो आप कलीसियारो लीडर बनानो चाते। 10 एल्हेरेलेइ अगर अवं एज्जेलो, त कलीसियारे लोकां केरे सामने ज़ैन तै केरि रावरोए ज़ोइलो। तै इश्शे खलाफ बुरी-बुरी गल्लां ज़ोइतां झूठे दोष लाते, ते एतूरू नई तै एप्पू प्रचार केरनेबालन कबूल न केरे, ते ज़ैना तैन कबूल केरने चातन, तैन भी ठाकते ते कलीसिया मरां कढतन।

11 हे ट्लारा, तैन लोकां केरि नकल न केरा ज़ैना बुरां कम्मां केरन, पन तैन लोकां केरू ज़ेरू बन्नेरी कोशिश केरा ज़ैना भला कम्मां केरतन। ज़ैखन कोई भला कम्मां केरते तैस सेइं साबत भोते कि तै परमेशेरो बच्चोए, अगर कोई बुराई केरते तैस सेइं साबत भोते कि तै परमेशर न ज़ाने। 12 कलीसियारो सारे मैन्हु दिमेत्रियुसेरे बारें मां ज़ोतन कि तै रोड़ो मैन्हु आए, किजोकि तै सच्चेरे मुताबिक ज़ीते ते अस भी ज़ोतम कि तै अक रोड़ो मैन्हु आए, ते तू ज़ानतस अस सच्च ज़ोतम।

??????

13 बेड़ि गल्लां आन ज़ैना अवं तीं सेइं ज़ोनी चाताई, पन अवं तैना एन्चरे चिट्ठेरे ज़िरिये न लिखनी चैई। 14 पन मीं उमीदे कि अवं तीं सेइं जल्दी मुलाकत केरेलो, तैखन अस आमने-सामने गल्लां केरमेले। 15 अवं परार्थना केरताई परमेशर तीं शान्ति दे, इट्ठेरे मसीही दोस्त तींजो नमस्कार ज़ोतन, एट्ठेरे दोस्तन अकैल्ले-अकैल्ले मां गेइतां मेरू नमस्कार ज़ोइयां।

यहूदा

११११११११ ११११११११

1 अवं यहूदा यीशु मसीहेरो सेवक ते कने याकूबेरो निकडो ढला आई। अवं यहूदा ई चिट्ठी तुसन लोकन लिखने लोरोई, जैना परमेशरे कुजवरेथ कि तैस पुड़ विश्वास केरथ। बाजी परमेशर तुसन सेइं प्यार केरते ते यीशु मसीहेरे जिरिये तुस सुरक्षित आथ। 2 अवं प्रार्थना केरताई कि परमेशर तुसन दया ते शान्ति ते प्यार जादे करां जादे दे।

१११११ ११११११११ १११११११११११ १११११ १११११ ११११ ११११११११११

3 हे ट्लारव, अवं लिखनेरे लेइ हर मुमकिन कोशिश केरि रावरो थियो तैस (मुक्त्तरे) नंवे ज़िन्दगरे बारे मां ज़ै यीशु मसीहेरे जिरिये परमेशरे तरफां मैलतीए, ज़ैस मां अस शामिल आम। पन हुना अवं इन ज़रूरी समझताई कि तुसन इस चिट्ठेरे जिरिये होलसो देई, ताके तुस मसीही विश्वास बनोरो रखनेरे लेइ बड़ी मेहनत केरि बटथ, परमेशरे ई विश्वास अपने सेबमी लोकां केरे लेइ एककी बार दित्तोरोए, ते ई न बेदलोए। 4 किछ्छ लोक ज़ैना यीशु मसीह पुड़ विश्वास केनेरो दिखावो केरतन तैना तुश्शे कलीसियान मां शामिल भोरेन। तैना परमेशरेरी आदर न केरन ते तैना ई गलत शिक्षा देतन, कि परमेशरे इश्शे पाप माफ़ कियोरेन ते अस अधर्मी ज़िन्दगी ज़ी बटतम। तैना यीशु मसीहेरो इन्कार केरतन, ज़ै इश्शो अक्के मालिक ते प्रभुए। बड़े पेइले पवित्रशास्त्र ज़ोते, परमेशरे एरे ज़ेरे लोकन सज़ा देलो।

5 पन अगर तुसेई सब गल्लां एककी बार ज़ैनोरिन, फिरी भी अवं तुसन इना गल्लां याद करैनी चाताई, कि प्रभुए इस्राएली लोक गुलैमी मरां आज़ाद किये, ते मिस्र मुलखे मरां कढे पन बादे मां तैने तैना मारे ज़ैनेई सुनसान ठारी मां तैस पुड़ विश्वास न कियो। 6 तुसेई तैन स्वर्गदूतां केरे बारे मां सोचोरू लोडे ज़ैना अपने पदे पुड़ खुश न थिये, ज़ै परमेशरे तैन दित्तोरो थियो, पन तैनेई स्वर्गेरू घर शारू; परमेशरे तैना कधी न ट्लुटने बैली शंगलन सेइं बंधतां बुन आंधरे मां तैस महान दिहैड़ी तगर रखोरेन, ज़ेइस तै तैन दोषी बनालो। 7 इना इस्राएली ते स्वर्गदूतां केरू ज़ेरू इन भी याद रखवा कि सदोम ते अमोरा नगरां ते कने आसेपासेरे नगरां केरे रानेबाले लोकन सेइं कुन भोवं। लोक अधर्मी भोए ते हर किसमेरी बदमाशी केरनेबाले थिये। एल्हेरेलेइ परमेशरे तैना अगारे ज़िरिये भस्म किये। ज़ैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशारे अगारे ज़िरिये सज़ा मैल्लनीए।

8 तेन्चरे इना अधर्मी लोक ई दावो केरतन कि परमेशरे दर्शने मां ज़ोवरू अधर्मी ज़िन्दगी ज़ीतां तैना अपनो जिसम अशुद्ध केरि बटतन, ते कोन्ची भी एप्पू पुड़ अधिकार रखनेरी अज़ाज़त न देन ते तैना महिमा बाले स्वर्गदूतां केरे बारे मां बुरी गल्लां ज़ोतन। 9 पन इड़ी तगर कि प्रधान स्वर्गदूत मीकाईले इन अधर्मी लोकां केरू ज़ेरू न कियूं। ज़ैखन शैतान ते मीकाईल मूसा नेबेरी लाश दबनेरे अधिकारेरे बारे मां बेंस भोइ, त मीकाईल स्वर्गदूते कां इन लोकन करां जादे अधिकार भोनेरे बावजूद भी तैने शैताने बुरी गल्लां ज़ोइतां दोषी न ठहराव, इसेरे बदले तैने इन ज़ोवं, कि “प्रभु तीं डाँटे।” 10 पन इना लोक तैन चीज़ां केरे खलाफ गलत ज़बान इस्तेमाल केरतन ज़ैन तैना न समझन। ते ज़ैन चीज़न तैना समझतन तैन लैट्टे जानवरां केरे ज़ेरे केरतन, एना चीज़ां केरतां तैना अपनो आप नाश केरतन। 11 तैन पुड़ अफ़सोस! किजोकि तैना आदमेरे मट्ठे कैनेरो ज़ेरो बुरो सलूख केरतन, ज़ैने अपनो ढला मारो। तैना जल्दी ज़ेन्चरे बिलामे पेइंसो कमानेरे लेइ लोकन करां पाप कराव तैनेई भी तैए गलती की, ते ज़ेन्चरे करोह नाश कियो किजोकि तैने (मूसेरे खलाफ) खलाफत की, तेन्चरे तैना लोक भी नाश किये गाले किजोकि तैना भी प्रभुएरे खलाफ खलाफत केरने लोरेन। 12 ज़ैखन इना लोक धामन मां खातन ज़ैना तुस प्रभुएरो प्यार याद केनेरे लेइ बनातथ, त तैना समुन्दरेरी छेपोरी शफ़ड़ां केरे ज़ेरे खतरनाक आन, ज़ैना तुसन डोबनेरी वजा बेनि बटतन। तैना तैन बेशर्म पुहालां केरे ज़ेरे आन ज़ैना सिर्फ़ अपनो खियाल रखतन। तैना बगैर पैने विदलारारे ज़ेरेन ज़ैन हवा उडारतीए, तैना शेरारे बेफल बुट्टां केरे ज़ेरे आन. ज़ैना ज़ीलना उखड़ोरेन ते दुइये तरीकेई सेइं मरेन। 13 ज़ेन्चरे समुन्दरेरी मज़बूत छेल्ली गंदी शैमफ़ एनतिन, तेन्चरे इना लोक बेशर्म कम्मां केरतन। तैना किछ्छ तारां केरे ज़ेरे आन ज़ैना सिद्धे बत्तां न चलन, तैना सही बत न हिरान। प्रभुए तैन केरे लेइ अक ठार रखोरि ज़ै पूरे तरीके सेइं आंधरीए ज़ैड़ी तैनेई हमेशारे लेइ रानू पेनू।

14 ते हनोक जै आदमेरे सतोवं पीड़ी मरां थियो, तैने इन अधर्मी लोकां केरे बारे मां भविष्यद्वाणी की। तैने ज़ोवं “हेरा, प्रभु अपने बेशुमार पवित्र स्वर्गदूतन सेइं साथी एज्जेलो। 15 कि सेब्भी लोकां केरो इन्साफ केरे, ते तैन केरे सेब्भी बुरां कम्मां केरे बारे मां जैना तैनेई परमेशेरे खलाफ कियोरन ते सैरी बुरी गल्लां जैना तैनेई तैसेरे खलाफ कियोरिन तैन केरे बारे मां तैन दोषी बनालो।” 16 इना लोक हमेशा परमेशेरे खलाफ ज़ोतन ते होरि केरि गेलती कढतन। तैना अपने मनेरे मेरजरे मुताबिक लगातार बुरां कम्मां केरतन। तैना अपने बारे मां घमण्ड केरतन ते अपने फैइदेरे लेइ होरि केरि चापलूसी केरतन।

???????? ?? ???????

17 पन हे ट्लारव, तुस तैन गल्लन याद रखा; जैना गल्लां इश्शे प्रभु यीशु मसीहेरे परेरितेई पेइली ज़ोरिन। 18 तैना तुसन सेइं ज़ोते थिये, “कि आखरी दिहाइन मां एरे लोक भोले जैना प्रभु ते तैसेरे लोकां केरो मज़ाक बनाले। इना तैना लोक आन जैन केरि ज़िन्दगी तैन केरे बुरी इच्छा केरे कैबू मां आए।” 19 इना तैना लोक आन जैना तुसन अलग-अलग टोलन मां बंटतन, तैन केरि बुरी इच्छां तैन चलैतिन ते तैन कां परमेशेरो आत्मा नई। 20 पन हे ट्लारव, तुस एक्की होरेरी मद्दत केरते राथ कि बड़े पवित्र सच्चे मां बद्धथ जैन तुस विश्वास केरतथ। तुसेईं पवित्र आत्मारें शेक्तेरे अगवैई सेइं प्रार्थना कियोरो लोडे। 21 तुसेईं लगातार इन जैनतां ज़ीयोरू लोडे कि परमेशर तुसन सेइं प्यार केरते, जेन्चरे तुस बलगने लोरेथ जेइस इश्शो प्रभु यीशु मसीह अपने दयाई मां तुसन हमेशारी ज़िन्दगी देलो। 22 तैन लोकन पुड़ दया केरा जैन नई पतो कि तैना कोस शिक्षाई पुड़ विश्वास केरन। 23 किछ्च होरे लोक जैन तुस ज्ञानतथ कि नरके मां चलोरेन। तैन जल्दी खिचतां हमेशारी अगगी मरां बच्चाथ। हेजू भी होरन पुड़ दया केरा। हांलाकि, ध्यान देथ तैस्से पापे दुबारा न केरा। तुस तैन केरे पापन सेइं अज़मैइशी मां न पेथ, ते तैना पाप केरनेरे ज़िरिये अपनो आप दागदार न केरा।

24 परमेशर तुश्शी हफाज़त केरनेरे बाले ताके तुस पापेरी ज़िन्दगी ज़ीतां धोखो न खाथ। तै महिमा बालो परमेशर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले। 25 तैए अक परमेशेरे जैने यीशु मसीहेरे ज़िरिये असन मुक्ति दिती, इश्शो प्रभु यीशु लोकन परमेशेरी आदर केरने ते तैसेरी बडयाई केरनेरी वजा बनाते। ताके तैना इस गल्ली पिशानन कि तैस कां शुरू करां हुन्ना ते हमेशारे लेइ शक्ति ते अधिकार आए। आमीन।

यीशु मसीहेरो प्रकाशितवाक्य

११ ११११११११ ११११ ११११ ११११

1 यीशु मसीहेरो प्रकाशितवाक्य, जै परमेशरे तैस एल्हेरेलेइ दित्तो कि तै अपने सेवकन तैना गल्लां हिराए, जैन केरू जल्दी भोनू जरूरीए। यीशु मसीहे अपनो स्वर्गदूत भेजतां तैसेरे जिरिये अपने दास यूहन्ना इना गल्लां जोई, 2 अवं यूहन्ना तैन सब लिखने लोरोई जैन मीं लवं, अवं इस मां परमेशेरू वचन ते यीशु मसीहेरी सच्चि शिक्कारी गल्लां लिखने लोरोई जैना तैनी मीं सेइं जोई। 3 परमेशर तैन सेभी लोकन बरकत देलो जैना इस भविष्यवैनेरे वचने पढतन, ते कने जैना शुन्तन ते इस मां लिखोरी गल्लन मन्तन, किजोकि इन गल्लां पूरी भोनेरो वक्त नेडो ओरोए। 4 अवं यूहन्ना आसिया इलाकेरे सत कलीसियान जो लिखने लोरोई। परमेशरे जै आए ते जै हमेशा थियो, ते जै एजनेबालो आए; ते तैन सत आत्मां केरे तरफां जैना तैसेरे तखतरे सामनेन तुसन अनुग्रह ते शान्ति मैलती राए। 5 ते यीशु मसीहेरे तरफां, जै वफादार गवाह ते मुडदन मरां जीतो भोने बालन मरां पेइलोए त कने धेरतरे राजां केरो प्रधाने तुसन अनुग्रह ते शान्ति मैलती राए। यीशु मसीहे असन सेइं प्यार कियो, त कने तैने अपने खूने सेइं अस पापन करां छुटाए। 6 तैने अस अक राज ते अपने बाजी परमेशेरी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन। 7 हेरा, मसीह बिदलारी सेइं साथी एजनेबालोए, ते हर कोई तैस लाएलो, बल्के जैना लोक तैसेरे मौतरे लेइ जिमेवार थिये, तैना भी तैस लाएले, ते धेरतरे सारे लोक ज़ोरे-ज़ोरे सेइं लेरां देले। हाँ इन भोलू। आमीन। 8 प्रभु-परमेशर ज़ोते, “अव्वे अलफा ते ओमेगा आई, (मतलब पेइलो ते आखर) अवं तै आई, जै आए, जै हमेशा थियो, ते जै एजने बालोई, ते बडो शक्ति बालोई।” तै इन ज़ोते,

११११११११ ११११११११ ११११११ १११११

9 अवं यूहन्ना तुशुओ विश्वासी ढला, ते कने यीशु मसीहेरे लेइ दुःखन मां, परमेशेरे राज्जे मां, ते सबरी मां तुसन सेइं साथी शामलाई। अवं पतमुस नव्वेरे टैपू पुड परमेशेरू वचन शुनानेरे त कने यीशुएरी गवाही देनेरे वजाई सेइं कैद थियो। 10 हफतेरे पेइले दिहाडे पवित्र आत्मां अवं अपने कैबू मां कियो, मीं एप्पू पत्र अक आवाज इन ज़ोते शुनी। तै आवाज नइशिगेरी उच्ची आवजरी जेरि थी। 11 “जैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मुरना, पिरगमुन, थुआतीरा, सरदीस, फिलदिलफिया ते लौदीकिया नगरन मां आन।”

12 तैखन जै मीं सेइं गल्लां केरने लोरो थियो तैस हेरनेरे लेइ तकू; ते पत्रोवं फिरतां मीं सोन्नेरे सत दीवट लाए। 13 ते तैन दीवटां केरे मझाटे मडदेरो ज़ेरो कोई लाव, तैने पवन तगर लम्मो चोगो लोरो थियो, ते तैसेरे छैती पुड सोन्नेरो पटको बंधोरो थियो। 14 तैसेरे दोगगे पुड तैसेरे बाल छिती उन्नी या हिवेरे ज़ेरे थिये। तैसेरी एछ्छी अगारे लपारी जेरि बेलती थी। 15 ते तैसेरे पाव भेट्ठी मां गर्म कियोरे पितलरे ज़ेरे चमकते थिये, ते जैखन तैने गल की तैसेरी आवाज बडे ज़ोरे सेइं थी, जेन्नेरे बडे दरियां केरि जेरि जैना बडे ज़ोरे सेइं चलतन। 16 ते तै अपने देइने हथ्ये मां सत तारे घिन्तां थियो, ते तैसेरे मुखे सेइं दूई धारण बाली तलवार निसती थी, तैसेरू तुतर एरू चमकतू थियूं, जेन्नेरे दिहाडो भर-दुपारेई चमकते। 17 जैखन मीं तै लव, त तैसेरे पावन पुड मुडदेरो ज़ेरो पेव, ते तैने मीं पुड अपनो देइने हथ रखतां इन ज़ोवं, “डर न, अवं पेइलो त कने आखरी आई। 18 ते जीतो भी अवं आई, अवं एक्की बार मरौं थियो, पन हुनी अवं जीतोई ते अवं हमेशा जीतो रानोई। मीं मौती पुड ते पाताले पुड जै मरौं लोकां केरि ठारे अधिकारे। 19 एल्हेरेलेइ जैना गल्लां तीं हेरी ते जैना गल्लां भोइ रेवरिन, ते जैना इट्टां बाद भोने बैलिन, तैना सब लिख।” 20 मतलब तैन सत तारां केरो भेद जैना तीं मेरे देइने हथ्ये मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान।

2

११११११११ ११११११११ ११११११११११ ११११११११११११ ११ ११११११११

1 तैने मीं सेइं इन भी ज़ोवं: “इफिसुस नगरेरे कलीसियारे स्वर्गदूते जो ई सन्देश लिख कि, ‘अवं तै आई जै सते तारे अपने देइने हथ्ये मां घिन्तां फिरताई, ते सोन्नेरे सत दीवटां केरे मझाटे फिरताई, अवं इन ज़ोताई: 2 अवं तेरां कम्मां, तेरी मेहनत, ते तेरू सबर जानताई। ते इन भी, कि तू बुरे लोकन बर्दाश न केरि बटस; त कने तैन जैना अपनो

आप प्रेरित ज़ोतन पन आन नई, तैना तीं परखे ते तैना झूठे निस्से। ³ अवं इन भी ज्ञानताई मेरे नंब्बेरे खातर तीं सबरी सेइं दुःख झैल्ले ते तीं मेरी सेवा केरनि न शारी। ⁴ पन मीं तेरे खलाफ इन ज़ोनूए कि ज़ेरो प्यार तीं मीं सेइं विश्वास केरनेरे वक्ते मां कियोरो थियो इस वक्ते मां न केरस। ⁵ याद रख तू बिछड़ने करां पेइलो कोड़ि थियो। तू पाप केरने करां मनफिरा ते तेरही ज़िन्दगी ज़ी ज़ेरि पेइलो विश्वास केरनेरे वक्ते ज़ीतो थियो। अगर तू मन न फिरालो त अवं तीं कां एइतां तेरू दीवट तैस ठारां पुटेलो। ⁶ पन हाँ तीं मां ई गल त आए, कि तू नीकुलइयां* केरे कम्मन सेइं नफरत केरतस, ज़ैन सेइं अवं भी नफरत केरताई। ⁷ ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते, ज़ै ज़ीत हासिल केरे, अवं तैस, ज़िन्दगरे बुटे मरां फल खानेरे लेइ देइलो ज़ै ज़िन्दगी देते, ज़ै परमेशेरे स्वर्ग लोके मांए।”

???????? ???? ???? ???? ???? ??

⁸ तैने मीं सेइं इन भी ज़ोवं, “स्मुरना नगरेरे कलीसियारे स्वर्गदूते जो ई सन्देश लिख, ज़ै पेइलो ते आखरीए; ज़ै मरों थियो ते हुनी ज़ीतो भोरोए, तै इन ज़ोते: ⁹ अवं ज्ञानताई कि तू स्तव गातस ते तू गरीब आस, पन आत्मिक गल्लन मां तू धनी आस। अवं इन भी ज्ञानताई कि ज़ैना लोक ज़ोतन कि तैना परमेशेरे चुनोरे (यहूदी) लोकन, पन तैना असलीती मां नई। तैना तुशे बारे मां बुरी गल्लां ज़ोतन, पन हकीकति मां तैन केरो रिशतो एरे टोली सेइं आए ज़ै शैतानेरी। ¹⁰ ज़ैना दुःख तीं झैल्लने पेनेन तैन करां न डर। शैतान तुसन मरां किछ लोकेन टलुइतां कैद करालो ताके तैना परखे गान। ते तुसन दश दिहाइन तगर बड़ो दुःख झैल्लनो भोलो। पन मीं पुड़ विश्वास केरनो न शार, चाए जान भी देनी पे, किजोकि अवं तेरे ज़ीतरे लेइ हमेशेरे ज़िन्दगरू इनाम देइलो। ¹¹ ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते, ज़ै ज़ीते, तैस दुइयोवं मौती† सेइं नुकसान न पुजेलो।”

???????? ???? ???? ???? ???? ??

¹² तैने मीं सेइं इन भी ज़ोवं, “पिरगमुन नगरेरे कलीसियारे स्वर्गदूते जो ई सन्देश लिख, ‘अवं तै आई ज़ैस कां दूई धारण बाली तिख्खी तलवारे, अवं इन ज़ोताई: ¹³ अवं इन ज्ञानताई, कि तू तैडी रातस ज़ैडी शैतान राज़ केरते, तू मीं सेइं साथी ईमानदार राव, त कने तू मीं पुड़ विश्वास केरनो कधे न शारस। तीं इडी तगर विश्वास कियो ज़ेइस मेरो वफादार गवाह अन्तिपास तैनेई तैस ठैरी मारो, ज़ैडी शैतान राज़ केरते। ¹⁴ पन मीं तेरे खलाफ किछ गल्लां ज़ोनिन, किजोकि तू तैन केरि खलाफत न केरस ज़ैना तुशे कलीसियाई मां झूठी शिक्षा देतन तेन्बरे ज़ैन बिलामे बीतोरे वक्ते मां शिखालू। बिलामे बालाक राज़े शिखालू कि इस्राएली लोकां केरि अज़मैइश केरे ताके तैना पाप केरन। तैने शिखालू कि तैना मूरतन पुड़ बलिदान कियोरी चीज़ां खान ते बदमाशी केरन। ¹⁵ तेन्बरे तुसन मां किछ लोक एरे आन ज़ैना नीकुलइयां केरि शिक्षा मन्तन। ¹⁶ ते मनफिरा, नई त अवं तीं कां जल्दी एजतां तैन लोकन सेइं तैस तलवारी सेइं लेइलो ज़ै मेरे ऐशेरां निसतीए। ¹⁷ ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते; ज़ैना लोक ज़ीत हासिल केरन, तैन अवं छप्पोरो मन्ने मरां देइलो, त कने अवं तैन अक छितो घोड़ भी देइलो; तैस घोड़े पुड़ अक नवं लिखोरू भोलू, ज़ैस तैसेरे हासिल केरनेबालेरी अलावा होरो कोई न ज़ानेलो।”

???????? ???? ???? ???? ???? ??

¹⁸ तैने मीं सेइं इन भी ज़ोवं, “थुआतीरा नगरेरे कलीसियारे स्वर्गदूते जो ई सन्देश लिख कि, ‘अवं परमेशेरू मट्टू ज़ेसेरी एछ्छी अगारी ज़ेरिन, त कने ज़ेसेरे पाव कीमती पीतलारे ज़ेरेन, अवं इन ज़ोताई: ¹⁹ अवं तेरे कम्मन, तेरे प्यारे, विश्वास, सेवा त कने सबरी ज्ञानताई, ते इन भी ज्ञानताई, कि तेरां आखरी कम्मां पेइले कम्मन करां बेद्वतन। ²⁰ पन मीं तेरे खलाफ इन ज़ोनूए, कि तू तै कुआन्श इजेबेल राने देतस; ज़ै अपनो आप नबिन ज़ोतीए, ते मेरे दासन बदमाशी केरने त कने मूरतन कां चाढोरू खानू शिखैलतां टपलातीए। ²¹ मीं तैस मनफिरानेरे लेइ मौको दित्तो, पन तैसा अपने बदमाशी केरने करां मन न फिरानो चाव। ²² हेरा, एल्हेरेलेइ अवं तैस बिमार केरेलो; ते ज़ै तैस सेइं बदमाशी केरेलो अगर तैना भी तैन कम्मन करां मन न फिराले, त तैन बड़े मुसीबती मां छेडेलो। ²³ ते अवं तैसेरे बच्चन मैरेलो; ते तैखन सब कलीसियां बुझेली कि दिल त कने मनेरो परखने बालो अवं आई; ते अवं

* 2:6 2:6 नीकुलइयां: ए पंथ थियो तैना शिखालते थिये कि विश्वासी लोक अधर्मी ज़िन्दगी ज़ी सकतन ते मूरती केरि पूजा केरि सकतन। † 2:11 2:11 दुइयोवं मौत: पेइली मौत जानरी मौते, दुइयोवं मौत हमेशारी मौते

तुसन मां हर एक्की तैसेरे कम्मां केरे मुताबिक बदलो देइलो । 24 पन तुस थुआतीरा नगरेरे बाकी लोकन सेइं, जैना तैस शिक्षाई न मन्न, जैन गल्लन जो तैना शैतानेरी डुगी गल्लां ज़ोतन न ज़ानन, इन ज़ोताई, कि अवं तुसन पुड़ होरो बोझ न रेखवी । 25 पन हाँ, जैन तींकांए तैस मेरे एजने तर ठेमतां रख । 26 जैना लोक ज़ींत हासिल केरन, ते ज़ै मेरे इच्छेरे मुताबिक आखरी तगर केरतो राए, अवं तैस सैरी कौमां केरे लोकन पुड़ अधिकार देइलो । 27 अवं तैस तेरहो अधिकार राज़ केरनेरे लेइ देइलो ज़ेरो मेरे बाजे मीं दित्तोरोए । तैन केरू राज़ लोहेरू ज़ेरू मज़बूत भोलू ज़ैन ट्लुटे न, ते तैन केरे दुश्मन मित्तरे भाण्डां केरे ज़ेरे चूर-चूर भोले । 28 अवं तैन केरि ज़ींत हिरानेरे लेइ तैन झेझेरो तारो भी देइलो । 29 ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते । ”

3

११११११ १११११११ ११११११११११ १११११ ११ ११११११११

1 तैने मीं सेइं इन भी ज़ोवं, “सरदीस नगरेरे कलीसियारे स्वर्गदूते जो ई सन्देश लिख कि, ‘जैस कां परमेशेरी सत आत्मान ते सत तारेन, तै इन ज़ोते कि अवं तेरे कम्मन ज़ानताई, कि तींझो ज़ींतो ज़ोतन, पन तू आस मर्री । 2 एल्हेरेलेइ बींझो रा, ते तैन चीज़न ज़ैना रेवरिन, ते ज़ैना मिटने बैलिन, तैन मज़बूत केर; किजोकि मीं तू केन्ची चीज़ी मां अपने परमेशेरे कां पूरो न लव । 3 याद केर, कि तीं केरि शिक्षा मैलोरी थी तीं ते शुनोरी थी, ते तैस मनतो रा ते कने मनफिरा, ते अगर तू बींझो न रालो, त अवं चोरेरो ज़ेरो एज्जेलो ते तू कधे न ज़ानेलो, कि अवं कोस घेडी तीं पुड़ एज्जेलो । 4 पन सरदीस नगरे मां तुसन मां किछ लोक एरे आन, ज़ैनेई अपनो आप पापे सेइं अशुद्ध नई कियोरो, तैना छित्तां लिगडां लेइतां मीं सेइं साथी चलेले किजोकि तैना इस काबलन । 5 ज़ैना ज़ींत हासिल केरेले तैन इस्से तरीके सेइं तैन केरां ज़ेरां छित्तां लिगडां लुवां गालां । अवं तैन केरू नवं तैस किताबी मरां हटेइलो ज़ैस मां परमेशेरे तैन केरां नव्वां लिखोरन ज़ैना हमेशारी जिन्दगी हासिल केरेले । अवं तैन केरू नवं अपने बाजी ते अपने स्वर्गदूतां केरे सामने एलान केरेलो । 6 ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते । ”

१११११११११११ ११११११११ १११११११११११ ११११११११११११ ११ १११११११११

7 तैने मीं सेइं इन भी ज़ोवं, “फिलदिलफिया नगरेरे कलीसियारे स्वर्गदूते जो इन लिख, ‘अवं तै आई ज़ै पवित्र ते सच्चे, ते ज़ैस कां दाऊदरी चाबीए, जेसेरे खोल्लेरे कोई बंद न केरि सके ते जेसेरे बंद केरे कोई खोल्लेरे न सके, तै इन ज़ोते: 8 अवं तेरे कम्मन ज़ानताई, हेर, मीं तेरे सामने अक बत खोलरोरीए, ज़ैस कोई बंद न केरि सके कि तेरी शक्ति थोड़ीए, ते तीं मेरू वचन मनोरूए, ते मेरे नव्वेरो इन्कार नई कियोरो । 9 हेर, ज़ैन लोकां केरो रिशतो शैतानेरी टोली सेइं आए, तैना ज़ोतन कि तैना यहूदी आन, पन आन नई, बल्के झूठ ज़ोतन हेर, अवं एरू केरेलो, तैना तीं कां एइतां झुकेले, ते इन ज़ानेले, कि अवं तीं सेइं प्यार केरताई । 10 ज़ैखन तू दुःख झैल्लतो थियो तीं सबरी सेइं मेरो सन्देश मन्नो । एल्हेरेलेइ अवं भी तीं बड़े अज़मैइशेरे वक्ते बचेइलो, ज़ै धेरतली पुड़ रानेबालन पुड़ परखनेरे लेइ सारे दुनियाई पुड़ एजने बालीए । 11 अवं जल्दी एजने बालोई; ज़ैन किछ तींकांए, तैस ठेमतां रख, कि कोई तेरू ताज न थसोडे । 12 ज़ै ज़ींत हासिल केरे, तै ज़ेन्चरे अक खम्भो घरे मज़बूत रखते, तेन्चरे तै भी परमेशेरे मन्देरे मां हमेशा रालो; ते अवं अपने परमेशेरेरू नवं, ते अपने परमेशेरेरे नगर, मतलब नव्वे यरूशलमेरू नवं, ज़ैन नगर स्वर्गे पुडां एजने बालूए ते अपनू नव्वू नवं तैस पुड़ लिखेलो । 13 ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते । ”

१११११११११११ ११११११११ १११११११११११ ११११११११११११ ११ १११११११११

14 तैने मीं सेइं इन भी ज़ोवं “लौदीकिया नगरेरे कलीसियारे स्वर्गदूते जो ई सन्देश लिख कि, ‘जै आमीन, वफादारे, ते सच्चो गवाह आए, ते परमेशेरी सर्ष्टिारी वजाए, तै इन ज़ोते । 15 कि अवं तेरे कम्मन ज़ानताई, कि तू तैस पैनेरो ज़ेरोस ज़ैन न ठंडू ए ते न गर्म, रोडू भोथू कि तू ठंडो भोथो या फिरि गर्म, यानी तू मीं पूरो विश्वास केरेथो या बिलकुल न केरेथो । 16 एल्हेरेलेइ तू निघोस, ते न ठंडोस ते न त्तओस, पन तू अध्ये मने सेइं मीं पुड़ विश्वास केरतस, एल्हेरेलेइ अवं तीं रद केरनेबालो आई । 17 तू ज़ैन ज़ोतस, कि अवं धनी, ते धनी भोरोई, ते मीं केन्ची चीज़री घटी नई, ते इन न ज़ानस, कि तू बदकिसमत ते तुच्छ ते कंगाल ते कानो, ते नगोस । 18 एल्हेरेलेइ अवं तीं सलाह देताई, कि अग्गी मां तौरू सोन्नू मीं करां ने, कि धनी भोस; ते छित्तां लिगडां ने, कि तीं अपने नग्गे पनेरी शर्म न भोए; ते अपने एछ्छी केरे लानेरे लेइ कजल ने, कि तू लास । 19 अवं ज़ैन-ज़ैन सेइं प्यार केरताई, तैन शिखालताई ते

सजा देताई ताके तैना रोडे बनन । एल्हेरेलेइ भलाई करने मां लगगोरो रा, ते पापन करां मनफिरा । 20 हेर, तेरे दिले मां एजनेरे लेइ अवं जेन्चरे कोई घेरू दार गुडकाते अवं तेन्चरे आई; अगर तू मेरी आवाज श्रुन्तां अपनो दिल खोल्लस, त अवं अन्तर एज्जेलो ते अस एप्पू मांमेइ संगती केरमेले । 21 जै ज़ीते, अवं तैस एप्पू सेइं साथी अपने तखते पुड़ बिशैलेलो, जेन्चरे अवं भी ज़ीत हासिल केरतां अपने बाजी केरे तखते पुड़ बिशरोई । 22 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते ।”

4

????????? ???? ???? ?????

1 इना गल्लां हेरनेरां पत्ती, मीं स्वर्गे मां अक दार खुल्लोरू लाव । ते मीं सेइं कोई गल्लां करने लाव ई तैए थियो जैने मीं सेइं पेइली गल्लां की, तैसेरी आवाज नइशिनगोरे ज़ेरि थी । तैने मीं सेइं ज़ोवं, “इड़ी बा एई: अवं तीं तैना गल्लां हिरेइलो, ज़ैन केरू इन गल्लां केरे पत्ती पूरू भोनू ज़रूरीए ।” 2 अकदम पवित्तर आत्मां अवं अपने कैबू मां कियो; ते मीं स्वर्गे मां अक तखत लाव ते तैस तखते पुड़ कोई बिशोरो लाव । 3 ते ज़ै तैस तखते पुड़ बिशोरो थियो, तै यशब ते मानिक कीमती घोड़ां केरो ज़ेरो लेइहोतो थियो । ते तैस तखते च़ेवरे पासन भुन्जल्लैठ थी, ज़ै मरकत घोड़ेरी ज़ेरि लेइहोती थी । 4 तैस तखतेरे च़ेवरे पासन चोव्ही तखत थिये; ते तैन तखतन पुड़ चोव्ही बुजुर्ग छिन्तां लिगडां लेइतां बिशोरे थिये, ते तैन केरे दोगन पुड़ सोन्नेरां ताजां थियां । 5 ते तैस तखते मां बिजली ते गुड़ने ते तखतेरे सामने अगारे सत दीवट बलने लोरे थिये, इन परमेशेरे सत आत्मा आन । 6 ते तैस तखतेरे सामने शीशेरो साफ समुन्दर थियो ज़ै बरफारो ज़ेरो थियो, ते तखतेरे मझाटे ते तखतेरे च़ेवरे पासन प्राणी थिये, तैन केरे सैरे जानी पुड़ एच्छी-एच्छी थी । 7 पेइलो प्राणी शेरेरो ज़ेरो थियो, ते दुइयोवं प्राणी दाँतेरो ज़ेरो, टलेइयोवं प्राणी मैनेरो ज़ेरो थियो, ते च़ेवरोवं प्राणी उडरने बाले उकाबेरो ज़ेरो थियो । 8 ते च़ेवरे परैणी केरां शा-शा फंगां थियां ते तैन पुड़ एच्छी थी इड़ी तगर कि फंगन अन्तर भी एच्छी थी, तैना रात दिहाड़ी बगैर आरामे इन ज़ोते रातन,
“पवित्तर, पवित्तर, प्रभु-परमेशर, सर्वशक्तिमान,
जै थियो, जै आए, ते ज़ै एजनेबालोए ।”

9-10 ज़ै तखते पुड़ बिशोरो ज़ै हमेशा-हमेशा ज़ीतोए, तैना प्राणी तैसेरी महिमा ते आदर ते शुक्र केरेले, ज़ैखन चोव्ही बुजुर्ग तखतन पुड़ बिशने बाले कां मथ्यो टेकेले, ते तैसेरी आराधना केरेले । ते तैना अपना-अपना ताजां तखतेरे सामने इन ज़ोइतां रखेले:

11 “हे इश्शे प्रभु-परमेशर, तींए सैरी चीज़ां बनेइ ।
तेरे मेर्ज़ी सेइं सब चीज़ां बनेइ जैई ते वजूदे मां एई ।
एल्हेरेलेइ तूए महिमा, आदर ते शेक्तेरे काबलस ।”

5

????????????? ?????? ?? ???? ?????

1 ज़ै तखते पुड़ बिशोरो थियो, मीं तैसेरे देइने हथ्ये मां अक किताब लाई, ज़ै अन्तरमेई त कने बेइरमेई लिखोरी थी, ते तै सत मोहरां लेइतां बन्द कियोरी थी । 2 फिरी मीं अक ताकतबर स्वर्गदूत लाव, ज़ै ज़ोरे ज़ोरे सेइं ई प्रचार केरतो थियो । “इस किताबारो खोल्लने ते इसेरी मोहरां टलोइनेरे काबल कौने?” 3 पन न स्वर्गे मां, न धेरती पुड़ न धेरतारे बुन कोई तैस किताबी खोल्लने या तैस पुड़ नज़र केरनेरे काबल मैलो । 4 ते अवं ज़ोरे-ज़ोरे सेइं लेरां देने लव, किजोकि तैस किताबे खोल्लनेरे या तैस पुड़ नज़र केरनेरे काबल कोई न मैलो । 5 तैखन तैन बुजुर्गन मरां एक्के मीं सेइं ज़ोवं, “लेरां न दे, तक, तै ज़ैस जो यहूदारे गोतरेरो शेर ज़ोतन, ज़ै दाऊद राजेरे खानदाने मरांए तैने तै किताबी खोल्लनेरे ते सत्ते मोहरां टलोइनेरे लेइ शैतान हारावरोए ।” 6 तैखन मीं तखत ते च़ेवरे प्राणी त कने तैन बुजुर्गां केरे मझाटे अक मारोरू गबडू लाव । तैसेरां सत शिन्गाँ ते सत एच्छी थी; इना परमेशेरी सते आत्मान, ज़ैना सैरी धेरतली पुड़ भेजोरिन । 7 गबडे अगगर एइतां ज़ै तखते पुड़ बिशोरो थियो तैसेरे देइने हथ्ये मरां तै किताब नेही । 8 ते ज़ैखन तैने किताब नेही, त तै च़ेवरे प्राणी ते चोव्ही बुजुर्ग तैस गबडेरे सामने झुके; ते हर केन्चरे हथ्ये मां बर्बत ते धूपे सेइं भरोरे सोन्नेरे कटोरे थिये, इना पवित्तर लोकां केरि प्रार्थनान । 9 त तैना इन नंवू गीत ज़ोने लगे,

“तीं कां अधिकारे कि तू मोहरन ट्लोडस ते इस किताबी खोल्लस,
किजोकि तीं मेरतां अपने खूने सेइं परमेशेरे लेइ हर एककी कुले मरां, हर भाषाई मरां,
हर लोकन मरां, ते कौमी मरां लोक धिन्नोरेन।”

10 “तीं तैना राजे बनाए, तीं तैना याजक बनाए जैना इशे प्रभु परमेशेरे लेइ सेवारू कम केरन, ते तैना धेरती पुड़ राजां केरू जेरू राज करतन।”

11 मीं दुबारा तक्कू, त मीं बेशुमार स्वर्गदूतां त च़ेवरे प्रणी ते बुजुगां केरि आवाज शुनी जैना तखतेरे च़ेवरे पासन थिये। 12 तैना ज़ोरे सेइं ज़ोते थी, “मारो गबडू समर्थ, धन, ज्ञान, शेक्ति, आदर, महिमा, ते कने शुकरेरे काबले।” 13 फिरी मीं स्वर्गे मां ते धेरतली पुड़ त कने धेरतलरे बुन, ते समुन्दरेरी सब चीजां, ते सब किछ ज़ैन तैन मांए, इन ज़ोते शुनू कि, “जै तखते पुड़ बिशोरोए तैसेरू त कने गबडेरू शुकर, आदर, महिमा ते राज, हमेशा राए।” 14 ते च़ेवरे प्रणेई आमीन ज़ोवं, ते बुजुगेई मथ्यो टेको।

6

?? ??????? ?????????

1 फिरी मीं लाव, कि गबडे तैन सत मोहरन मरां अक खोल्ली; ते तैन च़ेवरे प्रणेन मरां एक्केरी गुडनेरी जेरि आवाज शुनी कि, “एई।” 2 ते मीं नज़र की, ते अक छितो घोडोए, ते तैसेरे सुवारे कां धनक थियू, ते तैस अक ताज दित्तू, ते तै ज़ींतो निस्सो कि होरि भी ज़ीत हासिल केरे।

3 ज़ैखन गबडे दुइयोवं मोहर खोल्ली, त मीं होरो प्राणी इन ज़ोते शुनू कि, “एई।” 4 फिरी अक होरो घोडो निस्सो, ज़ै लाल रंगेरो थियो; ते तैसेरे सुवारे ई अधिकार दित्तो, कि धेरतली पुड़ां मेल-मिलाप सल्ले, ताके लोक एककी होरि मारन; ते तैस अक बड्डी तलवार दित्ती। 5 ते ज़ैखन गबडे ट्लेइयोवं मोहर खोल्ली, त मीं ट्लेइयोवं प्राणी इन ज़ोते शुनू कि, “एई।” ज़ैखन मीं तक्कू त अक कालो घोडो निस्सो; 6 ते मीं तैन च़ेवरे प्रणेन मरां मैनेरी जेरि ई गल ज़ोते शुनी, कि दीनारो गेहुं, “ते दीनारेरे टलाई सेर जौ, तेल, ते कने दाछोरो रसेरो नुकसान न केरथ।”

7 ज़ैखन तैने च़ेवरोवं मोहर खोल्ली, त मीं च़ेवरोवं प्राणी इन ज़ोते शुनो कि, “एई।” 8 ते मीं नज़र की, ते हेरा, अक हेइदलो घोडोए; तैसेरे सुवारेरू नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड़ रानेबाले लोकन मरां हर च़ेवरो मैन्हु मारन, कि तैना तैन तलवारी सेइं मारन, ते दलुखी सेइं मारन, ते बुरी बिमैरी सेइं मारन, ते तैन जंगली जानवरन सेइं भी मारन।

9 ज़ैखन गबडे पंचाव मोहर खोल्ली, त मीं बलिदान केरनेरी ठारी करां बुन आत्मा लेई, जैना परमेशेरे वचनेरे वजाई सेइं, ते तैस गवाहेरी वजाई सेइं ज़ै तैनेई दित्तोरी थी, कि यीशु मसीह तैन केरो प्रभुए मारोरो थियो। 10 ते तैनेई बडे ज़ोरे सेइं हक देइतां ज़ोवं, “हे पवित्तर, ते सच़्चे प्रभु; तू केइस तगर इशो इन्साफ न केरेलो? ते धेरतलरे रानेबालन सेइं इशे खूनेरो बदलो केइस नेलो?” 11 ते तैन सेब्बन छित्तां लिगडां दित्तां, ते तैन सेइं ज़ोवं, कि थोडे च़िरेरे लेइ आराम केरा, ज़ांतगर तुशे संगी दास, ते विश्वासी साथी, ज़ैना तुशे ज़ेरे मारे गानेन, तैन केरि भी गिनती पूरी न भोए।

12 ज़ैखन गबडे शेइयोवं मोहर खोल्ली, त मीं हेरू, कि अक बडो भुंजल अव; ते दिहडो कमलेरो ज़ेरो भोव, ते चाँदनी पूरी खूनेरी जेरि भोइ। 13 ते अम्बरेरे तारे धेरतली पुड़ां झडे जेन्च़ेरे बडे तूफाने सेइं फ़ेगेरे बुटे मरां कच़्चे फल झडतन। 14 ते अम्बर एरू घिशकू, जेन्च़ेरे बरको पलेटोते ते हर अक पहाड़, ते टैपू, अपने-अपने ठारां घिशके। 15 ते धेरतलरे राजे, प्रधान, सरदार, धनी ते समर्थि लोक, ते हर अक दास, ते हर अक आज़ाद पहाड़ां केरे कुढन मां, ते शफ़डन मां छप्पे। 16 ते पहाडन, ते शफ़डन सेइं ज़ोने लाए, “कि असन पुड़ झडा; ते असन तैसेरे ऐशी सेइं ज़ै तखते पुड़ बिशोरोए ते गबडरे सरकी करां छुपा। 17 किजोकि तै खतरनाक दिहाडी एज्जेली ज़ेइस परमेशर ते गबडू हर एककी सज़ा देले, ते कोई भी तैस झैल्लनेरे काबल नई।”

7

???????????????? 144000 ?????

1-2 इसेरां पत्ती मीं दुनियारे च़ेवरे कूनन पुड़ च़ेवरे स्वर्गदूत खडे लाए। तैन स्वर्गदूतन दुनियाई मां आफत फैलेइतां नुकसान पुजानेरे लेइ परमेशेरे करां अधिकार हासिल कियोरो थियो, चाए धेरती पुड़ या समुन्दरे पुड़। तैनेई दुनियारे

चेवरे कूनन करां हवान टेमतां रखी ताके धेरतली, या समुद्र, या कोन्ची बुटे पुड़, हवां न चले। ते मीं अक होरो स्वर्गदूत पूर्बेरां एडतो लाव। तैस कां अक महोर थी जै हमेशा जीते परमेशेरे तरफां थी। तैने चेवरे स्वर्गदूतन सेइं ज़ोरे सेइं ज़ोवं: ³ “जांतगर अस अपने परमेशेरे दासां केरे कुपाए पुड़ मोहर न लाम तांतगर तैना आफतां तैन पुड़ न एजन, ते धेरतली, समुन्द्र ते कने बुटन नुकसान न पुजान।” ⁴ ते जैन पुड़ मोहर कीजेई, मीं तैन केरि गिनती शुनी, कि इस्राएलेरी खानदानेरे गोदलन मरां अक लख चुरतैली हज़ारन पुड़ महोर कीजेई। ⁵ यहूदारे गोदलन मरां 12 हज़ारन पुड़ मोहर लाई, रूबेनेरे गोत्रे मरां 12 हज़ारन पुड़; गादेरे गोत्रे मरां 12 हज़ारन पुड़। ⁶ अशेरेरे गोदलेरे मरां 12 हज़ारन पुड़; नफ्तालेरे गोत्रे मरां 12 हज़ारन पुड़; मनशेरे गोत्रे मरां 12 हज़ारन पुड़। ⁷ शमौनेरे गोत्रे मरां 12 हज़ारन पुड़; लेवेरे गोत्रे मरां 12 हज़ारन पुड़; इस्साकारेरे गोत्रे मरां 12 हज़ारन पुड़। ⁸ जबूलूनेरे गोत्रे मरां 12 हज़ारन पुड़; यूसुफेरे गोत्रे मरां 12 हज़ारन पुड़, बिन्यामीनेरे गोत्रे मरां 12 हज़ारन पुड़ मोहर लाई जेई।

२२ २२२ २२२

⁹ इसरां पत्ती मीं मैन्हु केरि भीड़ लाई जैस कोई गेनि न थियो बटतो। तैना हर कुले मरां, हर कौमी मरां, ते हर भाषाई मरां ओरे थिये। तैना तखतेरे ते गबड़ेरे सामने खड़े थिये। तैनेई छित्तां लिगडां लोरो थियां, ते सैभेई अपने हथ्यन मां तैसेरे आदरारे निशानेरे रूपां मां खजूरेरी डैलडी घिन्तां थिये। ¹⁰ ते तैना लोक बड़े ज़ोरे सेइं ज़ोती थिये, “मुक्तेरे लेइ इशे परमेशेरे जै तखते पुड़ बिशोरोए, ते गबड़ेरू जयजयकार भोए।” ¹¹ ते सारे स्वर्गदूत जैना तखतेरे चेवरे पासन ते बुजुगां केरे चेवरे पासन थिये ते चेवरे प्रेणेई तैनेई मथ्यो टेको, ते परमेशेरे कां मथ्यो टेकतां ज़ोवं, ¹² “आमीन, इशे परमेशेरेरी स्तुति, ते महिमा, ते ज्ञान, ते शुक्र ते आदर, ते समर्थ, ते शक्ति हमेशा बनोरी राए। आमीन।”

¹³ इन गल्लन पुड़ बुजुर्गन मरां एक्के मीं सेइं ज़ोवं; “इना छित्तां लिगडां लेइतां कौन? ते कोट्ठां ओरेन?” ¹⁴ मीं तैस सेइं ज़ोवं; “हे मालिक, तूए ज्ञानतस।” तैने मीं सेइं ज़ोवं; “इना तैना आन, जैना तैस बड़े मुसीबती मरां निसोरेन; तैनेई अपना लिगडां गबड़ेरे खूने सेइं धोइतां छित्तां केरन, जेसेरो मतलब तैन केरे पाप दूर किये।”

¹⁵ “एल्हेरेलेइ तैना परमेशेरे तखतेरे सामनेन,
ते तैसेरे मन्दरे मां रात दिहाड़ी तैसेरी सेवा केरतन;
ते जै तखते पुड़ बिशोरोए, तै तैन मां रालो ते तैन केरि रक्षा केरेलो।

¹⁶ ते तैना फिरी दलुखोरे ते टलिशोरे न भोले:
ते तैना दिहाड़े सेइं ते कोन्ची भी गेरमी सेइं न फुकोले।

¹⁷ किजोकि गबड़ू जैन तखतेरे मझाटे, तैन केरि रखवाली केरेलू;
ते तैन लोकन ज़िन्दगरे पैनी कां नेलू,
ते परमेशर तैन केरे एछ्छी केरां सब ऐंखरू पुछ्छेलो।”

8

२२२२२ २२२२ २२ २२२२२२२२ २२२२२२

¹ जैखन गबड़े सतोवं मोहर खोल्ली, त स्वर्गे मां अध्ये घंटे तगर खामोशी राई। ² मीं तैन सत स्वर्गदूत जैना परमेशेरे सामने खड़े रहतन, लाए, ते तैन सत नइशिंगे दित्ते जे।

³ फिरी अक होरो स्वर्गदूत सोन्नेरू धूपदान घिन्तां अव, ते बलिदान केरनेरी ठारी कां जेव; ते तैस बड़ो धूप दित्तो, कि सेभी पवित्तर लोकां केरि प्रार्थनान सेइं साथी तैस सोन्नेरे बलिदान केरनेरी ठारी पुड़ जै तखतेरे सामने च़ाढ़े। ⁴ ते तैस धूपेरो तू परमेशेरे लोकां केरि प्रार्थनान सेइं साथी स्वर्गदूतां केरे ज़िरिये परमेशेरे सामने पुजो। ⁵ तैखन स्वर्गदूत धूपदान नेइतां तैस मां बलिदान केरनेरी ठारारी अग भरी, ते धेतली पुड़ छड़ी, ते गुड़नेरी आवाज़ ते बिजली ते भुंजल भोने लाए।

२२ २२२२२२२२

⁶ ते तैना सते स्वर्गदूत जैन कां सत नइशिनगे थिये, बजानेरे लेइ तियार भोए।

⁷ पेइले स्वर्गदूत नइशिनगों बजाव, ते खूने सेइं मिलोरी आण ते अग धेरतली पुड़ शारी; ते धेरतली दलेइन मरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव।

8 दुइयोवं स्वर्गदूते नइशिनगों बजाव, त किछ जेन्चरे बड्डे पहाड़ेरू जेरू अग्गी सेइं फुकोतू समुन्द्रे मां शारू; ते समुन्दर अक तीहाई खून भोव। 9 ते अक तीहाई जानवर जैना समुन्द्रे मां रहते थिये मेरि जे, ते समुन्दरेरेरां अक तीहाई जिहाजां तुबा भुआं।

10 ट्लेइयोवं स्वर्गदूते नइशिनगो बजाव, ते अक बड्डो तारो जै दीयेरो जेरो बलतो थियो, स्वर्गेरां ट्लुटो, ते दरियां केरे एक्की तीहाई पुड़, ते पैन्न पुड़ पेव। 11 ते तैस तारेरू नवं नागदौनाए, ते अक तीहाई पानी नागदौनारू जेरू ट्लिटू भोवं, ते बडे मैन्हु तैस पैनेरे ट्लिटू भोने सेइं मेरि जे।

12 च़ेवरोवं स्वर्गदूते नइशिनगो बजाव, ते दिहाड़ो अक तीहाई, ते चेंदनरी अक तीहाई ते तारां केरि एक्की तीहाई पुड़ हलचल पेई, इडी तगर कि तैन केरो अक तीहाई हिस्सो आंधरो भोव ते दिहैडरी एक्की तीहैई मां लौ न राई, ते तेन्चरे राती मां भी।

13 जैखन मीं हेरू, त अम्बरेरे मझामेई अक उकाब उडरते ते ज़ोरे सेइं इन ज़ोते शुनू, “कि तैन ट्लाई स्वर्गदूतां केरे नइशिनगेरे आवाज़ारे वजाई सेइं जैना बजाने हेजू बाकिन, धेरतली रानेबालन पुड़ अफ़सोस! अफ़सोस! अफ़सोस!”

9

1 जैखन पंच्रोंव स्वर्गदूते नइशिनगो बजाव, त मीं स्वर्गेरां धेरतली पुड़ अक तारो झड़तो लाव, ते तैस अथाह कुण्डेरी चाबी दित्ती। 2 तैने अथाह कुण्ड खोल्लू, ते कुण्डे मरां एक्की भेट्टारो जेरो तू निस्सो, ते कुण्डेरे तूए सेइं दिहाड़ो ते अम्बर आंधरू भोइ जेव। 3 ते तैस तूए मरां धेरतली पुड़ टिट्टां निस्सां, ते तैन धेरतलरे बिच्चू केरि जेरि ताकत दित्ती जेई। 4 ते तैन सेइं ज़ोवं, कि न धेरतलरे घासे, न केन्ची नीलारे, न केन्ची बुटे नुकसान पुजान, सिर्फ तैन मैन्न जैन केरे कुपाए पुड़ परमेशेरी मोहर नई। 5 ते तैन मारनेरे लेइ नई, पन पंच्र महीन्न तगर लोकन दुःख देनेरो अधिकार दित्तो, ते तैन केरो दुःख एरो थियो, जेन्चरे बिच्चू केरे डस मारने सेइं मैन्न भोते। 6 तैन पंच्र महीन्न मां मैन्हु मरनू चाएले, पन तैना न मेरि बटेले। तैना मरनेरी इच्छा रखेले पन तैना कोन्ची भी तरीके सेइं मरनेरी बत न मैलेली। 7 तैना टिट्टां जंग केरनेरे लेइ तियार घोड़ां केरे जेरां लेइहोतां थियां, तैन केरे दोगन पुड़ सोनरां ताजां केरू जेरू किछ लेइहोतू थियूं; तैन केरां तुत्रां मैन्हु केरे तुत्रां केरां जेरां थियां। 8 ते तैन केरे बाल कुआन्शां केरे जेरे लम्मे थिये, ते तैन केरे दंत शेरां केरे जेरे मजबूत थिये। 9 ते तैने लोहेरी जेरि झिलम लोरी थी, ते तैन केरे फंगां केरि आवाज़ एरी थी जेन्चरे रथां केरि ते लडैई मां दौडते बडे घोड़ां केरि। 10 तैन केरां पूछड़ां बिच्चू केरां जेरां थियां, ते तैन मां डस थियो, ते तैन पंच्र महीन्न तगर मैन्न दुःख पुजानेरी ताकत थी, ते तातक तैन केरे पूछड़न मां थी। 11 अथाह कुण्डेरो दूत तैन पुड़ राजो थियो, तैसेरू नवं इब्रानी भाषाई मां अबदोन, ते यूनानी भाषाई मां अपुल्लहोने, जेसेरो मतलब नाश केरनेबालो।

12 पंच्र महिन्ना बाद पेइली आफत बीती जेई, ते इट्टां पत्ती दूई बल्के दूई करां जादे आफतां एजने बैलिन।

13 जैखन शेइयोवं स्वर्गदूते नइशिनगो बजाव ते जै सोन्नेरे बलिदान केरनेरी ठार परमेशेरे सामने, तैसेरे च़ेवरे कूनन मरां मीं एरी आवाज़ शुनी। 14 जेन्चरे कोई शेइयोवं स्वर्गदूत सेइं ज़ोने लोरोए जैस कां नइशिनगो थियो, “कि तैन च़ेवरे दूत जैना बडे दरियाए फराते कां बन्दोरोए, तैन खोल्ले।” 15 तैखन तैना च़ेवरे दूत खोल्ले, तैना पेइले तियार भोरे थिये, त इस घेड़ी, ते दिहाड़े, ते महीने, ते सालेरे लेइ तैन बलगनेरे लेइ ज़ोरू थियूं, ते हुनी ई वक्त अव, कि तैना दुनियारे लोकन मरां अक तीहाई लोक मारन। 16 ते तैन केरे फौजरी गिनती बी करोड़ थी जैना घोड़न पुड़ सुवार थिये, मीं तैन केरि गिनती शुनी। 17 ते मीं इस दर्शने मां घोड़े ते तैन केरे एरे सुवार लेइहोए, जैन केरि झिल्लमां अगारे जेरि लाल, ते नीले ते हेइले रंगेरे जेरे थी, ते तैन घोड़ां केरि करोड़ी शेरां केरे करोड़ी केरि जेरि थी, ते तैन केरे ऐशेरां अग ते तू ते गन्धक निसती थी। 18 इन ट्लेइ आफतन सेइं जैना इना आन, अग, तू, ते कने गन्धक, जै तैन घोड़ां केरे ऐशी मरां निसती थी; तैन सेइं अक तीहाई लोक मेरि जे। 19 तैन घोड़ां केरि ताकत तैन केरे ऐशी, ते कने तैन केरे पूछड़न मां थी, किजोकि तैन केरां पूछड़ां सप्पां केरां जेरां थियां, ते तैन केरे पूछड़ां केरि करोड़ी भी थी, ते तैने सेइं तैना दुःख भी पुजाते थिये। 20 ते होरे मैन्हु जैना तैन आफतन सेइं न थी मरें, ते तैनेई मूरती केरि पुजा केरनि न शारी, जैना तैनेई सोन्ने, पितल, ते कन्ने घोड़, लेकडरे बनेइं। तैना मूरती न लहन, न शुन्न, न च़ेलि बटन, ते तैनेई भूतां केरि आराधना केरनि भी न शारी। 21 ते तैनेई, खून, टूनो, बदमाशी, ते कने च़ोरी केरने करां मन न फिराव।

10

११११११११ ११ ११११११ १११११

1 फिरी मीं अक होरो ताकतबर स्वर्गदूत बिदलार पलेटतां स्वर्गोरां एडतो लाव, तैसेरे दोगगे पुड भुञ्जल्लैठ थी, ते तैसेरू आशी दिहाड़ेरू जेरू ते तैसेरे पाव अगारे खम्मबेरे जेरे थिये। 2 तैने अपनो देइने पाव समुन्दरे पुड रखवो, ते खिशडो धेरतली पुड रखवो, ते तैसेरे हथ्ये मां अक निकडी किताब खोलोरी थी। 3 तैनी स्वर्गदूते बडे ज़ोरे सेइं ज़ोवं, तैसेरी आवाज़ शेररे गर्जनेरी ज़ेरि थी। ते ज़ैखन तैने ज़ोरे सेइं चिन्ड मारी, त सत आवाज़ेईं जुवाब दित्तो, ज़ैन केरि आवाज़ गुडनेरी ज़ेरि थी। 4 ते ज़ैखन मीं सत्ते गुडनेरी आवाज़ शुनी, त अवं लिखनेबालो थियो, त मीं स्वर्गोरां ई आवाज़ शुनी, “कि ज़ैना गल्लां तीं गुडनेरी ज़ेरि शुनोरिन, तैन छेपोरी रख, ते तैन न लिख।” 5 ते ज़ै स्वर्गदूत मीं समुन्दर ते धेरतली पुड खडो लोरो थियो; तैने अपनो देइने हथ स्वर्गेरे पासे खडो कियो। 6 ते ज़ै हमेशा जीतोए ते ज़ैने स्वर्ग, धरती त कने समुन्दर ते ज़ैन किछ तैन मांए बनोरूए, तैनी तैसेरी कसम खेइतां ज़ोवं, “हुनी होरि कोन्ची चीज़रो इंतज़ार नई। हुनी सब पूरू कियूं गालू।” 7 बल्के ज़ैखन सतोवं स्वर्गदूत नइशिनगो बज़ालो, त परमेशेरो ते मकसद पूरो भोलो ज़ै तैसेरे नेबेईं ज़ोरोए, ज़ैनेईं तैसेरी सेवा की, पन तैने होरि लोकन तैसेरो पतो लगने न दित्तो। 8 मीं फिरी दुबारां स्वर्गोरां तैए आवाज़ शुनी। तैस आवाज़ां मीं सेइं ज़ोवं, तैए फिरी मीं सेइं गल्लां केरने लाव; “कि गा, ज़ै स्वर्गदूत समुन्दर ते धेरतली पुड खडोए, तैसेरे हथ्ये मरां खुलोरी किताब ने।” 9 ते मीं स्वर्गदूत कां गेइतां ज़ोवं, “ई निकडी किताब मीं दे।” तैने मीं सेइं ज़ोवं, “यां इस खा, ते ई तेरे पेटे ट्लइट्टी त केरेली, पन तेरे ऐशी मैछी करां भी जादे मिट्टी लग्गेली।” 10 ते मीं तै निकडी किताब तैस स्वर्गदूत करां नेइतां खाइ, तै मेरे ऐशी मां मैछेरी ज़ेरि मिट्टी लग्गी, पन ज़ैखन मीं तै खाइ, ते तैस सेइं मेरू पेट ट्लिटू भोवं। 11 तैखन मीं सेइं इन ज़ोवं, “तीं बडे लोकन, कौमन, भाषान, ते कने राजन पुड, फिरी दुबारां भविष्यवाणी केरनि भोली।”

11

१११ ११११

1 फिरी मीं नापनेरे लेइ अक निराठी दित्ती, ते तैने मीं सेइं ज़ोवं, “उठ परमेशेरे मन्दरे ते बलिदान केरनेरी ठार नाप, ते ज़ैना लोक तैडी मेरी आराधना केरने लोरेन तैन गन। 2 पन मन्दरेरे बेइरयो अंगन न नाप, किजोकि एन तैन लोकां केरे लेइ आए ज़ैना मीं पुड विश्वास न केरन, ते तैना तैस पवित्र नगर यरूशलेमे 42 महीन्न तगर तुबा केरेले। 3 तैस वक्ते अवं अपने दुइये गवाहन ई अधिकार देइलो, तैना टाट यानी मातमेरां लिगडां लेइतां 1260 दिहाइन तगर मेरे सन्देशेरू एलान केरन।”

4 तैना दूई गवाह, ज़ैन केरे बारे मां बडे पेइले केन्चे ज़ैतूनेरे दूई बुट ते दूई दीवट* केरि मिसाल दित्तोरी थी ज़ैना परमेशेरे सामने रहतन ज़ै धेरतरे लोकां केरो प्रभुए। 5 ते अगर कोई तैन नुकसान पुज़ानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अगर कोई तैन नुकसान पुज़ानो चाए, त ज़रूर तै इस्से तरीके सेइं मारे गाले। 6 परमेशेरे तैन अधिकार दित्तोरो, कि तैना सन्देश एलान केरनेरे दौरान अम्बर बंद केरन (यानी झड़ी रोकन)। तैन ई भी अधिकार मैल्लो पानी खूनेरू ज़ेरू लाल बनान, ते इन भी कि ज़ैखन तैना चान धेरतली पुड हर किसमेरी आफत एनी बटतन। 7 ते ज़ैखन तैना दूई गवाह परमेशेरे सन्देशेरू एलान केरतां झाड़ेले, त तैए हैवान ज़ै अथाह कुण्डे मरां निसेलो, तैन सेइं लेइतां तैन करां जीतेलो ते तैन मारेलो। 8 ते तैन केरि लाशां तैस महान नगर यरूशलेमेरे सडकी मां राली ज़ैडी तैन केरो प्रभु कूरूस पुड चादोरो थियो, ज़ेसेरी तुलना सदोम नगर ते कने मिसरे मुल्ले सेइं कियोरीए। 9 ते सब लोकन, कुलन, भाषान ते कने कौमन मरां लोक तैन गवाहां केरि लाशां सडे टलाई दिहाइन तगर हेरते राले। ते तैना लोक तैन केरि लाशन कोन्ची भी दबने न देले। 10 ते धेरतलेरने रानेबाले, तैन केरे मारने सेइं खुश ते मघन भोले, ते तैन केरे हेरने बालन बडे डरेले। 11 ते सडे टलाई दिहाइना पत्ती परमेशेरे तरफां ज़िन्दगरी सांस तैन मां आई, ते तैना खडे भोए, ते ज़ैनेईं तैना दुबारां जीते लाए तैना बडे डेरि जे। 12 एसेरां बाद, तैन दूई मैनेईं स्वर्गोरां अक ज़ोनेबालो उच्ची आवाज़ी मां ज़ोते शुनो, “कि इडी बा एज्जा!” ज़ैखन तैन केरे दुश्मन हेरनेरे लोरे थिये तैना तैने केरे सामने बिदलारी पलेटतां स्वर्गे मांजो चले जे। 13 फिरी तैस्से वक्ते यरूशलेम नगरे मां अक बडो भुञ्जल अव, ते नगरेरे इमारतां केरो दशोवं हिस्सो झडो; ते तैस भुञ्जले सेइं 7000 मरे, ते होरे ज़ैना बचोरे थिये तैना बडे डरे, ते तैनेईं स्वर्गेरे परमेशेरेरी बडीयाई की।

* 11:4 11:4 ज़ैतूनेरे दूई बुट ते दूई दीवट जक. 4:1-3, 11-14

14 दुइयोवं आफत बीती जेई, हेरा, ट्लेइयोवं आफत एजने बालीए ।

?????? ???? ????????

15 जैखन सतोवं स्वर्गदूते नइशिनगो बजव, त मीं स्वर्गे मां बड़ी ज़ोरे सेइं आवाज़ शुनी, “हुनी इस दुनियाई मां कोई राज़ केरनेबालो नई सिर्फ इशशो प्रभु-परमेशर ते तैसेरो चुनोरो मसीह, ते तै हमेशारे लेइ राज़ केरेलो ।” 16 ते चोब्ही बुज़ुर्ग ज़ैना परमेशरेरे सामने अपने-अपने तखते पुड़ बिशशारे थिये, परमेशरे कां मथ्यो टेकतां, 17 इन ज़ोने लाए:

“हे सर्वशक्तिमान प्रभु-परमेशर, तू ज़ै आस, ते ज़ै थियो,
अस तेरू शुक्र केरतम, कि तीं हुन्ना महान शक्ति हिराई,
ते तीं धेरती पुड़ राज़ केरनू शुरु कियोरूए ।

18 होरि कौमां केरे लोकेई तीं पुड़ क्रोध कियो, ते तेरो प्रकोप अव,
ते तै वक्त ओरोए कि मरां केरो इन्साफ कियो गाए, ते ई वक्त भी आए,
कि तेरे दास नेबन ते सारे लोकन ज़ैना तेरे आदर केरतन ज़ैना कमज़ोरन ते ज़ैना ताकतबरन तैन तू इनाम देस,
ते तैस्से वक्ते तैन नाश केरस ज़ैना धेरतरे नाश भोनेरी वजा थिये ।”

19 परमेशरेरू ज़ैन मन्दर स्वर्गे मांए, तैन खोल्लू, ते तैसेरे मन्दरे मां करारेरो सन्दूख लेइहोव, ते बिजली ते आवाज़ ते गुड़ने ते भुंजल आए, ते बड़ी-बड़ी आण पेई ।

12

???????? ? ? ? ? ? ?

1 जैखन तैन बीती जेव, त फिरी अम्बरे मां अक बड़ो आजीब निशान लेइहोव । मतलब अक कुआन्श ज़ै चाँदनी पुड़ खड़ी आए ते तैसां ज़ैना लिगडां लोरन तैना दिहाड़ेरे ज़ेरां लेइहोतन । ते तैसेरे अपने दोगगे पुड़ ताज लोरू थियूं ज़ैस पुड़ 12 तारे थिये । 2 तै दोज़ींती भोइ, ते चिन्डां मारती थी; किजोकि तैस बच्चो ज़ानेरी तकलीफ थी । 3 ते अक होरो निशान अम्बरे मां लेइहोव, ते हेरा; अक बड़ो लाल अजगर (यानी शैतान) थियो, तैसेरी सत क्रोड़ी ते दश शिन्गां थियां, ते तैसेरे दोगन पुड़ सत ताजां थियां । 4 ते तैसेरे पूछडां अम्बरेरे तारां केरि अक तीहाई ज़मीनी पुड़ आनी, ते तै अजगर तैस कुआन्शरे सामने खड़ो भोव ज़ै दोज़ींती थी, कि ज़ैखन तै बच्चो ज़ाए त तै बच्चे तैस खाए । 5 तैखन तैस कुआन्शां मट्टू ज़ाऊं, तैन अजगरे न खेइ बटु किजोकि तैन अकदम परमेशरे ते तैसेरे तखते कां आनू जेव । तैन मट्टू सारी कौमन पुड़ लोहेरे डण्डे सेइं राज़ केरेलू । 6 ते ई कुआन्श जंगले जो नशशी, ज़ैड़ी परमेशरेरे तरफां तैसेरेलेइ अक ठार तियार कोयोरी थी, कि तैड़ी 1260 दिहाड़न तगर तैसेरी हेरगेश की गाए ।

7 फिरी स्वर्गे पुड़ लड़ाई भोइ, मीकाईल ते तैसेरे स्वर्गदूत अजगरे सेइं लड़ने लेइ निस्से, ते अजगर ते तैसेरे दूतन सेइं लड़े । 8 अजगरे लड़ाई हारी, ते फिरी तैना स्वर्गे मां न रेइ बटे । 9 एल्हेरेलेइ तै त तैसेरे दूत धेरती पुड़ शारे, तैए बड्डो अजगर, ई तैए ज़ै बड़े पेइले सपेरे रूपे मां बांदो भोरो थियो, जेसेरू नवं शैतान या दोष लानेबालोए । तैए आए ज़ै दुनियारे लोकन धोखे देने लोरोए । 10 फिरी मीं स्वर्गेरां ई बड़ी आवाज़ एइती शुनी, “कि हुनी परमेशर अपने लोकन बचालो! हुनी तै अपनि शक्ति इस्तेमाल केरेलो ते राज़ेरू ज़ेरू राज़ केरेलो! हुनी तैसेरो मसीह दुनियाई पुड़ अधिकार रखेलो! किजोकि हुनी शैतान इशशे परमेशरेरे हज़ूरी मां खड़ो न रेइ बटेले कि इशशे साथी सेवकन पुड़ रात दिहाड़ी दोष लाए । तै स्वर्गे मरां शारो जोरोए । 11 ते तैनेई गबड़ेरे खूनेरे वजाई सेइं ते अपने गवाहेरे वचनेरे वजाई सेइं, तैस पुड़ ज़ीत हासिल की, ते तैनेई अपने प्राण टलारे न समझे, इड़ी तगर की मौतरी भी परवाह न की । 12 ‘एल्हेरेलेइ तुस सब ज़ैना इड़ी स्वर्गे मां रहने बालेथ खुश भोथ । पन हे धेरतली ते कने समुन्दरे मां रानेबालव तुसन पुड़ अफ़सोस! किजोकि शैतान बड़े क्रोधे सेइं तुसन कां एजनेबालोए, किजोकि तै ज़ानते कि तैसेरो आखरी वक्त एजनेबालो ।’ ”

13 ते ज़ैखन अजगरे समझू, कि अवं ज़मीनी पुड़ जो शारोरो, त तैस कुआन्शी पत्ती दौड़ो ज़ैसां मट्टू ज़ावरू थियूं । 14 पन परमेशरे तैस कुआन्शी उकाबेरां दूई बड्डां फंगां दितां, कि अजगरे करां उडरतां जंगले मां तैस ठैरी पुज़े, ज़ैड़ी सड़े टलाई सालन तगर तैसेरी हेरगेश भोरी थी, ताके तैड़ी अजगर न पुज़ी बटे । 15 फिरी अजगरे तैस कुआन्शी पत्ती अपने ऐशी सेइं दरियारू ज़ेरू पानी शारू, कि तैस इस दरियाए सेइं रूइए । 16 तैस कुआन्शरी महत केरनेरे लेइ ज़मीना तैन पानी पियूं ज़ैन तैस अजगरेरे ऐशी मरां निसोरू थियूं । 17 ते अजगर कुआन्शी जो

सेरकोव । एल्हेरेलेइ तैने कुआन्शरे औलादी सेइं लडाई केरनेरू एलान कियूं । तैना लोक जैन परमेशरे हुक्मन मन्तन, ते यीशुएरी दित्तोरी शिक्षाई पुड च़लतन । 18 तैखन अजगर जेव, ते समुन्दरेरे बन्ने पुड खडो भोव ।

13

???? ???? ?

1 मीं अक हैवान समुन्दरे मरां निसतो लाव, तैसेरां दश शिन्गाँ ते सत क़ोडी थी; तैने शिन्गान पुड दश राजमुकट ते तैसेरे दोगन पुड परमेशरेरी तुहीनरां नंवां लिखोरां थियां । 2 जै मीं हैवान लाव, तै ड़लाघेरो ज़ेरो थियो; ते तैसेरे पाव इछेरे पावां केरे ज़ेरे थिये; ते तैसेरू आशी शेरेरे एशेरू ज़ेरू थियूं, ते अजगरे तैस हैवाने अपनि शेक्ति दित्ती ते राज केरनेरे लेइ तैस अधिकार दित्तो । 3 मीं तैस हैवानेरे करोडन मरां एक्की पुड अक एरो ज़खम लाव, ज़ेन्चरे तै मरने पुडे; फिरी तैसेरो मारनेबालो ज़खम रोडो भोव, ते सारे धेरतलरे लोक हैरान भोए, ते तैस हैवाने पत्ती च़लने लगे । 4 ते तैन सेब्भी लोकेई तैस अजगरेरी पूजा की, किजोकि तैने हैवाने अपनो अधिकार दित्तोरो थियो । ते इन जोइतां कि, “इस हैवानेरो ज़ेरो कौने? हैवाने सेइं कौने लेडि बटते?”

5 परमेशरे तैस हैवाने अज़ाज़त दित्तोरी थी कि अपने अधिकारे पुड घमण्ड केरे ते एन्चरे परमेशरेरी तुहीन केरे । परमेशरे तैस 42 महीन्न तगर ई अधिकार रखनेरे लेइ अज़ाज़त दित्ती । 6 तै हैवान परमेशरेरी तुहीन केरने लगे, कि तैसेरे नंवेरे खलाफ, ते ज़ैडी परमेशर रहते ते स्वर्गे मां रानेबाले सेब्भी लोकां केरे खलाफ तुहीन केरने लगे । 7 परमेशरे तैस हैवाने अज़ाज़त दित्तोरी थी, कि परमेशरेरे लोकन सेइं लडे, ते तैन करां जीते, ते तैस हर कुले, सारे लोकन, भाषान, त कने कौमन पुड अधिकार दित्तो जेव । 8 ते धेरती पुड रानेबाले सेब्भी लोकेई तैसेरी पूजा की । सिर्फ तैनेई न की ज़ैन केरां नंवां ज़िन्दगरे किताबी मां दुनिया बनाने करां पेइले लिखोरां थियां । तै किताब गबडेरी ज़िन्दगरी किताबे ज़ैन बलिदानेरे लेइ मारू ज़ोवं । 9 ज़ै समझनू चाते तै ध्याने सेइं शुने ।

10 ज़ैना कैद भोनेन, तैना कैद भोले, ज़ैना तलवारी सेइं मरेलो, ज़रूरीए तैना तलवारी सेइं मरेले, परमेशरेरे लोकां केरि सबर ते विश्वास इस्से मांए ।

11 फिरी मीं अक होरो हैवान धेरतली पुडां निसतो लाव, तैस गबडरे ज़ेरां दूई शिन्गाँ थियां, पन ज़ैखन तैने ज़ोवं त तैसेरी आवाज़ अजगरेरे ज़ेरि थी । 12 ई दुइयोवं हैवान पेइले हैवानेरो सारो अधिकार इस्तेमाल केरते । दुइयोवं हैवाने धेरती ते तैस पुड रानेबालन करां पेइले हैवानेरी पूजा कराते ज़ेसेरो मारनेबालो ज़खम ठीक भोरो थियो । 13 दुइयोवं हैवान बडे-बडे निशान हिरातो थियो, इडी तगर कि मैन्हु केरे सामने अम्बेरां ज़मीनी पुड अग भेज़तो थियो । 14 दुइयोवं हैवाने परमेशरे अज़ाज़त दित्ती कि तै पेइले हैवानेरे सामने चमत्कार हिराए । एन चमत्कारां केरे ज़िरिये तैनी दुनियारे सारे लोक टपलाए । तैने तैन पेइले हैवानेरी मूरती बनानेरो हुक्म दित्तो, ज़ै तलवारी सेइं मारोरो थियो पन फिरी जीतो भोरोए । 15 दुइयोवं हैवाने परमेशरे अज़ाज़त दित्तोरी थी कि तै पेइले हैवानेरी मूरती बनाए ते तै जीतोए, ताके तैस हैवानेरी मूरती गल्लां केरि बटे ते ज़ैना तैस हैवानेरी पूजा न केरने तैना मारे गान । 16 दुइयोवं हैवाने सारे लोकन सेइं ज़बरदस्ती की, ज़ैना खास आन ते ज़ैना खास नई, अमीर, गरीब, आज़ाद, गुलाम आन, कि तैना पेइले हैवानेरे नंवेरी मोहर देइने हथ्थे या कुपाए पुड लान । 17 ज़ैस पुड छाप मतलब तैस हैवानेरू नवं या तैसेरो नंवेरो अंक भोए, त तैसेरे अलावा होरो कोई लेन देन न केरि सके । 18 इस समझनेरे लेइ अक्ल ज़रूरीए । ज़ैस अक्ल भोए, तै इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए ।

14

?????? ?? ???? ???? ?

1 एसेरे बाद, मीं किछ लाऊं, मीं गबडू सिय्योन पहाडे पुड खडू लाऊं । ते तैस सेइं साथी 144000 लोक थिये, ज़ैन केरे कुपाए पुड तैसेरू ते कने तैसेरे बाजेरू नवं लिखेरू थियूं । 2 ते स्वर्गेरां एरी आवाज़ शुनोई, ज़ै बडे पैनेरी ते बडे गुडनेरी ज़ेरि आवाज़ थी, ते ज़ै आवाज़ मीं शुनी; तै एरी थी ज़ेन्चरे कोई सारंगी बाज़ाने बालो सारंगी बज़ाने लोरोए । 3 144000 लोक तखतेरे सामने, ते प्राणी ते कने बुजुर्गां केरे सामने खडे थिये; तैना अक नंवू गीत ज़ोने लोरे थिये, तैन गीत सिर्फ तैन लोकेई शिखेरू थियूं । तैना लोक इना आन ज़ैना सिर्फ इस दुनियाई मां रानेबाले लोकन मरां परमेशरे छुटोरे थिये । 4 इना तैना लोक आन, ज़ैना कुआन्शन सेइं अशुद्ध नई भोरे, पन कुवारेन, इना

तैना आन, जेरां भी गबडू गाते तैना भी तैस पत्ती चलतन, इना त परमेशेरे लेइ पेइले फल भोनेरे लेइ मैनु मरां घिने जोरेन। ⁵ तैनेई कधी झूठ नई जोरू, ते तैना बेइलजामन।

॥॥॥॥ ॥॥॥॥॥॥॥॥

⁶ फिरी मीं अक होरो स्वर्गदूत अम्बरे मझामेई उडरतो लाव जैस कां धेरतली पुड़ रानेबालां केरि हर अक कौम, कुल, ते कने भाषारे लोकन शुनानेरे लेइ हमेशारी खुशखबरी थी जै कधे न बेदलोए। ⁷ तैने बडे ज़ोरे सेइं ज़ोवं, “परमेशे करां डरा; ते तैसेरी बड़याई केरा; किजोकि तैसेरो इन्साफ केरनेरो वक्त पुजोरोए, ते तैसेरी आराधना केरा, जैने स्वर्ग, धरती, समुन्दर, पैनेरे नाग बनोरेन।” ⁸ फिरी तैसेरां पत्ती अक होरो स्वर्गदूत इन ज़ोतो अव, “कि झडू, तैन बाबेल नगर झडू, तैने सारे कौमन अपनि शराबी पियाई, जेसेरो मतलब ई आए कि तैने सैरी लोकन मूरती केरि पूजा केरनि शिखाली।”

⁹ फिरी एसेरां पत्ती अक होरो स्वर्गदूत बडे आवाजी सेइं इन ज़ोतो अव, “कि जै कोई इस हैवाने ते तैसेरी मूरतरी पूजा केरे, ते अपने कुपाए या अपने हथ्ये पुड़ तैसेरी छाप लाए। ¹⁰ परमेशर तैन टलिठी शराबी पियालो जैस मां पानी न भोए मिलावरू जेसेरो मतलब परमेशेरे तैन सेइं बडो क्रोधे मां आए ते तैन पुड़ दया न केरेलो, तैना लोक अग ते गन्धकेरे दुखे मां छडे गाले, जैखन परमेशर तैन सजा देतो भोलो त पवित्तर स्वर्गदूत गबडू लालू। ¹¹ ते तैन केरे दुखेरो तू सदा उठतो रालो, ते जैना तैस हैवाने ते तैसेरे मूरतरी पूजा केरेले, ते जैना तैसेरे नंवेरी छाप नेतन, तैन रात दिहाडी चैन न मैलेलो।”

¹² एल्हेरेलेइ परमेशेरे लोकां केरे लेइ ज़रूरी आए कि जैना भी दुःख तैन पुड़ एज्जन तैन सबरी सेइं झैल्लन, परमेशर जैन केरनेरो हुक्म तैन दे तैनेई तैन कियोरू लोडे, ते तैनेई यीशु पुड़ विश्वास केरनो न लोडे शारोरो।

¹³ मीं स्वर्गेरां ई आवाज़ शुनी, “लिख; जैना मुडदे प्रभु मां मरतन, तैना धन आन।” पवित्तर आत्मा पक्कू केरते, “तै ज़ोते, तैन सच्चे। हाँ किजोकि तैना अपने मेहनती करां आराम हासिल केरेले, ते जैन तैनेई कियू तैसेरे बदले तैन इनाम मैलेलू।”

॥॥॥॥

¹⁴ फिरी मीं अक छिती बिदलार लाई, ते तैस बिदलारी पुड़ मैनेरू जेरो कोई बिशोरो लाव, तैसेरे दोग्गे पुड़ सोन्नेरू ताज ते हथ्ये मां तिखी डलातीए। ¹⁵ फिरी अक होरो स्वर्गदूत मन्दरे मरां निस्तां, तैने जै बिदलारी पुड़ बिशोरो थियो, तैस बडे ज़ोरे सेइं ज़ोवं, “कि अपनि डलाती चला किजोकि कटनेरो वक्त ओरोए।” ¹⁶ ते जै बिदलारी पुड़ बिशोरो थियो, तैने धेरतली पुड़ अपनि डलाती लाई, ते धेरतलरी फसल केटोई।

¹⁷ फिरी अक होरो स्वर्गदूत तैस मन्दरे मरां निस्सो, जै स्वर्गे मांए, ते तैस कां भी तिखी डलाती थी। ¹⁸ फिरी एक्की होरे स्वर्गदूत जैस अग्गी पुड़ अधिकार थियो, बलिदान केरनेरी ठारी मरां निस्सो, ते जैस कां तिखी डलाती थी, तैस सेइं ज़ोरे सेइं ज़ोवं; “अपने तिखे डलैइती लेइतां धेरतलरी दाछ कटी; किजोकि तैसेरी दाछ पकोरीए।” ¹⁹ ते तैने स्वर्गदूत धेरतली पुड़ अपनि डलाती रख्खी, ते धेरतलरे दाछारे फल केटतां, अपने परमेशेरे परकोपेरे बडे रसेरे कुण्ड मां छडी। ²⁰ ते नगरेरे बेइर तैस रसेरे कुण्डे मां दाछ ढलेन्नी, ते रस कुण्ड मरां एत्रो खून निस्सो कि घोड़ां केरे लगामी तगर पुजो, ते 100 कोसे तगर रूडो।

15

॥॥॥॥ ॥॥॥॥ ॥॥॥॥ ॥॥॥॥ ॥॥॥॥॥॥॥॥

¹ फिरी मीं स्वर्गे मां अक बडडो ते आजीब निशान लाव, मतलब सत स्वर्गदूत जैन कां आखरी सत आफतां थी, किजोकि तैन केरे भोने पुड़ परमेशेरेरो क्रोध मुकेलो।

² तैखन मीं समुन्दरेरू जेरू किछ लाव जैन शीशेरू जेरू चमकतू थियू ते अग भी तैस मां मिलोरी थी। मीं तैना लोक भी लाए जैना हैवाने न थिये हैरेई बटोरो, तैन लोकेई हैवान ते तैसेरे मूरतरी पूजा न थी कियोरी। ते तैन पुड़ तैस हैवानेरे नंवेरे अंकेरी महोर न थी लोरोरी। तैना तैस शीशेरे समुन्दरेरे बन्ने पुड़ तै सारंगी घिन्तां खडे भोए जै परमेशेरे तैन दित्तोरी थी। ³ तैना परमेशेरेरे दास मूसेरू गीत, ते गबडेरू गीत ज़ोते थी,

“हे सर्वशक्तिमान प्रभु-परमेशर,

जैना कम्मां तीं कियां तैना बड़ा महान ते आजीब आन,

तू सेब्भी कौमां केरो राजोस,

तैन सब जैन तीं कियूं तैन सही ते धर्मी आए।”

4 “हे प्रभु,

सेभी लोकेई तेरी आदर की,
ते तैना सारे तेरे नंब्वेरी इज्जत करतन,
किजोकि तूए सिर्फ पवित्तरस।

सैरी कौमां केरे लोक हर राज्जन मरां तीं कां एज्जले,

तैना तेरी आराधना केरेले किजोकि तेरे धर्मी कम्मां बड़ां मशूर आन।”

5 जैखन तैन लोकेई गीत ज़ोताई खतम कियां, त मीं स्वर्गे मां मन्दर खोलोरू लाव। तैन एरू थियूं जेन्चरे तेम्बु।
6 ते तैना सत स्वर्गदूत जैन कां सत आखरी आफतां थी, तैना तैस मन्दरे मरां निस्से। तैनेई छित्तां चमकतां लिगड़ां लोरां थियां ते तैनेई अपने छैती पुड़ सोन्नेरी पेट्टी बेन्धोरी थी। 7 ते तैन च़ेवरे प्रैणन मरां एक्के सत्ते स्वर्गदूतन हमेशा ज़ीते रानेबाले परमेशरेरे प्रकोपे सेइं भरोरे सत सोन्नेरे कटोरे दित्ते। 8 ते परमेशरेरी महिमा, ते तैसेरे शेक्तेरे वजाई सेइं मन्दर तूए सेइं भेरोई जेव, ते ज़ां तगर तैन सत्ते स्वर्गदूतेईं सते आफतां खतम की, तांतगर कोई मन्दरे मां न गेइ बटो।

16

?????????? ???? ? ? ?

1 तैट्टां पत्ती मीं मन्दरे मां कोई ज़ोरे सेइं तैन सत स्वर्गदूतन सेइं ज़ोतो शुनो कि, “गाथ, परमेशरेरे सज़ारे सते कटोरे दुनियारे लोकन पुड़ उलटाथ।”

2 ते पेइले गेइतां अपनो कटोरे धेरतली पुड़ उलटव। ते तैन मैन्हु केरे जैन पुड़ हैवानेरी छाप थी, ते ज़ैना लोकेई तैसेरी मूरतरी पूजा केरते थी, एक्की किसमेरे बुरे ते दुःख देनेबालो फोड़े निस्से।

3 ते दुइयोवें अपनो कटोरो समुन्दरे पुड़ उलटव, ते तै मुइदां केरे खूनेरो ज़ेरो बनो, ते समुन्दरेरे सारे जानदार मरे।

4 ते टलेइयोवं स्वर्गदूते अपनो कटोरो दरियान ते पैनेरे नागन पुड़ उलटव, ते सारू पानी खून बन्नु। 5 ते ज़ैस स्वर्गदूते पैनी पुड़ अधिकारे मीं तै परमेशरे सेइं इन ज़ोते शुनो कि,

“हे पवित्तर परमेशर, तू ज़ै आस, ते हमेशा करां थियो, तीं कां एन्चरे इन्साफ केरनेरू हक्के।

6 किजोकि तैनेई तेरे लोक ते तेरे नबी मारे ते तैन केरो खून बगोरो थियो,

एल्हेरेलेइ तीं हुना तैन खून पीने जो दित्तो।

इन इनामेरे रूपे मां तैन केरे लेइ ठीक आए।”

7 फिरी मीं बलिदान केरनेरी ठारी मरां ई आवाज़ शुनी कि,

“हाँ सर्वशक्तिमान प्रभु-परमेशर, तेरो इन्साफ सही ते कने सच्चो आए।”

8 ते च़ेवरोवें स्वर्गदूते अपनो कटोरो दिहाड़े पुड़ उलटव, ते दिहाड़े जादे गर्म भोनेरी अज़ाज़त दित्ती कि तैस सेइं लोक फुकोन। 9 ते लोक तैस बड़े सेके सेइं फुकोए, ते तैना लोक परमेशरेरी तुहीन केरने लाए, किजोकि तैए आए ज़ैस कां सैरी आफतन पुड़ अधिकारे। फिरी भी तैन लोकेई अपने पापन करां मन न फिराव, ते फिरी भी तैनेई परमेशरेरे महिमारे इकरार न कियो।

10 ते पंचोवें स्वर्गदूते अपनो कटोरो तैस हैवानेरे तखते पुड़ उलटव ते तैसेरे सारे राज्जे मां आंधरू भोवं। ते लोक दुखे सेइं मरे ते अपनि-अपनि जिभ चापने लाए। 11 ते अपने दुखे ते फोड़ां केरे वजाई सेइं स्वर्गेरे परमेशरेरी तुहीन की; ते अपने-अपने कम्मन करां मन न फिरव।

12 शेइयोवं स्वर्गदूते अपनो कटोरो बडे दरिया फराते पुड़ उलटव ते तैसेरू पानी शुक्की जेव एसेरो नितीजो ई भोव कि पूरबेरे राजे अपनि फौज घिन्तां पार जे। 13 एसेरां पत्ती मीं ट्लाई भूतां मैन्डू केरे रूपे मां लाए। अक अजगरेरे ऐशी मरां निस्सू, ते अक पेइले हैवानेरे ऐशी मरां निस्सू, ते अक दुइयोवं हैवानेरे ऐशी मरां निस्सू, ज़ै जो झूठो सन्देश ज़ोते। 14 इन भूतन कां चमत्कार केरनेरी काबलीत थी ते तैना दुनियारे सारे मुलखां केरे राज़ केरनेबालन अकोट्टे केरने च़ले ताके तैना परमेशरे सेइं लड़न, ई तै दिहाड़ी आए ज़ेइस परमेशर भूतन नाश केरेलो ते अपने लोकन मुक्ति देलो। 15-16 तैन भूतेई हकोमत केरनेबाले ते तैन केरि फौज एक्की ठैरी अकोट्टी की ज़ैस जो इब्रानी भाषाई मां हर-मगिदोन ज़ोतन। एल्हेरेलेइ यीशुए ज़ोरूए, “इस शुना। मेरू एजनु अचानक च़ोरेरू

जेरूए। धने तै मैन्हु ज़ैखन अवं एज्जी त तै बींझो रहते, ते अपने लिगइन तियार रखते। फिरी तै नग्गो न भोलो, ते फिरी तैस लोकन मां गाने सेइं शर्म न भोली।”

17 ते सतोवंग् स्वर्गदूते अपनो कटोरो हवाई पुड़ उलटव, ते मीं स्वर्गे मां मन्दरे मरां परमेशरे तखते पुड़ा ई बड़ी आवाज शुनी कि कोई ज़ोने लोरोए, “सब किछ् पूरू भोवं।” 18 फिरी बिजली, ते आवाज, ते गुड़ने लाव, ते अक एत्रो बड़ो भुंजल अव, कि ज़ेइसेरे मैन्हु इस धेरतली पुड़ पैदा भोरोरेन, तेइसेरो अज तगर एरो भुंजल कधी नई ओरो। 19 ते तैस महान बाबेल नगरेरे टलाई टुकड़े भोए, ते दुनियारे कौमां-कौमां केरे सारे नगर बर्बाद भोए। ताके परमेशर तै वादो पूरो केरे जै तैने बाबेल नगरेरे लोकन सज़ा देनेरे लेइ कियोरो थियो। ई सज़ा परमेशर पक्की देलो। परमेशर तैन टलिठी शराबी पियालो ज़ैस मां पानी न भोए मिलावरू ज़ेसेरो मतलब परमेशरे तैन सेइं बड़ो क्रोधे मां आए ते तैन पुड़ दया न केरेलो। 20 तैस वक्ते हर अक टैपू समुन्दरे मां डुबो; ते कोई भी पहाड़ न राज़। 21 ते अम्बरेरां मैनन् पुड़ मन-मन आण पेई, ते एल्हेरेलेइ कि ई आफत बड़ी भारी थी, लोकेई आनहरी आफतरे वजाई सेइं परमेशेरी तुहीन की।

17

?????? ? ? ? ? ? ?

1 ज़ैन सत स्वर्गदूतन कां तैना सत कटोरे थिये, तैन मरां एइतां एक्के मीं सेइं ज़ोवं, “इरां एई, अवं तीं तैस बड़े वेश्यारी सज़ा हिराताई, ज़ै बड़े पैन्न पुड़ विशोरीए। 2 ज़ैस सेइं धेरतलरे राजेई बदमाशी की, ते धेरतली पुड़ रानेबाले तैसेरे बदमैशरे शराबी सेइं मसत भोरे थिये।” 3 तैखन आत्मा अवं अपने कैबू मां कियो ते स्वर्गदूते अवं सुनसान ठैरी मांजो नेव। तैड़ी मीं अक कुआन्श हैवाने पुड़ सुवार लाई, ज़ेसेरी सत क्रोड़ी ते दश शिंगाँ थियां, तैसेरे जान परमेशेरी तुहीन केरनेरे नंव्वन सेइं ढकोरी थी। 4 तैस कुआन्शां बैगनी ते लाल लिगड़ां लोरो थियां, ते सोन्नेरे ते कीमती मेनी ते मोतन सेइं सज़ोरी थी, ते तैसेरे हथ्ये मां अक सोन्नेरो कटोरो शराबी सेइं भेरतां थियो, ज़ै भिट्टे कम्मन ते बदमैशरे कम्मन हिराते। 5 ते तैसेरे कुपाए पुड़ इन नवं लिखोरू थियूं, “भेद-बड़ो बाबेल धेरतलरी वेश्यां ते भिट्टी चीज़ां केरि अम्मा।” 6 ते मीं तै कुआन्श परमेशेरे लोकां केरो खून ते यीशुएरे गुवाहां केरो खून पीने सेइं मसत भोती लाई, ते अवं तैन लेइतां हैरान भोव।

7 तैने स्वर्गदूते मीं सेइं ज़ोवं; “तू किजो हैरान भोव? अवं तीं सेइं इस कुआन्शरो, ते तैस हैवानेरो भेद ज़ोताई, ज़ैस पुड़ तै सुवारे, ते ज़ेसेरी सत क्रोड़ी ते दश शिनगन। 8 ज़ै हैवान तीं लाव, ई पेइलो थियो, पन हुनी नई रानो, ते अथाह कुण्डेरां निसेलो ते परमेशर तैस पूरे तरीके सेइं नाश केरेलो, ते ज़ैना लोक इस दुनियाई मां जीने लोरेन ज़ैन केरां नंव्वां परमेशरे दुनिया बनाने करां पेइले ज़िन्दगरे किताबी मां नई लिखोरां, तैना इस हैवान हेरतां हैरान भोले, ई हैवान पेइलो जीतो थियो ते हुनी जीतो नई पन फिरी एज्जेलो। 9 इन समझनेरे लेइ ज़ानी मन ज़रूरीए, तैना सत पहाड़न, ज़ैन पुड़ तै कुआन्श राज़ केरतीए। 10 ते तैना सत राजे भी आन, पंच त मेरि जोरेन, ते अक हेजू ए; ते अक आखरी हेजू नई ओरो, पन ज़ैखन तै एज्जेलो त थोड़े चिरेरे लेइ राज़ केरेलो। 11 ते ज़ै हैवान पेइलो थियो, ते हुना नई, तै एप्पू अठोवं राज़ोए; ते तैन सत्तन मरां पैदा भोव, ते आखरी मां तैस राजे हमेशारी सज़ा मैलेली। 12 ते ज़ैना दश शिन्गाँ तीं पेइलां लां, तैना दश राजेन, ज़ैनेई हेजू तगर राज़ शुरू नई कियोरू। तैन दश राजेन हैवाने सेइं साथी राज़ केरनेरो अधिकार दित्तो जेव, पन तैन राज़ केरनेरे लेइ थोड़ो वक्त दित्तो। 13 इना सब अक मन भोले, ते तैना अपनि-अपनि शक्ति ते अधिकार तैस हैवान देले। 14 इना गबड़े सेइं लड़ेले, ते गबड़ू तैन पुड़ जीत हासिल केरेलू; किजोकि तै राज़ां केरो राज़ो ते प्रभुं केरो प्रभु आए। तैस पत्ती चलने बाले तैना आन ज़ैना परमेशरे कुजोरेन ते चुनोरेन, ते ज़ैना तैस सेइं साथी ईमानदार आन।”

15 फिरी तैने स्वर्गदूते मीं सेइं ज़ोवं, “कि ज़ैन पानी तीं पेइलू लोरो थियूं, ज़ैस पुड़ तै वेश्या बिशोरी थी, ए दुनियारे सारे कौमन हिराती, ज़ैना बड़े मुलखन मरां ते भाषान मरां आन। 16 तै वक्त एज्जेलो ज़ेइस हैवान दश राजेन सेइं ज़ैना तैस सेइं साथी आन, तैस वेश्याई सेइं बैर रखेले, तैना तैस पुड़ हमलो केरेले ते तैस नग्गी केरेले तैसेरू किछ् मास खाले, ते बाकी फुकेले। 17 किजोकि परमेशर तैन केरे मन्न मां इन छड़ेलो, कि तैना तैसेरी मर्जी पूरी केरेले; ते ज़ांतगर परमेशेरू वचन पूरू न भोए, तांतगर अक मन भोइतां अपनू राज़ हैवाने देन। 18 ते तै कुआन्श, ज़ै तीं लोरीए तैन बड़ू नगरे, ज़ैन धेरतलरे राजेन पुड़ राज़ केरते।”

18

११११११ १११११११ १११११११

1 इट्ठां पत्ती मीं अक स्वर्गदूत स्वर्गे मरां एइतो लाव । तैस कां बड़ो अधिकार थियो, ते एल्हेरेलेइ तैसेरे बड़े चमकने बाले महिमा सेइं सारी धरतली लौ बनी । 2 तैने ज़ोरे सेइं ज़ोवं, “कि डुल्ली बाबेल नगरी डुल्ली, ते भूतां केरे रानेरी ठार, ते हर एक्की भूतेरो अड्डो, ते हर एक्की दुष्ट ते भिट्टे च़ड़ोलोवेरो अड्डो बीती जेव ।

3 किजोकि तैसेरे बदमैशेरे शराबी सेइं सब कौमां मसत भोइ, ते धेरतलरे राजेई तैस सेइं बदमाशी की, ते धेरतलरे बुपारी तैसेरे एशेरे वजाई सेइं अमीर भोइ जे ।”

4 फिरी मीं स्वर्गेरां अक होरि आवाज़ शुनी, “हे मेरे लोकव तुस तैस मरां निस्सा ताके तुस तैसेरे पापन मां शामिल न भोथ, ते तैसेरी आफतन मरां कोई भी तुसन पुड़ न एज्जे ।

5 किजोकि तैसेरे पाप बड़े आन ज़ेन्चरे कि अगर ढेर लाव गाए त अम्बरे तगर पुजोरेन, ते परमेशेरे तैसेरी बुराई नई बिसरोरी ज़ै तैसां कियोरी आए ।

6 ज़ेन्चरे तैसां लोकन सेइं कियूं तेन्चरे तैस सेइं भी केरा ।

तैना दुःख ज़ैना तैसां लोकन दित्ते तैस दुगने देथ, तैसां लोक अपने बुरां कम्मां केरो स्वाद च़खनेरे लेइ प्रभावित किये, तै परमेशेरी दुगनी सरक मैसूस केरनेरे लेइ भी बनाई जेई ।

7 ज़ेतरी तैसां अपनि बड़याई की, ते एश किये, तेतरी तैस तकलीफ ते दुःख देथ, किजोकि तै अपने मने मां ज़ोतीए, अवं रानई, विधवा नई; अवं विधवारे दुखे मां कधे न गोइली ।

8 एल्हेरेलेइ तैसेरे घमण्डेरे वजाई सेइं तैस पुड़ अचानक आफतां एज्जेली ।

अचानक तैस पुड़ बिमारी, दुःख ते कने काल साथी एज्जेलो । ते तै अग्गी मां भस्म की गाली, किजोकि प्रभु-परमेशर शक्तिमाने ते तै तैस सज़ा देलो ।”

9 ते दुनियारे राजे ज़ैनेई तैस सेइं बदमाशी ते एश कियोरे थिये, ज़ैखन तैना तैसेरे फुकोनेरो तू लाएले त तैसेरेलेइ ढा छ़डेले, ते छ़ाती कुटेले । 10 ते तैना डरेले कि तैना भी तैसेरे सज़ाई मां टलेइयोनेन, ते दूर खड़े भोइतां ज़ोले, “हे महान नगरी, बाबेल! हे मज़बूत नगरी, हाय! हाय! एक्की सैइती मां तीं सज़ा मैल्ली ।”

11 “ते धेरतलरे बुपारी तैसेरेलेइ लेरां देले ते मिनत केरेले किजोकि हुनी कोई तैन सेइं लेन देन न केरेलो । 12 तैन केरू सामान बड़े किसमां केरू थियूं । सोन्नू चाँदी, जुवाहर, मोती । ते मलमल, बैजनी, रेशमी, ते लाल लिगड़ां थियां, ते कने किसमां-किसमां केरि खुशबूदार लकड़ी, ते हथीदंतेरी हर किसमेरी चीज़ां, ते कीमती लकड़ी, पितल, लूहाँ, संगमरमरेरे किसमां-किसमां केरि चीज़ां, 13 ते दालचीनी, मसाले, धूप, गन्धरस, लोबान, मदिरा, तेल, मैदो, गेहुं, बेछी-दांत, भैड्डां-छ़ेल्ली, घोड़े, रथ, गुलाम, ते कने मैन्हु केरे प्राण । 14 ते बुपारी तैस सेइं ज़ोले, ज़ैना चीज़ां तीं चैई तैना हुनी न रैली, ज़ैना खुशबूदार चीज़ां तीं पसंद की, तैना सैरी चीज़ां ज़ैना तीं अपनो जिसम खूबसूत बनानेरे लेइ इस्तेमाल की, तैना सैरी तीं गवेई ते हुनी तैना न मैल्लन । 15 इन चीज़न सेइं बुपारी ज़ैना तैसेरे वजाई सेइं अमीर भोरे थी, तैसेरे दुखेरे डरे सेइं दूर खड़े भोले, ते लेरां देइतां ते तड़फते ज़ोले,

16 ‘अफ़सोस! अफ़सोस! ई बड़ी नगरी ज़ै मलमल, बैगनी, लाल लिगड़ां लेइतां थी, ते सोन्नू, ते जुवाहर ते मोतन सेइं सज़ोरी थी,

17 एक्की सैइती मां तैसेरू एरू धन बरबाद भोवं, ते सब मांझी, ते मुसाफर, ते मल्लाह, ते ज़ेतरे समुन्दरे मरां कमाई कमातन तैना सारे दूर खड़े भोए ।”

18 ज़ैखन तैना तैस नेगरारे फुकोनेरो तू लाएले त ज़ोरे सेइं ज़ोले, इस महान नेगरारी ज़ेरि कोई नगरी नई । 19 ते अपने-अपने दोग्गे पुड़ धूड़ मलेले, ते लेरां देते ते कर लाते चिन्डां मैरतां ज़ोले,

“अफ़सोस! अफ़सोस! ई बड़ी नगरी ज़ैसेरी दौलती सेइं समुन्दरेरां सब ज़िहाज़न बाले धनी भोरे थी, एक्की सैइती मां उजड़े ।

20 तुस ज़ैना स्वर्गे मां रातथ, ते परमेशेरे लोकव,
ते प्रेरितव, ते कने नेबव, ज़ैन तैस सेइं भोवं तैसेरे वजाई सेइं खुश भोथ,
किजोकि परमेशेरे तैस नेगरारो इन्साफ कियोरो किजोकि तैसां तुसन सेइं बुरू कियोरू थियूं।”

21 फिरी एक्की ताकतबर स्वर्गदूते बड़े चेकारे पाटेरो ज़ेरो अक घोड़ छूवो, ते इन जोइतां समुन्द्रे मां शारो, कि बड़ी नगरी बाबेल एन्चरे बछोड़ी गाली, ते फिरी कधे तैसेरो पतो न मैलेलो। 22 ते सारंगी बजानेबाले, ते गीतां ज़ोनेबाले, ते बेइशोई बजानेबाले, ते नइशिनगों बजानेबालां केरि आवाज़ फिरी तीं मां कधी न शुनोली, ते फिरी केन्ची पेशेरो करीगिर तीं मां न मैलेलो; ते चक्की चलनेरी आवाज़ तीं कधे न शुनोली। 23 ते लोक दीयेरी लौ फिरी तीं मां न बालेले, ते लाड़ेरी ते लैडारी आवाज़ कधे तीं मां न शुनोली; किजोकि तेरे बुपारी धेरतली पुड़ प्रधान थिये, ते तेरे टूने सेइं सब कौमां टेपलोवरी थी। 24 परमेशर बाबेले सज़ा देलो किजोकि सारे नेबी ते परमेशेरे लोकां, ते धेरतली पुड़ सब मारोरां केरो खून तैस्से मांए।

19

1 ताकतबर स्वर्गदूतेरे जोइतां झाइनेरां बाद, मीं स्वर्गे मां बड़े लोकां केरि भीड़ उच्चे आवाज़ी मां इन जोते शुनी,
“हल्लिलूय्याह*! मुक्ति, महिमा, शक्ति इश्शे परमेशेरेरीए।

2 तैसेरी बडयाई भोए किजोकि तैसेरे सारे फैसले सही ते ठीक आन। तैने मशूर वेश्यारो इन्साफ कियो तैसां दुनियारे लोक पाप केरनेरे लेइ प्रभावित किये। परमेशर तैस बदलो देलो किजोकि तैसारे ज़िरिये परमेशेरे दास मारोरेन।”

3 फिरी दुइयोवं बार तैनेईं जोवं,
“हल्लिलूय्याह! ते तैसेरे फुकोनेरो तू सदा चलतो रालो।”

4 ते चोव्ही बुजुर्गेईं ते च़ेवरे प्रेणेईं परमेशेरे कां मथ्यो टेको; ज़ै तखते पुड़ बिशोरो थियो, ते जोवं, “आमीन! हल्लिलूय्याह!”

?????? ???? ?

5 ते तैखन मीं जोते शुनो, ते परमेशेरे तखते मरां अक आवाज़ आई, तैने जोवं,
“तुस इश्शे परमेशेरे दास आथ ज़ैना तैसेरी आदर केरतथ,
कुन निकड़े, कुन बड्डे, तुस सब तैसेरी तारीफ़ केरा।”

6 फिरी मीं बड़ी भीडारी, ते बड़े पैनेरी आवाज़ शुनी, ते गुड़नेरी ज़ेरि आवाज़ शुनी,
“हल्लिलूय्याह! कि प्रभु इश्शो परमेशर, सर्वशक्तिमान राज़ केरते।

7 एज्जा अस खुश ते मगन भोम, ते तैसेरी बडयाई केरम;
किजोकि गबड़ेरो ड्ला पुजोरोए, ते तैसेरे लैडं अपनो आप तियार केरोए।

8 ते तैस साफ ते चमकदार महीन मतलब मलमल लानेरो अधिकार दित्तो,
किजोकि तैस महीन मलमलेरो मतलब परमेशेरे लोकां केरां धर्मेरां कम्मन।

9 ते स्वर्गदूते मीं सेइं जोवं, “इन लिख, कि धन आन तैना, ज़ैना गबड़ेरे ड्लाएरे धामी मां कुजोरेन।” फिरी तैने मीं सेइं जोवं, “इना गल्लां ज़ैना परमेशेरे जोई सच्च आन।” 10 ज़ैखन मीं शुनू, अवं ज़ै मीं सेइं गल्लां लोरो थियो केरने तैसेरी आराधना केरनेरे लेइ तैस कां झुको तैने मीं सेइं जोवं, “मेरी आराधना न केर, तै परमेशेरे ज़ेसेरी आराधना कियोरी लोडे। अवं भी परमेशेरो दास आई, ज़ेन्चरे तू त तेरे विश्वासी साथी आन ज़ैना यीशुएरो अपने प्रभुएरे रूपे मां इकरार केरतन।” ई सच्च़ाई यीशुए बांदी कियोरी ज़ै लोकन शक्ति देती कि परमेशेरे वचनेरू एलान केरन।

?????? ???? ?

11 फिरी मीं स्वर्ग खुल्लू लाव; तैडी मेरे सामने छितो घोड़ो थियो; ते तैस पुड़ अक सुवार थियो, ज़ै वफादार, ते झूठ न जोए; ते ज़ैन परमेशेरेरी नज़री मां सही आए तैसेरे मुताबिक इन्साफ ते परमेशेरे दुश्मन्न सेइं लडाई केरते। 12 तैसेरे एछ्छी अगारे लपारी ज़ेरि थी, ते तैने बडं ताजां लोरो थियां; ते तैसेरू नवं तैस पुड़ लिखोरूए, तैसेरो मतलब सिर्फ़ तैए ज़ानतो थियो। 13 तैनी खूने मां डुबोरू लिगड लोरो थियूं, तैसेरू नवं परमेशेरेरू वचने।

* 19:1 19:1 हल्लिलूय्याह: परमेशेरेरी बडयाई भोए

14 ते स्वर्गेरी फौज छिते घोडन पुड सुवारे; ते तैना छिते ते साफ मलमल लेइतां तैस पत्ती पत्तीन । 15 ते कौमी-कौमी मारनेरे लेइ तैसेरे ऐशी मरां अक तिखी तलवार निसतीए, ते तै लोहेरे सोटे सेइं तैन पुड राज करेलो, ते तै सर्वशक्तिमान परमेशेरे बडे प्रकोपेरी खालिस शराबी सेइं दाछ्छ् दलेन्नेलो । 16 ते तैसेरां लिगडन ते जंघी पुड इन नवं लिखोरूए, “राजां केरो राजो ते प्रभुं केरो प्रभु ।”

17 फिरी मीं अक स्वर्गदूत दिहाडे पुड खडो लाव, ते तैने बेडि आवाजी सेइं अम्बरे मां उडने बाले चडोलन सेइं ज़ोवं, “एज्जा परमेशेरे बडे धामी मां शामिल भोनेरे लेइ अकोट्टे भोथ । 18 जैस सेइं तुस राजां, प्रधानां, ताकतबर लोकां, घोडां ते कने तैन केरे सवारां, आज्ञादां, गुलामां, निकडे, बडे, सेब्भी लोकां केरू मास खाथ ।”

19 फिरी मीं हैवान लाव जै समुन्दरे मरां ओरो थियो, ते धेरतलरे राजे ते कने तैन केरि फौज तैस घोडेरे सुवार ते तैसेरी फौजी सेइं लडनेरे लेइ अकोट्टी लाई । 20 ते तै पेडलो हैवान ते तैस सेइं साथी तै झूठो नबी ट्लाव, जैने तैसेरे सामने एरे निशान हिरावरो थियो, जेसेरे ज़िरिये तैने तैना सारे लोक टपलाए, जैनेई तैस हैवानेरी छाप नेवरी थी, ते जैना तैसेरी मूतरी पूजा करते थिये, इन दुइये जीते तैस अगारे झीली मां छडे जे, जै गन्धके सेइं बलतीए । 21 ते बाकी लोक तैस घोडेरे सवारेरी तलवारी सेइं जै तैसेरे ऐशी मरां निस्सती थी मारे जे; ते चुडोलू तैसेरे मासे सेइं रेज्जी जेआं ।

20

1000 [REDACTED] [REDACTED] [REDACTED]

1 फिरी मीं अक स्वर्गदूत स्वर्गेरां एडतो लाव; जेसेरे हथ्ये मां अथाह कुण्डेरी चाबी ते कने अक बडडी शंगल थी । 2 तैने तै अजगर ट्लाव जै बडे पेडले सप्पेरे रूपे मां लेइहोरो थियो जेसेरू नवं शैतान भी आए । तैने तै टलेइतां हजार सालेरे लेइ बन्धो । 3 ते तै अथाह कुण्डे मां शैरतां बन्द कियो ते तैस पुड मोहर लई; कि तै हजार साल पूरे भोने तगर कौमां-कौमां केरे लोकन फिरी न भटकाए; इसेरां पत्ती ज़रूरे, कि थोडे चिरेरे लेइ खोल्लो गाए ।

4 फिरी मीं किछ् तखत लाए ते जैना लोक तैन पुड बिशोरे थिये ते तैन राज करनेरो अधिकार दित्तो; ते तैन केरि आत्मा भी लेई, जैन केरि कुरोडी एल्हेरेलेइ केटोरी थी कि तैना यीशु मसीह अपनो प्रभु मन्तन ते परमेशेरे वचने पुड विश्वास करतन, ते जैनेई तैस हैवानेरी, ते तैसेरे मूरतरी पूजा न थी कियोरी, ते तैसेरी महोर अपने कुपाए ते हथ्यन पुड न थी । तैना जीते भोइतां मसीह सेइं साथी हजार सालन तगर राज करेले । 5-6 इना लोक पेडले आन जैना जीते किये गाले ते तैना धन ते पवित्र आन । दुइयोवं मौतरी तैन पुड कोई शक्ति न भोली । तैना परमेशेरे लेइ याजक भोले ते मसीह तैन सेइं साथी हजार साल राज करेलो, जांतगर तैना हजार साल पूरे न भोन तांतगर होरे मरें लोक जीते न किये गाले ।

[REDACTED] [REDACTED] [REDACTED]

7 जैखन हजार साल खतम भोनेबाले भोले त स्वर्गदूत शैताने तैस ठैरारा हथरां छडेलो जैडी तै बन्धोरो थियो । 8 ते तैन कौमन जैना सैरी दुनियाई मां आन धोखो देनेरे लेइ निस्सेलो । तैन कौमन जो गोग ते मागोग ज़ोतन । शैतान तैन तैस ठैरी आनेलो जैडी तै तैन सेइं लडेलो । तैन केरि गिनती समुन्दरेरे रेती बराबर भोली । 9 शैतानेरी फौज सारे दुनियाई मां गाली, तैना तैस नगरे घेरेले जैस सेइं परमेश प्यार करते ते जैडी तैसेरे लोक रहतन, परमेशेरे तरफां स्वर्गेरां अग तैन सेब्भन भस्म करेली । 10 ते तैन केरो गुमरा करनेबालो शैतान अग ते गन्धकेरे समुन्दरे मां शारो गालो, जैस मां तै हैवान ते कने झूठो नबी भी भोलो, तैना रात दिहाडी हमेशा दुखे मां राले ।

[REDACTED] [REDACTED] [REDACTED] [REDACTED] [REDACTED]

11 फिरी मीं अक बडडो छितो तखत ते जै तैस पुड बिशोरो थियो लाव, जेसेरे सामनेरां धरती ते अम्बर नशू, ते तैन केरे लेइ ठार न मैल्ली । 12 फिरी मीं निकडे बडे जैना मरें थिये तखतेरे सामने खडे लाए, ते किताबां खोल्ली जेई; ते फिरी अक होरि किताब खोल्ली; मतलब ज़िन्दगरी किताब खोल्ली; ते जेन्चरे तैन किताबन मां लिखोरू थियूं, तैन केरे कम्मां केरे मुताबिक मुडदां केरो इन्साफ कियो । 13 ते समुन्दरे तैना मरें मैन्हु दित्ते जैना तैस मां थी, ते मौतां ते पाताले जैना तैस मां मरें थिये दित्ते; ते तैन मरां हर एक्केरो तैन केरे कम्मां केरे मुताबिक इन्साफ कियो । 14 ते मौत ते पाताल भी अगारे समुन्दरे मां शारू, ई अगारो समुन्दरे त दुइयोवं मौते । 15 ते जेसेरू भी नवं ज़िन्दगरे किताबी मां लिखोरू न मैल्लू, तै अगारे समुन्दरे मां शारो जेव ।

21

११११११ ११११११ ११ १११ ११११११ १११११

१ फिरी मीं नंवू अम्बर ते नंवी धेरतली लाई, किजोकि पेडलू अम्बर, ते पेडली धेरतली न थी रावरी, ते समुन्दर भी न राव। २ फिरी मीं पवित्तर नगर नंवू यरूशलेम स्वर्गोरां परमेशे करां एंडतू लाव, ते तैन तैस लैडारू जेरू थियूं, जै अपने लाडरे लेइ तियार भोरी भोए। ३ फिरी मीं परमेशेरे तखते मरां कोई उच्ची आवाजी सेइ इन ज़ोते शुनो, “अजेरां बाद परमेशर मैनन् सेइ साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले। ४ ते तै तैन लोकां केरे एछ्छी केरां सब ऐंखरू पुछ्छेलो; ते तैट्टां पत्ती मौत न राली, ते न दुःख, न मातम, न मुसीबत राली; पेडली गल्लां बीती जेई।”

५ जै तखते पुड बिशोरो थियो तैने ज़ोवं, “कि तक, अवं सब किछ्छ नंवू केरताई।” फिरी तैने ज़ोवं, “कि लिख, किजोकि इना वचन विश्वासेरे काबल ते सच्च्चे आन।” ६ फिरी तैने मीं सेइ ज़ोवं, “सब किछ्छ पूरू भोवं, अवं अलफा ते ओमेगा, पेडलो ते आखरी आई, अवं टलिशोरे ज़िन्दगरे पैनेरे नागन मरां मुखत देडलो। ७ जै ज़ीत हासिल केरे, तैए इन चीजां केरो बारस भोलो; ते अवं तैसेरो परमेशर भोलो, ते तैन मेरू मट्टू भोलू। ८ पन डरपोक, विश्वास न केरनेबाले, भिटे, खूनी, बदमाशी केरनेबाले, जैदू केरने बाले, मूरती केरि पूजा केरनेबाले ते सब झूटां केरो हिस्सो तैस समुन्दरे मां मैलेलो जै अग्गी ते गन्धकी सेइ बलतो रहते, ई दुइयोवं मौते।”

११११११ ११११११११

९ फिरी तैन सत स्वर्गदूतेई जैनेई सत आखरी आफतन सेइ भरोरे कटोरे मैनन् पुड उलटावरे थिये, तैन मरां एक्के मीं कां एइतां ज़ोवं, “इरां एई, तीं अवं लैडे जै जल्दी गबडे सेइ इला बनाली हिराताई।” १० परमेशेरे आत्मा अवं अपने कैबू मां कियो ते स्वर्गदूते अवं एक्की बड्डे ते उच्चे पहाडे पुड नेव, ते पवित्तर नगर यरूशलेम स्वर्गोरां मरां परमेशे करां एइतो हिरव। ११ परमेशेरी महिमा तैस मां थी, ते तैसेरी लौ बडे कीमती घोडां, मतलब बिल्लौरे जेरे यशबे बराबर साफ थी। १२ तैस नगरेरे च़ेवरे पासन बडी उच्ची दिवार थी, ते तैसेरां १२ दारां ते दारन पुड १२ स्वर्गदूत थिये; ते तैन पुड इस्राएली केरे १२ गोत्रां केरां नंवां लिखोरां थियां। १३ पूर्वेरे पासे टलाई दारां, उत्तरेरे पासे टलाई दारां, दखिनेरे पासे टलाई दारां, ते पश्चिमेरे पासे टलाई दारां थियां। १४ ते नगरेरे दिवारारी १२ मुनीयादां थी, ते तैन पुड गबडेरे १२ परेरितां केरां १२ नंवां लिखोरां थियां। १५ ते जै मीं सेइ गल्लां केरतो थियो, तैस कां नगर, ते तैसेरे दारन ते तैसेरे दिवारन नापनेरे लेइ अक सोन्नेरो गज्ज थियो। १६ ते तैस नगरेरे च़ेवर पासे थिये, ते तैसेरी लमबाई चोडाइअरे बराबर थी, ते तैने तैस गजे सेइ नगर नापू, त सडे ७५० कोस निस्सी, ते तैसेरी लमबाई, ते चौडाई, ते ऊँचाई बराबर थी। १७ तैसेरां बाद स्वर्गदूते दिवारारी ऊँचाई नापी। तैने एन्च़ेरे नापी ज़ेन्च़ेरे मैन्हु चीजां नापतन, तै दिवार ६६ मीटर उच्ची निस्सी। १८ ते तै दिवार कीमती घोडन सेइ बनोरी थी ज़ैस जो यशब ज़ोतन, नगर खालिस सोन्ने सेइ बनोरू थियूं, ज़ैन साफ चमकते शीशेरू जेरू भोए। १९ ते तैस नगरेरी मुनीयादारे घोड हर किसमेरी कीमती घोडन सेइ सज़ावरी थी, पेडली मुनीयाद यशबेरी दुइयोवं नीलमणेरी टलेइयोवं लालडी, च़ेवरोवं मरकते, २० पंच़ोवं गोदेक, शेइयोवं माणिक्ये, सतोवं पीतमणि, अठोवं पेरोजे, नावोवं पुखराजे, दशोवं लहसनिए, यारोवं धूम्रकान्त, बारोवं याकूतेरी थी। २१ ते १२ दारां, १२ मोती केरां थियां, अक-अक दार, एक्की-एक्की मोती सेइ बनोरू थियूं, ते नगरेरी सडक साफ शीशेरी ज़ेरि खालिस सोन्नेरी थी।

२२ मीं कोई मन्दर न लाव, किजोकि सर्वशक्तिमान प्रभु-परमेशर, ते गबडू तैडी नगरे मां आए। एल्हेरेलेइ मन्देरेरी कोई ज़रूरत नई। २३ ते तैस नगर मां दिहाडो ते च़ैदनेरे लोअरी ज़रूरत नई, किजोकि परमेशेरे महिमा सेइ तैस मां लौ भोइ रावरीए, ते कने गबडू तैसेरो दीयोए। २४ ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले। २५ तैस नगरेरां दारां सारे दिहैडी खुल्लां भोलो ते कधी बंद न भोलां। किजोकि तैडी कोई रात न भोली। २६ दुनियारे लोक दुनियारे कौमां केरि सैरी खूबसूत चीजां ते धन दौलत तैस नगरे मां आनेले। २७ ते तैस मां कोई भिट्टी चीज या गन्दु कम केरनेबालो या झूठ बनानेबालो, केन्ची भी तरीके सेइ अन्तर न गालो; पन सिर्फ तैना लोक ज़ैन केरां नंवां गबडेरे ज़िन्दगरे किताबी मां लिखोरां भोलां।

22

1 फिरी तैने मीं बिल्लौरेरे ज़ेरो अक चमकतो ज़िन्दगरे पैनेरो दरिया हिराव, ज़ै परमेशेरे ते गबडेरे तखते करां निस्तां तैस नगरेरी सङकी तगर मझामेई निसतो थियो। 2 ते दरियारे इस पासे ते उस पासे, ज़िन्दगरो बुट थियो, तैस मां 12 किसमां केरे फल लगते थिये, ते तै हर महीने फलतो थियो; ते तैस बुटेरे पट्लान सेइं कौमां-कौमां केरे लोक बेज्झोते थी। 3 फिरी तैडी लानत न भोली ते परमेशर ते गबडेरो तखत तैस नगर मां भोलो, ते तैसेरे दास तैसेरी सेवा केरेले। 4 ते तैना परमेशेरे आमने सामने लाएले, ते परमेशेरू नवं तैन केरे कुपाए पुड लिखेरू भोलू। 5 ते फिरी रात न भोली, ते तैन दीयो ते दिहाडेरी ज़रूरत न भोली, किजोकि प्रभु-परमेशर तैन लौ देलो, ते तैना हमेशा राज केरेले।

¶¶¶¶¶¶¶¶ ¶¶¶¶¶¶¶¶ ¶¶¶¶¶

6 फिरी स्वर्गदूते मीं सेइं ज़ोवं, “इना गल्लां विश्वासेरे काबल ते सच्चीन, ते प्रभु ज़ै नेबी केरे आत्मा केरो परमेशेरे, तैने अपने स्वर्गदूत एल्हेरेलेइ भेजे, कि अपने दासन तैना गल्लां ज़ैन केरू जल्दी भोनू ज़रूरीए हिराए।”

7 “हेर, अवं जल्दी एजने बालोई, परमेशर तैन सेभन बरकत देते ज़ैना इस किताबरे सन्देशे पुड ध्यान देतन।”

8 अवं तैए यूहन्ना आई, ज़ै इना गल्लां शुन्तो, ते लहतो थियो, ते ज़ैखन मीं शुनु, ते लाऊं, त ज़ै स्वर्गदूत मीं इना गल्लां हिरातो थियो, अवं तैस कां मथ्यो टेकने लाव। 9 ते तैने मीं सेइं ज़ोवं, “हेर, एरू न केर; किजोकि अवं तेरो, ते तेरे विश्वासी सैथी नेबी ते इस किताबरी गल्लां केरे मन्ने बालां केरो संगी दासाई; परमेशेरे कां मथ्यो टेक।”

10 फिरी तैने मीं सेइं ज़ोवं, “इस किताबरे भविष्यवैनरे गल्लन केरो भेद छुपेइतां न रख, किजोकि वक्त नेडोए।

11 ज़ै बुरू केरते, तै बुरू केरतो राए; ते ज़ै भिट्टो, तै भिट्टो बनोरो राए; ते ज़ै धर्मी, तै धर्मी बनोरो राए; ते ज़ै पवित्रे तै पवित्र बनोरो राए।”

¶¶¶¶¶ ¶¶¶¶¶¶¶¶¶¶ ¶¶¶¶¶¶¶¶¶¶¶¶¶¶ ¶¶¶¶¶¶¶¶¶

12 फिरी प्रभु यीशुए ज़ोवं, “अवं जल्दी एज्जेलो। अवं एज्जी रावरोई ज़ैन लोकेई कियूं तैसेरे मुताबिक इनाम देनेरे लेइ या सजा देनेरे लेइ। 13 अवं अलफा ते ओमेगाई, पेइलो ते आखरी, शुरुआत ते अन्त आई।”

14 धने तै, ज़ै अपना लिगडा धोते, किजोकि तैस ज़िन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर मां दाखल भोलो। 15 पन कुतरां, जैदू केरनेबाले, बदमाशी केरनेबाले, खून केरनेबाले, मूरती केरि पूजा केरनेबाले, हर कोई झूठेरो चाने बालो, ते कने झूठ बनानेबालो बेइर राले।

16 “मीं यीशुए अपने स्वर्गदूत एल्हेरेलेइ भेजो, कि तुसन अगर कलीसिया मां इन गल्लां केरे बारे मां गवाही दे, अवं दाऊदेरू ज़ील, वंश, ते झेझरो चमकतो तारोई।”

17 परमेशेरेरी आत्मा ते गबडेरी लाडी यीशु सेइं ज़ोतिन, “तू ज़रूर एई!” ते शुने बाले भी ज़ोन, “एई!” ज़ै टलिशोरो भोए, तै एज्जे ते ज़ै कोई चाए पानी ने ज़ैन मुफ्ते मां ज़िन्दगी देते।

¶¶¶¶¶¶¶¶ ¶¶¶¶¶¶¶¶

18 अवं हेर एक्की ज़ै इस किताबरी भविष्यवैनरी गल्लां शुनते गवाही देताई, कि अगर कोई मैन्हू इन गल्लन मरां किछ बधाए, त परमेशर तैना आफतन ज़ैना इस किताबी मां लिखोरिन, तैस देलो। 19 ते अगर कोई इस भविष्यवैनरी किताबरी किछ गल्लां कढे, त परमेशर तैस ज़िन्दगरे बुटे ते पवित्र नगर मरां जेसेरे बारे मां इस किताबी मांए, तैसेरो हिस्सो कढेलो।

20 ज़ै इन गल्लां केरि गवाही देते, तै इन ज़ोते, “हाँ अवं जल्दी एजने बालोई।” आमीन। हे प्रभु यीशु एई!

21 प्रभु यीशुएरो अनुग्रह परमेशेरे लोकन सेइं साथी राए। आमीन।